


Tũpa Ñehengagüer



New Testament in Guarayu (BL:gyr:Guarayu)

Tũpa Ñehengagüer

New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files dated 29 Jan 2022
c27c2d97-c359-59f5-b367-83efb2e33739

Contents

SAN MATEO	1
SAN MARCOS	45
SAN LUCAS	72
SAN JUAN	120
LOS HECHOS	154
ROMANOS	197
1 CORINTIOS	215
2 CORINTIOS	234
GALATAS	246
EFESIOS	253
FILIPENSES	259
COLOSENSES	264
1 TESALONICENSES	268
2 TESALONICENSES	272
1 TIMOTEO	274
2 TIMOTEO	279
TITO	283
FILEMÓN	286
HEBREOS	287
SANTIAGO	301
1 SAN PEDRO	306
2 SAN PEDRO	311
1 SAN JUAN	314
2 SAN JUAN	319
3 SAN JUAN	320
SAN JUDAS	321
APOCALIPSIS	323

MATEO REMBICUACHIA JESUS RECOUER RESENDAR SAN MATEO

Ava eta oyesu vahe Jesucristo yesu renondeve

¹ Co yipindar Jesucristo renondeve yuvirecoi vahe aracahe Abraham suindar, mborerecuar guasu David suindar avei:

² Abraham rahir Isaac, Isaac rahir evocoiyase Jacob, ipare Jacob rahir ahe Judá ambuae tiquehir, tivireta reseve.

³ Judá rahir yuvirecoi Fares iyavei Zara (ahe ichi rer Tamar). Fares rahir Esrom, Esrom rahir evocoiyase Aram.

⁴ Aram rahir Aminadab, Aminadab rahir Naasón, Naasón rahir evocoiyase Salmón,

⁵ Salmón rahir Booz (ahe ichi rer Rahab). Booz rahir Obed (ahe ichi rer Rut), Obed rahir Isaí,

⁶ Isaí rahir mborerecuar guasu David, David rahir evocoiyase Salomón, Urías rembirecuoer pipe oyesu vahe.

⁷ Salomón rahir Roboam, Roboam rahir Abías, Abías rahir Asa.

⁸ Asa rahir Josafat, Josafat rahir Joram, Joram rahir evocoiyase Uzías.

⁹ Uzías rahir Jotam, Jotam rahir Acáz, Acáz rahir ahe Ezequías.

¹⁰ Ezequías rahir Manasés, Manasés rahir Amón, Amón rahir evocoiyase Josías.

¹¹ Josías rahir Jeconías tivireta reseve, Babilonia ve mbiguai yuvirecoi vahecuer.

¹² Mbiguai yuvirecoire Jeconías omboyesu Salatiel, Salatiel rahir ahe Zorobabel.

¹³ Zorobabel rahir Abiud, Abiud rahir ahe Eliaquim, Eliaquim rahir evocoiyase Azor.

¹⁴ Azor rahir Sadoc, Sadoc rahir ahe Aquim, Aquim rahir evocoiyase Eliud.

¹⁵ Eliud rahir Eleazar, Eleazar rahir ahe Matán, Matán rahir evocoiyase Jacob.

¹⁶ Jacob rahir José, María mer, María evocoiyase Jesús si secoi. Ahe imembrí Tüpa Rembiporavo Poropísirosar.

¹⁷ Evocoiyase Abraham yesusa sui tupri oyepota oso David yesusa rupive. Ahe catorce yesu yoapi agüer. David reco agüer sui oyepota oso ava mbiguai sereco agüer pipe Babilonia ve; ahe omomba avei catorce yesu yoapi agüer. Mbiguai ava serecosa sui oyepota araviter Poropísirosar haragüer rupi, ahe omomba iri avei ambuae catorce yesu yoapi agüer.

Jesucristo yesu agüer

¹⁸ Na ehi Jesucristo oyesu aracahe. María, ichi, ahe omenda pota vahe José rese. Oyesu yuvirecoiêhi viteseve rumo, Espíritu Santo pĩratasa pipe imembrí.

¹⁹ Evocoiyase José, imeví, ahe ava seco tupri vahe. “Tapoiño ayase ava icuaêhisa pipe che remimbotar rupi ichui” ehi chupe viña ‘co rupi tarecomegua eme co cuñatai rer aviye vahe’ ohesa pipe.

²⁰ Aipo opihãñemoñeta reseve oque. Iquerve rumo, Tüpa rembiguai oyemboyecua chupe aipo ehi: “José, David suindar, eresiquiyei rene María rese nde menda água. Esepia, Espíritu Santo sui ou imembrã.

²¹ María virecose omembrí, pemondora sererguã Jesús. Esepia, ahe oipísirora omu judío eta yangaipa sui” ehi.

²² Co rupi opa yaviye yande Yar remimombehugüer aipo ehi vahecuer iñehe mombehusar aracahe:

²³ “Cuña ndaseco marai vahe imembrã.

Ahe imembrí rer-ra Emanuel” ehi

(‘Tüpa yande rese ité secoi’ oya aipo ehi).

²⁴ Omahese José, Tüpa rembiguai oyeupe ñehe agüer omboyeroya ité. Ichui omenda María rese cute.

²⁵ Ndoyapo vitei eté rumo mbahe oyesu yuvireco. Yipindar imembrã rane ité, ahese José omondo Jesús sererguã.

2

Ava yasitata rese oyembohe vahe ari sêsa cotindar yuviraso pĩtani repia

¹ Herodes mborerecuar guasu recose, Jesús oha Judea ivi rupi tecua Belén ve. Coiye yugüeru ava yasitata rese oyembohe vahe ari sêsa coti sui Jerusalén ve.

² Ahe oporandu Herodes upe yuvireco aipo ehi:

—¿Que vo aipo oha judío rerecuar guasu? Esepia niha, caharu coti yasitata orosepia. Sese oroyu ari sêsa coti sui imboetel água —ehi yuvireco chupe.

³ Aipo ihese, mborerecuar Herodes oyembosiquiye tēi, ava Jerusalén pendar avei ěgüe ehi pāve yuvireco.

⁴ Iyavei cūrteimi opa omonuha uca pahi rerecuareta, Moisés porocuaita rese oporombohe vahe avei. Ipare oporandu chupe:

—¿Que vo aipo ohara Poropīsiosar? —ehi.

⁵ Ahe omboyevi yuvireco chupe:

—Ahe ohara Judea rupi Belén ve —ehi—. Esepia, Tūpa ñehe mombehúsar Miqueas rembicuachiagüer pīpe aipo ehi:

⁶ ‘Pe, tecua mini Belén pīpendar, ndahei ivi coti tēi vahe ambuae tecua Judá pīpendar sui peico.

Esepia, pe sui osēra mborerecuar che recua iguar Israel yocuai āgua’ ehi —ehi yuvireco Herodes upe.

⁷ Aipo hese, Herodes oñehe ñemi ava yasitata rese oyembohe vahe upe ‘toicua eme ava yuvireco’ oyapave oporandu: “¿Mbahe yasi pīpe ité vo pesepia ramo aipo yasitata?” ehi.

⁸ Oyeupe mombehu pare, omondopa Belén ve aipo ehi chupe:

—Peso evocoyase, peseca pītani. Acoi peyosuse, co rupi avei peyevi cheu icua uca āgua. Che avei evocoyase tasomi imboetei —ehi angahu chupe.

⁹ Aipo oyeupe he pare, yasitata rese oyembohe vahe osiriño voi yuviraso. Ahe pīpeve yasitata oyemboyecua iri senonera. Ichui pītani recosa rese tupri tecua Belén ve opita yasitata.

¹⁰ Sepiase, ovihareté yuvireco.

¹¹ Ipare yuviroique oi pīpe, osepia pītani ichi María reseve yuvireco. Ichui oñenopiha sovai imboeteisa pīpe. Ipare opōhe ombahe rīru pīpe yuvireco oicuvāhe vaherā oporerecosa sepīrusu vahe oro, itaisi, ambuae mbahe śīcua vahe mirra serer vahe avei.

¹² Yuviroyevise güecuave yuviraso, ndoyuviroyevi iri Jerusalén rupi mborerecuar Herodes upe imombehu. Esepia, Tūpa aipo omombehu iquerve chupe ambuae peri rupi iyevi āgua.

Jesús pītani seroñemisa Egipto ve

¹³ Aipo ava yepēpi pare, José upe oyemboyecua Tūpa rembiguai iquerve, aipo ehi chupe: “Eñarapuha, eroñemi pītani ichi reseve eraso Egipto ve. Aheve erepītara acoi che amombehuse voi nde yevi āgua. Esepia, mborerecuar Herodes osecura pītani yuca āgua oico” ehi chupe.

¹⁴ Ahe pītu pipeve voi José viraso pītani ichi reseve Egipto ve.

¹⁵ Aheve yuvirecoi co mborerecuar Herodes mano rāro. Co rupi imboavīyesa Tūpa ñehe mombehúsar remimombehügüer: “Egipto sui anose che Rahīr” ehi vahe.

Herodes oyuca uca chīhivahe eta

¹⁶ Mborerecuar Herodes rumo oñemoiró iteanga yasitata rese oyembohe vahe ombopa tēisa rese. Sese, “Toyuviraso sundao tecua Belén ve, toyucapa chīhivahe cuimbahemi yuvireco opacatu ñuvirío araviter ovireco vahe, chīhivahemi catu vahe avei, ahe tecua ivirindar pīpe avei no” ehi. Esepia, omoñetase yasitata rese oyembohe vahe yuvireco, oicua ahe araviter opa cūrtei.

¹⁷ Ęgüe ehi yaviye Tūpa ñehe mombehúsar Jeremías remimombehügüer aipo ehi vahe:

¹⁸ “Oyeendu ava Ramá ve.

Ahe Raquel oyaseho ité omembireta manose; ndoyembovīha catui eté ipīpe” ehi.

¹⁹ Mborerecuar Herodes manore, Egipto ve José upe oñehe iri Tūpa rembiguai iquerve aipo ehi:

²⁰ “Eñarapuha, eroyevi pītani ichi reseve Israel recuave. Esepia, opa omano pītani yuca potasar yuvireco” ehi.

²¹ Aipo oyeupe hese, oñarapuha, viroyevi pītani ichi reseve Israel recuave.

²²⁻²³ Peri rupi oyanduse rumo Arquelao vu recoyar mborerecuar chinise, ahese oyembosiquiye aheve oso āgua. Coiyemi tēi iquerve Tūpa, “Peso Galilea ivi rese” ehi chupe. Ichui yuviraso tecua Nazaret ve. Aheve opita yuvireco cute. Ęgüe ehi yaviye Tūpa ñehe mombehúsar remimombehügüer: “‘Nazaret pendar’ ehira serecosa” ehi vahe.

3

Juan Oporoāpiramo vahe ivi iporupirēhisa rupi secoi

¹ Ipare Juan Oporoāpiramo vahe Tūpa recocuer rese oñehe oico Judea ivi rupi ava yemboerecuahisave

² aipo ehi: “¡Pemboasi pe angaipa; peyevi Tüpa upe! Esepia, co Tüpa mborerecuasa cõimi secoi yandeu” ehi.

³ Co Juan rese niha oñehe yipive Tüpa ñehe mombehugar Isaiás aipo ehi güembicuachiagüer pipe:

“Oyeendu ñehesa ava yemboerecuaëhisave:

‘Pemoingatu yande Yar raperã; pemohivi tupri avei’ ehi” ehi aracahe.

⁴ Juan turucuar ahese camello ragüer apopri, sumbicuasa mbahe pিরer, sembihu evo-coiyase tucru, eiri caha pipendar avei.

⁵ Opacatu ava Jerusalén pendar, Judea rupindar tecua, iai Jordán rerovica pendar avei yuviraso ñehe rendu

⁶ oangaipagüer mombehu água. Ahese Juan oñapiramo iai Jordán pipe.

⁷ Yugüeru atise rumo fariseo iyavei saduceo oñeapiramo uca água, Juan aipo ehi ahe ava upe: “¡Pe mboi mboetasa tõi peico! ¿Iva vo, ‘Pesëra Tüpa ñemoirosa ou vaheã sui’ ehi tupri tõi pëu?”

⁸ Yipindar toyecua tupri rane Tüpa upe pe yevisa pe angaipa mboasisa pipe.

⁹ Iyavei ndapeyeroyai chira ‘ore Abraham suindar oroico’ pe hesa rese tõi pe ñepisiro água. Esepia, Tüpa oicatuño ité co ita sui Abraham suindar nungar tupri apo água oyeupe nara yepi.

¹⁰ Hacha niha imoingatusa voi eté opacatu ivira ndihai vahe sapo rupi yasia água. Ichui yasia pare imondosa tatave.

¹¹ Che i pipe tõi opoãpiramo Tüpa upe pe yevis água. Oura rumo ambuae che raquicuei, ahe pe ãpiramora Espiritu Santo tata nungar pipe. Ahe seco pĩrata catu vahe secoi che sui. Sese cheu ndiyai eté ahe ipitaquisã yora água ichui.

¹² Ahe oipehara mbahe rãhi ihigüer sui. Sãhi evocoyase oyapocatura, ihigüer rumo omondora tata apirëhi vahesave” ehi.

Jesús ãpiramosa

¹³ Ipare Jesús oso Galilea sui iai Jordán ve Juan recosave ‘tache ãpiramo’ oya.

¹⁴ Yipindar rumo Juan ndoipotai eté, aipo ehiño chupe:

—Nde rumo iya ité che ãpiramora eve viña, ¿nde rumo ereyu che nde ãpiramo água? —ehi.

¹⁵ —Ëgüe tehiño aipo. Iyacatu yayapora Tüpa porocuaita —ehi Juan upe.

Evocoyase Juan, “Aviye” ehi chupe.

¹⁶ Oãpiramo pare, osë ive sui. Ahe pipeve voi iva oyemboi tupri, aheseve avei osepia Tüpa Espiritu ogüeyise ou iharive apicasu nungar.

¹⁷ Iyavei oyeendu ñehesa iya suindar aipo ehi vahe: “Co che Rahir, che rembiaisu. Sese aviharete vichico” ehi.

4

Jesús recoãhasa

¹ Ipare Tüpa Espiritu viraso Jesús ava yemboerecuaëhisave ‘tosecoãha Carugar’ ohesa pipe.

² Aheve cuarenta ari, cuarenta pĩtu ndocarui. Sese ndasiepoi eté oico.

³ Evocoyase oyemboya Carugar sese secoãha água, aipo ehi chupe:

—Tüpa Rahir ité nde recose, co ita sui eyapo pan cũritei —ehi.

⁴ Jesús rumo omboyevi chupe:

—Icuachiapri pipe rumo aipo ehi:

‘Ndahei chira pan sui güeraño ava yuvirecove.

Ëgüe ehi rumo opacatu Tüpa Ñehengagüer reroya pipe ava yuvirecovera yepi’ ehi —ehiño chupe.

⁵ Ichui Carugar viraso Jesús Jerusalén maranehi pipendar tüparo torre apĩterve.

⁶ Aheve aipo ehi chupe:

—Tüpa Rahir ité nde recose, eviapi cohave sui. Esepia niha, icuachiapri pipe:

‘Tüpa oyocuaira güembiguai eta nde rãro água.

Ahe nde mopuhara yuvireco que ñepe ita nde momara rãgüer sui’ ehi —ehi Carugar chupe.

⁷ Evocoyase omboyevi Carugar upe:

—Icuachiapri pipe rumo aipo ehi avei no: ‘Nderesecoãhai chira nde Yar Tüpa’ ehi —ehi chupe.

⁸ Ipare Carugar viraso iri ivitri ivate vahe apĩterve secoãha água. Aheve aipo opacatu ivi pipendar, tecua guasu pipendar mbahe porañete vahe yemboivate aisa omboyecua chupe,

⁹ aipo ehi:

—Che rovai ereñenopihase che mboeteisave, co opacatu mbahe nde rembiepia amondora nde mahera —ehi Carugar chupe.

¹⁰ Aipo oyeupe hese:

—Eyepepi che sui cūritei, Carugar —ehi—. Esepia, icuachiapri: ‘Emboetei nde Yar Tūpa, ahe güeraño tupri avei eremboyeroyara’ ehi —ehi Carugar upe.

¹¹ Ahese Carugar oyepepi ichui. Ipape Tūpa rembiguai yuvirogüeyi Jesús rese hañeco āgua yuvireco.

Jesús omboipi oporombohe Galilea rupi

¹² Jesús oyanduse Juan roquendasa, oso Galilea ivi rese Nazaret ve.

¹³ Ndopitai rumo aheve. Osoño Capernaum ve, aheve opita. Ahe tecua ipa Galilea ivi, ivi Zabulón iyavei Neftalí rupi avei.

¹⁴ Na ehi yaviye Tūpa ñehe mombehugar Isaías rembicuachiagüer aipo ehi vahe aracahe:

¹⁵ “Co ava ivi Zabulón pendar, Neftalí pendar, para guasu ivirindar, iai Jordán rovaingar iyavei Galilea pipendar ndahei vahe judío,

¹⁶ ahe aviye pītumimisave yuvirecoi vahe, osepia ramo vahe tesapesa yuvireco; iyavei mano rāgüer pipe yuvirecoi vahe upe avei aviye oyecua ramo vahe tesapesa” ehi.

¹⁷ Ahe ari suive Jesús omombehu Tūpa recouer ava upe: “Pemboasi pe angaipa; peyevi Tūpa upe. Esepia, cōimi eté Tūpa mborerecuasa secoi” ehi.

Jesús, “Perio che rupi” ehi irungatu pira mbohasar upe

¹⁸ Coiye ipa Galilea ivi oguatase, Jesús osepia mbia Simón Pedro serer vahe tivri Andrés reseve. Ahe pira omboha yuvireco.

¹⁹ Evocoiyase:

—Pe pira recasar peico. Perio che rupi. Na peye aveira ava reca āgua cheu nara —ehi chupe.

²⁰ Aipo he ramoseve, opoi opira mbohasa sui yuvireco, yuviraso supi.

²¹ Cōi coti catu aipo Jesús osepia ambuae mbia Santiago tivri Juan reseve, ahe oguapi yuvinoi carite pipe oyesupa Zebedeo piri; omoingatu opira mbohasa yuvinoi.

²² “Perio che rupi” he ramoseve, opaño oporaviquisa sui opoi yuvireco, oseyaño oyesupa, yuviraso supi.

Jesús ombohe ava rehii

²³ Jesús evocoiyase oguata opacatu Galilea ivi rupi, judío tūparo yacatu rupi oporombohe oico. Aheve ñehesa aviye vahe omombehu Tūpa mborerecuasa resandu. Oporombogüera avei opacatu-catu tēi mbaherasisa ava vireco vahe sui.

²⁴ Oyepotase rumo serācua opacatu Siria ivi rupindar upe, ahese güeru opacatu iparaisu vahe yuvireco chupe: imbaheasi vahe, carugar vireco vahe, que nañaca pōrai vahe iyavei ndogutai vahe. Ahe opa tupri ombogüera.

²⁵ Ēgüe ehi ava rehii oguata yuvireco opacatu iguatasa rupi supi: Galilea pendar, Decápolis pendar, Jerusalén pendar, opacatu Judea pendar, iai Jordán rovaingar avei no.

5

Jesús oporombohe ivitrive

¹ Ñepe ari pipe, ava rehii repiase, Jesús oyeupi ivitri rese. Aheve oguapi oī. Ahese semimbohe oyemboya yuvireco sese.

² Ichui omboipi imbohe aipo ehi:

³ “Sorivete catura acoi ava oicuaase mbahe ipane vahe Tūpa rese ité güeco tupri āgua. Esepia niha, chupe nara ité Tūpa mborerecuasa.

⁴ “Sorivete catura acoi ava oyaseho vahe oviharēhisa pipe. Esepia niha, Tūpa omboura viharetasa chupe coiye.

⁵ “Sorivete catura ndaseco asiimi vahe. Esepia, ahe chupe imondosara co ivi imahera curi.

⁶ “Sorivete catura ava oipota vahe teco catuprisa Tūpa suingar. Esepia, chupe ité ahe imondosara.

⁷ “Sorivete catura acoi ava oporoparaisuereco vahe. Esepia, ahe Tūpa oiparaisuerecora.

⁸ “Sorivete catura acoi ava ipihañemoñeta tupri vahe. Esepia niha, ahe osepia Tūpa yuvireco curi.

⁹ “Sorivete catura acoi ava oporomoñeroi vahe mbahe tupri pipe. Ahe chupe, ‘Che rahir ité’ ehira Tūpa.

¹⁰ “Sorivete catura acoi ava seco catupri rese imombaraisupri. Esepia, ahe chupe nara Tūpa mborerecuasa.

11 “Perorivete catura pe acoi ava ñehe-ñehe tēise pēu, iyavei pe mombaraususe, acoi oyapo-yapo tēise güemira-mira tēi pipe mbahe pe rese che recocuer sui tēi yuvireco.

12 Pe rumo peyemboviñafora. Esepia, ivave tuvichá vahe porerecosa peipsisira curi. Ēgüe ehi avei niha yipindar evocoi ava ramoi Tūpa ñehe mombehusareta mombarausu yuvireco aracahe” ehi.

Jesús reroyasar aviye yucri iyavei tesapesa yuvirecoi ava upe

13 “Co ivi pipe pe aviye yucri peico opacatu ava upe. Yucri rumo nasehe irise, ndayaicatu imoehe iri āgua, ndiporusai chietera; imombopasara ava pirunga āgua yuvireco.

14 “Iyavei pe tesapesa nungar peico opacatu ava upe co ivi pipe inungar que tecua guasu yapopri ivitri rese. Ahe ndayaicatu ñomi āgua.

15 Iyavei ndayamoendii chira tataendi mbahevri tēi. Iyacatu rumo yasupi ivate sendave opacatu oi pipendar ava resape āgua.

16 Pe Ēgüe peye aveira pemboyecua ava eta upe pe recocuer aviye vahe. Ipipe sui tomoetei yande Ru Tūpa iva pendar yuvireco” ehi ava rehii upe.

Jesús oporombohe Moisés porocuita rese

17 “Aní chira, ‘Co mbia revo oporombohe Tūpa ñehe mombehusar rembicuachía mboyeroyaēhi āgua iyavei Moisés porocuita cuachiapri mboyeroyaēhi āgua avei no’ peye tēi cheu. Ēgüe ehi rumo che ayu imboaviye āgua.

18 Supi eté co iva, ivi avei yandeu oime vitemiseve, ndipoi chietera que ñepe yepe Moisés porocuita, que ambuae Tūpa ñehe mombehusar rembicuachiagüer ocañi tēi vaheñā; ñepeipe porocuita imombehupri imboaviyesaño itera.

19 Sese acoi ava ndoviroyai vahe que ñepe mborocuitamira viña, ombohe avei ava seroyaēhi āgua, ahe evocoyase ivi coti catu vahe aveira Tūpa mborerecuasave yuvirecoi. Acoi viroya vahe rumo Tūpa porocuita yuvireco iyavei oporombohe vahe yuvireco sese, ahe evocoyase Tūpa osecomboivate catura omborerecuasave curi.

20 Iyavei amombehu pēu: acoi pe reco ivi tuprisa ndaheise aviye catu vahe fariseo recocuer sui iyavei ndaheise aviye catu vahe Moisés porocuita rese oporombohe vahe recocuer sui avei, ahe ndapeiquei chietera Tūpa mborerecuasave” ehi.

Jesús oporombohe ñemoiroēhi āgua rese

21 “Pe peicua acoi pe ramoi arachendar upe aipo ehi vahe: ‘Pepeyoyuca rene. Acoi que ava oporoyuca vahe rumo, ahe serasosara mborerecuar porandusave mbahe sembiapocuer repirā’ ehi.

22 Che rumo aipo ahe pēu: acoi ava ambuae ava rese oñemoiro vahe yuvireco, ahe avei serasosara aheve. Iyavei acoi ‘nde Ēgüe ere tēi vahe eico’ ehi vahe ambuae ava upe, ahe serasosara porandu āgua mborerecuar ivate catu vahe rovai. Acoi ava rumo oñehe marase seroirosave ambuae ava upe, ahe iyacatu imondosa ité tata guasuve.

23 “Sese Tūpa upe pe porerecosa reropovēhesave tūparo pipe pemahenduhase ava pe amotarēhimbar rese,

24 peseya rane pe porerecosa aheve; peyevi rane pe amotarēhimbar upe pēu ñero āgua rese. Acoi peñerose oyeupe, ahe ve peyevi, tapeicuavēhe pe porerecosa Tūpa upe.

25 “Iyavei peyemotarēhise, peñero voi oyeupe peyoepiase. Anise, aviyeteramo coiye catu tēise pe mombehu tēira pe amotarēhimbar mborerecuar upe pe reraso āgua. Ichui aviyeteramo ahe pe roquenda ucara.

26 Supi eté aipo ahe pēu: Ndapesēi chietera acoi peyemboepipase voi eté pesēra ichui” ehi.

Jesús oporombohe yemboaguasaēhi āgua rese

27 “Peicua niha Moisés porocuita yipindar: ‘Peaguasai rene ambuae ava rembireco rese’ ehi vahe.

28 Che rumo aipo ahe pēu: Acoi ava omahese cuña rese ipotasa pipe, ahe inungar oyapo vahe ité mbahe sese opiha pipe yepi.

29 “Iyavei inungar que pe resa pe acato cotindar oipota rai ucase mbahe pēu pe mboangaipa āgua tēi, iya penose ité, pemombo amombri peyesui. Aní pe mondo uca opacatu pe recocuer tata guasuve.

30 Iyavei inungar que pe po pe acato cotindar pe mboangaipa ucase, iya peyasia ité imombo amombri peyesui. Aní pe mondo uca opacatu pe recocuer tata guasuve” ehi.

Jesús oporombohe ava mendasa sui poiēhi āgua rese

31 “Iyavei aipo ehi Moisés aracahe: ‘Opoi potase que omenda vahe oyesui, iyacatu cuachiar imondosa poiisa resendar mborerecuar rovai yuvireco chupe’ ehi.

³² Che rumo aipo ahe pëu: ava opoise güembireco sui, cuña ndoyaviise mbahe, aheso mbopihañemoñeta tiñtera güembireco mboaguasa uca água. Iyavei cuimbahe omendase cuña omenda vahecuer rese, oyemboaguasa tēi avei sese” ehi.

Jesús oporombohe Vu Tūpa rer poru tēiēhi água rese

³³ “Iyavei peicua acoi aipo ehi vahe pe ramoi upe aracahe: ‘Pemboaviye itera pemoin-gatu tuprise Tūpa rer pipe mbahe pemombehu vahe yepi’ ehi.

³⁴ Che rumo, ‘Ndapeñehei chira que mbahe rer pipe, iva rer pipe tēi avei’ ahe pëu. Esepia, ahe niha Tūpa renda;

³⁵ iva rer pipe tēi avei ndapeñehei chira. Esepia, ahe Tūpa pirunga; Jerusalén rer pipe avei ndapeñehei chira. Esepia, ahe niha mborerecuar ivate catu vahe recua.

³⁶ Pe āca rer pipe avei ndapeñehei chira. Esepia, ndapeicatui chira que ñepepe pe ha momorochi água, imou água avei.

³⁷ Sese niha peñehese, ñepepe reseve, ‘Aviye’ peyera; anise, ‘Aní’ peye voira. Esepia, aipo ndehi vahe mbahe tēi” ehi.

Jesús oporombohe yande amotarēhisar upe mbahe tēi mboyeviēhi água

³⁸ “Peicua acoi Moisés porocuaita aracahendar aipo ehi vahe: ‘Que ava vinose vahe ambuae ava resa ichui, ahe sesa avei senosesara. Iyavei vinose vahe sāi ichui, sāi avei senosesara’ ehi vahe.

³⁹ Che rumo aipo ahe pëu: Aní chira pemboyevi pëu mbahe tēi aposar upe. Acoi que pe amotarēhisar pe rovapetese yuvireco, ambuae coti pe rova avei pemoporēhiñora chupe.

⁴⁰ Porandusave pe rerasose pe camisa reroqua água yuvireco pe sui, pe saco avei pemondoñora chupe.

⁴¹ Ñepepe legua rupi evosii co mbahe rese cheu’ ehise que ava pëu, pe rumo perasoñora ñuvirio legua rupi chupe.

⁴² Iyavei oporanduse que pe mbahe rese yuvireco pëu, pemondoño avei chupe. Aní chira perecatēhi sese” ehi.

Pesaisu pe amotarēhimbar

⁴³ “Iyavei pesendu ñehesa yipindar: ‘Pesepia potai rene pe amotarēhimbar, pe mboripar güeraño pesaisu’ ehi vahe.

⁴⁴ Che rumo aipo ahe pëu: Pesaisu catu pe amotarēhimbar iyavei peyeroqui pe momara potasar rese.

⁴⁵ Evocoi nungar apo pipe pe Ru Tūpa iva pendar rahir ité peicora. Ahe niha osesape uca ari ava naporai vahe upe, ava aviye vahe upe avei. Ombou avei amar seco catupri vahe upe, ava ndaseco pōrai vahe upe avei.

⁴⁶ Pe raisupar güeraño pesaisu catu tēise, ndapeipisii chietera porerecosa evocoi nungar sui. Esepia niha, ava guarepochi reroquasar ndipihai vahe guaisupar tēi osaisu yuvireco yepi.

⁴⁷ Ndahei yande mboripar upe güeraño yayapora ‘avirave’. Esepia, ava ndoicuai vahe avei Tūpa oyapo ‘avirave’ omboripar upe yuvireco yepi.

⁴⁸ Sese pe recocuer perecora pe Ru Tūpa iva pendar seco catupri vahe nungar” ehi.

6

Jesús oporombohe mbahe aviye vahe apo água rese

¹ “Tūpa upe mbahe peyapo potase, ‘Tache repia ava yuvireco’ ndapeyei chira. Esepia, ěgüe peyese, ndapeipisii chietera pe Ru Tūpa iva pendar porerecosa.

² Evocoiyase iparaisu vahe rese peporerecose, ‘Tamombehupa ava upe vichico’ ndapeyei chira inungar ava Tūpa reroyasar angahu tēi yuvireco yepi. Tūparove iyavei ocar rupi mimbimboñe yuvireco ‘Co ava aviye ité yuvirecoi, tehi angahu yuvireco yandeu’ oya tēi. Supi eté aipo ahe pëu: ěgüe ehi vahe rumo opa voi oipisi porerecosa co iva pipe tēi yuvireco.

³ Pe rumo peporerecose iparaisu vahe rese, aní chira pemombehu ambuae ava upe yepera que pe mboripar ité viña.

⁴ Peperereco catu ava pe repiañehisa pipe; pe Ru Tūpa niha mbahe ndoyecuai vahe osepeia. Ahe omboura porerecosa pëu opacatu ava rembiepiave curi” ehi.

Jesús oporombohe yerure água rese

⁵ “Acoi peyerurese, peicoi rene acoi ava ‘tosepia che yeruresa yuvireco’ ehi vahe nungar. Esepia, ahe opūha-pūha catu tūparo pipe oyerocui yuvireco cupiha yacatu avei ‘tayande repia angahu ava’ ohesa pipe tēi. Supi eté che aipo ahe pëu: ěgüe ehi vahe opa voi eté co iva pipeve tēi oipisi porerecosa yuvireco.

⁶ Iyacatu rumo pe, peyeroqui potase, peiquera pe rēta pipe peyeoquendara pe ae pe yeroqui āgua pe Ru Tūpa upe. Evocoiyase pe Ru Tūpa oicua vahe mbahe pe rembiapo, iporeredora pe rese.

⁷ “Iyavei peyeroquise, ndapemboyevi-yevii chira pe ñehe pe poranduse mbahe rese Tūpa upe inungar ava Tūpa ndoicuai vahe. Ahe omboyevi-yevii oyeruresa ‘Tūpa revo co rupi yande mboyeroya vōira’ ohesave yuvireco viña.

⁸ Aní chira inungar tēi peico. Esepia, pe Ru Tūpa oicua pe porandu renondeve mbahe ipane vahe pēu.

⁹ Sese aipo peyera peyeroqui:

‘Ore Ru Tūpa, ivave ereico vahe, imboeteipri nde rer tasecoi.

¹⁰ Tou nde mborerecuasa oreu.

Tayaposa nde remimbotar co ivi pipe, inungar ivave yaposa.

¹¹ Embou ore rembihu ari yacatundur oreu co ari pipe.

¹² Iyavei ndeñero ore angaipar rese oreu oreñero ore amotarēhimbar upe.

¹³ Ore mboangaipa ucai rene eve; eipeha mbahe naporai vahe ore sui’ peyera.

¹⁴ “Esepia, pe amotarēhimbar upe peñerose, pe Ru iva pendar avei iñerora pēu;

¹⁵ ndapeñeroise rumo, ahe avei ñiñeroi chietera pēu” ehi.

Jesús oporombohe yecuacusa rese

¹⁶ “Acoi peyecuacuse, ndapemboyeuai chira pe viharēhisa, inungar acoi Tūpa reroyasar angahu tēi yuvireco yepi. Esepia, ahe opa oyeerecomeguapa tupri yuvireco, ‘Co oyecuacu vahe, tehi ava yande repiasar yuvireco yandeu’ ohesa pipe tēi. Supi eté aipo ahe pēu: Ēgüe ehi vahe opa voi oipisi porerocosa ava güepia pipe tēi yuvireco.

¹⁷ Pe rumo peyecuacuse, peñeaca monodoro tuprira, peyovai tupri aveira.

¹⁸ Evocoiyase, ‘Co oyecuacu vahe’ ndehi chira ava yuvireco pēu. Pe Ru Tūpa, ndayasepiai vahe, güeraño oicuaru pe yecuacusa. Ahe evocoiyase iporeredora pe rese curi” ehi.

Mbahe porañete vahe oime ivave

¹⁹ “Ndapemonuha atii chietera mbahe pe rembiereco co ivi pipe. Esepia, ahe mbahe pe rembiereco mbahe rasoi omboaso ati-ati imocañipa, iyavei sãve-sãve tēi opochi ati-ati oapocatusave, imonda vahe avei evocoiyase imondaño sese pēu.

²⁰ Iya peseca catu tecocuer aviye vahe ivave nara. Aheve niha ndipoi chira co ivi pipendar nungar pe reco mocañi āgua.

²¹ Esepia, pe mbahe pe rembiereco setá catu vahesa rupi-rupi pe pihañemoñeta yepi, yepera que co ivi pipe, anise que ivave avei” ehi.

Yande resa inungar tataendi yande recocuer uve

²² “Iyavei yande resa inungar tataendi yande retecuer upe. Evocoiyase yande resa aviye, opacatu yande retecuer upe osesape;

²³ acoi imarase rumo, opacatu yande retecuer pītumimbisave tēi seci. Tesapesa oime vahe yande rese, ahe ogüese rumo yande sui, mbahe tēi eté, pītumimbi nungar opacatu yande recocuer upe” ehi.

Guarepochi pota raisa; Tūpa mboyeroyaēhisa

²⁴ “Iyavei ndipoi chietera que ava ñuvirio güerecar omboyeroya vahe. Esepia, ñepeí oy- amotarēhira imboyeroya potaēhisa pipe, ambuae evocoiyase osaisu catura imboyeroya pipe. Ēgüe peye avei, ndapeicatuí Tūpa mboyeroya guarepochi pota raisa pipe” ehi.

Tūpa osãro guahireta

²⁵ “Iyavei ndapeyemomahenduha guasu ai chira mbahe pe remihura rese pe recove āgua, pe ihu āgua rese, pe turucuarã rese tēi avei no. Esepia, yande recovesa aviye catu vahe tembihu sui, yande retecuer avei aviye catu turucuar sui no.

²⁶ Pesepia vírai eta oveve vahe: nomaheti vahe, nomonuhai avei, ndoyapocatuí avei mbahe yuvireco. Pe Ru Tūpa iva pendar ité niha omoime mbahe itohu. ¡Pe rumo ivate catu vahe ité peico vírai sui!

²⁷ Ndipoi que ñepeí pe pãhu pendar oicatu vahe opihañemoñetasa pipe tēi güecocuer mopucu iri āgua.

²⁸ “Ndahei chira pe turucuarã rese tēi peyemomahenduha guasu ai. Pemahecu ru mbahe potri caha pipendar rese: ndoporaviqui eté iyavei ndoipiai oturucuarã.

²⁹ Iyavei yepi mborerecar guasu Salomón vireco setá ombahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese.

³⁰ Tūpa niha omboporañete raimi tēi mbahe potri caha pipendar, moviro ari tēi yasepia, ichui sapisapaño horno pipe. ¡Ahe rumo omondo catura turucuar pēu, pe ava nimbahe reroya tupri vahe!

³¹ Sese, ‘¿Mbahe pīha yahura, yaihura?’ Iyavei, ¿mbahe pīha yamondera?’ ndapeyei chira pe yemomahenduha guasu aisa pipe.

³² Ava Tūpa reroyasarēhi aipo nungar reseño tēi ipihañemoñeta yuvireco yepi. Pe Ru Tūpa iva pendar rumo oicua ité pēu mbahe ipane vahe.

³³ Pemahenduha rane Tūpa rese pe recocuer tupri pipe ipovrīve mbahe pe yapo āgua semimbotar rupi, ahese omboura opacatu co mbahe ipane vahe pēu.

³⁴ Peyemomahenduha guasa ai eme mbahe peyapo vaheṛā rese. Iyacatu rumo ahe ari oyepotase voi, peyemomahenduhara sese. Esepia, ari yacatu rupi oime mbahe pemoiñgatu vaheṛā yepi.

7

Ani, “Oyavi mbahe” peye voi ambuae upe

¹ “Ndiyai, ‘Oyavi ité mbahe’ peye voño tēi ambuae ava upe; evocoiyase Tūpa, ‘Oyavi mbahe’ ndehi chira pēu.

² Esepia, inungar pe ambuae ava upe peico, ēgüe ehi aveira niha Tūpa pēu.

³ ¡Mahera ambuae ava rembiavimi rese tēi pemahe! ¡Iya rumo peyese rane mbahe tuvichá catu vahe pesepia!

⁴ Ndiyai pēu, ‘Che toropīvivi mbahe nde rembiavi rese’ peye vaheṛā chupe. Esepia, ¡pe peyavi guasu catu mbahe ichui!

⁵ ¡Pe Tūpa reroyasar angahu tēi peico vahe! Penose uca rane mbahe pe rembiavi tuvichá catu vahe peyesui, ahese ramo ambuae ava rembiavi tahimi vahe moingatu peicatura.

⁶ “Pemondo eme mbahe maranehi ava cave nungar tēi upe, iyavei ndapemondoi chira mbahe porañete vahe ava cuchi nungar tēi upe. Aviyeteramo oyemboyerera mbahe-mbahe tēi apo yuvireco pēu” ehi.

Peporandu Tūpa upe pēu mbahe ipane vahe rese

⁷ “Peporandu mbahe rese Tūpa upe, ahese omboura pēu; peseca ahe mbahe, ahese peyosura; inungar pemota oquenda, ēgüe peyera pe yeroquisa pipe Tūpa upe, ahese imbousara pe porandusa pēu.

⁸ Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyeroquisa pipe omota vahe oquenda Tūpa upe, chupe imboisara.

⁹ “Ndiptoi eté revo que ñepeí pe pāhu pendar omondo vaheṛā ita tēi guahir upe pan rese oyeupe poranduse.

¹⁰ Que pira rese oyeupe poranduse revo, ndomondoi chiaveira mboi tēi chupe.

¹¹ Yepe ava ndaseco pōrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru iva pendar oipotata catu mbahe aviye vahe mondo āgua acoi ava mbahe rese oporandu vahe upe!

¹² “Acoi mbahe peipota vahe ambuae ava oyapo vaheṛā pēu, ahe tupri avei peyapora chupe. Ahe niha Moisés porocuita iyavei Tūpa ñehe mombehusareta porombohesa” ehi.

Oime peri icāhimi vahe ava recocuer upe nara

¹³ “Peique oquendipi icāhimi vahe rupi. Esepia, oquendipi guasu iyavei peri guasu cañi tēisave oso vahe. Ahe supi setá catu ava yuviraso;

¹⁴ teco apirēhisave oso vahe rumo oquendipi, peri reseve icāhimi. Supi guata āgua yavai eté; moviromi tēi ava oseca yuvireco” ehi.

Ivira aviye vahe icuasa iha rese

¹⁵ “Coipe yugüerura ava Tūpa Ñhengagüer mombehusar angahu tēi pe pāhuve. Ahe ndoyavi chira ovesa ndaseco marai vahe yuvireco. Ipiha pipe rumo secocuer aviye mahembiar oñaro ai vahe. Sese peicua catu evocoi nungar sui.

¹⁶ Ava recocuer icuasa sembiapo rese. Esepia, ndahipohosai yu sui uva, ndipohosai avei higuera ha ivira sächí ati vahe sui.

¹⁷ Evocoiyase ivira aviye vahe, iha aviye avei; ivira naporai vahe, iha naporai avei no.

¹⁸ Esepia, ivira aviye vahe ndovirecoi oha naporai vahe, iyavei ivira naporai vahe ndovirecoi oha aviye vahe.

¹⁹ Sese opacatu ivira iha naporai vahe yasiasa yepi. Ichui imondosapa tatave.

²⁰ Na peyera ava recocuer cua sembiapo rese” ehi.

Ndahei chira opacatu ava yuviroique Tūpa mborerecuasave

²¹ “Ndahei opacatu ava ‘che Yar, che Yar’ ehi vahe yuvireco cheu yuviroiquera che Ru Tūpa mborerecuasave. Che Ru iva pendar remimbotar aposar año tupri rumo yuviroiquera aheve.

²² Ari cañi pipe setá tēi ava aipo ehira yuvireco cheu: ‘Ore Yar, nde ñehe mombehúsar niha ore oroco cuese, setá avei oromombo caruguar ava sui nde rer pipe, setá poromondiisa oroyapo’ ehi tēira yuvireco cheu.

²³ Che rumo, ‘¡Aní, ndopocuai! ¡Pe mbahe tēi peico vahe, peyepēpi che sui!’ aheñora aipo nungar upe” ehi.

Ñuvirío oi apopri

²⁴ “Iyavei que ava osendu vahe che ñehengagüer, omboaviye vahe avei, ahe inungar ava ipihañemoñeta tupri vahe omopuha ita harive güetarã.

²⁵ Yepe ahe oi upe oyepota tēi ivitu ai, amarusu reseve, ichui oyeapo tēi avei iai chupe, oi rumo ndoviapi eté. Esepia, ita harive ité yaposa.

²⁶ Acoi ava che ñehengagüer rese ndoyapisacai vahe rumo, ahe inungar ava opihañemoñeta tupriñehisa pipe omopuha vahe ivi cuhi harive tēi güetarã.

²⁷ Ipare rumo oyepotase ivitu ai amarusu reseve chupe, ndaracaheimi ahe oi omondurupa” ehi Jesús ava rehii upe.

²⁸ Ñehe renduse ava rehii, “¿Mara ehi rutei?” ehi tēi yuvireco chupe.

²⁹ Esepia, ndahei Moisés porocuaíta rese oporombohe vahe nungar; ahe rumo oporombohe güeco pĩratasa pipe.

8

Jesús ombogüera ava lepra vireco vahe

¹ Ivitri sui ogüeyise Jesús, ava rehii avei yuvirecoi supi.

² Ahese ava lepra vireco vahe ou, oñenopiha sovai aipo ehi chupe: —Che Yar, ereipotase, che mbogüerami eve co mbaherasi sui —ehi.

³ Aipo ihese, Jesús opoco sese aipo ehi:

—Taa, aipota. ¡Ecuera cūrítei! —ehi.

Aipo ihe ramoseve, ocuera voi eté.

⁴ —Nde cuerasa eremombehu eme ambuae ava upe —ehi—. Nde poyavaño eso, eyemboyecua judío pahí upe. Ipare eicuavēhe nde porerecosa nde cuera agüer resendar Moisés porocuaíta rupi. Ipipe sui toicua ava nde cuerasa yuvireco —ehi.

Jesús ombogüera sundao rereciar remimboacua

⁵ Ipare Jesús oguataño, ěgüe ehi tecua Capernaum ve oyepota oso. Aheve oime sundao rereciar Roma iguar. Ahe ou chupe

⁶ aipo ehi:

—Che Yar, che remimboacua imbaheasi guasu vupave ou. Ndoguata catui, oiporara tēi ombaherasisa ou —ehi.

⁷ —Aviye, cūrítei evocoyase asora imbogüera —ehi.

⁸ —Aní, che Yar, ndiyai eté che rēta pipe nde reique āgua; iyacatu niha cohapeve ereñeñeño tēi icuera āgua. Evocoyase nde ñehe pipe tēi che remimboacua ocuerara.

⁹ Esepia, che niha serecua vahe avei no, areco avei sundao che voya. Ahe chupe, “Eso peve” ahese, cūrítei oso; ambuae upe, “Erio ave” ahese, ou voi avei cheu; che remimboacua upe, “Ahe mbahe eyapo” ahese, che reroya avei —ehi.

¹⁰ “¡Tool!” ehi Jesús aipo oyeupe hese. Ichui aipo ehi oyeupindar ava rehii upe:

—Yepe ahe ndahei vahe judío viña, opacatu Israel recua pipendar rumo ndasepiai eté ava imbahe reroya vahe yuvireco yepi co ava nungar.

¹¹ Che aipo ahe pēu: Setá ava yugüerura añihivei coti sui, caharu coti sui avei no, inungar co sundao rereciar. Iyavei opacatu ava ivi rupindar oguapira yuvireco Tūpa mborerecuasave Abraham, Isaac iyavei Jacob piri coiye.

¹² Judío eta rumo, oyeupe ñehesa reroyaēhi pipe setá pĩtumimbisave ocañi tēira yuvireco. Aheve oyaseho tēira yuvireco iyavei oñeaimbotere-tere tēira mbaheasicuer rereco yuvireco —ehi oñehe.

¹³ Evocoyase sundao rereciar upe aipo ehi:

—Eso, nde mbahe reroya pipe yaposa nde remimbotar ndeu —ehi.

Ahe pipeve semimboacua ocuera tupri ité.

Jesús ombogüera Pedro rembireco si

¹⁴ Ipare Jesús oso Pedro rētake. Aheve osepia Pedro rembireco si sohí iteangase vupave ou.

¹⁵ Opocose ipo rese, ahe ramoseve sohí opituhu ichui. Ocuerare, oñarapuha ava rese ohañeco āgua.

Jesús ombogüera setá ava imbaheasi vahe

¹⁶ Ipape pĩtu ramose setá caruguar vireco vahe ogüeru yuvireco chupe. Jesús rumo ñepei reseve oñehe pipe tẽi omombopa caruguar ava rehii sui, iyavei opacatu imbaheasi vahe ombogüera avei no.

¹⁷ Ēgüe ehi omboaviye Tũpa ñehe mombehusar Isaías rembicuachiagüer aipo ehi vahe aracahe: “Ahe ae virocua opacatu yande mbaherasisa yande sui iyavei oiporara opacatu mbahe tasi vahe yande rese” ehi.

Oguata pota tẽi vahe ava Jesús rupi yuvireco

¹⁸ Jesús osepiase ava rehii oyere guasu vahe oyese, oyocuai güemimbohe eta aipo ehi: “Peyemoingatu yandeu ipa rovai yande so ägua” ehi.

¹⁹ Ahese Moisés porocuita rese oporombohe vahe aipo ehi chupe:

—Porombohesar, che mo aso pota nde rupi opacatu nde guatasa rupi —ehi.

²⁰ Jesús rumo aipo ehi imboyevi chupe:

—Yavaira rumo ndeu. Esepia, v̄irai vireco guaiti, iyavei aguara vireco oquesa; che rumo, Ava Riquehir, ndarecoi que che r̄eta ité che pĩtuhu ägua yepi —ehi.

²¹ Ipape ñepei ivoya aipo ehi chupe:

—Che Yar, che ru manore voi che nde rupiño ité aicora —ehi.

²² —Aní, cūritei voi eyu che rupi —ehi—. Ēgüe tehiño ava secocuer omano vahe nungar, ahe ae toñeñeti yuvireco —ehi chupe.

Jesús omombituhu ivitu ai, ohitu vahe avei

²³ Ipape Jesús yuviroha güemimbohe reseve yuviraso carite pipe.

²⁴ İpa pipe yuviraso pucu ramoseve Jesús oque ou. Ahese aviyeteramo tẽi ivitu ai opũha ipa pipe; i ohitu vahe ndiguayii eté, seni-seni carite oyopi.

²⁵ Evocoyase semimbohe yuviraso voi imomahe:

—ıOre Yar, yande rerasora mo co carite ipive! İYande pĩsiro eve! —ehi yuvireco chupe.

²⁶ Evocoyase aipo ehi:

—ıMahera pesiquiye! İNdapeyeroyai eté che rese! —ehi güemimbohe upe.

Ahese oñarapuha aipo ehi itu guasu upe, ivitu ai upe avei no: “Pepituhupa” ehi. Aheseve voi opa tupri opituhu yuvireco.

²⁷ —ıMara ehi rutei pĩha co? —ehi tẽi semimbohe yuvireco chupe—. İMara ehi vahe pĩha co ava secói?

Esepia niha, ivitu, para guasu avei omboyeroa yuvireco no —ehi.

Jesús omboyepipia caruguar Gadara pendar sui

²⁸ Jesús oguataño güemimbohe eta reseve oyepota ipa rovai Gadara ivi rese yuviraso. Aheve ñuvirio ava carugar vireco vahe yugüeru sovaĩchi. Ahe ava tehögüer ruvipa rupi tẽi yuvirecoi vahe, iyavei ndiporomboeti vahe yuvireco. Ichui osiquiyepave ava ndoguata potai ahe peri rupi yuvireco yepi.

²⁹ Jesús repia ramoseve rumo, oñehe pĩrata yuvireco chupe aipo ehi:

—ıJesús, Tũpa Rahir, eyepipi ore sui! Esepia niha, ndoyepota vitei arı nde ore mombaraisu ägua oreu —ehi tẽi yuvireco.

³⁰ Namombriimi cuchi rehii yuvirecoi ichui.

³¹ Caruguar evocoyase aipo ehi yuvireco chupe:

—Ore mombopaño tẽi eve evocoi cuchi rese —ehi.

³² —Aviye, peso —ehi caruguareta upe.

Aipo hese, caruguar opa yuvirase ava sui, yuviroique cuchi rehii aviterve. Ipape rumo cuchi ndayaracua iri yuvireco; iivi socuer rupi yuviranoña yuviraso, opa ipa pipe ocañi tẽi yuvireco.

³³ Yuviranoña evocoyase cuchi rãrosar tecuave yuviraso opacatu mbahe güembiepia mombehu ava upe yuvireco.

³⁴ Ichui opacatu ava tecua pendar yuvirase ati Jesús upe, “ıEso cohava sui!” ehi yuvireco chupe.

9

Jesús ombogüera ava ndoguatai vahe

¹ Ipape Jesús oha carite pipe osasa iri ipa rovai oso güecua Capernaum ve.

² Aheve, ava ndoguatai vahe omboyovai seraso imbaheasi vahe riru pipe yuvireco chupe. Ahe oicuae co ava yuvirecoi vahe oyese yeroya, aipo ehi imbaheasi vahe upe:

—Che rahir, eyemopoase, che ñero nde angaipa rese ndeu —ehi.

³ “ıCo mbia oyemboivate ai tẽi vahe, Tũpa ñehe nungar pipe tẽi oñehe!” ehi Moisés porocuita rese oporombohe vahe yuvireco chupe.

⁴ Jesús rumo oicua ipihañemoñetasa, sese aipo ehi chupe:

—jMahera pepihañemoñeta rai pe yapisacasa rereco!

⁵¿Uma rupi vo ñehesa ndayavaimi catu: 'Nde angaipa rese che ñero ndeu' hesa pñha, anise, 'Epñha, eguata' hesa tie?

⁶Tapeicua ru che, Ava Riquehir, areco mborerecuasa co ivi pipe ava angaipa upe che ñero ãgua —ehi.

Evocoiyase aipo ehi imbaheasi vahe upe:

—Epñha, esupi nde rupa seraso nde rêtave —ehi.

⁷Ahese opñha voi, oso güetave.

⁸“¡Too! ¿Mara ehi rutei vo?” ehi ava rehii yuvireco imboeteisave. “Esepia, ahe niha ombou opíratasa ava upe” ehi yuvireco chupe.

Jesús, “Erio che rupi” ehi Mateo upe

⁹Ichui osose Jesús, che repia, che Roma pendar mborerecuar guasu upe guarepochi rero cuasa mesave che rëise. Ípare aipo ehi cheu:

—Erio che rupi —ehi.

Evocoiyase apñha, aso voi supi.

¹⁰Ahe ari pipeve Jesús güemimbohe reseve yuviroique che rêtave. Ambocarú setá ambuae ava guarepochi Roma pendar mborerecuar guasu upe monuhasar reseve, ava angaipa viyar yuvirecoi vahe reseve avei.

¹¹Co nungar repiase, fariseo oporandu semimbohe upe yuvireco:

—¿Mahera ru pe mbohesar ocaru evocoi nungar ava angaipa viyar pãhuve tēi? —ehi seroírosa pipe yuvireco chupe.

¹²Jesús rumo, osenduse oyesendar ñehesa, aipo ehi:

—Ava nimarai vahe ndosecai eté oporopõsano vahe; imbaheasi vaheño rumo oseca yuvireco.

¹³Peyapisaca icuachiapri aracahendar aipo ehi vahe rese: ‘Poroparaisuerecosa aipota; ndaipotai mbahe cheu serocuavêhepri tēi’ ehi. Esepia, ndayui ava seco catupri vahe reca, ãgüe ehi rumo ayu ava angaipa viyar reca —ehi Jesús ava eta upe.

Yecuacu rese ñehesa

¹⁴Ípare Juan Oporoãpiramo vahe rupindar yugüeru oporandu Jesús upe:

—Ore iyavei fariseo eta oroyecuacu yepi, ¿mahera ru evocoiyase nde remimbohe eta ndoyecuacui yuvireco yepi? —ehi yuvireco chupe.

¹⁵Ahe rumo omboyeví ahe ava upe:

—jNdiyai eté ichohopri mendasave ndoyembovihal yuvireco imer oicovese ipãhuve! Oimera rumo ari imer reraso ãgua ichui curi. Ahese ramo oyecuacura yuvireco cute —ehi.

¹⁶“Ndipoi chietera revo que ava oturucuar cuacua oyapete vahe turucuar ipiasu vahe pipe. Esepia niha, yapetesa ipiasu vahe oichohoño turucuar cuacua imondoro. Ichorosa evocoiyase tuvicha catu-catuño ité.

¹⁷Iyavei ndiyai ava uva ricuer piasu oyapocatu siru mbahe pírer cuacua vahe pipe. Ëgüe ehise, mbahe pírer opura viña, ocañi tēira, uva ricuer avei evocoiyase ocañi tēi aveira viña no. Acoi uva ricuer ipiasu vahe mbahe pírer ipiasu vahe pipe yapocatupri rumo oyoya ndoyemomarai yuvireco” ehi.

Jairo rayri iyavei cuña Jesús turucuar rese opoco vahe

¹⁸Jesús oporombohe viteseve, ou mborerecuar oñenopiha sovai aipo ehi chupe:

—Che rayri mo cūrítei omano pota ité. Yaso, nde eremondose rumo nde po sese oicovera —ehi chupe.

¹⁹“Aviye” ehi. Evocoiyase opñha yuvíraso güemimbohe reseve supi.

²⁰Ahe pipeve cuña doce araviter rupi suví ndopai vahe opoco saquícuei coti iturucuar popi rese.

²¹Esepia, ahe aipo ehi opiha pipe: “Yepe que iturucuar popi resemi tēi apocora, acuerara rumo” ehi.

²²Jesús evocoiyase oyemboyere cuña rese aipo ehi chupe:

—Che rayri, eyemopoase, erecuera cūrítei nde yeroyasa pipe —ehi.

Aipo ihe ramoseve, cuña ocuera voi eté.

²³Oyepotase Jesús mborerecuar rêtave, osepia omimbi vahe iyemoingatupase omano vahe tí ãgua, ava yaseho atise avei no.

²⁴Ahese aipo ehi ava oyaseho vahe upe:

—Pesēpa cohava sui. Co cuñatai nomanoi; oque tēi ou —ehi.

Ahe ava rumo opucaeete atíño seroyaëhisave yuvireco.

²⁵Ichui opa ava omose, ahese oi que oi pipe oipopisi cuñatai. Evocoiyase ahe oñarapuha voi.

²⁶ Co sembiapo evocoyase oyandupa voi opacatu tecua rupi yuvireco.

Jesús ombogüera ñuvirío ava ndasesapisoi vahe

²⁷ Acoi osêse evocoi oi sui Jesús, ahese ñuvirío ndasesapisoi vahe osaquicue moña, osapucai yuvireco chupe aipo ehi:

—¡Jesús, David suindar, ore paraisuerecomi tēi eve! —ehi pucu-pucu yuvireco chupe.

²⁸ Oi pipe seiquese, oyemboya ndasesapisoi vahe yuvireco sese. Ahese Jesús oporandu chupe:

—¿Che reroya ité vo pe mbogüera ägua rese peye? —ehi.

—Nde reroyasa ité, ore Yar —ehi yuvireco.

²⁹ Aipo oyeupe hese, opoco sesa rese, aipo ehi chupe:

—Tayapo pe che reroyasa pipe mbahe pēu —ehi.

³⁰ Aipo ihe ramoseve osareco tupri voi yuvireco. Ipare,

—Peicua catu. Peicua ucai rene ambuae ava upe —ehi chupe viña.

³¹ Ahe rumo ichui oyepepi pare, yuviraso opacatu tecua rupi, “Jesús ore mbogüera” ehi-ehiño ité yuvireco.

Jesús ombogüera ñiñehengatui vahe

³² Ichiri ramoseve rumo, ambuae ava viroyepota ava ñiñehengatui vahe carugar rerecosar Jesús upe yuvireco.

³³ Ichui omosese carugar, iñehengatu cute. Sepiase opacatu ava,

—¡Too! —ehi—. ¡Ndasesapiasai vahe ité co nungar mbahe yande recua pipe yepi! —ehi tēi yuvireco.

³⁴ Fariseo eta rumo aipo ehiño yuvireco:

—Carugar rerecurar pīratasa pipe co mbia omose carugar ava sui —ehi tupri tēi yuvireco chupe viña.

Jesús oiparaisuereco ava

³⁵ Ichui opacatu tecua rupi Jesús oguata oporombohe tūparo yacatu. Omombehu tecovesa aviye vahe Vu mborerecuasa resendar iyavei oporombogüera opacatu-catu tēi mbaherasisa sui avei no.

³⁶ Osepiase ava rehi, oiparaisuereco yuvireco. Esepia, ahe oñemosañi tēi mbahe rasicuer pāhuve inungar ovesa ndovirecoi vahe guārosar yuvireco

³⁷ Evocoyase aipo ehi güemimbohe upe:

—Supi eté mbahe miti imonuhapirā setā iteanga; sese oporaviqui vahe rumo moviromi tēi.

³⁸ Sese peporandu mbahe miti Yar upe, ahe tomondo ava imonuha ägua —ehi güemimbohe eta upe.

10

Jesús oiporavo doce tupri apóstol

¹ Evocoyase, “Perio” ehi Jesús doce güemimbohe upe. Chupe omondo güeco pīratasa carugar ava sui imboyepepi ägua iyavei iporombogüera ägua opacatu-catu tēi mbaherasisa sui.

² Ahe ava doce tupri apóstol yuvirecoi vahe: yipindar Simón Pedro, ahe tivri Andrés; ambuae Santiago, Zebedeo rahir, ahe tivri Juan;

³ Felipe, Bartolomé, Tomás; iyavei che, Mateo, guarepochi monuhasarer; ambuae Santiago, Alfeo rahir; ambuae Tadeo;

⁴ iyavei Simón, güecua rese secatēhi vahe pāhu pendarer; ipa vahe Judas Iscariote, ahe Jesús omondo vahe yamotarēhimbar upe.

Jesús oyocuai güemimbohe Vu mborerecuasa mombehu ägua

⁵⁻⁶ Ipare oyocuai güemimbohe imondo aipo ehi chupe: “Pesora yipindar judío recua rupi. Esepia, inungar ovesa ocañi vahe, ägüe ehi tēi secocuer yuvireco. Evocoyase pesoi rene ndahei vahe judío recua rupi iyavei ndapeiquei chira tecua Samaria ve” ehi.

⁷ “Judío recua rupi pesoseve, ‘Cōimi Tūpa mborerecuasa secoi yandeu’ peyera imombehu.

⁸ Iyavei pembogüera imbaheasi vahe, pembogüerayevi avei omano vahe, pembogüera lepra rerecosar iyavei carugar pemboyepepi serecosar sui. Esepia niha, peipisi pīratasa ndasepii vahe. Sese peyapoño evocoi mbahe guarepochi pisiñhisa pipe.

⁹⁻¹⁰ “Ava oporaviqui pipe sui ocaru yepi. Sese ndaperaso chira guarepochi peyese. Ndaperaso chiaveira pe mbahe riru, iyavei ambuae pe turucuar, pe pitaqui; peyesendar güeraño tupri perasora. Pe pococa avei ndaperaso chira” ehi.

¹¹ “Iyavei que tecuave peyepotase, peseca rane ava imboyeroyapri. Ahe sētave pepitami ranera. Pemboaviyese pe cuaíta, ahese ramo pesora ichui” ehi.

¹² “Evocoiyase peique ramoseve oi pipe, peyapora, ‘Avirave, Tūpa tape rovasa’ peyera chupe.

¹³ Acoi aviyeve oi pipendar ava pēu, ahe oipisira Tūpa porovasasa; acoi ndahaviyeise rumo ava, ndoipisii chira Tūpa porovasasa yuvireco.

¹⁴ Acoi ndosendu potaise pe ñehe, ndape pisi potaise avei yuvireco, ahese pesēño ahe oi pipe sui, anise tecua sui. Peipipetera pe pi ivi rātachigüer sui, pesē pecua ichui ‘toipisi Tūpa ñemoirosa yuvireco’ pe yapave.

¹⁵ Evocoiyase supi eté ari cañi oyepotase co tecua upe, ivate catura Tūpa ñemoirosa ava Sodoma, Gomorra iguar upendar sui curi” ehi.

Yamotarēhiprira Jesús reroyasar

¹⁶ “iPesendu tupri che ñehe! Che opomondo ovesa nungar ava mbahe mimba oñaro ai vahe nungar pāhuve. Sese peresaeté tuprira peyese mboi nungar, iyavei inungar apicasu seco tupri vahe peicora.

¹⁷ Iyavei peicua catu peamotarēhimbar sui. Esepia, mborerecuar rovai pe rerasora iyavei pe nupara otūparo pipe yuvireco,

¹⁸ ichui pe reraso aveira mborerecuareta ivate catu vahe rovai yuvireco che recocuer sui tēi, ěgüe peyera peñehe che recocuer rese chupe iyavei ava ndahei vahe judío upe avei.

¹⁹ Acoi pe rerasose mborerecuar upe yuvireco, ‘¿Mbahe pīha amombehura chupe?’ ndapevei chira; acoi peñehe potase rumo, Tūpa omondora pe ñehe āgua pēu.

²⁰ Esepia, ndahei chira peyesui tēi peñehe, pe Ru Tūpa Espiritu pemoñehe ucara.

²¹ “Ipare rumo ava vivri omondora oamotarēhisar upe ‘toyuca yuvireco’ oya. ěgüe ehi aveira ava guahir upe; tahir avei oyamotarēhira oyesupa yuca uca āgua yuvireco che recocuer rese.

²² Iyavei opacatu ava ndape ambotai chira che recocuer sui tēi yuvireco. Acoi oye-moviracua vahaño rumo ari ipa vahe rupi, ahe ipisiroproi yuvirecoira curi.

²³ Iyavei acoi pe mañeco tēise ñepe tecuave yuvireco, ahese peyepipiñora ichui ambuae tecua pipendar upe che recocuar mombehu āgua. Supi eté Ava Riquehir oura ndapem-boaviye viteiseve pe guatasa judío recua rupi.

²⁴ “Ñepe yepi niha ava oyembohe vahe ndahei eté ivate catu ombohesar sui; que ava rembiguai ndahei avei ivate catu vahe güerecuar sui.

²⁵ Iyavei semimbohe, ‘Aviye ité’ ehiñora ombohesar osecupitise. ěgüe ehi aveira mbiguai güerecuar upe. Acoi oi yar upe: ‘Carugar rerecuar Beelzebú’ ehise, aipo ehi aveira niha oi pipendar upe yuvireco no” ehi.

¿Uma sui pīha siquiyesara?

²⁶ “Sese ndapesiquiyei chira ava pe amotarēhimbar sui. Esepia, yaposa vahe imombe-hupirēhi cūritei, icuasaño itera curi; iyavei mbahe ñomipri, icuasaño aveira no.

²⁷ Acoi che amombehu vahe pitumimisave pēu, pemombehu ari pipe coye, iyavei acoi amombehu vahe pēuñomi, perosapuca pe rēta harive imombehu opacatu ava upe.

²⁸ Iyavei ndapesiquiyei chira acoi ava peyuca potasar sui. Esepia, ndoicatu niha ava hā mocañi āgua yuvireco. Tūpa sui rumo pesiquiye catura. Esepia, ahe oicatu yande retecuer, yande hā reseve imocañi āgua tata guasu pipe” ehi.

²⁹ “Yamondo niha ñuvirio vīraimi repirā ñepeimi guarepochi yepi. Yande Ru Tūpa ndoipotaise rumo, ndoviapi chietera que ñepe vīraimi” ehi.

³⁰⁻³¹ “Sese pesiquiye eme. Esepia, pe niha ivate catu vahe ité peico opacatu vīrai sui. Supi eté Tūpa niha oicua opacatu ñepe-pe pe ha retacuer” ehi.

“Che aicua Jesucristo” ehi vahe opacatu ava rovaque

³² “Acoi ava ‘che aicua Jesucristo’ ehi vahe opacatu ava rovaque, che avei evocoiyase: ‘Co ava che rupindar secoi’ ahera che Ru ivā pendar upe.

³³ Acoi ava ‘che ndahei Cristo rese aico’ ehi vahe rumo cheu ava rovaque, che avei evocoiyase, ‘Ndahei co che rupindar secoi’ ahera che Ru ivā pendar upe.

Jesús reroyasa pipe sui oimera yeamotarēhisa

³⁴ “ ‘Mbahe tupri ai revo güeru co ivi pipe’ ndapevei chira cheu. ěgüe ehi rumo che yusa omoime ucara yeamotarēhisa.

³⁵⁻³⁶ Sese ava oñemu ae oyeamotarēhi-rēhira yuvireco; ava oyesupa oyamotarēhira, iyavei cuña membri osi oyamotarēhira, cuña vovayar oyamotarēhi aveira.

³⁷ “Iyavei acoi oyesupa tēi osaisu catu vahe che sui, ahe ndiyai eté secoi che voyarā; inungar avei osaisu catu vahe guahir, anise guayri che sui.

³⁸ Iyavei acoi noñemosai vahe mbahe rasicuer upe, inungar-ra curusu rese ovosii vahe ité viña che rupi oguata pipe, ahe chupe ndiyai eté che voya seco āgua.

³⁹ Acoi ava oipísiro pota vahe güecocuer tēi, ahe ocañi tēira; acoi omocañi vahe rumo güecocuer che recocuer rese, ahe oñepísirora” ehi Jesús güemimbohe eta upe.

Porrecosa resendar ñehesa

⁴⁰ “Acoi ava pe pisi tupri vahe, ahe che pisi tupri avei yuvireco, iyavei acoi che pisi vahe, ahe oipisi avei che mbousar.

⁴¹ Acoi ava oipisi tupri vahe ambuae ava Tüpa ñehe mombehúsar secosa rese, ahe oipisi aveira porrecosa inungar tupri. Iyavei acoi ava oipisi tupri vahe ava seco catuprisa rese, ahe oipisi aveira porrecosa inungar tupri.

⁴² Iyavei acoi omondo vahe que chíli i sōhisa vahe que ñepei seco mbegüemi catu vahe toihu che reroyasar seco rese, ahe oipisi aveira Tüpa suindar porrecosa” ehi.

11

Juan Oporoãpiramo vahe ovoya omondo Jesús recocuer cua uca ñgua

¹ Opase Jesús oyocuai doce güemimbohe, ahese yuviraso oporombohe Tüpa Ñehengagüer rese judío recua rupi yuvireco.

² Ahese Juan Oporoãpiramo vahe voquendasave chinise, oyandu mbahe Jesucristo rembiapo. Sese omondo vupindar Jesús upe mbahe rese

³ imborandu ñgua: “¿Nde ité vo Tüpa Rembiporavo aipo sãrombri ereico? anise, ¿oime tie ambuae orosãro vaherã?” ehi yuvireco chupe.

⁴ Ipare omboyevi chupe aipo ehi: “Peso, pemombehupa Juan upe mbahe pe rembiepia iyavei pensudu vahe.

⁵ ‘Ndasesapisoí vahe osareco tupri cūritei yuvireco, ipãri-pãri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehusa písirosa resendar ñehesa’ peyera chupe.

⁶ ¡Oviharetera acoi ava oyeroyañi vahe che rese!” ehi Juan rupindar upe.

⁷ Juan rupindar yuviraso pare, Jesús omboipi imombehu ava upe Juan recocuer: “¿Pesepiase Juan recocuer ava porēhisave capihata ivitu ombova-mbova vahe nungar pñha?

⁸ Anise, ¿pesepia tie iturucuar porañete ai vahe iyemboetise? ¡Aní! Ñgüe ehi vahe rumo secoi mborerecuar guasu rētave yepi.

⁹ Evocoiyase pesepiase, ¿‘Ava’ peye vo pe chupe? ¿Tüpa ñehe mombehúsar ité pñha? Taa, ahe ité. Evocoi niha ivate catu vahe Tüpa ñehe mombehúsar sui.

¹⁰ Ahe chupe ité Tüpa icuachiapri arachendar pipe aipo ehi:

‘Che amondora nde renondeva che ñehe mombehúsar nde raperã moingatu ñgua’ ehi.

¹¹ Supi eté ndipoi que ñepei ava seco ivate catu vahe Juan Oporoãpiramo vahe sui. Yepe ahe ivate catu vahe viña, Tüpa mborerecuasave rumo ava seco mbegüemi catu vahe ivate catu ichui.

¹² “Juan yusa suive tupri Tüpa povri pendar oiporara mbahe tēi yuvireco. Osãha-sãha ava opñratasa pipe imocañi ñgua.

¹³ Opacatu Tüpa ñehe mombehúsar rembicuachía pipe, Moisés porocuita icuachiapri pipe avei imombehusa Juan yusa rupive co Tüpa mborerecuasa resendar.

¹⁴ Yepe yavaira seroya ñgua pēu viña, Juan rumo, Tüpa ñehe mombehúsar Elías. Ahe imombehupri ou vahe.

¹⁵ Acoi ava osendu pota vahe che ñehe, toyapisacaño sese” ehi.

¹⁶ “¿Mbahe rese pñha amboyoyara ava recocuer cūriteindar? Esepia, co ava inungar acoi chíhivahe iguayí tēi vahe ocar rupi. Ipare oñehe pucu-pucu omboripar upe yuvireco aipo ehi:

¹⁷ ‘Oromoñehe tēi mimbí pēu, ndapepivoi eté rumo iyavei orosapucái tēi sapucaisa viharēhisa resendar pēu, pe rumo ndapeyasehoi eté’ ehi.

¹⁸ Esepia, ouse Juan Oporoãpiramo vahe, ahe ndohui tembihu sepírusu ai vahe iyavei ndoiñui uva ricuer ipñrata vahe, sese, ‘Co mbia caruguar víreco vahe oyese’ peye tupri tēi chupe.

¹⁹ Coiye che ayu, Ava Riquehir, acarú, aihu tupri avei. Ipare, ‘Co icaru guasu ai vahe secoi, ihu guasu ai vahe avei’ peye cheu; ‘Ava angaipa viyar mboripar tēi iyavei guarepochi rerecuasar mboripar tēi’ peye avei cheu. Acoi ava supi eté víreco vahe Tüpa mbahecuasa, ahe icuasara sembiapo rese yepi” ehi.

Tecua ndiporeroyai vahe

²⁰ Ahese Jesús oñehe pñrata moviro tecua pendar upe. Esepia, aheve acoi oyapo ati catu mbahe poromondiisa viña. Ahe pendar ava rumo ndosecuñaro potai eté güecocuerai Tüpa upe nara yuvireco. Evocoiyase aipo ehi chupe:

²¹ “¡Peparaisu, ava tecua Corazín pendar! ¡Pe avei peparaisu tecua Betsaida pendar! Esepia, acoi poromondiisa pe pãhuve yapopri, yaposara yipive tecua Tiro, Sidón ve viña, co tecua pendar aracaheve anga omondera turucuar viharêhisa resendar, tanimbu avei omondora oãca rese oangaipa mboasisa pipe yuvireco viña no.

²² Pe rumo peipisira ivate catu vahe Tüpa ñemoirosa ava Tiro, Sidón pendar sui ari cañi pipe coiye.

²³ Pe avei no, tecua Capernaum pendar pemoha co ivave pe reco ãgua viña. ¡Pe rumo pe mombosara ivicuar ipicucu catu vahe pipe. Ehi revo tecua Sodoma ve rane, acoi poromondiisa yapopri vahe pe pãhuve yaposara viña, cûritei oime vitera ahe tecua viña.

²⁴ Sese, pe peipisira ivate catu Tüpa ñemoirosa ava Sodoma iguar sui ari cañi pipe coiye” ehi.

Peyu cheu mbituhusa reca

²⁵ Iyavei ahe ari pipe Jesús oyerure: “Che Ru, aviye ndeu. Nde niha iva pendar, ivi pipendar Yar ereico. Esepia, nde ereñomi co ñehesa supi tupri vahe ava imbahecua vai vahe sui; eremboyecua rumo ava seco mbegüemi vahe upe.

²⁶ Ëgüe ere niha mbahe nde remimbotar apo, che Ru” ehi.

²⁷ “Opacatu mbahe che Ru ombou cheu iyavei ndipoi ava che cua tupri vahe yuvireco, che Ru güeraño ité rumo che cua; ndipoi avei che Ru oicua tupri vahe yuvireco no, che güeraño ité aicua iyavei acoi que ava upe aicua uca potase, evocoi nungar upe aicua uca tuprira.

²⁸ Peyu cheu opacatu icuerai vahe. Che amondora pe pituhu ãgua.

²⁹⁻³⁰ Peico che povrive, peyembohe avei che sui. Esepia, che ndache reco asii, iyavei che povrive pe recosa ndayavaimi eté. Ahese ramo oimera mbituhusa pëu” ehi.

12

Mbituhusa ari pipe Jesús remimbohe oipoho trigo yuvireco

¹ Mbituhusa ari pipe Jesús yuviraso güemimbohe rese, oguata mbahe miti pãhu rupi. Ahese semimbohe ndasiepoi. Evocoyase trigo rãhi oipoho-pohomi güemihura yuvireco.

² Fariseo yuvirecoi vahe osepiase, aipo ehi Jesús upe:

—Esepia nde remimbohe. Oporaviquiño mbituhusa ari pipe yuvireco —ehi yuvireco chupe.

³ Ahe rumo omboyevi ahe fariseo upe:

—Peicua tēi niha icuachiapri arachendar mborerecuar guasu David rembiapogüer resendar ñehesa ondugüer reseve ndasiepoise yuvireco.

⁴ Ahe niha yuviroique ité tũparo pipe pan imboeteipri Tüpa upendar hu ãgua ondugüer reseve. Ahe chupe acoi ndipotasai ihu ãgua yuvireco viña. Judío pahi yuvirecoi vahe upeño ité niha ipotasa ihu ãgua yepi.

⁵ ¿Ndapeyeroqui vo Moisés porocuita resendar pipe? Esepia, judío pahi tũparo rese hañecosar ndopituhui eté tũparo pipe yuvireco mbituhusa ari pipe yepi. Ndahei rumo oyemboangaipa ipipe yuvireco.

⁶ Cûritei cohava oime ava ivate catu vahe tũparo sui.

⁷ Evocoyase pe ndapesenducuai eté Tüpa Ñehengagüer aipo ehi vahe: ‘Che aipota peporoparaisuereco, aní chira peropovêhepa porereresa mbahe mimba tēi cheu’ ehi vahe. Pesenducuae viña, ahese, “Oyavi mbahe” ndapeye voi chira che remimbohe mbahe ndoyavii vahe upe viña.

⁸ Esepia, Ava Riquehir mbituhusa ari rerecuar ité secoi —ehi fariseo eta upe.

Mbia ipo nomii vahe Jesús ombogüera

⁹ Ichui olose Jesús, oique judío tũparove.

¹⁰ Aheve oime mbia ipo co cotigüer nomii vahe. Aheve avei fariseo, “Yaiñhengapo angahu Jesús” ehi yuvireco viña. Sese,

—¿Iyaño pãha mbituhusa ari pipe ava imbogüerasa yepi’ —ehi yuvireco chupe.

¹¹ Evocoyase Jesús aipo ehi imboyevi:

—¿Ava vo pe pãhu pendar acoi mbituhusa ari pipe oviapise seimba ovesa ivicuarve ndosoi chira senose viña?

¹² ¡Ava niha aviye catu ovesa sui! Sese iyacatu yande yayapo mbahe aviye vahe mbituhusa ari pipe yepi —ehi.

¹³ Ahese aipo ehi aipo mbia upe:

—Eichoho nde yiva —ehi.

Evocoyase oichohose oyiva, ocuera tupri voi inungar ambuae iyiva.

¹⁴ Evocoyase fariseo opa yuvinose yuviraso oyemoingatu Jesús yuca ãgua yuvireco.

Yaviye aracahendar imombehupri Jesús recocuer resendar

¹⁵ Evocoiyase Jesús oicuase fariseo pihañemoñetasa, osê oso, ava rehii avei yuviraso supi. Setá avei imbaheasi vahe ombogüera,

¹⁶ iyavei, “Che mombehui rene ava upe peyé” ehi.

¹⁷ Ëgüe ehi yaviyepa Tüpa ñehe mombehusar Isaías remimombehugier:

¹⁸ “Co ité che mboyoyasar che rembiporavo.

Ahe asaisu etepri.

Sese ité ayemboviha.

Amondora che Espíritu chupe.

Ahe omombehu aveira mbahe ihívi vahe opacatu ava ivi pipendar upe.

¹⁹ Noiñehopeopi-epii chira ava, nasase-sasei tēi chiaveira; iyavei ndosendui chietera ava iñehe ocar rupi.

²⁰ Iyavei nomopei chietera que ñepepi pataviimi oyeapa vahe; nombogüei chiaveira tataendi sātachiñomi tēi vahe.

Ëgüe ehira mbahe ihívi vahe pipe opacatu secopipa.

²¹ Evocoiyase opacatu tecua pendar ava ndaheí vahe judío oyeroyara yuvireco sese' ehi Isaías aracahe.

“Jesús vireco carugar pīratasa oyese” ehi tēi ava yuvireco

²² Ichui ava ndasesapisoí vahe, noñehei vahe carugar rerecosar viraso Jesús upe yuvireco. Evocoiyase Jesús ombogüera. Ahese osareco, oñehe avei.

²³ Evocoiyase opacatu ava oyepehamondiisave aipo ehi yuvireco: “¿Tüpa Rembiporavo David suindir pīha co?” ehi yuvireco chupe.

²⁴ Osenduse rumo fariseo, “Co mbia carugar rerecuar Beelzebú pīratasa pipe tēi omboyepipi carugar ava sui” ehi yuvireco.

²⁵ Oicuaño rumo ipihañemoñetasa. Sese aipo ehi: “Que mborerecuar guasu povri pendar ovava-vavase oyeupe oyeamotarēhisave yuvireco, ahese evocoi mborerecuar pīratasa ocañi tēira. Iyavei que tecua pendar, anise, que ava omu rese ovavase oyeupe, oyoya oyemocañi tēira yuvireco.

²⁶ Ëgüe ehi avei carugar. Esepia, serecuar omboyepipse opovri pendar, ovavara oyeupe yuvireco viña. Evocoiyase ahe oyemocañi tēira yuvireco.

²⁷ Iyavei pe, ‘Beelzebú pīratasa pipe sui tēi omboyepipi carugar ava sui’ peye tēi cheu. Evocoiyase, ¿ava pīratasa pipe vo pe voya eta omboyepipi carugar ava sui yuvireco? Tüpa pīratasa pipese, che avei evocoiyase ayapo evocoi nungar ipīratasa pipe. Pe voya ae omboyecua pe ñehe pe rembiavi yuvireco pēu.

²⁸ Che rumo Tüpa Espíritu pīratasa pipe amboyepipi carugar ava sui. Sese cūrítei pesepia ité Tüpa mborerecuasa.

²⁹ “Iyavei no, que ava oique potase ambuae ava ipīrata etepri vahe rētave imbahe rerocua água ichui viña, yipīndar opa rane itera oñapichi-pichi. Ipape voi opara vīrocua imbahe ichui.

³⁰ “Iyavei acoi ava ndache mboyoyai vahe, ahe che amotarēhimbar yuvirecoi; acoi ava ndosecai vahe ava cheu nara, ahe omosai tēi yuvireco che sui.

³¹ “Sese ava upe oimera ñeroisa opacatu angaipa rese iyavei iñehe mara-mara tēi vahe upe avei. Co catu acoi iñehe-ñehe tēi vahe Tüpa Espíritu upe, ahe chupe ndipoi chietera ñeroisa.

³² Iyavei acoi ava oñehe-ñehe tēi vahe che, Ava Riquehir rese, ahe chupe oimeño ñeroisa; acoi oñehe-ñehe tēi vahe rumo Espíritu amotarēhisave, ahe chupe ndipoi chira ñeroisa co ivi pipe iyavei ivave” ehi Jesús fariseo eta upe.

Ava recocuer icuasa sembiapo rese

³³ “Emoatiro tupri ivira, ahe iha aviñera; nderemoatiro tupriise ivira, ahe evocoiyase virecora oha naporai vahe. Esepia, ivira icuasa iha rese.

³⁴ |Evocoiyase pe, mboi nungar tēi peico vahe, pe recocuer naporaise, ndapeicatu chira mbahe aviye vahe rese pe ñehe água! Esepia, pe piha pipe sui tēi osê pe ñehe água.

³⁵ Iyavei acoi ava aviye vahe oñehe tupri opihañemoñeta catuprisa pipe; acoi ava recocuer naporai vahe rumo, opihañemoñeta raisa pipe tēi oñehe.

³⁶ Sese ari cañi pipe opacatu ava opara omombehu oñehe-ñehe tēisa Tüpa rovai yuvireco.

³⁷ Esepia, pe ñehe aviye vahe repri peipisira, pe ñehe naporai vahe repri peipisi aveira” ehi Jesús.

Ava eta ndaseco pōrai vahe oporandu poromondiisa rese yuvireco

³⁸ Evocoiyase fariseo iyavei Moisés porocuita rese oporombohe vahe aipo ehi yuvireco Jesús upe:

—Porombohesar, ore orosepia pota mbahe nde rembiapo poromondiisa nde recocuer cua āgua —ehi yuvireco.

³⁹ Jesús rumo omboyeve iñehe:

—Pe ava ndaseco pōrai vahe, ndiporeroyai vahe, peporandu tēi poromondiisa tecocuer cua āgua rese. Che rumo namboyecuai chira ambuae poromondiisa; Jonás recocuer rese güeraño opomomahenduhara.

⁴⁰ Esepia, inungar Jonás secoi mbosapi ari pira guasu aviterve aracahe, ēgüe ehi aveira Ava Riquehir mbosapi ari ivivirive tuira omano vahe pāhuve.

⁴¹ Evocoyase ari cañi pipe ava tecua Nínive pendar porandusave omombehura ava cūrteindar cañipa āgua. Esepia, Nínive pendar niha omboasise oangaipa, oyeve Tūpa upe yuvireco Jonás omombehuse Tūpa Nēhengagüer chupe. Cūrteitei rumo oime Jonás sui avīye catu vahe pe pāhuve.

⁴² Iyavei ari cañi pipe cuña mborerecuar guasu irohi coti secua vahe porandusave, omombehura cūrteindar ava cañipa āgua. Esepia, ahe ou amombrī sui Salomón mbahe-cuasa rendu āgua. Cūrteitei rumo oime ivate catu vahe Salomón sui —ehi fariseo eta upe.

Carugar oyeve iri ava güeco agüerve

⁴³ “Iyavei carugar osēse ava sui, oguata tēi ivi ipiru vahe rupi opituhu āgua reca. Ipare rumo ndoyosuisse, ipihañemoñeta,

⁴⁴ ‘Ayeve irira che reco agüerve vicho’ ehi. Aheve oyeveise, osepia iri secocuer inungar oi ndiporusai vahe, sahuvapri tupri.

⁴⁵ Sepiase, oso siete carugar naporai catu vahe reca. Ichui güeruse, oyoya guasu yuviroique co mbia piha pipe. Sese mbahe tēi catu ité secocuer yipindar güeco agüer sui. Ēgüe ehi aveira ava cūrteindar ndaseco pōrai vahe upe” ehi.

Jesús si, tivireta avei

⁴⁶ Jesús oñehe viteseve ava upe, ahese ichi, tivireta reseve ocarve yuvinochai. Ahe oñehe pota yuvireco chupe.

⁴⁷ Evocoyase mbia omombehu Jesús upe:

—Nde si, nde rivireta reseve co ocarve yuvinochai. Ahe oñehe pota yuvireco ndeu —ehi.

⁴⁸ Ahe rumo,

—¿Ava piha che si; ava piha che riviri? —ehi ahe mbia upe.

⁴⁹ Evocoyase omboyecua opo pipe güemimbohe eta aipo ehi:

—Co che si eta, co che rivireta.

⁵⁰ Esepia, acoi che Ru iva pendar remimbotar oyapo vahe, ahe che riviri, che reindri iyavei ahe che si yuvirecoi —ehi.

13

Mbahe miti sui yembohesa

¹ Ahe ari pipe Jesús osē oi sui oso, oguapi ipa popive oi.

² Aheve ava oñemonuha atise yuvireco, oha carite pipe oguapi oi, evocoyase opacatu ava opita ipa popi rupi yuvireco.

³ Ahese omboyoya-yoya oporombohesa setá mbahe rese aipo ehi:

“Ñepe i mbia osē omaheti oico.

⁴ Ahe otiapi-apiise mbahe rāhi oso, moviro oiti peri rupi. Vīrai ogüeyise rumo sese, opaño yuvirohu.

⁵ Iyavei moviro oiti ivi nayanai vahesave ita pāhuve. Sese cūrteimi sorī;

⁶ ari tasise rumo, opaño ipiru. Esepia, ndasapoi niha.

⁷ Iyavei ambuae mbahe rāhi oiti yu pāhuve. Ahe yu rumo sorī poyava catu yuvireco ichui. Sese opaño oyopi.

⁸ Ambuae rumo oiti ivi avīye vahesave, ahe setá iha imonuhasa; ñepe ihi sui osē cién iha, ambuae sui osē sesenta, ambuae sui treinta.

⁹ Acoi ava osenducua pota vahe che ñehe, toyapisacaño sese” ehi Jesús ava eta upe.

¿Mahera piha co yembohesa imboyoyasa ambuae mbahe rese?

¹⁰ Ichui semimbohe eta oyemboya Jesús rese yuvireco mbahe rese oporandu āgua chupe: “¿Mahera vo eremboyoya-yoya mbahe rese nde porombohesa ava upe yepi?” ehi.

¹¹ Jesús aipo ehi: “Pēu rumo Tūpa oicua uca ité mbahe ndicuasai vahe omborerecuasa resendar; ambuae ava upe rumo ndoicua ucai eté.

¹² Esepia, acoi vireco vahe upe, imondosa catura; acoi ndovirecoi vahe evocoi osenducua raimi vahe serocuasafora ichui.

¹³ Sese añehese chupe, amboyoya-yoya aipo nungar mbahe yavai vahe ambuae mbahe rese yepi. Esepia, ahe osepia tēi, ndosepiacuai rumo yuvireco iyavei osendu tēi, ndosenducuai avei yuvireco no.

¹⁴ Na ehi yaviye Tūpa Ñehengagüer Isaías remimombehu: 'Pe niha pesendu tēira, ndapeicuai chira rumo; iyavei pesepia tēira, ndapesepiacuai chira rumo.

¹⁵ Esepia, evocoi ava eta upe yavai eté ipiha pipe imbahe reroya ãgua, ndayapisai eté sendu potaēhisave; ndoyemboesapisoi avei sepia potaēhisave.

Esepia, ndosenducua potai opiha pipe yuvireco cheu oyevi potaēhisave ombogüera ãgua' ehi

Isaías aracahe.

¹⁶ "Pe rumo perorivete ité sepiacuase, pesenducuae avei no.

¹⁷ Supi eté setá Tūpa ñehe mombehugar iyavei ava seco catupri vahe aracahendar osepia pota tēi mbahe pe rembiepia, ahe rumo ndosepai eté yuvireco; iyavei osendu pota tēi co pe remiendu, ahe rumo ndosendui avei yuvireco" ehi Jesús güemimbohe eta upe.

Jesús omombehu yembohesa mbahe miti resendar

¹⁸ Ipare aipo ehi: "Peyapisaca omaheti vahe recocuer rese.

¹⁹ Acoi osendu tēi vahe Tūpa Ñehengagüer imborerecuasa resendar, ipare rumo ndosenducuai, ahe inungar acoi mbahe rāhii oviapi vahe peri rupi. Ipare rumo carugar ou chupe. Ahe ipiha pipe osendu vahe Tūpa Ñehengagüer opa tupriño omocañi ichui.

²⁰ Iyavei acoi mbahe rāhii seitipri ita pāhuve, ahe inungar ava recocuer yipiño osendu vahe, oipisi vahe avei vorivetesa pipe Tūpa Ñehengagüer.

²¹ Ipare rumo inungar co mbahe miti ndovirecoi vahe guapo oviracua ãgua, ãgüe ehi avei evocoi nungar ava oimese mbahe-mbahe tēi Tūpa Ñehengagüer sui chupe, cūrteimi seroyaēhisave oyepepi ichui.

²² Acoi mbahe rāhii seitipri yu pāhuve, ahe inungar ava osendu vahe Tūpa ñehe. Ipare rumo ahe ipihañemoñeta catu saisusave opacatu ombahe eta co ivi pipendar rese. Ipipe sui oyembopa uca ombahe eta upe. Ichui ndoguata iriño Tūpa Ñehengagüer rupi. Sese secocuer ndaviye iri eté, inungar mbahe miti ndihai vahe.

²³ Acoi itisa vahe mbahe rāhii ivi aviye vahe rese, ahe inungar ava osenducua vahe Tūpa Ñehengagüer. Iyavei inungar acoi co mbahe miti ihá iteanga vahe, ãgüe ehi avei ava secocuer aviye vahe inungar ñepepepe sāhii sui osé que cien iha, sesenta iha, anise que treinta" ehi Jesús güemimbohe eta upe.

Trigo pāhuve caha naporai vahe sui yembohesa

²⁴ Jesús omombehu iri co ambuae mbahe rese yembohesa oyoya vahe: "Tūpa mborerecuasa oyoya tupri ava oivi pipe mbahe rāhii oñoti vahe rese.

²⁵ Opacatu ava queveve rumo oyepota yamotarēhisar, caha tēi rāhii oñoti trigo pāhuve oso.

²⁶ Acoi trigo iha potase, supive avei sori caha.

²⁷ Evocoyase oporaviqui vahe yuviraso, omombehu iyar upe aipo ehi yuvireco: 'Ore rerecuar, ¿ndahei vo acoi mbahe rāhii aviye vahe ereñoti nde ivi pipe? ¿Que sui ru caha sori ipāhuve?' ehi yuvireco chupe.

²⁸ Iyar rumo aipo ehi chupe: 'Oime revo que che amotarēhisar' ehi. Evocoyase oporaviqui vahe oporandu yuvireco chupe: '¿Ndiyai pīha caha tēi orosapohopara ichui viña?' ehi.

²⁹ Ahe rumo aipo ehi chupe: 'Aní, aviyeteramo caha rupive pesapoho tiētera trigo' ehi.

³⁰ 'Evocoyase peseya, tocuacuaño oyoya yuvireco. Yaviyese voi mbahe miti, ahese che ayocuaíra oporaviqui vahe caha tēi rane rerocua ãgua imboapuha uca sapi. Ipare oyapocatura trigo rāhii che mbahe apocatusave yuvireco' ehi ivi yar" ehi Jesús.

Yembohesa mostaza rāhii suindar

³¹ Jesús omombehu iri co ambuae mbahe rese yembohesa oyoya vahe: "Tūpa povri pendar oyoya tupri mostaza rāhii rese. Ahe mbia oñoti vahe oivi pipe.

³² Supi eté co mostaza rāhii tahimi catu opacatu ambuae mbahe rāhii sui. Ipare rumo, ocuacuase, tuvichá catu ambuae mbahe miti sui inungar ivira tuvichá vahe. Ahe sāca rese vírai rehii oyapo guaitirā" ehi oporombohe.

Yembohesa pan mboapeposa sui

³³ Ipare Jesús oporombohe iri ambuae mbahe rese aipo ehi: "Tūpa povri pendar oyoya tupri pan mboapeposa rese, acoi cuña omboyesaha tupri vahe trigo cuhi rese opacatu imboapepo ãgua yepi" ehi oporombohe.

Jesús oiporu oporombohe ãgua mbahe rese mboyoyasa yepi

³⁴ Jesús omombehu opacatu evocoi nungar mbahe omboyoya-yoyase oporombohesa ambuae mbahe rese opacatu ava upe.

³⁵ Co rumo na ehi Tūpa ñehe mombehúsar rembicuachiagüer aviye ãgua: “Che añehese, amboyoyara che porombohesa ambuae mbahe rese. Iyavei amombehura Tūpa ivi apo suive mbahe niporëhii vahe” ehi.

Jesús omombehu tupri oporombohesa caha tēi resendar

³⁶ Aheve Jesús, “Aviye” ehi ava upe. Ipare oi que oi pipe. Aheve semimbohe oyemboyapa yuvireco sese ‘tomombehu trigo pãhuve caha oime vahe resendar yandeu’ oya.

³⁷ Evocoyase omboyevi chupe: “Acoi ava mbahe rãhii aviye vahe oñoti vahe, ahe che, Ava Riquehir.

³⁸ Ivi mbahe miti rupa, ahe ava co ivi pipendar. Iyavei mbahe rãhii aviye vahe, ahe ava Tūpa povri pendar; caha naporai vahe, ahe ava carugar suindar yuvirecoi vahe.

³⁹ Acoi yamotarëhimbar, oñoti vahe caha, ahe niha Carugar ité. Evocoyase ari mbahe miti pohosa, ahe ari cañisa; acoi omonuha vahe mbahe miti, ahe Tūpa rembiguai ìva pendar yuvireco.

⁴⁰ Iyavei inungar acoi caha tēi imonuhapri sapi ãgua, ãgüe ehi aveira ari cañi pipe coiye.

⁴¹ Evocoyase che, Ava Riquehir, che rembiguai ìva pendar amondora opacatu ava ambuae omboangaipa uca vahe, mbahe-mbahe tēi aposar avei rerocua ãgua che povri ve yuvirecoi vahe pãhu sui.

⁴² Ichui omondopara tata guasuve. Aheve oyaseho tēira iyavei ombotere-tere tēira guã yuvireco.

⁴³ Aheveve voi ava Tūpa reroyasar seco tupri vahe, ari nungar sendi yaira Vu mbore-re-cuasave yuvireco. Que ava osendu pota vahe che ñehe, toyapisacaño sese” ehi.

Mbahe repirusu ñomimbri sui yembohesa

⁴⁴ “Evocoyase Tūpa mbore-recuasa oyoya tupri mbahe sepirusu vahe que ivi pipe ñomipri rese. Ipare ava aviyeteramo tēi oyosura viña. Ahe rumo aheve avei oñomi. Ipare vorivetesá pipe opacatu ombahe omondopa co ivi rerocua ãgua mbahe sepirusu vahe pota raisa pipe” ehi.

Mbohir sepirusu catu vahe sui yembohesa

⁴⁵ “Iyavei Tūpa mbore-recuasa inungar ava mbahe rerocuasar oseca vahe mbohir icatupri vahe yepi.

⁴⁶ Ahe oyosuse mbohir sepi catu vahe, oso opacatu ombahe mondo co sepi catu vahe rerocua ãgua.

Pira mbohasa sui yembohesa

⁴⁷ “Iyavei Tūpa mbore-recuasa inungar pira mbohasa. Imondopri ipive. Ipare omboha opacatu-catu tēi pira.

⁴⁸ Acoi savapipose pira mbohasa, vinose ivi átasave yuvireco. Aheve oiporavo pira aviye vahe oñõñapa ombahe riruve yuvinoi, naporai vahe rumo opaño omombo yuvireco.

⁴⁹ Ëgüe ehi aveira ari cañi pipe: aheve Tūpa rembiguai ìva pendar yuvinosera opacatu ava ndaseco pōrai vahe mboyepepi ãgua ava seco catupri vahe sui.

⁵⁰ Evocoyase ava ndaseco pōrai vahe imondosara tata guasuve. Aheve oyaseho tēira iyavei ombotere-tere tēira guã yuvireco” ehi.

Mbahe ipiasu vahe iyavei ocuacua vahe sui yembohesa

⁵¹ Evocoyase oporandu güemimbohe eta upe:

—¿Pesenducua vo aipo opacatu? —ehi.

—Taa —ehi yuvireco chupe.

⁵² Evocoyase ahe aipo ehi:

—Acoi ava oporombohe vahe porocuita rese, oyembohe vahe avei che Ru mbore-re-cuasa rese, ahe inungar ava oi yar vinose vahe ombahe ipiasu vahe, ocuacua vahe avei yapocatusa sui —ehi güemimbohe eta upe.

Jesús Nazaret ve secoi

⁵³ Oñehe pare, Jesús osë ichui

⁵⁴ oyepota güecuave oso. Aheve ombohe ava judío tūparo pipe oico. Evocoyase ahe pendar ava oyepihamondii tēi:

—¿Que pãha co ava oyembohe catu ombahecua ãgua? iyavei, ¿mara ehi pãha co mbahe poromondiisa apo? —ehi yuvireco—.

⁵⁵ ¿Ndahei vo acoi carpintero rahir tēi? Ichi niha acoi María, iyavei yuvirecove tivri, ahe Santiago, José, Simón, Judas.

⁵⁶ Seindri avei niha yuvirecove yande pãhuve. Evocoiyase, ¿que pãha oyembohera viña? —ehi tẽi yuvireco chupe.

⁵⁷ Ipipe sui ndoviroyai yuvireco. Ahe rumo aipo ehi chupe:

—Tũpa ñehe mombehusar niha omboetei opacatu rupi yuvireco yepi. Secua pipendar, sêta pipendar ae rumo nombotei yuvireco —ehi.

⁵⁸ Evocoiyase, ahe ava viroyaẽhisa rese, moviro tẽi oyapo mbahe poromondiisa ipãhuve.

14

Juan Oporoãpiramo vahe mano agüer

¹ Ahe ari rupi Herodes, mborerecuar guasu Galilea pendar, oyandu Jesús rerãcua.

² Evocoiyase aipo ehi opitivisar upe: “Juan Oporoãpiramo vahe revo ocuerayevi. Sese oyapo poromondiisa ipãrata vahe” ehi.

³ Esepia niha, yipendar Herodes Juan oipisi, oñapichi carena pipe soquenda ãgua vivri Felipe rembireco Herodías sui tẽi,

⁴ “Ndiyai eté nde rembireco nungar ererectora” oyeupe hese.

⁵ Herodes oyuca pota Juan viña, osiquiyeño rumo ava eta sui. Esepia, ahe, “Tũpa ñehe mombehusar secoi” ehi yuvireco chupe.

⁶ Acoi Herodes haragüer mboeteisa pipe rumo aipo cuña Herodías membri osẽ opivoi ava rehii rembiepiave. Herodes upe evocoiyase aviye ai eté.

⁷ Sese ahe oyemoingatu ñepi reseve que mbahe oyeupe oporanduse imondo ãgua chupe.

⁸ Evocoiyase ahe cuñatai oyeupe osi remimombehu rupi, aipo ehi Herodes upe:

—Embou Juan Oporoãpiramo vahe ãca poratu pipe cheu —ehi.

⁹ Aipo ñehesa nombovihai eté Herodes; ndiya iri rumo, “Aní” ohe ãgua. Esepia, opacatu ava güemimbori eta rovaque aipo ehi. Sese, “Taperu chupe” ehiño.

¹⁰ Ahese oporocuai Juan ãca hasia ãgua soquendasave.

¹¹ Ipare víraso poratu pipe cuñatai upe yuvireco. Evocoiyase ahe omondo osi upe.

¹² Ahese Juan remimbohe oyepota yugüeru, víraso sete ñoti yuvireco. Ipare yuvíraso Jesús upe imombehu.

Jesús oyopoi cinco mil cuimbahe

¹³ Jesús oyanduse Juan manosa, ahese ahe ae oso ava porẽhisave carite pipe. Ava rehii rumo oyanduse, yuvínose voi güecua sui, ivi rupi yuvíraso osupiti secosave yuvireco.

¹⁴ Evocoiyase osẽse carite pipe sui, osepia ava rehii. Ahese oiparaisuereco ava eta. Sese opa ombogüera imbaheasi vahe serasopri.

¹⁵ Evocoiyase caharuse semimbohe oyemboya yuvireco sese aipo ehi:

—Caharú ité moco cute iyavei ndipoi oi co rupivemi vahe. ¿Ndiyai vo eremondopa ava tecua-tecuami rupi, ahe supi tovírocua mbahe güemihura yuvireco? —ehi yuvireco chupe.

¹⁶ —Aní, ndiyai yuvíraso. Pe pemondora mbahe semihura yuvireco —ehiño chupe.

¹⁷ —Poyandepomi tẽi rumo pan orovireco iyavei ñuviriomi tẽi avei pira —ehiño semimbohe yuvireco chupe.

¹⁸ —Peruño ave cheu —ehi güemimbohe upe.

¹⁹ Ipare aipo ehi ava rehii upe: “Peguapi capihari harive” ehi. Evocoiyase oipisi poyandepomi vahe pan, ñuviriomi vahe pira. Ichui omahese iva rese, “Aviye ndeu, che Ru” ehi. Ichui omombite-mbite pan imondo güemimbohe upe. Ahe evocoiyase omboyaho-yaho ava eta upe semihura yuvireco.

²⁰ Evocoiyase opacatu ava ocaru vahe ihitaropa tẽi yuvireco. Ipare semimbohe omboapipopa doce tupri iruova sembihu rumbirer yuvireco.

²¹ Ahe cuimbahe ocaru vahe retacuer cinco mil. Cuña rumo iyavei chihivahe ndipapasai yuvireco.

Jesús oguata i hari rupi

²² Ipare Jesús, “Peha pe rane carite pipe, pesasa ipa peso che renondeve. ‘Aviye’ tahe rane ava eta upe” ehi güemimbohe upe.

²³ “Aviye” ohe pare ava upe, oyeupi oso ahe ae ivitri rese oyoeroqui ãgua. Pítuse chupe, opitaño aheve.

²⁴ Aheseve carite oso pucuse ipa popi sui, ivitu ipãrata vahe osovaichi yuvireco. Sese ohitu vahe nambegüe-mbegüei ocua sese.

²⁵ Cõhe potase, oguata i hari rupi oso güemimbohe coti.

²⁶ Semimbohe i hari rupi iguatase, oyembosiquiye yuvireco ichui. Sese,

—iNdahei vo evocoi hãgüer secoi! —ehi yuvireco chupe.

²⁷ Güemimbohe upe rumo aipo ehi:

—¡Peyemoviracuaño, che tẽi! ¡Pesiquiye eme che sui! —ehi.

²⁸ —Che Yar —ehi Pedro—. Nde ité ereicose, taguata i hari rupi vicho nde piri —ehi.

29 —Erio ru —ehi chupe.

Evocoyase Pedro ogüeyi carite pipe sui, uguata i hari rupi. Osora ipiri viña.

30 Ivitu pīrata repiase rumo, osiquiye ichui. Oso senise rumo ipive,

—¡Che Yar! ¡Che pīsiromi eve! —ehi.

31 Ahese cūrteimi voi oipisi Pedro po rese, aipo ehi chupe:

—¡Chīhi tēi ereyeroa che rese! ¡Mahera ndereyeroa tuprii che rese! —ehi.

32 Oyuvirohase rumo carite pipe, opituhu voi ivitu.

33 Evocoyase carite pipe yuvirecoi vahe oñenopiha sovai,

—¡Supi eté catu nde Tūpa Rahir ereico! —ehi yuvireco chupe.

Jesús ombogüera imbaheasi vahe Genesaret pendar

34 Osasase ipa, oyepota Genesaret ivi rese yuviraso.

35 Opacatu ahe pendar ava oicuase Jesús yepota, ahese opacatu tecuami rupi omombehu-mbehu va a upe yuvireco. Evocoyase viraso imbaheasi vahe chupe,

36 aipo ehi yuvireco: “Topocomi tēi nde turucuar popi rese yuvireco” ehi; evocoyase opacatu sese opoco vahe, ocuerapa voi eté yuvireco.

15

Porombohesa yande mboangaipa vahe resendar

1 Oyemboya Jesús rese moviro fariseo iyavei Moisés porocuita rese oporombohe vahe, yugüeru vahe tecua guasu Jerusalén sui. Ahe oporandu yuvireco chupe:

2 —¿Mahera vo nde remimbohe ndoguatai yande ramo aracahendar aracuaa rupi yuvireco? ¿Mahera vo yande porocuita mboaviyeēhisa pipe ndoyepoi ocaru āgua yuvireco yepi? —ehi.

3 Jesús omboyevi aipo ehi chupe:

—Pe no, ¡mahera ndapemboyeroai Tūpa porocuita pe ramo aracahendar aracuaa rupi tēi pe guata āgua!

4 Esepia, Tūpa aipo ehi: “Pemboyeroaya iyavei peipitiviira pe ru, pe si avei no. Acoi iñehe mara vahe oyesupa upe, ahe tomanoño” ehi aracahe.

5 Pe rumo aipo peye tēi: “Acoi ava aipo ehi vahe vu upe, osi upe avei no: ‘Ndiyai chira mbahe mondo āgua pēu. Esepia, che opacatu mbahe areco vahe imondopri Tūpa upe’ ehise,

6 ahese ndiyai eté ipitivi āgua chupe” peye. Ēgüe peye pe araca raisa pipe pemocañi Tūpa porocuita peyesui.

7 ¡Pe Tūpa reroyasar angahu tēi peico vahe! Supi tupri ité Tūpa ñehe mombehusar Isaías rembicuachía aracahendar omombehu pe recocuer:

8 ‘Co tecua pendar ava oyuru pipe tēi che mboetei yuvireco; ipihañemoñetasa rumo amombri tēi che sui.

9 Oyerure tupri tēi yuvireco cheu.

Esepia, iporombohesa ava porocuita tēi’

ehi Isaías rembicuachigüer pipe aracahe —ehi Jesús imombehu.

10 Ipare,

—Perio —ehi ava rehii upe—. Peyapisaca, pesenducua tupri che ñehe:

11 mbahe oi que vahe ava yuru rupi nomboangaipa ucaí. Mbahe osé vahe ava yuru pipe sui, ahe rumo omboangaipa uca —ehi.

12 Evocoyase semimbohe oyemboya sese, oporandu yuvireco chupe:

—¿Ereicua vo acoi fariseo oñemoiro nde ñehe renduse yuvireco? —ehi.

13 Ahe rumo aipo ehi chupe:

—Opacatu mbahe miti ndahei vahe che Ru ¡va pendar remiti, opara sapohosa curi —ehi—.

14 Ēgüe tehiño yuvireco. Esepia, evocoi inungar ndasesapisoi vahe viroguata ambuae ava ndasesapisoi vahe yuvireco. Ahe evocoyase oyoya voira oviapi ivicuar pipe yuviraso —ehi.

15 Evocoyase Pedro oporandu chupe aipo ehi:

—Emombehu tupri catu iri mbahe eremombehu vahe oreu —ehi.

16 —¿Ndapesenducua vitei avei catu pe co ñehesa?

17 ¿Ndapeicuai vo opacatu mbahe acoi ava yuru rupi oi que vahe oso yaviterve, ipare osé setecuer sui?

18 Ava pihañemoñetasa sui osé vahe rumo iyuru rupi, ahe ava omboangaipa.

19 Esepia, ava pihañemoñetasa sui osé pihañemoñeta raisa, porapichisa, mendasa sui yemboaguasasa, nomendai vahe yemboaguasa tēisa, mondasa, temira iyavei ava rese ñemoñeta tēisa.

20 Evocoi nungar mbahe rumo omboangaipa ava; ndahei angaipa acoi yande caru renonde yande yepoiēhisa nungar —ehi.

Cuña ndahei vahe judía viroya Jesús

- ²¹ Ichui osé Jesús oso, oguata Tiro ivi rupi, Sidón ivi rupi avei.
²² Cuña cananea, Tiro, Sidón ivi rese secoi vahe oyemboya Jesús rese aipo ehi:
 —¡Che Yar, David suindar, che paraisuerecomi eve! ¡Che membrí vireco caruguar oyese!
 —ehi pucu-pucu ou chupe.
²³ Ahe rumo nomboyevíi eté chupe. Evocoyase semimbohe oyemboya yuvireco sese aipo ehi:
 —Emboyepépi co cuña yande sui. Esepia, sãse pucu-pucu ou yande raquicuei —ehi yuvireco chupe.
²⁴ Evocoyase aipo ehi güemimbohe upe:
 —Che Ru Tüpa rumo che mbou Israel recua pendar upeño. Esepia, ahe ovesa ocañi tēi vahe nungar yuvireco —ehi.
²⁵ Ahe cuña rumo oñenopiha sovai, aipo ehi chupe:
 —¡Che Yar, che pítiviimi eve! —ehi.
²⁶ Ahe rumo aipo ehi chupe:
 —Naporai rumo yarocua pan tahir sui cave tohu yamondo vaheerã —ehi.
²⁷ —Supi eté, che Yar, cave avei rumo ohuño ité pan rahicuer oviapi vahe yepi —ehiño chupe.
²⁸ —¡Cuña, tuvichá nde yeroyasa! Aviye, ãgüe tehi eté nde remimbotar rupi —ehi.
 Aipo ihe ramoseve, ocuera voi eté imembrí.

Jesús setá ombogüera ava imbaheasi vahe

- ²⁹ Ichui Jesús osé oso ipa Galilea ivi. Ipare oyeupi ivitri rese oguapi oí.
³⁰ Aheve setá ava oyepota, güeru ati imbaheasi vahe yuvireco chupe: ndipindugüei vahe, ndasesapisoi vahe, ipãri-pãri vahe, niñehengatui vahe, iyavei ambuae setá imbaheasi vahe no. Omondose sovai yuvireco, ahe opa ombogüera.
³¹ Ichui ava niñehengatui vahe oñehe; ipãri-pãri vahe ocuera tupri; ndoguatui vahe oguata avei iyavei ndasesapisoi vahe osareco yuvireco. Sepiase ava rehii oyepihamondii aipo ehi: “Imboeteipri Israel Tüpa tasecoi” ehi yuvireco.

Jesús oyopoi cuatro mil cuimbahe

- ³² Evocoyase Jesús oñehe güemimbohe upe aipo ehi:
 —Iparaisu catu co ava yuvireco cheu. Esepia, mbosapi ari yuvirecoi yande piri iyavei ndipoi eté mbahe semihura. Ndiyai sêtave sie porēhi reseve amondo. Aviyeteramo oviroviapi-api tiêtera tieporēhi peri rupi yuvireco viña —ehi.
³³ Evocoyase semimbohe aipo ehi yuvireco chupe:
 —¿Que sui pïha orosecara tembihu ava rehii upe nara cohava ava porēhisave viña? —ehi yuvireco.
³⁴ —¿Mbovi vo pan pereco? —ehi.
 —Orovirecomi siete pan iyavei moviromi tēi pirami —ehi semimbohe yuvireco chupe.
³⁵ Evocoyase, “Peguapi ivi harive” ehi ava rehii upe.
³⁶ Ahese oipisi siete pan, pirami reseve, “Aviye ndeu” ehi Vu upe. Ichui omboyaho-yaho güemimbohe upe imondo. Ahe evocoyase omondopa ava rehii upe yuvireco.
³⁷ Opacatu ava ocaru vahe ihitaro yuvireco. Ipare semimbohe omboapipo iri rane sumbirer siete iruova yuvireco.
³⁸ Cuimbahe ocaru vahe retacuer cuatro mil. Cuña, chihivahe retacuer rumo ndicuasai.
³⁹ Ipare Jesús, “Aviye” ehi ava upe, ahese oha carite pipe oso ivi Magadán rupi.

16*Fariseo iyavei saduceo oporandu poromondiisa rese yuvireco*

- ¹ Fariseo iyavei saduceo yuviraso Jesús repia secoãha água yuvireco viña. “Emoporēhi Tüpa suindar nde recosa poromondiisa pipe oreu” ehi yuvireco chupe.
² Aipo ehi rumo fariseo, saduceo yuvirecoi vahe upe: “Supi eté amove caharuse pe aipo peye: ‘Ari tupri aira. Esepia, iva rese pïrá iteanga’;
³ iyavei añihivei: ‘Co pipe ari naporai chira. Esepia, iva rese pïra vai anga, pïtu guasuguasu avei’ peye. Pe niha peicua mbahe iva resendar tēi oyecua vahe mombehu; ndapeicuai rumo mara oyapave co poromondiisa cüriteindar ava upe imombehu.
⁴ Co ava ndaseco pōrai vahe oyepepi vahe Tüpa sui oporandu poromondiisa rese ‘¿Tüpa suindar ité pïha?’ oyapave. Che rumo namboyecuai chira ambuae poromondiisa chupe; acoi poromondiisa Tüpa oyapo Jonás upe güeraño tupri asevara chupe” ehi.
 Ichui oseyapaño ava rehii oso.

Fariseo iyavei saduceo porombohesa inungar pan mboapeposa

⁵ Evocoiyase semimbohe oyepota ipa rovai yuviraso. Pan sui rumo sesarai eté yuvireco.

⁶ Evocoiyase Jesús aipo ehi chupe:

—Peicua catu fariseo iyavei saduceo pan mboapeposa sui —ehi.

⁷ Ñehe renduse, semimbohe aipo ehi oyeupe yuvireco:

—¡Ndayarui eté rumo pan! —ehi-ehi tēi oyeupe yuvireco.

⁸ Ahe rumo oicua güemimbohe pihañemoñetasa. Sese aipo ehi chupe:

—¡Mahera, “Ndayarui pan” peye! ¡Pe ndapeyeroya tupri che rese!

⁹ ¿Ndapeicua vitei vo che rembiapo? ¿Ndapeyemomahenduha vitei eté vo acoi poyandepo pan mboyaho agüer acoi ava cinco mil upendar rese, iyavei mbovi iruova pemboapipo sumbirer imonuhase?

¹⁰ ¿Ndapeyemomahenduha vitei avei vo acoi amboyaho vahe siete pan ava cuatro mil vahe upe, iyavei mbovi iruova pemboapipo sumbirer?

¹¹ ¡Too, mara peye rutei pe aipo senducuaēhi! Ndahei mo pan rese ité añehe. Peicua catu fariseo iyavei saduceo pan mboapeposa sui —ehi.

¹² Ahe se ramo oicua yuvireco cute, ndahei pan mboapeposa rese ité oñehe, Jesús rumo oñehe fariseo iyavei saduceo eta porombohesa rese tēi.

Pedro oicua uca Jesús Tūpa Rembiporavo secose

¹³ Oyepotase Jesús, oso tecua Cesarea coti Filipino ivi rese, aheve oporandu güemimbohe upe aipo ehi:

—¿Mara ehi vo ava oñehe yuvireco che rese, Ava Riquehir che recose? —ehi.

¹⁴ Semimbohe evocoiyase aipo ehi yuvireco chupe:

—Amove ava: “Juan Oporoāpiramo vahe” ehi yuvireco ndeu; ambuae aipo ehi yuvireco: “Elias”; ambuae ava aipo ehi avei yuvireco: “Jeremías”; anise ambuae ava, “Tūpa ñehe mombehusar mboetas” ehi yuvireco ndeu —ehi.

¹⁵ —Pe no, ¿‘Ava co secoi’ peye ru pe cheu no? —ehi güemimbohe upe.

¹⁶ —Nde niha Tūpa supi eté vahe Rembiporavo imombehupri; Tahir ité ereico —ehi Simón Pedro.

¹⁷ —Nde sovasapri ereico Simón, Jonás rahir. Esepia, ndahei ava tēi omboyecua co mbahe ndeu, che Ru iva pendar teieté omboyecua ndeu —ehi—.

¹⁸ Nde Pedro ereico, co ita guasu harive amopuhara che tūparoguã. Ñepeí yepe manosa ndosecoreroyi chietera opíratasa pipe.

¹⁹ Evocoiyase che amondo Tūpa mborerecuasa resendar mboisa ndeu; acoi, “Aviye” erese que mbahe uve co ivi pipe, ēgüe ehi aveira ivave; iyavei, “Aní” erese que mbahe uve co ivi pipe, ēgüe ehi aveira ivave —ehi.

²⁰ Ipare Jesús aipo ehi güemimbohe upe: “ ‘Co Tūpa Rembiporavo Poropísirosar’ peye eme ava upe cheu” ehi.

Jesús omombehu omano āgua

²¹ Ichuive tupri Jesús omboipi imombehu güemimbohe upe oico: “Iya niha cheu che so āgua tecua guasu Jerusalén ve. Aheve judío rerecuar, pahí rerecuar ivate catu vahe iyavei Moisés porocuaite rese oporombohe vahe, ahe che mombaraisu ucara iyavei che yuca ucara yuvireco. Che yucasa sui rumo imombosapisa ari pipe acuerayevira” ehi.

²² Pedro rumo viraso co cotimi chupe oñehengata āgua:

—¡Tūpa ndoipotai eté evocoi nungar nde reco āgua, che Yar! ¡Ndipoi chietera mbahe ndeu! —ehi Pedro chupe viña.

²³ —¡Esiri che sui, Carugar! —ehi Pedro upe—. Nde che reiti pota eve mbahe tēi pipe. Esepia, nandepihañemoñetai mbahe Tūpa upendar rese, ava nungar tēi nde pihañemoñeta eico —ehi.

²⁴ Ipare aipo ehi güemimbohe upe:

—Acoi oguata pota vahe che rupi, tasesarai mbahe güemimbotar aposa sui iyavei inungarra curusu rese ovosira viña, toyemoingatu voi che recocuer rese oparaisu āgua iyavei toguata tupri che rupi.

²⁵ Esepia, acoi ava güetecuer tēi raisupar, ocañi tēi etera; acoi ava omocañi tēi vahe rumo güetecuer che recocuer rese, ahe oñepísirora.

²⁶ Esepia, ¿aviye ai angahu pīha ava upe opacatu mbahe co ivi pipendar pisi āgua, ahe ae tēi omocañise güecocuer yuvireco viña? ¿Mbovi pīha omondora ava güecocuer repirā viña?

²⁷ Esepia che, Ava Riquehir, ayevira che Ru reco pīratasa pipe che rembiguai iva pendar reseve curi. Che evocoiyase aicuara ñepeí-peí ava rembiapo agüer rupi chupe.

²⁸ Supi eté oimera amove cohava ava nomano vitei chivaherā, ahe che, Ava Riquehir, che repia rane itera che yevise che mborerecuasa pipe yuvireco curi —ehi güemimbohe upe.

17

Jesús ñecuñaro agüer

¹ Seis ari pare Jesús viraso Pedro, Santiago, tivri Juan reseve co coti ivitri ivate vahesave oyeupi.

² Aheve, aviyeteramo tēi oñecuñaro güemimbohe rovai. Evocoyase sendi sova inungar ari, iturucuar morochí, sendi avei.

³ Aheसेve voi oyemboyecua Moisés, Elías reseve yuvireco chupe. Ahe oñemoñeta oyeupe yuvinoha.

⁴ Ahese Pedro aipo ehi chupe:

—Che Yar, javiye ai eté cohove yaico! Ereipotase, ayapora mboşapı teyupami: ñepeı ndeu nara, ambuae Moisés upe, ambuae evocoyase Elías upe nara —ehi.

⁵ Aviyeteramo tēi iva quiha rese osesapé ogüeyi ou oyopıpa tuprı ité. Ipāhuve oyeendu ñehesa aipo ehi: “Co che Rahır, che rembiaısu. Che mboviharete; peyapisaca catu iñehe rese” ehi vahe.

⁶ Aipo renduse, semimbohe osiquiyé iteangasa pıpe opaño ivi rese oñaca mboya yuvireco ichui.

⁷ Ahese oyemboya oso güemimbohe rese, oñatoi aipo ehi chupe:

—Pepūha; pesiquiyei rene —ehi.

⁸ Evocoyase omahe yuvireco sese, ahese ahe güeraño osepia imoha yuvireco.

⁹ İpare yuvırogüeyi ivitrı sui aipo ehi evocoi mboşapı güemimbohe upe:

—Ndapemobehui chıetera que ñepeı ava upe co mbahe pesepia vahe, pemombehura rumo acoı che, Ava Rıquehir, acuerayevıse voi —ehi.

¹⁰ Evocoyase semimbohe oporandu yuvireco:

—¿Mahera ru Moisés porocuita rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹¹ Evocoyase omboyevı güemimbohe upe aipo ehi:

—Elías rane ité niha oura opacatu mbahe moıngatu āgua curi.

¹² Ahe rumo ou ité cuese. Ndoıcuai rumo ava yuvireco. Amove rumo opacatu güemimbotar tēi oyapo yuvireco sese. Ęgüe ahe aveira niha cheparaisura ahe ava povrıve vıchıco —ehi.

¹³ Evocoyase semimbohe osenducua ramo iñehe yuvireco. Ęgüe ehi Jesús oñehe Juan Oporoāpiramo vahe rese.

Jesús ombogüera chıhıvahe carugar rerecosar

¹⁴ Vıroyepota Jesús güemimbohe ava rehıısave seraso. Aheve mbıa oyemboya oso sese, oñenopiha sovai aipo ehi chupe:

¹⁵ —Che Yar, ereıparaisuerecomı tēıra che rahır cheu viña. Esepia, ahe ipıha mbaheası vahe, oyemombarıısú iteanga. Setá yupagüer oviapi tatave, ive aveı no.

¹⁶ Sese aru tēi nde remimbohe upe. Nombogüera catui rumo yuvireco —ehi.

¹⁷ —ıToo, ndapeyeroya tuprı viteı eté che rese! ¡Co cotı tēi vite pe pihañemoñetas! ¡Mbovi rupı ruteı vo aıco vıtera pe pāhuve che ñemosasa pıpe! Peru evocoi chıhıvahe cheu —ehi.

¹⁸ Ahese oñehe pırata carugar upe chıhıvahe sui imose. Aheसेve ocuera tuprı voi eté.

¹⁹ İpare semimbohe oporandu co cotımi yuvireco chupe:

—¿Mahera pıha ndoromose catui eté carugar ichui? —ehi yuvireco.

²⁰ —Esepia, ndapeyeroya tuprıı Tüpa rese. Supı eté sese pe yeroyasa, yepe ndoyavı chıra mostaza rähiı tahımi vahe viña, aipo peyera co ivitrı upe: ‘Esıri, eso coı cotı’ peyera. Evocoyase ivitrı osıriño itera. Ahese ndapemboavaimı chıra mbahe.

²¹ Evocoi nungar carugar imosesa yayerurese yande yecuacusa pıpe —ehi.

Jesús omombehu iri omano āgua

²² Jesús oguata vıteseve Galilea ivı rupı, aipo ehi güemimbohe upe oıco:

—Che, Ava Rıquehir, imondoprı aıcora che amotarēhımbar povrıve.

²³ Che yuca aveira yuvireco. Acuerayevıra rumo imombosapısa arı pıpe —ehi.

Osenduse semimbohe aipo ihe, ndovıhai tēi yuvireco.

Jesús omondo guarepochı tūparo uve nara oyeupe oporandu vahe upe

²⁴ Oyepotase Jesús güemimbohe reseve tecua Capernaum ve, aheve guarepochı re-rocuasar tūparo upe nara yuvıraso Pedro upe, oporandu yuvireco chupe:

—¿Supı eté pe rerecuar ndomondoı guarepochı tūparo upe nara? —ehi.

²⁵ —Omboepı niha —ehi Pedro chupe.

Evocoyase oıquese Pedro oı pıpe, aheve Jesús rane oñehe chupe aipo ehi:

—¿Mara ehi nde pihañemoñeta, Simón? ¿Ava sui vo vırocuı guarepochı mborerecuar guasu co ivı pıpe yepı? ¿Omu sui pıha, ambuae ava sui tie? —ehi.

²⁶ Pedro evocoyase omboyevi chupe:

—Ambuae ava sui —ehi.

—¡Taal! —ehi—. Evocoyase mborerecuar povri pendar nombopai chira yuvireco —ehi—.

²⁷ Guarepochi reroquasar moñemoiroñehi água rumo, eresora ipa pipe, epirapoi. Acoi yipindar pira erenose vahe, ahe iyuru pipe ereyosura ñepeí guarepochi. Ahe eraso chupe. Ipipe iyacatura imboepi água yandeu —ehi Jesús Pedro upe.

18

¿Ava vo seco ivate catu vahe?

¹ Ahe ari pipeve semimbohe oyemboya Jesús rese yuvireco mbahe rese oporandu água chupe:

—¿Uma vo seco ivate catu vahe Tüpa mborerecuasa pipendar? —ehi.

² Evocoyase Jesús: “Erio” ehi ñepeí chihivahemi upe, omondo güemimbohe pähuve imoha,

³ aipo ehi:

—Supi eté, acoi ndapeñecuñaroise iyavei ndapeicoise chihivahemi nungar, ahese ndapeiquei chira Tüpa mborerecuasa pipe.

⁴ Acoi oñemomini vahe rumo inungar co chihivahemi, evocoi nungar seco ivate catura Tüpa mborerecuasave.

⁵ Acoi ava oipisi vahe co chihivahemi nungar che rer pipe sereco, che ité che pisi yuvireco —ehi.

Iparaisu itera ava oporomboangaipa uca vahe

⁶ “Acoi que ava rumo omboangaipa uca vahe co chihivahemi nungar che reroyasar, iyacatu evocoi nungar ava ñapichisa ita guasu iyesho rese para guasu pipe imombo água.

⁷ ¡Iparaisu co ivi pipendar che reroyasar omboangaipa uca vahe yuvireco! Che reroyasar upe rumo oimeño itera poroñtoisa yepi, jahe imboangaipa ucasar rumo iparaisu itera!

⁸ “Sese inungar pe po, anise que pe pi avei pemboangaipa uca vahe, peyasia, pemombora amombri peyesui viña. Esepia, aviye catu peiquera tecove apirēhisave ñepeí pe pi, pe po rese, peso rāgüer sui tata guasu apirēhisave ñuvirio pe po, que ñuvirio pe pi reseve.

⁹ Iyavei pe resa pe mboangaipa ucasa, penose, pemombo amombri peyesui. Esepia niha, aviye catu peiquera ñepeimi pe resa rese tecove apirēhisave, ñuvirio pe resa rese tata guasu apirēhisave pe reique rāgüer sui.

Porombohesa ovesa ocañi tēi vahe resendar

¹⁰ “Peroñroi rene que ñepeí chihivahemi che reroyasar. Esepia, ivave sembiguai che Ru pirindar ité yuvirecoi yepi” ehi.

¹¹ “Che niha, Ava Riquehir, ayu ava ocañi tēi vahe pisiro água.

¹² “¿Mara ehi pe pihave? Acoi virecose mbia cien tupri ovesa güeimba, ipare rumo ocañira ñepeí ichui viña, evocoyase oseya ranera noventa y nueve tēi vahe ovesa ivitri rese. Oyvira ocañi vahe reca oso.

¹³ Ipare oyosuse rumo, oviharete catuñora evocoi ovesa rese ambuae noventa y nueve nocañi vahe sui.

¹⁴ Ëgüe ehi avei che Ru ivave seci vahe, ndoipotai eté que ñepeí ava che reroyasar chihivahemi nungar cañi água” ehi.

Porombohesa yande ñero água rese

¹⁵ “Acoi nde mboetasa Tüpa reroyasar oyapose que mbahe tēi ndeu, eresora nde ae, eñehe mbahe ndeu oyavi vahe rese chupe. Nde ñehe viroyase, ahese peñero oyeupe cute.

¹⁶ Nande reroyaise rumo, ahese ereñehera ñepeí, anise ñuvirio ava upe nde pitivii água rese. Ahe avei tosendu pe ñehe. Ahese oimera que ñuvirio, anise mbosapi sendusar.

¹⁷ Acoi ndoviroyaise pe ñehe, ahese emombehu opacatu Jesús reroyasar upe; ahe ndoviroyaise ité no, evocoyase Tüpa ndoicuai vahe nungar pereco iyavei inungar mbahe-mbahe tēi aposar, Ëgüe peye sereco” ehi.

¹⁸ “Supi eté acoi, ‘Aviye’ peyese que mbahe upe co ivi pipe; Ëgüe ehi aveira ivave. Iyavei co ivi pipe, ‘Ani’ peyese que mbahe upe, Ëgüe ehi aveira ivave.

¹⁹ “Iyavei co amombehu potami avei pēu: Acoi ñuvirio co ivi pipe pe pihañemoñetasa oyoya tuprise que mbahe rese peporandu água pe yeruresa pipe, evocoyase che Ru ivava pendar omondora pe porandusa pēu.

²⁰ Esepia, acoi ava ñuvirio, que mbosapi oñemonuhase che rer pipe yuvireco, ahese che aico ipähuve” ehi.

²¹ Ipare Pedro oyemboya sese oporandu:

—Che Yar, ¿mbovi rupi vo che ñerora che mboetasa mbahe tēi cheu oyapose? ¿Siete yupagüer rupi pīha? —ehi.

²² —¡Aní! —ehi—. ¡Setenta rupi siete oyupagüer! —ehi Pedro upe.

Yembohesa ava niñero potai vahe resendar

²³ “Tüpa mborerecuasa inungar mborerecuar guasu omoingatu pota vahe güembiguai revesa chupe.

²⁴ Evocoiyase omboipi imoingatu ñgua, ahese ipitiviisar güeru ireve ati catu vahe guarepochi rese chupe.

²⁵ Ahe rumo ndovirecoi imboepi ñgua. Sese co mborerecuar oyocuai opitiviisar aipo ehi: ‘Timondopasa co che rembiguai sembireco reseve, tahir iyavei opacatu mbahe vireco vahe reseve irevesa mboepipa ñgua cheu’ ehi.

²⁶ Evocoiyase sembiguai oñenopiha sovai aipo ehi chupe: ‘¡Too! Che rerecuar, eñemosañomi tēi cheu. Opara niha amboepi ndeu’ ehi chupe.

²⁷ Ahese oiparaisuereco, opoi irevesa sui.

²⁸ “Aheseve voi rumo sembiguai osēse, osepia ambuae ondugüer oyeupe ndaseta tuprii vahe ireve. Ahe chupe aipo ehi iyeseho pisi: ‘¡Emboepipa acoi nde revesa cheu!’ ehi.

²⁹ ‘¡Aní!’ ehi oñenopiha oso sovai, ‘Eñemosañomi tēi cheu’ ehi, ‘amboepipara niha acoi che revesa ndeu’ ehi.

³⁰ Niñero potai eté rumo. ‘Tomboepipa rane ité orevesa cheu’ ehi soquenda uca.

³¹ Osepia rumo ambuae imboetasa, tasi iteanga ipiha pipe. Ahese yuviraso omombehu güerecuar uve opacatu sembiapocuere yuvireco.

³² Evocoiyase ahe serecuar güeru uca aipo ehi chupe: ‘¡Mbahe tēi eté nde rembiapo! Che apoñño opacatu nde revesa sui. Esepia, ereyemombaraisu catumi ereporandu cheu.

³³ ¡Ndiyai vo nde avei ereiparaisuereco nde mboetasa viña, inungar che oroparaisuereco!’ ehi.

³⁴ Ichui serecuar oñemoirosave oyocuai imombaraisu ñgua ‘tomboepipa rane ité orevesa cheu’ oyapave.

³⁵ “Indó, evocoiyase ñgüe ehi aveira che Ru iva pendar pēu ndapeñeroise ité peyeupe” ehi Jesús güemimbohe upe.

19

Jesús oporombohe mendasa sui poiñhi ñgua

¹ Ipare Jesús osē Galilea sui, oso Judea ivi rupi ari sēsa coti iai Jordán rovai.

² Ava rehii yuviraso saquicuei. Aheve setá imbaheasi vahe ombogüera.

³ Evocoiyase oyemboya fariseo Jesús rese yuvireco; secoñahasave oporandu yuvireco chupe:

—¿Aviye piha opoi cuimbahe güembireco sui que mbahe tēi oyapose? —aipo ehi yuvireco chupe.

⁴ Ahe rumo omboeyevi fariseo upe:

—¿Ndapesenducuaimi vo ñehesa icuachiapri pipe peyeroquise: ‘Yipindar yande Aposar oyapo cuimbahe, cuña avei’ ehi?

⁵ Iyavei aipo ehi: ‘Sese niha cuimbahe omendase, oyepepira oyesupa sui güembireco rese ité yuvirecoi ñgua. Evocoiyase ñuvirío yuvirecoira ñepeí ava nungar’ ehi.

⁶ Sese ndahe iri ñuvirío, ñepeí vahe ité yuvirecoira. Evocoiyase ava Tüpa omomenda vahe oyese, ndiyai ava tēi omboeyepi yuvireco oyesui —ehi.

⁷ Evocoiyase fariseo oporandu yuvireco chupe:

—¿Mahera ru oyocuai Moisés cuimbahe omondo vaheñā güembireco upe cuachiar poisa resendar opoi ñgua ichui? —ehi.

⁸ —Pe poreroyañhisa pipe niha Moisés ñgüe ehi pēu. Yipisuive ité rumo Tüpa ndoipotai oyesui opoi ñgua yuvireco.

⁹ Esepia, acoi opoi vahe güembireco mbahe ndoyavi vahe sui omendase ambuae cuña rese, ahe oyemboaguasa tēi vahe —ehi fariseo upe.

¹⁰ Ipare semimbohe aipo ehi yuvireco chupe:

—Ñgüe ehise cuimbahe güembireco rese, evocoiyase aviye catu ndayamendai chira —ehi.

¹¹ —Ndahe chira rumo opacatu osenducua che aipo ahe vahe yuvireco. Tüpa ombou vahe sembiaporã, ahe güeraño osenducua yuvireco —ehi güemimbohe upe—.

¹² Esepia, oime pihañemoñetasa ava mendañhi ñgua: amove ohasa suive ndatahii vahe, ambuae nomboahi ucai ava yuvireco, ambuae evocoiyase nimendasei. Esepia, ahe oporaviñi pota Tüpa mborerecuasa reseño ité. Acoi oicatu vahe co ñehesa reroña ñgua, toviroyaño —ehi.

Jesús osovasa chñhivahe

¹³ Ipare ahe pendar güeru moviro chihivahe Jesús upe yuvireco 'tomondo opo iharive; toyere avei sese no' oyapave; semimbohe rumo, "¿Mahera vo peruño tēi chihivahe?" ehiño serusar upe yuvireco.

¹⁴ Jesús rumo aipo ehi:

—¡Mahera ndapeipotai iyu āgua! Toyugüeruño chihivahe cheu. Esepia, co chihivahe nungar ava yuviroiquera che Ru povrive —ehi.

¹⁵ Ipare omondo opo chihivahe harive osovasa. Ichui osē oso.

Mbia chihivahe imbahe eta vahe omoñeta Jesús

¹⁶ Mbia chihivahe mbahe yar oso Jesús upe oporandu:

—Porombohesar, ¿mbahe vo aviye vahe ayapora tecovesa apirēhi vahe rereco āgua? —ehi.

¹⁷ —¡Mahera ereporandu cheu mbahe aviye vahe rese! —ehi—. Ñepeño ité aviye vahe oime. Erereco potase rumo tecovesa apirēhi vahe, emboyeroya mborocuaita —ehi.

¹⁸ —¿Uma vo aipo mborocuaita? —ehi.

Ahese omboyeví chupe:

—'Ndereporoyuca chira, nandeaguasai chira, nandemondai chira, nanderemirai chiveira ambuae ava rese,

¹⁹ eremboyeroyara nde ru, nde si avei, eresaisura ambuae ava nde yeaisu nungar eico' ehi icuachiapri pipe —ehi mbahe yar upe.

²⁰ —Co rumo mborocuaita opacatu amboaviye ité yepí. ¿Mbahe vo evocoyase ipane vite che ayapo vaheerā? —ehi.

²¹ —Ereipotase mbahe tupri pipe nde reco āgua, emondopa rane nde mbahe; ahe sepri evocoyase eremondora ava iparaisu vahe upe. Ichui ererectora mbahe aviye vahe ivave. Ipare ereguatara che rupi —ehi chupe.

²² Aipo oyeupe hese rumo, ahe mbia oyepepiño ichui oviharēhisave oso. Esepia, mbahe yar ité secoi.

²³ Evocoyase aipo ehi güemimbohe upe:

—Supi eté yavai eteanga imbahe eta vahe upe oiye vaheerā che Ru mborerecuasave.

²⁴ Aipo ahe iri: Yavai rai camello upe yucuar rupi seique āgua; ava imbahe eta vahe upe rumo yavai catu che Ru mborerecuasave seique āgua —ehi.

²⁵ Aipo iñehesa renduse, semimbohe oyepihamondii aipo ehi:

—¡Ava angahu pīha evocoyase oñepisiora yuvireco viña! —ehi yuvireco.

²⁶ Omahe güemimbohe rese, aipo ehi:

—Ava tēi upe yavai aipo nungar mbahe apo. Tūpa upe rumo mbahe opacatú ndayavaimi eté —ehi.

²⁷ Ahese Pedro aipo ehi chupe:

—Ore rumo oroseyapa opacatu ore mbahe nde rupi ore guata āgua. ¿Mbahe evocoyase oimera oreu? —ehi.

²⁸ —Oime itera niha mbahe pēu. Esepia, acoi arí oyepotase opacatu mbahe recuñaro āgua, ahese che, Ava Riquehír; aguapira che rendave che mborerecuasave. Pe avei, che rupindar, peguapira doce tenda harive. Ahese opacatu judío acoi doce imar Israel suindar recocuer rese peporandura curi.

²⁹ Acoi opacatu ava oseya vahe güeta, anise que viquehír, anise vivri, güeindri, que vu, mbahe osi, guahír, que oivi avei che raisusa pipe, ahe oipisira omahera cien yupagüer rupi mbahe oseya vahe iyavei virecora tecovesa apirēhi vahe.

³⁰ Seta vai rumo cūrítei yipindar vahe, ipa tēira yuvirecoi; setá aveira cūrítei ipa tēi vahe, yipindar yuvirecoira curi —ehi.

20

Yembohesa oporaviqui vahe resendar

¹ "Tūpa mborerecuasa inungar acoi ava ivi yar osē añihiveive oyeupe nara oporaviqui vahe reca 'toporaviqui che uva tive yuvireco' oyapave.

² Oyosuse ava, ahese omoingatu oyeupe oporaviqui vaheerā upe ñepeí arí mboraviqui repri imboepi āgua. Ahese opa omondo ocove imboporaviqui.

³ Ipare osē, oso añihivei, arivate catumi osepia ocarusu pipe ambuae ava oporaviquisa ndovirecoi vahe,

⁴ aipo ehi chupe: 'Peso, tapeporaviqui che uva tive. Amboepi tuprira niha pēu' ehi. Ahe evocoyase yuviraso oporaviqui āgua icove.

⁵ Ipare oso iri mbiter arí rupi oyeupe oporaviqui vahe reca, ēgüe ehi tupri avei caharuse, las tres rupi.

⁶ Ipa osē iri las cinco pipe, aheve avei osepia ambuae ava ndovirecoi vahe oporaviquisa yuvinoha. Chupe aipo ehi: '¿Mahera peyembohi tēi arí momba cohave pehá?'

⁷ ‘¡Aní!’ ehi yuvireco, ‘Esepia, ndipoi eté ava, tapeporaviquimi, ehi vahe oreu’ ehi. Evocoiyase, ‘Peso, pe avei peporaviqui tive’ ehi.

⁸ “Pítu ramose, cove yar aipo ehi oporaviqui vahe rese yangarecuar upe: ‘Eñehépa ava oporaviqui vahe upe. Emboepi ipa yugüeru vahe upe rane iporaviqui yuvireco chupe. Ipare tenonendar uve’ ehi.

⁹ Evocoiyase las cinco pipe yuviroique vahe oporaviqui, ahe rane tenonde yugüeru. Oyacatu ñepei-pei ñepei ari rupindar oipisi guarepochi yuvireco.

¹⁰ Ipare tenonde catu yuviroique vahe oporaviqui, ahe chupe ipa tēi imboepisa. Ahe ipihañemoñeta, ‘Yaipisi catura revo guarepochi’ ehi oyeupe yuvireco viña. Ipare rumo ahe tupriño avei oipisi ñepei ari rupindar yuvireco.

¹¹ Guarepochi pisire rumo oñemoiro cove yar upe yuvireco,

¹² aipo ehi: ‘Co ava yugüeru ipa tēi vahe, ñepei horami tēi oporaviqui yuvireco. Nde rumo eremboepi oyoya tupriño ité oreu eremboepi vahe rese. Oroñemosañi tēi oroporaviqui ari momba sacucuer upe oroico’ ehi.

¹³ Cove yar rumo aipo ehi ñepei ipāhu pendar upe: ‘Mbori, ndahei mbahe tēi ayapo ndeu. Esepia, amboepi guarepochi ñepei ari resendar ndeu acoi, Aviye, peye vahecuer rese cheu’ ehi.

¹⁴ ‘Evocoiyase ndo co, eipisi nde guarepochi, eraso. Che rumo amondo pota co ava ipa tēi oique vahe upe inungar tupri ndeu amboepi.

¹⁵ Esepia, cheu iyacatu ité che remimbotar rupi mbahe ayapo che guarepochi rese. Nderecatēhi tie ambuae ava mbahe rese che ayapose mbahe aviye vahe chupe’ ehi.

¹⁶ “Indó, ěgüe ehi aveira ava seco ivi coti catu vahe seco ivate catura yuvireco; iyavei yipindar ava seco ivate catu yuvirecoi vahe, ahe seco ivi coti catu tēi vaheṛā yuvireco curi” ehi güemimbohe upe.

Jesús omombehu iri omano āgua

¹⁷ Jesús oguata oso tecua Jerusalén piar rupi. Ahese co cotimi oipeha güemimbohe doce vahe oyeupe aipo ehi chupe:

¹⁸ —Peyapisaca tupri che ñehe rese: yasora tecua Jerusalén ve. Aheve che, Ava Riquehir, che pisira, che mondo pahi eta rerecuar iyavei Moisés porocuaita rese oporombohe vahe povrive yuvireco. Ahe, “Tomano” ehira yuvireco cheu.

¹⁹ Ipare che mondora ava ndahei vahe yande mu upe mara-mara tēi che rereco āgua che reroirosa pipe. Ipipe che yucara curusu rese yuvireco. Imombosapisa ari pipe rumo acuerayevira —ehi.

Santiago, Juan si oporandu Jesús upe mbahe rese omembri upe nara

²⁰ Ipare Zebedeo rembireco ñuvirío omembri reseve, oyemboya Jesús rese yuvireco. Ahese oñenopiha sovai oporandu āgua mbahe rese.

²¹ Evocoiyase,

—¿Mbahe vo ereipotami? —aipo ehi ichi upe.

—Che aipota che membri erembogupira ndeyepiri ñepei nde mbahe rese pocosa coti, ambuae nde mbahe rese pocoēhisa coti nde mborerecuasave —ehi chupe.

²² —Pe ndapeicuai mbahe rese peporandu. ¿Peiporara catura pīha co mbahe-mbahe tēi aiporara vaheṛā, inungar-ra que igua iro vahe aihu vaheṛā viña? —ehi.

—Taa, oroicatuño itera —ehi yuvireco.

²³ —Supi eté peiporarara mbahe-mbahe tēi. Co rumo ndiyai cheu, che piri opombogupai āgua che mbahe rese pocosa coti, ambuae che mbahe rese pocoēhisa coti avei. Che Ru rumo omingatu güembiporavo upe nara oguapi vaheṛā che ipive —ehi.

²⁴ Aipo iñehesa renduse ore ambuae diez semimbohe, oroñemoiro Santiago, Juan upe avei.

²⁵ Evocoiyase, “Perio” ehi oreu.

—Peicua niha acoi mborerecuar guasu yuvirecoi vahe Tūpa cuaparēhi oporocuai oporoyuca ai tēisa pipe, iyavei acoi ivate catu vahe oyeecoapirasá omborecuasa pipe yepi.

²⁶ Pe rumo ěgüe ndapeyei chira peico. Iyacatu rumo acoi ava oipota vahe ivate catu güeco āgua pe pāhuve, ihañeco rane itera opacatu ambuae ava rese.

²⁷ Iyavei acoi pe pāhu pendar oipota vahe tenonde catu güeco āgua, ihañeco tupri ranera opacatu pe pāhu pendar rese.

²⁸ Esepia, che, Ava Riquehir, ayu ndahei ava che rese ihañeco āgua, che rumo ayu ava rese che hañeco āgua iyavei amano vaheṛā ava eta repirā Carugar povri sui senose āgua —ehi.

Jesús ombogüera ñuvirío ndasesapisoi vahe

²⁹ Ipare Jesús, güemimbohe reseve oñocuase tecua Jericó yuvireco, ahese ava rehi yuviraso saquicuei.

³⁰ Aheve perĩ popĩve ñuvirĩo ava ndasesapĩsoi vahe oguapĩ yuvĩnoĩ. Evocoyase osenduse Jesũs ocuase supĩ, osapucapĩ pĩrata yuvĩreco chupe aipo ehi:

—¡Ore Yar, mborerecuar guasu David suindar, ore paraisuerecomi tẽi eve! —ehi yuvĩnoĩ.

³¹ Ahe ava oyaca-yacaño: “Quiriri” ehi yuvĩreco chupe. Ahe rumo osapucapĩ pĩrata catuño itẽ yuvĩreco aipo ehi:

—¡Ore Yar, David suindar, ore paraisuerecomi tẽira eve viña! —ehi iriño itẽ yuvĩreco.

³² Evocoyase osendu iñehe, opĩta, “Perio” ehi chupe. Ipare,

—¿Mbahe vo peipota ayapo vaherã pẽu? —ehi.

³³ —¡Ore Yar, ore mbosarecomi tẽi eve! —ehi.

³⁴ Evocoyase saĩsusave opoco sesa rese. Ahe ramoseve ndasesapĩsoi vahe osareco tupri ai etẽ yuvĩreco. Ipare yuvĩrasoño itẽ supĩ.

21

Jesũs oique Jerusalẽn pipe

¹ Acoi orovirovise Jerusalẽn, oroyepota tecuami Betfagẽ popĩve, ivĩtri Olivo serer vahe ipĩmi. Aheve omondo ñuvirĩo gũemimbohe

² aipo ehi chupe:

—Peso co tecuami yande rovindarve. Aheve pesepiara guaricu imembri reseve ñapĩchimbri imoha. Ahe peyorañora seru cheu.

³ Acoi que ava oporanduse yuvĩreco pẽu sese, “Yar oĩporu pota, ipare niha omboyevĩ voĩñora” peyera chupe —ehi gũemimbohe upe.

⁴ Co ãgũe ehi chupe arachendar Tũpa ñehe mombehusar ñehengagũer mboaviye ãgua, aipo ehi vahe:

⁵ “Pemombehu Siõn pendar upe:

‘Pesepia, pe rerecuar guasu ou oico gũeco mbegũesa pipe pẽu guaricu harive imembri reseve’ peyera” ehi.

⁶ Evocoyase evocoi semimbohe yuvĩraso, oyapo itẽ ocuaisa yuvĩreco.

⁷ Gũeru guaricu imembri reseve yuvĩreco chupe. Omondo oturucuar icupeao ãgua yuvĩreco. Ipare Jesũs oyepuĩ iharive.

⁸ Iyaveĩ ava rehĩ oĩpĩpĩra oturucuar perĩ rupi imboeteĩ guasusa pipe. Ambuae evocoyase oyasia pĩdo omondo perĩ rupi yuvĩreco saperã.

⁹ Ava rehĩ senonde, saquĩcui aveĩ oguata vahe osapucapĩ yuvĩreco aipo ehi:

—¡Co mborerecuar guasu David suindar, imboeteĩpĩ tasecoi! —ehi—. ¡Sovasapri secoi ou vahe yande Yar rer pipe! ¡Ivave imboeteĩpĩ tasecoi! —ehi yuvĩreco.

¹⁰ Oĩquese Jerusalẽn pipe, opacatu co tecua pĩpendar oyepĩhamondĩ yuvĩreco. Iyaveĩ setã oporandu-randu yuvĩreco:

—¿Ava pĩha co mbia? —ehi tẽi yuvĩreco.

¹¹ Ava rehĩ oguata vahe Jesũs rupi aipo ehi yuvĩreco chupe:

—Co niha Jesũs, Tũpa ñehe mombehusar, ivĩ Galilea rupindar, Nazaret pendar —ehi yuvĩreco chupe.

Jesũs omombopa ava mbahe mboepĩsar tũparo pipe sui

¹² Ipare Jesũs oique judĩo tũparo guasu pipe. Ipiendar opa omombo ichui ava mbahe mondosar, mbahe reroquasar. Iyaveĩ ava guarepochi recuñarosar mesa opa omboviapĩ ichui; apicasu mondosar renda aveĩ omboviapĩ imondo.

¹³ Ipare aipo ehi chupe:

—Icuachiapri arachendar pipe aipo ehi: ‘Che rẽta yeruresa rẽtarã’ ehi. Pe rumo imonda rai vahe rẽta nungar tẽi pereco —ehi.

¹⁴ Aheve oyemboya Jesũs rese yugũeru ava ndasesapĩsoi vahe, ipãri-pãri vahe aveĩ. Ahe opa ombogũera.

¹⁵ Osepiase rumo pahĩ rerecuar guasu iyaveĩ judĩo porocuaĩta rese oporombohe vahe yuvĩreco mbahe ndayasepiã vahe sembiapo, iyaveĩ tũparo pipe osenduse chĩhivahe sapucaĩsa: “¡Imboeteĩpĩ David suindar tasecoi!” ehise, ahese oñemoĩro yuvĩreco

¹⁶ aipo ehi chupe:

—¡Resendu vo aipo ehi tẽi vahe chĩhivahe yuvĩreco! —ehi.

—Taa, asendu itẽ —ehi—. Pe no, ¿ndapeyeroquĩ vo sesendar ñehesa icuachiapri pipe: ‘Chĩhivahemi, pĩtanĩmi aveĩ osapucaira nde mboeteĩsa pipe yuvĩreco’ ehi vahe? —ehi.

¹⁷ Ipare opaño oseya ava oso tecua Betania ve. Aheve ñepeĩ pĩtu oque.

Jesũs omomara ivĩra higuera ndĩhai vahe oñehe pipe

¹⁸ Ahere ayĩhĩve añihĩveĩve, oyeĩse tecua Jerusalẽn ve, Jesũs ndasĩepoi oico.

¹⁹ Aheve perĩ popĩve osepiã ivĩra higuera. Ahe sese oyemboya oso ‘¿Iha pĩha?’ oya viña. So gũeraño tẽi rumo osepiã. Evocoyase ahe aipo ehi chupe:

—¡Co pipe suive nandehai chietera! —ehi.

Aheseve voi opa ipiru.

²⁰ Ahe mbahe repiase, ore,

—¡Too, mara ehi rutei pīha co cūríteimi opa voi ipiru! —orohe tēi chupe.

²¹ Ahese omboveyi oreu:

—Acoi peyeroyase ité Tūpa rese, ahese ndahei co mbahe güeraño peyapora. Co ivitri uve avei rumo: ‘Esiri ave sui, eso para guasu pipe’ peyese, ahe evocoyase osiriño itera.

²² Indó, acoi peyerurese mbahe pe porandusa rese Tūpa rese pe yeroyasa pipe, peipisi itera ahe mbahe —ehi.

Jesús mborerecuasa

²³ Ichui Jesús oi que iri judío tūparo guasu pipe oporombohe. Ahese pahi eta rerecuar, judío rerecuar avei oyemboya sese, oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarā ndeu? —ehi.

²⁴ Evocoyase ahe aipo ehi chupe:

—Che avei aporandura mbahe rese pēu. Pemboveyise che porandusa, ahese che avei amombeura ava porocuaita rupi eté pīha ayapo co mbahe vichico.

²⁵ ¿Ava vo Juan ombou ava āpiramo āgua? ¿Tūpa pīha, ava tēi tie? —ehi.

Evocoyase oñemoñeta aipo ehi oyeupe yuvireco: “ ‘Tūpa ombou’ yahese chupe, ahe evocoyase omboveyira yandeu: ‘¿Mahera ru evocoyase ndaperoyai?’ ehira.

²⁶ Anise, ‘Ava tēi remimbou’ yahese rumo, aviyeteramo opacatu ava yande amotarēhira yuvireco. Esepia, opacatu: ‘Juan omombehu vahe ñehesa Tūpa suindar’ ehi eté yuvireco chupe’ ehi.

²⁷ Sese,

—Ndroicuaita eté Juan mbousar —ehiño yuvireco.

Ahese ahe aipo ehi:

—Evocoyase che avei, “Ahe iporocuaita pipe co mbahe ayapo” ndahei chietera pēu —ehi mborerecuar guasu upe.

Ñuvirío ava rahír recocuer sui yembohesa

²⁸ Iyavei Jesús aipo ehi judío rerecuareta upe:

—¿Mara ehi pe pihañemoñetasa co rese? Oime mbia vireco vahe ñuvirío guahír. Ahe aipo ehi ocuacua catu vahe upe: ‘Che rahír, co pipe eresora, eporaviqui cove’ ehi.

²⁹ ‘¡Nachequerēhi!’ ehi voiño. Coiye rumo, ‘¿Mahera ēgüe ahe?’ ehi. Ipare osoño ité, oporaviqui.

³⁰ Ipare oso ambuae guahír upe: ‘Eresora, eporaviqui cove’ ehi tupri avei. Evocoyase, ‘Asora, che ru’ ehi angahu. Ipare rumo ndosoi eté.

³¹ ¿Uma vo co ñuvirío yuvirecoi vahe oyapo vu remimbotar? —ehi.

—Co yipindar vahe —ehi yuvireco.

—Supi eté. Esepia, co angaipa viyar mbahe-mbahe tēi aposar, cuña oyemondo-mondo tēi vahe avei, ahe rane yuviroiquera Tūpa mborerecuasave pe sui.

³² Esepia, Juan Oporoāpiramo vahe ou co tecocuer ihívi vahe mboyecua āgua pēu pe reco tupri āgua viña. Pe rumo ndaperoyai eté. Co angaipa viyar iyavei co cuña oyemondo-mondo tēi vahe ava upe, ahe rumo viroya ité yuvireco. Yepe pesepia tēi opacatu evocoi mbahe viña, ipare rumo ndapeñecuñaroi pe recocuerai sui seroya āgua —ehi mborerecuar guasu yuvirecoi vahe upe.

Ava mbahe tēi oporaviqui vahe recocuer sui yembohesa

³³ “Pesendu ambuae ava recocuer rese yembohesa: Oime ivi yar oñoti vahe uva oivi pipe, ahe oñachi tupri sereco, oyapo uva riavii āgua; oyapo avei oi ivate vahe ahe sese mahemoha āgua. Ipare oseya oivi ava oporaviqui vahe upe iporu āgua. Ichui osē oso amombri vahesa rupi.

³⁴ Coiye oyeptase ari uva pohosa, ahese omondo güembiguai oporaviqui vahe upe imboporandu āgua ‘taipisi uva pohopri cheundar cute’ oyapave viña.

³⁵ Ipare rumo oporaviqui vahe oipisi sembiguai yuvireco: amove oinupa-nupa yuvireco, amove oyuca, oyapi-yapi avei amove ita pipe yuvireco.

³⁶ Ipare rumo ivi yar setá catu omondo iri güembiguai. Oporaviqui vahe rumo mara-mara tēiño avei vireco yuvireco.

³⁷ “Coiye rumo guahír teieté omondo chupe cute. Ahe ipihañemoñeta: ‘Omboyeroya catura revo che rahír yuvireco’ ehi viña.

³⁸ Evocoyase ahe ava tahír repiase, ‘Co aipo oipisira vu mbahe; yayucaño, evocoyase co ivi opítara yandeu nara’ ehi oyeupe yuvireco.

³⁹ Evocoiyase oipisi, vinose miti pãhu sui, oyuca ité yuvireco” ehi.

⁴⁰ “Acoi ouse ivi yar, ¿mbahe vo oyapora oporaviqui vahe upe?” ehi oñehe rendusar upe.

⁴¹ Ahe evocoiyase,

—Opara revo oyuca saisuẽhisa pipe ité co ava ndipihai vahe yuvireco. Ipare revo omondora oivi ambuae ava oporaviqui vahe uve iporu ãgua ‘ahe tombou voimi uva ipohopirer cheundar cheu curi’ ohesa pipe —ehi yuvireco.

⁴² Aipo ihe pare, aipo ehi oñehe rendusar upe:

—¿Ndaperoqui vo co aipo ehi vahe icuachiapri pipe?

‘Co ita oi aposar opaño omombo yuvireco.

Ahe ita rumo avíye catu vahe oi moviracua tupri ãgua.

Ëgüe ehi niha Yar yapo yande mohapisi ai eté’

ehi icuachiapri pipe.

⁴³ Sese che Ru Tũpa mborerecuasa serocuasara pe sui. Ambuae ava upe rumo imondosara.

Ahe virasora che Ru mombahe chupe.

⁴⁴ Acoi que oviapi vahe evocoi ita harive, opa tẽira ahe ae oyemomara; iyavei acoi oviapise evocoi ita que ava harive, ahese opa tupri aveira omocañi —ehi Jesús oñehe oyese.

⁴⁵ Acoi osenduse pahi rerecuar iyavei fariseo yuvirecoi vahe, osenducua oyesendar ñehesa yuvireco.

⁴⁶ Aheseve oipisi pota voi yuvireco viña. Osiquiyẽño rumo ava rehii sui yuvireco. Esepia, opacatu ava ipihañemoñeta: “Co ité Tũpa pĩratasa pipe oñehe” ehi yuvireco chupe.

22

Jesús oporombohe carusa mendasa resendar rese

¹ Ipare Jesús oporombohe iri ambuae ava recocuer rese aipo ehi:

² “Tũpa omborerecuasave inungar mborerecuar guasu guahir mendase oyapo pieta.

³ Ipare oyocuai güembiguai eta ‘ava ichohopri upe toyugüeru cute’ oya. Ichohopri rumo niquerẽhi iri yugüeru aheve.

⁴ Ipare oyocuai iri ambuae güembiguai eta aipo ehi: ‘Aipo peyera ichohopri upe: ¡Toyugüeruño ité! Esepia, opa ité oingatu tembihu iyavei ayuca uca tivi iyavei ambuae mbahe mimba iquira vahe. Che opacatu amoingatu. Sese toyugüeruño ité mendasave, ehi, peyera chupe’ ehi güembiguai upe.

⁵ Ichohopri rumo ndoviroyai eté yuvireco. Evocoiyase ñepeí osoño ocove, ambuae oso ombahe movendesave,

⁶ ambuae rumo oipisi sembiguai mara-mara tẽi sereco ãgua. Ahe ipipe oyuca yuvireco.

⁷ Evocoiyase mborerecuar guasu oñemoiro eteprisave omondo osundao eta co ava oporapichi vahe yuca ucapa ãgua, iyavei secua rapipa ãgua.

⁸ Ipare aipo ehi ambuae güembiguai eta upe: ‘Opa oingatu tembihu mendasave. Co rumo yipindar ichohopri, ndiya iri chira yugüeru vaheerã cohave.

⁹ Sese peso opacatu ava guata catusa rupi, peñehe mendasave yugüeru vaheerã opacatu pe rovaichisar upe’ ehi.

¹⁰ Evocoiyase sembiguai eta yuvinosepa yuviraso ocar rupi. Ahe osovaichi vahe setá omonuha yuvireco que seco tupri vahe, seco rai vahe avei; ãgüe ehi ava savapipo tupri oi guasu mendasave yuvireco.

¹¹ “Evocoiyase acoi mborerecuar oique ava ichohopri repia. Ipare omahecua tupri ñepeí ava ipãhu pendar rese. Ahe rumo ndomondei turucuar mendasa resendar.

¹² Evocoiyase aipo ehi chupe: ‘Che mboripar, ¿mara ere eique ave co turucuar mendasa resendar porẽhi?’ ehi. Ahe rumo noñehiño ité chupe.

¹³ Evocoiyase, ‘Peipisi co mbia, peñapichi ipi, ipo avei, pemose ocarve pĩtumimbisave. Aheve oyaseho tẽira, sãitere-tere tẽira mbaherasicuer rereco’ ehi ichohopri rese hañecosar upe.

¹⁴ Esepia, setá tẽi ichohopri, moviromi tẽi rumo iporavopri ipãhu sui” ehi mborerecuareta uve.

Fariseo osecõha iri tẽi Jesús guarepochi rese yuvireco

¹⁵ Ipare fariseo oñemonuha, ipihañemoñeta yuvireco oyeupe Jesús ñehe yavi uca ãgua mborerecuar rovai imomara-mara tẽi ãgua.

¹⁶ Ahe evocoiyase omondo moviro ovoya yuvireco mborerecuar Herodes rupindar reseve Jesús upe. Ahese aipo ehi angahu chupe:

—Porombohesar, ore oroicua nde supi eté vahe mbahe eremombehu eico iyavei eroporombohe mbahe supi tupri vahe Tũpa recocuer rese. Nde niha ndereroyai vahe ava ñehesa tẽi. Esepia, ava pihañemoñeta rupi ndereicoi vahe; nde pihañemoñeta rumo ñepeí reseve erereco.

¹⁷ ¿Mara ehi nde pihañemoñeta? ¿Aviyera pīha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

¹⁸ Oicua rumo fariseo pihañemoñeta raisa. Sese aipo ehi chupe:

—Pe seco tupri angahu tēi vahe peico. ¡Mahera che moingue pota mbahe tēi pipe peye!

¹⁹ Pemboyecua ru ñepe guarepochi mborerecuar guasu upendar cheu —ehi. Evocoyase güeru yuvireco chupe.

²⁰ —¿Ava rahanga vo co guarepochi rese chini iyavei ava rer vo co chini sese no? —ehi.

²¹ —Roma pendar mborerecuar guasu —ehiño fariseo yuvireco chupe.

—Pemondora evocoyase mborerecuar upe mbahe chupendar, Tūpa upendar mbahe evocoyase pemondora Tūpa upe —ehi fariseo upe.

²² Osenduse, oyepihamondii tēi yuvireco. Evocoyase yuvínose yuviraso ichui.

Saduceo oporandu Jesús upe cuerayevisa rese secoñahasave

²³ Ahe arí pipe saduceo “ndipoi eté cuerayevisa” ehi vahe yugüeru Jesús upe, oporandu tēi angahu yuvireco chupe:

²⁴ —Porombohesar, Moisés aipo ehi aracahe:

‘Que cuimbahe omanose guahiehiseve, ahese tivri omendara sembirecocuer rese ahe viquehir omano vahecuer upe nara tahirā oico’ ehi —ehi yuvireco chupe—.

²⁵ Cohave, ore pāhuve, oime siete tupri oyesuindar pāve yuvirecoi vahe. Yipindar vahe omenda. Ipare omanoño guahiehiseve. Evocoyase tivri omenda sembirecocuer rese.

²⁶ Ahe omano guahiehiseve avei no. Ēgüe ehi avei opacatu ambuae tivri, omano avei guahiehiseve yuvireco.

²⁷ Opacatu imano pare, cuña avei omano cute.

²⁸ Evocoyase opase ocuerayevi yuvireco, ¿uma rese ité pīha opitara ahe cuña? Esepia, opacatu niha omenda yuvireco sese —ehi saduceo yuvireco chupe.

²⁹ —Pe pihañemoñetasa co coti tēi eté. Esepia, ndapeicuai eté Tūpa ñehe icuachiapri arachendar, ndapeicuai avei Tūpa pīratasa —ehi—.

³⁰ Esepia, acoi omano vahe ocuerayevisa, chupe ndipo iri chira mendasa. Ahe rumo Tūpa rembiguai iva pendar nungar yuvirecoira ivave —ehi—.

³¹ Co cuerayevisa resendar rumo amombehura pēu. Avíve ndapeyeroqui anga vahe acoi Tūpa omombehu vahecuer rese. Supi eté ahe aipo ehi aracahe:

³² ‘Che Abraham, Isaac iyavei Jacob Tūpa aico’ ehi. ¡Tūpa ndahei omano vahecuer Tūpa, ahe rumo oicove vahe ité Tūpa secoi! —ehi.

³³ “¡Too!” ehi ava rehii. “¡Mara ehi rutei iporombohesa!” ehi tēi yuvireco.

Porocuita avíve catu vahe

³⁴ Ipare fariseo oyanduse yuvireco Jesús omonguiriripañose saduceo oyesui, ahese oñemonuha yuvireco.

³⁵ Ñepe ipāhu pendar Moisés porocuita rese oporombohe vahe, ahe oyemboya oso Jesús rese oporandu ‘toyavi oñehe Moisés porocuita sui yandeu’ oyapave viña:

³⁶ —Porombohesar, ¿uma ité vo porocuita avíve catu vahe opacatu ambuae porocuita sui? —ehi.

³⁷ Evocoyase ahe aipo ehi chupe:

—‘Eresaisura nde Yar Tūpa opacatu nde pihañemoñetasa pipe, opacatu nde recocuer pipe, nde yapisacasa pipe avei’ ehi.

³⁸ Co porocuita avíve catu vahe ambuae porocuita sui.

³⁹ Imoñuviriosa inungar tupri avei aipo ehi no: ‘Eresaisura ambuae ava nde yeaisu nungar’ ehi.

⁴⁰ Co ñuvirío porocuita rupi oguata opacatu Moisés porocuita icuachiapri, opacatu Tūpa ñehe mombehurar rembicuachía avei —ehi.

¿Ava suindar pīha Poropīsīrosar?

⁴¹ Fariseo ñemonuha vitesave,

⁴² Jesús oporandu chupe:

—¿Mara ehi pepihañemoñeta acoi Tūpa Rembiporavo ou vaheṛā ava pīsīro āgua rese? ¿Ava suindar-ra pīha secoi? —ehi.

—Ahe niha David suindar secoira —ehi fariseo yuvireco chupe.

⁴³ Ahese aipo ehi fariseo upe:

—¿Mahera pīha evocoyase David oñehese Espíritu pīratasa pipe aracahe, “Che Yar” ehi chupe? Esepia, ahe aipo ehi:

⁴⁴ Yar aipo ehi che Yar upe:

Eguapi che acato coti acoi che amondose voi eté nde amotarēhimbar nde povrive yuvireco’ ehi David aracahe.

45 Evocoiyase, ¿mahera ru: “Poropĩsirosar David suindar secoira” peye, David teieté, “Che Yar” ehise chupe? —ehi fariseo upe.

46 Evocoiyase ndoicatu iri imboyevi ãgua yuvireco cute. Ahe ari pipe sui ndipo iri que ñepe iquerẽhi vahe ñehe avi uca ãgua oñehe pipe yuvireco.

23

Jesús oicua uca fariseo iyavei Moisés porocuita rese oporombohe vahe recocuerai

1 Ipape Jesús aipo ehi ava eta upe, oreu avei no:

2 “Co Moisés porocuita rese oporombohe vahe iyavei fariseo eta, ahe icuita Moisés porocuita mombehu tupri ãgua yuvireco.

3 Sese iya peroyañõ ité iyavei peyapo opacatu mbahe semimombehu; aní chira rumo peyapo mbahe sembiapo ai. Esepia, omombehu tupri tẽi mbahe viña, ipape rumo co coti tẽi mbahe oyapo yuvireco.

4 Iyavei omondo porocuita inungar mbahe ndayasupi catui vahe ava upe ‘tomboaviye opacatu ité yuvireco’ oya. Ahe ae rumo nomboaviyei eté que ñepe oporocuita yuvireco no.

5 Oyapo angahu mbahe opacatu ava rembiepiave yuvireco yepi ‘tayande repia yuvireco’ oyapave tẽi. Osiva rese, oyiva rese avei ipe guasu vahe vireco-reco tẽi oturucuar rese Tũpa Ñehengagũer cuachiapri yuvireco. Iyavei ipi catu vahe oturucuar popi moarõ ãgua omondo yuvireco.

6 Oipota carusa rupi güenara aviye catu vahe yuvireco, oseca avei tenda porañete catu vahe güenara otũparo pipe yuvireco no.

7 Oipota avei ava oyeupe ‘avirave’ apo ãgua omboteisave ocar rupi iyavei oipota, ‘Porombohesar’ oyeupe he yuvireco.

8 “Pe rumo, ‘Porombohesar’ ndapembohe ucai chira ava peyeupe. Esepia, pe opacatu guasu peyeivri peico, iyavei ñepeñõ ité pereco pe Mbohesar.

9 Iyavei, ‘Che ru’ ndapeyei chira que ava co ivi pipendar tẽi upe. Esepia, ñepeñõ ité pe Ru pereco, ahe niha iya pendar.

10 Ndiyai avei, ‘Mborerecuar’ pembohe uca ava peyeupe. Esepia, Poropĩsirosar güerañõ ité pe rerecurar secoi.

11 Acoi ava seco ivate catu vahe, ahe toporopĩtivii güeco mbegüesa pipe.

12 Esepia, acoi oyemboivate ai vahe opara seco reroyisa, iyavei acoi ava seco mbegüe vahe, ahe seco mboivate catusara curi.

13 “¡Peparaisu catu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tẽi vahe peico! Pemombitañõ ava Tũpa povrive seique rãgũer sui peico yepi. Pe avei eté ndapeiquei ipovrive, iyavei acoi yuviroique pota vahe pemombitañõ seique rãgũer sui.

14 “¡Peparaisu catu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tẽi vahe peico! Esepia, perocua-rocuañõ tẽi cuña imer mano vahecuer rẽta ichui, ipape peyeroqui tupri tẽi angahu ava rembiepiave. Sese peipisira Tũpa ñemoirosa ipĩrata catu vahe curi.

15 “¡Peparaisu catu itera pe Moisés porocuita rese oporombohe vahe, pe avei fariseo, pe guata tẽi angahu vahe Tũpa rese! Peguata opacatu ivi rupi iyavei para guasu rovai rupi ava mbohe. Ipape rumo pe remimbohecuer mbahe tẽi catu pe sui. Pe nungar carugar ratave nara tẽi pereco uca.

16 “¡Peparaisu catu itera, pe ava mbohesar ndasesapisoi vahe nungar peico! Pe aipo peye tẽi vahe: ‘Yamombehuse mbahe tũparo rer pipe yande ñehe mboaviye ãgua, ãgüe yahe tẽi eté; co rumo yamombehuse mbahe oro tũparo pendar rer pipe, ahese iya itera yamboaviye yepi’ aipo peye tẽi.

17 ¡Pe ndapembahecui vahe nungar, ndasesapisoi vahe nungar avei peico! ¿Uma vo aviye catu vahe: oro pĩha, anise tũparo tie? Tũparo pipe niha oro rovasasa yepi.

18 Iyavei co uve avei aipo peye tẽi peico: ‘Yamombehuse mbahe seropovẽhepri renda rer pipe yande ñehe mboaviye ãgua, ãgüe yahe tẽi eté; co rumo mbahe yamombehuse mbahe seropovẽhepri renda hari pendar rer pipe yande ñehe mboaviye ãgua, ahese iya ité yamboaviyera yande ñehe yepi’ aipo peye tẽi.

19 ¡Pe ndasesapisoi vahe nungar peico yepi! ¿Uma vo aviye catu vahe? ¿Evocoi porerrecosa seropovẽhepri pĩha, anise mbahe seropovẽhepri renda tie? Ahe tenda harive niha porerrecosa sovasasa yepi.

20 Sese acoi mbahe omombehu vahe mbahe seropovẽhepri renda rer pipe oñehe mboaviye ãgua, ndahei serer pipe güerañõ, omombehu avei opacatu ihari pendar mbahe seropovẽhepri rer pipe,

²¹ iyavei acoi ava omombehu vahe mbahe tūparo rer pipe oñehe mboaviye āgua, ahe omombehu ipendar rer pipe avei. Ahe niha Tūpa seci.

²² Iyavei acoi omombehu vahe mbahe que ambuae ava upe iva resendar rer pipe oñehe mboaviye āgua, omombehu avei Tūpa recua rer pipe, Tūpa rer pipe avei. Esepia, Tūpa aheve ité seci.

²³ “¡Peparaisu catu itera, pe Moisés porocuita rese oporombohe vahe iyavei pe fariseo peico vahe, pe peyapo angahu tēi vahe pe recocuer pipe mbahe peico yepi! Yepe pemondo ñepeí-peí diez pe remiti menta, anis, comino pereco vahe sui ñepeí Tūpa uve nara viña, pe rumo pepoi co porombohesa aviye catu vahe porocuita resendar sui. Ahe peyapora mbahe ihívi vahe, peporoparaisuerecora iyavei pemboaviye tuprira pe cauita yepi. Iyacatu rumo ahe pemboaviye aveira viña.

²⁴ ¡Pe ava mbohesar ndasesapisoi vahe nungar peico! Pe pembogua rutei mbahe rahicuer sui pe igua; mbahe tuvicha vahe rumo pemocoño ité evocoyase. Ēgüe peye co mborocuita upe.

²⁵ “¡Peparaisu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tēi vahe! Esepia, inungar igua riru iyavei tembihu riru icupe rupi tēi yoseipri. Ipipe rumo iquiha opitaño ité. Ēgüe ehi tēi pe recocuer pe monda raisave, mbahe pota-pota tēisave avei.

²⁶ ¡Pe fariseo peico vahe, ndapepihañemoñetai vahe mbahe pe rembiapo ai rese, pe moatiro rane pe piha pipe mbahe yavaeté vahe sui! Ahese ramo pe rembiapo icatuprira cute.

²⁷ “¡Peparaisu catu itera, pe Moisés porocuita rese oporombohe vahe, fariseo peico vahe, peyapo angahu tēi vahe mbahe pe recocuer pipe peico! Pe recocuer inungar tuvipa imomorochimbrí tēi. Iharive tēi icatupri chupe. Ipipe rumo tehögüer cangüer iyavei opacatu mbahe yavaeté vahe ovireco oyese.

²⁸ Ēgüe peye: ava rembiepiave aviye pe reco ihívi vahe viña, pe piha pipe rumo oime pe porombopasa iyavei opacatu mbahe-mbahe tēi.

²⁹ “¡Peparaisu catu itera pe Moisés porocuita rese oporombohe vahe, pe fariseo peico vahe, pe reco tupri angahu tēi vahe! Esepia, pemoingatu Tūpa ñehe mombehusar ruvipagüer peico sese pe yemomahenduha āgua iyavei pemoporañete ai tēi ava seco ihívi vahe ruvipagüer yepi viña.

³⁰ Ipare aipo: ‘Yande yaicose revo aracahe yande ramoi recose, ndayaipítivi chietera Tūpa ñehe mombehusar yuca āgua yuvireco viña’ peye tupri tēi.

³¹ Aipo peyese rumo, pemboyecua Tūpa ñehe mombehusarer yucasar suindar pe yesusa.

³² ¡Pemboeyepi iriño evocoyase pe ramoi rembiapocuerai!

³³ “¡Pe mboi vai suindar tēi peico! Ndapesoyepi chira rumo Tūpa ñemoirosa sui, pesora rumo tata guasuve.

³⁴ Evocoyase che amboura pēu Tūpa ñehe mombehusar ava yaracua vahe iyavei ava pe mbohe āgua yuvireco viña. Amove rumo ipāhu pendar peyucara, ambuae peyaticara curusu rese sereco. Ambuae peinupara pe ñemonuhasa rupi iyavei ambuae peseca-secara peico tecua yacatu rupi.

³⁵ Sese pēuño ité oura Tūpa ñemoirosa opacatu ava aviye vahe yuca agüer rese co ivi pipe; Abel seco ivi tupri vahe yuca agüer sui, ipare opacatu ambuae saquicuerindar ava yuca agüer sui, ipa Berequías rahir Zacarías sui avei, ahe peyuca vahe tūparo pipe mbahe seropovēhepri renda rovai.

³⁶ Supi eté opacatu co mbahe tēi oura pe recove vitesevé” ehi.

Jesús oyaseho Jerusalén pendar rese

³⁷ “¡Too rutei, pe Jerusalén pendar, peyuca vahe Tūpa ñehe mombehusar, ita pipe peyapiyapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembri opepovrive! Ēgüe ahe pota tēi pe rereco viña, pe rumo ndapeipotai eté evocoi nungar pe rereco āgua.

³⁸ Sese seyapirā tēi peicora.

³⁹ Esepia, ndache repiai chira peye acoi, ‘¡Imboeteipri Yar remimbou tasecoi!’ peyese voi che repia irira peye” ehi Jesús ava eta upe.

24

Jesús omombehu judío tūparo guasu mocañi āgua

¹ Ipare Jesús osē judío tūparo pipe sui oso. Aheseve ore semimbohe oroyemboya sese aipo orohe chupe: “¡Ore Yar, esepia co tūparo!” orohe.

² Ahe rumo:

—Supi eté amombehu pëu: co opacatu pesepia vahe, ndipoi chietera que ñepeí ita oyeha vite vahe. Opacatu ité imondurusara curi —ehi oreu.

Jesús omombehu mbahe oime vaherã ari cañi renonde

³ Ipare Jesús oso ivitri Olivo ve oguapi oí. Aheve ore güeraño tupri oroso chupe mbahe rese ore porandu água:

—Emombehu catu oreu: ¿Mbahese vo aipo mbahe yaviyera? ¿Mbahe poromondiisa rese rane vo icuasara nde yu água iyavei ari cañi água? —orohe chupe.

⁴ —Peicua catu, peyembopa ucai rene ambuae ava upe peico.

⁵ Esepia, setá ava yugüerura, ‘Che aico Tüpa remimbou ava písiro água’ ehi tẽira ava eta mbopa yuvireco.

⁶ Iyavei pesendura ñehesa vavasa resendar cohava iyavei que rupi. Ndapeyembosiquiyei chira rumo ichui. Esepia, êgüe ehi rane itera niha; ndehi vitei chira rumo ari cañisa.

⁷ Esepia, ñepeí ivi pipendar ovavara ambuae ivi pipendar rese oyeupe yuvireco. Ahese oimera tiavor, ivi ririí opacatu-catu tẽi tecua rupi.

⁸ Opacatu evocoi mbahe rumo omboipi ramomi vahe mbahe tẽi porarasa.

⁹ “Ahese pe písira yuvireco mara-mara tẽi pe rereco água, pe yuca água avei. Iyavei opacatu ava-ava tẽi ndape ambotai chira che recocuer sui tẽi yuvireco.

¹⁰ Ahe ari rupi evocoiyase setá ava ndache reroya iri chira yuvireco. Ahe oyeamotarẽhira iyavei omondora ambuae omboetasagüer yamotarẽhimbar povrive yuvireco.

¹¹ Iyavei setá Tüpa ñehese mombehusar angahu tẽi oimera, ahe ava ombopa-mbopa tẽira yuvireco.

¹² Ombouvicha catura mbahe-mbahe tẽi naporai vahe. Ipipe sui ndoyeaisu tupri iri chira ava yuvireco.

¹³ Acoi ava oyemoviracua vaheño rumo ari ipa vahe rupi, ipísiropi yuvirecoira.

¹⁴ Iyavei co ñehesa icatupri vahe Tüpa mborerecuasa resendar imombehusapa ranera opacatu ivi rupi icua uca água. Ahese ramo oimera cañisa co ivi pipe” ehi oreu.

¹⁵ “Tüpa ñehese mombehusar Daniel oicuachia mbahe-mbahe tẽi aposa resendar oime vaherã tüparo guasu maranehi vahe pipe aracahe. Ahe pesepiase oi maranehi pipe —acoi oyoerqui vahe, ahe tosenducua tupri yuvireco—,

¹⁶ evocoiyase Judea ve yuvirecoi vahe toñemipa poyava ivitri rese yuvireco ichui;

¹⁷ iyavei acoi güeta harive yuvirecoi vahe ogüeyise, toique iri eme güetave ombahe reca;

¹⁸ iyavei acoi que rupi tẽi yuvirecoi vahe, toyevi iri eme güetave que oyeaosa renose água yuvireco.

¹⁹ Iparaisu itera cuña ipuruha vahe, imembi pítani vahe avei yuvireco!

²⁰ Peporandu Tüpa upe pe recua pipe sui pe sêehi água irohí pipe, mbituhusa ari pipe avei.

²¹ Esepia, ahe ari pipe ava iparaisu catura opacatu yipive ava ivi apo ramo suive yuvirecoi vahe sui. Ipare ndipo iri chietera evocoi nungar.

²² Iyavei nomombituhise Tüpa co ari naporai vahe, ndipoi chietera ava oñepisiro vahe yuvireco viña. Ahe rumo güembiporavo raisusa pipe omombituhura” ehi.

²³ “Iyavei que ava, ‘Esepia co Poropísirosar secói’; anise, ‘Peve secói’ ehise yuvireco pëu, aní chira peroya aipo ehi vahe.

²⁴ Esepia, yugüerura ava ‘che Poropísirosar aico’ ehi tẽi vahe iyavei ‘che amombehu vahe Tüpa Ñehengagüer’ ehi angahu tẽi vahe; iyavei oyapora mbahe ava ndoyapoi vahe poromondiisa güeco pıratasa mboyecua água yuvireco. Ipipe osecoãhara Tüpa rembiporavo imbopa água yuvireco.

²⁵ Opa aipo co senondeve amombehu pëu.

²⁶ Sese que ava pëu: ‘Pesepia pe ivi iporupirẽhisave secói’ ehise, pesoi rene aheve seroyasave, aní chiveira peroya acoi ‘pesepia co secói oi pipe’ ehi vahe yuvireco.

²⁷ Che rumo inungar overa vahe sendi añihivei sui caharu coti ocua iva rese, êgüe ahera che, Ava Riquehir, opacatu ava rembiepiave ayevi irise vitu curi.

²⁸ Esepia, mbahe rehögüer reimesave, uruvu oñemonuha ati yuvireco yepi” ehi güemimbohe eta upe.

Jesús yevi água resendar

²⁹ “Ahe ari pipe mbahe-mbahe tẽi pare cūrteimi ndoyecua iri chira ari, yasi avei ndosesape iri chira, yasıtata avei opara oviapi iva sui iyavei iva resendar mbahe oririira yuvireco.

³⁰ Ahese oimera iva rese iporẽhi vahe che, Ava Riquehir, yu água resendar. Evocoiyase opacatu ava-ava tẽi co ivi pipendar oyaseho tẽira osiquiyepave yuvireco. Che repia aveira yuvireco agüeyise iva quihá rese che pıratasa rendigüer porañetesa pipe.

³¹ Iyavei amboura che rembiguai eta iva pendar. Ahe evocoiyase güemimbi omoñehe pīratara opacatu che rembiporavo co ivi rupindar que amombri rupi yuvirecoi vahe monuha āgua” ehi.

³² “Peyembohera ivira higuera recocuer sui: Co ivira soqui ramose, yaicua cōimi ari sacu vahe yepota āgua yandeu yepi.

³³ Na ehi aveira pēu che ñehe rupi tupri mbahe pesepiase, sese peicuaa cōimi eté che yevi āgua.

³⁴ Supi eté yuvirecove vitera ava osepia vahe co mbahe opase yaviye.

³⁵ Iva, ivi opara ocañi, che ñehengagüer rumo imboaviyesa rane itera.

³⁶ “Ndipoí eté rumo ava oicua vahe ari iyavei hora che yevi āgua. Iva pendar che Ru rembiguai avei ndoicuai yuvireco. Che avei ndaicuai eté. Che Ru güeraño ité rumo oicua.

³⁷ “Inungar ava Noé recose yuvirecoi aracahe, ēgüe ehi tupri aveira che, Ava Riquehír, yevi āgua renonde.

³⁸ Yipive amarusu renonde, ahese ava ocaru, oihu; guahír, guayri avei omomendaño yuvireco. Noé arca pipe seiquese, ēgüe ehi vite yuvireco.

³⁹ Nomohai eté rumo amarusu viapi āgua yuvireco oyeupe viña, ēgüe ehi rumo avieteramo tēi amar oviapi imocañipa. Ēgüe ahe aveira che, Ava Riquehír, ayevi avieteramo tēi.

⁴⁰ Evocoi ari pipe oimera ñuvirío ava amombri güecua sui yuvirecoi vahe: ñepeí serasosara, indugüer rumo opitara.

⁴¹ Ēgüe ehi aveira ñuvirío cuña ohicho vahe upe: ñepeí serasosara, indugüer rumo opitara.

⁴² “Sese pemahemoha yepi. Esepia, ndapeicuai mbahe ari pipe che, pe Yar, ayevira iva sui.

⁴³ Iyavei peyapisaca tupri co rese: inungar acoi oi yar oicuaese revo que hora pītu pipe imonda vahe yepota āgua, ahese imahemohara sese güeta pipe seiqueēhi āgua viña.

⁴⁴ Ēgüe peye aveira peyemoingatu che yevi āgua rese. Esepia niha, che, Ava Riquehír, aporoepiña tēira vitu curi” ehi.

Mbiguai omboaviye vahe ocuaita, nomboaviyei vahe avei

⁴⁵ “Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseya icuaitarā güeta pipendar rese hañeco āgua ‘tembihu tomondo che rēta pipendar upe che porocuita rupi’ ohesave.

⁴⁶ Acoi omboaviyese ocuaita, ahese oviharetera güerecuar yevise.

⁴⁷ Supi eté niha serecuar oyocuai opacatu ombahe rese hañeco āgua.

⁴⁸ Ahe mbiguai rumo ndipihaise ‘ndoyepota vitei chira revo che rerecuar’ oya,

⁴⁹ omboetasa omboipi mara-mara tēi sereco iyavei oyemboya caguar tēi rese ipiri ocaru iyavei oihu tēi āgua.

⁵⁰ Ipare rumo serecuar oyepotara imahemohaēhiseve.

⁵¹ Ahese omombaraisu catura, ‘Tinupasa, ava seco tupri ai angahu tēi vahe nupasa nungar pipe’ ehira chupe. Ahese oyaseho tēira, oyemoaitere-tere tēi aveira” ehi güemimbohe upe.

25

Diez cuñatai ndaseco marai vahe resendar ñehesa

¹ “Evocoi ari pipe Tüpa mborerecuasa inungar-ra mendasave diez cuñatai ndaseco marai vahe virasora tataendi ambuae cuña mevi pisi āgua yuvireco.

² Ipāhuve yuvirecove cinco ndipihañemoñetai vahe, ambuae cinco rumo ipihañemoñetai tupri vahe yuvireco.

³ Ipare ndipihañemoñetai vahe oipisi guataendirā yuvireco, ndovirasoi rumo yandi guataendi riru mboapipo iri āgua yuvireco;

⁴ evocoi ipihañemoñetai tupri vahe rumo viraso yandi siru pipe guataendi reseve yuvireco.

⁵ Acoi ndoyepota apihaise cuña mevi, ahese sopesii tēi yuvireco. Coiye opaño yuviroque yuvireco ichui.

⁶ Pitu mbiter senise rumo, osendu ñehesa aipo ehi vahe yuvireco: ‘¡Coi imevi turi! ¡Pesē ipisi āgua cute!’ ehi.

⁷ Evocoiyase opacatu evocoi cuñatai oñarapuha voi iyavei omoingatu guataendi yuvireco.

⁸ Ahese nimahemohai vahe aipo ehi ambuae imahemoha vahe upe yuvireco: ‘Pemboumi tēi chíhi pe yandi oreu. Esepia, ogüe pota ité ore rataendi’ ehi tēi yuvireco.

⁹ ‘Aní, ndiyai chira revo oromondo vaherā pēu. Iyacatu revo peso imboepisave serocua peyeupe nara’ ehi.

¹⁰ Imboepi yuvirasos viteseve, ou cuña mevi cute. Oyemoingatu vahe rumo yuviroique supi mendasave. Evocoiyase saquicuerive voi omboya oquenda rārosar.

¹¹ Ipape oyepotase ambuae cinco cuñatai yugüeru aipo ehi yuvireco oi yar upe: ‘¡Emboimi tēi oreu!’ ehi tēi yuvinoha.

¹² ‘Aní, ndopocuai vahe ité’ ehiño chupe.

¹³ “Pe evocoyase pemahemohara. Esepia, ndapeicuai mbahe ari pipe, mbahe hora pipe che, Ava Riquehir, ayevíra” ehi Jesús oreu.

Ñehesa guarepochi mondosa resendar

¹⁴ “Iyavei Tūpa omborerecuasave inungar-ra ava mbahe yar oso āgua renonde ivi amombrisave omonuha güembiguai oguarepochi rāro āgua viña.

¹⁵ Yipindar ñepepe upe omondo cinco mil guarepochi, ambuae upe omondo dos mil, iyavei imombosapisa upe omondo mil tēi: ahe omondo ñepepepepe upe seco etegüer rupi-rupi. Ipape voi oso cute.

¹⁶ Evocoyase evocoi mbiguai oipisi vahe cinco mil guarepochi, ahe oporaviqui co guarepochi rese. Ipape sui coiye oipisi catu iri ambuae cinco.

¹⁷ Inungar avei ambuae oipisi vahe dos mil, ichui oipisi catu iri ambuae dos mil.

¹⁸ Ambuae oipisi vahe rumo ñepepe guarepochi, ahe oyoho ivicuar. Aheve oñoti güerecuar guarepochi.

¹⁹ “Ipape coiye oyeviserecuar, ahese oñehe güembiguai upe oguarepochi retacuer cua āgua.

²⁰ Yipindar cinco mil guarepochi oipisi vahe ranengatu oyemboya güerecuar rese aipo ehi: ‘Ndo co acoi erembou vahe cinco mil cheu, ichui co ambuae cinco aipisi irimi ndeu’ ehi.

²¹ ‘Aviye ité, nde mbiguai seco aviye vahe ereico iyavei eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarā. Indó, eique che piri, yayembovihara che rese’ ehi chupe.

²² Ipape ambuae sembiguai oipisi vahe dos mil guarepochi, oyemboya güerecuar rese aipo ehi chupe: ‘Ndo co erembou vahe dos mil cheu. Ipape sui co ambuae aipisi irimi dos mil avei ndeu’ ehi.

²³ ‘Aviye ité, nde mbiguai seco aviye vahe, eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarā. Indó, eique che piri, yayembovihara che rese’ ehi avei chupe.

²⁴ “Ipape acoi oyepotase ambuae mbiguai oipisi vahe mil guarepochi, ahe aipo ehi güerecuar upe: ‘Che aicua nde reco; nde acoi ndihavai vahe ereico. Esepia, ava remitigüer tēi eremouha iyavei imbovepepirer tēi avei ereipisi nde yeupe nara.

²⁵ Sese che siquiyesa pipe añomi ivivrive nde guarepochi. Ndo co nde mbahe’ ehi chupe.

²⁶ ‘Nde mbiguai ndaseco pōrai vahe, yangaipa vai vahe avei ereico. Nde niha ereicua che recocuer aipisise mbahe nañoti vahe sui.

²⁷ Ereyapocatumira che guarepochi guarepochi apocatusave cuese rahe viña che yevise voi senose āgua cheu imboyevi catumi āgua viña’ ehi.

²⁸ Ipape aipo ehi: ‘Perocua guarepochi ichui, pemondora evocoi diez rupi guarepochi omboeta vahe upe’ ehi.

²⁹ ‘Indó, acoi vireco vahe mbahe, chupe imondosa catura, sumbire aveira; acoi ndovirecoi vahe rumo mbahe, opaño itera serocuasa mbahe sembierecomi ichui.

³⁰ Sese pemose co mbiguai ēgüe ehi tēi vahe ocarve pitumimbisave. Aheve toyaseho, tasaitere tēi oñ ehira serecuar chupe” ehi Jesús oreu.

Jesús oura opacatu ava recocuer rese porandu āgua

³¹ “Che, Ava Riquehir, ayevisere, opacatu che Ru rembiguai ivi pendar reseve che reco ivategüer pipe, ahese aguapira che renda porañete vahesave ava recocuer rese porandu āgua.

³² Evocoyase ava opacatu tecua rupindar imonuhasara che rovai yuvireco. Ahese aipehara ava oyesui, inungar ovesa rārosar oipeha vahe ovesa cavara sui.

³³ Che evocoyase ovesa aipehara mbahe rese che pocosa coti, cavara mbahe rese che pocōhisa coti.

³⁴ Ahese che mborerecuar ivate catu vahe aipo ahera che acato cotindar upe: ‘Perio pe opacatu che Ru sui sovasapri peico vahe, peique che Ru mborerecuasa pipe; ahe acoi yipive ivi apo ramo suive imoingatupri pēu nara.

³⁵ Esepia, ndacheripeise, pe evocoyase pembou mbahe che remihura; iyavei che huseise, pe evocoyase pembou taihu; che aguata tēise pe recua rupi vichico, pe avei oi pembou che que āgua.

³⁶ Turucuar cheu ipanese, pe avei pembou che turucuarā; chembaheasise, peso avei che piri; che roquendasave peso avei che repia no’ ehi.

³⁷ Evocoiyase evocoi seco catupri vahe aipo ehira yuvireco cheu: ‘Ore Yar, ¿mbahese vo nde repiasa nanderiepoise eico iyavei imondosa nde remihura? ¿Mbahese vo nde repiasa ndehuseise, ipare imondosa tereihu?’

³⁸ ¿Mbahese vo nde repiasa nde guatase ore recua rupi, ipare nde monguesa ore piri, ipanese nde turucuarã, ore aipo evocoiyase oromondo ndeu?

³⁹ Iyavei, ¿mbahese vo aipo nde repiasa nembahesise, anise que nde roquendasave, aheve aipo oroso nde repia yepi? ehira yuvireco cheu.

⁴⁰ Evocoiyase che, mborerecuar ivate vahe, ambojevira yuvireco chupe aipo ahera: ‘Supi eté, opacatu mbahe peyapose que ñepeí seco mbegüemi vahe che reroyasar pãhu pendar upe viña, cheu rumo êgüe peye’ ahera.

⁴¹ ‘Ahese aipo ahera cute che mbahe rese pocoẽhisa cotindar upe: ‘Pesiri che sui. Esepia, pe peico Tũpa ñemoirosavri pendar. Pesopa tata guasu apirẽhisave, evocoi imoingatupri opacatu carugar upe nara serecuar reseve.’

⁴² Esepia, ndacheriepoise, pe evocoiyase: Yamondomi icaru ãgua, ndapeyei eté cheu; che huseise, ahese, Yamondomi toihu, ndapeyei avei cheu;

⁴³ ambuae tecua pipe aguata tẽise vichico, ahese, Eique che rõtave che piri, ndapeyei eté cheu. Ipanese che turucuarã, pe rumo ndapembou cheu, chembahesise vichico, iyavei che roquendasave, Yasomi tẽi sepi, ndapeyei eté cheu’ ahera.

⁴⁴ ‘Ore Yar, ¿marase vo aipo nde repiasa nanderiepoise, anise aipo nde huseise, ipanese nde turucuarã ndeu no, nembahesise, anise nde roquendasave, marase vo mbahe rese nande pĩtviĩsai?’ ehi tẽira yuvireco cheu.

⁴⁵ ‘Supi eté acoi amove mbahe ndapeyapose que seco mbegüemi vahe upe viña. Ipipe rumo cheu avei mbahe ndapeyapoi eté’ ahera.

⁴⁶ Ahe ava yuvirasora Tũpa ñemoirosa apirẽhi vahesave. Seco ñvi vahe rumo teco ori opaẽhisave yuvirasora” ehi Jesús oreu.

26

Jesús yamotarẽhimbar omboguai yuca ãgua yuvireco

¹ Ipare Jesús aipo ehi oreu:

² —Pe peicua ñuvirio ari tẽi ipane vite co Pascua pieta yepota ãgua yandeu. Ahese che, Ava Riquehir, imondopri aicora che atica ãgua curusu rese yuvireco —ehi.

³ Ahe pipeve avei Jerusalén ve, co pahĩ rerecuareta, iyavei judio rerecuareta oñemonuha yuvireco pahĩ rerecuar ivate catu vahe Caifás rõtave.

⁴ Aheve oñemoñeta: ‘Yambopa ipisi yuca ãgua’ ehi yuvireco oyeupe.

⁵ Ahe rumo:

—Ndiyai pieta pipe ité yaipisi ava rehii yemondii guasuẽhi ãgua yandeu —ehi.

Cuña oipiyere Jesús ãca rese mbahe siacua vahe

⁶ Jesús tecua Betania ve secoi, Simón lepra vireco vahecuer rõtave.

⁷ Aheve mesave chiniseve, cuña vireco vahe mbahe siacua vahe siru reseve viroyepota chupe. Ahe oipiyere Jesús ãca rese.

⁸ Orosepiase rumo oroñemoiro aipo orohe oreyeupe:

—¡Mahera vo co omocañi tẽi!

⁹ Omondo vahe ité tie co setã guarepochi rupi ava iparaisu vahe pĩtivii ãgua viña —orohe tẽi chupe.

¹⁰ Jesús rumo oicua ore pihãmoñetasa. Sese aipo ehi oreu:

—¡Mahera vo co cuña pemañeco tẽi! Esepia, co mbahe oyapo vahe aviye ité cheu.

¹¹ Ava iparaisu vahe niha yuvirecoiño itera pe pãhuve. Che rumo êgüe ndahe viteñoi chira vichico pe pãhuve.

¹² Esepia, co cuña oipiyere mbahe siacua vahe che rese che tĩ ãgua renondeve.

¹³ Supi eté aipo ahe pẽu: co ñehesa pĩsirosa resendar mombehuse opacatu tecua rupi, imombehusa aveira co cuña rembiapo sese mahenduha ãgua —ehi.

Judas Iscariote oyemoingatu Jesús mondo ãgua yamotarẽhimbar povrive

¹⁴ Ipare ñepeí ore pãhu pendar, Judas Iscariote, oso, oñehe pahĩ eta rerecuar yuvirecoi vahe upe

¹⁵ aipo ehi:

—¿Mbovi rupi vo pemboepira cheu amondose Jesús pẽu viña? —ehi.

“Treinta guarepochi rupi” ehi yuvireco chupe.

¹⁶ Ahesa reseve voi oisca Jesús mondo ãgua yamotarẽhimbar upe.

Jesús caru agüer ipa vahe güemimbohe rese

¹⁷ Ari yipindar vahe pieta resendar, pan ndayapepoi vahe husa pipe, ahese ore Jesús remimbohe oroico vahe oroyemboya sese aipo orohe:

—¿Que vo ereipotata oromoingatura carusa Pascua pieta resendar yandeu? —orohe chupe.

¹⁸ Evocoyase,

—Peso tecua guasuve che cua vahe rêtave aipo peyera chupe: ‘Ore Mbohesar aipo ehi: Cõimi che mano âgua, sese ayapo potami sêtave Pascua pieta che remimbohe reseve, ehi ndeu’ peyera chupe —ehi.

¹⁹ Evocoyase oyapo semimombehu rupi tupri ité yuvireco, omoingatu carusa Pascua pieta resendar yuvireco aheve.

²⁰ Pîtu ramomise, opacatu oroguapi mesave Jesús pîri ore caru âgua.

²¹ Ore carusave aipo ehi oreu:

—Supi eté aipo ahe pëu: ñepei pe pâhu pendar che mondora che amotarêhisar upe —ehi.

²² —Che Yar, ¿che pîha? —orohe-rohe tõi ñepei-peï ore yacatu ore viharêhisa pipe chupe.

²³ —Omondo vahe opo che caro pipe, ahe che mondora che amotarêhisar upe —ehi—.

²⁴ Imboaviyesa itera che, Ava Riquehir, rese ñehesa icuachiapri. ¡Iparaisu catura rumo acoi mbia che mondosar! Aviye catura ndoyesuisse viña —ehi.

²⁵ Ahese Judas imondosavi oporandu:

—Ore Mbohesar, ¿che tie? —ehi.

—Taa, inde ité niha êgüe erera! —ehi chupe.

²⁶ Ore caru viteseve, Jesús oipisi pan, “Aviye ndeu” ehi Vu upe. Aipo ohe pare, ombohimbohi oreu imondo, aipo ehi:

—Ndo co, pehu co che rete —ehi.

²⁷ Ipare oipisi igua riru, “Aviye ndeu” ehi Vu upe. Aipo ohe pare ombou oreu aipo ehi:

—Peihu peyacatu co sui.

²⁸ Esepia, co che ruvi, ahe omoimera che Ru remimbotar ipiasu vahe pëu, ahe oyepiyerera ava rehii angaipa rese ñero âgua.

²⁹ Ndaihu iri chira uva ricuer cheu ari oyepotase voi che Ru mborerecuasave aihura pe rese ambuae uva ricuer ipiasu vahe —ehi oreu.

Jesús, “Ndaicuai vahe ité aipo mbia’ erera cheu” ehi Pedro upe

³⁰ Ore sapucaire, oroso ivitri Olivo ve.

³¹ Evocoyase Jesús aipo ehi oreu:

—Opara pemocañi che rese yeroyasa peyesui co pîtu pipe. Esepia, acoi icuachiapri pipe aipo ehi: ‘Ayucara ovesa rârosar, ahese oñemosai tẽira ovesa opacatu rupi yuvireco’ ehi vahe.

³² Che cuerayevire rumo, aso voi etera pe renonera Galilea ve —ehi.

³³ Pedro rumo,

—Yepe ambuae opacatu nande reroya iri chira yuvireco, che rumo ndayepipi chietera nde sui —ehi chupe.

³⁴ —Che rumo supi eté aipo ahe ndeu: co pîtu pipeve voi eté tacura ñehes renondeve, “Ndaicuai vahe ité aipo mbia” erera mbosapi oyupagüer rupi cheu —ehi Pedro upe.

³⁵ Pedro rumo,

—Yepe amanora nde rupi viña, che rumo, “Ndaicuai vahe aipo mbia” ndahei chietera —ehi-ehi catuño ité chupe.

Aipo orohe pâve tupri tõi chupe.

Jesús oyerogui Getsemaní ve

³⁶ Ipare Jesús rupi orosoño Getsemaní ve. Aheve aipo ehi oreu:

—Peguapi cohava; che aso ranera peve catumi, ayeroqui —ehi.

³⁷ Aheve viraso Pedro oyepui iyavei ñuvirio Zebedeo rahir. Ahese oyandu oviharêhisa oico.

³⁸ Evocoyase ahe aipo ehi chupe:

—Ndavihai eté. Esepia, che hã oyandu ité manosa. Pepita rane cohava iyavei pemahe-mohara pe yeroqui pipe che rese —ehi.

³⁹ Evocoyase oso tenonde catumi. Aheve oñenopiha ovapi ivi rese oyerogui Vu upe aipo ehi: “Che Ru, iyase ndeu che renose mbahe-mbahe tõi sui eve; tayapo eme ru che remimbotar tõi, nde remimbotar rupi catu tayapo” ehi.

⁴⁰ Ipare oyevi güemimbohe upe. Ahe rumo opaño yuviroque yuvirocua. Ahese aipo ehi Pedro upe:

—¡Ndapeñemosai eté vo pe ropesii upe che rãro âgua que ñepei hora che mondugüe âgua peye!

⁴¹ Pemahemoha, peyerogui mbahe tõi pipe pe viapiêhi âgua. Supi eté pequerêhi ité viña, pe retecuer tõi niha nipiratai pëu —ehi.

⁴² Ichui imoñuviriosa rupi oso iri oyerocu i aipo ehi: “Che Ru, ereipotase che reique ãgua co mbahe tẽi pipe, eyapo nde remimbotar che rese” ehi.

⁴³ Ipare oyevisẽ, osesapiha iri iqueseve ou. Esepia, sopesi nomboyeroyai etẽ yuvireco.

⁴⁴ Evocoiyase oseyapa iri oso oyerocu ãgua imombosapisa rupi. Aipo ehi tupriño avei oyerocu Vu upe.

⁴⁵ Ipare oyevi iri güemimbohe upe aipo ehi chupe no:

—¡Pequeño vite vo peyu! Osupiti che, Ava Riquehir, mondo ãgua ava yangaipa vahe povrive.

⁴⁶ Pepũha, yaso. Esepia, cõimi etẽ che amotarẽhisar upe che mondo vaheã secõi —ehi.

Jesús oipisi yuvireco

⁴⁷ Jesús ñehe viteseve, Judas oyepota oso chupe. Ahe ñepe semimbohe ore pãhu pendar, iyavei setã iteanga ava yugüeru quise pucu, ivira reseve-seve supi. Ahe pahi eta rerecuar yuvirecoi vahe judio rerecuareta porocuaita rupi oyapo yuvireco.

⁴⁸ Yipindar rumo imondosar Judas aipo ehi: “Asovaupitese, ahese peicura; ahe peipisira” ehi.

⁴⁹ Ipare oyemboya voi oso sese.

—¡Avirave, Porombohesar! —ehi sovaupite.

⁵⁰ —Che mboripar —ehi Jesús—, eyapoño mbahe nde remimbotar cheu —ehi.

Aheseve voi oipisi yuvireco.

⁵¹ Evocoiyase semimbohe secõi vahe supi vinose oquise pucu, oyasia pahi rerecuar ivate catu vahe rembiguai nambi.

⁵² —¡Ani! —ehi güemimbohe upe—. Emoingue siru pipe nde quise pucu. Esepia, acõi ava opacatu ovava vahe oquise pipe yuvireco, ipipe avei opara yucasa yuvireco.

⁵³ ¿Ndereicuai vo aporanduse che Ru uve viña, ahe evocoiyase cõritei voi omboura doce mil sui setã catu vahe güembiguai che repi ãgua viña?

⁵⁴ ¿Egüe ehise rumo Tũpa Ñehengagüer icuachiapri ndayaviyei chietera viña, ahe co cõritei osupiti —ehi.

⁵⁵ Ahese aipo ehi ava rehii upe:

—Pe quise pucu, ivira reseve-seve rutei co peyu che ropeña che pisi ãgua imonda rai vahe nungar che rereco peye. Che ari yacatu rupi aguapise pe pãhuve pe mbohe ãgua tũparo pipe, ndapeyapoi etẽ co nungar cheu.

⁵⁶ Co rumo opacatu egüe peye Tũpa ñehe mombehusar rembicuachiagüer mboaviye ãgua cute —ehi ava rehii upe.

Ahese voi opacatu oroñemosaipe, oroseya ahe aetemi Jesús ava rehii upe imoha.

Jesús serasosa pahi rerecuar ivate catu vahe rovai

⁵⁷ Ahese Jesús pisisar viraso Caifás rõtave yuvireco, ahe pahi rerecuar ivate catu vahe secõi. Aheve oñemonuha Moisés porocuaita rese oporombohe vahe, judio rerecuar yuvirecoi vahe avei no.

⁵⁸ Pedro rumo amombri rupive tẽi osaquicue moña oso. Egüe ehi oyepota pahi rerecuar ivate catu vahe rẽta rocar achisave. Aheve oi que ipipe, iyavei oguapi oĩ sundao pãhuve ‘¿mara ehi etera pãha sereco yuvireco?’ oya.

⁵⁹ Ahese pahi eta rerecuar iyavei opacatu porandusa ivate catu vahe pendar, ahe oñhengapo-ngapo uca tẽi ava Jesús amotarẽhisave yuca uca ãgua yuvireco,

⁶⁰ yepe oyemboyecua setã iteanga yamotarẽhisar semira-mira tẽi vahe yuvireco viña, ndoyosui etẽ rumo mbahe sembiapo naporai vahe yuca uca ãgua yuvireco. Aheseve yugüeru ñuvirio yamotarẽhisar oporombopa-mbopa tẽi vahe yuvireco cute.

⁶¹ —Co mbia aipo ehi: ‘Che aicatu co tũparo monduru; aicatu aveira imopuha iri mbosapi ari rupi’ ehi —ehi tẽi yuvireco chupe.

⁶² Ahese pahi rerecuar ivate catu vahe opũha, oporandu Jesús upe:

—¿Mahera vo nderemboyeve etẽ iñehe yuvireco chupe? ¿Mbahe ehi vo aipo nde amotarẽhisar nde rese oñehe? —ehi.

⁶³ Noñehei etẽ rumo. Ahese,

—Che orocuai Tũpa supi etẽ vahe rer pipe emombehu oreu: ¿Poropĩsirosar itẽ nde ereico, Tũpa Rahir? —ehi pahi rerecuar ivate catu vahe chupe.

⁶⁴ —Taa, supi etẽ niha aipo aipo ere cheu, co catu amombehura pẽu, che repiara niha peye che, Ava Riquehir, aguapise Tũpa mbahe mboavaisarẽhi acato coti, ayevisẽ avei iva quiha rese curi —ehi.

⁶⁵ Evocoiyase pahi rerecuar ivate catu vahe imboasipave omondo oturucuar aipo ehi: —¡Indó, mbahe tẽi etẽ iñehe Tũpa upe! ¡Mbahe iri vo yaipota vite yaico! Yasendupa niha aipo Tũpa upe iñehe-ñehe tẽisa cõritei.

⁶⁶ ¿Mara ehi aipo pe pihave? —ehi.

—Supi eté, oyaví mbahe. ¡Tomanoño ité! —ehiño ivoya eta yuvireco chupe.

⁶⁷ Ahese ondiví-ndiví sova rese iyavei yuvirocua-rocua yuvireco sese. Ambuae osovapete-pete,

⁶⁸ aipo ehi yuvireco chupe:

—Nde niha aipo ereico Tüpa remimbou Poropísiosar, ¿eicua ité ru, ava evocoi ocua nde rese? —ehi yoyai catu-catu yuvireco.

Pedro, “Ndaicuai vahe evocoi mbia” ehi Jesús upe

⁶⁹ Pedro evocoiyase oguapi sâro ocarve ñachimbrí pipe oí. Aheve oyemboya cuña mbiguai oso sese aipo ehi chupe:

—Nde avei Jesús Galilea pendar rupindar ereico —ehi.

⁷⁰ Ahe rumo aipo ehiño opacatu ava rovaque:

—Ndaicuai aipo nde ñehesa —ehiño cuña mbiguai upe.

⁷¹ Ichui oso oquendipive. Aheve omahe ambuae cuña sese. Ahe sepiase aipo ehi ava ahe pendar yuvirecoi vahe upe imombehu:

—Co ava avei acoi secoi Jesús Nazaret pendar rupi yepi —ehi ava upe.

⁷² —¡Aní! —ehi iri ahe cuña upe—. ¡Tüpa oicua, supi eté ndaicuai aipo mbia! —ehi angahu tēi.

⁷³ Iparemi tēi aheve yuvirecoi vahe, oyemboya sese aipo ehi yuvireco chupe:

—Nde avei eté niha supindar ereico. Esepia, nde ñehhe pãrigüer rese nde cuasaño —ehi yuvireco.

⁷⁴ Ahe evocoiyase,

¡Tüpa niha oicua ndopombopai eté niha! ¡Che ndaicuai vahe ité evocoi mbia, ahe mo aipo pēu! —ehi angahu tēi chupe.

Aipo iheseve, tacura oñehhe.

⁷⁵ Ahese Pedro oyemomahenduha Jesús oyeupe, ‘Acoi tacura ñehhe renondeve mbosapi oyupagüer rupi: Ndaicuai vahe ité aipo mbia, erera cheu’ ihe agüer rese. Ahese osē, oyasehó iteanga oso.

27

Jesús serasosa Pilato rovai

¹ Cōhe ramose, ahese opacatu pahi eta rerecuar, judío rerecuar avei oñemonuha ati oyemboyoya guasu ‘Jesús tayucasa ité’ oyapave yuvireco.

² Ipare oipocua-pocua seraso mborecuar guasu Pilato upe yuvireco.

Judas yeyuca agüer

³ Judas, acoi Jesús omondo vahe yamotarēhisar uve oicua, “Jesús tayucasa cute” ehise, ahese tasi iteanga chupe. Evocoiyase oso voi tēi tüparo guasuve pahi eta rerecuar yuvirecoi vahe upe iyavei judío rerecuareta upe treinta guarepochi mboyeví ñgua aipo ehi:

⁴ —Che ayemboangaipa tiēte vichico. Esepia, amonduño tēi mbia seco catupri vahe pēu yuca uca ñgua —ehi mborecuareta upe.

—Mara etemo ore orovireco. ¡Nde remimbotar niha! —ehiño yuvireco chupe.

⁵ Evocoiyase opaño guarepochi omombó tüparo pipe. Ichui voi oso oyemboyaseco, oyeyuca.

⁶ Pahi eta rerecuar rumo omonuhase guarepochi aipo ehi yuvireco oyeupe:

—Ndiyai rumo yamondo co guarepochi porerecosa riru pipe. Esepia, ava yucapirā repri tēi —ehi yuvireco.

⁷ Ipare oyoya guasu ipihañemoñeta yuvireco co guarepochi rese ñaihu rese oporaviquí vahe ivi reroocua ñgua ‘toime ava secua ambuae vahe rehögüer tī ñgua’ oyapave yuvireco.

⁸ Sese cūríte co ivi upe, “Ava ruví repri tēi” ehi yuvireco yepi.

⁹ Ēgüe ehi co imboaviye ité Tüpa ñehhe mombehusar Jeremías remimombehugüer aipo ehi vahe: “Oipisipa treinta guarepochi yuvireco, ahe ava Israel suindar mborecuar remimombehugüer rupi eté evocoi mbia pisi ñgua.

¹⁰ Ipipe vircua ñaihu rese oporaviquí vahe ivi yuvireco. Cheu che Yar omombehu vahecuer rupi tupri ité oyapo yuvireco” ehi Tüpa ñehhe mombehusar arachendar.

Jesús serasosa mborecuar Pilato rovai

¹¹ Jesús serasosa mborecuar Pilato upe, ahese Pilato oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, ‘Ahe ereico’ ere cheu —ehiño imboyeví Pilato upe.

¹² Evocoiyase acoi pahi eta rerecuar iyavei judío rerecuareta oñemonuha vahe eipeve oiñhengapo-ngapo tēi yuvireco. Nomboyeví eté rumo iñehhe chupe oyeepi ñgua.

¹³ Evocoiyase:

—¿Nderesendui vo aipo co opacatu ndeu ñehe-ñehe tēisa? —ehi Pilato chupe.

¹⁴ Nomboyevii eté rumo que ñepei angara ñehesa chupe viña. “¡Too, mara ehi rutei vo co!” ehi-ehi tēi mborerecuar chupe.

“¡Tayaticasa!” ehi Jesús upe ava yuvireco

¹⁵ Mborerecuar guasu recosa ité ñepei ava soquendapri renose água Pascua pieta pipe ava rehii remimbotar rupi yepi.

¹⁶ Aheve oime soquendapri mbia icuapri vahe ité Barrabás serer vahe;

¹⁷ evocoyase ava rehii oñemonuha atise, Pilato oporandu chupe yuvireco:

—¿Uma peipota che amose ucara pēu: Barrabás pñha, anise Jesús “Poropísirosar” ehi vahe yuvireco chupe tie? —ehi.

¹⁸ Esepia, ahe oicuaño ité ava rese yemoecatēhisa pipe sui imondopri secoise.

¹⁹ Pilato güendave chini viťeseve, sembireco omondo oñehe chupe aipo ehi: “Ereyapoi rene mbahe evocoi ava seco catupri vahe upe. Esepia, che querve asepia mbahe tēi eté sesendar” ehi.

²⁰ Evocoi pahi eta rerecuar iyavei judío rerecuareta rumo ava rehii omonguerēhi, “Barrabás tošē; Jesús evocoyase tomano” he água yuvireco.

²¹ Evocoyase Pilato oporandu iri ava rehii upe:

—¿Uma peipota catu co ñuvirío yuvirecoi vahe sui amose vaherã pēu? —ehi.

—¡Barrabás tošē! —ehi yuvireco.

²² —¿Mbahe vo evocoyase che ayapora Jesús rese chupe acoi ava, “Poropísirosar” ehi yuvireco? —ehi.

—¡Tayaticasa curusu rese! —ehi ati-atiño yuvireco chupe.

²³ —¿Mbahe ité vo oyapo naporai vahe? —ehi tēi ava rehii upe.

Ahe rumo:

—¡Tayaticasa ité curusu rese! —ehi ati-ati iriño yuvireco chupe.

²⁴ Evocoyase Pilato: “Ndaicatu mbahe moingatu sepi água” ehi tēi oyeupe. Sese ava yaivu guasu catu-catu irise, ogüeru uca i. Ipipe oyepoi opacatu ava rehii rovaque aipo ehi: —Ndahe che remimbotar rupi co mbia yucasara; pe remimbotar rupi eté —ehi.

²⁵ —¡Ore rese ité, ore rahir rese avei toviapi que mbahe tēi co mbia mano sui! —ehi atiño ité yuvireco.

²⁶ Ahese Pilato omose uca Barrabás; Jesús rumo oinupã iteanga uca tucumbo tupeicha nungar pipe imondo curusu rese yatica água.

²⁷ Evocoyase mborerecuar sundao viroique Jesús ambuae oi pipe. Aheve opacatu omboetasa omboyere tupri uca sese yuvireco.

²⁸ Ahese osequiipa iturucuar ichui. Ipare omonde turucuar pñra vahe yuvireco sese

²⁹ iyavei omonde ñaca rese yu piapri, omondo avei ñepei tacuarmi mbahe rese ipocosa coti ipove yuvireco. Ipare oñenopiha angahu sovai yuvireco aipo ehi:

—¡Imboeteipri judío rerecuar tasecoi! —ehi angahu sese oguayĩ tēisa pipe yuvireco.

³⁰ Iyavei ondivi-ndivi yuvireco sese. Ipare yuvirocua-rocua ipo pendar tacuarmi pipe ñaca rese yuvireco.

³¹ Ēgüe ehi yoyai catu-catu yuvireco. Ipare virocuase turucuar pñra vahe ichui, ahese omonde iturucuar ité yuvireco sese. Ichui viraso curusu rese yatica água yuvireco cute.

Jesús yaticasa curusu rese

³² Acoi yuvinosese yuviraso, osepia mbia Cirene pendar, Simón serer vahe. Ahe chupe, “Erio, terevosii co curusu Jesús vireco vahe rese” ehi voño tēi yuvireco.

³³ Oyepotase yuviraso Gólgota serer vahesave, ahe ‘ava ácagüer’ oya aipo ehi chupe,

³⁴ aheve uva ricuer imboyesehapri mbahe pihaupiar rese omondo tēi yuvireco Jesús toiñu. Osãha tēi, ndoiñu potai rumo.

³⁵ Ipare oyatica curusu rese yuvireco. Ahese sundao iguayĩño oyeupe iturucuar mboyaho-yaho água rese.

³⁶ Ipare aheve oguapi yuvinoi sãro.

³⁷ Iyavei omombehu ivate curusu rese ñaca harive mbahe sui oyuca yuvireco: “Co Jesús judío rerecuar guasu” ehi icuachiapri oĩ.

³⁸ Ñuvirío imonda rai vahe yaticasa avei curusu rese supive yuvireco, ñepei mbahe rese ipocosa coti, ambuae evocoyase mbahe rese ipocoēhisa coti yuvireco.

³⁹ Acoi ava ñocuasar iñehe-ñehe tēi, oñeaca mbovava,

⁴⁰ aipo ehi yuvireco chupe:

—Nde acoi, “Opara tũparo amonduru. Ipare mbosapi ari rupi opa irira amopuha” ere acoi cuese. ¡Eñepisiro ru nde ae cute! ¡Tũpa Rahir nde recose, egüeyi curusu sui! —ehi tēi yuvireco chupe.

⁴¹ Aipo ehi avei pahi eta rerecuar, Moisés porocuita rese oporombohe vahe iyavei judío rerecuareta avei; ahe iñehe mara-mara tēi yuvireco chupe aipo ehi:

⁴² —Oipĩsĩro ambuae, ahe ae rumo ndoicatui oñepisĩro. Israel rerecuar guasu secoise, ¡togüeyi curusu sui cūrítei, ahe se voi seroyasara!

⁴³ Ahe oyeroya Tūpa rese, Tūpa evocoiyase oipotase, toipĩsĩro cūrítei. Esepia, ahe, “Che Tūpa Rahir aico” ehi yandeu cuese —ehi yuvireco.

⁴⁴ Hmonda rai vahe avei rumo acoi yaticapri supive, ahe avei mara ehi-ehi tēi chupe.

Jesús mano agüer

⁴⁵ Ahese mbiter ari pipe, opa tupri pĩtu ivi rupi. Ēgüe ehi las tres rupi.

⁴⁶ Ahese tupri avei Jesús oñehe pĩrata aipo ehi: “Elí, Elí, ¿lema sabactani?” ehi, (ahe ‘che Ru Tūpa, che Ru Tūpa, ¿mahera vo che reya eve?’ oyapave aipo ehi).

⁴⁷ Ava aheve yuvirecoi vahe osenduse iñehe, aipo ehi yuvireco:

—Esendu co mbia, Tūpa ñehe mombehugar Elías upe oñehe —ehi yuvireco chupe.

⁴⁸ Aheseve voi imboetasa oña, oso mbahe saviyu vahe reca, omoaqui vinagre pipe imondo ivira apri rese chupe ‘toihu’ oya.

⁴⁹ Ambuae rumo aipo ehiño yuvireco:

—Ēgüe tehiño rane, ¿oura pĩha Elías ipĩsĩro āgua? —ehi yuvireco.

⁵⁰ Ahese Jesús sãse pĩrata iri, omano.

⁵¹ Ahe pipeve voi tūparo guasu turucuar ivate coti sui ovo tupri. Aheseve avei ivi orirĩi iyavei ita guasu-guasu oyeca.

⁵² Tehögüer ruvĩpa ita apopri avei oyemboi yuvireco iyavei setá Tūpa reroyasar omano vahecuer, ahe avei opa ocuerayevi yuvireco.

⁵³ Ēgüe ehi Jesús cuerayevire, ahe opa yuvĩnose tehögüer ruvĩpa sui. Ipare yuviroique Jerusalén maranehi pipe. Aheve setá ava upe oyemboyecua yuvireco.

⁵⁴ Evocoiyase co sundao rerecuar iyavei Jesús rãrosareta, ahe oyanduse ivi rirĩi yuvireco iyavei ambuae mbahe Ēgüe ehi vahecuer repiase, aheve oyembosiquiye guasu aipo ehi yuvireco:

—¡Supi eté catu co mbia Tūpa Rahir ité secoi! —ehi tēi yuvireco.

⁵⁵ Iyavei setá cuña aheve amombrive osepia catu yuvĩnoha, ahe acoi Galilea sui yugüeru vahecuer Jesús rupi iyavei setá rupi oipitivĩi yuvireco yepi.

⁵⁶ Ahe ipãhuve María Magdalena secoi, iyavei ambuae María ahe Santiago, José si, Zebedeo rahir si avei supi secoi.

Jesús apocatu agüer tuvĩpa pipe

⁵⁷ Pĩtu potase, ou mbia mbahe yar José serer vahe, ahe Jesús reroyasar tecua Arimatea pendar.

⁵⁸ Evocoiyase ahe oso Pilato upe oporandu Jesús rehögüer rese. Evocoiyase Pilato aipo ehi: “Aviye, timondosaño chupe” ehi.

⁵⁹ José evocoiyase vĩraso sehögüer. Ipare oimama tupri turucuar secose vahe ndiquihai vahe pipe.

⁶⁰ Ichui omoingue ombahe tuvĩpa ipiasu vahe, ita oyoho uca vahe pipe. Ipare osovapi ita guasu yapayere vahe pipe oso.

⁶¹ Aheve María Magdalena ambuae María rese suvĩpa rovai oguapi yuvĩnoi.

Jesús ruvĩpa osãro sundao yuvireco

⁶² Ahere ayihive mbĩtuhusa ari pipe, yuvĩraso pahi eta rerecuar iyavei fariseo Pilato upe mbahe rese oporandu āgua

⁶³ aipo ehi yuvireco:

—Ore rerecuar, ore oroyemomahenduha acoi iporombopa serai vahe ñehe agüer rese: “Acuerayevira mbosapi ari pare omano vahe pãhu sui” ehi acoi cuese oicove vitesse —ehi yuvireco—.

⁶⁴ Sese emondo sundao sehögüer ruvĩpa rãro tupri āgua mbosapi ari rupi semimbohe ñomiẽhi āgua pĩtu pipe yuvireco. Aviyeteramo, “Ocuereyevi omano vahe pãhu sui” aipo ehi tupri tēi tiẽtera ava upe yuvireco. Aipo ehise yuvireco, yipindar semira tēi vahe sui ivate catura serecosa —ehi yuvireco.

⁶⁵ Pilato evocoiyase aipo ehi chupe yuvireco:

—Aviye —ehi—. Amondora sundao pẽu. Peraso, pemovĩracua tupri ité sãro āgua —ehi.

⁶⁶ Evocoiyase yuvĩraso tehögüer ruvĩpa rãro tupri āgua yuvireco. Ahese omondo tehögüer rovapisa ita guasu rese mbahe imomiãsa cua āgua yuvireco. Ipare oseya aheve sundao sãro āgua yuvireco cute.

28

Jesús ocuerayevi

¹ Cõhe ramomise, domingu pipe, María Magdalena iyavei ambuae María yuviraso tehõgüer ruvipa repia yuvireco.

² Aviyeteramo tõi oririĩ pĩratá ivi Tũpa rembiguai iva sui igüeyise. Êgüe ehi oyepota tehõgüer ruvipave ou, ahe virocuat itape guasu sovapisa ichui. Ipare iharive oguapi õi.

³ Êgüe ehi sendĩ iteanga aviye acoi overa vahe. Iturucuar evocoiyase morochĩ eté.

⁴ Osepiase sundao, oririĩ eteanga osiquiyepave yuvireco ichui, opa oyuca pucu-pucu tõi yuvireco.

⁵ Tũpa rembiguai rumo aipo ehi voi eté cuña upe:

—Pesiquirei rene. Esepia, che aicua pe peseca Jesús yatıcapirer.

⁶ Ndipoi eté cohave. Esepia, ahe ocuerayevi güemimombehu rupi eté. Tapesepia ru supagüer —ehi.

Ipare aipo ehi:

⁷ —Peso poyava voi, tapemombehu semimbohe eta upe: ‘Ocuerayevi omano vahe pãhu sui iyavei ahe rane osora pe renonera Galilea ve. Aheve pesepiara’ tapeye chupe. Co che cuaita imombehu ãgua pẽu —ehi Tũpa rembiguai cuña upe.

⁸ Evocoiyase cuña yuviraso poyava voi suvipa sui, osiquiye pãhuve rumo ovihaño yuvireco; êgüe ehi yuvinoña iteanga imombehu yugüeru oreu.

⁹ Ahese Jesús oyemboyecua cuña upe cute omboavirave. Ahe cuña evocoiyase oyemboya sese oñenopiha ipicuhaguã imboetisave yuvireco.

¹⁰ Evocoiyase ahe aipo ehi chupe:

—Pesiquirei rene che sui. Pesoño, tapemombehu che reroyasareta upe. Ahe toyuviraso Galilea ve. Aheve che repiara yuvireco —ehi cuña upe.

Sundao omombehu mbahe güembiepia yuvireco

¹¹ Cuña yuviraso vitesese, ahese moviro sundao yuviroique tecua guasu Jerusalén pipe yuvireco. Ahe omombehupa pahi eta rerecuar upe opacatu mbahe osepiavahecuer yuvireco.

¹² Evocoiyase pahi rerecuareta oñemoñeta judío rerecuar rese opihañemoñeta mboyoya ãgua. Ichui omondo setá guarepochi sundao upe yuvireco,

¹³ aipo ehiño yuvireco chupe:

—Aipo peyera ava uve: “Oroque vitesese pĩtu pipe, ahese revo Jesús remimbohe yugüeru sehõgüer ñomi ãgua ore sui” peyera —ehi mborerecuar yuvireco chupe—.

¹⁴ Acoi oyanduse rumo mborerecuar guasu curi, ahese opoviroya ucara chupe. Evocoiyase ndipoi chira mbahe pe rese —ehiño pahi eta rerecuar sundao upe yuvireco.

¹⁵ Evocoiyase oipisipa guarepochi yuvireco. Ipare yuviraso oyapo oyeupe imombehu agüer yuvireco. Êgüe ehi vite cüritei judío Jesús cuerayevisa reroyaehi yuvireco yepi.

Jesús omondo güemimbohe ivi yacatu rupi oñehengagüer mombehu ãgua

¹⁶ Evocoiyase êgüe orohe oroso semimbohe once oroico vahe Jesús remimombehu ivi Galilea pendar ivitrive.

¹⁷ Acoi orosepiase rumo Jesús, ahese oromboetei oroico, yepe moviro tõi ore pãhu pendar ndoviroya tupri vitei yuvireco viña.

¹⁸ Evocoiyase ahe oyemboya ore rese aipo ehi oreu:

—Tũpa che mbou mborerecuar ivate catu vahe che reco ãgua ivave, ivive nara avei no —ehi—.

¹⁹ Peso ava upe opacatú ivi rupi iyavei pembohe che recocuer rupi eté yuvirecoi vaherã; peñapiramo avei che Ru rer pipe, che rer pipe, Espíritu Santo rer pipe avei no.

²⁰ Iyavei pembohe che opacatu pe mbohe agüer reroya ãgua rese —ehi—. Peicuañora che aicovera pe reseve ari yacatu rupi yepi, acoi ari ipa vahe rupi —ehi Jesús oreu.

Aviye, aipo rupive.

MARCOS REMBICUACHIA JESUS RECOUER RESENDAR San Marcos

Juan Oporoãpiramo vahe ivi iporupirêhisa rupi secoi

¹ Co yipindar aviye vahe ñehesa Jesucristo, Tüpa Rahir, recocuer resendar amombehu potami pëu.

² Yipiindar Tüpa aipo ehi imombehu oñehe mombehugar Isaiás rembicuachia pipe aracahe:

“Amondora che ñehe mombehugar nde renonera, ndeu peri moatiro água” ehi.

³ “Oyeendu ñehesa ipirata vahe ava porêhisave: ‘Pemoingatu yande Yar raperã; pemohivi tupri avei’ ehi” ehi aracahe.

⁴ Ëgüe ehi Juan ou ava ãpiramo ivi iporupirêhisa rupi oico, aipo ehi: “Pemboasi pe angaipa, peyevi Tüpa upe, ahese opoãpiramora Tüpa pëu ñero água pe angaipa rese” ehi ava upe.

⁵ Opacatu ava oyugüeru iñehe rendu água ivi Judea rupindar, iyavei tecua Jerusalén pendar oangaipagüer mombehu água. Ahese Juan oñapiramo iai Jordán pipe.

⁶ Juan turucuar camello ragüer apopri, sumbicuasa mbahe pírer, sembihu evocoyase tucru, eiri caha pipendar avei.

⁷ Ahe aipo ehi oñehe ava upe oico: “Che raquicuei oura seco pírata catu vahe che sui, sese cheu ndiyai chira ayeaivi ipitaquisã yora água.

⁸ Che supi eté opoãpiramo i pipe têi; ahe rumo pe ãpiramora Espiritu Santo pipe” ehi.

Jesús ãpiramo agüer

⁹ Ipape Jesús osê tecua Nazaret sui oso Galilea rupi. Aheve Juan oñapiramo iai Jordán pipe.

¹⁰ Osê ramoseve i sui, Jesús osepia iva oyemboi tupri, ahese Espiritu ogüeyi iharive apicasu nungar.

¹¹ Ahese oyeendu ñehesa iva sui aipo ehi: “Nde che Rahir ereico, che rembiaisu, aviha etepri nde rese” ehi vahe.

Jesús recoãhasa

¹² Ipape voi, Espiritu Santo viroguata Jesús ava porêhisa rupi.

¹³ Aheve Jesús secoi cuarenta ari mbahe mimba vai pãhuve. Aheve avei Carugar osecõãha; Tüpa rembiguai iva pendareta rumo ihañecoño yuvireco sese.

Jesús omboipi oporaviqui Galilea rupi

¹⁴ Juan roquenda pare, Jesús oso ivi Galilea rupi, omombehu ñehesa aviye vahe Vu recocuer resendar ava upe oico

¹⁵ aipo ehi: “Oyepota ari iyavei cõimi eté Tüpa mborerrecuasa yandeu. Sese, pemboasi pe angaipa, peyevi Tüpa upe, iyavei peroya co ñehesa aviye vahe Tüpa suindar” ehi.

Jesús, “Perio che rupi” ehi irungatu pira mbohasar upe

¹⁶ Ñepe ari Jesús oguata ipa Galilea ivi. Ahese osepia Simón, tivri Andrés avei, ahe pira omboha yuvireco.

¹⁷ Ahese Jesús aipo ehi chupe:

—Pe pira recasar peico, perio che rupi, na peye aveira ava reca água cheu nara —ehi.

¹⁸ Aipo he ramoseve voi, opoi opira mbohasa sui yuvireco, yuviraso supi.

¹⁹ Ipape chíli oguata irimise, ahese osepia Santiago, Zebedeo rahir, tivri Juan reseve carite pipe omoingatu opira mbohasa yuvinoi vu piri.

²⁰ Ahe chupe avei: “Perio che rupi” ehi, evocoyase vu oseyá carite pipe ipitãvisar reseve, yuviraso supi.

Mbia carugar vireco vahe oyese

²¹ Oyepotase tecua Capernaum ve yuvireco mbãtuhusa ari pipe, Jesús oi que oporombohe tãparove.

²² Evocoyase ava osenduse iporombohesa, “¿Mara ehi rutei?” ehi tãi yuvireco chupe. Esepia, ahe oporombohe güeco pírata pipe, ndahei Moisés porocuita rese oporombohe vahe nungar.

²³ Aheve mbia ahe tecua pendar vireco vahe carugar oyese, oñehe pírata chupe aipo ehi:

²⁴ —¿Mahera vo ereyuño tãi cohava oreu, Jesús Nazaret pendar? ¿Ereyu vo ore mocañi água tãi? Che orocua ité, nde Tüpa suindar ndaseco marai vahe ereico —ehi chupe.

²⁵ Oñehe pírata rumo carugar upe aipo ehi: —¿Quiriri, esê co mbia sui! —ehi chupe.

²⁶ Evocoyase carugar mbia rese secoi vahe omoehoha seiti ivive, sãse, osê oso ichui.

²⁷ Opacatu ava ombosiquiye, ichui oporandu-randu oyeupe yuvireco aipo ehi:

—¿Mbahe pīha co? ¡Iporombohesa ipiasu vahe ité! ¡Co mbia vireco ité omborerecuasa! ¡Carugar avei eté omboyeroya oyeupe iñehese! —ehi tēi ava yuvireco.

²⁸ Cūrteimi voi yandusa serācua opacatu ivi Galilea rupi.

Jesús ombogüera Pedro rembireco si

²⁹ Jesús yuvinosese tūparo sui, yuviraso Santiago, Juan rese Simón, Andrés rētave.

³⁰ Aheve Simón rembireco si sohí iteanga vupave ou. Evocoyase omombehu Jesús upe imbaherasisa yuvireco.

³¹ Aheve oso chupe oipisi ipo rese imopuha, ahe ramoseve, sohí opituhu ichui. Ipare voi ahe cuña ihañeco semihura rese.

Jesús setá ombogüera ava imbaheasi vahe

³² Pītu ramose opacatu imbaheasi vahe iyavei carugar vireco vahe viraso yuvireco chupe imbogüera āgua.

³³ Opacatu ava ahe tecua pendar oñemonuha oquendipive yuvireco.

³⁴ Evocoyase setá ombogüera mbaherasi-rasi tēi vireco vahe, iyavei omboyepipi setá carugar ava sui. Ndoipotai rumo carugar ñehé. Esepia, ahe oicua ité evocoyi seco yuvireco.

Jesús Vu Tūpa Ñehengagüer omombehu judío tūparo rupi

³⁵ Ayihiteve Jesús oñarapuha oso ava porēhisave oyoerqui āgua.

³⁶ Evocoyase Simón ondugüer reseve yuviraso seca.

³⁷ Osepiase,

—Opacatu ava nde reca tēi yuvireco —ehi yuvireco chupe.

³⁸ Ahe rumo,

—Yaso ambuae tecua namombrii vahesa rupi Tūpa Ñehengagüer mombehu āgua aheve; evocoi nungar apo āgua niha che ayu —ehi.

³⁹ Ēgüe ehi oguata opacatu Galilea ivi rupi, omombehu Vu Tūpa Ñehengagüer judío tūparo yacatu rupi oico, iyavei setá omose carugar ava sui.

Jesús ombogüera mbia lepra vireco vahe

⁴⁰ Ñepe mbia lepra rerecosar oyemboya Jesús rese, oñenopiha sovai aipo ehi:

—Ereipotase, iya nde che mbogüerami eve —ehi.

⁴¹ Iparaisuerecosave opoco sese.

—Aipota. ¡Erecuerara cūrteim! —ehi chupe.

⁴² Aipo ihe ramoseve, ocuera voi eté.

⁴³ Aheve aipo ehi iri chupe icho renondeve:

⁴⁴ —Aní chira eremombehu ambuae ava upe, esoño ipa voi pahi upe nde cuerasa mombehu, iyavei eremondora porerecosa nde cuerasa resendar Moisés porocuita rupi. Evocoyase toicua opacatu ava yuvireco nde cuerasa —ehi chupe viña.

⁴⁵ Ahe mbia rumo oso omombehu-mbehu opacatu ava upe. Sese Jesús ndoicatu iri güeique āgua güecocuer mombehuse tecua rupi; secoiño tēi tecua popi rupi ava porēhisave. Ava rumo yugüeruño ité opacatu tecua rupindar sepia.

2

Jesús ombogüera ava ndoguatai vahe

¹ Ñepe ari pipe Jesús oyevi ou tecua Capernaum ve, aheve opacatu oyandu ñepe oive secoise yuvireco.

² Cūrteimi voi eté setá ava oñemonuha yuvireco secosave. Sese ndipoi eté ava reique iri āgua oi pipe oquendipi rupi. Ahe rumo omombehuño ité Vu Ñehengagüer.

³ Aheveve irungatu mbia viroyepota ndoguatai vahe yuvireco chupe.

⁴ Ahe rumo ndiyai seroique āgua Jesús uve ava rehísave yuvireco. Sese viroyepi oi harive seraso yuvireco. Aheve teca virocua oi sui yuvireco; supi viroyi supa reseve imondo Jesús rovai tupri yuvireco.

⁵ Ahe oicuae co mbia yuvirecoi vahe oyese yeroya, aipo ehi imbaheasi vahe upe:

—Che rahir, che ñero nde angaipa rese ndeu —ehi.

⁶ Moisés porocuita rese oporombohe vahe rumo ipihañemoñeta aheve yuvinoi:

⁷ “¿Mahera co mbia aipo ehiño tēi oñehé? Ahe oyemboivate ai tēi vahe Tūpa ñehé nungar pipe tēi oñehé. Tūpaño ité niha oicatu ava angaipa upe oñeroi āgua” ehi.

⁸ Ahe rumo oicuaño ipihañemoñetasa, sese aipo ehi:

—¿Mahera vo pepihañemoñeta rai tēi che rese?

⁹ ¿Uma rupi vo ñehesa ndayavaimi catu ndoguatai vahe upe: “Nde angaipa rese che ñero ndeu” hesa pīha, anise: “Eñarapuha, esupi nde rupa, eguata” hesa tie?

¹⁰ Tapeicua ru che, Ava Riquehir, areco mborerecuasa co ivi pipe ava angaipa upe che ñero água —ehi.

Evocoiyase aipo ehi imbaheasi vahe upe:

¹¹ —Eñarapuha, esupi nde rupa, eso nde rêtave —ehi.

¹² Imbaheasi vahe aipo ihe ramoseve, oñarapuha, osupi vupagüer, osë oso ichui opacatu ava rembiepiave. Sese opacatu oyepihamondii yuvireco, omboetei Tüpa yuvireco aipo ehi: —Yipisuive ndayasepiai vahe ité co nungar mbahe —ehi tēi yuvireco.

Jesús oñhe mbia Leví serer vahe upe

¹³ Ipare Jesús oso iri ipa ivi. Aheve oporombohe oyese ava rehi yemboyase.

¹⁴ Ichui oguata vitese, osepia Leví, Alfeo rahir, guarepochi rerocuasave chinise, aipo ehi chupe:

—Erio che rupi —ehi.

Evocoiyase Leví opüha, oso voi supi.

¹⁵ Ipare ocaru Leví rêtave güemimbohe reseve yuvireco, ava sui guarepochi rerocuar iyavei ava yangaipa vahe pãhuve. Esepia, setá ava osaquicue moñaño ité yuvireco.

¹⁶ Evocoiyase Jesús ocaruse ipãhuve, fariseo eta, oporombohe vahe Moisés porocuaite rese avei oporandu semimbohe eta upe yuvireco:

—¿Mahera ru pe mbohesar ocaru ava guarepochi rerocuar iyavei yangaipa guasu vahe pãhuve tēi? —ehi.

¹⁷ Ahe rumo osenduse iñemoñetasa, aipo ehi chupe:

—Ava nimarai vahe ndosecai eté oporoposano vahe, imbaheasi vaheño rumo oseca yuvireco. Che ndayui ava seco tupri vahe reca; che rumo ayu ava yangaipa guasu vahe reca —ehi.

Yecuacusa rese ñehesa

¹⁸ Ñepeí ari pipe Juan Oporoãpiramo vahe remimbohe oyecuacu yuvireco, fariseo eta avei oyecuacu yuvireco no. Evocoiyase moviro mbia ipãhu pendar yuviraso, oporandu Jesús upe:

—¿Mahera ru nde remimbohe ndoyecuacui eté yuvireco? Esepia, Juan remimbohe iyavei fariseo eta oyecuacu yuvireco yepi —ehi yuvireco chupe.

¹⁹ Evocoiyase omboyevi ahe ava upe:

—¿Ndiyai eté ichohopri mendasave iyecuacu água imer oicove vitese ipãhuve!

²⁰ Oimera rumo ari imer reraso água ichui curi, ahese ramo oyecuacura yuvireco cute —ehi.

²¹ “Ndiyai yayapete turucuar cuacua turucuar ipiasu vahe pipe. Esepia niha, ipiasu vahe oichohó turucuar cuacua imondoro iri água, ichorosa evocoiyase tuvicha catu-catuño ité.

²² Iyavei uva ricuer ipiasu vahe ndiyai iñasa mbahe pিরer cuacua pipe. Esepia, uva ricuer ipiasu vahe oseca mbahe pিরer cuacua vahe pipe, ombopuñora, uva ricuer evocoiyase ocañipa tēira, iyavei mbahe pিরer ocañi tēi aveira. Sese uva ricuer ipiasu vahe ñoñasara mbahe pিরer ipiasu vahe pipe yepi” ehi.

Jesús remimbohe oipoho trigo mbituhusa ari pipe yuvireco

²³ Ñepeí mbituhusa ari pipe, Jesús oguata güemimbohe rese trigo pãhu rupi fariseo rembiepiave yuvireco. Ahese semimbohe oipoho-poho sãhi yuvireco.

²⁴ Evocoiyase fariseo aipo ehi:

—¿Mahera nde remimbohe mbituhusa ari pipe oporaviquiño yuvireco! —ehi yuvireco chupe.

²⁵ Ahe rumo aipo ehi:

—Peyeroqui niha icuachiapri aracadendar pipe mborerecuar guasu David rembia-pogüer rese acoi ndasiepoise ondugüer reseve yuvireco aracahe.

²⁶ Pahi rerecuar ivate catu vahe Abiatar serer vahe recose, ahese David oi que Tüpa rēta pipe pan imboeteipri Tüpa upendar reca ondugüer reseve yuvirohu água. Ahe chupe acoi ndipotasai ihu água yuvireco viña; judío pahi yuvirecoi vahe upeño ité niha ipotasa ihu água yepi. Ahe rumo oñuño, omondo avei ava oyepindar tohu aracahe —ehi.

²⁷ Iyavei aipo ehi:

—Mbituhusa ari yaposa ava upe nara, ndahei ava yaposa mbituhusa ari upe nara.

²⁸ Sese Ava Riquehir mbituhusa ari rerecuar secoi —ehi Jesús fariseo upe.

3

Mbia ipo nomii vahe Jesús ombogüera

¹ Jesús oi que iri judío tūparove. Aheve oime mbia ipo co cotigüer nomii vahe.

² Aheve avei fariseo ‘¿ombogüerara pîha mbituhusa ari pipe?’ oya omahengatu yuvireco sese ‘yaiñehengapo angahu’ oyapave tēi.

³ Evocoiyase Jesús aipo ehi co mbia ipo nomii vahe upe:

—Epûha ore mbiterve —ehi.

⁴ Ipape oporandu ambuae upe:

—¿Mbahe vo yaposara mbituhusa ari pipe yepi: mbahe aviye vahe pîha, mbahe naporai vahe tie? ¿Yaipisiro pîha ava recocuer, yamocañi uca tēi tie? —ehi chupe.

Ahe rumo opaño iquiriri tupri yuvireco.

⁵ Evocoiyase omahe ava oyese oyere tupri vahe rese vorîehisave iyavei ndovihai ava ndosenduca catuise yuvireco. Sese aipo ehi ipo nomii vahe uve:

—Eichoho nde yîva —ehi.

Evocoiyase oichoho oyîva, ocuera tupri ité.

⁶ Aheve fariseo opa yuvînose yuviraso oyemoingatu Herodes rupindar rese Jesús yuca âgua yuvireco.

Ava rehii ipa popi rupi yuvirecoi

⁷ Ipape Jesús yuviraso güemimbohe reseve ipa popi rupi, ava rehii avei ivi Galilea rupindar yuviraso supi.

⁸ Oyanduse mbahe sembiapo yuvireco, setá avei ambuae ava yugüeru Judea rupindar, Jerusalén pendar, Idumea rupindar, iai Jordán cotindar avei, opacatu ava Tiro, Sidón pendar yugüeru sepia âgua.

⁹ Sese oyocuai güemimbohe vireco voi vaherã ñepei carite yuvireco ava omboti etepriêhi âgua yuvireco.

¹⁰ Esepia, setá imbaheasi vahe ombogüera. Sese opacatu ambuae imbaheasi vahe yuviraso chupe sese opoco âgua.

¹¹ Iyavei ava carugar vireco vahe sepiase, oñenopiha sovai, oñehe pucu-pucu yuvireco:

—¡Nde Tûpa Rahir ereico! —ehi.

¹² Jesús rumo oñehe pîrata chupe: “Che mombehui rene ava rovaque peye” ehiño imondo.

Jesús oiporavo doce tupri güemimboherã

¹³ Ipape Jesús oyeupi ivitri rese oso. Aheve ava vîroyasar upe oñehe iporavo âgua güemimbotar rupi. Ichui oyugüeru yuvireco chupe.

¹⁴ Ahe ipâhu pendar osenoi doce tupri güemimboherã ‘toguataño che rupi, tomombehu Tûpa Ñehengagüer opacatu ivi rupi’ oya. Ahe osero “apóstol”

¹⁵ ‘toipisi avei mborerecuasa carugar ava sui imboyepipi âgua yuvireco’ oyapave.

¹⁶ Evocoi doce yuvirecoi vahe, ahe: Simón (sererguã acoi omondo Pedro),

¹⁷ Santiago iyavei tivri Juan Zebedeo rahir, ahe avei omondo sererguã Boanerges (‘osunu vahe rahir’ oya aipo ehi);

¹⁸ iyavei Andrés, Felipe, Bartolomé, Mateo, Tomás, Santiago Alfeo rahir; Tadeo, Simón, ava güecua rese secatêhi vahe pâhu pendarer;

¹⁹ iyavei Judas Iscariote, ahe omondo vaherã Jesús yamotarêhisar upe.

“Jesús carugar pîratasa vireco oyese” ehi tēi ava yuvireco

²⁰ Ipape Jesús oi que oi pipe güemimbohe reseve. Aheve oñemonuha ati irise ava yuvireco sese, ndiyai icaru âgua yuvireco.

²¹ Oyanduse imu secocuer yuvireco, oyugüeru seraso âgua ‘ndayaracua iri revo’ oya.

²² Iyavei oporombohe vahe Moisés porocuita rese oyugüeru vahe Jerusalén sui aipo ehi: “Co mbia carugar rerecuar Beelzebú oyocuai vahe, ipîratasa pipe tēi omboyepipi carugar ava sui” ehi yuvireco.

²³ Evocoiyase Jesús omombehu carugar recocuer aipo ehi: “¿Mara ehira aipo carugar ahe ae oyeenose ava sui viña?”

²⁴ Acoi mborerecuar guasu povri pendar, ahe ovava-vavase oyeupe; evocoi nungar mborerecuar pîratasa ocañi tēira.

²⁵ Acoi oñemu oyese ae oyeamotarêhise, oyemboyahose yuvireco viña, ahe ndipocopii chiaveira yuvireco.

²⁶ Acoi carugar oyemboyahose ovava âgua oyeupe ae yuvireco, ndipocopii chiaveira yuvireco, ahe evocoiyase secocuer ocañi tēi vaherã ité yuvireco.

²⁷ “Ndipoi eté niha ava oi que vahe que ava ipîrata etepri vahe rêta pipe imbahe rerochuapa âgua ichui; oñapichi rane itera. Ipape voi opara imbahe vîrocua ichui.

²⁸ “Supi eté aipo ahe pēu: Acoi ava yangaipa vahe upe Tûpa iñerora opacatu yangaipa rese, iñehe-ñehe tēisa rese avei.

²⁹ Acoi iñehe-ñehe tēi vahe rumo Espíritu Santo rese, ahe chupe ndipo iri chietera ñerosa apirêhi vaherã ité” ehi.

³⁰ Aipo ehi Jesús imboyeveí ava upe. Esepia, “Carugar tēi erereco” ehiño ava yuvireco chupe.

Jesús sí, tivireta avei

³¹ Coiye opa oyeopota Jesús rivireta iyavei ichi; ahe rumo opitaño ocarve yuvireco. Ichui omondo oñehe yuvireco chupe oyeupe ichē āgua.

³² Yivíi yuvinoi vahe oñehe yuvireco chupe:

—Nde sí, nde rivireta, nde reindri reseve ocarve nde reca tēi yuvireco —ehi.

³³ Ahe rumo,

—¿Ava pīha che sí; ava pīha che rivireta yuvireco? —ehi.

³⁴ Evocoyase omahe ava oivirindar yuvinoi vahe rese aipo ehi iri chupe:

—Co che sí eta; co che rivireta.

³⁵ Esepia, acoi Tūpa remimbotar oyapo vahe yuvireco, ahe che rivri, che reindri, che sí avei yuvirecoi —ehi.

4

Mbahe miti sui yembohesa

¹ Jesús oporombohe iri ipa popi rupi. Aheve ava rehii oyemboya yuvireco sese. Ipare oha carite imbehive tui vahe pipe. Aheve oguapi oī oñehe. Ava rumo opacatu ivi ātasa rupi opitaño yuvireco.

² Evocoyase ava mbohe āgua omboyoya tecocuer mbahe tisa rese aipo ehi:

³ “Pesendu co ñehesa: Ñepeí mbia osē omaheti.

⁴ Ahe otiapi-apiise mbahe rāhii oso, moviro oviapi peri rupi. Vīrai yugüeruse rumo, opaño yuvirohu.

⁵ Iyavei moviro oiti ivi nayanai vahesave, ita pāhuve. Sese cūriteimi sorí.

⁶ Ari tasise rumo, opaño ipiru. Esepia, ndasapoi niha.

⁷ Iyavei ambuae mbahe rāhii oiti yu pāhuve; ahe yu rumo sorí poyava catu. Sese opaño oyopi. Evocoyase ahe miti ndihai eté.

⁸ Ambuae mbahe rāhii oiti ivi aviye vahesave. Ahe opa ocuacua miti, iha tupri ai yuvireco: amove iha treinta tupri ohi rese, amove sesenta, amove cien tupri ité oha vireco” ehi.

⁹ Evocoyase, “Acoi osendu pota vahe che ñehe, toyapisacaño sese” ehi Jesús ava rehii upe.

¿Mahera pīha co yembohesa imboyoyasa ambuae mbahe rese?

¹⁰ Ipare Jesús opita ahe ae. Ava opita vite vahe semimbohe eta reseve oyemboya yuviraso sese oporandu yuvireco chupe, “¿Mara oya vo co yembohesa aipo ehi?” ehi yuvireco chupe.

¹¹ Ahe aipo ehi: “Pēu niha Tūpa oicua uca mbahe ndicuasai vahe omborecuasa resendar. Ndache reroya potai vahe upe rumo imboyoyasa mbahe ambuae mbahe rese yepi.

¹² Yepe osepia tēira, ndosepiacuai chietera rumo yuvireco. Iyavei yepe osendu tēira, ahe rumo ndosenducuai chietera yuvireco, Tūpa upe oyeve potaēhisave, ipipe sui ndipoi chira ñeroisa yuvireco chupe” ehi.

Jesús omombehu tupri yembohesa mbahe tisa resendar

¹³ Iyavei aipo ehi: “¿Ndapesenducuaími vo aipo porombohesa? ¿Mara peyera ru opacatu ambuae che porombohesa cua tupri āgua?

¹⁴ Evocoi mbahe rāhii oñoti vahe, Tūpa Ñehengagüer mombehugar nungar.

¹⁵ Amove ava recocuer inungar co mbahe rāhii seitipri peri rupi: osendu angahu Tūpa Ñehengagüer. Sendu pare rumo, ou Carugar ovirocuapaño oique vahe ipiha pipe ichui.

¹⁶ Ambuae ava recocuer inungar mbahe rāhii seitipri ita pāhu rupi: osendu Tūpa Ñehengagüer, oipisi tupri angahu oyeupe nara vorivetesá pipe;

¹⁷ ndovirecoi rumo guapo oyese opirata āgua. Evocoyase yuvirecoise mbahe-mbahe tēi pipe Tūpa Ñehengagüer sui tēi, cūriteimi seroyaēhisave, ‘Apoira ichui’ ehi yuvireco.

¹⁸ Ambuae ava recocuer inungar mbahe rāhii ñotimbri yu pāhu rupi: osenduse ñehesa Tūpa suindar,

¹⁹ ahe rumo ipihañemoñeta catu opacatu ombahe eta co ivi pipendar rese saísusave. Oyembopa uca rumo ombahe eta upe. ‘Opacatu ité mbahe tareco’ ehi tiēte viña. Ipipe sui omocañi tēi Tūpa Ñehengagüer. Ndoypa ucai avei mbahe eta aviye vahe evocoi nungar ava upe.

²⁰ Ambuae ava rumo osendu vahe Tūpa Ñehengagüer seroyasa pipe, oyapoño ité mbahe aviye vahe. Ahe inungar mbahe rāhii ñotimbri ivi aviye vahe rese: amove vireco ohi rese treinta, ambuae sesenta, ambuae cien” ehi.

Tataendi resendar porombohesa

²¹ Iyavei aipo ehi: “¿Serecosa vo tataendi mbahe riruvrive nara tēi iyavei yande rupavrive nara tēi no? Aní, tataendi imondosa ivate poroesape āgua.

²² Ndipoi chietera mbahe ñomipri ndayasepiaí vaheṙā curi.

²³ Acoi osendu pota vahe che ñehe, toyapisacaño yuvireco sese” ehi.

²⁴ Iyavei aipo ehi: “Peyapo catu mbahe pesendu vahe. Pe rembiapo nungar rupi tupri asenducua ucara che ñehe pēu. Ihariṙe amondo iri catura pēu.

²⁵ Vireco tupri vahe upe, imondosa catura. Acoi ndovireco tuprii vahe sui, se-rocuasañora” ehi.

Yembohesa mbahe rāhii rorisā resendar

²⁶ Aipo ehi iri avei Jesús: “Tūpa mborerecuasa co ivi pipe inungar que ava oñoti vahe mbahe rāhii.

²⁷ Omahaṙi pare, oso oque. Ipare coiye catu oñarapuha. Ahe oñocua pītu, ari avei, evocoiyase mbahe rāhii sorí poyava yuvireco. Itisar rumo ndoicuai mara ehi vori.

²⁸ Ivi rese niha oyesu miti: yipindar sorí, ipare iha, ipare sāhii yuvinosē sese.

²⁹ Evocoiyase co mbia mbahe ha yaviyese, oipoho. Esepia, oyepota ari ipoho āgua chupe” ehi.

Yembohesa mostaza rāhii suindar

³⁰ Iyavei aipo ehi: “¿Mara ehi vo Tūpa povri pendar co ivi pipe pēu; mbahe rese pīha iyacatu imboyoyasa icua āgua?

³¹ Ahe oyoya tupri mostaza rāhii rese. Ahe tahimi catu opacatu ambuae mbahe rāhii sui.

³² Ñoti pare rumo, sorí, ocuacuase tuvichá catu ambuae mbahe miti sui. Sāca tuvichá ité, sese vírai oyemboaiti sovri rupi yuvireco” ehi.

Jesús omboyoya ambuae mbahe rese oporombohe yepi

³³ Ēgüe ehi Jesús oporombohe Tūpa Ñehengagüer rese, omboyoya-yoya ñepei mbahe ambuae mbahe rese ava mbahecuagüer rupi.

³⁴ Nomombehui eté mbahe ambuae mbahe rese imboyoyaēhi pipe. Ahe rumo omombehu tupri güemimbohe upe ahe aemi yuvirecoise.

Jesús omombituhu i ohitu vahe, ivitu ai reseve

³⁵ Ahe ari pipe pītu ramomise, aipo ehi güemimbohe upe:

—Yaso ipa rovai —ehi.

³⁶ Evocoiyase ava sui osiri yuvireco, yuviraso carite pipe. Ambuae carite pipendar avei yuviraso supi.

³⁷ Oyepotase rumo ivitu ai ipírata vahe, i ohitu vahe oha guasu-guasú carite pipe, omboapiṙo seni yuvireco chupe.

³⁸ Jesús rumo oyeatocoño, oque ou supita coti. Evocoiyase omomahe voi yuvireco, aipo ehi chupe:

—¡Poroambohesar! ¿Nandemahemohaimi rutei vo yande rese? ¡Opara moco yaso ipive! —ehi.

³⁹ Evocoiyase aipo hese, omahe, oñehe pírata ivitu ai upe, ipa upe avei:

—¡Pepituhu! —ehi.

Aheseve voi opituhu tupri.

⁴⁰ Ipare aipo ehi güemimbohe upe:

—¿Mahera pesiquiyé iteanga? ¿Ndapeyeroṙa vítei vo che rese? —ehi.

⁴¹ Ahe rumo osiquiyepave oporandu-randu oyeupe yuvireco:

—¿Ava pīha co mbia secoi? Esepia niha, ivitu ai, ipa avei omboyeroṙa —ehi tēi yuvireco chupe.

5

Mbia Gerasa iguar vireco vahe carugar oyese

¹ Jesús güemimbohe reseve oyepota ipa rovai Gerasa ivi rese yuviraso.

² Yuvinosē pare carite pipe sui, ahese mbia carugar rerecosar tuvīpa pāhu rupi secoi vahe oso Jesús upe.

³ Co mbia tuvīpa pāhu rupi secoi vahe yepi. Ndipoi eté ava secopisar, carena avei eté opa-opaño omondoso.

⁴ Setá yupagüer rupi tēi ñapichisa carena pipe ipi, ipo rupi avei yepi. Ahe rumo opa-opaño ité omondoso carena yepi. Ndipoi eté ava osecoreroṙi vahe.

⁵ Ari, pītu rupi oguata, osapucaí oico ivitri mahugüer rupi, tuvīpa mahugüer rupi avei; ocua-ocua ita pipe oyese yepi.

⁶ Amombri Jesús repia ramoseve, oña senonde oñenopiha voi sovai,

⁷ oñehe pírata chupe:

—¡Eyepipi che sui Jesús, Tüpa seco ivate catu vahe Rahir! ¡Aporandu Tüpa rer pipe che mombaraisuēhi āgua eve! —ehi.

⁸ Aipo ehi, esepia, yipindar Jesús aipo ehi chupe:

—¡Carugar mbahe tēi vahe, esē co mbia sui! —ehi chupe.

⁹ Aheve oporandu chupe:

—¿Mara vo nde rer? —ehi.

Ahe omboyevi chupe:

—Che rer Legión. Esepia, ore rehii eté —ehi.

¹⁰ Oporanduño chupe omondopaēhi āgua co ivi sui.

¹¹ Ichui namombriimi setá cuchi ocaru vahe ivitri rese yuvireco.

¹² Sese carugar oporandu yuvireco chupe:

—Ore mondopaño cuchi aviterve eve —ehi yuvireco.

¹³ Evocoyase Jesús omondo carugar sē āgua ahe mbia sui. Ahe opa yuviroique cuchi aviterve. Ahe cuchi retacuer dos mil tupri vahe, ahe yuvinoña yuviraso ivivate sui ipa pipe ocañipa.

¹⁴ Evocoyase cuchi rārosar yuvinoña osiquiyepave yuviraso imombehu āgua tecuave, caha pipe rupi yuvirecoi vahe upe avei. Sese ava opa yugüeru sepia ‘¿mbahe pñha?’ oya yuvireco.

¹⁵ Oyepotase Jesús recosave, aheve osepia mbia carugar vireco vahecuer yuvireco oyemonde tuprise oī, yaracua tuprise avei. Ahese oyembosiquiye tēi yuvireco.

¹⁶ Mbahe oime vahe carugar vireco vahe rese, cuchi rese avei, ahe sepiasar omombehupa ambuae ava upe yuvireco.

¹⁷ Evocoyase ava Jesús upe: “Esē cohave sui” ehi yuvireco.

¹⁸ Oha irise Jesús carite pipe, co mbia carugar rerecosarer oporandu chupe supi oso āgua.

¹⁹ Ahe rumo,

—Esoño nde rētave, nde mu piri. Aheve emombehupa Yar oporoaisusa pipe mbahe oyapo vahecuer nde rese —ehiño chupe.

²⁰ Ahe mbia oso, omombehu opacatu tecua Decápolis rupi Jesús oyapo vahecuer mbahe sese. Evocoyase ava opacatu, “¡Mara ehi rutei!” ehi tēi yuvireco.

Jesús ombogüera Jairo rayri, iyavei cuña opoco vahe iturucuar rese ombogüera

²¹ Oyevíse Jesús carite pipe ipa rovai oso, aheve oñemonuha ati ava yuvireco chupe. Ahe evocoyase opitaño ipa popive.

²² Evocoyase oyepota mbia mborerrecuar tūparo pendar, ahe serer Jairo. Jesús repiase, oñenopiha sovai,

²³ aipo ehi chupe:

—Che rayri omano pota. Yaso, teremondomi tēi nde po iharive imbogüera āgua —ehi.

²⁴ Evocoyase oso supi. Ava rehii avei yuviraso supi.

²⁵ Ipāhuve avei oime cuña doce araviter rupi suvi yepiyere-yere vahe.

²⁶ Iparaisú iteanga, setá oporoposano vahe ndoicatu imbogüera yuvireco omandavete catu iposanosa pipe yuvireco. Opa tupri tēi omondo mbahe vireco vahe, ivate catuño rumo imbaherasisa chupe.

²⁷ Co cuña osenduse Jesús rese ñehesa, oguata saquícuei oso ava rehii pāhuve, iturucuar rese opoco.

²⁸ Aipo ehi oyeupe oico: “Iturucuar rese apocose rumo, acuerara” ehi.

²⁹ Ahe ramoseve voi ndasuvi yepiyere iri. Ipare oyandu güetecuer yemoingatu tuprisa, ocuerase ombaherasisa sui.

³⁰ Jesús rumo oyandu osēse opīratasa oyesui. Sese omahe guaquícuei coti ava rese, ahese oporandu:

—¿Ava vo opoco che turucuar rese? —ehi.

³¹ Semimbohe omboyevi yuvireco chupe:

—¿Nderemahei vo ava oyere tupri yuvireco nde rese? ¿Mahera ru, ‘¿Ava vo opoco che rese?’ ere iri? —ehi yuvireco chupe.

³² Ahe rumo omaheño vīte ité ava oivīindar rese ‘¿uma ité pñha opoco che turucuar rese?’ oya.

³³ Evocoyase co cuña oicuae mbahe oyesendar, oyembosiquiye. Ipare oso sovai, oñenopiha, ahese opacatu mbahe supi vahe omombehu chupe.

³⁴ Evocoyase Jesús aipo ehi chupe:

—Che rayri, erecuera cūrītei nde yeroyasa pipe. Eso tupri. Esepia niha, erecuera nde mbaherasisa sui —ehi chupe.

³⁵ Ñehē vīteseve, oyepota moviro Jairo rēta pendar tayri mano mombehu yuvireco:

- Omano ité nde rayri. Aní eremañeco tēi vite Porombohesar —ehi yuvireco chupe.
- ³⁶ Ahe rumo Jairo upe aipo ehi:
—Aní eresiquiye. Eyeroya catuño —ehi.
- ³⁷ Ndoiopotai rumo ambuae ava oyeupi icho ãgua; Pedro, Santiago, Juan güeraño oipota.
- ³⁸ Oyepotase Jairo rētave, osepia ava yemondii oyaseho vahe.
- ³⁹ Ichui oiquese oi pipe, aipo ehi:
—¿Mahera vo perãse guasu tēi peyaseho peyu? Co cuñatai nomanoi, oque tēi ou —ehi ava upe.
- ⁴⁰ Ava rumo opucaeete-eteño seroyaēhisave yuvireco. Evocoyase omose opacatu ava. Ipare omoingue iyepupa, ichi, oyeupindar reseve cuñatai rehögüersave.
- ⁴¹ Ipare oipopisi aipo ehi:
—Talita, cum —ehi chupe ('cuñatai, eñarapuha, ahe ndeu' ohesave aipo ehi).
- ⁴² Ahe ramoseve voi cuñatai doce araviter vahe oñarapuha, ipare uguata. Sepiase ava, oyembosiquiye guasu yuvireco.
- ⁴³ Jesús rumo oyocuai imombehuēhi ãgua ambuae ava upe. Ipare,
—Pembocarú co cuñatai —ehi.

6

Jesús Nazaret ve secoi

- ¹ Jesús osē co tecua sui oso güecuave; semimbohe avei yuviraso supi.
- ² Oyepotase mbituhusa ari, ahesa oporombohe tūparo pipe. Setá ava ñehe rendusar oyepihamondisave oporandu-randu yuvireco:
—¿Que sui vo co ava oicuapa opacatu mbahe? ¿Que sui pñha vinose co mbahecuasa co poromondisa apo ãgua? —ehi yuvireco oyeupe—.
- ³ Co niha carpintero, María membri; Santiago, José, Judas iyavei Simón riquer; seindri avei yuvirecove yandē pñhuve —ehi.
Sese ndoviroyai yuvireco.
- ⁴ Jesús rumo aipo ehi ahe ava eta upe:
—Tūpa ñehe mombehusar avei niha ava omboetei opacatu rupi yuvireco yepi, imu sēta pipendar ae rumo nomboetei yuvireco —ehi.
- ⁵ Ndoiocatui mbahe oporomondii vahe apo ãgua ava viroyaēhisa pipe, sese moviro tēi imbaheasi vahe harive omondo opo imbogüera ãgua.
- ⁶ Ndoyembovihalí ava viroyaēhisa rese.

Jesús oyocuai güemimbohe Tūpa mborerecuasa mombehu ãgua

- Ipare Jesús oso, uguata tecua-tecuami namombrii vahe rupi oporombohe oico.
- ⁷ Evocoyase, "Perío" ehi güemimbohe doce vahe upe. Ipare oyocuai ñuvirío-río, iyavei omondo güeco pñratasa carugar mboyepepi ãgua chupe.
- ⁸ —Ndaperaso chira rumo mbahe peguatasa rupi, pe pococa güeraño ité perasora —ehi—. Ndiyai avei peraso mbahe riru, pan, guarepochi avei.
- ⁹ Iyavei pemondera pitaqui güeraño. Ndapemondugüei chiaveira pe camisa seraso.
- ¹⁰ —Que pesosave peiquese oi pipe, pepitaño ipipe, ichuive tupriño ité pesēra pecua.
- ¹¹ Acoi ambuae tecua pendar ndape pisi potaise, ndosendu potaise avei pe ñehe yuvireco, peyepipiñora ichui. Peipipeteño aveira pe pi ivi rātachigüer sui. Ëgüe pe hesa omboyecuara cañisa apirēhi yuvireco chupe —ehi.
- ¹² Evocoyase semimbohe eta yuviraso, "Pemboasi pe angaipa, peyevi Tūpa upe" ohe ãgua yuvireco.
- ¹³ Iyavei setá omboyepepi carugar ava sui, setá avei omondo mbahe quira ava imbaheasi vahe rese imbogüera ãgua yuvireco.

Juan Oporoãpiramo vahe mano agüer

- ¹⁴ Mborerecuar guasu Herodes oyandu ñehesa Jesús resendar, iyavei opacatu rupi oicua yuvireco. Sese Herodes aipo ehi:
—Juan Oporoãpiramo vahe revo ocuerayevi. Sese oyapo poromondisa ipñrata vahe —ehi.
- ¹⁵ Ambuae rumo,
—Tūpa ñehe mombehusar Elías mo evocoi —ehi yuvireco.
Ambuae evocoyase,
—Tūpa ñehe mombehusar aracahendar mo evocoi —ehi yuvireco.
- ¹⁶ Osenduse Herodes co nungar ñehesa, aipo ehi:
—Juan ité niha evocoi che añaca asia uca vahecuer, ahe cūritei ocuerayevi —ehi.
- ¹⁷ Herodías recocuer sui tēi niha Herodes Juan oñapichi uca carena pipe soquenda. Esepia, co cuña Herodías yipindar Felipe rembireco, co Felipe Herodes rivri viña. Herodes rumo omendaño vivri rembireco rese.

¹⁸ Juan aipo ehi Herodes upe: “Ndiyai eté nde ererecora nde rivri rembireco” ehi.

¹⁹ Herodías evocoyase oyuca pota Juan yamotarēhisave; ndoicatui rumo yuca.

²⁰ Esepia, Herodes osiquiyēno ichui oicuase co mbia reco tupri aisa iyavei seco maranehise. Sese osepī ité; yepe ndoyembohe catui osenduse iñehe viña, ahe rumo osendu pota raifño ité.

²¹ Coiye rumo osupiti ari Herodías remimbotar apō āgua, ahese Herodes oharagüer pipe oyapo carusa guasu mborerecuareta rese, ava Galilea pendar icuapri ivate catu yuvirecoi vahe rese avei.

²² Herodías membri cuñatai oique carusave. Aheve opivoi ava rovaque. Ipivoisa aviye ai Herodes upe, ambuae ava ocaru vahe upe avei. Ichui aipo ehi cuñatai upe:

—Eporandu mbahe nde remimbotar rese cheu, che evocoyase amondora ndeu —ehi.

²³ Ipare aipo ehi iri opacatu ava rovaque chupe: “Amondora nde remimbotar ndeu, anise, che mbahe eta amboyahora ndeu” ehi.

²⁴ Ahe cuñatai osē oso, osi upe oporandu:

—¿Mbahe rese pīha aporandura chupe? —ehi.

Ichui aipo ehi chupe:

—Eporandu Juan Oporoāpiramo vahe āca rese —ehi chupe.

²⁵ Ipare cuñatai oña, oique oso mborerecuar guapisave, aipo ehi chupe:

—Che aipota co pipeve voi eremboura Juan Oporoāpiramo vahe āca poratu pipe cheu —ehi.

²⁶ Mborerecuar rumo ndoyembovīhai tēi. Esepia, ava ichohopri rovaque ité yipindar oñehe. Sese ndoicatui, “Aní” ohe āgua.

²⁷ Evocoyase ipare voi mborerecuar oyocuai sundao Juan āca reru āgua.

²⁸ Sundao oso soquendasave, oyasia Juan āca, seru poratu pipe. Mborerecuar omondo co cuñatai upe, evocoyase cuñatai omondo osi upe.

²⁹ Oyanduse Juan remimbohe, yuviraso setecuer reca. Ipare viraso yuvireco tuvipave yapocatu.

Jesús oyopoi cinco mil cuimbahe

³⁰ Co pare, apóstol oñemonuha Jesús piri yuvireco. Ipare omombehu mbahe güembiapogüer, oporombohe agüer avei yuvireco chupe.

³¹ Ahese aipo ehi oapóstol upe:

—Perio cohava, yaso, yapituhumi rane co coti —ehi.

Esepia, oyepindecuaño ité ava yugüeru chupe, sese ndiyai icaru āgua yuvireco.

³² Evocoyase ahe güeraño apóstol reseve yuviraso carite pipe co coti ava sui.

³³ Setá rumo ava osepia ichose. Ichui opacatu ava tecua rupindar osaquícue moñaño; ahe ranengatu oyepotapa yuvireco ichui.

³⁴ Ogüeyise rumo carite pipe sui, osepia ava rehii, ahese iparaisu ava eta chupe, inungar ovesa ndovirecoi vahe guārosar. Ipare ombohe opacatu mbahe rese.

—Caharuse rumo, semimbohe oyemboya yuvireco sese, aipo ehi yuvireco chupe:

—Caharu etepri moco, iyavei ndipoi oi co rupivemi vahe.

³⁶ ¿Ndiyai vo eremondopa ava tecua-tecuami cōi vahesa rupi? Aheve tovirouca ocaru āgua yuvireco —ehi yuvireco chupe.

³⁷ Ahe rumo omboyevi:

—Pe pemondora mbahe semihura —ehi.

Semimbohe aipo ehi yuvireco chupe:

—¿Iyacatura pīha oreu dosciento denario pan repirā ava mbocarū āgua? —ehi.

³⁸ Jesús aipo ehi:

—¿Mbovi vo pereco pan? Peso, tapesepia —ehi.

Sepia pare, omombehu:

—Poyandepo pan, ñuvirío pira —ehi yuvireco chupe.

³⁹ Evocoyase omboyaho-yaho ava imboguapi capihari rupi.

⁴⁰ Cincuenta, cien rupi-rupi oyemboyaho yuvireco.

⁴¹ Ichui Jesús oipisi poyandepo pan, ñuvirío pira. Ipare omahe iva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehii upe imondo āgua yuvireco. Pira ñuvirío vahe avei omboyaho-yaho opacatu ava upe.

⁴² Evocoyase opacatu ava ocaru vahe ihitaropa tēi yuvireco.

⁴³ Ipare semimbohe omboapipopa doce tupri iruova pan iyavei pira rumbirer yuvireco.

⁴⁴ Cuimbahe ocaru vahe retacuer cinco mil tupri.

Jesús oguata i hari rupi

⁴⁵ Ipare Jesús, “Peha pe rane carite pipe, pesasa ipa Betsaida ve peso che renondeve. ‘Aviye’ tahe rane ava eta upe” ehi güemimbohe upe.

- ⁴⁶ “Aviye” ohe pare ava upe, oyeupi oso ivitri rese oyeroqui āgua.
⁴⁷ Pītuse carite ipa mbiterve ité secoi. Jesús rumo ahe ae opitaño ivive.
⁴⁸ Ahese omahe güemimbohe rese iyeapicui catuēhise. Esepia, ivitu ipīrata vahe osovaichi yuvireco. Cōhe potase, oguata i hari rupi güemimbohe coti oso. Aviye ité acoi oñocuaño vaherā oso.
⁴⁹ Sepiase rumo ‘hāgüer tēi revo’ oya, sāse pucu-pucu i hari rupi iguatase semimbohe yuvireco.
⁵⁰ Esepia, opacatu osepiase osiquiye yuvireco ichui. Ahe rumo aipo ehi:
 —¡Peyemoviracuaño, che tēi! ¡PesiQuiye eme che sui! —ehi güemimbohe upe.
⁵¹ Ahe ohase carite pipe, opituhu voi ivitu. Evocoiyase, “¡Mara ehi rutei!” ehi tēi yuvireco.
⁵² Esepia, ndoicua vitei eté pan apo ati agüer yuvireco, yavai vite seroya āgua yuvireco chupe.

Jesús ombogüera ava imbaheasi vahe Genesaret pendar

- ⁵³ Osasase ipa, oyepota Genesaret ivi rese yuviraso, ahe imbehive oñapichiño carite yuvireco.
⁵⁴ Yuvinosepa ramomiseve, ava oicua voi Jesús yuvireco.
⁵⁵ Ichui opacatu ahe ivi pipendar güeru imbaheasi vahe Jesús upe yuvireco.
⁵⁶ Oyepotase que tecuamive, anise tecua guasuve, caha pipe oi-oimi rupi, ahe supi imbaheasi vahe ocar rupi yinosepa voi yuvireco. “Topocomi tēi nde turucuar popi rese” ehi yuvireco chupe. Evocoiyase opacatu sese opoco vahe, ocuerapa voi eté yuvireco.

7

Mbahe omonguiha vahe ava recocuer

- ¹ Evocoiyase fariseo eta, Moisés porocuaita rese oporombohe vahe avei yugüeru Jerusalén sui oyemboya Jesús rese yuvireco.
² Ahese ahe osepia Jesús remimbohe ocaru āgua iyepoiēhise porocuaita mboaviyeēhise yuvireco, sese oñemoiro yuvireco chupe.
³ (Esepia, fariseo iyavei opacatu judío eta aracahendar recocuer sui ndipoisai eté yuvireco, sese oyepoiēhise ndocarui eté yuvireco yepi.
⁴ Mbahe rerocuasa sui oyevise, ndocarui oyepoiēhi viteseseve yuvireco. Iyavei tecocuer aracahendar tēi oyapo vite yuvireco inungar igua riru piisa, mbahe riru guarepochi apopri iyavei vupa moatiro tuprisa.)
⁵ Sese fariseo eta iyavei Moisés porocuaita rese oporombohe vahe oporandu Jesús upe yuvireco:
 —¿Mahera vo nde remimbohe yande ramoi aracahendar recocuer ndoviroya iri yuvireco? Esepia ru, ahe ocaruño opo quiha reseve yuvireco —ehi.
⁶ Jesús rumo aipo ehi chupe:
 —Pe Tūpa reroyasar angahu tēi peico vahe, supi tupri ité Tūpa ñehe mombehusar Isaías rembicuachía aracahendar aipo ehi:
 ‘Co tecua pendar ava oyuru pipe tēi che mboetei yuvireco; ipihañemoñeta rumo amombri tēi che sui.
⁷ Oyerure tupri tēi yuvireco cheu.
 Esepia, iporombohesa ava porocuaita tēi’ ehi.
⁸ Ēgüe peye pepoipa Tūpa porocuaita sui ava recocuer aracahendar rupi tēi pe guata āgua —ehi.
⁹ Iyavei aipo ehi iri chupe:
 —Pe ramoi recocuer aracahendar pipe tēi peseyaño co coti Tūpa porocuaita.
¹⁰ Esepia, Moisés aipo ehi: ‘Pembroyera iyavei peipitiviira pe ru, pe si avei no. Acoi iñehe mara vahe oyesupa upe ahe, Tomanofño, ehi’ ehi aracahe.
¹¹ Pe rumo aipo peye tēi: ‘Acoi ava aipo ehi vahe vu upe, osí upe avei no: Ndiyai chira mbahe mondo āgua pēu. Esepia, che opacatu mbahe areco vahe Tūpa upe imondopri, ahe Corbán, ehi’ peye;
¹² pe evocoiyase, aipo ehi vahe upe, ‘Ndiyai eté oyesupa pītivi āgua’ peye.
¹³ Co nungar apo pipe Tūpa porocuaita ndaperoyai. Esepia, ndapepoi potai ava recocuer aracahendar sui. Setá mbahe co nungar peyapo vite —ehi.
¹⁴ Ipare, “Perio” ehi iri ava rehii upe.
 —Peyapisaca, pesenducua tupri che ñehe:
¹⁵ Ndahei ocar sui tēi ou ava recocuer monguiha āgua. Ahe rumo osē ipiha sui.
¹⁶ Acoi osendu pota vahe che ñehe, toyapisacaño sese —ehi.
¹⁷ Ipare oseyapase ava, oi que oi pipe. Aheve semimbohe eta oporandu yuvireco co porombohesa omombehu vahe rese chupe.

¹⁸ Ahe evocoiyase aipo ehi güemimbohe upe:

—Evocoiyase pe avei no, ¿ndapesenducuai? ¿Ndapeicuai vo acoi ocar sui oi que vahe ava aviterve nomboangaipai eté?

¹⁹ Esepia niha, ndahei ipihave oso, ahe rumo oso yaviterve. Ipare osē ichui —ehi ‘opacatu tembihu avíyeño ité’ oyapave aipo ehi.

²⁰ Ipare aipo ehi:

—Ava piha sui osē vahe rumo mbahe, ahe omonguiha ava recocuer.

²¹ Esepia, ava pihañemoñetasa sui osē pihañemoñeta raisa, yemboaguasasa, mondasa, porapichisa,

²² mendasa sui yemboaguasasa, mbahe pota raisa, teco raisa, porombopasa, mbahe tēi pota raisa, mbahe rese ñemoirosa, ava rese ñemoñeta tēisa, teco ivate aisa, pihañemoñetasa nihivi vahe.

²³ Co mbahe opacatu naporai vahe yuvínose ava sui imboangaipa uca āgua —ehi.

Cuña ndahei vahe judía viroya Jesús

²⁴ Ichui Jesús osē oso tecua Tiro coti. Aheve oi que oi pipe, ndoyecua uca potai ava upe viña; ndoicatu rumo ava sui oñemi.

²⁵ Oime cuña viresco vahe omembrí cuñatai, ahe viresco carugar oyese; ahe cuña oicuae Jesús recosa, oso voi sovai oñenopiha.

²⁶ Ahe rumo ndahei judía, sirofenicia iguar ité. Ahe aipo ehi Jesús upe: “Enose che membrí sui carugar” ehi.

²⁷ Jesús rumo aipo ehi chupe:

—Tahir judío rane toipisi mbahe yuvireco. Esepia, naporai yarocua pan tahir sui cave tohu imondo āgua —ehi.

²⁸ Co cuña aipo ehi:

—Supi eté, che Yar, cave avei rumo ohuño ité pan rahicuer oviapi vahe tahir mesavri pendar —ehi.

²⁹ Aipo ihese, aipo ehi:

—Avíye ité nde ñehe. Eyevi eso. Carugar osē nde membrí sui —ehi chupe.

³⁰ Co cuña oyepotase güetave, osepia omembrí supave; yipíve rumo osē carugar ichui.

Jesús ombogüera mbia ndayapisai, iñehe ipiti-piti vahe

³¹ Jesús oyevi oso Tiro ivi sui. Ipare osasa Sidón rupi oso, ambuae tecua eta Decápolis ivi rupi avei. Ichui oyepota ipa Galilea ve.

³² Aheve mbia ndayapisai, iñehe ipiti-piti vahe rerasosar: “Emondomi tēi nde po iharíve” ehi yuvireco chupe.

³³ Ichui Jesús viraso coi cotimi ava sui. Aheve ocuā omonde yapisa pipe. Ipare omondo güendi ñapecu rese.

³⁴ Ipare omahe íva rese, ipítuhe pucu aipo ehi: “¡Efatal!” ehi (‘timboisa’ ohesave aipo ehi).

³⁵ Ahe pípeve voi yapisa tupri, oñehe tupri avei.

³⁶ “Ndapemombehuí chira ambuae upe” ehi ahe mbia upe. Ahe rumo oicua ucaño ité ambuae ava upe yuvireco.

³⁷ Evocoiyase ava oyemboviha guasusave, aipo ehi yuvireco: “Avíye ité rumo mbahe sembiapo. ¡Esepia, ndayapisai vahe omboapisá, iñehe ipiti-piti vahe avei omoñhengatu tupri!” ehi yuvireco.

8

Jesús oyopoi cuatro mil cuimbahe

¹ Ñepi ari pipe setá ava oyemboya iri Jesús rese yuvireco. Ndipoi rumo mbahe icaru āgua. Sese oñehe güemimbohe eta upe aipo ehi:

² —Iparaisu catu co ava yuvireco cheu. Esepia, mbosapi ari yuvirecoi yande piri, iyavei ndipoi eté mbahe semihura.

³ Amondopase sētave sieporēhi reseve, virovíapi-api tiētera tieporēhi peri rupi yuvireco viña. Esepia, setami ava yugüeru amombri sui —ehi.

⁴ Semibohe aipo ehi yuvireco chupe:

—¿Mara yahera vo ava tohu mbahe mondo cohava ava porēhisave? —ehi.

⁵ Ahe oporandu:

—¿Mboví vo pan pereco? —ehi.

—Orovireco siete pan —ehi semimbohe yuvireco chupe.

⁶ Evocoiyase, “Peguapi ivi haríve” ehi ava rehíu upe. Ahese oipisi siete pan, “Avíye ndeu” ehi Túpa upe. Ichui omboyaho-yaho pan imondo güemimbohe upe, semimbohe evocoiyase omondo ava rehíu upe yuvireco.

⁷ Iyavei vireco moviro pirami yuvireco, sese avei, “Aviye ndeu” ehi iri Tūpa upe. Ichui güemimbohe upe, “Pemboyaho-yaho ava upe” ehi.

⁸ Opatatu ité ava ocaru vahe ihıtaro yuvireco. Ipare rumo semimbohe omboapipo iri rane sumbirer siete iruova yuvireco.

⁹ Ava rēhi ocaru vahe retacuer cuatro mil tupri. Ipare Jesús, “Aviye, peso tupri” ehi ava upe.

¹⁰ Ipare voi eté yuviraso güemimbohe eta reseve carite pipe Dalmanuta ivi rese.

Fariseo eta oporandu poromondiisa rese yuvireco

¹¹ Ipare fariseo eta oyepota Jesús ñehe poepi-epi āgua yuvireco. Jesús recoāha āgua, oporandu iva pendar poromondiisa rese ‘¿Tūpa sui eté pīha ou?’ oya yuvireco chupe.

¹² Sese Jesús ipıtuhe pucu, aipo ehi:

—¿Mahera vo co ava oipota iva pendar poromondiisa che recocuer cua āgua yuvireco! Namboyecuai chietera rumo que ñepeı evocoi nungar mbahe pēu —ehi.

¹³ Ipare oseypaño ava. Ichui yuviroha iri carite pipe, osasapa ipa yuviraso sovai.

Fariseo porombohesa inungar pan mboapeposa

¹⁴ Jesús remimbohe sesarai pan sui yuvireco, ñepeımi tēi pan viraso güemihura yuvireco.

¹⁵ Evocoiyase Jesús aipo ehi:

—Peıcua catu fariseo iyavei Herodes pan mboapeposa sui —ehi güemimbohe upe.

¹⁶ Aipo ehise, semimbohe: “Pan ndayaruise revo aipo ehi yandeu” ehi-ehi tēi oyeupe yuvireco.

¹⁷ Ahe rumo oicua güemimbohe pıhañemoñetasa, aipo ehi:

—¿Mahera, “Pan ndayaruı” peye? ¿Ndapeıcua vıteı vo che rembiapo? ¿Yavai vıte tie seroya āgua pēu?

¹⁸ Oıme tēi pe resa, ndapesepıai rumo; oıme tēi pe nambi, ndapesendui rumo mbahe. ¿Ndapeyemomahenduha iri vo

¹⁹ acoı amboyaho-yahose cinco pan sui ava cinco mil vahe tohu? ¿Mbovi iruova vo acoı sumbirer pemonuha iri? —ehi.

—Doce iruova —ehi yuvireco chupe.

²⁰ —Iyavei acoı amboyaho-yahose siete pan sui ava cuatro mil vahe tohu, ¿mbovi iruova vo acoı pemonuha sumbirer no? —ehi.

—Siete iruova —ehi yuvireco chupe.

²¹ Ipare aipo ehi:

—¿Ndapesenducua vıteı vo? —ehi güemimbohe upe.

Jesús ombogüera ava ndasesapısoı vahe tecua Betsaida ve

²² Oyepotase Jesús tecua Betsaida ve, ahe ramoseve voi ogüeru ndasesapısoı vahe yuvireco chupe ‘epocomı tēı sese’ oya yuvireco.

²³ Evocoiyase oıpopısi ndasesapısoı vahe seraso co cotımi tecua sui. Aheve omondo güendi sesa rese, omondo aveı opo iharıve. Ipare oporandu chupe: “¿Eresepıa vo mbahe?” ehi.

²⁴ Ndasesapısoı vahe omahese, aipo ehi:

—Asepıa va inungar ivıra uguata vahe yuvireco —ehi.

²⁵ Evocoiyase omondo iri opo sesa rese. Ipare co mbıa omahe tuprı ité cute, ocuera ité, opacatu mbahe osepiá tuprı.

²⁶ Ichui Jesús omondo sėtave aipo ehi chupe:

—Ereyevi iri eme tecuave —ehi.

Pedro oicua uca Jesús Tūpa Rembıporavo seco rese

²⁷ Ipare yuviraso Jesús güemimbohe reseve ivı Galılea sui tecua Cesarea cotı, Filıpo ivı rese. Perı rupı oporandu güemimbohe upe:

—¿Mara ehi vo ava oñehe yuvireco che rese? —ehi.

²⁸ Semimbohe evocoiyase omboyevi yuvireco chupe:

—Amove ava, “Juan Oporoāpiramo vahe” ehi yuvireco ndeu; ambuae evocoiyase, “Elıas” ehi; ambuae, “Tūpa ñehe mombehısar mboetasa” ehi yuvireco ndeu —ehi.

²⁹ Evocoiyase oporandu iri güemimbohe upe:

—Pe no, ¿ava, “Co secoı” peye ru pe cheu no? —ehi.

Pedro evocoiyase aipo ehi chupe:

—Nde niha Tūpa Rembıporavo Poropısirosar ereıco —ehi.

³⁰ Jesús rumo, “Pemombehıı rene que ñepeı ava upe” ehi.

Jesús omombehu omano āgua

³¹ Evocoiyase Jesús omboıpi oporombohe: “Che, Ava Rıquehıı, che parısu itera, iyaveı opacatu judıo rerecuareta, pahı rerecuar ivate catu vahe iyaveı Moısés porocuaıta rese

oporombohe vahe remiamotarēhi aicora. Ahe avei che yuca ucara yuvireco. Acuerayevira rumo mbosapi ari rupi” ehi.

³² Ahe omboyecua tupri ité chupe. Evocoyase Pedro viraso co cotimi chupe oñhengata āgua.

³³ Oyemboyere rumo, omahe güemimbohe eta rese, oñhengata Pedro upe aipo ehi:

—¡Esiri che sui, Caruguar! Esepia, nde nandepihañemoñetai mbahe Tupa upendar rese; ava nungar tēi nde pihañemoñeta eico —ehi.

³⁴ Evocoyase Jesús, “Perio” ehi güemimbohe upe, iyavei ambuae ava upe aipo ehi:

—Acoi ava oguata pota vahe che rupi, topoi mbahe güemimbotar tēi aposa sui, iyavei inungar-ra curusu rese ovosiira viña, toyemoingatu voi che recocuer rese oparaisu āgua iyavei toguata tupri che rupi.

³⁵ Esepia, acoi ava güetecuer tēi raisupar, ocañi tēi etera. Acoi ava omocañi tēi vahe rumo güetecuer che recocuer rese, ñehesa ñepisirosa sui avei, ahe oñepisirosa.

³⁶ ¿Aviye ai anghar pīha ava upe opacatu mbahe ivi pipendar pisi āgua tēi, ahe ae tēi omocañi güecocuer yuvireco viña?

³⁷ ¿Mbovi pīha omondora ava güecocuer repirā viña?

³⁸ Esepia, acoi ava yuvinochi ai vahe che sui iyavei che ñhengagüer sui ava angaipa viyar ndaseco tupri vahe rovai, che avei, Ava Riquehir, ěgüe ahera acoi ayevisé che Ru reco pīrata porañetesa pipe, sembiguai rehi i va pendar maranehi reseve curi —ehi.

9

¹ Ipare Jesús aipo ehi iri:

—Supi eté, oimera amove cohava ava nomano vītei chivaherā, osepia rane itera ouse Tupa mborerecuasa ipiratasa pipe yuvireco curi —ehi.

Jesús ñecuñaro agüer

² Seis ari pare, Jesús viraso Pedro, Santiago, Juan reseve ivitri ivate vahesave oyeupi. Aheve aviyeteramo tēi oñecuñaro güemimbohe rovai.

³ Iturucuar sendí, morochí eteanga. Ndipoi eté que ava co nungar co ivi pipe turucuar oyosei vahe.

⁴ Iyavei aviyeteramo tēi oyemboyecua Elías, Moisés reseve Jesús rese oñemoñeta yuvinocha.

⁵ Ipare Pedro aipo ehi chupe:

—Ore mbohesar, javiye ai eté cohava yaico! Toroyapo mbosapi teyupami: ñepeí ndeu nara, ambuae Moisés upe, ambuae evocoyase Elías upe nara —ehi.

⁶ Osiquiye tēi semimbohe yuvireco. Sese Pedro ndoicuaise oñhe āgua, aipo ehiño tēi.

⁷ Ahe ramoseve avei ogüeyi i va quiha iharive, oyopi pa tupri yuvireco. Ahe ipāhuve oyeendu ñehesa aipo ehi vahe: “Co che Rahir, che rembiaisu; peyapisaca catu iñhe rese” ehi vahe.

⁸ Ahe ramoseve avei omahese oivii yuvireco, ndosepia eté que ambuae ava, Jesús güeraño tupri ité osepia opāhuve yuvireco.

⁹ Ipare ogüeyi ivitri sui yuvireco, aipo ehi güemimbohe upe ou: “Ndapemombehui chietera que ñepeí ava upe co mbahe pesepia vahe, pemombehura rumo acoi che, Ava Riquehir, acuerayevise voi” ehi.

¹⁰ Oyeupeñomi tēi vireco aipo ñehesa yuvireco, ahe rumo oporandu-randu oyeupe: “¿Mara oya pīha aipo, ‘Acuerayevira’ ehise?” ehi tēi yuvireco.

¹¹ Evocoyase semimbohe oporandu chupe:

—¿Mahera ru Moisés porocuaita rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹² Evocoyase aipo ehi chupe:

—Elías rane ité niha oura opacatu mbahe moingatu āgua. ¿Mahera aracahendar icuachi-apri pipe aipo ehi: “Ava Riquehir oiporarara mbahe, yamotarēhimbrí: avei secoira” ehi?

¹³ Che niha aipo ahe pēu: Elías rumo ou ité, ava evocoyase opacatu güemimbotar tēi oyapo yuvireco sese. ěgüe ehi opacatu yaviye aracahendar icuachiapirer sese —ehi.

Jesús ombogüera chīhivahe caruguar rerecosar

¹⁴ Ipare oyevi yuvireco güemimbohe recosave. Aheve osepia ava rehi oyeve guasuse yuvireco sese, iyavei oime aheve Moisés porocuaita rese oporombohe vahe oñhehepepi-epi semimbohe yuvireco.

¹⁵ Ichui Jesús repiase, opacatu yuvinoña yuviraso chupe “avirave” apo.

¹⁶ Evocoyase ahe oporandu ava eta upe:

—¿Mbahe rese vo peporandu-randu peyeupe? —ehi.

¹⁷ Ñepeí ipāhu pendar omboyevi chupe:

—Porombohesar, co aru che rahir ndeu, vireco vahe caruguar oyese, nomoñehengatu ucai vahe yepi.

¹⁸ Iyavei que iguatasa rupi co caruguar aviyeteramo tēi opocose sese, oiti voi ivive iyavei sendiriyuiyusu, sāitere-tere avei; sese cūritei nīpirata iri eté. “Penosemi caruguar ichui” ahe tēi nde remimbohe eta upe. Ahe rumo ndoicatu eté yuvireco —ehi.

¹⁹ Jesús omboyeve chupe:

—¡Too, ndapeyeroya tupri vīte eté che rese! ¿Mbovi rupi rutei vo aico vītera pe pāhuve che ñemosasa pipe? Peru evocoi chīhivahe cheu —ehi.

²⁰ Evocoiyase ogūeru yuvireco chupe. Osepiase caruguar Jesús, oiti uca iri chīhivahe ivive. Omboapayere-yere iyavei sendiriyui guasu-guasú.

²¹ Sese oporandu tu upe:

—¿Mbahese vo na ehi chupe? —ehi.

Tu evocoiyase aipo ehi:

—Ichīhivahemi suive ité.

²² Amove co caruguar oiti uca tatave, ive avei yuca pota uca āgua yepi. Sese ereicatusé, ore pītivīñomi tēi catu eve ore paraisuerecosave —ehi.

²³ Jesús aipo ehi chupe:

—¡Mahera, “Ereicatusé” ere cheu! Acoi che rese oyeroya vahe upe opacatu mbahe yaposa —ehi.

²⁴ Aipo hese tu,

—¡Oroviroya niha, che pītivī ru eve nde reroya catu āgua! —ehi pīrata chupe.

²⁵ Osepiase Jesús ava rehīi, oyemboyase sese, oñehe pīrata caruguar upe aipo ehi:

—Caruguar noñehei vahe, ndayapīsa vahe, che orocuai, epoi co chīhivahe sui, ereique iri eme secocuer rese —ehi.

²⁶ Caruguar sāse pucu chīhivahe yuca tupri oso. “Omano ité co chīhivahe” ehi ambuae ava yuvireco.

²⁷ Jesús rumo oipopīsī imopuha; evocoiyase chīhivahe opūha tupri voi eté.

²⁸ Ichui oi que oi pipe. Aheve semimbohe ahe aemi oporandu yuvireco chupe:

—¿Mahera pīha ndoromose catui eté caruguar ichui? —ehi yuvireco.

²⁹ Jesús rumo aipo ehi güemimbohe upe:

—Yeroqui iyavei yecuacu pipeño ité niha co nungar caruguar yaicatu imombo —ehi.

Jesús omombehu iri omano āgua

³⁰ Ichui yuvinosepase, yuvīraso ivi Galilea rupi. Jesús rumo ndoyemboyecua uca potai eté que ambuae ava upe.

³¹ Esepia, güemimbohe güeraño ité ombohe aipo ehi:

—Che, Ava Riquehīr, imondopri aicora che amotarēhimbar povrive, che yuca aveira yuvireco, mbosapī arī rupi rumo acuerayevīra —ehi.

³² Semimbohe rumo ndosenducuai eté oyeupe ñehesa yuvireco iyavei osiquiye chupe porandu āgua yuvireco yepi.

¿Ava vo seco ivate catu vahe?

³³ Ipare oyepota tecua Capernaum ve yuvireco. Yuvīroiquese oi pipe,

—¿Mbahe rese vo acoi peyeaca-aca peico perī rupi? —ehi güemimbohe upe.

³⁴ Ahe rumo noñehei tupri yuvireco chupe. Esepia, perī rupi, “¿Ava pīha ivate catu vahe?” ehi asi-asi oyeupe yuvireco.

³⁵ Evocoiyase oguapīsave, “Periopa” ehi güemimbohe upe, aipo ehi avei:

—Oimese pe pāhu pendar oyemboivate ai vahe, ahe rumo seco ivi coti catura opacatu sui ava eta pītivī āgua —ehi.

³⁶ Ipare oipīsī chīhivahe güemimbohe pāhuve senoha aipo ehi:

³⁷ —Acoi ava oipīsī vahe co chīhivahemi nungar che rer pipe sereco, che ité che pisī yuvireco; iyavei acoi ava che pisī vahe, ndahei che güeraño che pisī, oipīsī aveira che mbousar —ehi.

Acoi ndahei vahe yande amotarēhimbar, ahe yande mboyoyasar secoi

³⁸ Evocoiyase Juan aipo ehi chupe:

—Ore mbohesar, orosepia mbīa nde rer pipe omombo vahe caruguar. Ahe rumo ndogutai cūritei ore rupi; ore ité ndoroipotai chupe —ehi.

³⁹ Jesús rumo,

—Anī ēgūe peye —ehi—. Esepia, ndipoi eté que ambuae oyapo vahe poromondiisa che rer pipe, oicatu vaherā oñehe rai che rese.

⁴⁰ Sese ndayande amotarēhīi vahe, ahe yande mboyoyasar secoi.

⁴¹ Acoi que omondo vahe i vaso pipe che rupi pe recosa pipe pëu, evocoi nungar oipisi itera porerecosa oyeupe nara —ehi.

Yaicua catura mbahe tēi apoēhi āgua

⁴² “Acoi que ava omboangaipa uca vahe co chīhivahe mi nungar che reroyasar, iyacatu evocoi nungar ñapichisa ita mbahe mbocuhisa iyesho rese para guasu pipe imombo āgua.

⁴³ Sese pe po pe mboangaipa uca vahe peyasía ité peyesui. Esepia, aviye catu peiquera tecove apirēhisave ñepeí pe po rese, peso rāgüer sui que ñuvirío pe po rese tata guasu apirēhisave.

⁴⁴ Aheve acoi uru nomanoi vahe, tata ndogüei vahe avei.

⁴⁵ Pe pi pe mboangaipa ucase, peyasía avei peyesui. Esepia, aviye catu ndape pindugüei peique tecovesave, que ñuvirío pe pi rese peique rāgüer sui tata guasu ndopai vahesave.

⁴⁶ Aheve acoi uru nomanoi vahe, tata ndogüei vahe avei.

⁴⁷ Pe resa avei pe mboangaipa ucase, penose ité peyesui. Esepia, aviye catu peique ñepeí pe resa rese Tūpa mborerecuasave que ñuvirío pe resa rese tata guasu apirēhisave pe reique rāgüer sui.

⁴⁸ Aheve acoi uru nomanoi vahe, tata ndogüei vahe avei.

⁴⁹ “Esepia, opacatu ava imoehesara tata nungar pipe.

⁵⁰ Sese yucrí aviye ai eté. Nasehe irise rumo, ndayaicatuí chira imoehe iri āgua. Peico catu yucrí nungar mbahe tuprí pipe peyeupe nara” ehi.

10

Jesús oporombohe mendasa sui poiēhi āgua

¹ Ipare Jesús osē tecua Capernaum sui, oso Judea ivi rupi íai Jordán rovai ari sēsa coti. Aheve ava rehii oñemonuha iri yuvireco sese. Iyavei ombohe iri ava güecocuer rupi tupri.

² Evocoiyase fariseo oyemboya seco rāha āgua tēi yuvireco sese, “¿Aviye píha cuimbahe omenda vahe opoi güembireco sui?” ehi yuvireco chupe.

³ Ahe rumo omboyeví chupe:

—¿Mara ehi vo acoi Moisés porocuita pipe? —ehi.

⁴ Ahe evocoiyase omboyeví yuvireco chupe:

—Moisés remimombehu aipo ehi: “Pemondora pe rembireco upe cuachiar poisa re-sendar pe poi āgua pe rembireco sui” ehi —ehi fariseo yuvireco chupe.

⁵ Evocoiyase fariseo upe aipo ehi:

—Moisés omondo co porocuita pe poreroyaēhisa pipe sui pëu.

⁶ Yipisuive ité niha, “Tūpa oyapo opacatu mbahe, oyapo avei cuimbahe, cuña reseve.

⁷ Sese niha cuimbahe omendase, oyepepira oyesupa sui güembireco rese ité yuvirecoi āgua.

⁸ Evocoiyase ñuvirío yuvirecoira ñepeí ava nungar. Sese ndahe iri ñuvirío, ñepeí nungar ité yuvirecoira.

⁹ Evocoiyase ava Tūpa omomenda vahe oyese, ndiyai ava tēi omboyepépi yuvireco oyesui —ehi.

¹⁰ Oive yuvirecoi vitese, semimbohe oporandu iri co mbahe rese yuvireco chupe.

¹¹ Evocoiyase ahe aipo ehi:

—Acoi opoi vahe güembireco sui omendase ambuae cuña rese, oyemboaguasa tēi vahe güembireco sui.

¹² Acoi cuña oposito omer sui omendase ambuae cuimbahe rese, ahe oyemboaguasa tēi vahe avei —ehi güemimbohe upe.

Jesús osovasa chīhivahe

¹³ Ipare ogüeru chīhivahe Jesús upe yuvireco sese ipoco āgua. Semimbohe rumo, “¿Mahera vo peruño tēi chīhivahe?” ehi opíha víracuasa pipe serusar upe yuvireco.

¹⁴ Evocoiyase Jesús osepiase, ndasoríi güemimbohe upe aipo ehi:

—¡Mahera ndapeipotai iyu āgua! Toyugüeruño chīhivahe cheu. Esepia, co chīhivahe nungar ava yuviroiquera che Ru Tūpa mborerecuasave.

¹⁵ Supi eté, acoi ndoipisii vahe che Ru Tūpa mborerecuasa chīhivahe nungar yuvireco, ahe evocoiyase ndoyuviroiquei chietera ipipe —ehi.

¹⁶ Evocoiyase oipisi, omondo opo iharive osovasa.

Ñepeí mbia chīhivahe imbahe eta vahe oñehe Jesús upe

¹⁷ Oguata vitese Jesús yuvireco, aheseve mbia chīhivahe oña oso sovai, oñenopíha, oporandu chupe:

—Porombohesar aviye vahe, ¿mbahe vo ayapora tecovesa apirēhi vahe rereco āgua? —ehi.

¹⁸ Jesús evocoiyase aipo ehi ahe mbia upe:

—¿Mahera vo, “Aviye vahe” ere cheu? Oime rumo ñepeí aviye vahe ité, ahe Tüpa secói.

¹⁹ Ereicua niha Tüpa porocuaíta: ‘Ndereporoyucaí chira, nandeaguasai chira, nandemondai chira, nanderemirai chira ambuae ava rese, ndereporombopai chira, eremboyoyara nde ru, nde sí aveí’ ehi vahe —ehi.

²⁰ Ahe mbía rumo,

—Porombohesar, che aipo nungar opacatu amboaviye ité che chíhivahe suive —ehi.

²¹ Evocoiyase omahe saísusave sese, aipo ehi chupe:

—Ñepeí mbahe rumo ipane víte ndeu: eso, emondopa rane nde mbahe; ahe seprí evocoiyase emondo ava iparaisu vahe upe. Ichuí ererecora mbahe aviye vahe ivave. Ipare ereguatará che rupí —ehi chupe.

²² Aipo oyeupe hese rumo, ahe mbía oyepepiño ichuí ovíharēhisave oso. Esepía, ahe mbahe yar ité secói.

²³ Evocoiyase omahe oiviíndar güemimbohe rese, aipo ehi:

—¡Yavai eté rumo ava mbahe yar reique água che Ru Tüpa mborerecuasave! —ehi.

²⁴ Semimbohe evocoiyase, “¡Mara ehi ruteí!” ehi tēi ñehe renduse yuvireco. Ahe rumo omombehu iri:

—Che rahireta, iyavai eté Tüpa mborerecuasave imbahe eta vahe reique água ombahe eta rese tēi ipihañemoñeta vahe upe!

²⁵ Yavai rai camello upe yucuar rupí seique água, ava imbahe eta vahe upe rumo yavai catu che Ru mborerecuasave seique água —ehi.

²⁶ Aipo nungar renduse oyepihamondíi guasu yuvireco. Oporandu-randu tēi oyeupe yuvireco: “¿Ava angahu píha oñepisírorá yuvireco víña?” ehi.

²⁷ Evocoiyase omahe güemimbohe rese aipo ehi:

—Ava tēi upe rumo yavai aipo nungar mbahe apo água; Tüpa upe rumo ndayavaimi eté. Esepía, Tüpa opacatu mbahe mboavaisarēhi secói —ehi.

²⁸ Ipare Pedro aipo ehi:

—Ore Yar, ore rumo oroseyapa opacatu ore mbahe nde rupí ore guata água —ehi chupe.

²⁹ Omboyeví rumo Pedro upe:

—Supi eté co aipo ahe pēu: acoi che raisusa pípe iyaveí ñehesa ñepisírosá raisusa pípe oseypa vahe güeta, víquehir, vívri, güeindri, vu, osí, guahir iyaveí oivi,

³⁰ ahe oipísira omahera co iví pípe cien yupagüer rupí aveí oi, vívri, güeindri, osí, guahir iyaveí iví. Yepe oiporarara mbahe-mbahe tēi víña. Ipare rumo tecua ambuaeve oipísí aveira tecovesa apirēhi vahe curi.

³¹ Setá vai rumo cūrítei yipíndar vahe; ipa tēira yuvirecoí. Setá aveira cūrítei ipa tēi vahe, yipíndar yuvirecoira curi —ehi.

Jesús omombehu imombosapísa rupí omano água

³² Yuvirasose Jerusalén ve, Jesús tenonde secói güemimbohe upe. Semimbohe rumo ndoyembovíhai iyaveí saquícueríndar osiquíye yuvireco. Aheve Jesús oñehe iri co cotimí güemimbohe doce yuvirecoí vahe upe. Ichuí omboipi imombehu co mbahe-mbahe tēi reime água chupe aipo ehi:

³³ “Peícua niha, yasora tecua Jerusalén ve, aheve rumo che, Ava Riquehir, che pírsira che mondo pahí eta rerecuar iyaveí Moisés porocuaíta rese oporombohe vahe povrive yuvireco. Ahe, ‘Tomano’ ehira yuvireco cheu. Ipare che mondo aveira ava ndahei vahe yande mu upe yuvireco.

³⁴ Mara ehi-ehi tēira yuvireco cheu, ondiví-ndivíra, oyuvírocuá-rocuara che rese, che yuca aveira yuvireco. Mbosapí arí rupí rumo acuerayevíra” ehi güemimbohe upe.

Mbahe aviye vahe rese oporandu Santiago, Juan reseve yuvireco

³⁵ Ipare oyemboyase Zebedeo rahír Santiago, Juan Jesús rese aipo ehi yuvireco chupe:

—Ore mbohesar, oroipota ereyapo mbahe aviye vahe oreu —ehi.

³⁶ Ahe evocoiyase,

—¿Mbahe vo peipota ayapo vaheṛá pēu? —ehi chupe.

³⁷ —Ore oroipota nde mborerecuá porañetesave ore mboguapíra ndeyepíri eve, ñepeí nde mbahe rese pocosa coti, ambuae nde mbahe rese pocoēhísa coti —ehi yuvireco chupe.

³⁸ Evocoiyase omboyeví:

—Pe ndapeicuai mbahe rese pe porandu. ¿Peiporara catura píha che co mbahe-mbahe tēi aiporara vaheṛá, inungar-ra que ígua iro vahe aihu vaheṛá víña? Iyaveí, ¿peicatura píha che āpíramosa aipísí vaheṛá písi? —ehi.

³⁹ —Taa, oroicatuño ítera —ehi yuvireco.

Evocoiyase ahe aipo ehi chupe:

—Supi eté peihura co mbahe iro vahe, peipísí aveira āpíramosa che aipísí vaheṛá nungar.

⁴⁰ Co rumo ndiyai cheu che piri pe guapí ãgua, che mbahe rese pocosa coti, ambuae che mbahe rese pociõhisa coti. Che Ru Tũpa omoingatu güembiporavo upe nara oguapí vaheerã che ipive —ehi.

⁴¹ Evocoyase ambuae semimbohe diez yuvirecoi vahe iñehe renduse, oñemoiro Santiago, Juan upe yuvireco.

⁴² Ahe rumo, “Perio” ehi opacatu upe. Ipare aipo ehi:

—Peicua niha acoi mborerecuar guasu yuvirecoi vahe Tũpa cuaparẽhi oporocuai oporoyuca ai tẽisa pipe. Iyavei acoi ivate catu vahe oyecoapirasã iteanga omborerecuasa pipe yepi.

⁴³ Pe rumo ãgũe ndapeyei chira pe yeereco. Iyacatu rumo acoi ava oipota vahe ivate catu güeco ãgua pe pãhuve, ihañeco rane itera opacatu ambuae ava rese.

⁴⁴ Iyavei acoi pe pãhu pendar oipota vahe tenonde catu güeco ãgua, ihañeco tupri ranera opacatu pe pãhu pendar rese.

⁴⁵ Aherã niha che, Ava Riquehir, ayu ndahei ava che rese ihañeco ãgua; che rumo ayu ava rese che hañeco ãgua, iyavei amondo vaheerã che recocuer manosave ava eta repirã Carugar povri sui senose ãgua —ehi.

Jesús ombogüera Bartimeo sesapisoõhisa sui

⁴⁶ Ipare oyepota tecua Jericó ve yuvireco. Ahe tecua sui yuvinosese güemimbohe reseve, ava rehii avei, aheve peri popive mbia ndasesapisoi vahe Bartimeo serer vahe, Timoteo rahir, oguapí oi.

⁴⁷ Osenduse, “Jesús Nazaret pendar” hesa, osapucái pirata:

—¡Jesús, David suindar, che paraisuerecomi tẽi eve! —ehi chupe.

⁴⁸ Ava rumo oyaca-yacaño, “¡Quiriri!” ehi yuvireco chupe. Ahe rumo,

—¡David suindar, che paraisuerecomi tẽi eve! —ehi pirataño ité chupe.

⁴⁹ Evocoyase osenduse iñehe, opita,

—Peñehe chupe —ehi.

Ichui oñehe yuvireco chupe:

—Eyemonguerẽhi, epũha. Esepia, oñehe aipo ndeu —ehi.

⁵⁰ Aipo oyeupe he ramoseve, omomboño oturucuar guasu, opũha yesapiha oso chupe.

⁵¹ Evocoyase oporandu ndasesapisoi vahe upe:

—¿Mbahe vo ereipota ayapo vaheerã ndeu? —ehi.

Ahe evocoyase,

—Porombohesar, che mbosarecomi tẽira eve viña —ehi.

⁵² Evocoyase aipo ehi ahe mbia upe:

—Eso tupriño eico; erecuera niha. Esepia, ereyeroya ité che rese —ehi.

Ahe ramoseve ndasesapisoi vahe osareco tupri ité. Ipare osoño ité Jesús raquicuei peri rupi.

11

Jesús oique Jerusalén pipe

¹ Ovirovise tecua Jerusalén yuviraso, serovicave oime ñuvirío tecuami: Betfagé, Betania avei ivitri Olivo ipiimi. Aheve Jesús omondo ñuvirío güemimbohe,

² aipo ehi chupe:

—Peso evocoi tecuami yande rovaingarve. Peyepotase aheve, pesepiara guaricu ñapichimbrí imoha, ava ndoyeupi vitei vahe yuvireco sese, ahe peyorañora seru.

³ Acoi que ava: “¿Mahera vo ãgũe peye?” ehise pẽu, “Ore Yar oiporu pota, ipare niha omboyeveí voiñora” peyera chupe —ehi.

⁴ Evocoyase ahe yuviraso peri rupi. Aheve guaricu ñapichimbrí osepia imoha yuvireco oquendipive. Ichui oyoraño seru yuvireco.

⁵ Evocoyase ahe pendar ava,

—¿Mbahe peyapo? ¿Mahera vo peyora guaricu? —ehi yuvireco chupe.

⁶ Ahe rumo Jesús ombohosa rupi tupri ité omboyeveí yuvireco chupe. Evocoyase, “Tovirasoño” ehi yuvireco chupe.

⁷ Ipare viraso guaricu Jesús upe, iyavei oturucuar omondo iharive yuvireco. Ahese Jesús oyeupi iharive.

⁸ Setá ava oipipira oturucuar peri rupi, ambuae ava evocoyase oyasia pindo omondo peri rupi saperã yuvireco.

⁹ Ava senonendar, saquicuerindar avei,

—¡Imboeteipri, sovasapri tasecoi ou vahe yande Yar rer pipe! —ehi pirata yuvireco chupe—.

¹⁰ ¡Sovasapri yande ramoi David mborerecuasa tasecoi ou vahe oico! ¡Ivave imboeteipri tasecoi! —ehi yuvireco chupe.

¹¹ Ēgüe ehi Jesús oiquese Jerusalén ve. Ipare oi que tūparo pipe. Aheve opacatu rupi mbahe osepia. Ipare yuviraso Betania ve caharuse ité doce güemimbohe rese.

Jesús vireco megua higuera ndihai vahe

¹² Ahere ayihive, yuvinosese Jesús tecua Betania sui, ndasiepoi oico.

¹³ Osepiase amombri ivira higuera so ati vahe, oso chupe '¿iha pīha?' oyapave. Ahe rumo osepia so pāve tēi sese. Esepia, ahe ivira upe ndosupiti vitei iha āgua.

¹⁴ Evocoiyase aipo ehi ahe ivira upe:

—¿Co pipe suive ndipo iri chira ava nde ha yuvirohu vahe rā! —ehi.

Semimbohe osendu iñehe yuvireco.

Jesús omombopa ava mbahe mboepisar tūparo pipe sui

¹⁵ Ipare oyepota Jerusalén ve yuvireco. Aheve Jesús oiquese judío tūparo guasu pipe, omboipi ava mbahe mondosar, mbahe rerocuasar mombopa tupri ocarve oico iyavei ava guarepochi recuñarosar opa ombovapi mesa imondo, apicasu mondosar renda avei omboviapi imondo.

¹⁶ Ndoipotai eté que ambuae mbahe seroiquepirā tūparo pipe.

¹⁷ Ipare oporombohe aipo ehi:

—Icuachiapri aracahendar pipe aipo ehi: 'Co che rēta yeruresa rētarā opacatu ava ivi pipendar uve nara' ehi. Pe rumo imonda rai vahe rēta nungar tēi pereco —ehi.

¹⁸ Pahi eta rerecuar iyavei oporombohe vahe Moisés porocuaíta rese osenduse, "¿Mara yahera pīha sereco yuca uca āgua?" ehi voi yuvireco chupe. Osiquiye rumo opacatu ava sui. Esepia, ahe ndoyembovihai iporombohesa rese yuvireco.

¹⁹ Pitu ramomise, Jesús yuvinose güemimbohe eta reseve yuviraso ahe tecua sui.

Ivira higuera ndihai vahe ipiru

²⁰ Ahere ayihive, añihiveive yuvirasose, osepia ivira higuera sapo suive ipirupa vahe yuvireco.

²¹ Evocoiyase Pedro oyemomahenduha voi iñehe agüer rese, sese aipo ehi Jesús upe:

—Ore mbohesar, esepia co ivira higuera upe ereñehe rai vahecuer, opa ité ipiru —ehi.

²² Jesús evocoiyase,

—Peyeroya Tūpa rese —ehi—.

²³ Supi eté aipo ahe pēu: acoi que ava ivitri upe: 'Esiri ave sui, eso para guasu pipe' ehi vahe oyeroya tuprise ité aipo hesa rese, ēgüe ehi etera chupe.

²⁴ Sese aipo ahe pēu: opacatu que mbahe rese peporanduse pe yeroquisa pipe, peyeroya itera mbahe oime vahe rā rese pēu, ahese peipisi itera.

²⁵ Acoi peyerouise, yipindar peñero rane que pe amotarēhimbar upe, ahese ēgüe ehi aveira pe Ru iva pendar iñero pe angaipa rese pēu.

²⁶ Ēgüe ndapeyise, pe Ru iva pendar avei niñeroi chira pe angaipa rese pēu —ehi.

Jesús mborecuasa

²⁷ Ipare oyevi Jerusalén ve yuvireco. Aheve Jesús secoise judío tūparo guasu pipe, pahi eta rerecuar, Moisés porocuaíta rese oporombohe vahe, ava rerecuar guasu avei oyemboya yuvireco sese.

²⁸ Aheve oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarā ndeu co nungar apo āgua? —ehi yuvireco chupe.

²⁹⁻³⁰ Evocoiyase omboyevi chupe:

—Che avei aporandura mbahe rese pēu: ¿Ava vo Juan ombou ava āpiramo āgua; Tūpa pīha, ava tēi tie? Pemboyeveise cheu, ahese che avei amombehura pēu ava porocuaíta rupi eté pīha ayapo co mbahe vichico —ehi.

³¹ Evocoiyase oñemoñeta aipo ehi oyeupe yuvireco: " 'Tūpa ombou' yahese chupe viña, ahe evocoiyase: '¿Mahera ru ndaperoyai?' ehira vandeu.

³² 'Ava tēi remimbou' ndayahei chiaveira chupe" ehi. Ahe osiquiye tēi ambuae ava sui yuvireco. Esepia, opacatu ité oicua Juan oñehe Tūpa suindar ñehesa rese yepi.

³³ Evocoiyase omboyevi chupe yuvireco:

—Ndroicuai eté Juan mbousar —ehi.

Ahese ahe aipo ehiño chupe:

—Sese che avei, "Ahe iporocuaíta pipe co mbahe ayapo" ndahei chietera pēu —ehi mborerecuar guasu upe.

12

Ava mbahe tēi oporaviqui vahe recouer sui yembohesa

¹ Evocoiyase Jesús omboyoya tecocuer ambuae ava recocuer rese aipo ehi: “Oime mbia oñoti vahe uva oivi pipe, ahe oñachi tupri sereco iyavei oyapo mbahe uva ricuer renose água. Oyapo avei oi ivate vahe opacatu mbahe moha água. Ipare oseya oivi ava oporaviqui vahe upe iporu água. Ichui osê, oso amombri vahesa rupi.

² Oyepotase ari uva pohosa, ahese omondo güembigui oporaviqui vahe upe imboporandu ‘tombomi uva pohopri cheundar cheu cute’ oyapave viña.

³ Ahe rumo oipisiño, inupa-nupa imboyevi tupri tēi yuvireco.

⁴ Evocoiyase ahe ivi yar omondo iri ambuae güembigui. Ahe oyapicha-pichaño ñaca rupi, iñehe mara-mara tēiño avei yuvireco chupe.

⁵ Ipare omondo iri ambuae. Ahe oyucaño yuvireco. Ichui omondo ati iri tēi. Ahe ipāhu pendar rese yuvirecua-rocucaño yuvireco, oyucaño avei ambuae yuvireco.

⁶ “Iyavei ñepeí opita vite, tahir ité, sembiaisu. Ahe omondo ipa ‘co omboyeroyara yuvireco’ oyapave viña.

⁷ Oporaviqui vahe rumo aipo ehi oyeupe yuvireco: ‘Co aipo oipisira vu mbahe. Yayucaño, yandeu nara pāve topita co ivi’ ehi yuvireco.

⁸ Ichui oipisi, oyucaño yuvireco. Ipare ovinose sehögüer ahe miti sui co coti yuvireco.

⁹ “¿Mbahe vo evocoiyase oyapora ivi yar? Osora chupe, opara oyuca oporaviqui vahe, iyavei omondopara oivi ambuae ava upe.

¹⁰ “¿Ndapeyeroqui vo pe co icuachiapri pipe? Aipo ehi niha acoi: ‘Co ita oi aposar opaño omombo yuvireco.

Ahe ita rumo aviye catu vahe oi moviracua tupri água.

¹¹ Ëgüe ehi niha yande Yar yapo.

¡Mara ehi rutei revol’ ehi icuachiapri pipe” ehi.

¹² Evocoiyase oviraso pota voi Jesús soquenda água yuvireco. Esepia, ahe osenducua ité oyesendar iporombohesa yuvireco. Ava sui osiquiyepave rumo opoiño yuvireco ichui.

Fariseo osecoãha iri tēi Jesús guarepochi rese yuvireco

¹³ Ipare mborerecuar omondo fariseo iyavei mborerecuar Herodes rupindar avei Jesús upe ‘toyavi angahu oñehe’ oya yuvireco chupe.

¹⁴ Ahe yuviraso chupe aipo ehi:

—Porombohesar, ore oroicua nde supi eté vahe mbahe eremombehu eico, nde niha ndereroyai vahe ava ñehesa tēi. Esepia, “Ëgüe ehi co mbia” nderei eté ava upe iyavei ereporombohe mbahe supi tupri vahe Tüpa remimbotar apo água rese. ¿Aviyera pñha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

¹⁵ Oicua ité rumo fariseo pihañhisa, sese aipo ehi voi chupe:

—¿Mahera che moingue pota mbahe tēi pipe peye? Peru evocoiyase ñepeí guarepochi cheu, tasepia —ehi.

¹⁶ Ipare fariseo güeru yuvireco chupe, ahe guarepochi repiase, oporandu chupe:

—¿Ava rahanga vo co chini sese, iyavei ava rer vo co chini sese no? —ehi chupe.

—Roma pendar mborerecuar guasu —ehiño fariseo yuvireco chupe.

¹⁷ Evocoiyase aipo ehi fariseo upe:

—Pemondora mborerecuar upe mbahe chupendar; Tüpa upendar mbahe evocoiyase pemondora Tüpa upe —ehi.

Evocoiyase oyepihamondii tēi aipo oyeupe hese yuvireco.

Saduceo oporandu Jesús upe cuerayevisa rese secoãhasave

¹⁸ Evocoiyase saduceo “ndipoi eté cuerayevisa” ehi vahe yugüeru Jesús upe. Oporandu tēi angahu yuvireco chupe:

¹⁹ —Porombohesar, Moisés niha oseya güembicuachiagüer yandeu aipo ehi: “Que cuimbahe omenda vahe omanose guahiñhiseve, tivri evocoiyase omendara sembirecocuer rese ahe viquehir omano vahecuer upe nara tahir a oico.”

²⁰ Oime siete tupri oyesuindar pāve yuvirecoi vahe. Yipindar vahe omenda. Ichui omanoño, ndatahii eté rumo.

²¹ Ipare tivri omenda viquehir rebirecocuer rese. Ahe rumo omanoño, ndatahii avei rumo. Ëgüe ehi tupri avei tivri imombosapisa.

²² Ëgüe ehi co siete tupri omenda ahe cuña rese, ndatahii eté rumo yuvireco. Coiye rumo cuña omano avei no.

²³ Evocoiyase opase ocuerayevi yuvireco, ¿uma rebireco itera pñha? Esepia niha, siete tupri ité omenda tēi yuvireco sese —ehi yuvireco chupe.

²⁴ Evocoiyase Jesús omboyevi chupe:

—Pe pihañemoñeta pipe peyavi. Esepia, ndapeicuai eté Tūpa ñehe icuachiapri aracahendar, ndapeicuai avei Tūpa pīratasa.

²⁵ Supi eté omano vahe ocuerayevise, chupe ndipo iri chira mendasa. Ahe rumo Tūpa rembiguai iva pendar nungar yuvirecoira ivave.

²⁶ Co cuerayevisa resendar rumo amombehura pēu: aviye ndapeyeroqui anga vahe Moisés rembicuachiagüer pipe, acoi caha rese sendi guasu vahe aviterve Tūpa aipo ehise chupe: ‘Che Abraham, Isaac, iyavei Jacob Tūpa aico’ ehi vahe.

²⁷ ¡Tūpa ndahei omano vahecuer Tūpa! ¡Ahe rumo oicove vahe Tūpa secoi! Sese pe pihañemoñeta pipe peyavi —ehi saduceo yuvirecoi vahe upe.

Porocuita aviye catu vahe

²⁸ Ñepe Moisés porocuita rese oporombohe vahe osendu iñehe pīratase oyeupe yuvireco, oicua avei Jesús omboyevi tuprise iñehe yuvireco chupe, evocoiyase oyemboya sese oporandu chupe:

—¿Uma vo porocuita aviye catu vahe opacatu sui? —ehi.

²⁹ Jesús omboyevi chupe:

—Yipīndar mborocuita aviye catu vahe aipo ehi: ‘Pesendu Israel: yande Yar Tūpa aheño ité ñepe yande Yar secoi.

³⁰ Eresaisura nde Yar Tūpa opacatu nde pihá pipe, opacatu nde recocuer pipe, opacatu nde yapisacasa pipe iyavei opacatu nde pīratasa pipe’ ehi.

³¹ Iyavei imoñuviriosa porocuita ahe co: ‘Eresaisura ambuae ava nde yeaisu nungar’ ehi. Ndipo iri ambuae porocuita aviye catu vahe co sui —ehi.

³² Evocoiyase porocuita rese oporombohe vahe aipo ehi chupe:

—Aviye tupri ité aipo nde ñehe, Porombohesar. Supi eté aipo ere oime ñepe Tūpa iyavei ndipoi eté ambuae.

³³ Iyavei yasaisura Tūpa opacatu yande pihá pipe, opacatu yande yapisacasa pipe, opacatu yande pīratasa pipe, iyavei yasaisura ava yande yeaisu nungar. Ahe ité aviye catu mbahe seropovēhepri sui iyavei opacatu porerecosa sapipri tēi sui —ehi.

³⁴ Evocoiyase Jesús icuase co ava pihañemoñeta tuprise, aipo ehi chupe:

—Namombriimi ereico Tūpa mborerecuasa sui —ehi.

Ipare ndipo iri oyemonguerēhi vahe oporandu vaheerā mbahe rese yuvireco chupe.

¿Ava suindar pīha Poropīsiosar?

³⁵ Jesús oporombohese tūparo pipe aipo ehi:

—¿Mahera ru Moisés porocuita rese oporombohe vahe: “Poropīsiosar David suindar ité” ehi yuvireco?

³⁶ Esepia, David ité aipo ehi Espíritu Santo pīratasa pipe:

‘Yar aipo ehi che Yar upe:

Eguapi che acato coti, acoi che amondose voi eté nde amotarēhimbar nde povrive yuvireco’ ehi David aracahe.

³⁷ ¿Mahera ru, “Poropīsiosar David suindar secoira” peye, David teieté, “Che Yar” ehise chupe? —ehi.

Ava rehii oquerēhisave ité osendu Jesús ñehe yuvireco.

Jesús oicua uca Moisés porocuita rese oporombohe vahe recocuerai

³⁸ Jesús aipo ehi oporombohesave: “Peicua catu Moisés porocuita rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo āgua ocar rupi omboeteisa pipe yuvireco.

³⁹ Oseca avei tenda porañete catu vahe güenara otūparo pipe yuvireco yepi, iyavei carusave tenda aviye catu vahesave oguapi yuvireco yepi no.

⁴⁰ Iyavei cuña imer mano vahecuer rēta virocuva-rocuva tēi ichui. Oarondaguā tēi avei oyoeroqui pucu-pucu yuvireco. Ahe rumo oipisira Tūpa ñemoirosa ipīrata catu vahe yuvireco curi” ehi.

Cuña imer mano vahecuer porerecosa

⁴¹ Ñepe ari Jesús oguapi oī porerecosa riru rovai ava repia āgua mara ehi oporerecosa imondo ipipe yuvireco. Aheve setá mbahe yar omondoño ité guarepochi yuvireco.

⁴² Ahe pipeve oyepota cuña imer mano vahecuer iparaisu vahe. Ahe avei omondo ñuviriomi guarepochi oporerecosa ipipe.

⁴³ Evocoiyase Jesús oñehe güemimbohe upe aipo ehi:

—Supi eté che aipo ahe pēu: co cuña imer mano vahecuer iparaisu vahe setá catu guarepochi oporerecosa omondo ambuae ava eta sui co guarepochi riru pipe.

⁴⁴ Ambuae ava eta rumo oguarepochi rumbirermi tēi omondo oporereco āgua yuvireco; co cuña rumo oparaisusa pipe opa ité omondo oguarepochi —ehi güemimbohe upe.

13

“Imondurusara tūparo guasu” ehi Jesús

1 Jesús osêse tūparo guasu pipe sui, ahese ñepeí semimbohe aipo ehi chupe:

—Ore mbohesar, jesepia oi ita imopuhapri, icatupri ai! —ehi.

2 Jesús rumo omboyeví chupe:

—¿Esepia co oi tuvichá vahe ité? Ndipoi chietera rumo que ñepeí ita oyeha vite vahe; opacatu ité imondurusara curi —ehi.

Cañi renonde mbahe oime vaheṛā

3 Evocoyase Jesús yuviraso ivitri Olivo ve, ahe ivitri tūparo guasu rovai tupri. Aheve Jesús uguapise oĩ, Pedro, Santiago, Juan iyavei Andrés oporandu co cotimi mbahe rese yuvireco chupe:

4 “¿Mbahese vo aipo mbahe yaviyera? ¿Mbahe poromondiisa rese rane vo icuasara?” ehi.

5 Jesús rumo omboyeví chupe: “Peicua catu, peyembopa ucai rene ambuae ava upe.

6 Esepia, setá ava yugüerura, ‘Che niha Poropĩsirosar aico’ ehi tẽira ava eta mbopa yuvireco.

7 “Pesenduse rumo ñehesa vavasa resendar cohava, iyavei que rupi, ndapeyembosiquiyei chietera. Esepia niha, ěgũe ehi rane itera; ndehi vitei chira rumo ari cañi.

8 Esepia, ñepeí ivi pipendar ovavara ambuae ivi pipendar rese oyeupe yuvireco; iyavei oimera ivi riri opacatu-catu tẽi tecua rupi, tiavor avei. Co rumo omboipi ramomira mbahe tẽi porarasa.

9 “Peñearo catu. Esepia, pe rerasora mborerecuar rovai yuvireco, iyavei pe nupara tūparove yuvireco. Pe reraso aveira mborerecuareta rovai, iyavei mborerecuar ivate catu vahe rovai che recocuer sui tẽi yuvireco. ěgũe peyera peñehe che recocuer rese chupe.

10 Cañi renonde rumo co ñehesa písirasa resendar opacatu rane ité ava upe icua ucasara ivi rupi.

11 Iyavei, ‘¿Mbahe pĩha amombehura chupe?’ ndapeyei chira pe mondose mborerecuar rovai yuvireco. Aheve voi eté omboyecuara Tūpa pe ñehe āgua pẽu. Esepia, ndahei chira peyesui tẽi peñehe, Espĩritu Santo ité oñehera.

12 Ipare rumo ava omondoñora vivri yamotarẽhisar upe ‘toyuca yuvireco’ oya. ěgũe ehi aveira ava guahir upe; tahir avei oyamotarẽhiñora oyesupa yuca uca āgua yuvireco che recocuer rese.

13 Opacatu avei ava ndape ambotai chira che recocuer sui tẽi yuvireco. Acoi ava oyemoviracua vaheño rumo ari ipa vahe rupi, ahe ipĩsiropri yuvirecoira.

14 “Tūparo guasu maranehi pipe pesepiase mbahe-mbahe tẽi aposa —acoi oyoeroqui vahe, ahe tosenducua tupri yuvireco—, evocoyase acoi yuvirecoi vahe ivi Judea rupi, toñemipa pojava ivitri rese yuvireco.

15 Acoi güeta harive secoi vahe, ahe ari toique iri eme güetave mbahe renose āgua.

16 Acoi que rupi tẽi secoi vahe, toyeve eme avei güetave oyeaosa renose āgua.

17 Iparaisu itera cuña ipuruha vahe ahe ari pipe, imembi pĩtani vahe avei!

18 Peoporandu Tūpa upe, toime eme co nungar mbahe sōhisa vahe pipe pẽu.

19 Esepia, ahe ari pipe ava iparaisu catura opacatu yipive ava ivi apo ramo suive yuvirecoi vahe sui; ipare ndipo iri chietera evocoi nungar.

20 Iyavei yande Yar nomombituhise ari naporai vahe, ndipoi chietera oñepisiro vahe yuvireco viña; ahe rumo güemboporavo raisusa pipe omombituhura.

21 “Que oimese aipo ehi vahe: ‘Esepia, co Poropĩsirosar secoi’ ehi, anise, ‘Peve secoi’ ehise yuvireco pẽu, aní chira peroya aipo ehi vahe.

22 Esepia, yugüerura ava, ‘Che Poropĩsirosar aico’ ehi tẽi vahe, iyavei, ‘Che amombehu vahe Tūpa Ñehengagüer’ ehi angahu tẽi vahe, iyavei oyapora mbahe ava ndoyapoi vahe poromondiisa güeco pĩratasa mboyecua āgua yuvireco. Aviyeteramo ombopa aveira ava Tūpa reroyasar.

23 ¡Peicua catura! opa aipo co senondeve amombehu pẽu” ehi.

Mara ehira Tūpa Rahir oyevisẽ

24 “Ahe ari pipe rumo co mbahe-mbahe tẽi pare ndoyecua iri chira ari, yasi avei ndosesape iri chira,

25 yasitata avei opara oviapi iva sui, iyavei iva resendar mbahe oririira yuvireco.

26 Ahese che, Ava Riquehir, iva quiha rese ayecua itera vitu che pĩratasa pipe che rendigüer porañetesa pipe avei.

27 Ipare amboura che rembiguai eta iva pendar. Ahe evocoyase omonuhara opacatu ivi rupindar che rembiporavo yuvireco, que amombri rupi yuvirecoi vahe, que iva rese yuvirecoi vahe avei.

²⁸ “Peyembohera ivira higuera recocuer sui: co ivira soqui ramose, yaicua cõimi ari sacu vahe yepota ãgua yandeu yepi.

²⁹ Na ehi aveira niha pẽu che ñehe rupi tupri mbahe pesepiase. Sese peicuarã che, Ava Riguehir, cõimi eté che yevi ãgua.

³⁰ Supi eté yuvirecove vitera ava osepia vahe, co mbahe opase yaviye.

³¹ Iva, ivi opara ocañi; che ñehengagüer rumo imboaviyesa rane itera.

³² “Ndipoi eté rumo ava oicua vahe ari iyavei hora che yevi ãgua yuvireco, che Ru rembiguai iva pendar avei ndoicuai yuvireco, che avei ndaicuai eté. Che Ru güeraño ité rumo oicua.

³³ “Sese niha pemahemohara yepi, che rãrora peye. Esepia niha, ndicuasai che yevi ãgua.

³⁴ Inungar que mbia amombri oso pota ãgua renonde, güembiguai oseyapa güeta rãro ãgua, omondo avei ñepeipei upe iporaviqui ãgua, iyavei omondo güeta roquendipi rãro ãgua.

³⁵ Pe evocoiyase pemahemohara. Esepia, ndapeicuai marase che oi yar ayevira pẽu, aviyyeteramo pitu ramose, pitu mbiter, tacura ñehese, anise añihivei.

³⁶ Ndaipotai pemahemohaẽhiseve tẽi ayevira.

³⁷ Che aipo ahe pẽu, opacatu upe avei: ¡Pemahemohaño ité yepi!” ehi güemimbohe eta upe.

14

Oyemborandu Jesús yuca ãgua rese yuvireco

¹ Ipare ñuvirio ari judío Pascua pieta ãgua ipane, ahe pieta pipe yuvirohu pan ndayapepoi vahe yepi, pahi rerecuareta, Moisés porocuaita rese oporombohe vahe avei oyemborandu: “¿Mara yahera Jesús mbopa ipisi yuca ãgua?” ehi yuvireco.

² Ambuae rumo aipo ehi yuvireco:

—Ndiyai pieta pipe ité yaipisi ava rehii yemondiẽhi ãgua yandeu —ehi.

Cuña Jesús rese mbahe síacua vahe oipiyere

³ Ahese Jesús secõi Betania ve Simón lepra vireco vahecuer rõtave. Aheve mesave chiniseve, cuña güeru mbahe síacua vahe siru reseve sepí iteanga vahe. Ahe osovapisa rerocua, ipare oipiyere Jesús ãca rese.

⁴ Ambuae ava aheve yuvinoi vahe rumo oñemoiro tẽi aipo ehi yuvireco oyeupe:

—¿Mahera vo co omocañi tẽi mbahe síacua vahe?

⁵ Omondo vahe ité tie co tresciento ari rupindar mboraviqui repri rupi ava iparaisu vahe pitivii ãgua viña —ehi yuvireco.

Omañeco tẽi avei ahe cuña yuvireco.

⁶ Jesús rumo aipo ehi ahe ava upe:

—Teheni, ãgüe tehiño, ¿mahera vo pemañeco tẽi? Co mbahe oyapo vahe rumo cheu aviye ité.

⁷ Ava iparaisu vahe niha yuvirecoiño itera pe pãhuve, iyavei peyapoño itera mbahe aviye vahe peyapo potase chupe; che rumo ãgüe ndahe viteñoi chira vichico pe pãhuve.

⁸ Iyavei co cuña oyapo mbahe ocatugüer rupi; opa voi omoiacua che rete che manoẽhi viteseve.

⁹ Supi eté aipo ahe pẽu: ñehesa pĩsirosa resendar mombehuse opacatu tecua rupi, imombehusa aveira co cuña rembiapo sese mahenduha ãgua —ehi.

Judas oyemoingatu Jesús mondo ãgua yamotarẽhimbar upe

¹⁰ Evocoiyase Judas Iscariote, semimbohe doce vahe pãhu pendar, oso pahi eta rerecuar upe imoñeta Jesús mondo ãgua.

¹¹ Senduse, oyemboviharete: “Yamondo guarepochi chupe” ehi voi eté yuvireco. Evocoiyase Judas oseca voi Jesús mondo ãgua yamotarẽhimbar upe.

Jesús caru agüer ipa vahe güemimbohe rese

¹² Yipindar ari pan ndayapepoi vahe husa pipe, ahese avei ovesa Pascua resendar yucapri seropovẽhesa yepi, ahe ari pipe semimbohe oporandu Jesús upe yuvireco:

—¿Que vo ereipota oromoingatura carusa Pascua pieta resendar yandeu? —ehi.

¹³ Aipo oyeupe hese, omondo ñuvirio güemimbohe, aipo ehi chupe:

—Peso tecuave. Aheve pesepiara mbia vireco vahe cambuchi pipe i. Supi pesora,

¹⁴ seiquesave aipo peyera sêta vahe upe: ‘Ore mbohesar oporandu: ¿Uma oi pipe vo Pascua pieta resendar orohura che remimbohe reseve? ehi’ peyera.

¹⁵ Evocoiyase ahe moyecuara oi guasu ivatendar imoingatupri pẽu. Aheve pemoin-gatu mbahe yahu vaherã —ehi güemimbohe upe.

¹⁶ Evocoiyase semimbohe yuviraso tecuave. Aheve semimombehu rupi tupri osepia mbahe yuvireco. Ichui omoingatu carusa Pascua pieta resendar yuvireco.

¹⁷ Pitu ramomise, Jesús doce güemimbohe rese aheve oyepota yuviraso.

¹⁸ Iyavei ocaruse ité mesave yuvinoi, güemimbohe upe aipo ehi:

—Supi eté aipo ahe pëu: ñepeí pe pãhu pendar yande piri ocaru vahe che mondora che amotarëhimbar upe —ehi.

¹⁹ Evocoiyase semimbohe ndoyembovihai tēi yuvireco, iyavei oporandu-randu tēi ñepeí-peí chupe yuvireco:

—¿Che pãha? —ehi yuvireco.

²⁰ Omboyeví rumo güemimbohe upe:

—Ñepeí eté pe pãhu pendar ahe co omoaqui pan che caro pipe.

²¹ Supi eté che, Ava Riquehir, amboaviyera icuachiapri; jiparaisu catura rumo acoi mbia che mondosar! Aviye catura ahe mbia ndoyesuise viña —ehi.

²² Yuvirocaru viteseve, Jesús oipisi pan, “Aviye ndeu” ehi Vu upe. Aipo ohe pare, ombohimbóhi imondo güemimbohe upe aipo ehi:

—Peipisi; co che rete —ehi.

²³ Ipare oipisi igua riru, “Aviye ndeu” ehi Vu upe. Aipo ohe pare omondo güemimbohe upe, ipare opacatu yuviroihu.

²⁴ Ahese aipo ehi:

—Co che ruví, ahe che Ru remimbotar ipiasu vahe pëu nara. Oyepeyerera ava rehii recocuer rese nara.

²⁵ Supi eté aipo ahe pëu: ndaihu iri chietera uva ricuer cheu ari oyeopotase voi che Ru Tüpa mborerecuasave aihura uva ricuer ipiasu vahe —ehi.

“Pedro, Ndaicuai vahe evocoi mbia’ erera cheu” ehi Jesús Pedro upe

²⁶ Osapucaire, opa yuviraso ivitri Olivo ve.

²⁷ Ahese Jesús aipo ehi:

—Opara pemocañi che rese yeroyasa peyesui. Esepia, acoi icuachiapri pipe aipo ehi: ‘Ayucara ovesa rãrosar, ahese oñemosai tēira ovesa opacatu rupi yuvireco’ ehi.

²⁸ Che cuerayevire rumo aso voi etera pe renonera Galilea ve —ehi.

²⁹ Evocoiyase Pedro aipo ehi chupe:

—Yepe ambuae opacatu nande reroya iri chira yuvireco, che rumo ãgüe ndahei chietera —ehi.

³⁰ Aipo ehi rumo Pedro upe:

—Che rumo supi eté aipo ahe ndeu: co pítu pipeve voi eté tacura ñehe yupagüe renon-deve, “Ndaicuai vahe evocoi mbia” erera mbosapi oyupagüer rupi cheu —ehi.

³¹ Ahe rumo,

—Yepe che amano tēira nde rupi viña, che rumo, “Ndaicuai vahe evocoi mbia” ndahei chietera —ehi—ehi catuño ité chupe.

Ambuae opacatu aipo ehi tupri tēi avei yuvireco chupe.

Jesús oyoeróqui Getsemaní ve

³² Ipare yuviraso Getsemaní ve yuvireco. Aheve Jesús aipo ehi güemimbohe upe:

—Peguapi cohove, che aso ranera ayeroqui peve —ehi.

³³ Aheve viraso Pedro, Santiago, Juan oyeupi. Ahese ndoyepihambóvihai eté oico

³⁴ aipo ehi:

—Che cūritei ndavihai eté. Esepia, che hã oyandu ité manosa. Pepita rane cohove, iyavei pemahemohara pe yeroqui pipe —ehi güemimbohe viraso vahe upe.

³⁵ Evocoiyase oso tenonde catumi. Aheve oyaivi ivi rese oso, oporandu Tüpa upe mbahe tasi vahe reimeñhi água oyeupe.

³⁶ Oyoeróqui pipe aipo ehi: “Che Ru, che rembiaisu, ndeu niha mbahe ndayavai vahe ité: che renose co mbahe-mbahe tēi sui eve; tayapo eme che remimbotar tēi, nde remimbotar rupi catu tayapo” ehi.

³⁷ Ipare oyeví güemimbohe upe. Ahe rumo opaño yuviroque yuvirocua. Ahese aipo ehi Pedro upe:

—Simón, ¿ereque? ¿Ndereñemosai eté vo que ñepeí hora nde ropesii upe?

³⁸ Pemahemoha, peyeroqui mbahe tēi pipe pe viapiñhi água. Pe niha pequerēhi ité viña, pe retocuer tēi rumo nipiratai pëu —ehi.

³⁹ Ichui oso iri oyoeróqui, aipo ehi tupri avei oñehe.

⁴⁰ Ipare oyevíse, osesapiha iri iqueseve tēi avei. Esepia, sopesii nombroyoyai eté yuvireco, ahese ndoicatui eté iñehe mboyeví yuvireco.

⁴¹ Imombosapisa rupi oso irise aipo ehi chupe:

—¡Pequeño vite vo peyu! Aviye revo peque. Osupiti ité che, Ava Riquehir, mondo água ava yangaipa vahe povrive.

⁴² Pepũha, yaso. Esepia, cōimi eté che amotarēhisar upe che mondo vaherã secoi —ehi.

Jesús ipisisa

⁴³ Jesús oñehe vitesese ohã, Judas oyepota oso chupe, ahe doce pãhu pendar semimbohe, iyavei setã ava yugüeru quise pucu, ivira reseve-seve supi. Ahe pahi eta rerecuar, Moisés porocuaita rese oporombohe vahe, judío rerecuareta porocuaita rupi oyapo yuvireco.

⁴⁴ Yipindar rumo imondosar Judas aipo ehi: “Asovaupite vahe rese peicuara. Ahe peipisi tupri itera seraso” ehi.

⁴⁵ Oyepotase Jesús upe, oyemboya voi oso sese aipo ehi chupe:

—¡Porombohesar! —ehi sovaupite.

⁴⁶ Ahese oipisi Jesús yuvireco.

⁴⁷ Semimbohe secõi vahe supi ovinose oquise pucu. Ipípe oyasia pahi rerecuar ivate catu vahe rembiguai nambi.

⁴⁸ Ahese Jesús aipo ehi ava upe:

—Pe quise pucu, ivira reseve-seve rutei co peyu che ropeña che pisi ãgua. Imonda rai vahe nungar che rereco peye.

⁴⁹ Ari yacatu rupi niha pe pãhve aporombohese tũparove vichico, na ndapeyei eté cheu. Co rumo ãgüe peye icuachiapri mboaviye ãgua cute —ehi.

⁵⁰ Ahese semimbohe oñemosaipe oseyã Jesús ahe ae tupri imoha yuvireco.

⁵¹ Mbia chñhivahe rumo turucuar pípe güerañomi oñemama vahe supive secõi viña;

⁵² ahe avei oipisi yuvireco. Oipoequiñño rumo oturucuar reya oso nani tupri.

Jesús serasosa pahi rerecuar ivate catu vahe rovai

⁵³ Evocoyase Jesús vïraso pahi rerecuar ivate catu vahe rovai yuvireco. Aheve oñemonuha pahi eta rerecuar, judío rerecuar, Moisés porocuaita rese oporombohe vahe avei no.

⁵⁴ Pedro avei amombri rupive tõi oiique ité oso pahi rerecuar ivate catu vahe rëta ãchisa pípe. Aheve oguapiño mbia sundao pãhve tata ipípe oyephe oi.

⁵⁵ Pahi eta rerecuar rumo iyavei opacatu porandusa ivate catu vahe pendar oseca-seca tõi ava oñehe-ñehe tõi vaherã Jesús rese yamotarëhisave yuca uca ãgua yuvireco; ndoicatu eté rumo yuvireco.

⁵⁶ Iyavei setã iteanga tõi semira yuvireco sese; oyecopi-copi tõi rumo güemira pípe.

⁵⁷ Amove aipo ehi tõi yuvireco seco momara ãgua:

⁵⁸ —Ore orosendu iñehe aipo ehise: ‘Che opara amonduru co tũparo ava tõi rembiapo. Ipare rumo mbosapi ari rupi opara amopuha. Ndahe iri chira evocoyase ava tõi rembiapo’ ehi —ehi tõi yuvireco chupe.

⁵⁹ Ndahoyoyai rumo ambuae imombehusa rese.

⁶⁰ Ahese pahi rerecuar ivate catu vahe opũha oporandu Jesús upe:

—¿Nderemboyeví chira vo iñehe yuvireco chupe? ¿Mbahe vo aipo nde amotarëhimbar oñehe nde rese? —ehi chupe.

⁶¹ Noñeheiño ité rumo chupe. Pahi rerecuar ivate catu vahe rumo oporandu iri chupe:

—¿Poropisïrosar ité vo nde ereico, Tũpa imboeteipri Rahir? —ehi.

⁶² —Taa, ahe ité niha che aico. Pe niha che repiara peye che, Ava Riquehir; aguapise che Ru mbahe mboavaisarëhi acato coti; ayevise avei iva quihã rese curi —ehi chupe.

⁶³ Evocoyase pahi rerecuar ivate catu vahe omondoro oturucuar aipo ehi:

—¿Mbahe iri vo yande yaipota vite yaico?

⁶⁴ Yasendupa niha aipo Tũpa upe iñehe-ñehe tõiã, ¿mara ehi aipo evocoyase pe pihave? —ehi.

Ipare opacatu guasu ava, “¡Tomanoño ité!” ehi yuvireco chupe.

⁶⁵ Ahese amove ava ondivi-ndivi sese iyavei osesacua, ipare yuvirocua-rocua sese aipo ehi yuvireco:

—¡Eicua ité ru, ava evocoi ocua nde rese! —ehi-ehi yuvireco chupe.

Sundao tũparo rãrosar avei osovapete-pete yuvireco.

Pedro, “Ndaicuai vahe evocoi mbia” ehi Jesús upe

⁶⁶ Pedro ivive ñachimbri pípe secõi. Aheve cuña oyepota ou pahi mborerecuar ivate catu vahe rembiguai chupe.

⁶⁷ Osepiase Pedro iyephehese tata ipípe, omahengatu ohã sese aipo ehi chupe:

—Nde avei acoi Jesús Nazaret pendar rupindar ereico —ehi.

⁶⁸ Ahe rumo aipo ehiño:

—Ndaicuai vahe ité rumo aipo mbia; ndaicuai avei aipo nde ñehesa —ehiño chupe.

Ichui osëse oquendipípe ohã, ahese oñehe tacura.

⁶⁹ Omahe irise co cuña mbiguai sese, ahe aipo ehi ahe pendar ava yuvirecoi vahe upe:

—Co ava niha supindar ité —ehi.

⁷⁰ Pedro rumo, “Ndahei eté che” ehiño. Iparemi tēi ambuae ava aheve yuvirecoi vahe aipo ehi iri yuvireco chupe:

—Nde ité niha supindar ereico. Esepia, nde Galilea iguar ité ereico —ehi chupe.

⁷¹ Pedro evocoyase,

—jTūpa niha oicua, ndopombopai eté niha aipo, ndaicuai eté aipo mbia pe ñehesa! —ehi.

⁷² Aipo iheseve, tacura oñehe imoñuviriosa rupi. Ahese Pedro oyemomahenduha, “Tacura ñehe yupagüesa renondeve, mbosapi oyupagüer rupi, ‘Ndaicuai vahe evocoi mbia’ erera cheu” ihe agüer rese. Sese oyasehó iteanga.

15

Jesús serasosa Pilato rovai

¹ Cōhe potase, pahí eta rerecuar, judío rerecuar, Moisés porocuaita rese oporombohe vahe iyavei opacatu ava porandusa ivate catu vahe pendar oñemonuha yuvireco. Ipare ipocua-pocua Jesús seraso Pilato upe yuvireco.

² Pilato aheve oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, “Ahe ereico” ere cheu —ehi.

³ Pahí eta rerecuar rumo omombehu-mbehu tēi mbahe sembiaviñhi yuvireco chupe.

⁴ Evocoyase Pilato oporandu iri chupe aipo ehi:

—¿Mahera vo ndereñehei eté? Esepia, setá mbahe nde rembiavi omombehu yuvireco —ehi.

⁵ Nomboyevii eté rumo Pilato upe. Evocoyase, “¿Mara ehi rutei piha?” ehi tēi.

“jTayaticasa!” ehi ava Jesús upe yuvireco

⁶ Mborerecuar guasu recosa ité ñepeí ava soquendapri renose água Pascua pieta pipe ava rehí porandusa rupi yepi.

⁷ Mbia Barrabás serer vahe, ahe pipeve avei soquendasa yuvireco ambuae oporapichi vahe reseve.

⁸ Ava yugüeru Pilato upe ‘tayaposa pieta pipe yaposa vahe yepi’ oyapave yuvireco.

⁹ Pilato rumo aipo ehi:

—¿Peipota amose vaherã judío rerecuar? —ehi.

¹⁰ Esepia, Pilato oicuaño ité ava rese yemoecatēhisa pipe sui pahí eta rerecuar remimondo secoise.

¹¹ Pahí eta rerecuar rumo ‘Barrabás tosē’ ombohe ati-ati uca ava yuvireco.

¹² Evocoyase Pilato oporandu ahe ava upe:

—¿Mbahe vo peipota ayapora co mbia chupe acoi, ‘Judío rerecuar’ peye vahe rese? —ehi.

¹³ Ahe rumo omboyeví Pilato upe:

—jTayaticasa curusu rese! —ehi ati-atiño yuvireco.

¹⁴ Pilato rumo aipo ehi ava upe:

—¿Mbahe ité vo oyapo naporai vahe? —ehi.

Ahe rumo,

—jTayaticasa ité curusu rese! —ehi ati-ati iriño yuvireco.

¹⁵ Evocoyase Pilato, mbahe tupri opita água ava rese, omose uca Barrabás. Ipare oinupá iteanga uca Jesús tucumbo tupeicha nungar pipe, imondo curusu rese yatica água.

¹⁶ Ahese sundao viraso mborerecuar rēta sui ambuae oi pipe, aheve opacatu omboetasa omonuha yuvireco.

¹⁷ Aheve omboyemonde turucuar pīraumbi vahe pipe yuvireco, ipare yu piapri omonde ñaca rese.

¹⁸ Sāse avei yuvireco:

—jImboeteipri judío rerecuar tasecoi! —ehi angahu yuvireco chupe.

¹⁹ Iyavei yuvirocua-rocua ivira pipe ñaca rupi yuvireco sese, ondivi-ndivi avei oñenopiha-piha avei sovai yuvireco imboeteisave angahu.

²⁰ Mara-mara tēi sereco pare, ovirocua iturucuar pīraumbi vahe yuvireco ichui, ahese omonte iturucuar ité yuvireco sese. Ichui vinose ocarve yatica água yuvireco.

Jesús yaticasa curusu rese

²¹ Ñepeí mbia Simón serer vahe Cirene pendar, Alejandro, Rufo yesupa, ahe pipe avei oyepota chupe que co coti rupi sui ou. Oñocua potase ocua viña: “Erio, terevosii curusu co Jesús vireco vahe rese” ehi voñho tēi yuvireco chupe.

²² Jesús oviraso Gólgota serer vahesave yuvireco (‘Ava Ñca Cangüer’ oyapave aipo ehi).

²³ Iyavei uva ricuer oyeseha vahe mirra rese omondo tēi yuvireco chupe. Ahe rumo ndoihui eté.

²⁴ Evocoyase oyatica yuvireco. Ipare sundao iguayĩño Jesús turucuar rese ‘¿uma pĩha virasora oyeupe’ oyapave yuvireco.

²⁵ Ahe oyatica añihivei la nueve rupi yuvireco.

²⁶ Cúrusu rese rumo omombehu mbahe sui oyuca yuvireco: “Judío rerecuar guasu” ehi icuachiapri oĩ.

²⁷ Supive avei yaticasa ñuvirío imonda rai vahe ñepe mbahe rese ipocosa coti, ambuae mbahe rese ipocoẽhisa coti.

²⁸ Ēgüe ehi imboaviye icuachiapri aipo ehi vahe: “Ava mbahe-mbahe tẽi aposar nungar ipãhuve serecosa” ehi.

²⁹ Acoi ava ñocuasar iñehe-ñehe tẽi, oñeaca mbovava aipo ehi yuvireco chupe:

—Nde acoi, “Opara tũparo amonduru. Ipare mbosapi ari rupi opa irira amopuha” ere acoi cuese.

³⁰ ¡Eñepisiro ru nde ae cute; egüeyi curusu sui! —ehi yuvireco chupe.

³¹ Ēgüe ehi avei pahi eta rerecuar; oporombohe vahe avei Moisés porocuita rese iñehe mara-mara tẽi yuvireco chupe, aipo ehi yuvireco oyeupe:

—Oipĩsiro ambuae. Ahe ae rumo ndoicatu oñepisiro.

³² ¡Poropĩsirosar Israel rerecuar guasu, toyeeroi ahe ae curusu sui cũritei, ahese voi seroyasara —ehi.

Iyavei supive yaticapri mara ehi-ehi tẽi avei chupe.

Jesús mano agüer

³³ Osupitise rumo mbiter ari, opa tupri pĩtu ivi rupi. Ēgüe ehi las tres rupi.

³⁴ Ahese tupri avei Jesús oñehe pĩrata aipo ehi: “Eloi, Eloi, ¿lema sabactani?” ehi, (ahe ‘che Ru Tũpa, che Ru Tũpa, ¿mahera vo che reya eve?’ oyapave aipo ehi).

³⁵ Aheve ava yuvirecoi vahe rumo osenduse iñehe, aipo ehi yuvireco:

—Pesendu aipo Tũpa ñehe mombehusar Elías upe oñehe —ehi yuvireco chupe.

³⁶ Evocoyase ñepe imboetasa oña oso mbahe saviyu vahe reca. Ahe omoaqui vinagre pipe imondo ivira apri rese chupe ‘toihu’ oya:

—Ēgüe tehiño rane, ¿oura pĩha Elías seroyi ãgua curusu sui? —ehi.

³⁷ Ahese Jesús sãse pĩrata. Ipare omano.

³⁸ Aheseve tũparo asiasa turucuar ivate coti sui ovo tupri.

³⁹ Iyavei sundao rerecuar Roma iguar, ahe Jesús rehögüer rese omahengatu ohã. Osenduse Jesús rãse iyavei osepiase imano, aipo ehi:

—Supi eté catu, co mbia Tũpa Rahir ité —ehi.

⁴⁰ Iyavei cuña aheve amombrive osepia catu yuvinoha; ahe yuvirecoi María Magdalena, José si María, ahe avei Santiago chĩhivahe catu vahe si iyavei ambuae cuña Salomé.

⁴¹ Co cuña eta yuvirecoiño vahe ité Jesús rupi, oipitivi vahe avei Galilea ve yuvirecoise. Setã avei ambuae ava supi yugüero vahe Jerusalén ve yuvirecoi.

Jesús apocatu agüer tuvipa pipe

⁴² Pĩtu ramose, ahe ari pipe oyemoingatu ava yuvireco ari mbituhusa upe nara yepi,

⁴³ ahese José, tecua Arimatea pendar, porandusa ivate catu vahe pendar, acoi Tũpa mborerecuasa osãro vahe oico, oquerẽhisa pipe ité oique oso Pilato upe oporandu ãgua Jesús rehögüer rese.

⁴⁴ Pilato rumo oyepihamondii tẽi, “Omano” hese. Oñehe sundao rerecuar upe oporandu ãgua ‘¿marase vo ěgüe ehi?’

⁴⁵ Sundao rerecuar omombehuse chupe, ahese omondo sehögüer José upe.

⁴⁶ Evocoyase José virocuva turucuar secose vahe. Curusu sui seroyi pare, oimama voi eté ipipe. Ipare omoingue tuvipa ita yohopri pipe. Ichui ita yapayer vahe pipe osovapi.

⁴⁷ María Magdalena iyavei María, José si, osepiaño yapocatuse yuvireco.

16

Jesús ocuerayevi

¹ Mbituhusa ari pare, María Magdalena, María, Santiago si, Salomé avei, ahe virocuva mbahe siacua vahe Jesús rehögüer rese nara yuvireco.

² Iyavei añihivei, yipindar ari semana pipe, oyepota Jesús ruvipave icatu ramose yuviraso.

³ Aheve aipo ehi oyeupe yuvireco:

—¿Ava pĩha co tehögüer rovapisa virocuara yuvireco yandeu? —ehi.

⁴ Osepiase rumo ita guasu yuvireco, ndahe irise güendave ihã,

⁵ yuviroiquesa tehögüer ruvipave yuvireco, aheve osepia ombahe rese pocosa coti mbia chĩhivahe, iturucuar pucu morochi vahe oguapise oĩ. Ahese cuña oyembosiquiye yuvireco.

⁶ Ahe rumo aipo ehi chupe:

—Pesiquiye eme. Pe peseca Jesús Nazaret pendar, yaticapri. Ahe rumo ocuerayevi; ndipoi eté cohave. Pesepia ru supagüer.

⁷ Peso, tapemombehu semimbohe eta upe iyavei pemombehu Pedro upe: 'Jesús rane osora pe renonera Galilea ve. Aheve pesepiara mbahe che remimombehu rupi tupri' peyera —ehi.

⁸ Evocoyase ahe cuña yuvinosese tuvipa sui, yuvinoña yuviraso, oririi avei osiquiyepave. Iyavei nomombehui eté ambuae ava upe osiquiyepave yuvireco.

Jesús oyemboyecua María Magdalena upe

⁹ Jesús ocuerayevire añihiveive domingu pipe, oyemboyecua yipindar María Magdalena upe, ahe ichui acoi siete tupri caruguar opa omboyepepi.

¹⁰ Ahe oso imombehu supindar upe. Ahe rumo oyaseho vite oviharêhisave yuvireco.

¹¹ Osenduse cuña ñehe: "Jesús ocuerayevi, che ité asepiá" ehise, ndoviroyai eté yuvireco.

Jesús oyemboyecua ñuvirio güemimbohe upe

¹² Ipare Jesús oyemboyecua iri ñuvirio güemimbohe upe ambuae güepiaca pipe peri rupi.

¹³ Ahe avei yuviraso omboetasa upe imombehu; ndoviroya viteiño avei rumo yuvireco.

Jesús oyocuai güemimbohe

¹⁴ Coiye catumi têi, Jesús oyemboyecua güemimbohe once tupri yuvirecoi vahe upe mesave yuvinoi viteseve, oñehengata ahe oyese yeroyaêhisa rese chupe, iyavei ocuerayevisa mombehusar reroyaêhi rese avei.

¹⁵ Ipare aipo ehi güemimbohe upe: "Peso opacatu ivi rupi, pemombehu co ñehesa pîsirosa resendar peico.

¹⁶ Acoi viroya vahe, iyavei oñeapiramo vahe, ahe oñepisîrora yuvireco; acoi ndoviroyai vahe rumo, ahe imocañipirâ têi yuvirecoira.

¹⁷ Co mbahe poromondiisa omboyecua che reroyasar yuvireco: Che rer pipe omboyepepira caruguar ava sui. Oñehe aveira ñehesa ndicuasai vahe pipe yuvireco.

¹⁸ Oipîsi aveira mboi yuvireco, yuvirohuse mosa oporoyuca vahe, ndoyapoi chietera mbahe yuvireco chupe; iyavei omondose opo ava imbaheasi vahe harive, ombogüera aveira yuvireco" ehi.

Jesús oso ivave

¹⁹ Oñehe pare, yande Yar Jesús oso ivave. Aheve oguapî Vu Tüpa acato coti oî.

²⁰ Semimbohe evocoyase opa yuviraso opacatu ivi rupi ñehesa pîsirosa resendar mombehu. Yande Yar avei oipîtivîi, iyavei mbahe poromondiisa pipe omboyecua uca ité ñehesa pîsirosa resendar supî eté vahe. Aipo rupive.

LUCAS REMBICUACHIA JESUS RECOCUER RESENDAR SAN LUCAS

Lucas oicuachía Teófilo upe

1-2 Imboeteipri Teófilo, setá ava oicuachía yuvireco opacatu arachendar mbahe imombeupri mboaviyesa cüritei yande pãhuve co Jesucristo recocuer resendar. Acoi ava yipisuive osepia vahe omombehu tupri vahe Jesucristo recocuer ava upe yuvireco, ahe omombehu tupri avei yuvireco cheu.

³ Sese che avei opa aseca tupri yipisuive opacatu co mbahe cua tupri água, Teófilo. Ichui che amoingatu tupri pota icuachiapri sesendar ndeu nara avei sereco.

⁴ Evocoiyase nde ereicia tupri co porombohesa supi eté vahe acoi nde mbohe agüer.

Tüpa rembiguai omombehu Juan Oporoãpiramo vahe ha água

⁵ Yipindar Jesús ha renondeve, Herodes mborerecuar ivi Judea rupindar recose aracahe, ahese aipo judío pahi secoi Zacarías serer vahe. Ahe pahi Abías rupindar secoi. Sembireco aipo pahi Aarón suindar, ahe serer Isabel.

⁶ Co ñuvirío secocuer aviye tupri Tüpa upe; viroya tupri opacatu Yar porocuita yuvireco. Evocoiyase ndipoi eté que ava “mara” ehi vahe yuvireco chupe.

⁷ Zacarías rumo yipisuive ndatahi vahe. Esepia, sembireco ndimembii vahe ité, iyavei oyoya ité ocuacua-cuacuami yuvireco.

⁸ Ñepeí ari aipo osupiti icuaita tüparo pipe imboetasa reseve iporaviqui água Tüpa rovaque yuvireco.

⁹ Pahi recosa ité ñgüe ehi aracahe suive, ahese iporavosa Zacarías yipindar yasiapri tüparo maranehi pipe oique vaheñ itaisi rapí água.

¹⁰ Itaisi rapí viteseve aipo, opacatu ava oyerure yuvireco ocarve.

¹¹ Aheseve aipo oyemboyecua yande Yar rembiguai itaisi renda maranehi ique coti chupe.

¹² Tüpa rembiguai repiase aipo, oyembosiquiyé iteanga.

¹³ Tüpa rembiguai rumo aipo ehiño chupe:

—Zacarías —ehi—, eresiquiye eme. Tüpa osendu nde yeruresa. Sese nde rembireco Isabel imembira ndeu. Ahe nde rahir rer-ra Juan.

¹⁴ Ereviharetera sese, iyavei oyemboviharetera opacatu ava yuvireco nde rahir ohasé.

¹⁵ Esepia niha, nde rahir secocuer tuvichara oico Tüpa rovaque. Ndoihui chietera uva ricuer sai vahe, iyavei que ambuae mbahe sai vahe; secoira rumo Espiritu Santo rese ohañhi viteseve.

¹⁶ Ñgüe ehira omonguerëhi setá ava judío Yar Tüpa reroia iri água oico.

¹⁷ Ahe viorecora espíritu piratasa oyese oyoyara Tüpa ñehe mombehisar Elías rese ‘ava guahir rese tiñero yuvireco oyeupe’ oya, ‘toyembohe avei ava ndiporeroyai vahe yuvireco seco catupri vahe aracuasa mboyeroia água rese’ oyapave. Ñgüe ehira ava mbohe imoingatu yande Yar pisi água sereco —ehi chupe.

¹⁸ Evocoiyase,

—¿Mara ahera pñha aipo reroia? Che rumo acuacuami eté vichico, iyavei che rembireco ocuacuami avei no —ehi Tüpa rembiguai upe.

¹⁹ —Aní —ehi chupe—. Che aico Tüpa rembiguai Gabriel, Tüpa rovaingar. Ahe niha che mbou ndeu che ñehe água iyavei co ñehesa aviye vahe mombehu água.

²⁰ Nde rumo ndereroyai acoi amombehu vahe ndeu. Sese co pipe suive ité nandehengatui chira eico. Osupitise voi che remimombegüer, acoi ohasé nde rahir, ahese ramo ndehengatura —ehi aipo Tüpa rembiguai chupe.

²¹ Osãro pucu tñi aipo ocarve ambuae imboetasa eta yuvireco. “¿Mahera pñha nose vitei tüparo pipe sui?” ehi tñi yuvireco chupe.

²² Osëse aipo tüparo pipe sui, niñehengatui voi eté. “Ñaro osepia mbahe tüparo pipe” ehiño ité aipo imboetasa eta yuvireco chupe. Ipo ãta-ãta tñi aipo oñehengatuñhise mbahe mombehu oico.

²³ Ipare omboaviyese ocuaita tüparo pipe, oyeví oso güëtave.

²⁴ Coiye aipo sembireco Isabel ipuruha oico. Judío porocuita mboyeroiasave nose iri eté ambuae ava piri poyandepo yasi rupi. Ipihañemoñeta:

²⁵ “Yar Tüpa ité ñgüe ehi cheu ava che rese ñeheñhi iri água yuvireco” ehi vorivetesa pipe aracahe.

Tüpa rembiguai Jesús yesu água omombehu

²⁶ Coiye seis yasi pipe Tüpa omondo güembiguai Gabriel tecua Nazaret ve ivi Galilea rupi
²⁷ cuñatai ndaseco marai vahe upe iñehe ägua; ahe serer María. Ahe omenda pota vahe
 cuimbahe mborerecuar guasu David suindar José serer vahe rese.

²⁸ Tüpa rembiguai oi que co cuña rêtave aipo ehi chupe:
 —¡María, Tüpa nde rovasa, erereco mbahe icatupri vahe pítiviisa Yar Tüpa suindar! Tüpa
 nde rese ité secói; nde rovasa catu opacatu cuña sui —ehi chupe.

²⁹ Tüpa rembiguai repiase, “¿Mara oya pñha co aipo ehi cheu?” ehi tēi osiquiyepave
 ophiñemoñeta rereco.

³⁰ Evocoyase Tüpa rembiguai aipo ehi chupe:
 —María, eresiquiye eme. Esepia niha, Tüpa ité nde poravo nde rovasa ägua.
³¹ Cüritei voira rumo ndemembira: ererectora nde membri; ahe serer-ra Jesús.
³² Ahe niha secouvicha catu vaherā secoira; “Tüpa seco ivate vahe Rahir secói” ehira
 yuvireco chupe. Iyavei niha Yar Tüpa ité omoinguera mborerecuar guasu seco ägua
 inungar tamoi David aracahe.

³³ Mborerecuar guasu secoira judío recua rupi apirēhi vaherā; imborerecuasa niha
 apirēhi vaherā ité secoira —ehi.

³⁴ Evocoyase ahe aipo ehi:
 —¿Mara ahera vo aipo che membri viña? Esepia niha, ndaico vitei vahe cuimbahe rese
 —ehi Tüpa rembiguai upe.

³⁵ —Espíritu Santo ogüeyira nde harive iva quiha nungar; Tüpa güeco pñratasa pipe nde
 momembira. Sese acoi ohasa nde membri seco maranehi vahe, “Tüpa Rahir” hesara chupe.

³⁶ Cüritei nde mu Isabel avei ocuacuami pipe imembí oico; ahe niha ndimembí vahe
 yipindar viña, cüritei rumo vireco seis yasi omembri vie pipe.

³⁷ Esepia niha, Tüpa upe ndipoi eté mbahe yavai vahe —ehi.

³⁸ Evocoyase María aipo ehi:
 —Che Yar rembiguai aico, tayaviye ayase Tüpa remimbotar cheu nde ñehe rupi —ehi.
 Aipo ihe pare, Tüpa rembiguai oyepepi oso ichui.

María oso omu Isabel piri

³⁹ Ahe se María oso voi eté ivitri rupi tecua ivi Judea ve.

⁴⁰ Aheve aipo Zacarías rēta pipe oi que se oso, oyapo “avirave” omu Isabel upe.

⁴¹ Evocoyase Isabel rie pipe omí imembri iñehe renduse. Ahe se Espiritu Santo oi que
 Isabel aviterve.

⁴² Ipape osapucaí pñrata aipo ehi chupe vorivetesave:
 —¡Tüpa nde rovasa cuña opacatu sui, iyavei osovasa nde membri!

⁴³ Noromohai eté che piri ereyu vaherā viña, che Yar si.
⁴⁴ Esepia, cheu “avirave” ereyapose, che membri omí voi vorivetesave che rie pipe.

⁴⁵ ¡Sovasapri ereico! Esepia, ereroya ité ñehesa ndeandar. Iyavei Tüpa omboaviyera
 güemimombehu nde rese —ehi Isabel chupe.

⁴⁶ Evocoyase aipo ihese,
 “Che niha amboetei che Yar vichico;

⁴⁷ cheroriveté Tüpa che Pñsirosar rese.

⁴⁸ Esepia, ahe omahe che rese che reco yemominisa pipe seroyasar che recosave.

Co pipe sui ve, ‘Sovasapri secói’ ehira opacatu ava yuvireco cheu.

⁴⁹ Esepia niha, Tüpa mbahe mboavaisarēhi, oyapo mbahe tuvichá vahe cheu.

¡Tüpa imboeteipri catu tasecoi yepi!

⁵⁰ Ahe oiparaisuereco opacatu omboetisar yepi.

⁵¹ Nomboavai eté mbahe yapo.

Osecoreroyi ava oyemboivate ai tēi vahe.

⁵² Viroyi mborerecuar seco pñrata vahe pñratasa sui; ava seco mbegüemi vahe rumo osec-
 omboivate.

⁵³ Ava yaracua pota vahe, omboaracua; ava ‘che aracua vai’ ehi vahe rumo, nomboaracuai
 eté.

⁵⁴ Oipitivi niha opacatu viroyasareta judío yuvirecoi vahe.

Esepia, ndasesarai eté poroparaisuerecosa mondo ägua

⁵⁵ güemimombehugüer rupi yande ramoi aracahendar Abraham upe, ichuindar upe avei
 yepi no” ehi vorivetesava pipe omu

Isabel upe.

⁵⁶ Ipape María opita Isabel piri mbosapi yasi rupi. Ichui oyevi oso güetave.

Juan Oporoãpiramo vahe haragüer

⁵⁷ Osupitise ari Isabel upe, imembira. Ahe imembri cuimbahemi.

⁵⁸ Imu iyavei icotindar oyanduse Tūpa rembiapo mbahe aviye vahe, aipo ehi yuvireco chupe: “Aviye ai catu Yar Tūpa secoi co cuña rese” ehi vorivetesave yuvireco.

⁵⁹ Ocho ari pipe aipo, ahe pītani ombocircuncida yuvireco judío porocuaíta mboyeroyasa pipe. Ipare aipo omondo pota iyesusupa Zacarías rer yuvireco sese viña,

⁶⁰ ichi rumo,

—Aní—ehiño—. Juan itera rumo serer —ehi.

⁶¹ —¿Mahera vo? Ndipoi eté rumo nde mu rer aipo nungar —ehi yuvireco chupe.

⁶² Evocoiyase aipo omahe pītani yesupa rese yuvireco ‘¿mbahe pīha ahe omondo pota sererguā viña?’ oyapave yuvireco.

⁶³ Evocoiyase aipo iyesusupa oporandu ivirapemi rese sese serer oicuachía vahe. Ahe serer oicuachía: ‘Juan sererguā’ ehi imoi. Ahese aipo opacatu ava: “¿Mara ehi rutei pīha co?” ehi tēi oyeupe yuvireco.

⁶⁴ Ahese ramo Zacarías iñhengatu, omboipi Tūpa upe osapucaí oico.

⁶⁵ Opacatu aipo sēta cotindar oyembosiquiye tēi yuvireco, iyavei aipo opacatu Judea recua rupi omombehu-mbehu mbahe osepiā vahecuer yuvireco.

⁶⁶ Mbahe osendu vahecuer rese avei aipo oporandu-randu oyeupe yuvireco: “¿Mbahe pīha aipo pītani oyapora curi?” ehi. Esepia niha, supi eté Tūpa osovasa.

Zacarías sapucaí agüer

⁶⁷ Zacarías, Espíritu Santo pīratasa pipe, oñehe Tūpa oyeupe ñehesa pipe aipo ehi:

⁶⁸ “¡Yande Yar Tūpa imboeteipri tasecoi!

¡Esepia niha, ahe ou yande judío yaico vahe pīsiro āgua!

⁶⁹ Ombou niha Poropisirosar güembiguai David suindar yandeu.

⁷⁰ Ēgüe ehi imombehu opacatu oñhengagüer mombehúsar seco maranehi vahe upe aracahe.

⁷¹ Ahe yande písirora yande amotarēhimbar sui.

⁷² Ēgüe ehi Tūpa imbou oporoparisuerecosa yande ramoi aracahendar upe, iyavei iye-momahenduha āgua güemimbotar maranehi mombehu agüer rese.

⁷³ Evocoiyase, ‘Che supi eté ayapora evocoi mbahe’ ehi yande ramoi Abraham upe aracahe

⁷⁴ yande renose āgua yande amotarēhimbar povri sui ‘tache mboetei osiquiyeēhisa pipe yuvireco’ oya;

⁷⁵ ‘toyuvirecoi che rembiepiave güeco ívisa pipe iyavei güeco maranehisa pipe ari yacatu rupi’ oyapave.

⁷⁶ Nde, che rahir, ‘Co Tūpa ivate vahe ñehe mombehúsar secoi’ ehira ava yuvireco ndeu.

Esepia, nde eremoingatura ava recocuer Yar pisi āgua senondeve eico.

⁷⁷ Supi eté nde niha eremboyecuara opacatu ava Tūpa upendar yuvirecoi vahe upe angaipā sui ñeroisa pisi āgua iñepisiro āgua.

⁷⁸ Esepia, yande Ru Tūpa, oporoparisuerecosa pipe ombou oporoesapesa iva pendar yandeu yande reco mbopiasu āgua

⁷⁹ iyavei ava Tūpa cuaparēhi resape āgua ‘toyuvirecoi mbahe tupri pipe’ oyapave.

Esepia, ahe inungar ava pītumimisave yuvirecoi vahe, ocañi tēi vahe. Ahe yuvireco” ehi Zacarías.

⁸⁰ Ichui pītani ocuacua iyavei vireco pīratasa Espíritu suindar oyese. Ipare rumo oso oyemboerecua ivi iporupirēhi rupi. Coiye oyemboyecua omu Israel pendar upe oico.

2

Jesús yesu agüer

¹ Yipindar mborerecuar guasu Augusto oporocuai oico, “Tayecuachiasa opacatu tecua rupi” ehi.

² Ahe yipindar yecuachiasa mborerecuar Cirenio, Siria pendar rēise.

³ Opacatu ava yuviraso güecua yacatu rupi oyecuachía āgua yuvireco.

⁴ Sese José avei osē Nazaret, Galilea ivi rupi sui oso ivi Judea rupindar tecua Belén ve. Esepia niha, aracahendar mborerecuar guasu David aheve oha vahecuer, iyavei José ichuindar avei secoi.

⁵ Ēgüe ehi oyoya yuviraso güembirecovi María rese oyecuachía āgua. María rumo imembira pota ité oico.

⁶ Aheve oyepota ramose, osupiti ari imembira āgua.

⁷ Aheve oha imembri yipindar vahe cuimbahemi. Ahese María oyao omembri turucuar pipe, ēgüe ehi imoñeno imondo mbahe mimba rembihu riru pipe. Esepia niha, ndoyosui eté oque āgua aheve yuvireco.

Tūpa rembiguai eta omombehu Jesús haragüer ovesa rārosar upe yuvireco

⁸ Namombriimi Belén sui ovesa rārosar yuvirecoi. Aheve osāro ovesa pītu pipe yuvireco.

⁹ Aviyeteramo tēi oyemboyecua Tūpa rembiguai iva pendar chupe. Tūpa porañetesa avei sendi yivii chupe yuvireco. Ahe sepiase, oyembosiquiyé iteanga tēi yuvireco ichui.

¹⁰ Ahe rumo aipo ehi chupe: “Pesiquire eme. Esepia, che ayu mbahe icatupri vahe mombehu āgua pēu pe mboviharete āgua iyavei opacatu ava mboviharete āgua avei no.

¹¹ Co pipe oha David recua Belén ve Poropisirosar pēu nara. Ahe niha Tūpa Rembiporavo, pe Yarguā secói.

¹² Icuā āgua peyosura pītani yaopri tuprimi vahe tui mbahe mimba rembihu riru pipe” ehi.

¹³ Aviyeteramo tēi oyemboyecua ambuae setá Tūpa rembiguai iva pendar yivii yuvireco. Tūpa upe osapucaí yuvireco aipo ehi:

¹⁴ “¡Imboeteipri tasecoi Tūpa ivave!

¡Ivive ava Tūpa rembiaisu toyuvirecoi tupri oyeaisusa pipe!” ehi osapucaí yuvireco.

¹⁵ Opase oyeví Tūpa rembiguai ivave yuviraso, ahese ovesa rārosar aipo ehi oyeupe yuvireco:

—Yaso ru Belén ve; yasepiara aipo mbahe, acoi oicua uca vahe Yar oico yandeu —ehi yuvireco.

¹⁶ Evocoiyase ipoyava yuviraso. Ipare osepia María, José, Jesús pītani avei yuvireco cute. Ahe pītani omoñenomi mbahe mimba rembihu riru pipe ino.

¹⁷ Ipare yuvinose omombehu-mbehu ambuae ava upe Tūpa rembiguai remimombegüer pītani resendar ñehesa yuvireco.

¹⁸ Evocoiyase opacatu ava oyepihomondii co ñehesa renduse yuvireco.

¹⁹ María rumo opacatu co mbahe rese oyapísacaño; ahe ehiño ité ipihañemoñetasa.

²⁰ Oyevíse ovesa rārosar yuviraso, omboetei iyavei osapucaí Tūpa upe yuvireco. Esepia niha, opacatu mbahe osendu vahe, osepia vahecuer yuvireco imombehupri rupi tupri ité.

Jesús pītani seropovēhesa Tūpa upe tūparo pipe

²¹ Ocho ari pipe ahe pītani ombocircuncida yuvireco; omondo sererguā Jesús yuvireco, ahe terer tupri avei acoi Tūpa rembiguai omombehu María upe imembíēhi viteseve.

²² Ipare omboaviyese ohari güētave oñemoatiro āgua, ahe aipo ēgüe ehi Moisés porocuaita rupi yuvireco yepi, ahese vīnose pītani seraso tecua guasu Jerusalén tūparo pipe seropovēhe āgua Yar upe yuvireco.

²³ Ēgüe ehi yuvireco. Esepia, Yar porocuaita aipo ehi icuachiapri pipe aracahe: “Opacatu yipindar pītani cuimbahe mini yuviroha vahe ipehasara Tūpa upe nara yepi” ehi.

²⁴ Yuviraso oporerecosa reropovēhe āgua yuvireco yande Yar porocuaita rupi: “Ñepeí oyovaichor reseve picuhi, anise ñuvirío apicasu reropovēhera” ehi vahe.

²⁵ Ahe pipe mbia Jerusalén ve secói Simeón serer vahe. Ahe mbia aviye etepri vahe. Oyerure vahe Tūpa upe, osāro vahe avei Israel recua pendar Pisirosar imombehupri. Ahe secói vahe ité Espiritu Santo rese.

²⁶ Ahe chupe Espiritu Santo opa uca oicua “eresepia rane itera Poropisirosar Tūpa remimbou nde mano renondeve” ehi vahe.

²⁷ Ahe ari pipe Espiritu Santo viroguata tūparove. Oyepotase José, María reseve yuvireco tūparove Jesús pītani reropovēhe āgua Tūpa porocuaita rupi tupri,

²⁸ ahese Simeón oyemboya oso sese, osupi ichi sui, viroyeroqui Tūpa upe señoa aipo ehi: ²⁹ “Che Yar, cūrítei che, nde rembiguai, amano tupriño itera.

Esepia niha, nde remimombegüer eremboaviye ité cheu.

³⁰ Asepia ité niha Poropisirosar vichico cute.

³¹ Nde niha erembou opacatu ava rembiepiave.

³² Ahe niha poroesapesa ité secói.

Esepia, omboyecua mbahe supi eté vahe ava ndahei vahe judío yuvirecoi vahe upe, iyavei omondara poromboeteisa nde recua Israel pendar judío yuvirecoi vahe upe” ehi oyerogu.

³³ José iyavei María ndoyembovīhai tēi yuvireco pītani rese Simeón yeroqui renduse.

³⁴ Evocoiyase Simeón osovasa ahe pītani iyesupa reseve. Ipare aipo ehi ichi María upe:

—Esendu, co pītani reroyaēhisa pipe setá yande mu judío oviapira mbahe tēi pipe yuvireco; ambuae rumo seroya pipe sovasapri yuvirecoira. Ahe avei omboyecua mbahe ava upe. Amove rumo viroñoñora yuvireco.

³⁵ Ipīpe sui ava pihañemoñetasa icuasara curi. Iyavei co opacatu mbahe tasira nde piha pipe inungar quise pucu osasara nde piha viña —ehi chupe.

³⁶ Aheve avei cuña cuacuami yaracua vahe secói, ahe serer Ana, Fanuel rayri, Aser suindar. Ocuñatamiseve rumo omenda, iyavei secói raimi tēi omer rese siete araviter rupive.

³⁷ Cūrītei secōi omer mano pare ochenta y cuatro aravīter. Nosei eté tūparo pīpe sui oico. Ēgūe ehi yande Yar mboetēi pītū, arī rupi oyecuacusa pīpe iyavei oyeruresa pīpe avei oico no.

³⁸ Ahe evocoyase ahesa reseve avei ou pītani upe, “Avīye ndeu” ehi Tūpa upe. Ipāre oñehe secocuer rese opacatu ava Jerusalén pendar osāro vahe güecua pīsīro āgua upe oico.

Jesús pītani reroyevi agūer Nazaret ve

³⁹ Evocoyase opacatu Moisés porocuaita mboaviyere, opa oyevi Galilea pendar güecua Nazaret ve yuvireco.

⁴⁰ Ahesē pītani ocuacua catumi imbahecua-ecua irimi eté oico iyavei ipīrata catu irimi. Esepia, Tūpa osovasa ité sereco no.

Jesús chīhivahe tūparo pīpe secōi

⁴¹ Iyesupa yuvīraso aravīter yacatu Jerusalén ve Pascua pieta repia yepi.

⁴² Jesús doce aravīter virecose, ahesē vīraso iyesupa Jerusalén ve oyeupi pieta repia yuvireco. Esepia, ēgūe ehi eté judío recocuer pietase yuvireco yepi.

⁴³ Ahe pieta pare voi, oyevisē yuvireco güecosave, ahesē Jesús opitaño Jerusalén ve; ichi rumo iyavei tu José ndoicuai eté ipītase yuvireco.

⁴⁴ “Ouño revo ava pāhu rupi” ehi yuvireco chupe viña; aipo ehiño ité ñepeī arī pīpe yuvireco chupe. Oseca tēise rumo omu pāhu rupi, iyavei omborīpar pāhu rupi avei no,

⁴⁵ ndoyosuī eté yuvireco. Ahesē oyevi iri tēi Jerusalén ve seca yuvireco.

⁴⁶ Imombosapīsa arī pīpe oyosu ramo tūparo pīpe yuvireco. Aheve oguapī ava Tūpa porocuaita rese oporombohe vahe pāhuve oī; oyapīsaca iñehe rese iyavei oporandu-randu ahe ava upe Tūpa Ñehengagūer rese oī.

⁴⁷ Evocoyase opacatu ava ndoyembovihai tēi imbahecua vaisa rese yuvireco. Esepia, oporanduse mbahe rese yuvireco chupe, omboyevī tupri voi-voiño ité ñehesa.

⁴⁸ Oyosuse iyesupa, oyepihamondīi yuvireco. Ahesē ichi aipo ehi chupe:

—Che membri, ¿mahera vo ēgūe ere eico oreu? Nde recasa tēi opacatu rupi, ore mopīhañemoñeta ati uca eve —ehi.

⁴⁹ Evocoyase,

—¿Mahera vo che reca co coti rupi tēi peye peico? ¿Ndapeicuai vo che Ru rēta pīpe aico vaherā? —ehi osi upe.

⁵⁰ Iyesupa rumo ndosenducuai eté aipo oyeupe hesa yuvireco.

⁵¹ Evocoyase oyevi Nazaret ve oso supi. Aheve omboyeroyaño ité oyesupa. Ichi niha opacatu co mbahe rese oyapīsacaño ité.

⁵² Ahesē Jesús ocuacua-cuacua iri, iyetei catu avei imbahecua catu iri avei oico no. Secōi tupri ai eté Tūpa upe iyavei ava eta upe avei no.

3

Juan Oporoāpiramo vahe secōi ivi iporupirēhisa rupi

¹ Quince aravīter pīpe mborerecuar guasu Tiberio recose, Poncio Pilato evocoyase mborerecuar secōi Judea rupi, Herodes avei mborerecuar secōi Galilea ve, tivri Felipe evocoyase mborerecuar secōi Iturea ve iyavei Traconite ve, Lisantias avei mborerecuar secōi Abilinia ve.

² Anás iyavei Caifás ahe pahī rerecuar ivate catu vahe yuvirecoi. Ahesē Tūpa, “Emobehu che ñehe ava upe cute” ehi Zacarías rahir Juan upe oico ivi iporupirēhisave.

³ Juan evocoyase oso opacatu iai Jordán ivi oico, supi aipo ehi ava upe: “Pemboasī pe angaipa, peyevī Tūpa upe, ahesē opoāpiramora Tūpa pēu ñero āgua pe angaipa rese” ehi.

⁴ Co yaviye ité Tūpa ñehe mombehusar Isaiás rembicuachigūer pīpendar aipo ehi vahe:

“Sendusa ivi iporupirēhisave ava sapucaisa aipo ehi vahe:

‘Pemoingatu yande Yar raperā, pemohivi tupri avei’ ehi.

⁵ Evocoyase opacatu ivisocuer opara imboapiposa chupe, opacatu ivitri ivate vahe iyavei ivitri mini opara imboyoyasa tupri no.

Acoi perī ipāri vahe, ahe imohivisapara; perī ipicucu ati vahe opara imboapiposa tupri chupe.

⁶ Iyavei opacatu ava osendura ñehesa pīsīrosa resendar Tūpa remimbou yuvireco cute’ ehi vahe” ehi.

⁷ Ava rehīi yuvinosepa chupe ‘tayande āpiramo’ oyapave yuvireco viña. Ahe rumo aipo ehi: “iPe mboi mboetas tēi peico! ¿Ava vo, ‘Pesēra Tūpa ñemoirosa ou vaherā sui’ ehi tupri tēi pēu?”

⁸ Yipindar toyecua tupri rane yande Yar upe peyevisa pe angaipa mboasisa pipe. Iyavei ndapeyeroyai chira 'ore Abraham suindar oroico' pe hesa rese tēi peñepisiro āgua. Esepia, Tūpa oicatuño ité co ita sui Abraham suindar nungar tupri apo āgua oyeupe nara yepi.

⁹ Hacha niha imoingatusa voi eté opacatu ivira iha naporai vahe sapo rupi yasia āgua yepi. Yasiapri evocoiyase imondosapara tatave" ehi.

¹⁰ —¿Mbahe pīha evocoiyase oroyapora ore recocuer recuñaro āgua oroico? —ehi ava rehii oporandu yuvireco chupe.

¹¹ —Pe pereco vahe ñuvirío pe camisa, ñepeí pemondo ava ndovirecoi vahe upe; iyavei pe pereco vahe tembihu, pemboyahomi tēi ambuae ava ndovirecoi vahe upe —ehi imboyeví ava upe.

¹² Yugüeru avei moviro ava sui guarepochi reroquasar 'tayande āpiramo' oyapave yuvireco. Ipare oporandu Juan upe mbahe rese yuvireco:

—Porombohesar, ¿mbahe vo ore oroyapora Tūpa rupi ore guata āgua oroico? —ehi yuvireco chupe.

¹³ Evocoiyase aipo ehi ahe ava yuvirecoi vahe upe:

—Aní perocua catu iri guarepochi pēu imombehusa sui —ehi.

¹⁴ Iyavei amove sundao oporandu mbahe rese yuvireco chupe:

—Ore no, ¿mbahe vo ore oroyapora? —ehi.

—Ndaperocuai chietera que mbahe ambuae ava sui, ndapeñehe-ñehe tēi chira ava upe sembiapoēhi rese, iyavei peyembovihanora pe poraviqui repri rese —ehi sundao upe.

¹⁵ Ava rumo, "¿Ndaheí pīha co Poropisirosar sãrombri secoi?" ehi tēi Juan upe yuvireco.

¹⁶ Juan rumo aipo ehi opacatu ava upe: "Che opoāpiramo i pipe tēi; oura rumo ambuae che raquicuei, ahe pe āpiramora Espiritu Santo tata nungar pipe. Ahe seco pĩrata catu vahe secoi che sui. Sese cheu ndiyai eté ahe ipitaquisã yora āgua ichui" ehi.

¹⁷ "Ahe güeru trigo mbovevesa ihigüer sui ipēha āgua. Sãhii evocoiyase yapocatusa, ihigüer rumo imondosa tata apirēhi vahesave" ehi ava upe.

¹⁸ Omombehu-mbehu vite ñehesa aviye vahe ava upe 'toyemonguerēhi güecocuer recuñaro āgua yuvireco' oya.

¹⁹ Ipare rumo Juan oñehe pĩrata mborerecuar Herodes upe secocuerai rese. Esepia, vivri Felipe rembireco Herodías rese secoi, iyavei setá ambuae mbahe naporai vahe sembiapo.

²⁰ Sese Herodes oyapoño ambuae mbahe tēi: seroyaēhisa pipe osoquenda ucaño Juan sereco.

Jesús āpiramosa

²¹ Yipindar rumo voquenda viteēhiseve Juan oñapiramo setá ava oico, aheseve avei oñapiramo Jesús. Jesús yerure viteseve, aviyeteramo tēi oyemboi tupri íva.

²² Ipare Espiritu Santo ogüeyi ou iharive apicasu nungar, iyavei oyeendu ñehesa íva sui aipo ehi vahe:

—Nde che Rahir ereico, che rembiaisu; sese aviha ité nde rese —ehi.

Ava eta oyesu vahe Jesucristo yesu renondeva

²³ Jesús virecose treinta araviter, ahese ramo omboipi oporombohe. Ahe icuapri vahe ité José rahir secose viña. José Elí rahir secoi,

²⁴ Elí evocoiyase Matat rahir, ahe Matat evocoiyase Leví rahir, Leví evocoiyase Melqui rahir, ahe Melqui evocoiyase Jana rahir, Jana evocoiyase José rahir,

²⁵ ahe José Matatías rahir, Matatías evocoiyase Amós rahir, ahe Amós evocoiyase Nahúm rahir, Nahúm evocoiyase Esli rahir, ahe Esli Nagai rahir,

²⁶ Nagai evocoiyase Maat rahir, ahe Maat Matatías rahir, Matatías evocoiyase Semei rahir, ahe Semei evocoiyase Josec rahir, Josec evocoiyase Judá rahir,

²⁷ ahe Judá Joanán rahir, Joanán evocoiyase Resa rahir, ahe Resa evocoiyase Zorobabel rahir, Zorobabel evocoiyase Salatiel rahir, ahe Salatiel Neri rahir,

²⁸ Neri evocoiyase Melqui rahir, ahe Melqui Adi rahir, Adi evocoiyase Cosam rahir, Cosam evocoiyase Elmadam rahir, Elmadam evocoiyase Er rahir,

²⁹ ahe Er Jesús rahir, Jesús evocoiyase Eliezer rahir, ahe Eliezer Jorim rahir, Jorim evocoiyase Matat rahir,

³⁰ ahe Matat Leví rahir, Leví evocoiyase Simeón rahir, ahe Simeón evocoiyase Judá rahir, Judá evocoiyase José rahir, ahe José Jonam rahir, Jonam evocoiyase Eliaquim rahir,

³¹ Eliaquim Melea rahir, ahe Melea Mena rahir, Mena evocoiyase Matata rahir, ahe Matata evocoiyase Natán rahir,

³² Natán David rahir, ahe David evocoiyase Isaí rahir, Isaí Obed rahir, ahe Obed evocoiyase Booz rahir, Booz Sala rahir, ahe Sala evocoiyase Naasón rahir,

³³ Naasón Aminadab rahir; ahe Aminadab evocoiyase Admin rahir; Admin evocoiyase Arni rahir; Arni evocoiyase Esrom rahir; ahe Esrom evocoiyase Fares rahir; Fares evocoiyase Judá rahir;

³⁴ ahe Judá Jacob rahir; Jacob evocoiyase Isaac rahir; ahe Isaac Abraham rahir; Abraham evocoiyase Taré rahir; Taré evocoiyase Nacor rahir;

³⁵ ahe Nacor Serug rahir; Serug evocoiyase Ragau rahir; ahe Ragau evocoiyase Peleg rahir; Peleg Heber rahir; ahe Heber evocoiyase Sala rahir;

³⁶ Sala Cainán rahir; ahe Cainán evocoiyase Arfaxad rahir; Arfaxad evocoiyase Sem rahir; ahe Sem evocoiyase Noé rahir; Noé evocoiyase Lamec rahir;

³⁷ ahe Lamec Matusalén rahir; Matusalén evocoiyase Enoc rahir; Enoc evocoiyase Jared rahir; ahe Jared Mahalaleel rahir; Mahalaleel evocoiyase Cainán rahir;

³⁸ ahe Cainán evocoiyase Enós rahir; Enós evocoiyase Set rahir; ahe Set Adán rahir; Adán evocoiyase Tüpa rahir.

4

Jesús recoãhasa

¹ Jesús Espíritu Santo rese ité secoi. Ahe osē iai Jordán sui oso. Ipare Espíritu viroguata ivi iporupirēhisa rupi.

² Aheve cuarenta ari secoise Caruguar osecoãha. Ndocarui avei oico. Sese ndasiepoi eté.

³ Caruguar evocoiyase aipo ehi chupe:

—Tüpa Rahir ité nde recose, co ita sui eyapo pan cūrítei —ehi.

⁴ Evocoiyase Jesús omboyeví chupe:

—Che Ru ñehe rumo icuachiapri pipe aipo ehi: ‘Ndaheí chira pan suiño ava yuvirecovera’ ehi —ehi Caruguar upe.

⁵ Ipare Caruguar viraso ivate vahesave. Aheve ñepei reseve opacatu ava-ava tēi mborerecuasa ivi pipendar omboyecua chupe.

⁶ Ipare aipo ehi chupe:

—Che amondora opacatu ivi rupindar mborerecuar pīratasa iyavei mbahe porañete vahe nde povrive. Esepia niha, co opacatu cheu imbouprí; iya ité amondo vaheṛā ava upe che remimbotar rupi.

⁷ Acoi ereñenopihase cheu che mboetei āgua, ahe se opacatu co mbahe ereipisira nde mahera —ehi tēi Caruguar chupe.

⁸ —Icuachiapri pipe rumo: ‘Emboetei nde Yar Tüpa, ahe güeraño tupri avei eremboyeroyara’ ehi —ehi Caruguar upe.

⁹ Ipare Caruguar viraso oyeupi tecua guasu Jerusalén ve. Aheve oviroyeupi tüparo apiterve. Aheve Caruguar aipo ehi chupe:

—Tüpa Rahir ité nde recose, eviapi cohava sui.

¹⁰ Esepia niha, icuachiapri pipe:

‘Tüpa oyocuaiira güembiguaí eta nde rāro āgua.

¹¹ Ahe nde mopuhara yuvireco que ñepei ita nde momara rāgüer sui’ ehi —ehi Caruguar chupe.

¹² Evocoiyase omboyeví Caruguar upe:

—¡Aní! Icuachiapri pipe niha aipo ehi avei: ‘Nderesecoãhai chira nde Yar Tüpa’ ehi —ehi chupe.

¹³ Ahese Caruguar ndoicatu iri eté Jesús recoãha āgua oico. Ipare oyepepiño raimi tēi oso ichui.

Jesús omboipi oporombohe Galilea rupi

¹⁴ Jesús, Espíritu Santo reco pīratasa pipe, oyeví oso Galilea ve. Ipare serācua oguata opacatu tecua-tecuami rupi.

¹⁵ Esepia, ahe oporombohe judío tüparo pipe oico. Ahese opacatu ava omboetei yuvireco.

Jesús oyeví Nazaret ve

¹⁶ Ichui Jesús oyeví Nazaret ve ocuacua agüerve. Aheve judío mbituhusa ari pipe oique tüparove inungar oyapo yepi. Ahe se opüha ‘tayeroqui icuachiapri maranehi pipe’ oya.

¹⁷ Evocoiyase tüparo rese ñangarecuar pītivisar omondo Tüpa ñehe mombehúsar Isaías rembicuachía chupe. Oyorase ahe cuachiar, oyeróqui icuachiapri aipo ehi vahe pipe ohā:

¹⁸ —“Yar Espíritu secoi che rese.

Esepia niha, ahe ombou che cuaitarā cheu co ñehesa aviye vahe mombehu āgua ava iparaisu vahe upe.

Che cuaita avei ava mbahe-mbahe tēivrive yuvirecoi vahe senose āgua ichui, iyavei ava ndasesapisoi vahe ambosarecora; iyavei che cuaita ava mbahe-mbahe tēi rasicuer oiporara vahe sui senose āgua,

19 iyavei 'cūritei Yar oyemoingatu oporovasasa mondo āgua pēu' he āgua" ehi icuachiapri pipe
—ehi oyerogui.

20 Sese oyerogui pare, oyapoapipa cuachiar imondo tūparo rese ñangarecuar pītiviisar upe. Ipare oguapi oī ava rembiepiave. Ahese opacatu tūparo pipendar omahe ati yuvireco sese.

21 Evocoiyase ahe oñehe aipo ehi:

—Cūritei yaviye co icuachiapri pipendar opacatu pe rovaque —ehi.

22 Opacatu ava oñehe tupriño ité yuvireco sese. Ndoyembovihai tēi iñehe tupri renduse yuvireco. Oporandu-randu rumo yuvireco oyeupe:

—¿Ndahei vo acoi co José rahir tēi? —ehi yuvireco chupe.

23 Ahe rumo aipo ehi ava upe:

—Pe aipo peyera cheu: 'Oporombogüera vahe, eñeposano nde ae eico' peyera. Ipare aipo peyera cheu: 'Acoi orosendu vahe nde rembiapogüer Capernaum pipe, ēgüe ere avei eyapo cohava nde recua pipe ité' peyera cheu —ehi.

24 —Supi eté, ndipoi eté niha que ñepepe yepe Tūpa ñehe mombehusar oipisi tupri vahe güecua pipe yuvireco yepi.

25 Supi tupri ité Tūpa ñehe mombehusar Elías recose, iñehe rupi tupri ndoquui eté mbosapi araviter yemombitesa rupi oico. Sese oime tiavor opacatu Israel ivi rupi aracahe. Ahese setá etepri cuña imer mano vahecuer oime Israel recua rupi viña,

26 Tūpa rumo nomondo Elías cuña imer mano vahecuer Israel pendar upe ipītivi āgua. Ēgüe ehi rumo omondo cuña ndahei vahe Israel pendar ipītivi āgua. Ahe cuña tecua Sarepta pendar, ahe Sarepta Sidón ipiimindar.

27 Iyavei setá ava oime Israel recua pipendar imbaheasi vahe lepra rerecosar yuvireco evocoi Tūpa ñehe mombehusar Eliseo recose. Evocoi ava yuvirecoi vahe rumo ndipoi eté que ñepepe ocuera vahe yuvireco; Naamán año rumo Eliseo opa uca ombogüera, ahe mbia Siria pendar ndahei vahe Israel pendar secoi —ehi ava upe.

28 Ahese opacatu ava judío tūparo pipendar oñemoiró iteanga yuvireco sese aipo mbahe renduse.

29 Sese opa voi eté opūha Jesús reraso āgua tecua pipe sui ivitri ivi socuerve yuvireco, ahe iharive tecua yaposa. Ahe ichui oiti pota yuvireco viña.

30 Jesús rumo ipāhu sui osé tupriño oso.

Jesús ombogüera mbia carugar vireco vahe oyese

31 Ichui Jesús oso Capernaum ve, ahe tecua Galilea rupindar. Aheve ombohe ava oico mbituhusa ari pipe.

32 Ipare opacatu ava, "¡Mara ehi rutei!" ehi tēi iporombohesa renduse yuvireco. Esepia niha, ahe oñehe güeco pīratasa pipe.

33 Aheve judío tūparo pipe oime mbia vireco vahe carugar oyese, ahe oñehe pīrata Jesús upe:

34 —¡Ore mañeco tēi eme eve! ¡Mahera ereyuño tēi cohava oreu, nde, Jesús Nazaret pendar! ¿Ereyu vo ore mocañi āgua tēi? Che orocua ité. Nde niha seco maranehi vahe ereico Tūpa suindar —ehi chupe.

35 Evocoiyase,

—¡Quiriri, esē co mbia sui! —ehi oñehe pīrata carugar upe.

Ahese carugar omboviapi ahe mbia ava rovai, osé ocua ichui; nomomarai eté rumo.

36 Opacatu ava oyembosiquiye, iyavei oporandu-randu tēi mbahe rese oyeupe yuvireco: —¿Mara ehi vo aipo oñehe oico? ¡Esepia, co mbia opīratasa pipe oyocuai carugar ava sui imose āgua! —ehi yuvireco.

37 Sese Jesús rerācua oyandu opacatu tecua-tecuami ivirindar yuvireco.

Jesús ombogüera Simón Pedro rembireco si

38 Evocoiyase Jesús osé judío tūparo pipe sui oso, oique Simón Pedro rētake. Simón rembireco si sohi iteanga ou. Evocoiyase oñehe ahe pendar sese Jesús upe 'tombogüerami tēi' oyapave yuvireco.

39 Evocoiyase Jesús oyeaivi oso chupe sohi sui imbogüera āgua. Ocuera pare voi ahe cuña oñarapuha; ohañeco ahe ava yuvirecoi vahe rese.

Jesús ombogüera setá ava imbaheasi vahe

40 Ari so ramomise opacatu ava imbaherasisa ambuae tēi vahe güeru Jesús upe yuvireco. Ahe evocoiyase opo omondo iyacatu iharive ñepepe-pei imbogüera.

41 Iyavei setá ava sui opa omose carugar. Evocoiyase carugar osapucaí tēi aipo ehi yuvireco:

—¡Nde acoi Tūpa Rahir ité ereico! —ehi.

Ahe rumo oñehe pĩrata caruguar upe, nomoñehe iri. Esepia niha, caruguar oicua ité ahe Tũpa Rembiporavo seco rese yuvireco.

Jesús oporombohe judío tũparo rupi oico

⁴² Ahere ayihive cõhe ramomise, Jesús osẽ tecua pipe sui, oso ivi iporupirẽhisave. Ava rumo oseca-secaño ité yuvireco; osupitiño ité secosave yuvireco. Oipota ahe oyesui ichoẽhi ãgua ité yuvireco vinã.

⁴³ Ahe rumo aipo ehi ava eta upe:

—Tamombehu rane catu ambuae tecuave avei ñehesa aviye vahe Tũpa mborerecuasa resendar ava upe. Esepia, aherã niha che mbousa —ehi.

⁴⁴ Ëgũe ehi Jesús oguata oporombohe Judea tũparo rupi oico.

5

Pira mboha ati agũer

¹ Ñepeí ari Jesús secoi ipa Genesaret popi rupi. Aheve ava rehii oyepota yuvireco chupe, oyere ati yuvireco sese. Esepia niha, ahe osendu pota ité Tũpa Ñehengagũer yuvireco.

² Aheve oime ñuvirio carite imbehi popive. Ahe ava pira mbohasar opa yuvinoso evocoi carite pipe sui yuvireco. Ipare opira mbohasa oyosei yuvinoi.

³ Evocoiyase Jesús osepiase, oha Simón carite pipe iyavei aipo ehi chupe: “Tosiri catumi tẽi chĩhi coi coti iai popi sui” ehi. Ipare oguapĩ oĩ carite pipe. Aheve ombohe ava cute.

⁴ Oñehe pare aipo ehi Simón upe:

—Yaso ipa tipĩ catu vahesave. Aheve erembohara pira —ehi.

⁵ Simón rumo omboyeve chupe:

—Porombohesar, orosãha tẽi niha pĩtu momba pira mboha oroico. Nde porocuita pipe rumo amondo irira pira mbohasa ive —ehi.

⁶ Ëgũe ehise, pira rehii omondoromi ombohasa yuvireco.

⁷ Ahese oyaiti yuvireco omboetasa evocoi ambuae carite pipe yuvirecoi vahe upe ‘toyugũerumi yande pĩtĩvĩ’ oyapave yuvireco chupe. Ahe yugũeru chupe. Ipare opa ñuvirio carite omboapipo tupri yuvireco; seni iri rumo omondo ipive.

⁸ Co mbahe repiase, Simón Pedro oñenopiha oso sovai aipo ehi chupe:

—¡Eyepemĩ tẽi che sui, che Yar! ¡Esepia, che yangaipa vahe tẽi aico! —ehi.

⁹ Esepia, Simón iyavei opacatu ava yuvirecoi vahe supi osiquiyẽ iteanga co pira rehii repiase yuvireco.

¹⁰ Iyavei Simón mboetasa ambuae carite pipendar ahe Santiago, Juan Zebedeo rahir yuvirecoi. Jesús rumo aipo ehiño Simón upe:

—Eresiquiye eme; co pipe suive inungar pira eremboha, ãgũe ere aveira ava reca cheu nara —ehi.

¹¹ Evocoiyase opa vinose carite ivi ãtasave yuvireco, oseypaño opacatu mbahe. Ipare yuvirasu supi.

Jesús ombogũera ava lepra rerecosar

¹² Ñepeí ari Jesús secoise tecua pipe, aheve oime mbia lepra vireco vahe opacatu gũetecuer rese. Jesús repiase, oñenopiha oyeaivi oso chupe. Ipare oporandu aipo ehi:

—Che Yar, ereipotase, iya nde che mbogũerami eve —ehi chupe.

¹³ Evocoiyase, opocose sese,

—Aipota. ¡Erecuerara cũritei! —ehi chupe.

Aipo ihe ramoseve voi eté ocuera.

¹⁴ Ipare oyocuai aipo ehi chupe:

—Eremombehu eme nde cuerasa ambuae ava upe; esoño, eyemboyecua judío pahi upe. Ipare eicuavẽhe nde porerecosa nde cuerasa resendar Moisés porocuita rupi. Ipipe sui toicua opacatu ava nde cuerasa yuvireco —ehi chupe.

¹⁵ Jesús rerãcua rumo oyembouvicha catu-catu iri eté. Evocoiyase setã ava oyemboya yuvireco sese ñehe rendu ãgua ‘tayande mbogũerami tẽi yande mbaherasisa sui’ oyapave yuvireco.

¹⁶ Ava rehii sui rumo amove Jesús oyepipiño ahe aemi oyerure ãgua yepi.

Jesús ombogũera ava ndoguatai vahe

¹⁷ Ñepeí ari Jesús oporombohe oico. Yar Tũpa pĩratasa vireco oyese ava mbogũera ãgua. Aheve avei oguapĩ yuvinoi fariseo, Moisés porocuita rese oporombohe vahe avei ipĩri yuvireco. Ahe yugũeru opacatu Galilea tecua-tecuami rupi sui yuvireco. Ivi Judea rupi sui, tecua Jerusalén sui avei yugũeru no.

¹⁸ Ahese ava ndoguatai vahe güeru supa pipe yuvireco. Viroique pota oi pipe sovai eté seroyi água yuvireco viña;

¹⁹ ndoicatui eté rumo seroique yuvireco ava rehi pāhu rupi. Evocoyase viroyeupi yeupisa rupi ahe oi ipe vahe harive yuvireco. Aheve virocua teca ichui. Supi viroyi imbaheasi vahe supa pipe imondo yuvireco opacatu ava rembiepiave sovai.

²⁰ Ahe oicuaase co mbia yuvirecoi vahe oyese yeroyasa, ahease aipo ehi imbaheasi vahe upe:

—Che mboripar, che ñero nde angaipa rese ndeu —ehi.

²¹ Ichui oporombohe vahe Moisés porocuita rese iyavei fariseo ipihañemoñeta ati voi tēi yuvireco: “Co mbia oyemboivate ai tēi vahe Tūpa ñehe nungar pipe tēi; Tūpaño ité niha oicatu ava angaipa upe oñero água” ehi tēi oyeupe yuvireco.

²² Ahe rumo oicuaño ité ahe ava pihañemoñetasa. Evocoyase aipo ehi chupe:

—¡Mahera vo pepihañemoñeta rai tēi che rese!

²³ ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pīha, anise: ‘Epūha, eguata’ hesa tie?

²⁴ Tapeicua ru che, Ava Riquehir, areco ité mborerecuasa co ivi pipe ava angaipa upe che ñero água —ehi.

Evocoyase,

—Eñarapuha, esupi nde rupa, eso nde rētave —ehi imbaheasi vahe upe.

²⁵ Ahese opūha voi ava rovaque, osupi vupagüer. Ipare osapucái oso güetave Tūpa upe.

²⁶ Ahese opacatu tupri ité ava, “¡Too! ¿Mara ehi rutei pīha co?” ehi tēi imboetisave yuvireco. Iyavei osiquiyepave aipo ehi yuvireco:

—Co pipe yasepia mbahe ndayasepia vahe ité —ehi.

Jesús oñehe Leví upe

²⁷ Ichui osēse Jesús, osepia mbia Roma ve nara guarepochi rero cuasar Leví serer vahe, ahe guarepochi rero cuasave chiní. Sepiase,

—Erio che rupi —ehi chupe.

²⁸ Evocoyase Leví opūha. Oseyapa oporaviquisa, oso supi.

²⁹ Ipare Leví oyapo pieta guasu chupe nara güetave. Aheve iyemboisave setá imboetasa ava guarepochi rero cuasar iyavei ambuae ava ocaru yuvinoi ipiri.

³⁰ Pieta repiasar fariseo yuvirecoi vahe rumo iyavei ipāhu pendar Moisés porocuita rese oporombohe vahe avei, ahe omboipi semimbohe upe oñehe mara aipo ehi yuvireco chupe:

—¡Mahera ru pecaru iyavei pecahu guarepochi rero cuasar rese iyavei ambuae ava yangaipa guasu vahe rese tēi avei no! —ehi.

³¹ Jesús rumo aipo ehi chupe:

—Ava nimarai vahe ndosecai eté oporoposano vahe; imbaheasi vaheño rumo oseca yuvireco.

³² Esepia, che ndayui ava seco catupri vahe reca; che rumo ayu ava yangaipa vahe reca Tūpa uve iyevi água yuvireco —ehi.

Yecuacusa rese ñehesa

³³ Ipare ava oporandu yuvireco chupe:

—¿Mahera vo oyecuacu serai iyavei oyerure Juan Oporoãpiramo vahe rupindar yuvireco, fariseo rupindar avei no; nde remimbohe rumo yuvirocaruño ité, yuviroihuño avei no? —ehi.

³⁴ Ahe rumo omboyevi chupe aipo ehi:

—Ndiyai eté ichohopri mboyecuacu mendasave imer oicove viteseve ipāhuve.

³⁵ Oimera rumo ari imer reraso água ichui, ahease ramo oyecuacura yuvireco cute —ehi.

³⁶ Iyavei ambuae mbahe rese oporombohe imboyevi água:

—Ndiyai eté ava upe virocua vahe rā turucuar ipiasu vahe sui ambuae turucuar cuacuami vahe apete água. Esepia niha, egüe ehise evocoyase turucuar ipiasu vahe omomara; iyavei turucuar ipiasu vahe apirer naporai chira turucuar cuacua vahe rese —ehi—.

³⁷ Iyavei no, ndiyai eté ñoñasa uva ricuer piasu mbahe pিরer cuacua pipe no. Esepia niha, egüe ehise, uva ricuer piasu evocoyase opara ombopu mbahe pিরer cuacua viña, egüe ehira oyepiyerapa, mbahe pিরer avei evocoyase ocañi tēira viña.

³⁸ Uva ricuer piasu rumo yamondora mbahe pিরer piasu pipe.

³⁹ Iyavei ndipoi eté que ava oihu vahe uva ricuer ipiasu vahe yuvireco uva ricuer cuacua vahe yusei ai pare. Esepia niha, ava aipo, ‘Co uva ricuer cuacua vahe aviye catu vahe yepi’ ehi yuvireco —ehi ava upe.

6

Jesús remimbohe oipoho trigo mbituhusa ari pipe yuvireco

¹ Ñepeí mbituhusa ari pipe Jesús viroguata güemimbohe mbahe miti pāhu rupi. Semimbohe evocoyase oipoho-poho yuviraso trigo rāhi. Ipare oyequi opo pipe sāhi yuvireco igua.

² Evocoyase fariseo osepiase, aipo ehi yuvireco semimbohe eta upe:

—¡Mahera peporaviquiño tēi co mbituhusa ari pipe peico! —ehi.

³ Jesús rumo omboyeveí chupe:

—Peicua tēi niha ícuachiapri aracahendar mborerecuar guasu David rembiapogüer resendar ñehesa ondugüer reseve ndasiepoise yuvireco.

⁴ Ahe niha oi que ité Tüpa rēta pipe, opoco pan imboeteipri Tüpa upendar rese evocoi pahi upe güeraño ipotasa vahe ihu āgua yepi. Ahe rumo ohu, ondugüer tohu avei omondo —ehi.

⁵ Iyavei aipo ehi chupe:

—Ava Riquehír mbituhusa ari rerecuar ité secói —ehi fariseo upe.

Jesús ombogüera mbia ipo nomí vahe

⁶ Ambuae mbituhusa ari pipe, Jesús oi que judío tüparo pipe oporombohe oico. Aheve mbia yasu coti ipo nomí vahe secói.

⁷ Moisés porocuaíta rese oporombohe vahe, fariseo avei omahengatu Jesús rese yuvireco '¿ombogüerara pīha co mbia mbituhusa ari pipe?' oya; 'yaiñhengapo angahu' oyapave tēi yuvireco.

⁸ Ahe rumo oicuaño ité ipihañemoñetasa oico. Ipare aipo ehi evocoi mbia ipo nomí vahe upe:

—Epūha cohava terehā ava pāhuve —ehi.

Ahe mbia evocoyase opūha, opita aheve ohā

⁹ Ahese Jesús oporandu ahe ava upe:

—Aporandura mbahe rese pēu —ehi—. ¿Mbahe vo yaposara mbituhusa ari pipe yepi, mbahe tupri pīha, anise mbahe naporai vahe tie? ¿Yaipisiro pīha ava recocuer; yamocañi uca tēi tie? —ehi.

¹⁰ Evocoyase omahengatu oyese ava oyere tupri vahe rese. Ipare aipo ehi ava ipo nomí vahe upe:

—Eichoho nde yiva —ehi.

Ahe mbia evocoyase oichoho oyiva; evocoyase ipo ocuera tupri ité.

¹¹ Evocoyase oñemoiro catuño ité yuvireco sese, iyavei oporandu-randu oyeupe yuvireco '¿mara yahera pīha imomara āgua?' oya.

Jesús oiporavo doce tupri güemimboherā

¹² Ahe ari rupi Jesús oso ivitri ve, oyerure pītu momba tupri Vu upe oico.

¹³ Cōhese, "Perió" ehi güemimbohe eta upe. Ipāhu sui oiporavo doce tupri, ahe chupe, "Apóstol" ehi.

¹⁴ Co ahe yuvirecoi: Simón, ahe acoi Pedro avei serer; Andrés Simón rivri; Santiago, Juan, Felipe, iyavei Bartolomé;

¹⁵ Mateo, Tomás, Santiago Alfeo rahír; Simón, ava güecua rese secatēhí vahe pāhu pendarer;

¹⁶ Judas Santiago rivri; iyavei Judas Iscariote, ahe omondo vahe Jesús yamotarēhimbar uve.

Jesús ombohe ava rehü

¹⁷ Ipare Jesús ogüeyi ivitri sui yugüeru co doce güemimbohe reseve. Ipare opita ivi yoya tuprisave. Aheve ambuae semimbohe eta oyemboya ati yuvireco sese iyavei setá ava yuvirecoi opacatu tecua Judea rupindar, Jerusalén rupindar iyavei yemboyasa Tiro, Sidón cotindar, ahe oyemboya avei yuvireco sese. Ahe ava ēgüe ehi ñehe rendu potasave yuvireco 'tayande mbogüerami tēi yande mbaherasisa sui' oyapave yuvireco.

¹⁸ Acoi espíritu naporai vahe remimombaraisu avei ocuera tupri yuvireco.

¹⁹ Evocoyase opacatu ava opoco pota ité sese yuvireco. Esepia niha, ahe oporombogüera opacatu güeco pīratasa pipe oico.

Ava sorivete vahe iyavei ava ndoyembovihai vahe

²⁰ Ipare omahe Jesús güemimbohe rese aipo ehi chupe:

"Perorivete catu pe iparaisu vahe. Esepia niha, Tüpa mborerecuasa pēu nara ité secói.

²¹ "Perorivete catu cūrteindar ndasiepoi vahe. Esepia niha, pehitarora peico curi.

"Perorivete catu pe acoi ava cūrteí oyaseho vahe. Esepia niha, peviharetera coíye peico.

22 “Perorivete catu pe acoi ava pe amotarēhise, pe mboyepepiñose avei oyesui yuvireco, ñehe-ñehe tēise yuvireco pēu pe amotarēhisave, iyavei acoi viroirose pe rer mbahe tēi pipe che, Ava Riquehir, recocuer sui tēi yuvireco.

23 Peyembovihanō iyavei perorivete catuñora ahe ari pipe peico. Esepia niha, ipare peipisira porrecosa tuvichá vahe ivave. Ēgüe ehi tupri avei evocoi ava ramoi aracahendar mara-mara tēi Tūpa ñehe mombehusar sereco yuvireco” ehi.

24 “¡Peparaisu catu rumo cūrítei mbahe yar peico vahe! ¡Esepia niha, pemboaviye pe rorivetes peico!

25 “¡Peparaisu catu acoi pe ihitaro vahe cūrítei! ¡Esepia niha, ndaperiepoi chira peico coiyé! “¡Peparaisu catu acoi peviha vahe pe pietase cūrítei! ¡Esepia, peyasehora pe viharēhisa pipe peico coiyé!

26 “¡Peparaisu catu acoi peipisi vahe pe mboeteisa opacatu co ivi pipendar ava tēi sui! ¡Esepia niha, ēgüe ehi tupri tamoi Tūpa ñehe mombehusar angahu tēi vahe upe yuvireco aracahe!” ehi.

Iyacatu yasaisu yande amotarēhimbar

27 “Pe che ñehe rese peyapisaca vahe upe rumo aipo ahe: Pesaisu ava pe amotarēhimbar; peyapo tupri mbahe aviye vahe ava nape ambotai vahe upe.

28 Peoporandu Tūpa porovasasa rese ava pēu ñehe-ñehe tēi vahe upe nara; peyerure Tūpa upe pēu mbahe tēi oyapo vahe recocuer rese.

29 Acoi que pe amotarēhimbar pe rovatetese, co cotindar avei pemoporēhiñora chupe. Iyavei acoi que ava virocuaño tēise pe yeasa pe sui, toviraso avei pe yemondesa güemimbotar rupi” ehi.

30 “Acoi oporanduse que pe mbahe rese yuvireco pēu, pemondoño avei chupe. Iyavei acoi que ava virocuaño tēise pe mbahe pe sui, ndapeporandui chira pēu imboyevi āgua rese.

31 Acoi mbahe peipota vahe ambuae ava oyapo vaheerā pēu, ahe tupri avei peyapora chupe.

32 “Acoi ava pe raisupar güeraño pesaisu catu tēise, ndipoi eté mbahe aviye vahe ipipe. Esepia niha, ava naporai vahe ēgüe ehi yuvireco yepi.

33 Anise, acoi ava mbahe tupri ai oyapo vahe pēu, chupe güeraño mbahe tupri peyapose, ¿mbahe vo evocoiyase oime aviye vahe ipipe? Esepia niha, ava angaipa viyar avei ēgüe ehi yuvireco yepi.

34 Acoi pemondoño tēise mbahe ava upe ‘tomboyevi mbahe cheu’ pe hesave, ¿mbahe vo evocoiyase oime aviye vahe ipipe? Esepia niha, ava angaipa viyar ēgüe ehi avei yuvireco.

35 Pe rumo pesaisu catura ava pe amotarēhisar, peyapoñora mbahe aviye vahe chupe. Iyavei pemondoño itera mbahe chupe, ‘Tasāroño rane mbahe cheu imboyevi āgua vichico’ ndapeyei chietera. Ahese oimera porrecosa aviye catu vahe pēu. Pe evocoiyase Tūpa seco ivate catu vahe rahir peicora. Esepia niha, ahe aviye etepri vahe ava ‘aviye ndeu’ ndehi vahe upe iyavei ava yangaipa guasu vahe upe avei.

36 Pe peporoparaisuereco inungar pe Ru Tūpa oporoparaisuereco yepi” ehi.

Ndiyai ambuae ava seroñrosa

37 “Ndiyai, ‘Oyavi ité mbahe’ peye voñño tēi ambuae ava upe. Evocoiyase Tūpa, ‘Oyavi mbahe’ ndehi chira pēu. Pemocañi uca tēi eme ambuae ava. Evocoiyase Tūpa ndape mocañi tēi chira. Peñeroño catu ambuae ava upe, ahese Tūpa iñero itera pēu.

38 Pemondose mbahe ava upe, evocoiyase Tūpa omondoño itera mbahe aviye vahe pēu inungar-ra omondo pe mbahe riru pipe pēu sãhambri tupri aviye vahe viña. Ēgüe ehira mbahe imondo pēu. Tūpa oicua tupri itera pēu inungar pe mbahe pemondo ambuae ava upe” ehi.

39 Ipare Jesús omombehu co ambuae porombohesa: “¿Oicatu pñha ñepei ndasesapisoi vahe ambuae ndasesapisoi vahe reroguata? ¡Aní eté! Esepia, oyoya voi oviapira que ivicuar pipe yuvireco viña.

40 Ñepei yepe niha ava oyembohe vahe ndahei eté ivate catu ombohesar sui. Acoi omomba vahe rumo oyembohesa ahe osupitira ombohesar” ehi.

41 “¿Mahera ambuae ava rembiavimi rese tēi pemahe? Iya rumo peyese rane mbahe tuvicha catu vahe pesepiara.

42 Ndiyai pēu, ‘Che toropitivi mbahe nde rembiavi rese’ peye vaheerā chupe. Esepia, pe peyavi guasu catu mbahe. ¡Pe Tūpa reroyasar angahu tēi peico vahe! Penose uca rane pe rembiavi tuvicha catu vahe peyesui, ahese ramo ambuae ava rembiavi tahimi vahe moingatu peicatura” ehi oporombohe.

Ava recocuer icuasa sembiapo rese

43-44 “Ivira aviye vahe icuasa iha rese. Esepia, ivira aviye vahe, iha aviye avei; ivira naporai vahe, iha naporai avei no. Supi eté ndipohosai ivira sáchi ati vahe sui higuera ha, iyavei ndahipohosai uva, yu pāhu sui.

45 Ēgüe ehi avei ava upe. Ava aviye vahe oyapo mbahe tupri. Esepia, ahe vireco mbahe tupri opiha pipe yepi. Iyavei acoi ava ndaseco pōrai vahe oyapo mbahe tēi. Esepia niha, ahe vireco mbahe tēi eté opiha pipe yepi. Esepia niha, pe piha pipe sui tēi osē pe ñehe āgua” ehi.

Ava oyemoviracua vahe iyavei ndoyemoviracuai vahe Jesús reroyasave

46 “¿Mahera vo, ‘Che Yar, che Yar’ peye tēi peico cheu; ipare ndapeyapoi eté mbahe che remimombehu?

47 Amombehura rumo mbahe pēu uma nungar tupri ité acoi ava ou vahe cheu che ñehe rese oyapisaca vahe, iyavei oyapo ité vahe mbahe che remimombehu:

48 ahe inungar tupri ité acoi ava oyapo vahe güētara ita harive yepi. Yipindar rumo oyoho picucu rane ité ita harive imopuha āgua. Yepe ahe oi upe oyepota tēi ivitu ai, amarusu reseve oinupa pīrata tēi, nomboyerocuai eté rumo. Esepia niha, vireco ité ovīracuasa.

49 Acoi ava che ñhengagüer rese ndoyapisacai vahe rumo, ahe ndoyavii acoi ava oyapo vahe güētara ivi cuhi harive tēi, ndovirecoi eté ovīracuasa. Ipare amar, ivitu ai reseve oinupa pīratá, opaño omonduru; ocañi tēi eté evocoyase” ehi Jesús ava mbohe.

7

Jesús ombogüera chñivahe sundao rerecuar Roma iguar remimboacua

1 Jesús oñehepase ava upe oico, oso Capernaum ve.

2 Ahe tecua pipe sundao rerecuar ndahei vahe judío secoi vireco vahe güemimboacua güembiaisu. Ahe imbaheasi guasu ité ou; omano pota ité.

3 Jesús rerācua anduse rumo, oyocuai moviro tēi omboripar judío imboeteipri chupe iñehe āgua ‘toumi tēi che remimboacua mbogüera’ oyapave.

4 Ahe judío evocoyase oyemboya Jesús rese yuvireco iyavei oporandu yuvireco chupe aipo ehi:

—Ore mboripar sundao rerecuar oipota nde ereyapomi tēira mbahe icatupri vahe chupe viña.

5 Esepia niha, ore raisu iyavei ahe teieté oyapo uca tūparo oreu nara —ehi yuvireco chupe.

6 Evocoyase oso ahe yuvirecoi vahe rupi. Virovise rumo sēta yuvireco, ahese sundao rerecuar omondo ambuae omboripar chupe. Imboripar evocoyase omombehu iñehe aipo ehi vahe: “ ‘Che Yar, ereyemañecoi rene. Esepia niha, ndiyai eté che rēta pipe nde reique āgua.

7 Sese niha che teieté ndasoi nde reca. Nde ñehe pipe tēi rumo che remimboacua erembogüerara.

8 Esepia, che avei niha areco che cuaita. Iyavei areco sundao che voya. Eso peve, ahese ñepeu upe, ahe evocoyase oso voi eté; ambuae upe: Erio, ahese, ou voñño ité cheu. Ipare, Ereyapora co mbahe, ahese che rembiguai upe, ahe evocoyase che reroyaño voi’ ehi ore mboripar” ehi Jesús upe yuvireco.

9 Aipo oyeupe hese Jesús, “¡Too!” ehi. Ipare aipo ehi vupindareta upe:

—Supi eté ndasepai vahe ité co mbia che reroya tupri vahe nungar judío eta pāhuve —ehi.

10 Yuviroyevipase sundao rerecuar mboripar sētave yuvireco, aheve osepia evocoi semimboacua yuvireco ocuera tuprise.

Jesús ombogüerayevi cuña imer mano vahecuer membri cuimbahe

11 Ipare voi Jesús oso tecua Naín ve, iyavei semimbohe yuvirasoño ité supi ava rehi reseve avei no.

12 Virovise tecua oso, osepia tehögüer ava virocuase yuvireco ñoti āgua. Ahe cuña imer mano vahecuer membri ñepeu vahe ité viña. Tecua pipendar setá iteanga ava yuviraso supi.

13 Cuña repiase rumo, oiparaisuereco. Ipare aipo ehi chupe:

—Ereyaseho eme —ehi.

14 Evocoyase oyemboya oso, opoco tehögüer riru rese. Sese ovosii vahe evocoyase viropitaño yuvireco chupe. Ipare aipo ehi tehögüer upe:

—Mbia chñivahe, che aipo ahe ndeu: ¡Eñarapuha! —ehi.

15 Evocoyase omano vahecuer oñarapuha oñ iyavei oñehe no. Ichui Jesús omondo ichi upe.

16 Opatatu tupri ité ava oyembosiquiye sepiase yuvireco:

—Cūrítei oyemboyecua Tūpa ñehe mombehusar seco ivate vahe yande pāhuve cute —ehi yuvireco.

Iyavei,

—Tūpa niha ou güecua pítivii āgua oico —ehi avei yuvireco.

17 Ipare co Jesús rerācua yandusa opacatu Judea rupi, yivirindar rupi avei no.

Juan Oporoāpiramo vahe omondo vupindar Jesús recocuer cua uca āgua

18 Juan avei oyandu opacatu co mbahe oico. Esepia niha, supindareta omombehupa co mbahe yuvireco chupe.

19 Evocoiyase omondo ñuvirío vupindar Jesús upe mbahe rese porandu āgua ‘¿nde ité vo Tūpa Rembiporavo aipo sārombri ereico, anise oime tie ambuae orosāro vaherā?’ oyapave.

20 Evocoiyase oyepota yuviraso Jesús upe aipo ehi yuvireco chupe:

—Juan Oporoāpiramo vahe ore mbou ndeu co mbahe rese porandu āgua: ¿Nde ité vo Tūpa Rembiporavo ereico imombehupri ereyu vaherā, anise ambuae pīha orosārora oroico? — ehi yuvireco chupe.

21 Ahe ari pipeve voi Jesús ombogüera setá ava imbaherasisa sui oico, ava caruguar rerecosar sui avei no. Iyavei ava ndasesapisoi vahe setá ombogüera.

22 Ahe se ramo aipo ehi chupe cute:

—Peso, pemombehupa Juan upe mbahe pe rembiepia iyavei pesendu vahe: “Ndas-esapisoi vahe osareco tupri cūrítei yuvireco, ipāri-pāri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehusa písirisa resendar ñehesa” peyera chupe.

23 ¿Ovīharetera acoi ava oyeroyaño vahe che rese! — ehi Juan rupindar upe.

24 Juan rupindar yuviraso pare, Jesús omboipi imombehu ava upe Juan recocuer: “¿Pesepiase Juan recocuer ava porēhisave, capihiata ivitu ombova-mbova vahe nungar pīha?”

25 Anise, ¿pesepia tie iturucuar porañete ai vahe iyemboeteise? Ēgüe ehi vahe rumo secoi mborerecuar guasu guapisave yepi.

26 ¿‘Mara ehi secocuer’ peye vo chupe? ¿Tūpa ñehe mombehusar ité pīha? Ahe ité, iyavei evocoi niha ivate catu vahe Tūpa ñehe mombehusar sui.

27 Ahe chupe ité Tūpa icuachiapri aracahendar pipe aipo ehi:

‘Amondora che ñehe mombehusar nde renondeva nde raperā moingatu āgua’ ehi.

28 Aracahe suive ndipoi eté ivate catu vahe Juan sui. Yepe ahe ivate catu vahe viña, Tūpa mborerecuasave rumo ava seco mbeğüemi catu vahe ivate catu ichui.

29 “Co ñehe renduse opacatu ava, opacatu guarepochi reroquasar yuvirecoi vahe avei oñepiramo uca vahecuer Juan upe yuvireco: ‘Supi eté Tūpa aviye vahe ité’ ehi eté yuvireco cute.

30 Fariseo eta rumo iyavei Moisés porocuita rese oporombohe vahe ahe noñepiramo uca potai vahe Juan upe yuvireco, ahe viroiroño Tūpa remimbotar oyeupendar yuvireco.

31 “¿Mbahe rese pīha amboyoyara ava recocuer cūríteindar? ¿Mara ehi pīha secocuer?”

32 Ahe inungar chīhivahe iguayī tēi vahe ocar rupi. Ipare oñehe pucu-pucu omboripar upe yuvireco aipo ehi: ‘Oromoñehe tēi mimbī pēu, ndapepivoi eté rumo; iyavei orosapucaī tēi sapucaisa viharēhisā resendar pēu, ndapeyasehoī aveī’ ehi.

33 Esepia, ou Juan Oporoāpiramo vahe oico. Ahe ndohui vahe pan iyavei ndoihui vahe uva ricuer. Pe evocoiyase, ‘Co mbia caruguar vireco vahe’ peye tupri tēi chupe no.

34 Coiye che ayu, Ava Riquehir, acarū iyavei aihu tupri avei. Ipare, ‘Co mbia icaru guasu ai vahe secoi, lihu guasu ai vahe avei no’ peye cheu; ‘Ava angaipā viyar mboripar tēi iyavei ava guarepochi reroquasar mboripar tēi’ peye avei cheu.

35 Ava Tūpa mbahecuasa vireco vahe rumo icuasara sembiapo rese” ehi.

Fariseo Simón serer vahe rētave Jesús secoi

36 Fariseo Simón serer vahe oñehe Jesús upe: “Terecarumi che piri” ehi. Jesús evocoiyase oso sētave oguapi oi mesave.

37 Ahe se cuña angaipā viyar evocoi tecua pendar secoi vahe oyandu ichose Simón rētave icaru āgua. Sese viroyepota aheve mbahe síacua vahe siru pipe seraso sepirusu vahe chupe.

38 Aheve oyasehó ite oñenopiha Jesús pive iyavei gūesai pipe opa tupri omoaquī ipi. Ipare opaño omombiru oha aprī pipe ichui, iyavei oipirupite, oipiyere avei mbahe síacua vahe ipi rese.

39 Sepiase fariseo, ipihañemoñeta tēi: “Co mbia Tūpa ñehe mombehusar itese, oicuaño itera co cuña opoco vahe oyese ndipīhai vahe viña” ehi tēi fariseo chupe.

40 Evocoiyase aipo ehi fariseo upe:

—Simón, amombehu potami mbahe ndeu — ehi.

—Aviye Porombohesar, emombehu ru cheu — ehi.

41 Evocoiyase Jesús aipo ehi chupe:

—Ñuvirío mbia oime virocua guarepochi mbia guarepochi mondosar sui yuvireco. Ñepeī virocua guarepochi quiniento tupri mboraviqui repirā ichui. Ambuae evocoiyase cincuenta rupive virocua.

⁴² Ipare ndoicatu irise ité imboyeví ãgua yuvireco chupe, evocoi mbia guarepochi mondosar iñeroño chupe yuvireco —ehi—. Esãha, emombehu cheu, ¿uma evocoiyase osaisu catura mbia guarepochi mondosar? —ehi fariseo upe.

⁴³ —Cheu ndoyavii guarepochi virocua catu vahe ichui —ehi Simón.

—Taa, supi eté aipo ere —ehi Simón upe.

⁴⁴ Evocoiyase omahe cuña rese aipo ehi Simón upe:

—¡Emahe co cuña rese! Aiquese acoi nde rêta pipe, nde nderembouimi eté i che pisei ãgua cheu; co cuña rumo güesai pipe oyosei che pi. Ipare omombiru oha aprí pipe ae no.

⁴⁵ Iyavei nde ndache rovarupitei eve; co cuña rumo, acoi nde rêta pipe che reique ramomiseve che pirupite voi eté.

⁴⁶ “Nde nderemondoí mbahe siacua vahe che ãca rese; co cuña rumo opa tupri voi oipichi mbahe siacua vahe che pi rese.

⁴⁷ Sese co cuña opa oipisi ñerosa oangaipa guasu rese. Esepia, che raisú iteanga. Acoi ava upe nañerosa tuprii vahe rumo, ahe ndoporoaisu tuprii avei” ehi.

⁴⁸ Ahese aipo ehi cuña upe:

—Oime nde angaipa upe ñerosa ndeu —ehi.

⁴⁹ Evocoiyase ambuae ava ichohopri oguapi vahe yuvinoi aheve, ahe aipo ehi oyeupe yuvireco:

—¡Uma pïha co mbia iñero vahe ité angaipa upe! —ehi.

⁵⁰ Jesús rumo aipo ehiño cuña upe:

—Nde yeroyasa pipe ereipisi písirosa. Sese eso tupriño eico —ehi.

8

Cuña oipitívii vahe Jesús yuvireco

¹ Ipare Jesús oguata opacatu tecua rupi, omombehu ñehesa aviye vahe Tüpa mborerecuaa resendar oico. Doce vahe apóstol supive yuvirecoi.

² Cuña avei yuviraso supi, ahe ombogüera vahecuer caruguar rerecosa sui imbaherasisa sui avei no. Ahe ipãhuve avei María secói, Magdalena serer yoapisa vahe, ahe ichui osé vahecuer siete tupri caruguar;

³ iyavei Juana Cuza rembireco, ahe mbia Herodes mbahe rese ñangarecuar; Susana iyavei ambuae setá cuña oipitívii mbahe güembireco pipe yuvireco.

Yembohesa mbahe miti rese tecocuer mboyoyasa

⁴ Setá ava yuvinoso tecua yacatu rupi pipe sui Jesús repia ãgua yuvireco. Ipare oñemonuha guasuse yuvireco, ahese Jesús setá mbahe rese omboyoya-yoya oporombohe aipo ehi:

⁵ “Ñepeí mbia osé omaheti oico. Ahe otiapi-apüise mbahe rãhii oso, moviro oiti peri rupi. Ahe opa tēi oicambe yuvireco, iyavei vírai opa tēi yuvirohu.

⁶ Iyavei moviro tēi oiti ivi nayanai vahesave ita pãhuve. Sese cūritei sorí; opaño rumo ipiru. Esepia niha, ivi nañaquii chupe.

⁷ Iyavei ambuae oiti yu pãhuve. Ipare oyoya tupri sorí yuvireco; yu rumo opaño oyopi.

⁸ Ambuae rumo oiti ivi aviye vahesave. Ipare sorise, iha vai eté yuvireco; ahe iha retacuer amove cien tupri ité ñepeí-peí mbahe miti sui osé” ehi.

Aipo ohe pare, Jesús oñehe pīratá iteanga aipo ehi: “¡Acoi ava osenducua pota vahe che ñehe, toyapisacaño sese!” ehi ava rehii upe.

¿Mahera pïha co yembohesa imboyoyasa ambuae mbahe rese?

⁹ Ipare semimbohe eta oporandu yuvireco chupe: “¿Mara oyapave vo aipo co yembohesa?” ehi.

¹⁰ Evocoiyase omboyeví chupe: “Pëu Tüpa oicua uca ité mbahe ndicuasai vahe omborerecuaa resendar; ambuae ava rumo ambohe tēi ambuae mbahe mboyoyasa pipe; yepe osepia mbahe viña ‘tomahecua eme iyavei yepe osenduño mbahe tosenducua eme yuvireco’ viya” ehi.

Jesús omombehu tupri yembohesa mbahe tisa resendar

¹¹ “Co yembohesa resendar aipo oyapave aipo ehi: Mbahe rãhii ahe inungar Tüpa Ñehengagüer;

¹² iyavei mbahe rãhii peri rupi seitipri, ahe inungar acoi ava osendu tēi vahe Tüpa Ñehengagüer yuvireco oyapave. Ipare rumo ou vírai chupe, ahe inungar caruguar ou vahe chupe opaño oyaracua mocañi Tüpa Ñehengagüer sui ‘toviroya eme iyavei toñepisiro eme yuvireco’ oyapave tēi.

¹³ Acoi mbahe rãhii seitipri ita mahugüer rupi, ahe inungar acoi ava osendu tēi vahe Tüpa Ñehengagüer yuvireco iyavei oipisi tupri oviharetesa pipe yuvireco viña no. Ahe rumo

inungar co mbahe miti ndovirecoi vahe guapo ovíracua āgua; viroya raimi tēi yuvireco. Oyepotase rumo mbahe tēi chupe, oyepepi voĩño yuvireco ichui.

¹⁴ Acoi mbahe rāhiĩ seitipri yu pāhu rupi, ahe inungar acoi osendu tēi vahe. Ipare rumo oyemboyepepi uca mbegüēño ambuae mbahe rese opihañemoñetā iteangasa pipe tēi, ombahe eta rese iyavei güemimbotarai mbahe tēi potasa pipe avei. Ēgüe ehi ahe ava inungar mbahe miti ndihai vahe itē.

¹⁵ Acoi mbahe rāhiĩ seitipri rumo ivi aviye vahesave, ahe inungar ava vireco vahe opihañemoñetasa aviye vahe iyavei oyemoingatu voi Tūpa Ñehengagüer rese oyapisaca āgua yepi; viroya tupri itē no; yuvirecoĩño itē sese. Ēgüe ehise, oyapo mbahe aviye vahe yuvireco” ehi.

Yembohesa tataendi resendar

¹⁶ “Ndiyai eté ava upe guataendi omoendise omoha vahe que mbahe pipe, ‘Tamondo che rupavrive’ ndehi eté chupe; osupiño ivate imoi opacatu oi pipe yuviroique vahe resape āgua.

¹⁷ Esepia, ndipoi eté mbahe ñomipri, ndayasepiai vaheerā curi. Iyavei yaposa vahe imombēhupirēhi, icuasaño itera curi.

¹⁸ “Sese peyapisaca tupri co ñehesa rese. Esepia, acoi oyapisaca tupri vahe, chupe imondosa catura; acoi nomombitai vahe rumo mbahe güembieroya oyese, ichui serocusaño itera” ehi oporombohe.

Jesús si, tivireta avei

¹⁹ Ichui Jesús si iyavei tivireta oyepota secosave yuviraso. Ndiyai eté rumo chupe yuviraso vaheerā yuvireco ava rehii sui.

²⁰ Oime rumo ambuae ava imombehusar chupe,

—Nde si, nde rivireta reseve nde repia pota tēi ocarve yuvireco —ehi chupe.

²¹ Ahe rumo aipo ehi chupe:

—Acoi ava osendu vahe che Ru Ñehengagüer yuvireco, viroya tupri vahe avei, ahe che si, che rivri yuvirecoi —ehiño Jesús chupe.

Jesús omombituhu i ohitu vahe, ivitu ai reseve

²² Ñepeí ari Jesús oha carite pipe güemimbohe eta reseve. Ipare aipo ehi:

—Yaso peve ipa rovai —ehi.

Evocoyase ahe yuviraso.

²³ Yuviroguata viteseve, oqueño Jesús ou. Ahese ipa pipe aviyeteramo tēi ivitu ai omboha guasu-guasú carite pipe i, omondo pota itē ipive viña.

²⁴ Evocoyase semimbohe yuviraso imomba aipo ehi chupe:

—¡Porombohesar! ¡Porombohesar! ¡Yande rerasora moco carite ipive! —ehi yuvireco.

Ahese omahe. Ipare oñeha pírata ivitu ai upe iyavei i ohitu vahe upe: “¡Pepituhu!” ehi. Aheseve voi opituhu tupri.

²⁵ Evocoyase aipo ehi güemimbohe eta upe:

—¿Mahera vo ndapeyeroyai che rese? —ehi.

Ahe rumo osiquiyēño, ndoyembovihaiño iyavei oporandu-randu tēi oyeupe yuvireco:

—¡Mara ehi vahe pīha co mbia! Esepia niha, ivitu ai, para guasu avei omboyeroa —ehi tēi oyeupe yuvireco.

Mbia Gerasa iguar vireco vahe carugar oyese

²⁶ Coiye oyepota yuviraso Gerasa ivi rese cute, ahe ambuae ipa coti ivi Galilea rovai.

²⁷⁻²⁹ Aheve mbia tecua iguar carugar vireco vahe secói. Aracahe suive nani tupri itē secói iyavei ndopitai vahe itē oi pipe yepi; Ēgüe ehi rumo ahe tehögüer ruvípa rupindar tēi secói. Setá rupi carugar ombohe itē sereco yepi. Yepe ava oipocuhacua-acua carena pipe sereco, ipi rupi avei no ‘toviraso iri eme carugar’ oyapave yuvireco chupe viña, ahe rumo ombosando-sandoño itē iyavei carugar omoñemi ucaño ava porēhisa rupi sereco. Evocoyase Jesús osēse carite pipe sui, osovaĩchi ahe mbia. Sepiase rumo, ahe mbia oñenopiha voi oso sovai oñeha pírata chupe:

—¡Eyepepi che sui, Jesús, Tūpa seco ivate catu vahe Rahir! ¡Che mombaraisui rene eve! —ehi. Esepia, Jesús opa oyocuai carugar sereco ‘tosē ichui’ oyapave.

³⁰ —¿Mara vo nde rer? —ehi chupe.

—Che rer Legión —ehi.

Aipo ehi, esepia niha, setá etepri carugar yuviroique yaviterve.

³¹⁻³² Oimese rumo cuchi setá ocaru vahe ivitri ruambesave, carugar evocoyase oporandu chupe aipo ehi: “Toroiqueño mi tēi co cuchi aviterve” ehi yuvireco chupe ‘tayande mondo eme cañi tēisa apirēhi vahe pipe’ oyapave viña. “Peiqueño sese” ehi carugar upe.

³³ Ahese opa yuvínose mbia sui yuviroique cuchí avíterve cute. Aheseve voi cuchí opa yuvinoña yuvíraso ivívate sui ipa pipe. Aheve ipive opa tēi eté ocañi yuvireco.

³⁴ Cuchí rārosar osepiase ahe mbahe yuvireco, opa yuvinoña yuvíraso co mbahe mombehu tecua pipe ava upe, cove rupi avei no.

³⁵ Ipare setá ava yugüeru aipo mbahe oime vahecuer repia. Oyepotase rumo secosave yuvíraso, aheve osepia ahe mbia carugar rerecosarer oguapi oñiñipiimi, oyemonde tupri, yaracua tupri avei oico. Ahese oyembosiquiye tēi yuvireco.

³⁶ Acoi ava osepia vahecuer, ahe opa mbahe omombehu yuvireco co mbia carugar rerecosar cuera agüer.

³⁷ Ahese opacatu ava Gerasa pendar, yivirindar avei Jesús upe, “Esiri cohave sui” ehi yuvireco. Esepia niha, osiquiyé iteanga yuvireco ichui. Evocoiyase oha carite pipe. Ipare osoño.

³⁸ Yipindar rumo evocoi mbia carugar vireco vahecuer, “Tasomi tēi nde rupi” ehi viña. Ahe rumo, “Epitaño” ehi.

³⁹ —Eyevi nde rētave, emombehupa opacatu mbahe Tūpa oyapo vahecuer nde rese —ehi. Ahe mbia evocoiyase oso opacatu tecua rupi, Jesús oyeupe mbahe apo agüer mombehu.

Jesús ombogüera Jairo rayri iyavei cuña iturucuar rese opoco vahe

⁴⁰ Oyevise Jesús ipa rovai oso, aheve ava rehii oviharetesa pipe oipisi tupri yuvireco. Esepia niha, ava opacatu ité osāro yuvireco.

⁴¹ Ahese Jairo serer vahe oyepota oso Jesús upe, evocoi judío tūparo rese yangarecuar secói vahe. Ahe mbia oñenopiha sovai oso, oporandu chupe ‘tosomi tēi che rētave che rayri mbogüera’ oyapave.

⁴² Esepia niha, vireco guayri ñepeiimi vahe ité, doce aravíter vireco vahe. Ahe omano potami eté ou.

Osose Jairo rētave, aheve peri rupi ava rehii yuvírasoño supi; oyemboti tupri ité yuvireco.

⁴³ Ahe ipāhu rupi oime cuña doce aravíter rupi suvi yepiyere-yere vahe. Opa-opa tēi omondo ombahe ocuera āgua repirā yepi; ndocuerai eté rumo.

⁴⁴ Ahe cuña evocoiyase oyemboya oso saquicuei coti opoco iturucuar popi rese. Ipare ahe pipeve voi opituhu suvi ichui.

⁴⁵ Evocoiyase Jesús oporandu:

—¿Ava vo opoco che turucuar rese? —ehi.

Opacatu ava aipo ehi yuvireco: “Aní eté” ehi. Pedro evocoiyase aipo ehi chupe:

—Porombohesar, ava rehii mo oyemboya nde rese iyavei nde moañi-añii yuvireco opacatu rupi —ehi.

⁴⁶ —Che rumo aicua oime ava opoco vahe che turucuar rese. Esepia, ayandu che pīratasa osēse che sui —ehi Pedro upe.

⁴⁷ Ahe cuña ndoicatuñi oñemi. Sese oririri oñenopiha sovai. Oyemombehu chupe opacatu ava rovaque: “Che apoco nde turucuar rese. Esepia, ‘Acuera tuprira apocose iturucuar rese’ ahe ndeu” ehi.

⁴⁸ Ahese aipo ehi cuña upe:

—Che rayri, erecuera tupri ité. Esepia niha, che rese ereyeroya ité. Sese eso tupriño —ehi cuña upe.

⁴⁹ Jesús ñehe viteseve, aheve oyepota aheve mbia Jairo rēta sui aipo ehi Jairo upe oso:

—Omano nde rayri cute. Eremañeco tēi iri rene Porombohesar —ehiño Jairo upe.

⁵⁰ Evocoiyase iñehe renduse aipo ehi Jairo upe:

—Aní eresiquiye; nde che rese yeroyasa pipe ité nde rayri ocuerayevira —ehi.

⁵¹ Oyepotase Jairo rētave oso, aheve ndomoiñgue uca potai eté ava oyeupi. Pedro, Santiago, Juan iyavei cuñatai yesupa upeño oipota seiñe āgua.

⁵² Aheseve opacatu ava oyaseho ati, ndoyembovihai tēi sese yuvireco. Jesús rumo aipo ehi chupe:

—Peyaseho eme. Co cuñatai nomanoi, oque tēi ou —ehi.

⁵³ Ava rumo opuca ete-eteño seroyaēhisave yuvireco. Esepia niha, ahe oicua ité imanose yuvireco viña.

⁵⁴ Evocoiyase oipopisi cuñatai. Ipare aipo ehi chupe:

—¡Cuñatai, eñarapuha! —ehi.

⁵⁵ Ahe evocoiyase oñarapuha voi eté ocuerayevi. Ipare Jesús, “Pembocaru” ehi iyepupa upe.

⁵⁶ Iyesupa evocoiyase, “¿Mara ehi rutei pīha co?” ehi tēi yuvireco chupe. Jesús rumo omombehu chupe: “Ndapemombehui chietera que ñepei ava upe” ehi.

9

Jesús doce güemimbohe omondo Vu Tüpa mborerecuasa resendar mombehu ägua

¹ Jesús opa omonuaa güemimbohe doce vahe oyeupe. Ipare omondo opiratasa opacatu upe caruguar ambuae-ae tēi vahe imboyepepi ägua ava sui iyavei ava mbogüera ägua imbaherasisa sui.

² Opa omondo Vu Tüpa mborerecuasa resendar mombehu ägua, ava imbaheasi vahe mbogüera ägua avei.

³ Yipindar rumo aipo ehi chupe:

—Ndaperasoi chira mbahe pe guatasa rupi: que mbococa, mbahe riru, tembihu, que guarepochi avei no. Perasora rumo ñepegi güeraño pe turucuar; ndahei chira ñuvirío peraso.

⁴ Pepitami ranera ñepegi oi pipe güeraño tecua yacatu peico.

⁵ Acoi ava ndape moingue uca potaise güeta pipe yuvireco, peyepipiñora ichui iyavei peipipetera pe pi sui ivi cuhi ‘toicua Tüpa ñemoirosa oyeupendar yuvireco’ pe hesave —ehi güemimbohe eta mondo.

⁶ Evocoiyase opa yuvinose yuviraso, iyavei oñemosai opacatu tecua rupi omombehu Tüpa Ñhengagüer písirosa resendar yuvireco iyavei ombogüera-güera ité ava imbaherasisa sui opacatu oguatasa rupi yuvireco.

Herodes, “¿Mara ehi pñha?” ehi Jesús upe

⁷ Co mborerecuar guasu Herodes oyandu opacatu mbahe Jesús rembiapo. Evocoiyase, “¿Mara ahera pñha?” ehi tēi. Esepia niha, aipo, “Juan ocuerayevi” ehi yuvireco chupe.

⁸ Ambuae aipo ehi: “Tüpa ñehe mombehugar Eliás, ahe tēi oñemoporēhi iri” ehi yuvireco. Ambuae aipo ehi: “Que ñepegi Tüpa ñehe mombehugar aracahendar revo, ahe tēi ocuerayevi” ehi yuvireco viña.

⁹ Herodes rumo aipo ehi:

—Che niha ayasia uca Juan äca —ehi—. ¿Uma reräcua pñha evocoiyase ayandu? —ehi tēi. Sese Herodes osepia pota ité Jesús.

Jesús oyopoi cinco mil cuimbahe

¹⁰ Apóstol oyevipase Jesús upe, ahese opa tupri mbahe güembiapogüer omombehu yuvireco. Ahese opa viroyepipi ava rehii sui, viraso ivi iporupirēhisave tecua Betsaida cotive.

¹¹ Ahe ava rehii rumo oyanduse yuvireco, yuvirasoño saquicuei. Evocoiyase, “Perioño” ehi chupe. Ipare oñehe Vu Tüpa mborerecuasa rese ava upe iyavei ombogüerapa ava imbaherasisa sui.

¹² Caharuse co doce semimbohe oyemboya yuvireco sese aipo ehi chupe:

—¿Ndiyai vo eremondopa ava, topituhu yuvireco iyavei toseca mbahe güemihura tecua-tecuami cōi vahesa rupi? Esepia niha, cohava ndipoi eté mbahe —ehi yuvireco chupe.

¹³ Ahe rumo aipo ehi güemimbohe eta upe:

—Pe pemondora mbahe semihura yuvireco —ehi.

Semimbohe aipo ehi yuvireco chupe:

—Poyandepomi tēi rumo pan orovireco, ñuviriomi tēi avei pira, toroso ayase co ava opacatu remihura rerocua —ehi yuvireco chupe.

¹⁴ Esepia niha, cuimbahe retacuer cinco mil tupri. Jesús rumo aipo ehi güemimbohe eta upe:

—Pemboyaho cincuenta rupi-rupi imboguapi —ehiño.

¹⁵ Ëgüe ehi semimbohe yuvireco chupe. Ipare uguapi opacatu ava yuvireco.

¹⁶ Evocoiyase oipisi poyandepo pan iyavei ñuvirío pira. Ipare omahe iba rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehii upe imondo ägua yuvireco.

¹⁷ Evocoiyase opacatu ava ocaru vahe ihitaropa tēi yuvireco. Ipare semimbohe omboapipopa doce tupri iruova sembihu rumbirer yuvireco.

Pedro, “Jesús, Tüpa Rembiporavo Poropísirosar secoi” ehi

¹⁸ Ñepegi ari pipe Jesús oyeroqui ahe ae güemimbohe pähuve. Ahese oporandu güemimbohe upe:

—¿Mara ehi vo ava oñehe yuvireco che rese? —ehi.

¹⁹ —Amove ava, “Juan Oporoãpiramo vahe” ehi yuvireco ndeu; ambuae, “Eliás” ehi yuvireco ndeu, iyavei ambuae, “Aviyeteramo que ambuae Tüpa ñehe mombehugar aracahendar ocuerayevi” ehi yuvireco ndeu —ehi.

²⁰ Evocoiyase oporandu güemimbohe upe:

—Pe no, ¿“Ava co secoi” peye ru pe cheu no? —ehi.

—Nde niha Tüpa Rembiporavo Poropísirosar ereico —ehi Pedro imboyevi chupe.

Jesús omombehu omano āgua

²¹ Ahe rumo aipo ehi güemimbohe eta upe: “Pemombehui rene Tüpa Rembiporavo che recosa ava upe” ehi.

²² Iyavei aipo ehi chupe:

—Che, Ava Riquehir, che paraisu itera, iyavei opacatu judío rerecuareta, pahi rerecuar ivate catu vahe iyavei Moisés porocuaita rese oporombohe vahe remiamotarēhi aicora. Ahe avei che yuca ucara yuvireco; mbosapi ari rupi rumo acuerayevira —ehi.

²³ Ipare aipo ehi opacatu upe:

—Acoi oguata pota vahe che rupi, topoi mbahe güemimbotar tēi aposa sui iyavei inungarra curusu rese ovosira viña, toyemoingatu voi che recocuer rese oparaisu āgua ari yacatu rupi iyavei toguata tupri che rupi.

²⁴ Esepia, acoi ava güetecuer tēi raisupar ocañi tēi itera; acoi ava omocañi tēi vahe rumo güetecuer che recocuer rese, ahe oñepisirora.

²⁵ Esepia, ¿aviye ai angahu pīha ava upe opacatu mbahe co ivi pipendar pisi āgua tēi, ahe ae tēi omocañise güecocuer yuvireco viña?

²⁶ Esepia, acoi ava yuvinochi ai vahe che sui iyavei che ñehengagüer sui avei no, che avei, Ava Riquehir, ēgüe ahera ichui acoi ayevise che reco pīratasa pipe, che Ru reco pīrata porañetesa pipe avei sembiguai rehii iva pendar maranehi reseve curi.

²⁷ Supi eté, oimera amove cohava ava nomano vītei chivaherā, osepia rane itera ouse Tüpa mborerecuasa yuvireco curi —ehi.

Jesús ñecuñaro agüer

²⁸ Ocho ari pare Jesús oyeupi ivitri rese oso oyerure āgua. Pedro, Santiago iyavei Juan ahe viraso oyeupi.

²⁹ Oyerure viteseve, oñecuñaro sepiaca. Iturucuar evocoyase sendi, morochí eteanga.

³⁰ Ahese ñuvirío ava oyemboyecua yivii imoñeta yuvinocha. Evocoi ava yuvirecoi vahe ahe Moisés, Elías avei.

³¹ Oyere tupri sendigüer iporañetesa yuvireco sese, iyavei co ñuvirío mbia oñehe imano āgua rese yuvireco chupe: “Nde niha ereyemomborarara nde mano āgua Jerusalén pipe eico” ehi yuvireco chupe.

³² Yepe Pedro, ondugüer reseve sopesí eteanga yuvireco viña. Aviyeteramo tēi opa sopesí yuvireco ichui. Ahese osepia Jesús porañetesa yuvireco iyavei co ñuvirío mbia yuvinocha vahe yivii no.

³³ Evocoi mbia oyepepise ichui yuvireco, ahese Pedro aipo ehi chupe:

—Ore mbohesar, ¿aviye ai eté cohava yaico! Toroyapo mbosapi teyupami: ñepeí ndeu nara, ambuae Moisés upe, ambuae evocoyase Elías upe nara —ehi.

Pedro rumo ndoicuai eté aipo ohesa.

³⁴ Iyavei ñehe viteseve, aviyeteramo tēi iporēhi iva quiha, oyopipa tupri ité. Evocoyase osiquiye tēi yuvireco.

³⁵ Ipāhuve oyeendu ñehesa aipo ehi vahe: “Co che Rahir, che Rembiporavo ité; peyapisaca catu ñehe rese” ehi.

³⁶ Opase osendu co ñehesa yuvireco, ahese osepia Jesús, ahe ae ihāise yuvireco. Semimbohe rumo oyeupe tēi ovireco yuvireco; ndomombehu vītei eté ava upe mbahe osepia vahecuer yuvireco.

Jesús ombogüera chīhivahe caruguar rerecosar

³⁷ Ahere ayihive, ogüeyise ivitri sui yuvireco, setá ava oyugüeru Jesús rovaichi yuvireco.

³⁸ Ahese mbia ava pāhuve aipo ehi pīrata voi eté:

—Porombohesar, ereyapomira mbahe icatupri vahe cheu viña. Esepia, che rahir ñepeimí vahe ité;

³⁹ caruguar rumo opoco sese, omoase pucu-pucu uca yepi iyavei omoeōha-ōha sereco iyavei iyuru rupi tiyui yusu-yusu. Mara-mara tēi vireco iyavei ndopoi potai eté ichui.

⁴⁰ Amombehu tēi niha nde remimbohe upe ‘tomboyepemí tēi caruguar ichui’ che yapave viña; nomboyepemí eté rumo ichui yuvireco —ehi.

⁴¹ Ahe omboyevi:

—¡Too, ndapeyeroya tupri vītei eté che rese, co coti tēi vite pe pīhañemoñetasa! ¿Mbovi rupi rutei vo aico vītera pe pāhuve che ñemosasa pipe? Eru nde rahir cohava cheu —ehi ahe mbia upe.

⁴² Chīhivahe oyemboyase rumo sese, caruguar omboviapi voi imondo ivive, imoeōha iri. Jesús rumo oñehe pīrata caruguar upe imose āgua chīhivahe sui. Ahese chīhivahe ocuera tupri ité. Ipare omboyevi tu upe.

⁴³ Ahese opacatu ava, “¡Mara ehi rutei!” ehi tēi yuvireco Tüpa pīratasa rembiapo aviye vahe repiase.

Jesús omombehu iri omano āgua

Opacatu ava ndoyembovihal viteseve yuvireco, ahese aipo ehi güemimbohe upe:

⁴⁴—Pesendu tupri che ñehe; peresarai eme ichui: che, Ava Riquehir, imondopri aicora che amotarēhimbar povrive —ehi.

⁴⁵ Semimbohe rumo ndosenducuai eté oyeupe ñehesa yuvireco. Esepia niha, Tūpa ndoipotai eté senducua āgua chupe; osiquiye chupe oporandu āgua yuvireco yepi.

¿Ava vo seco ivate catu vahe?

⁴⁶ Coiye semimbohe eta omboipi oyecopi-copi yuvireco ‘¿ava ité pīha ivate catu vaherā curi?’ oyapave.

⁴⁷ Jesús rumo oicuaño ipihañemoñetasa yuvireco. Evocoyase oipisi chīhivahemi seru oipive imoha.

⁴⁸ Ipare aipo ehi güemimbohe eta upe:

—Acoi ava oipisi vahe co chīhivahemi nungar che rer pipe sereco, che ité che pisi yuvireco; iyavei acoi ava che pisi vahe, oipisi aveira che mbousar. Esepia, acoi ava seco mbegüemi catu vahe pe pāhu pendar, ahe aviye catu vahe —ehi.

Acoi yande mboyoyasar, ahe ndahei yande amotarēhisar

⁴⁹ Evocoyase Juan aipo ehi chupe:

—Ore mbohesar, orosepia niha mbia ombogüera vahe carugar pīratasa sui ava nde rer pipe oico; ore rumo ndoroipotai chupe evocoyase seco āgua. Esepia niha, ndahei yande rupindar secoi —ehi.

⁵⁰ Jesús rumo,

—¡Aní ndapeipotai chupe! —ehi—. Esepia niha, evocoi nungar ava ndahei yande amotarēhisar; ahe rumo yande mboyoyasar —ehi güemimbohe eta upe.

Jesús oñhengata Santiago upe, Juan upe avei

⁵¹ Virovise rumo ari ivave Jesús so āgua, ahese ahe aipo ehi: “Yaso ru Jerusalén ve cūrítei” ehi.

⁵² Evocoyase omondo ava güenonera. Ahe yuviraso tecua Samaria ivi rupi ipituhu āgua moingatu viña;

⁵³ Samaria iguar rumo nomoingue potai eté güetave yuvireco. Esepia, oicua Jerusalén ve ichose yuvireco.

⁵⁴ Co mbahe naporai vahe repiase rumo, semimbohe Santiago iyavei Juan oporandu yuvireco chupe:

—Ore Yar, toromboumi tata iva sui co ava mocañi āgua —ehi yuvireco chupe viña.

⁵⁵ “¡Aní!” ehi oyemboyere chupe.

⁵⁶ Ipare yuviraso ambuae tecuave.

Oguata pota vahe Jesús rupi

⁵⁷ Yuvirasose peri rupi aipo ehi mbia Jesús upe:

—Che Yar, che nde rupi aso pota opacatu nde guatasa rupi —ehi.

⁵⁸ Ahe rumo aipo ehi:

—Aguara vireco güetara, vīrai avei vireco guaiti; che rumo, Ava Riquehir, ndarecoi que che rēta che pituhu āgua —ehi chupe.

⁵⁹ Ipare ambuae upe aipo ehi:

—Erio che rupi —ehi.

—Che Yar, che ru manose voi, ñoti pare aguatarata nde rupi —ehi.

⁶⁰ —Aní —ehi—. Acoi omano vahe nungar ahe ae toñetiaño yuvireco; nde rumo eso, emombehuño ñehesa Tūpa mborerecuasa resendar ava upe —ehi.

⁶¹ Evocoyase ambuae aipo ehi chupe no:

—Che Yar, che aguata pota nde rupi; yipindar rumo aso ranera che rēta mbahe moingatu che so āgua —ehi.

⁶² —¡Aní! —ehi ahe mbia upe—. Esepia, inungar acoi oipisi vahe ivi mboyeresas imohivi tupri āgua, omahese rumo guaquicuei coti, evocoi nungar naporai Tūpa mborerecuasave yuviroique vaherā —ehi.

10

Jesús oyocuai setenta y dos tupri güemimbohe

¹ Ipare yande Yar oiporavo setenta y dos ava ñepe-pe tecua rupi ñuvirío-río güenonera.

² Yipindar rumo aipo ehi: “Supi eté mbahe imonuhapirā setá iteanga; sese oporaviqui vahe rumo moviromi tēi. Sese peporandu mbahe miti Yar upe, tombou ava imonuha āgua” ehi.

³ “Peso, opomondo ovesami nungar ava mbahe mimba oñaro vahe nungar pāhuve.

⁴ Perasoi rene mbahe riru iyavei guarepochi siru reseve. Ndapemondugüei chiaveira pe pitaqui; iyavei aní pepita ‘avirave’ apo ava upe peri rupi.

⁵ Acoi peiquese que oi pipe, yipindar rumo peyapo ranera: ‘Avirave. Tüpa tape rovasa’ peyera.

⁶ Acoi aheve oimese ava aviye vahe, ahe oipisira Tüpa porovasasa; anise evocoiyase ndipoi chira porovasasa chupe nara.

⁷ Acoi pe pisise, aheve ité pepitañora; pecarura iyavei peihura ahe sembiereco. Esepia, ava poraviquise imboepisa chupe. Sese ndapeguatai chira ambuae ava rêta rupi-rupi tēi. Ñepeí oi pipe güeraño pepitañora.

⁸ Acoi que tecuave peyepotase, ahe pendar pe repia potañose yuvireco, acoi ahe ombouse mbahe yuvireco tapehu, pehuñora ichui.

⁹ Ahe pendar imbaheasi vahe evocoiyase pembogüerara, iyavei aipo peyera chupe: ‘Tüpa mborerecuasa namombriimi pe sui’ peyera.

¹⁰ Acoi peyepotase rumo que tecuave, ahe tecua pendar ndape repia potaise yuvireco, peseñora ocar rupi aipo peyera:

¹¹ ¡Co pe recua pipendar ivi chimborer oya vahe ore pi rese oroipipete oreyesui, peicua catu, ore hesa pipe. Peicua tupri rumo Tüpa mborerecuasa namombriimi pe sui’ peyera chupe.

¹² Supi eté acoi ari cañi oyepotase, oimera Tüpa ñemoirosa ahe tecua pendar upe ivate catu vahe ava tecua Sodoma pendar sui” ehi güemimbohe eta upe.

Opacatu tecua ndiporeroyai vahe

¹³ ¡Peparaisu ava tecua Corazín pendar, pe avei peparaisu tecua Betsaida pendar! Esepia, acoi poromondiisa pe pãhuve yapopri yaposara yipive tecua Tiro, Sidón ve viña, ahe tecua pendar aracaheve anga omondera turucuar viharēhisa resendar, tanimbu avei omondora oaca rese oangaipa mboasisa pipe yuvireco viña no.

¹⁴ Pe rumo peipisira ivate catu vahe Tüpa ñemoirosa ava Tiro, Sidón pendar sui ari cañi pipe coipe.

¹⁵ Pe avei no tecua Capernaum pendar, ipemoha co ivave pe reco ãgua viña! ¡Pe mombosapara rumo ivicuar ipicucu catu vahesave!

¹⁶ “Acoi ava oyapisaca vahe pe ñehe rese yuvireco, ahe evocoiyase oyapisaca avei che ñehe rese. Iyavei acoi ava pe mboyepepiño vahe oyesui, ahe evocoiyase che avei che mboyepepi oyesui yuvireco. Acoi ava rumo che mboyepepiño vahe oyesui, ahe evocoiyase che mbousar avei mboyepepiño oyesui” ehi güemimbohe upe.

Oyevipa iri ava setenta y dos vahe

¹⁷ Oyevipase ava setenta y dos vahe, oviharetseve aipo ehi yuvireco chupe:

—¡Ore Yar, carugar avei eté niha ore mboyeroya etepri yuvireco nde rer pipe! —ehi.

¹⁸ Evocoiyase aipo ehi güemimbohe eta upe:

—Taa, asepia ité niha carugar rerecar oviapise iva sui overa vahe nungar.

¹⁹ Che niha amondo pĩratasa pẽu peguata vaherã mboi iyavei mbahe rumbiquiãpe hari rupi opacatu pe amotarēhisar pĩratasa reroyi ãgua, que mbahe pe momaraēhi ãgua avei.

²⁰ Peyemboviharetei rene carguareta pe mboyeroysa. Iya rumo peyemboviha pe rer iva pendar icuachiapri rese —ehi güemimbohe eta upe.

Jesús oviharete

²¹ Ahe pipeve voi Jesús, Espíritu Santo rese, vorivetesu pipe aipo ehi: “Che Ru, che oromboetēi. Nde niha iva Yar, ivi Yar avei no. Esepia niha, ereñomi co mbahe ava oyesui tēi mbahe oicua vahe sui iyavei co ivi pipendar ava imbahecua vai vahe sui avei no. Eremboyecua rumo co mbahe ava ndoyembohe tupri vahe upe nde rese oyeroyase. Ahe niha ereipota ité, che Ru” ehi.

²² “Opacatu mbahe che Ru ombou cheu. Iyavei ndipoi ava che cua vahe tahir che recose; che Ru güeraño ité rumo che cua. Ndiipoi avei che Ru oicua tupri vahe yuvireco no; che güeraño ité aicua. Iyavei acoi que ava upe aicua uca potase, aicua uca tupri aveira” ehi ava eta upe.

²³ Evocoiyase omahe güemimbohe eta rese, chupe güeraño aipo ehi: “Perorivete catu co mbahe pesepia vahe rese.

²⁴ Esepia niha, setá etepri ava Tüpa ñehe mombehusar yuvirecoi vahe iyavei mborerecuar guasu eta arachendar osepia pota tēi mbahe pe rembiepia; ndosepiaí eté rumo yuvireco. Osendu pota tēi co pe remiendu yuvireco; ahe rumo ndosendui avei yuvireco” ehi güemimbohe upe.

Jesús porombohesa Samaria iguar recocuer sui

²⁵ Iyavei no Tūpa porocuaíta rese oporombohe vahe oso Jesús upe secoãha ãgua, mbahe rese oporandu:

—Porombohesar, ¿mara ahera vo vichico teco apirêhi vahe rereco ãgua? —ehi chupe.

²⁶ Ahe omboyevi:

—¿Mara ehi vo Moisés porocuaíta icuachiapri pipe? ¿Mara ehi vo ereyeroquise ipipe? —ehi oporombohe vahe upe.

²⁷ Evocoyase oporombohe vahe omboyevi:

—“Eresaisura nde Yar Tūpa opacatu nde pihá pipe, opacatu nde recocuer pipe, opacatu nde pīratasa pipe, opacatu nde yapisacasa pipe avei; iyavei eresaisura ava nde cotindar nde yeaisu nungar” ehi Moisés porocuaíta —ehi chupe.

²⁸ —Supi eté —ehi—. Eremboyevi tupri ndeyeupe porandusa cheu. Eremboaviyese evocoi, ahese ererectora tecovesa apirêhi vahe —ehi co mbia upe.

²⁹ Co mbia rumo oyeepi pota. Sese aipo ehi chupe:

—¿Ava vo aipo che cotindar secoi? —ehi.

³⁰ Evocoyase omboyevi chupe:

—Oime mbia Jerusalén sui oso vahe Jericó ve. Ahe peri rupi yuvinose ava ndipihai vahe yuvireco chupe. Ahe virocuaa imbahe yuvireco ichui, iturucuar opacatu reseve; iyavei yuvirocua-rocua yuvireco sese. Ipore oyuca seni seya peri rupi yuviraso.

³¹ Ahese judío pahi ou ahe peri rupi. Evocoi mbia repiase rumo, co coti rupi oñacuasaño oso.

³² Êgüe ehi tupri avei ambuae mbia pahi pītiviisar levita, osepiase, oñacuasa tupriño avei oso no.

³³ Ipore rumo mbia sepia potapirêhi Samaria iguar oso ahe peri rupi avei. Ahe osepiase, oiparaisueroco.

³⁴ Evocoyase ahe mbia oyemboya oso sese oiposano yapichasa mbahe quira pipe, uva ricuer sai vahe pipe, oicuhacua avei turucuar pipe chupe. Ipore osupi güeimba harive oaprive, viraso ava quesave. Aheve ihañeco sese.

³⁵ Ahere ayihive Samaria iguar osose, omondo guarepochi ahe pendar oi yar upe. Ipore aipo ehi chupe: “Esãro tuprimi tēi co ava cheu. Acoi ndehañeco catuse sese, amboepi catu irira che yevise ndeu” ehi sēta vahe upe.

³⁶ Indó, ¿uma vo co evocoyase mbosapi yuvirecoi vahe oyemboava acoi ava ndipihai vahe remimombaraisu upe? —ehi.

³⁷ Evocoyase ahe mbia aipo ehi:

—Acoi mbia oiparaisueroco vahe iparaisu vahecuer —ehi.

—Supi eté —ehi chupe—. Eyapo tupri avei nde co nungar eico —ehi Jesús co Moisés porocuaíta rese oporombohe vahe upe.

Jesús oso Marta iyavei María rētave

³⁸ Ipore Jesús güemimbohe eta reseve oguata vite oyepota cuña recosave yuviraso, ahe cuña rer Marta. Ahe omoingue tupri güeta pipe.

³⁹ Icupihir evocoyase María serer. Ahe oguapi Jesús pive iñehe rendu oí.

⁴⁰ Marta rumo oyembopihaviracua opacatu mbahe rese oico. Ipore oyemboya oso Jesús rese opihaviracuasa pipe aipo ehi chupe:

—Che Yar, ¿aviye ai vo evocoi che cupihir chini tēi nde piri che poraviqui viteseve? Emombehu chupe, tou, tache pītivií rane —ehi chupe.

⁴¹ Omboyevi rumo Marta upe aipo ehi:

—Marta, Marta, ¿mahera vo ereyemañeco eteprí tēi setá mbahe apo ãgua eico?

⁴² Iya rumo ñepei mbahe yiposa. Co nde cupihir oiporavo ahe mbahe aviye catu vahe oyeupe che ñehe renduse; ndipoi chietera que ava virocua vaherã ichui —ehi Jesús Marta upe.

11

Jesús ombohe güemimbohe eta yerure ãgua rese

¹ Ñepei ari Jesús oyerure. Iyerure pare semimbohe aipo ehi chupe:

—Ore Yar, ore mbohemi tēi ore yerure ãgua rese eve inungar Juan ombohe güemimbohe eta sereco yepi —ehi chupe.

² —Aviye —ehi—. Peyeroquise, aipo peyera:

‘Ore Ru Tūpa, ivave ereico vahe, imboeteipri nde rer tasecoi. Tou nde mborerecuasa oreu.

Tayaposa nde remimbotar co ivi pipe, iva pendar nungar.

³ Embou ore rembihu ari yacatundar oreu.

⁴ Iyavei ndeñero ore angaipa rese oreu.

Esepia niha, ore oreñero opacatu ore amotarēhimbar upe.

Ore mboangaipa ucai rene eve, ore renose catu mbahe tēi sui eve' peyera —ehi

⁵ Iyavei aipo ehi no:

—Inungar co perecora pe mboripar viña. Ipare pesora ahe sētave pītu mbiter rupi aipo peyera chupe: 'Che mboripar; emboumi tēi mbosapi pan cheu tamboyevire ndeu.

⁶ Esepia, ambuae che mboripar oyeputa ou che rētave; ndarecoi eté rumo mbahe amondomi vaherā chupe' peyera chupe.

⁷ Ipare ahe, 'Che mañeco tēi rene eve. Esepia, opa ayoquenda, iyavei co che rahir opa aropituhu seru. Sese ndiyai apūha mbahe mondo ndeu' ehiñora pēu viña.

⁸ Supi eté, yepe nopuhai chietera mbahe mondo pēu pe mboripar secose viña, opūhaño itera rumo 'tache mañeco iri eme' oyapave. Ipare omondoño itera opacatu mbahe pe porandusa pēu.

⁹ Sese aipo ahe pēu: Peoporandura mbahe rese Tūpa upe, ahese omboura pēu; peseca ahe mbahe, ahese peyosura; inungar pemota oquenda, ěgüe peyera peyeroquisa pipe Tūpa upe, ahese imboisara mbahe mbou āgua pēu.

¹⁰ Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyeoquisa pipe omota vahe oquenda Tūpa upe, chupe imboisara.

¹¹ "Oimese tahi vahe pe pāhuve, tahir oporanduse pira rese vu upe, ¿omondora pīha mboi tēi guahir upe viña?

¹² anise, ¿omondora pīha oporanduse mbahe rupiha rese, mbahe rumbiquiāpe tēi chupe viña?

¹³ ¡Aní! Esepia, pe yepe ava ndaseco pōrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru iva pendar omondo catura Espiritu Santo acoi ava oyeupe porandusar upe!" ehi güemimbohe eta upe.

"Jesús vireco carugar pīratasa oyese" ehi tupri tēi ava yuvireco

¹⁴ Ambuae ari pipe, Jesús osepia mbia carugar nomoñehengatui vahe. Evocoiyase omose carugar ichui. Aheseve voi iñehengatu. Ipare ava rehii sepiase, ndoyembovihai tēi yuvireco.

¹⁵ Amove rumo ava aipo ehi tēi yuvireco: "Beelzebú, carugar rerecurar pīratasa pipe revo omboyepepi carugar oico" ehi tēi yuvireco chupe.

¹⁶ Ambuae ava secoñhasa pipe oporandu yuvireco chupe: "Eyapo ru mbahe nde rembiapo iva pendar nde recocuer cua āgua" ehi tēi.

¹⁷ Ahe rumo oicuaño ipihañemoñetasa. Evocoiyase aipo ehi chupe:

"Que mborerecurar guasu povri pendar ovava-vavase oyeupe oyeamotarēhisave yuvireco, ahese evocoi mborerecurar pīratasa ocañi tēira. Iyavei ava omu rese ae oyeamotarēhi vahe, oyemocañi aveira yuvireco no.

¹⁸ ěgüe ehi avei niha carugar. Esepia, serecurar omboyepepise opovri pendar, ovavara oyeupe yuvireco viña. Ahese oyemocañi tēira yuvireco. Co ñehesa aipo ahe pēu. Esepia pe, 'Beelzebú pīratasa pipe tēi opa omose carugar ava sui oico' peye tēi cheu.

¹⁹ ěgüe ahese rumo viña, ¿ava pīratasa pipe ru evocoiyase pe voya omboyepepi carugar ava sui? Pe voya ae omboyequara pe ñehes pe rembiavi yuvireco pēu.

²⁰ Che rumo Tūpa pīratasa pipe carugar amboyepepi ava sui. Sese cūrítei Tūpa mborerecuasa oyeputa ité pēu.

²¹ "Inungar oime ava ipīrata etepri vahe, iyavei vireco oyeroyasa. Ipipe osāro güēta opacatu mbahe ipīpendar avei icañiēhi āgua.

²² Acoi ouse rumo ambuae ipīrata catu vahe chupe, ahe osecoreroyise, opa víroca iyeroyasa ichui. Evocoiyase güembierocua ahe opa víraso oyeupe.

²³ "Acoi ava ndache mboyoyai vahe, ahe che amotarēhimbar yuvirecoi; iyavei acoi ava ndosecai vahe ava cheu, ahe omosai tēi yuvireco che sui" ehi.

Carugar oyevi iri güeco agüerve

²⁴ "Acoi osēse carugar ava sui, oguata tēi ivi ipiru vahe rupi opituhu āgua reca. Ipare rumo ndoyosuise, ipihañemoñeta oyeupe, 'Ayevi irira che reco agüerve vicho' ehi.

²⁵ Aheve oyevisse, osepia iri secocuer inungar oi sahuvapri tupri.

²⁶ Sepiase, oso siete carugar naporai catu vahe reca. Ichui güeruse, oyoya guasu yuviroique co mbia pīha pipe. Sese mbahe tēi catu ité secocuer yipindar güeco agüer sui" ehi Jesús ava rehii upe.

Tūpa Ñehengagüer víroya vahe sovasapri secoira

²⁷ Oñehes vitesese aipo mbahe rese, cuña ava rehii pāhu pendar oñehes pīrata aipo ehi:

—¡Evocoi mbia sui ereha vahe iyavei nde mboacua vahe, ahe sovasapri tasecoi! —ehi chupe.

²⁸ Ahe rumo aipo ehi:

—¡Acoi osendu vahe ité che Ru Tüpa Ñehengagüer iyavei viroya vahe ité, ahe sovasapri secora che Ru Tüpa rovaque! —ehi ahe cuña upe.

Ava eta ndaseco pōrai vahe oporandu poromondiisa rese yuvireco

²⁹ Ava rehii oyere ati vitesse Jesús rese yuvireco, ahe aipo ehi: “Pe cūrteindar ava ndaseco pōrai vahe, peporandu tēi poromondiisa che recocuer cua āgua rese. Che rumo namboyecuai chira ambuae poromondiisa pēu. Jonás recocuer rese güeraño opomomahenduhara.

³⁰ Inungar Jonás poromondiisa secói ava Nínive pendar upe, ēgüe ehi aveira niha Ava Riquehir reco pipe oimera poromondiisa ava cūrteindar upe.

³¹ Acoi ari cañi pipe cuña mborerecuar guasu irohí coti secua vahe porandusave omombehura co ava cūrteindar cañipa āgua. Esepia, ahe ou amombri iví sui Salomón mbahecuasa rendu āgua; cūrteitei rumo oime ivate catu vahe cohava Salomón sui.

³² Iyavei ari cañi pipe ava tecua Nínive pendar porandusave omombehura ava cūrteindar cañipa āgua. Esepia niha, omboasise oangaipa, oyeve Tüpa upe yuvireco Jonás omombehuse Tüpa Ñehengagüer chupe; cūrteitei rumo oime ivate catu vahe Jonás sui pe pāhuve” ehi.

Tesapesa yande retecuer resendar

³³ “Ndayañomi chira tataendi que imoendi imoi; ndayamondoí chiaveira que mbahevriive. Iyacatu rumo yamondora ivate tataendi rendave ‘tosasape opacatu ava oi que vahe oi pipe’ yande yapave.

³⁴ Iyavei pe resa inungar tataendi pe retecuer upe. Esepia, aviyese pe resa, opacatu pe retecuer upe osesape. Acoi imarase rumo, pe retecuer pītumimbi vahe nungar tēi.

³⁵ Sese peicua catu co poroesapesa pereco vahe, tape rereco eme pītumimbi vahe nungar.

³⁶ Co supi eté vahe osesape tuprise opacatu pe pihave, ndipoise que pītumimbisa nungar mbahe ipipe, evocoyase ahe inungar tataendi osesape vahe opacatu pe recocuer pipe. Ahese ndipoi que pītu vahe pēu” ehi.

Jesús omombehu fariseo iyavei Moisés porocuaita rese oporombohe vahe recocuerai

³⁷ Opase oñehe Jesús, fariseo viraso güetave imbocarú. Oiquese sètave oso, oguapi mesave oí.

³⁸ Ocaru renondeve ndoyepoise rumo, ahese fariseo ndoyembovihai tēi nomboaviyese judío porocuaita.

³⁹ Ahe rumo aipo ehi fariseo upe:

—Inungar igua riru iyavei tembihu riru icupe rupi tēi yoseipri, ipipe rumo iquiha opitaño ité, ēgüe ehi tupri avei pe recocuer pe monda raisave mbahe-mbahe tēi pe reco pipe.

⁴⁰ ¡Pe ndayaracuai vahe peico! ¿Ndapeicuai vo pe rete aposar, pe piha aposar avei?

⁴¹ Sese pemondo porerecosa ava iparaisu vahe upe pe recatēhiēhisa pipe. Evocoyase ipipe sui opacatu imoatimombri peicora.

⁴² “¡Peparaisu pe fariseo! Esepia, yepe pe remiti sui pemondo peyacatu ñepepe-pe diez vahe sui Tüpa upe viña, pe rumo ndaperoyai teco ivisa iyavei peseyaño tēi Tüpa poroaisusa. Iyacatu rumo peyapora evocoi mbahe pe porerecosa sui pe poiēhisa pipe viña.

⁴³ “¡Peparaisu pe fariseo! Esepia, peipota pe renda porañete catu vahe pe guapi āgua tüparo pipe, iyavei peipota pēu opacatu ‘avirave’ oyapora ava pe mboetisave ocar rupi yuvireco.

⁴⁴ “¡Peparaisu! Esepia, pe recocuerai inungar tehōgüer ruvípa icuāēhise ava oguata ihari rupi yuvireco” ehi chupe.

⁴⁵ Evocoyase Moisés porocuaita rese oporombohe vahe,

—Porombohesar —ehi—, aipo eremombehu vahe pipe niha ava ore amotarēhiño yuvireco —ehi.

⁴⁶ Ahe rumo aipo ehi:

—¡Peparaisu avei pe Moisés porocuaita rese oporombohe vahe! Esepia, pemondo porocuaita yavai vahe ava upe; pe rumo evocoyase ndapeipitiviimi eté ahe ava imboaviyē āgua rese yuvireco.

⁴⁷ “¡Peparaisu! Esepia, pemoingatu Tüpa ñehe mombehusar ruvipagüer peico Tüpa mboeteisa angahu pipe tēi. Pe ramoí teieté rumo oyuca yuvireco.

⁴⁸ Evocoyase pemboyecua co pe ramoí eta pihañemoñeta agüer secocuer moña pipe peico. Esepia, ahe oyuca Tüpa ñehe mombehusar yuvireco. Pe evocoyase cūrteitei pemoingatu vite supipagüer peico.

⁴⁹ “Sese Tüpa ombahecuasa pipe aipo ehi: ‘Amondora che ñehe mombehusar, apóstol avei ndiporeroyai vahe upe. Ahe ipāhu pendar oyucara yuvireco. Iyavei ambuae mara-mara tēi virecora yuvireco’ ehi.

⁵⁰ Esepia, ava ndiporeroyai vahe cūrteindar upe ité omondora oñemoirosa opacatu oñehe mombehusar yucagüer rese aracahe suive, cūrteindar avei oyucase yuvireco.

⁵¹ Abel yuca agüer suive oyepotara Zacarías yuca agüerve oso. Ahe oyuca tūparo maranehi rocar mbahe reropovēhesa rovai. Supi eté aipo ahe pēu: Tūpa opara omondo oñemoirosa ahe yuca agüer rese ava ndiporeroyai vahe cūrteindar upe curi.

⁵² “¡Peparaisu pe Moisés porocuita rese oporombohe tēi vahe! Esepia, pe mbahecuasa avīye soquendapri pereco ava sui. Pe niha ndaperoyai, iyavei ambuae ava upe ndapeipotai seroya āgua” ehi chupe.

⁵³ Ipape Jesús osē oso ichui. Ahese Moisés porocuita rese oporombohe vahe iyavei fariseo eta oñemoirō iteanga yuvireco sese. Ahe omañeco tēi, oporandu-randu mbahe rese yuvireco chupe,

⁵⁴ osecōña-āha tēi mbahe pipe ‘toyavi angahu oñehe yandeu’ ohesa pipe yuvireco.

12

Fariseo recocuer rese Jesús oñehe

¹ Ahe pipeve avei ava oñemonuha atí iteanga oyemboti tupri oyemombo guasu-guasú yuvireco. Yipindar Jesús güemimbohe upe rane omboipi oñehe: “Peñearo tupri fariseo pan mboapeposa nungar sui. Esepia, ahe ndoyavii supi tupri vahe viña; ndahei eté rumo.

² Esepia, yaposa vahe imombehupirēhi cūrtei icuasaño itera curi. Iyavei mbahe ñomipri icuasaño aveira no.

³ Supi eté opacatu mbahe pemombehu vahe pītumimbisave, ahe sendusa tuprira ari pipe coiye; iyavei acoi mbahe pemombehu vahe peyeupeñomi ‘tosendu eme ambuae ava’ pe hesa pipe, serosapucaisara oi harive opacatú ava rovaque” ehi.

¿Uma sui pīha siquiyesara?

⁴ “Iyavei aipo ahe pēu, che mboripareta: ndapesiquiyei chira acoi ava pe yuca potasar sui. Esepia, ipape ndoicatu iri ambuae mbahe apo āgua pēu.

⁵ Che rumo amombehura pēu uma sui pesiquiyera: acoi oicatu vahe omborecuasa pipe pe yuca pare pemondo tata guasuve. Ahe ichui eté pesiquiyera.

⁶ “Pe pemondo poyandepo vīrai ñuvirío guarepochi rupivemi tēi yepi. Tūpa rumo ndasesarai eté que ñepe sui.

⁷ Tūpa niha oicua ñepe-pe yande ha retacuer. Sese, pesiquiye eme; pe niha ivate catu vahe ité peico opacatu vīrai sui” ehi.

“Che aroya ité Jesucristo” ehi vahe opacatu ava rovaque

⁸ “Acoi ava ‘che aroya Jesús’ ehi vahe opacatu ava rovaque, che avei, Ava Riquehir, ‘Co che reroyasar secoi’ aipo ahera che Ru upe sembiguai rovaque.

⁹ Acoi ava ‘che ndaroyai Jesús’ ehi vahe rumo cheu opacatu ava rovaque, che avei evocoyase, ‘Co ndahei che reroyasar secoi’ ahe aveira che Ru Tūpa upe sembiguai rovaque” ehi.

¹⁰ “Iyavei opacatu oñehe-ñehe tēi vahe che, Ava Riquehir, rese, ahe chupe oimeño ñeroisa. Acoi que ava ñehe-ñehe tēi vahe rumo Espiritu Santo amotarēhisave, ahe chupe ndipoi chietera ñeroisa” ehi.

¹¹ “Acoi pe amotarēhisar che recocuer sui tēi pe rerasose porandusave pe recoña āgua yuvireco, anise mborerecuar mbahe moingatusar rovai, que ambuae mborerecuareta upe avei no, ‘¿Mbahe pīha amombehura?’ ndapeyei chira.

¹² Esepia niha, ahe pipeve voi Espiritu Santo pe mbohera aviyeteramo tēi mbahe mombehu āgua rese” ehi güemimbohe eta upe.

Ñearosa mbahe pota raisa sui

¹³ Ñepe mbia ava rehii pāhu pendar aipo ehi Jesús upe:

—Porombohesar, emombehumi che riquehir upe, tomboyahomi tēi mbahe che momba-hesa cheu —ehi.

¹⁴ Ahe rumo omboyevi chupe:

—Che mboripar, che ndachecuaitai mbahe moingatu āgua, mbahe mboyaho-yaho āgua avei —ehi ahe mbia upe.

¹⁵ Ipape aipo ehi:

—Peñearo tupri opacatu mbahe pota raisa sui. Esepia niha, ndahei mbahe rereco ati āgua pe recocuer —ehi.

¹⁶ Ipape omboyoya ambuae mbahe rese imbohe: “Oime mbia mbahe yar, iha tupri ai eté semiti.

¹⁷ Ahese ipihañemoñeta oico oyeupe: ‘¿Mara ahera pīha che rembipoho rereco?’ ehi tēi. ‘Ndareco iri eté yapocatu āgua’ ehi.

¹⁸ Ipare ipihañemoñeta cute: ‘Aicua mbahe che rembiaporã. Opara aroyi tembihu rëta. Ichui ayapo irira ambuae tuvichá catu vahe. Aheve ayapocatura che remiti rãhii opacatu mbahe areco vahe avei no.

¹⁹ Evocoiyase aipo ahera cheyeupe: Che mboripar, oime setá mbahe cheu araviter momba-momba água; sese cūritei apituhura vichico, acarura, acahura iyavei ayemboviharetera no, ahera’ ehi.

²⁰ Tūpa rumo aipo ehira chupe: ‘Mbia, nandearacuai eté eico, co pītu pipeve voi eté eremanora. Co mbahe nde rembiapocatu, ¿ava mahera pīha evocoiyase?’ ehira chupe.

²¹ Ēgüe ehi eté niha que ava oyeupeñomi tēi mbahe omonuha ati vahe, iparaisu rumo Tūpa rovaque” ehi ahe mbia upe.

Tūpa osãro opacatu guahir

²² Ipare aipo ehi Jesús güemimbohe upe: “Co amombehura pēu: Ndapeyemomahenduha guasu ai chira pe remihura rese pe recove água, pe turucuarã rese tēi avei no.

²³ Yande recovesa rumo aviye catu vahe tembihu sui; yande retecuer avei aviye catu turucuar sui no.

²⁴ Pesepia vírai: nomahetii vahe, nomonuhai vahe avei, ndovirecoi vahe avei mbahe rãhii rëta yuvireco. Tūpa rumo omoime mbahe itohu. ¡Pe rumo ivate catu vahe ité peico vírai sui!

²⁵ Ndipoi eté que ñepeí pe pāhu pendar oicatu vahe opihañemoñetá iteangasa pipe tēi güecocuer mbosasaviño água.

²⁶ Supi eté ndapeicatuñese yapo, ndiyai peyemomahenduha guasu ai mbahe rese.

²⁷ “Pemahecu ru mbahe potri caha pipendar rese: ndoporaviquí eté iyavei ndoipiai oturucuarã. Iyavei no yepi mborerecuar guasu Salomón vireco setá mbahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese.

²⁸ Tūpa niha omboporañete raimi tēi mbahe potri caha pipendar. Ichui sapisapaño horno pipe. ¡Ahe rumo omondo catura turucuar pēu, pe ava nimbahe reroya tuprii vahe!

²⁹ Sese, ¿Mbahe pīha yahura, mbahe pīha yamondera?” ndapeyei chira pe yemomahenduha guasu aisa pipe.

³⁰ Esepia, ava Tūpa reroyasarēhi co ivi pipendar aipo nungar mbahe reseño tēi ipihañemoñeta yuvireco yepi. Pe Ru Tūpa rumo oicua ité pēu mbahe ipane vahe.

³¹ Aviye catu rumo pesecara pe Yar Tūpa povrive pe reco água, ahese omboura que mbahe ipane vahe pēu” ehi.

Ivave mbahe eta oime vahe yandeu

³² “Aní pesiquiye, che ovesa nungar, yepi pe moviromi tēi peico viña, pe Ru rumo oporoaisusa pipe oipota opovrive pe rereco água.

³³ Pemondopa mbahe pereco vahe ava oipota vahe upe. Ipare pemondo sepri avei iparaisu vahe upe. Ahe yapocatusa ivave mbahe riru ndituyui vahe nungar pipe. Aheve ava imonda raí vahe ndoiquei chira ñomi água pe sui iyavei mbahe rasoi nomomaraí chiaveira.

³⁴ Esepia, pe mbahe pe rembiereco setá catu vahesa rupi-rupi pe pihañemoñeta yepi” ehi.

Peyemoingatu Tūpa Rahir yevi água

³⁵ “Peyemoingatu tupri che yevi água. Inungar tataendi ndogüei vahe, pemboyecua tupriño ité che recocuer pe recocuer pipe ava upe.

³⁶ Peico imboacuapri güerecuar osãro vahe nungar mendasa sui iyevisse, oquenda imotase, omboi voi vahe yuvireco chupe.

³⁷ Aviye itera serecuar upe osepiase iyemoingatu voi; evocoiyase serecuar ae niha ihañecora sese, omboguapira mesave imbocarua.

³⁸ Yepi serecuar oyepotara pītu mbiter ou viña, anise añihiveive, ahe rumo osãroño itera chupe imboi água yuvireco. Evocoiyase serecuar aviye ai etera chupe.

³⁹ Peyapisaca tupri co rese: acói oi yar oicuae mbahe hora imonda vahe yepota água, ahese opitara imonda vahe rãro güëta pipe sui mbahe renoseñhi água.

⁴⁰ Ēgüe peye aveira peyemoingatu che yevi água. Esepia niha, che, Ava Riquehir, aporoesapiha tēira vītu curi” ehi Jesús viroyasareta upe.

Mbiguai omboaviye vahe ocuaita iyavei nomboaviyei vahe

⁴¹ Evocoiyase Pedro oporandu Jesús upe aipo ehi:

—Che Yar, ¿oreuñomi pīha eremombehu co porombohesa eremboyoya vahe ambuae mbahe rese, opacatu upe tie? —ehi.

⁴² Evocoiyase omboyevi Pedro upe aipo ehi: “Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseya icuaitarã güëta

pipendar rese hañeco ãgua ‘tembihu tomondo che rêta pipendar upe che porocuita rupi’ ohesave.

⁴³ Acoi omboaviyese ocuaita, ahese oviharetera güerecuar yevise.

⁴⁴ Supi eté niha, serecuar oyocuita opacatu ombahe rese hañeco ãgua.

⁴⁵ Ahe mbiguai rumo ‘ndoyepota víteí chira revo che rerecuar’ oya omboetasa cuimbahe iyavei cuña omboipi mara-mara tēi sereco iyavei ocaru, oihu tēi osavaipo-ipoño avei oico.

⁴⁶ Ipare rumo serecuar oyepotara imahemohaēhiseve; ahese omombaraisu catura inupa sereco, inungar acoi ndiporeroyai vahe rerecosa yepi” ehi.

⁴⁷ “Acoi mbiguai oicua tēise mbahe güerecuar remimbotar, noyemoingatuisse rumo iyavei ndoviroyaise oico, ahe evocoiyase serecuar oinupara.

⁴⁸ Acoi mbiguai nomboaviyei vahe ocuaita icua tupriēhisa pipe, nañemoirosa rutei chira chupe. Esepia niha, acoi imondosa catu vahe icuaitarā, porandusa catura chupe. Acoi oyeroya catu vahe, oporandu catu aveira sese” ehi.

Jesús reroyasa pipe sui oimera yeamotarēhisa

⁴⁹ “Che ayu tata nungar yavai vahe reru ãgua co ivi pipendar upe ‘iyoandu tarahu yuvireco cute viña!’ viya.

⁵⁰ Aique ranera rumo mbahe tēi che recoãhasa pipe, iēgüe ahera che paradisú itera imboaviye ãgua!

⁵¹ ‘Mbahe tupri ai revo güeru co ivi pipe’ ndapeyei chira cheu. Ēgüe ehi rumo che ayu che sui ava yeamotarēhi ãgua.

⁵² Esepia niha, co pipe suive ité que poyandepo tupri revo oñemu yuvirecoi vahe amove oyeamotarēhira yuvireco che recocuer sui: mbosapi oyamotarēhira ñuvirío vahe, ñuvirío vahe evocoiyase oyamotarēhira mbosapi vahe yuvireco.

⁵³ Que ava oyamotarēhira guahir, anise tahir evocoiyase oyamotarēhira vu; cuña oyamotarēhira omembri, imembri evocoiyase oyamotarēhira osi; sovayar oyamotarēhira vovayar” ehi güemimbohe upe.

Iva pendar poromondiisa mboyecuaasa

⁵⁴ Ipare Jesús aipo ehi ava rehi upe: “Pe pesepiase mbahe pítu ari sosa coti sui opūhase, ahese, ‘Oquirá’ peye. Ēgüe ehi eté oqui.

⁵⁵ Iyavei acoi ivitu oipeyuse irohi coti sui, ahese, ‘Sacú iteangara’ peye. Ipare ēgüe ehi eté.

⁵⁶ ¡Pe Tūpa reroyasar angahu tēi peico vahe! Pe niha peicua mbahe iva rese oyecua vahe tēi iyavei ivi rese mbahe oyecua vahe tēi mombehu, ¡mahera ru ndapeicuai peyeupe mbahe cūrítei oime vahe rā mombehu peico!” ehi.

Peñero pe amotarēhimbar upe

⁵⁷ “¿Mahera napesāha ranei pe ae ité co mbahe supi eté vahe?”

⁵⁸ Acoi que ava nde amotarēhisar nde soho ucase nde mondo ãgua mborerecuar rovai, emoingatu tupri voi mbahe eico chupe tenondeve nde rerasoēhi ãgua sovai; anise, mborerecuar nde mondora ava naporai vahe rarōsar upe. Ahe evocoiyase nde roquendará.

⁵⁹ Supi eté nderesēi chietera acoi eremboepipase voi eté eresēra ichui” ehi ava rehi upe.

13

Aviye catu ité yañecuñaro

¹ Ahe pipeve avei yuviraso ava Jesús repia. Ahese omombehu Pilato mbia Galilea pendar yuca uca agüer: Ahe mbia viropovēhese mbahe mimba yucapri yuvireco chupe. Ahe suvi oyeseha mbahe mimba ruvi rese.

² Ipare Jesús aipo ehi chupe: “Pemoha co pe: Mbahe tēi oime vahe evocoi mbia Galilea pendar upe, yangaipa guasu catu rese ambuae güecua pendar sui ēgüe ehi mbahe chupe viña.

³ ¡Aní rumo! Acoi ndapemboasiise pe angaipa Tūpa upe pe yevi ãgua, pe avei opara pecañi tēi.

⁴ Peroya avei acoi ava dieciocho tupri yuvirecoi vahe omanopase Siloé torre oviapise iharive, ‘Ahe yangaipa catu yuvireco ambuae ava Jerusalén pipendar sui’ peye viña no.

⁵ Aní rumo; acoi ndapemboasiise pe angaipa Tūpa upe peyevi ãgua, pe avei opara pecañi tēi” ehi.

Yembohesa ivira higuera ndihai vahe resendar

⁶ Evocoiyase Jesús omombehu mbahe omboyoya oporombohe ambuae mbahe rese aipo ehi: “Oime mbia vireco vahe ivira higuera oco pipe. Setá ari ahe oso sepia ‘¿iha pñha?’ oyapave. Ndosecai eté rumo iha sese.

⁷ Ahese aipo ehi mbia oco rãrosar upe: ‘Esendu, che ayu pihî tēi higuera ha reca mbosapî araviter rupi. Ndasepiai eté rumo que ñepeî iha sese yepî’ ehi. ‘Eyasiapa; ndiyai ihâi tupri tēi cohave’ ehi.

⁸ Ico rarõsar rumo omboyevî chupe aipo ehi: ‘Che rerecuar, êgũe tehiño vite tēi rane co araviter; amonguhira ivî chupe. Ipare amondora ivî sũ vahe mbahe repochi resendar sese.

⁹ Ahese revo ambuae araviter ihara cute; anise ité rumo, ereyasia ucaño itera’ ehi ico rãrosar güerecuar upe” ehi Jesús ava mbohe.

Jesús ombogüera cuña oyecuhapami vahe mbituhusa ari pipe

¹⁰ Ñepeî mbituhusa ari pipe Jesús oporombohe judío tũparo pipe.

¹¹ Aheve oime cuña imbaheasi vahe, dieciocho araviter rupi ahe mbaherasisa vireco, carugar tēi omboyepami uca sereco. Sese ndoicatui opũha tupri uguata.

¹² Osepiase rumo Jesús, “Erió” ehi chupe.

—Cuña, cũritei nanembaheasi iri eico cute —ehi.

¹³ Evocoyase omondose opo sese, aheseve voi cuña oyemohivi. Ipare omboetei Tũpa oico.

¹⁴ Judío tũparo rerecuar rumo oñemoiro ahe cuña mbogüera rese mbituhusa ari pipe. Sese aipo ehi ava eta upe:

—Oime niha seis ari mboraviqui água; ahe ari pipe peyura peposano água, ndahei chira mbituhusa ari pipe —ehi.

¹⁵ Evocoyase ahe mbia upe omboyevî aipo ehi:

—Pe Tũpa reroyasar angahu tēi peico vahe, ¿nomboihui vo pe pãhu pendar acoi güeimba tivî iyaveî guaricu mbituhusa ari pipe yuvireco yepî no?

¹⁶ Co rumo cuña, Abraham suindar Carugar omombaheasi vahe dieciocho araviter suive sereco, ¿ndiyai eté pĩha evocoyase imbogüera mbituhusa ari pipe? —ehi tũparo pendar rerecuar upe.

¹⁷ Aipo ehise, opacatu yamotarẽhisar yuvinochi tēi yuvireco ichui. Ambuae ava rumo oyembovihaño opacatu Jesús rembiapo osepiase yuvireco.

Yembohesa mostaza rãhiî suindar

¹⁸ Evocoyase Jesús aipo ehi avei: “¿Mbahe nungar pĩha Tũpa povri pendar, iyavei mbahe rese vo amboyoyara?

¹⁹ Oyoya tupri ité mostaza rãhiî rese, inungar acoi mbia oñoti vahe oco pipe. Ichui ocuacua, tuvichá iteanga. Ahe sãca rese vĩrai rehî oyapo guaitirã” ehi oporombohe.

Yembohesa pan mboapeposa sui

²⁰ Evocoyase Jesús aipo ehi iri: “¿Mbahe rese pĩha amboyoyara Tũpa povri pendar?

²¹ Oyoya tupri co pan mboapeposa rese, acoi cuña omboyeseha tupri vahe mbosapî sãhambri trigo cuhi rese opacatu imboapepo água yepî” ehi oporombohe.

Jesús peri icãhimi vahe nungar

²² Ipare Jesús osoño Jerusalén ve, opita-pita tecua yacatu rupi oporombohe oico.

²³ Ahe supî ichose, ñepeî mbia oporandu chupe aipo ehi:

—Che Yar, ¿supî eté pĩha moviromi tēi ava oñepisirora yuvireco? —ehi.

Ahe evocoyase omboyevî chupe:

²⁴ —Peyemoviracua tupri catu peique água oquendipi cãhimi rupi. Esepia niha, supî eté setá ava osãha tẽira yuviroique vahe rã ahe oquenda rupi yuvireco viña, ndoyuviroique catui chira rumo yuvireco.

²⁵ Supî eté ahe inungar oi yar ouse oquenda mboya viña. Amove ava evocoyase ocarve yuvireco vite vahe omota tẽira oquenda, ‘Ore yar, emboimi tēi oreu’ ehi tẽira yuvireco. Ahe rumo aipo ehĩora chupe: ‘Aní, ndopocuai vahe rumo pe’ ehĩora chupe.

²⁶ Evocoyase ahe aipo ehi tẽira yuvireco: ‘Ore niha orocarua vahe, oroihu vahe nde piri, iyavei ore mbohe ore rocar rupi eve yepî’ ehi tẽira yuvireco chupe.

²⁷ Ahe rumo aipo ehira: ‘Ñepeî reseve niha acoi, Ndococuai vahe, ahe pẽu. ¡Pesiri che sui, pe opacatu mbahe-mbahe tēi aposar!’ ehĩora chupe.

²⁸ Pe rumo imoboprira pe recouer Tũpa povri sui, sese peyaseho tẽira, peyemoaitere tẽira peico pesepiase Abraham, Isaac, Jacob iyavei opacatu Tũpa ñehe mombehusareta yuvirecoise Tũpa povri ve ivave.

²⁹ Iyavei ava yugüerura añihivei coti sui, caharu coti sui, norte coti sui iyavei irohî coti sui, ahe evocoyase yuviroguapira ocaru Tũpa mborerecuasave ipiri yuvireco.

³⁰ Supî eté amove ava ndoyavii ipa tēi vahe seique água ivave Tũpa piri viña, ahe ranengatu rumo yuviroiqueño itera ipipe iyavei amove ava tenonde catu vahe ndoyavii ahe rane oique vahe rã ivave viña. Ahe rumo ipa tēi yuviroiquera —ehi Jesús ava rehii upe.

Jesús oyaseho Jerusalén pendar rese

³¹ Ahe ari pipe oyepota moviro fariseo aipo ehi tēi Jesús upe yuvireco:

—Eyepepiño ave sui. Esepia, Herodes niha nde yuca pota oico —ehi tēi yuvireco chupe.

³² Ahe rumo,

—Peso, tapemombehu aipo mbia aguara nungar tēi upe: ‘Esepia, co pipe iyavei ayihive amboyepepiñora ava sui carugareta vichico, ambogüerañora ava imbaherasisa sui, curi ayihive evocoyase amombara che cuaita’ peyera.

³³ Che rumo aporaviquiño itera co pipe, ayihive iyavei curi ayihive vichico. Ipare asora Jerusalén ve. Esepia niha, ndiyai Tüpa ñehe mombehusar omano co coti tēi Jerusalén sui yuvireco —ehi.

³⁴ “¡Too rutei pe Jerusalén pendar, peyuca vahe Tüpa ñehe mombehusar, iyavei ita pipe peyapi-yapi ava Tüpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembrí opepovrive, ñgüe ahe pota tēi pe rereco viña, pe rumo ndapeipotai eté!

³⁵ Sese seyapirã tēi peicora. Iyavei ndache repiai chiaveira peye acoi, ‘Imboeteipri Yar remimbou tasecoi’ peyese voi che repia irira peye” ehi Jerusalén pendar upe.

14*Jesús ombogüera mbia iruru sui*

¹ Ñepeí mbituhusa ari pipe Jesús oso ocaru mborerecuar fariseo rētave. Aheve ambuae fariseo eta oiviro yuvireco.

² Aheve avei mbia iruru vahe secói.

³ Evocoyase Jesús oporandu Moisés porocuita rese oporombohe vahe upe iyavei fariseo eta upe avei aipo ehi:

—¿Ipotasa vo mbituhusa ari pipe imbaheasi vahe mbogüera ñgua; aní tie? —ehi.

⁴ Ahe rumo noñeheño yuvireco chupe. Aheve ahe opoco imbaheasi vahe rese, ombogüera. Ipare, “Eso tupriño” ehi chupe.

⁵ Fariseo eta upe evocoyase aipo ehi:

—¿Ava pñha pe pñhu pendar novinose voi chira güeimba guaricu, anise tiví oviapise ivicuar pipe mbituhusa ari pipe viña? —ehi.

⁶ Aheve nombovevi catui eté ñehe yuvireco chupe.

Jesús ombohe mendasave ichohopri yuvireco

⁷ Ava ichohopri oiporavo-ravo güenara imboyeroyapri catu vahe mesave oyeupe nara yuvireco. Ahe sepiase aipo ehi Jesús imboaracua:

⁸ —Acoi que yande soho ucasa mendasa pietasave yuvireco, ndayaguapii chira ava imboeteipri catu vahe renda harive. Esepia, aviyeteramo que ambuae ava ichohopri oyepotara yande sui imboeteipri catu vahe yuvireco.

⁹ Ipare yande soho ucasar aipo ehira yandeu: ‘Epñha evocoi sui, co mbia toguapi eipeve’ ehira yandeu. Evocoyase yande yachí tēira yaso ipami tēi yaguapi.

¹⁰ Yande soho ucasa rumo yuvireco, yaguapira evocoyase ipa; yande soho ucasar ouse, aipo ehira yandeu: ‘Mbori, erio cohava tenda imboeteipri catu vahesave ore piri’ ehira. Ñgüe yahera imboeteipri yaico acoi ava yuviroguapi vahe rovaque yande piri.

¹¹ Esepia niha, acoi ava oyemboivate ai vahe opara seco reroyisa; acoi ava seco mbegüe vahe rumo, ahe seco mboivate catusara curi —ehi.

¹² Ipare aipo ehi avei ichohosar upe:

—Ereyapo potase pieta, ndereicho ucai chira nde mboripar, que nde rivri, que nde mu iyavei que nde rēta cotindar imbahe eta vahe. Esepia niha, ahe ombovevira ndeu, nde soho ucara oyepiri yuvireco; ñgüe ehira evocoyase mbahe imbovevira yuvireco ndeu.

¹³ Ereyapose rumo pieta, ereichocho ucara ava iparaisu vahe, ava ipo ichutu vahe, anise ipi chutu vahe, ipãri-pãri vahe, ndasesapiso vahe avei.

¹⁴ Esepia niha, ahe ndoicatui mbahe mbovevi yuvireco ndeu. Opase rumo ocuerayevi ava secó catupri vahe yuvireco, aheve ereviharera eico. Esepia, ereipsisira mbahe aviye vahe Tüpa suindar —ehi.

Jesús oporombohe carusa rese

¹⁵ Ñehe renduse rumo, ñepeí mbia yuviroguapi vahe mesave, ahe aipo ehi Jesús upe:

—¡Sovasapri catu ava Tüpa piri ocaru vahe imborerecuasave! —ehi.

¹⁶ Evocoyase aipo ehi ahe mbia upe:

—Oime mbia oyapo vahe carusa guasu, oichocho uca ava setá oyepiri.

¹⁷ Ipare oyepotase ari caru ñgua, aheve aipo ehi güembiguai mondo: ‘Toyugüerupa che piri ichohopri. Esepia niha, mbahe opa oingatu cute’ ehi.

¹⁸ Opacatu rumo ava, 'Eñemosañomi tēi cheu' ehi pāve yuvireco. Yipindar mbia aipo ehi: 'Che rumo arocua ivi; iya ité aso sepia. Sese eñemosañomi cheu' ehi chupe.

¹⁹ Ambuae mbia aipo ehi: 'Che arocua ramo diez tupri tiví, ahe asāha ranera. Sese eñemosañomi cheu' ehi chupe.

²⁰ Ambuae aipo ehi no: 'Che amenda ramomi vichico. Sese tēi ndasoi chira' ehi.

²¹ Oyevisē mbiguai, opa tupri omombehu mbahe güerecuar upe. Ahese serecuar aipo ehi oñemoirosa pipe güembiguai upe: 'Eso voi evocoiyase opacatu ocar rupi. Supi sui eru ava iparaisumi vahe, que ava ipo chutu vahe, anise ipi chutu vahe, que ndasesapisoi vahe, anise que ava ipāri-pāri vahe avei no' ehi.

²² Coiye ava reru pare aipo ehi mbiguai güerecuar upe: 'Che rerecuar, aroya ité nde che cuaita; ipane vite rumo ava' ehi.

²³ Evocoiyase aipo ehi güembiguai upe: 'Eguata iri ambuae peri tecua ivirindar rupi avei toyugüerumi che rētava yuvireco che piri, tomboapipopa ité che rēta yuvireco' ehi.

²⁴ 'Esepia niha, acoi yipindar ava aichoho uca vahe ndipoi chietera que ñepeí ocaru vaheṛā che piri' ehi güembiguai upe —ehi Jesús ahe mbia mbohe.

Yavai Cristo rupi guata āgua

²⁵ Ava rehii Jesús raquicuei oguata yuvireco. Sese ahe oyemboyere aipo ehi ava upe:

²⁶ 'Acoi oimese que ava oipota vahe che rupi oguata āgua, tache raisu catu que ambuae ava sui, que oyesupa, osi, güembireco, guahireta, vīvireta iyavei güeindireta sui, oyesui avei. Ēgüe ndehise, evocoiyase ndiyai chupe che remimbohe seco āgua.

²⁷ Iyavei que ava noñemosañomi vahe mbahe-mbahe tēi upe oiporarase ari yacatu rupi inungar-ra ocurusu rese ovosii vahe viña che rupi oguata āgua, ahe chupe ndiyai che remimbohe seco āgua' ehi.

²⁸ 'Que ava pe pāhu pendar omopuha potase oi, ¿ndoyapisaca ranei chira '¿amomba angara pīha?' oyapave?

²⁹ Esepia niha, omondose oi renara yipindar. Ipare rumo nomboaviye catuise, ahese opacatu ava sepiase viroñora

³⁰ aipo ehira yuvireco: 'Aye evocoi mbia omopuha pota tēi oi viña, ndoicatui eté rumo imboaviye' ehira yuvireco chupe.

³¹ Iyavei que mborerecuar guasu diez mil sundao vireco vahe oyepeí potase ambuae mborerecuar veinte mil ava vireco vahe sui, oyapisaca ranera yipindar icua tupri āgua '¿yiacatura pīha setá catu vahe rese yavava?' ohesave.

³² Esepia, ndoicatuisse, evocoiyase ambuae mborerecuar guasu amombri vite secoise, omondora mbahe mombehúsar mbahe tupri rese porandu āgua chupe.

³³ Ēgüe ehi avei pe recocuer ndapeseya potaise pe mbahe opacatu, ēgüe ehi vahe ndahei eté che remimbohe" ehi.

Yande recocuer inungar yucri

³⁴ 'Yucri aviye vahe ité yandeu; nashe irise rumo, ndayaicatui chietera imoehe iri āgua.

³⁵ Naporai eté ivi upe nara; ndiyai avei ivi mbahe repochi resendar rese oyeseha vaheṛā. Evocoiyase ahe imombopri tēi vaheṛā. Sese aipo ahe acoi ava oyapisaca pota vahe, toyapisacañomi" ehi.

15

Porombohesa ovesa ocañi tēi vahe resendar

¹ Opacatu ava sui guarepochi reroquasar yuvirecoi vahe iyavei ava eta yangaipa guasu vahe, oyemboya Jesús rese iñehe rendu āgua yuvireco.

² Sese fariseo yuvirecoi vahe iyavei Moisés porocuita rese oporombohe vahe yuvireco, ahe oviroiro tēi yuvireco aipo ehi:

—Co mbia ombori pota rai ava yangaipa guasu vahe tēi oico yepi, ocaru avei ipāhuve no —ehi.

³ Evocoiyase Jesús omombehu ovesa resendar yembohesa:

⁴ 'Que ñepeí pe pāhuve virecose cien ovesa güeimba, ipare co ocañira ñepeí ichui viña, oseya ranera evocoiyase evocoi noventa y nueve tēi aviye vahesave seco āgua. Ipare oyevíra ocañi vahe reca oso, oyosu rane itera viña.

⁵ Oyosuse, osupira oachihive vorivetesá pipe.

⁶ Ipare oyeopotase güetave, omonuhara omboripareta, ocotindareta avei no. Ipare aipo ehira chupe: 'Yayembovihara che piri. Esepia niha, ayosu ité ovesa ocañi vahecuer cute' ehira.

⁷ Supi eté ēgüe ehi aveira oime torivetesá guasu catu ivave acoi ñepeí ava yangaipa guasu vahe oñecufiarose güecocueraí sui noventa y nueve yuvirecoi tupri vahe sui yuvireco" ehi.

Yembohesa guarepochi ocañi vahe resendar

⁸ “Acoi que cuña omocañise ñepe guarepochi diez tupri vireco vahe sui, omoendira tataendi. Ipare osahuvara oi, oseca mbegüera, oyosu rane itera.

⁹ Evocoiyase oyosuse, omonuhara omboripareta, ocotindareta avei no chupe aipo ehira: ‘Yayembovichara che piri. Esepia niha, ayosu guarepochi che sui ocañi vahecuer cute’ ehira.

¹⁰ Supi eté egüe ehi aveira oime torivetesä Tüpa rembiguai i va pendar rehi upe que ñepeí ava yangaipa guasu vahe oñecuñarose güecocuerai sui” ehi.

Yembohesa mbia rahir ocañi vahe resendar

¹¹ Aipo ehi avei oporombohe: “Oime mbia vireco vahe ñuvirío guahir.

¹² Chihivahe catu vahe aipo ehi oyesupa upe: ‘Che ru, embou mbahe che mombahesa cheu’ ehi. Iyesupa evocoiyase omboyahó ombahe imondo chupe.

¹³ Ipare coiye catumi, omonuhapa opacatu ombahe. Ichui oso amombri ambuae tecuave. Aheve oguarepochi oiporupa tēi ombahe pota raisa pipe.

¹⁴ Acoi oiporupa tēise rumo opacatu ombahe, ahese oime tiavor ahe ivi rupi. Ahe evocoiyase ndasiepoi tēi oico.

¹⁵ Evocoiyase oso mboraviqui reca mbia piri aheve. Ahe mbia evocoiyase omondo ocove güeimba cuchi rāro āgua.

¹⁶ Aheve oyemohitaro pota tēi cuchi rembihu pipe oico viña. Ndiptoi eté rumo omondo vahe chupe.

¹⁷ Evocoiyase oyemomahenduha tēi güēta pendar oporaviqui vahe rese: ‘¡Che ru rētave oporaviqui vahe rumo co omoumbire guasu-guasú tēi güembihu yuvireco! ¡Che rumo che yuca pota tēi che rēporēhi che rereco cohavē!

¹⁸ Sese ayevíra che ru rētave. Aipo ahera chupe: Ayemboangaipa Tüpa rese, nde rese avei no.

¹⁹ Ahese che ndahe iri chira nde rahir nungar aico; iyacatu revo ndeu, oporaviqui vahe nungar tēi che rerecoñora eve, ahera’ ehi.

²⁰ Evocoiyase oyeví iri oso vu rētave cute.

“Amombri vitemi tahir recose rumo iparaisu catu chupe, oña voi oso guahir rovañchi, oyaco osovaupite avei.

²¹ Ahese tahir aipo ehi chupe: ‘Che ru, ayemboangaipa Tüpa rese, nde rese avei; ndiya iri nde rahir che reco āgua’ ehi.

²² Tu rumo aipo ehi güembiguaí upe: ‘Peso, taperumi avíye catu vahe turucuar pemboyemonde, pemonde avei cuā penda sese, pitaquí avei.

²³ Iyaveí guaca iquira catu vahe peyuca. ¡Yayapora pieta guasu!’ ehi.

²⁴ Esepia, co che rahir avíye omano vahe secoi viña, cūrítei rumo oyeví iri cheu’ ehi. Egüe ehi opacatu sorivete yuvireco pieta apo.

²⁵ “Tahir cuacua catu vahe rumo ocove vite secoi. Oyevíse ou güēta rerovicave, osendu voi ipieta guasu vahe yuvireco.

²⁶ Evocoiyase oporandu mbiguai upe mbahe oime vahe rese.

²⁷ ‘Nde rivri mo co oyeví tupri iri ou. Sese nde ru oyuca uca guaca iquira vahe iyevisa resendar’ ehiño.

²⁸ Evocoiyase tiqehir oñemoirosa pipe, ndoique potai oyesupa uve oi pipe; tu rumo osēño ité ocarve ‘eique’ oya chupe.

²⁹ Evocoiyase tahir omboyevi chupe aipo ehi: ‘Che niha setá araviter rupi oropitivií vichico nde mboyeroyasave viña, nderemboumi eté rumo que mbahe cheu, que mbahe mimba angara viña che mboripar rese ore pieta āgua’ ehi vu upe.

³⁰ ‘Indó, cūrítei oypota ndeu nde rahir, omocañi tēi vahe nde guarepochi cuña ndipihai vahe rese tēi. Ahe eremboetei catú che sui; ereyuca uca rutei guaca iquira vahe chupe’ ehi.

³¹ “Evocoiyase tu: ‘Eyapísacaño, che rahir, nde niha nderesiríi vahe che sui. Opacatu che areco vahe rumo nde mbahe ité yepi.

³² Cūrítei rumo iyacatu ité yande rorivetesave yayapora pieta. Esepia, co nde rivri ocañi tēi vahecuer rese yamahe irí’ ehi guahir upe” ehi Jesús ava eta mbohe.

16*Mbahe yar mbahe rese ñangarecuar ndoyemboaracuai vahe resendar yembohesa*

¹ Jesús aipo ehi avei güemimbohe eta upe: “Oime mbia imbahe eta vahe. Ahe vireco mbia ombahe eta rese ñangarecuar. Ahe chupe ava yugüeru mbahe mocañi tēi agüer mombehu.

² Evocoiyase serecuar ñepe opitiviisar omondo seca, ahe güeruse, ‘¿Mbahe vo aipo ereyapo eico; ayandu cūrítei nde rerācuá? Emoingatupa tupri voiño nde poraviquisa resendar cheu’ ehi, ‘Nandehañeco iri chira cohavē mbahe rese cheu’ ehi, ‘Nandehañeco iri chira cohavē mbahe rese cheu’ ehi chupe.

³ Evocoiyase mbahe rese ñangarecuar: ‘¿Mara ahera pīha co evocoiyase vichico imombopri che recose che poraviquisa sui? Ndareco iri rumo pīratasa cheyese ivi rese che poraviqui āgua. Achī eteanga aveira rumo mbahe rese che porandu āgua’ ehi tēi.

⁴ ‘Aicua rumo cute mara ahera vichico: che poraviquisa sui opa che momboise, oimera che pisi tupri vaherā oyepiri’ ehi.

⁵ Evocoiyase oñehe ñepeí-peí güerecuar sui mbahe vinose tēi vahe rese chupe. Yipindar vahe upe oporandu: ‘¿Mbovi mbahe erenose tēi yande rerecuar sui?’ ehi.

⁶ ‘Cien tupri chereve aceite siru tuvichagüe vahe rese’ ehi. Evocoiyase, ‘Eguapiru, co oime cuachiar sesendar nde yecuachía agüer. Emondoro, eyapo iri ambuae cincuenta rupindar año’ ehi chupe.

⁷ Ichui ambuae mbahe vinose tēi vahe upe oporandu no: ‘¿Mbovi mbahe vo erenose tēi yande rerecuar sui?’ ‘Cuatro ciento quintar rupindar’ ehi. Evocoiyase, ‘Co oime cuachiar sesendar. Yaicuachiaro rumo tresciento veinte quintar rupindar’ ehi.

⁸ Evocoiyase serecuar oyanduse, ‘Too, oicua ité mbahe apo’ ehi ombopasa rese ombahe rese ñangarecuarer ndipihai vahe upe. Esepia, ahe oyemoingatu voi oyeupe mbahe moingatu āgua. Supi eté ava ndoicuai vahe Tüpa oicua catu mbahe moingatu āgua oyeupe Tüpa reroiyasar sui.

⁹ “Sese che aipo ahe pēu: peiporu pe guarepochi pereco vahe co ivi pipe pe mboripar reime āgua. Ichui opa tēise pe guarepochi, oimera pe pisi vaherā teco apirēhisave.

¹⁰ “Acoi ava mbahe tupri chíhi oyapo vahe, ahe oyapo tupri catura mbahe tuvichá vahe. Iyavei acoi ēgüe ndehi vahe chíhi vahe rese, ēgüe ndehi chiveira mbahe tuvichá vahe rese.

¹¹ Evocoiyase ndapemboaviyese co ivi pipendar pe cuaita guarepochi rese, ahese ndaperecoi chira ivave mbahe rese hañeco āgua.

¹² Iyavei acoi ndapemboaviye tupriise pe cuaita ambuae ava mbahe rāro pipe, ¿ava pīha evocoiyase omondora pe mbahe ité pēu viña?

¹³ “Iyavei ndipoi chiyetera ñepeí mbiguaí omboyeroya vahe ñuvirío güerecuar. Esepia, ñepeí osaisu catura imboyeroya pipe, ambuae evocoiyase ndoyambotai chira imboyeroya potaēhisa pipe. Ēgüe peye avei ndapeicatui Tüpa mboyeroya guarepochi pota raisa pipe” ehi güemimbohe eta upe.

¹⁴ Aipo ñehesa renduse, fariseo yuvirecoi vahe oguarepochi raisusa pipe oviroiro yuvireco.

¹⁵ Evocoiyase aipo ehi fariseo eta upe: “Pe co ava rembiepiave pe recocuer aviye angahu pe reco viña. Tüpa rumo oicua opacatu pe pihañemoñetasa. Esepia, yepe ava rovaque ndoyavií aviye ai vahe pe recocuer viña, Tüpa uve rumo mbahe tēi eté” ehi.

Mborocuita iyavei Tüpa mborerecuasa rese ñehesa

¹⁶ “Yipisuive Moisés porocuita iyavei Tüpa ñehe mombehusar porombohesa Juan recosa rupive opa. Ichuive tupri ité rumo imombehusa ñehesa aviye vahe Tüpa mborerecuasa resendar, sese ava iquerēhi catu cūrítei aheve yuviroique vaherā.

¹⁷ “Yavai catura que ñepeí Tüpa porocuita mboaviyēhi āgua co iva, ivi opa vaherā sui” ehi.

Jesús oporombohe mendasa sui poiēhi āgua

¹⁸ “Acoi opoi vahe güembireco sui, omendase ambuae cuña rese, ahe oyemboaguasa tēi vahe. Iyavei acoi omendase cuña omenda vahecuer rese tēi, oyemboaguasa tēi vahe avei” ehi Jesús.

Ava mbahe yar iyavei Lázaro

¹⁹ “Iyavei oime mbía mbahe yar, ahe oyemonde turucuar aviye vahe pipe oyemboetei eteanga, iyavei ari yacatu oyapo pieta opacatu mbahe rese oyemboetei aisa pipe.

²⁰ Oime avei mbía iparaisu ité vahe Lázaro serer vahe. Ahe mbía icaracha ati vahe imboguapisa ivive imoi mbahe yar roquendipive.

²¹ Co mbía iparaisu catu vahe aipo ehi oyeupe, ‘Tomboumi tēi que güembihu rahicuer oviapi vahe mesa sui’ ehi mbahe yar upe viña. Aheve mbahe yar reimba cave oyemboya sese, icaracha osere yuvireco.

²² Omanose co mbía iparaisu vahe, ahese Tüpa rembiguai eta oviraso yuvireco Abraham piri ivave. Mbahe yar avei omano, opa oñoti yuvireco.

²³ “Ahese oso Tüpa ñemoirosave. Aheve oparaisuse, omahe ivate coti, osepia amombri aracahendar Abraham Lázaro reseve.

²⁴ Evocoiyase osapucái pīrata: ‘¡Che ramoí Abraham, che paraisuerecomi tēi eve! Emboumi tēi Lázaro che āpecu morohisa āgua ive ocuā pipe. Esepia, che paraisu etepri co tata pīratagüer pipe vitu’ ehi.

²⁵ Evocoiyase Abraham omboyeví aipo ehi chupe: ‘Che rumino, ndemahenduha eipeve nde reco agüer rese nipaneise mbahe ndeu nde recove pipe. Lázaro rumo iparaisumi tēi oico’ ehi. ‘Cūritei rumo Lázaro oviharete oico cohave, nde evocoiyase nde paraisu eipeve eico.

²⁶ Iyavei oime co ivicuar ipicucu vahe rasaēhi āgua oreu iyavei pēu no’ ehi.

²⁷ “Ahe mbia aipo ehi: ‘Che ramoi Abraham, emondomi tēi Lázaro

²⁸ che rivri poyandepo vahe upe, chupe iñehe āgua. Ahe tosecuñaro güecocuer yugüeruēhi āgua co tecocuer mbahe tēisave’ ehi.

²⁹ Abraham rumo, ‘Vireco niha Moisés porocuita iyavei Tūpa ñehe mombehúsar rembicuachiagüer yuvireco. ¡Ahe tovíroya yuvireco!’ ehiño chupe.

³⁰ Evocoiyase, ‘Taa, che ramoi Abraham, que omano vahecuer pāhu pendar rumo yuvirasose chupe, ahe evocoiyase omoingatura güecocuer yuvireco viña’ ehi.

³¹ Abraham rumo aipo ehi chupe: ‘Acoi ndoyapisaca potaise Moisés porocuita rese iyavei ambuae Tūpa ñehe mombehúsar remimombehu rese no, ndovíroyai chiveira que ava omano vahecuer ocuerayevise yuvireco’ ehi Abraham ava mbahe yar upe” ehi.

17

Iparaisu itera ava oporomboangaipa uca vahe

¹ Jesús aipo ehi güemimbohe eta upe: “Oimeño itera poroãtoisa che reroyasar reiti āgua. ¡Ahe imboangaipa ucasar rumo iparaisu itera!

² Iyacatu evocoi nungar ava ñapichisa ita mbahe mbocuhisa iyeseho rese para guasu pipe imombo āgua chīhivahemi nungar mboangaipa uca rāgüer sui.

³ ¡Sese peñearo tupri!

“Acoi nde mboetasa Tūpa reroyasar oyemboangaipase, pemboaracuara. Omboasi pare oyevise güecocuer tupri pipe, ahese peñerora chupe.

⁴ Supi eté acoi que ambuae ava pe amotarēhi viteso rumo siete yupagüer ñepeí arí pipe, acoi ouse pēu siete yupagüer avei, ‘Ēgüe ndahe iri chira’ ehise, peñero chupe” ehi Jesús güemimbohe upe.

Yayeroyase Tūpa rese oime pīratasa

⁵ Co doce tupri apóstol aipo ehi chupe:

—Emboumi oreu Tūpa rese ore yeroya catu āgua —ehi yuvireco chupe.

⁶ Evocoiyase yande Yar omboyeví chupe:

—Supi eté, Tūpa rese pe yeroyasa, yepe ndoyavii chira mostaza rāhii tahimi vahe viña, co ivira tuvicha vahe upe rumo, ‘EYeapoho ave sui. Eso eñeñeti para guasu aviterve’ peyese Tūpa rese pe yeroyasa pipe, ahe evocoiyase pe mboyeroya itera —ehi.

Ambuae ava rese hañecosar cuaita

⁷ “Inungar que pe pāhu pendar virecora güembiguai oporaviqui vahe ivi mboyere cove, anise que guaca rāro yuvi rupi viña; ichui iyevise, ¿‘Eique, eguapi terecaru’ ehira pīha serecaru chupe?

⁸ Aní eté, ahe rumo aipo ehiñora chupe: ‘Emoingatu voi mbahe che tohu, che toihurá avei. Ipare nde erecarura, ereihura’ ehira chupe.

⁹ ‘Aviye ndeu’ ndehi chietera icuai pare chupe.

¹⁰ Ēgüe peye avei mbiguai nungar pe opacatu Tūpa pe cuaitarā ombou vahe mboaviyere, ‘Yande niha mbiguai tēi yaico. Esepia, yande cuaita mboaviyesar tēi yaico’ peyeñora” ehi.

Jesús ombogüera diez tupri ava lepra pipe imbaheasi vahe

¹¹ Ososo Jesús Jerusalén ve, oguata ivi Samaria iyavei ivi Galilea rupi.

¹² Oyepotase tecuamive oso, ahese yuvínose diez ava lepra pipe imbaheasi vahe yuvireco chupe. Amombrive rumo opitaño yuvireco ichui.

¹³ Osapucái yuvireco chupe aipo ehi:

—¡Jesús, Porombohesar, ore paraisuerecomi tēi eve! —ehi.

¹⁴ Sepiase aipo ehi lepra vireco vahe upe:

—Peyevi, peso, tapeyemboyecua pahi eta yuvirecoi vahe upe —ehi.

Oyevise rumo yuvirasos, opa ocuera tupri ombaherasisa sui yuvireco.

¹⁵⁻¹⁶ Evocoiyase ñepeí ipāhu pendar, Samaria pendar, osepiase ocuerasa, oyeví chupe osapucái pīrata Tūpa upe imboetisave. Oñenopiha oso sovai, oyaívi, “Aviye ndeu” ehi Jesús upe.

¹⁷ Evocoiyase ahe aipo ehi:

—¿Ndaheí vo acoi diez tupri opa ocuera ombaherasisa sui yuvireco? ¿Aique que ru ambuae nueve yuvirecoi vahe?

¹⁸ ¡Co mbia ambuae ivi pendar güeraño rumo oyeví ‘aviye ndeu’ ohesave Tūpa uve! —ehi.

¹⁹ Evocoiyase aipo ehi ahe mbia upe:

—Eñarapuha, eso tupriño. Nde poreroyasa pipe niha erecuera eico —ehi Jesús chupe.

Tüpa mborerecuasa yande pãhuve secoi

²⁰ Ñepeí ari pipe fariseo eta, “¿Marase vo aipo oura Tüpa omborerecuasa pipe mbahe moingatu água?” ehi Jesús upe yuvireco. Ahe omboyeveí chupe:

—Tüpa mborerecuasa ndahei acoi yasepia vahe.

²¹ ‘Co secói, aheve secói’ ndapeyeí chira chupe. Esepia, ahe oicove ité pe pãhuve —ehi fariseo eta upe.

²² Ipare aipo ehi güemimbohe eta upe:

—Oimera ari pe peipota tẽira aico vaheerã pe piri que ñepeí ari rupi che, Ava Riquehir, che recosa pipe; ndache repiai chira rumo peye.

²³ Iyavei ava, ‘Co secói, aheve aipo secói’ ehi tẽira yuvireco cheu. Ndapesaquicue moñai chira rumo.

²⁴ Esepia, inungar acoi overa vahe osesape guasu iva rese ocua yepi, êgüe ahera che, Ava Riquehir, vitu ari opupitise che yevi água curi.

²⁵ Yipindar rumo co ivi pipe che paraisu ranera ava cûriteindar mara-mara tẽi che rerecose yuvireco che repia potaêhisave.

²⁶ Inungar ava Noé recose yuvirecoi aracahe, êgüe ehi tupri aveira che, Ava Riquehir, yevi água renonde.

²⁷ Esepia, ocaru, oihu, omendaño avei yuvireco. Oyepotase rumo ari ipapapri amarusu viapi água, ahese Noé yuviroique arca pipe. Ambuae ava rumo opa ocañi tẽi yuvireco.

²⁸ Êgüe ehi avei aracahe Lot recose, ava ocaru tẽi, oihu tẽi, vïrocua tẽi mbahe omahera yuvireco iyavei mbahe mondosar tẽi, mbahe tïsar tẽi, oi aposar tẽi avei yuvirecoi oyapisacaêhisa pipe.

²⁹ Osêse rumo Lot tecua Sodoma sui, aviyeteramo tẽi oviapi tata amar nungar iva sui. Opa tupri oyuca ava rehi aracahe.

³⁰ Êgüe ahe aveira aviyeteramo tẽi che, Ava Riquehir, ayemboyeuara curi.

³¹ “Ahe ari pipe acoi ava güeta harive secói vahe, ahe toi que iri eme güeta pipe ombahe renose. Iyavei ava que rupi tẽi secói vahe, toyeveí iri eme güetave.

³² Sese peyemomahenduha co aracahendar Lot rembireco rese.

³³ Opacatu güecocuer osaisu vahe, ahe ocañi tẽira. Iyavei setecuer tẽi ocañi vahe, ahe rumo oñepisirora” ehi.

³⁴ “Ahe pitu pipe oimera que ñuvirio ava vupave yuviroque vahe yugüeru: ñepeí acoi che reroyasar serasosara, ambuae rumo opitara.

³⁵ Ahese avei ñuvirio cuña ohichora yuvireco: ñepeí serasosara, indugüer rumo opitara.

³⁶ Êgüe ehi aveira ñuvirio ava amombri güecua sui yuvirecoi vahe: ñepeí serasosara, indugüer rumo opitara” ehi.

³⁷ Aipo ñehesa renduse, oporandu yuvireco chupe:

—Ore Yar, ¿que vo aipo êgüe ehira mbahe curi? —ehi.

Ahe evocoiyase,

—Mbahe rehögüer reimesave uruvu oñemonuha atira yuvireco —ehi güemimbohe eta upe.

18

Jesús omboyoya yeruresa cuña imer mano vahecuer iyavei mborerecuar mbahe moingatusar recocuer rese

¹ Jesús omboyoya ambuae aia recocuer sui querêhisa pipe yerureño água ari yacatu rupi

² aipo ehi: “Ñepeí tecuave oime mbia mborerecuar mbahe moingatusar ndosiquiyei vahe Tüpa sui, ambuae ava sui avei.

³ Ahe tecuave avei oime cuña imer mano vahecuer. Ahe oso co mborerecuar rêtave, ‘Oime ava oyapo mbahe tẽi eté cheu, tomoepi cheu’ ehi chupe.

⁴ Yipindar rumo noipitívii potai. Coiye catu rumo cuña ombopihaviracua tẽise, ipihañemoñeta iri: ‘Yepe che ndasiquiyei vahe Tüpa sui, ava sui avei ndasiquiyei vahe ité,

⁵ amoingatuñora rumo mbahe co cuña che mañeco tẽisar upe. Ayapoñora semimbotar cheu iyu pihîhî água’ ehi opihañemoñetasave” ehi.

⁶ Ipare yande Yar aipo ehi: “Peyapisaca aipo mborerecuar naporai vahe ñehe rese.

⁷ Tüpa avei niha omoingatura mbahe güembiporavo oyeupe yeruresar ari, pitu rupindar upe yepi. Nosaro tẽi chiranera opitívii água yuvireco.

⁸ Supi eté Tüpa omoingatu voira mbahe aviye vahe yande porandusa pipe yandeu. Co rumo che, Ava Riquehir, ayevise co ivi pipe vitu, oimera ava moviromi tẽi oyeroya vite vahe che rese yuvireco” ehi Jesús.

Yembohesa fariseo sui iyavei guarepochi reroquasar sui

⁹ Ichui Jesús oporombohe iri ambuae ava recocuer rese. Esepia, oime amove ava aviye ai angahu seci oyeupe viña, iharive rumo viroiro ambuae ava.

¹⁰ “Ñuvirio ava yuviraso tūparove oyeroku. Ñepeí ava fariseo, ambuae evocoiyase ava sui guarepochi reroquasar.

¹¹ Evocoiyase fariseo oso tenonde ava rembiepiave oyeroku aipo ehi: ‘Tūpa, aviye ndeu, che ndahei ambuae ava nungar che recocuer; ndachemondai vahe, ndachereco rai vahe, ndacheaguasa-guasa tēi vahe. Iyavei ndahei eté che recocuer co mbia ava sui guarepochi reroquasar nungar tēi aico no.

¹² Iyavei ñuvirio yupagüer ñepeí semana pipe ayecuacu ité nde recocuer rese, iyavei ñepeí-peí cien guarepochi che poraviqui repri aipisi vahe sui amboyaho diez che porerocosa ndeu’ ehi.

¹³ Ava sui guarepochi reroquasar rumo opitaño amombri ichui. Aheve nomahai íva rese oyeroku ñgua oangaipa mboasisa pipe. Oyepochihanupa-nupa aipo ehi: ‘¡Tūpa, che paraisuerecomi eve, che angaipa viyar aico!’ ehi oyeroku” ehi.

¹⁴ “Sese aipo ahe pēu: co mbia ava sui guarepochi reroquasar opa oipisi ñerosa Tūpa suindar güetave oso. Fariseo rumo aní eté. Esepia niha, opacatu acoi oyemboivate ai vahe, opara seco reroysa. Acoi ava seco mbegüe vahe rumo seco mboivate catusara curi” ehi.

Jesús osovasa chihivahe eta

¹⁵ Iyavei chihivahe güeru Jesús uve yuvireco sovasapirā. Evocoiyase semimbohe osepiase yuvireco, “¿Mahera vo peruño tēi chihivahe?” ehi opihavíracuasa pipe serusar upe yuvireco.

¹⁶ Jesús rumo aipo ehi:

—¡Mahera ndapeipotai iyu ñgua! Toyugüeruño chihivahe cheu. Esepia, co chihivahe nungar ava yuviroiquera che Ru Tūpa povrire.

¹⁷ Supi eté acoi ndoipisii vahe che Ru Tūpa mborerecuasa chihivahe nungar yuvireco, ahe evocoiyase ndoyuviroiquei chietera ipipe —ehi.

Ñepeí mbia mborerecuar imbahe eta vahe omoñeta Jesús

¹⁸ Ñepeí mbia mborerecuar oporandu Jesús upe:

—Poroombohesar aviye vahe, ¿imbahe vo ayapora tecovesa apirēhi vahe rereco ñgua? —ehi.

¹⁹ Jesús evocoiyase aipo ehi ahe mbia upe:

—¿Mahera vo, “Aviye vahe” ere cheu? Oime rumo ñepeí aviye vahe ité, ahe Tūpa seci.

²⁰ Ereicua niha co porocuita aipo ehi vahe: ‘Nandeaguasai chira, ndereporoyucaí chira, nandemondai chira, nanderemirai chira ambuae ava rese, eremboyeroyara nde ru, nde si avei’ ehi vahe —ehi chupe.

²¹ Ahe mbia rumo,

—Che aipo nungar opacatu amboaviye ité che chihivahemi suive —ehiño chupe

²² Aipo ihese rumo,

—Ipane vite mbahe ndeu —ehi—. Emondopa rane nde mbahe, ahe sepri evocoiyase eremondora ava iparaisu vahe upe. Ichui ererectora mbahe aviye vahe ivave cute. Ipare ereguatara che rupi —ehi chupe.

²³ Aipo oyeupe hese rumo, ahe mbia ndoyembovihai tēi. Esepia niha, mbahe yar ité seci.

²⁴ Sese omahe aipo ehi:

—¡Yavai eté rumo ava mbahe yar reique ñgua che Ru Tūpa mborerecuasave! —ehi—.

²⁵ Yavai rai camello upe yucuar rupi seique ñgua; ava imbahe eta vahe upe rumo yavai catu che Ru mborerecuasave seique ñgua —ehi.

²⁶ —¿Ava angahu pñha evocoiyase oñepisirora yuvireco viña? —ehi sendusar chupe.

²⁷ Evocoiyase ahe chupe aipo ehi:

—Ava tēi upe mbahe yavai eté, Tūpa upe rumo ndayavaimi eté —ehi.

²⁸ Evocoiyase Pedro aipo ehi:

—Che Yar, ore rumo opa oroseya ore mbahe nde rupi ore guata ñgua —ehi chupe.

²⁹ Evocoiyase aipo ehi güemimbohe upe:

—Supi eté acoi oseya vahe que güeta, güembireco, viquehir, vivri, oyesupa, que guahir Tūpa mborerecuasa rese,

³⁰ ahe setá iteanga catu oipisira mbahe aviye catu vahe co ivi pipe oseya vahe sui. Ipare rumo tecua ambuaeve oipisi aveira tecovesa apirēhi vahe curi —ehi.

Jesús omombehu iri omano ñgua

³¹ Evocoiyase yande Yar opa viraso co cotimi doce güemimbohe. Aheve aipo ehi: “Cūrítei yasora tecua Jerusalén ve yaico, aheve omboaviyera co Tūpa ñehe mombehúsar rembicuachigüer co che, Ava Riquehir, resendar ñehesa.

³² Che imondopri aicora ndahei vahe yande mu upe mara-mara tēi che rereco āgua. Che reroiro-īrora iyavei ondivi-ndivira yuvireco che rese” ehi.

³³ “Iyavei che nupa-nupara. Ipare che yucara yuvireco. Imombosapisa ari pipe rumo acuerayevira omano vahe pāhu sui” ehi.

³⁴ Semimbohe rumo ndosenducuai eté iñehe yuvireco. Esepia niha, yavai eté senducua āgua yuvireco chupe.

Jesús ombogüera ñepe mbia ndasesapisoi vahe

³⁵ Evocoiyase Jesús ovirovise tecua Jericó oso, aheve mbia ndasesapisoi vahe oguapi oī peri popive porerecosa oyeupe mondo āgua rese.

³⁶ Osenduse ahe ndasesapisoi vahe ava rehii piambu, aheve, “¿Mbahe vo pēu?” ehi ava upe.

³⁷ Ahe evocoiyase, “Jesús, Nazaret pendar, ocuara co rupi” ehi yuvireco chupe.

³⁸ Evocoiyase ahe güendapeve oñehe pīrata:

—¡Jesús, David suindar, che paraisuerecomi tēi eve! —ehi chupe.

³⁹ Evocoiyase ava tenonde oguata vahe oyaca-yacaño, “Quiriri” ehi yuvireco chupe. Ahe rumo,

—¡David suindar, che paraisuerecomi tēi eve! —ehi pīrataño ité chupe.

⁴⁰ Evocoiyase Jesús opitase aheve, oyocuai ava seru āgua. Ovirovise seru yuvireco, aipo ehi ndasesapisoi vahe upe:

⁴¹ —¿Mbahe vo ereipota ayapo vahe rā ndeu? —ehi.

—Che Yar, che mbosarecomi tēira eve viña —ehi chupe.

⁴² —¡Esareco, erecuera niha! Esepia, ereyeroya ité che rese —ehi chupe.

⁴³ Ahe ramoseve ndasesapisoi vahe, osareco tupri ité; osoño ité Jesús rupi imboeteisave. Opacatu ava osepia vahe avei omboetei Tūpa yuvireco.

19

Zaqueo osepia pota Jesús

¹ Ichui Jesús oique tecua Jericó pipe oguata oico.

² Aheve mbia mbahe yar Zaqueo serer vahe secoi. Ahe ava sui guarepochi reroquasar rerecuar.

³ Osepia pota tēi Jesús ‘taicua ité’ oya viña. Ndoicatu rumo opucueñise ava rehii pāhuve sepiā āgua.

⁴ Evocoiyase ahe oña tenonde oso ‘tasepia ité’ oyapave, oyeupi ivira rese ivate oī senonera.

⁵ Evocoiyase oyepotase, omahe Zaqueo rese ivate chinise, aipo ehi chupe:

—Zaqueo, egüeyi poyava. Esepia, asora nde rētave nde piri —ehi.

⁶ Aipo oyeupe he ramoseve, Zaqueo ogüeyi voi vorivetesā pipe oipisi.

⁷ Sepiase rumo opacatu ava, “Yangai pa guasu vahe rētave tēi oso” ehi yuvireco chupe.

⁸ Evocoiyase Zaqueo opūha aipo ehi chupe:

—Che Yar, esendu rane, amboyaho tuprira che mbahe eta ava iparaisu vahe upe; mbahe añomi vahecuer avei, ayapirasa catu-catura irungatu rupi imboeyevī āgua —ehi chupe.

⁹ —Co pipe Tūpa oipisiro ité co mbia. Esepia, ahe niha Abraham suindar avei secoi.

¹⁰ Esepia, che, Ava Riquehir, ayu co ivi pipe ava ocañi tēi vahe pisiro āgua —ehi Jesús Zaqueo upe.

Guarepochi sui yembohesa

¹¹ Aipo ñehesa rendu viteseve, Jesús oporombohe ambuae tecocuer resendar rese. Esepia, virovī Jerusalén, “Oyepota voi etera revo Tūpa mborerecuasa” ehi ava yuvireco viña.

¹² Ahe rumo aipo ehi ava upe imbohe: “Oime mbia imboyeroyapri, ahe senoipri oso vahe rā amombri oivi pendareta rerecuarā oyevisē.

¹³ Oso āgua renonde oichohopa uca diez tupri güembiguai. Ahese opa omondo ñepe-pei upe guarepochi sepīrusu vahe, aipo ehi chupe: ‘Peaporaviqui co guarepochi rese imboeta āgua che yevise nara’ ehi. Ipare oso.

¹⁴ Setā ava rumo secua pendar saquicuei tēi viroiro yuvireco. Sese omondo moviro ava ‘tomombehu: Ore rumo ndoroipotai ore rerecuarā secoi āgua, tehi yuvireco’ oya viña.

¹⁵ “Ahe rumo mborerecuar guasu güecosa pipe oyeve ou cute. Opa uca oichoho oguarepochi pisisarer ‘¿mbovi-mbovi pīha oipisi oyacatu yuvireco?’ oya.

¹⁶ Evocoiyase yipindar mbia guarepochi oipisi vahe ou voi chupe, ‘Che rerecuar, nde guarepochi oyemboeta diez rupi cheu’ ehi.

¹⁷ Evocoiyase mborerecuar guasu omboyeve chupe: 'Mbiguai aviye vahe ereico, nde cuaita co nde poraviqusa chihimi vahe eremboaviye ité. Sese ereicora diez tecua guasu pendar rese hañeco ãgua' ehi chupe.

¹⁸ Ipare voi ambuae ou chupe, 'Che rerecuar, nde guarepochi oyemboeta cinco rupi cheu' ehi chupe.

¹⁹ Aipo ehi tupri avei ahe chupe: 'Nde evocoiyase ereicora cinco tecua pendar rese hañeco ãgua' ehi.

²⁰ "Ipare voi ambuae ou chupe, 'Che rerecuar, ndo co nde guarepochi aipoqueño turucuarmpi pipe sereco.

²¹ Esepia, che asiquiye nde sui. Nderecatêhi mete ai vahe mbahe rese. Ambuae ava poraviqúi sui tēi iyavei acoi ndahei vahe mbahe nde remiti, ichui tēi avei ereipisi mbahe ndeyeupe nara yepi' ehi chupe.

²² Evocoiyase mborerecuar guasu aipo ehi chupe: 'Nde mbiguai ndaseco pōrai vahe ereico. Nde ñehe sui aicuara nde recouer. Ereicuase egüe che hesa viña,

²³ evocoiyase, ¿mahera ru ndereyapocatui che guarepochi guarepochi apocatusave che yevisé voi senose ãgua cheu imboyeve catumi ãgua viña?' ehi.

²⁴ Evocoiyase, 'Perocua guarepochi ichui. Pemondora acoi diez rupi guarepochi omboeta vahe upe' ehi vupindar upe.

²⁵ Supindar rumo aipo ehi: 'Ore rerecuar, ovireco rumo evocoi diez tupri avei iharive guarepochi' ehi tēi yuvireco chupe.

²⁶ Evocoiyase mborerecuar, 'Co rumo supi eté vahe: acoi ovireco vahe, imondosara setá catu chupe; acoi ndovirecoi vahe setá mbahe, ichui serocuasara' ehi.

²⁷ 'Acoi ava che amotarêhimbar, ndache potai vahe mborerecuarã yuvireco, ahe opara peru cohave che rovai yucapa ãgua' ehi" ehi Jesús ava eta upe.

Jesús oique Jerusalén pipe

²⁸ Jesús aipo ohe pare, oguata vite oso Jerusalén coti.

²⁹ Evocoiyase coipe catu tecua Betfagé iyavei Betania rerovicave, ivitri Olivo ipiimi, aheve omondo ñuvirío güemimbohe

³⁰ aipo ehi chupe:

—Peso co tecuamive, yande rovaingarve. Peyepotase aheve, pesepiara guaricu ñapichimbri imoha ava ndoyeupi vitei vahe yuvireco sese. Ahe peyorãora seru.

³¹ Acoi, ¿Mahera vo peyora?' ehise que ava pëu, 'Yar oiporu pota' peyeflora chupe —ehi güemimbohe upe.

³² Evocoiyase semimbohe yuviraso, semimombehu rupi tupri ité osepia mbahe yuvireco.

³³ Evocoiyase oyorase guaricu,

—¿Mahera vo peyora ore reimba? —ehi iyar yuvireco.

³⁴ —Yar oiporu pota —ehiño yuvireco chupe.

³⁵ Ipare viraso Jesús upe yuvireco, oicupeao oyeaosa pipe guaricu yuvireco chupe. Ipare omboyeupi sese oso ãgua.

³⁶ Oyeypise oso guaricu harive, oipipira ava oturucuar peri rupi senonera imboetei guasusave yuvireco.

³⁷ Ovirovise ivitri Olivo sui ogüeyi ãgua oso, opacatu ava seroyasar supi oguata vahe omboipi osapucái yuvireco vorivetesave mbahe poromondiisa sembiapogüer rese Tüpa upe

³⁸ aipo ehi yuvireco:

—¡Sovasapri secoi mborerecuar guasu ou vahe yande Yar rer pipe! ¡Mbahe tupri toime ivave iyavei imboeteipri Tüpa tasecoi! —ehi.

³⁹ Evocoiyase amove fariseo yuvirecoi vahe supi aipo ehi chupe:

—Porombohesar, eñehe nde rupi oguata vahe upe imonguiriri ãgua —ehi tēi yuvireco.

⁴⁰ Evocoiyase aipo ehi:

—Supi eté amombehu pëu: co ava iquiririse yuvireco, ita rumo evocoiyase osapucái pīratarata che mboeteisave —ehi.

⁴¹ Oyepota senimise tecua Jerusalén ve, ahe tecua repiase, oyaseho sese

⁴² aipo ehi: "¡Pesenducuarata tarahu co co ari pipe teco tuprisa amondo pota vahe pëu viña, cūrítei rumo ocañi tupriño pe sui, ndapeicatu eté sepia!" ehi oyaseho.

⁴³ "Oimera rumo ari imombehupri naporai vahe pëu curi. Pe amotarêhimbar oñachi irira pe recua. Ipare oyere tuprira yuvireco pe rese pëu ovava ãgua.

⁴⁴ Iyavei yuviroiquera pe recua pipe, opara pe rēta omonduru yuvireco, pe yuca aveira yuvireco. Ndipoi chietera ita que ñepeí oya vahe ambuae rese. Esepia, ndapeicuai eté Tüpa ose pëu pe písiro ãgua" ehi Jerusalén pendar rese oyaseho.

Jesús omombopa ava mbahe rerecosar tüparo pipe sui

⁴⁵ Ichui Jesús oi que judío tūparo guasu pipe. Aheve omboipi ava mbahe mondosar mombopa tupri ocarve oico

⁴⁶ aipo ehi:

—Icuachiapri arachendar pipe aipo ehi: ‘Che rēta yeruresa rētarā’ ehi. Pe rumo, imonda rai vahe rēta nungar tēi pereco —ehi.

⁴⁷ Ichui ahe tūparo guasu pipe ari yacatu oporombohe oico. Aheve avei rumo pahi eta rerecuar yuvirecoi vahe, Moisés porocuita rese oporombohe vahe iyavei tecua rerecuar guasu yuvirecoi vahe, ‘¿Mara yahera pīha yuca uca āgua viña?’ ehi yuvirecoi chupe.

⁴⁸ Ndoicatui rumo yuvireco. Esepia, ava rehii oyapisaca iporombohesa rese yuvireco.

20

Jesús mborerecuasa

¹ Ñepeí ari Jesús judío tūparo guasu pipe güecose, ombohe ava eta, omombehu ñehesa pīsirosa resendar oico. Aheve yugüeru pahi eta rerecuar guasu yuvireco iyavei Moisés porocuita rese oporombohe vahe, ava rerecuar guasu yuvirecoi vahe avei

² aipo ehi:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarā? —ehi ahe ava yuvirecoi chupe.

³ Ahe omboyeveí chupe:

—Che avei aporandura mbahe rese pēu. Pemboyeveíra cheu —ehi—.

⁴ ¿Ava vo Juan ombou ava āpiramo āgua: Tūpa pīha, ava tēi tie? —ehi ahe ava yuvirecoi vahe upe.

⁵ Aheve, “¿Mara yahera pīha?” ehi-ehi tēi oyeupe yuvireco. “‘Tūpa’ yahese chupe, ‘¿Mahera ru ndaperoyai?’ ehira yandeu.

⁶ Anise, ‘Ava tēi remimbou’ yahese chupe, opacatu seroyasar evocoyase yande api-apira ita pipe yuvireco. Esepia, ava, ‘Juan omombehu vahe ñehesa Tūpa suindar’ ehi eté yuvireco chupe’ ehi tēi oyeupe yuvireco.

⁷ Evocoyase ahe ava, “Ndroicuai rumo Juan mbousar, que sui oporoāpiramo oico” ehiño yuvireco chupe.

⁸ Sese aipo ehi ahe ava upe:

—Sese che avei, ‘Ahe iporocuita pipe co mbahe ayapo’ ndahei chietera pēu —ehi mborerecuar guasu upe.

Ava mbahe tēi oporaviqui vahe recocuer sui yembohesa

⁹ Ipare Jesús oñehe ava eta upe ambuae ava recocuer rese aipo ehi: “Oime mbia oñoti vahé uva oivi pipe. Ipare oseya oivi ava oporaviqui vahe upe iporu āgua. Ichui oso pucu que amombri vahesa rupi.

¹⁰ Evocoyase oyepotase ari uva pohosa, aheve omondo ñepeí güembigui oporaviqui vahe upe imboporandu ‘tomboumi uva pohopri cheundar cheu cute’ oyapave viña. Ahe rumo oinupa-nupaño imboyeveí tupri tēi yuvireco serecuar upe.

¹¹ Ipare ambuae güembigui omondo iri no. Ahe oinupa-nupaño, iñehe mara-mara tēi avei ipogüer tēi imboyeveí imondo yuvireco.

¹² Ichui omondo iri tēi imombosapisa rese ambuae güembigui no. Ahe oyapicha-pichaño imosē imondo yuvireco.

¹³ “Coiye miti yar aipo ehi: ‘¿Mara ahera pīha? Amondora revo che rahir, che rembiaisu. Ahe tie revo, osepiase, omboyeroyara yuvireco’ ehi.

¹⁴ Evocoyase ahe ava tahir repiase, ‘Co aipo oipisira vu mbahe. Yayucaño. Yandeu nara pāve topita co ivi’ ehi oyeupe yuvireco.

¹⁵ Evocoyase ovinose miti pāhu sui, oyuca ité yuvireco.

“¿Mbahe vo evocoyase oyapora ivi yar ahe ava naporai vahe upe?”

¹⁶ Oura evocoyase ahe ava mocañipa āgua, omondora ambuae ava upe oivi rese oporaviqui vaherā” ehi.

Aipo renduse,

—¡Egüe tehi eme! —ehi ava yuvireco chupe.

¹⁷ Omahese rumo ahe ava rese aipo ehi:

—¿Mara oya vo co aipo ehi icuachiapri arachendar pipe?:

‘Co ita oi aposar opaño omombo yuvireco, ahe ita rumo aviye catu vahe oi moviracua tupri āgua’ ehi.

¹⁸ Acoi que oviapi vahe evocoi ita harive, opa tēira ahe ae oyemomara. Iyavei oviapise que ava harive, opa tupri aveira omocañi —ehi Jesús judío rerecuareta upe.

¹⁹ Pahi eta rerecuar guasu iyavei oporombohe vahe Moisés porocuita rese, iñehe viteseve, oipisi pota tēi Jesús yuvireco. Esepia, osenducua ité oyesendar iporombohesa yuvireco. Osiquiyēño rumo ava rehii sui yuvireco.

Judío rerecuar osecoña iri tēi Jesús guarepochi rese yuvireco

²⁰ Ahe judío rerecuar evocoyase omondo ava ndaseco asiimi angahu vahe iviro, chupe iñehe āgua ‘toyavi angahu oñehe’ oya viraso vaherā mborerrecuar Pilato rovai.

²¹ Ahe evocoyase,

—Porombohesar, ore oroicua nde ñehe iyavei nde porombohesa supi eté vahe. Iyavei nderemboyoaviratii vahe nde ñehe yepi. Nde rumo ereporombohe mbahe supi tupri vahe Tūpa recocuer rese.

²² ¿Aviyera pñha yamondo guarepochi Roma pendar mborerrecuar ivate catu vahe upe viña? ¿Aní tie? —ehi yuvireco chupe.

²³ Opa rumo oicua iñehe porombopasa tēi. Sese,

²⁴ —Pemboyecua ru ñepei guarepochi cheu. ¿Ava rahanga vo vireco; ava rer icuachiapri vo co sese? —ehi ahe ava upe.

—Roma pendar mborerrecuar guasu —ehiño yuvireco chupe.

²⁵ —Taa, pemondo ru mborerrecuar uve chupendar, iyavei Tūpa upendar pemondoño ité Tūpa upe —ehi ahe ava upe.

²⁶ Ndojaví uca catui eté iñehe ava rovaque ipisi āgua yuvireco. Ahe rumo oyeupe imboveyise, iquiriripa tupriño oyepihamondiisa pipe yuvireco.

Porandusa cuerayevisa rese

²⁷ Ipare saduceo, ahe “ndipoi eté cuerayevisa” ehi vahe, yugüeru Jesús upe. Oporandu tēi angahu yuvireco chupe:

²⁸ —Porombohesar, Moisés niha oseya güembicuachiagüer yandeu aipo ehi: ‘Que cuimbahe omenda vahe omanose guahiñehiseve, tivri evocoyase omendara sembirecocuer rese. Ahe viquehir omano vahecuer upe nara tahira oico’ ehi.

²⁹ Evocoyase oime siete tupri oyesuindar pāve yuvirecoi vahe. Yipindar vahe omenda. Ipare omanoño guahiñehiseve.

³⁰ Ichui tivri omenda sese. Ahe omanoño avei guahiñehiseve.

³¹ Ipare imombosapisa tivri omenda iri tēi sese. Ēgüe ehi tupriño avei chupe. Ambuae ichuindar Ēgüe ehi tupri avei omanopa yuvireco guahiñehiseve.

³² Coiye cuña avei omano cute.

³³ Evocoyase opase ocuerayevi yuvireco, ¿uma rembireco itera pñha omendase opacatu siete yuvirecoi vahe rese? —ehi saduceo yuvireco chupe.

³⁴ Ahe rumo omboyeve chupe:

—Co ivi pipe cuimbahe iyavei cuña omenda vahe yuvireco yepi.

³⁵ Ocuerayevi pare oicatu vahe ivave yuviroique vahe, chupe ndipo iri chira mendasa.

³⁶ Iyavei nomanoi chietera aheve. Esepia, yuvirecoira Tūpa rahir, Tūpa rembiguai eta iba pendar nungar yuvireco.

³⁷ Moisés rembicuachía agüer pipe niha caha pāhu sendi vahe resendar oicua uca cuerayevisa yandeu. Aheve aipo ehi: “Ahe niha yande ramoi aracahendar Abraham, Isaac, Jacob Tūpa” ehi.

³⁸ ¡Tūpa ndahei omano vahe Tūpa! ¡Ahe rumo oicove vahe ité Tūpa secoi! Esepia, chupe opacatu yuvirecove vahe —ehi saduceo upe.

³⁹ Evocoyase moviro Moisés porocuita rese oporombohe vahe aipo ehi:

—Supi eté aipo ere, Porombohesar —ehi yuvireco chupe.

⁴⁰ Sese niquerēhi iri eté mbahe rese oporandu āgua yuvireco chupe.

¿Ava suindar pñha Poropisrosar?

⁴¹ Evocoyase Jesús aipo ehi ahe ava upe:

—¿Mahera ru, “Poropisrosar David suindar ité” ehi yuvireco?

⁴² David teieté niha aipo ehi güembicuachía pipe:

‘Yar aipo ehi che Yar upe:

Eguapi che acato coti

⁴³ acoi che amondose voi eté nde amotarēhimbar ñenopiha āgua nde povrive yuvireco’ ehi David aracahe.

⁴⁴ ¿Mahera ru, “Poropisrosar David suindar secoira” peye? David teieté, “Che Yar” ehise chupe —ehi Jesús ahe ava upe.

Jesús oicua uca Moisés porocuita rese oporombohe vahe recocuerai

⁴⁵ Opacatu ava oñehe rendu viteseve, Jesús aipo ehi güemimbohe upe:

46 “Peicua catu co Moisés porocuaíta rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo água ocar rupi omboeteisa pipe yuvireco. Oseca avei tenda porañete catu vahe güenara otüparo pipe, carusave avei oseca tenda aviye catu vahe yuvireco.

47 Iyavei virocua-rocuafño tēi cuña imer mano vahecuer rēta ichui. Oarondaguã tēi avei oyerocui pucu-pucu yuvireco. Ahe rumo oipisira Tüpa ñemoirosa ipírata catu vahe yuvireco curi” ehi güemimbohe eta upe.

21

Cuña imer mano vahecuer iparaisu vahe porerecosa

1 Ipare Jesús osepia ava imbahe eta vahe omondose oporerecosa guarepochi riru pipe yuvireco.

2 Aheve avei cuña imer mano vahecuer iparaisu vahe, omondo ñuviriomi guarepochi oporerecosa.

3 Evocoyase Jesús aipo ehi:

—Supi eté co cuña iparaisu vahe omondo catu oporerecosa opacatu mbahe yar sui.

4 Esepia, ava imbahe eta vahe, oguarepochi rumbírer tēi omondo oporerecosa Tüpa upe yuvireco. Co cuña rumo oparaisusa pipe vírecomi vahe guarepochi oyeupe, opacatu ité omondo oporereco água Tüpa upe —ehi.

Jesús omombehu tūparo guasu monduru água

5 Evocoyase amove semimbohe ofñehe yuvireco tūparo guasu recocuer rese: “Co tūparo niha icatupri vahe, ita mopuhapri, porerecosa sui opacatu mbahe icatupri ipipe” ehi yuvireco. Jesús rumo aipo ehi:

6 —Oimera ari opacatu co mbahe cūrítei pesepia vahe pipe ndipoi chietera que ñepeí ita oyeha víte vahe; opacatu ité imondurusara curi —ehi güemimbohe eta upe.

Cañi renonde sepiasara setá mbahe poromondiisa iva rese

7 Evocoyase semimbohe eta oporandu yuvireco chupe:

—Ore mbohesar, ¿mbahese vo aipo mbahe yaviyera? ¿Mbahe poromondiisa rese rane vo icuasara curi? —ehi yuvireco.

8 Evocoyase aipo ehi güemimbohe eta upe: “Peicua catu, peyembopa ucai rene catu. Esepia, setá ava yugüerura, ‘Che niha Poropísirosar aico, cūrítei osupiti ari imombehpri yandeu’ ehi tēira yuvireco. Ndaperoyai chira rumo ava aipo ehi vahe.

9 Acoi peyanduse vavasa iyavei tecua pípendar oyeupe vavase, ndapeyembosiquiyei chira rumo serācua anduse ichui. Evocoi nungar rane ité niha oimera. Ndehi víteí chira rumo ari cañi” ehi.

10 “Ñepeí ivi pípendar ovavara ambuae ivi pípendar rese oyeupe yuvireco.

11 Aheve avei oimera ivi ririí tuvichá vahe, tiavor, mbaherasisa opacatu-catu tēi tecua rupi. Iyavei pesepiara iva rese mbahe pe mbosiquíye vahe, poromondiisa tuvichá vahe avei curi.

12 “Co mbahe-mbahe tēi reime renondeve rumo pe písira yuvireco che recocuer sui marama tēi pe rereco água. Pe reraso aveira pēu porandu água tūparove, pe roquenda aveira, iyavei pe rerasora mborerecuar rovai, mborerecuar ivate catu vahe rovai avei yuvireco che recocuer sui tēi.

13 Ipipe pemombehura che recocuer chupe yuvireco.

14 ‘Aipo ahera añehe’ ndapeyei chira pepihañemoñeta rereco pe yeepi água.

15 Esepia, che amondora che mbahecuausa pe ñeñe água. Ndoicatui chietera evocoyase pe amotarēhimbar imboyevi yuvireco pēu.

16 Pe amotarēhira rumo pe yesupa, pe mu, pe rivri, pe riquehir, pe mboripar avei. Iyavei oyucara amove pe páhu pendar yuvireco.

17 Opacatu ava ndape ambotai chira che recocuer sui tēi yuvireco.

18 Nocañií chietera rumo que ñepeí pe ha pe áca sui.

19 ¡Peyemoviracua evocoi nungar mbahe upe pe ñepisiro água!

20 “Iyavei pesepiase ava Jerusalén rese sundao oyere tuprise, peicua evocoyase mbahe-mbahe tēi reime água yuvireco chupe.

21 Evocoyase Judea ve yuvirecoi vahe toñemipa poyava voi ivitri rese yuvireco ichui; tecua Jerusalén pipe yuvirecoi vahe, ahe toyuvínose poyava avei ichui. Iyavei acoi que rupi yuvirecoi vahe, ahe toyevi iri eme yuvireco.

22 Esepia, ahe ari oimera Tüpa ñemoirosa. Ahe omboaviyera icuachiapri aracahendar pipe imombehpri.

23 ¡Iparaisu itera ahe ari pipe cuña ipuruha vahe, imembí pītani vahe avei! Esepia, oimera tecoasisa co ivi pípendar upe, ñemoirosa tuvichá vahe ahe ava recocuer rese.

²⁴ Iyavei quise pucu pipe setá ava omanora yuvireco iyavei ambuae setá ava ipisipri serasosara ambuae ivi rese amombrisave. Iyavei ambuae ivi pipendar ava ndahei vahe judío yuvirecoi vahe oiporu itera tecua Jerusalén acoi osupitise voi eté ari imombehupri yuvireco chupe” ehi.

Ava Riquehír yevisa

²⁵ “Iva rese iporêhira poromondiisa, ari rese, yasi rese, yasitata rese; iyavei ivi pipe, opacatú tecua rupi ava ndayaracua iri chira yuvireco. Oyembosiquiye guasu-guasu tēi aveira yuvireco para guasu riapugüer renduse.

²⁶ Ahese ava setá yaracua cañi tēira osiquiyepave yuvireco opíhañemoñeta guasu aise co ivi pipe mbahe oime vahe rā sui. Ahese avei iva resendar opacatu mbahe orírira.

²⁷ Ahese ramo opacatu ava che, Ava Riquehír, che repiara yuvireco, agüeyise iva quiha rese che píratasa rendigüer porañetesa pipe.

²⁸ Omboipise evocoi nungar mbahe, peyemonguerêhi catura, peyemopoase pe querêhisa pipe. Esepia, pe renosesa píhaivira mbahe tēi sui” ehi.

²⁹ Iyavei oporombohe ambuae mbahe rese: “Peicua tupri higuera ivíra recocuer, anise que ambuae ivíra avei.

³⁰ Co ivíra soqui ramose, yaicua cōimi ari sacu vahe yepota água yandeu yepi.

³¹ Na ehi aveira pēu che ñehe rupi tupri mbahe pesepiase. Sese peicua Tūpa mborerecuasa cōimi eté secoise.

³² “Supi eté yuvirecove vítera ava osepia vahe co mbahe opase yaviye.

³³ Iva, ivi opara ocañi, che ñehengagüer rumo imboaviyesa rane itera” ehi güemimbohe upe.

³⁴ “Peicua catu, aní pemboavai etepri pe mbahe reroya água mbahe tēi aposa pipe, pe caguar tēisa pipe, co ivi pipendar tecocuer rese pe píhañemoñeta tēisa pipe avei. Evocoiyase topoesapiha eme

³⁵ inungar ivonde oviapi vahe ahe ari pipe. Esepia, opacatu ava eta upe oimera evocoi nungar mbahe.

³⁶ Sese peyemoingatu, peyeroqui ari rupi co mbahe tēi sui pe yepipi água, pe yemboyecua tupri água che, Ava Riquehír, rovai” ehi güemimbohe eta upe.

³⁷ Égüe ehi Jesús oporombohe ari rupi tūparo guasu pipe. Pítu pipe evocoiyase opita ivitri Olivo rese.

³⁸ Iyavei opacatu ava yuviraso añihiveive tūparo guasu pipe iñehe rendu água yepi.

22

Yemomborandusa Jesús yuca água

¹ Ovirovise Pascua pieta pan ndayapepoi vahe hu água,

² ahese pahí rerecuareta, Moisés porocuita rese oporombohe vahe avei ava sui osiquiyepave, oseca-seca tēi Jesús yuca água yuvireco.

³ Evocoiyase Carugar oi que Judas píha pipe, ahe acoi doce tupri semimbohe páhu pendar Iscariote serer vahe.

⁴ Ahe oso pahí eta rerecuar yuvirecoi vahe upe, tūparo rārosar yuvirecoi vahe upe avei imoñeta água, “Tamondo Jesús pe povríve” ehi.

⁵ Ahe evocoiyase oyemboviharete yuvireco. “Yamondo guarepochi chupe” ehi voi eté yuvireco.

⁶ Judas evocoiyase, “Avíye” ehi. Oseca voi ava porêhiseve Jesús mondo água yamotarêhimbar upe.

Yande Yar caru agüer ípa vahe

⁷ Oyepota ari yípindar vahe pan ndayapepoi vahe hu água. Ahe pipeve avei ovesa Pascua pieta resendar yucapri seropovêhesa yepi.

⁸ Evocoiyase Jesús omundo güemimbohe Pedro, Juan reseve aipo ehi:

—Peso, tapemoingatu yande caru água Pascua pieta resendar —ehi.

⁹ Semimbohe rumo,

—¿Que vo ereipota oromoingatura? —ehi yuvireco chupe.

¹⁰ Evocoiyase aipo ehi:

—Peyepotase tecua pipe, aheve pesepiara mbíá víreco vahe cambuchi pipe i. Pesora sêtave supi.

¹¹ Aipo peyera peñehe oi yar upe: “Ore mbohesar oporandu: ‘¿Uma oi pipe vo Pascua pieta resendar orohura che remimbohe rese?’ ehi” peyera.

¹² Evocoiyase ahe omboyecua oi guasu, ívatendar pēu. Aheve pemoingatura yande caru água —ehi güemimbohe upe.

¹³ Ipare ahe yuviraso, semimombehu rupi tupri ité osepia mbahe. Aheve omoingatu carusa Pascua pieta resendar yuvireco.

¹⁴ Osupitise icaru água apóstol reseve yuviroguapi mesave.

¹⁵ Evocoiyase aipo ehi:

—¡Cueseve tēi eté niha aipota acaru vaheṛā pe piri Pascua pieta resendar rese che mano água renonde!

¹⁶ Esepia niha, ndayapo iri chira pieta Pascua resendar acoi yaviyese voi eté Tūpa mborerecuasa pipe —ehi.

¹⁷ Evocoiyase oipisi igua riru, “Aviye ndeu” ehi Vu upe, iyavei aipo ehi:

—Co amondora pēu, perova-rova peyacatu.

¹⁸ Esepia, co pipe suive ndaihu iri chira uva ricuer acoi ouse voi Tūpa mborerecuasa —ehi.

¹⁹ Ipare oipisi pan, “Aviye ndeu” ehi Vu upe. Aipo ohe pare ombohi-mbohi imondo güemimbohe upe.

—Co che rete, omboyecua imondopirā pe recocuer rese. Na peyera pe mahenduhasa pipe che rese yepi —ehi.

²⁰ Ēgüe ehi avei carusa pare yapo igua riru rese aipo ehi:

—Co igua riru pipendar omboyecua che Ru remimbotar ipiasu vahe pēu nara, ahe che ruvi ipiyerepirā pe recocuer rese nara.

²¹ Cūritei rumo oime mbia mesave yande piri che mondo vaheṛā che amotarēhimbar upe.

²² Supi eté imboaviyesa itera che, Ava Riquehir, rese ñehesa yipive imombehpri. ¡Iparaisu catura rumo acoi mbia che mondosar! —ehi.

²³ Evocoiyase aipo ehise, semimbohe oporandu-randu tēi oyeupe: “¿Ava pīha ēgüe ehi?” ehi tēi yuvireco.

¿Ava vo ivate catu vahe?

²⁴ Ipare voi semimbohe oñemoñeta guasu yuvireco oyese, ipihañemoñeta ‘aviyeteramo che imboeteipri catu vahe aicora oporocuaise Jesús’ ohesave yuvireco.

²⁵ Evocoiyase Jesús aipo ehi: “Ava mborerecuar co ivi pipendar oyocuai pīrata ava yuvireco yepi. Ahe chupe rumo, ‘Mbahe tupri aposar’ ehi yuvireco.

²⁶ Pe rumo ēgüe ndapeyei chira. Acoi oyemboivate pota vahe, toyemochihivaheño güeco mbegüesa pipe. Acoi ava cuaisar, tihañeco catu ambuae ava rese.

²⁷ ¿Uma pīha ivate catu vahe: co mesave oguapi vahe ocaru yuvireco? ¿Sese ihañeco vahe tie? Acoi mesave oguapi vahe niha. Che rumo co aico pe pāhuve inungar pe rese ihañeco vahe.

²⁸ “Pe rumo peico vahe che rupi yepi opacatú che recoãhasa pipe.

²⁹ Sese che amondo pēu pe mborerecuasa inungar che Ru ombou cheu che mborerecu água.

³⁰ Esepia, pecarura iyavei peihura che mborerecuasave che piri. Iyavei peguapira opacatu judío recocuer rese porandu água” ehi güemimbohe upe.

Jesús, “Ndaicuai vahe evocoi mbia’ erera cheu” ehi Pedro upe

³¹ Aipo ehi avei yande Yar:

—Simón, Simón, esendu: Carugar oporandu pe recoãha água rese.

³² Che rumo ayeroqui nde rese nde yeroyasa paneñhi água. Ereyevise cheu, emonguerēhi catu ambuae nde rivireta imoviracua uca água yuvireco oyese —ehi Pedro upe.

³³ —Che Yar, che rumo ayemoingatu voi eté nde rupi che so água nde roquendasave iyavei che mano água nde rupi —ehi Pedro chupe.

³⁴ —Pedro, supi eté amombehu ndeu: co pipe, tacura ñehhe renondeve, nde, “Ndaicuai eté evocoi mbia” erera mbosapi oyupagüer rupi cheu —ehi.

Virovi ité Jesús recoãha água

³⁵ Evocoiyase Jesús oporandu güemimbohe eta upe:

—Opomondose acoi mbahe riru porēhi, guarepochi riru porēhi, ambuae pe pitaqui ndugüer rerasoēhise, ¿ipane vo acoi mbahe ahese pēu? —ehi.

—Aní eté —ehi yuvireco chupe.

³⁶ Evocoiyase,

—Cūritei, acoi mbahe riru vireco vahe, tovírecoveño, guarepochi riru vireco vahe, tovírecoveño avei; acoi ndovirecoi vahe quise pucu, tomondo oyeaosa quise repirā.

³⁷ Supi eté amombehu pēu: iyacatu ité imboaviye tupri água co che rese ñehesa imombehpri aipo ehi vahe: ‘Ava vireco ndaseco pōrai vahe nungar yuvireco’ ehi vahe. Supi eté yaviyera co icuachiapirer che resendar —ehi.

³⁸ Evocoiyase semimbohe aipo ehi yuvireco:

—Ore Yar, cohava oime ñuvirío quise pucu —ehi.

—Ahe güeraño ité aviye —ehi güemimbohe eta upe.

Jesús oyeróqui Getsemaní ve

³⁹ Ipare Jesús osê oso ivitri Olivo ve. Ahe ivitrive oso yepi, aheve semimbohe yuviraso yuvireco supi.

⁴⁰ Oyepotase aheve yuvireco, Jesús aipo ehi güemimbohe upe:

—Peyeroqui angaipa pe yapóehi água —ehi.

⁴¹ Ipare oyepepi güemimbohe sui, inungar ita imombosa vahe amombrimi, aheve oñenopiha, oyeróqui

⁴² aipo ehi: “Che Ru, ereipotase, che renose eve co mbahe tēi sui; tayapo eme che remimbotar tēi, nde remimbotar rupira rumo” ehi.

⁴³ Evocoiyase oyemboyecua Tūpa rembiguai chupe, seco momirata água.

⁴⁴ Mbahe-mbahe tēi porarasa pipe oyeróqui catu. Ahese sacuvor inungar tuví osê ichui otiqui ivive.

⁴⁵ Oñarapuhase oyeróquisa sui, oyeví oso güemimbohe uve. Ahe rumo opaño yuviroque yuvirocua oviharéhisa pipe.

⁴⁶ Evocoiyase,

—¡Mahera opaño peque! Peñarapuha, peyeroqui catu pe viapiēhi água mbahe tēi pipe —ehi güemimbohe upe.

Jesús oipisi yuvireco

⁴⁷ Jesús ñehe viteseve, oyepota ati ava yuvireco chupe. Judas doce semimbohe pāhu pendar tenonde secoi. Ahe oyemboya oso sese sovaupite água.

⁴⁸ Evocoiyase aipo ehi Judas upe:

—Judas, ¿mahera vo che, Ava Riquehir, rovaupitesa pipe che mondo eve che amotaréhimbar upe? —ehi.

⁴⁹ Semimbohe eta rumo, mbahe-mbahe tēi repiase, oporandu yuvireco:

—Ore Yar, ¿yavavara yande quise pucu pipe? —ehi yuvireco chupe.

⁵⁰ Ñepeí rumo supindar, pahi rerecuar ivate catu vahe rembiguai nambi yasu cotindar oyasia.

⁵¹ Ahe rumo,

—Teheni, evocoi rupive —ehi güemimbohe eta upe.

Ipare opoco inambi rese ombogüera voi.

⁵² Ichui aipo ehi güecasar opacatu pahi eta rerecuar upe, tūparo rārosar upe, tecua pendar rerecuar upe avei:

—¿Quise pucu, ivira reseve-seve rutei co peyu che ropeña, imonda rai vahe nungar che rereco peye?

⁵³ Aicose tūparo pipe pe pāhuve ari yacatu rupi, na ndapeyapoi eté co nungar cheu. Aviyeño rumo, oyepota ité niha pēu imombehupri Carugar pīratasa pipe mbahe-mbahe tēi apo água —ehi.

Pedro, “Ndaicuai vahe evocoi mbia” ehi Jesús upe

⁵⁴ Evocoiyase Jesús oipisi yuvireco, oviraso pahi eta rerecuar ivate catu vahe rētave yuvireco. Pedro rumo amombrí rupive tēi osaquícue moñaño oso.

⁵⁵ Aheve ñachimbri pipe oyatapi yuvireco, oyeré tupri tata rese oyepehe yuvinoi. Aheve avei Pedro ipāhuve chiní.

⁵⁶ Evocoiyase cuña mbiguai, osepíase Pedro, omahe tupri iri sese aipo ehi:

—Co ava avei niha acoi Jesús rupindar —ehi.

⁵⁷ Ahe rumo aipo ehiño:

—Cuña, ndaicuai vahe ité ahe mbia —ehi.

⁵⁸ Iparemi tēi ambuae osepíase aipo ehi chupe no:

—Nde ité niha acoi supindar ereico —ehi.

—Aní mbia, aipo ere tēi, ndahei eté rumo che supindar aico —ehi.

⁵⁹ Ñepeí hora paremi tēi, ambuae aipo ehi chupe:

—Supi eté rumo co ité supi secoi vahe. Esepia, Galilea iguar ité niha —ehi.

⁶⁰ Sese aipo ehi:

—¿Mbahe vo catu aipo nde ñehesa? Ndasenducuai eté —ehi.

Aipo ihe viteseve, oñehe tacura.

⁶¹ Evocoiyase yande Yar oyemboyere sese. Ahe ramoseve oyemomahenduha: “Co pipe tacura ñehe renondeve, ‘Ndaicuai vahe’ erera mbosapi oyupagüer rupi cheu” ihe agüer rese.

⁶² Ahese osê, oyasehó iteanga oso.

Sārosar mara-mara tēi Jesús vireco yuvireco

⁶³ Evocoiyase ava Jesús rãrosar iguayî tēi yuvirocua-rocua yuvireco sese.

⁶⁴ Osesacua yuvireco. Ipare oporandu yuvireco chupe:

—¡Eicua ité ru, ava evocoi ocua nde rese! —ehi yuvireco chupe.

⁶⁵ ¡Yavei setá mbahe rese oñehe-ñehe tēi yuvireco chupe.

Jesús serasosa ava ñemonuhasa ivate catu vahesave

⁶⁶ Ahe ari pipe, cõhese, oñemonuha ava judío rerecuar, pahi eta rerecuar iyavei opacatu Moisés porocuaíta rese oporombohe vahe yuvireco Jesús reraso uca água ava ñemonuhasa ivate catu vahesave, oporandu mbahe rese yuvireco chupe:

⁶⁷ —¿Supi eté vo nde Poropĩsirosar ereico? Emombehu ru oreu —ehi yuvireco chupe.

—Amombehuse rumo pēu, ndache reroyai chietera peye —ehi judío rerecuar upe—.

⁶⁸ Inungar che aporanduse mbahe rese pēu, pe avei ndapemboveyî chietera cheu viña no.

⁶⁹ Co pipe suive rumo che, Ava Riquehir, aguapira Tũpa mbahe mboavaisarēhi acato coti —ehi.

⁷⁰ Ichui opacatu ava oporandu yuvireco chupe:

—Evocoiyase, ¿nde ité ereico Tũpa Rahir? —ehi.

—Supi eté niha aipo aipo peye cheu —ehi mborerecuareta upe.

⁷¹ Evocoiyase ahe aipo ehi yuvireco:

—¡Indó! ¿Ava iri vo evocoiyase mbahe omombehura yandeu? Yasendu niha iñehe ité cute —ehi mborerecuar oyeupe yuvireco.

23

Jesús serasosa mborerecuar Pilato rovai

¹ Evocoiyase opacatu ava opũha yuvireco Jesús reraso água mborerecuar Pilato rovai.

² Aheve oiñehengapo aipo ehi yuvireco:

—Orosepia co mbia oipihañemoñeta rerova ati uca ava yande recua rupindar aipo ehi: “Pemondoi rene Roma pendar mborerecuar ivate catu vahe upe guarepochi” ehi. ¡Yavei, “Che Poropĩsirosar mborerecuar ivate catu vahe aico” ehi oico —ehi yuvireco Pilato upe.

³ Evocoiyase Pilato oporandu chupe:

—¿Nde ité vo judío rerecuar ivate catu vahe? —ehi.

—Nde niha aipo, “Ahe ereico” ere cheu —ehi imboveyî Pilato upe.

⁴ Evocoiyase Pilato aipo ehi pahi eta rerecuar upe opacatu ava upe avei:

—Che rumo namohai eté co mbia que mbahe oyapo vaheerã —ehi

⁵ Ahe ava eta rumo,

—Supi eté opacatu ava oipihañemoñeta mboyeaviratí uca opacatu tecua rupindar. Yipindar ombõpi Galilea rupi oico. Cũritei co Judea ve ãgũe ehiño ité —ehi ava eta Pilato upe yuvireco.

Jesús imondosa mborerecuar Herodes rovai

⁶ Pilato osenduse aipo ñehesa oporandu, “¿Supi eté pĩha co mbia Galilea iguar?” ehi.

⁷ “Ahe pendar ité” ehise yuvireco chupe, ahese omondo Herodes upe, ahe acõi mborerecuar Galilea rupindar. Ahese avei secõi Jerusalén ve.

⁸ Herodes sorivete Jesús repiase. Esepia, setá ari osepia pota tēi serãcua anduse yepi. Evocoiyase oipota ité poromondiãsa oyapo vaheerã oyeovaque viña.

⁹ Sese oporandu ati mbahe rese chupe. Nomboveyî eté rumo Herodes upe.

¹⁰ Aheve opacatũ pahi eta rerecuar iyavei Moisés porocuaíta rese oporombohe vahe eta serõrosave oñemoñeta-ñeta tēi sese Herodes rovaque yuvireco.

¹¹ Evocoiyase Herodes osundao eta reseve iñehe mara-mara tēi Jesús upe sese oguayî tēisa pipe yuvireco. Omboyemonde avei turucuar iporañete vahe pipe yuvireco. ãgũe ehi imboveyî Herodes Pilato upe.

¹² Ahe ari pipe suive oyembõri Pilato Herodes rese. Ndoyeambotai vahe tie yipindar yuvireco viña.

“¡Tayaticasa!” ehi Jesús upe yuvireco

¹³ Evocoiyase Pilato opa uca omonuha opacatu pahi eta rerecuar, judío rerecuareta, opacatu ava eta avei.

¹⁴ Ipare aipo ehi chupe:

—Pe niha peru co mbia cohava cheu, ‘Omañeco tēi ava secua rupi’ peye. Che rumo aporandu tēi pe rovaque mbahe rese chupe. Ndipoi eté rumo mbahe sembiapo naporai vahe pe remimombehu rupi.

¹⁵ Herodes avei, ‘Ndipoi mbahe sembiapo naporai vahe imano água’ ehi. Sese omboveyiño Jesús imbou cheu.

¹⁶ Ainupa ucara rumo. Ipape amoseñora —ehi Pilato.

¹⁷ Pascua pieta pipe iya ité Pilato ava upe ñepe soquendapri mose água.

¹⁸ Opacatú guasu rumo ava oñehe pĩrata yuvireco aipo ehi:

—¡Co topitaño oreu! ¡Barrabás emoseño! —ehi ava eta Pilato upe.

¹⁹ Co mbia Barrabás tecua pipe mbahe tẽi mopuhasa sui iyavei oporapichisa sui oyeo-
quenda uca vahe.

²⁰ Pilato rumo omose pota Jesús viña. Sese oporandu iri ava upe imose água.

²¹ Ahe rumo osapucaĩ pĩrata catu yuvireco:

—¡Aní, tayaticasa! ¡Tayaticasa curusu rese! —ehi ati-atĩño yuvireco.

²² Imombosapisa rese Pilato oñehe iri:

—¿Mbahe ité vo oyapo naporai vahe? Ndipoi eté niha que mbahe sembiapo yuca água,
ainupa uca tẽira rumo. Ipape amoseñora —ehi.

²³⁻²⁴ Ava rehii rumo osapucaĩ pĩratá catu yuvireco, “Tayaticasa ité” ehi-ehiño yuvireco.
Sese chupe, “Tayaposa evocoyase semimbotar yuvireco” ehiño Pilato ava eta upe.

²⁵ Ēgũe ehi imose co mbia Barrabás, acoi soquendapri mbahe-mbahe tẽi mopuhasa
sui, iporapichisa sui avei ava remimbotar rupi. Ipape omondo Jesús sãrosar upe ava
remimbotar apo água sese.

Jesús yaticasa curusu rese

²⁶ Oime mbia Simón serer vahe Cirene iguar ou vahe que co coti rupi sui. Ovirasose Jesús
yuvireco yatica águave, ahe mbia upe, “Nde terevosii curusu rese Jesús raquicuei” ehi voĩño
tẽi yuvireco.

²⁷ Ava rehii yuviraso saquicuei. Cuña avei setá oyaseho oviharẽhisave yuvireco sese.

²⁸ Omahese rumo cuña rese aipo ehiño chupe:

—Cuña Jerusalén iguar, peyasehoi rene che rese. Peyese ae peyaseho, pe membri rese
avei.

²⁹ Esepia, oura ari naporai vahe. Ahese aipo peye tẽira: ‘Aviye catu acoi cuña nimembii
vahe iyavei ndoicuai vahe imocambu omembri’ peye tẽira.

³⁰ Ahese avei ava ivitri uve aipo ehira yuvireco: ‘¡Toviapri ore harive!’ ehira osiquiyepave.
Iyavei ivivate vahe upe: ‘¡Tore mi!’ ehi tẽira yuvireco.

³¹ Esepia, ěgũe ehise ivira yivive vitese, ¿mara ehira vo catu oipise? —ehi cuña eta upe.

³² Iyavei viraso ñuvirio mbia ndaseco pĩrai vahe supive yaticapirã yuvireco.

³³ Oyeptase Ava Áca Cangüer serer vahesave, aheve oyatica curusu rese yuvireco.
Iyavei oyatica ñuvirio mbia, ñepe mbahe rese ipocosa coti, ambuae evocoyase mbahe rese
ipocoẽhisa coti.

³⁴ Ahese Jesús aipo ehi:

—Che Ru, ndeñero co ava upe sembiapo rai rese. Esepia, ndoicuai co mbahe güembiapo
yuvireco —ehi.

Sundao evocoyase iguayĩño Jesús turucuar rese oyeupe imboyaho-yaho água yuvireco.

³⁵ Ava rehii osepia yuvireco; mborerecuareta avei seroĩrosave aipo ehi yuvireco chupe:
—Oipĩsiro ambuae ava, toñepĩsiro ru ahe ae ité cute Tũpa Rembiporavo Poropĩsiosar
güecosa pipe —ehi yuvireco.

³⁶ Iyavei sundao seroĩropare omondo vinagre itoihu yuvireco,

³⁷ iyavei aipo ehi yuvireco chupe:

—¡Nde niha aipo ava judío eta rerecuar guasu ereico! ¡Eñepĩsiro ru nde ae ité! —ehi sundao
eta yuvireco chupe.

³⁸ Curusu rese ñaca harive icuachiapri aipo ehi oĩ: “Co judío rerecuar guasu” ehi.

³⁹ Evocoyase ndaseco pĩrai vahe yaticapri iñehe mara tẽi chupe aipo ehi:

—¡Nde Poropĩsiosar ereicose, eñepĩsiro ru nde ae, ore avei ru ore pĩsiro eve! —ehi chupe.

⁴⁰ Ambuae evocoyase aipo ehi voi ondugüer uve:

—¿Nderesiquiyeyimi rutei vo Tũpa sui? Nde avei niha ocañi tẽi vaherã.

⁴¹ Yande rumo co yande rembiapo sui tẽi mara-mara tẽi yande rereco yuvireco; co mbia
rumo mbahe sembiapoẽhi pipe sui tẽi na ehi serecosa —ehi ondugüer upe.

⁴² Evocoyase aipo ehi iri:

—Jesús, che paraisuerocomi tẽi eve nde eremboipise nde mborerecuasa —ehi.

⁴³ Evocoyase omboyeví chupe:

—Supi eté co pipe ereicora tecua apirẽhi vahesave che rupi —ehi Jesús ahe mbia upe.

Jesús mano agüer

⁴⁴ Osupitise rumo mbiter ari, opa tupri pĩtu ivi rupi; las tres pipe rumo opa icatu.

⁴⁵ Ari avei ogüe tupri, turucuar guasu tũparo asiasa avei mbiter rupi tupri ovo.

⁴⁶ Evocoyase Jesús oñehe pĩrata:

—¡Che Ru, amondo che espíritu ndeu! —ehi.

Aipo ohe pare voi omano.

⁴⁷ Evocoyase Roma iguar sundao rerecuar osepiase co mbahe poromondiisa Tūpa mboeteisa pipe aipo ehi:

—Supi eté co mbia ndaseco marai vahe —ehi.

⁴⁸ Iyavei opacatu ava supindar yuvirecoi vahe osepiase co nungar mbahe, oyepochiha nupa-nupa tēi oyepihamondiisa pipe yuvireco.

⁴⁹ Opacatu avei ava oicua vahe Jesús, ipāhuve cuña Galilea sui yugüeru vahe, osepiño tēi amombrive co nungar mbahe yuvireco.

Jesús apocatu agüer tuvipa pipe

⁵⁰⁻⁵¹ Oime mbia aviye etepri vahe, ahe serer José, tecua Arimatea pendar. Ahe tecua ivi Judea pipendar, judío rerecuar ñemonuhasa ivate catu vahe pendar secoi. Ahe mbia viroya vahe ité Tūpa ombou vahe rā omboreceusa pipe mbahe moingatu āgua. Sese ndahei ipiñañemoñeta rupi co mborerecuar oyapo vahe mbahe Jesús upe yuvireco.

⁵² Evocoyase ahe oso Pilato rētave oporandu āgua Jesús rehögüer rese.

⁵³ Curus sui seroyi pare voi, oimama turucuar secose vahe pipe, ipoyava imondo tuvipa pipe ita guasu yohopri ndiporusa vitei vaheve yuvireco.

⁵⁴ Esepia, ahe ari omoingatu mbahe mbituhusa ari upe nara, ahe mbituhusa rumo osupiti pota ité.

⁵⁵ Cuña yugüeru vahe Jesús rupi Galilea sui, yuvirasño ité supipave, osepia sehögüer apocatase yuvireco.

⁵⁶ Oyevise güetave yuvireco omoingatu mbahe siacua vahe tehögüer resendar ipichi āgua.

24

Jesús ocuerayevi

Ahe cuña opituhu mbituhusa ari pipe judío porocuita reroyasave yuvireco. ¹ Cōhe ramomise domingu pipe, oyevi yuviraso tuvipave mbahe siacua vahe reseve.

² Oyepotase yuvireco tuvipave, osepia soquendasa ita guasu ndipo irise güendagüerve.

³ Evocoyase yuviroique voi tuvipa pipe. Ndoyosui rumo yande Yar rehögüer yuvireco.

⁴ Ndoyembovihal tēi; ndoicatu iri. Ahese aviyeteramo tēi osepia ñuvirío mbia iturucuar sendi vahe oipive yuvireco.

⁵ Opañño ñaca iviso ivi coti yuvireco osiquiyepave. Evocoyase co mbia aipo ehi yuvireco chupe:

—¡Mahera peseca tuvipa pāhu rupi ava oicove vahe!

⁶ Ndipoi mo cohave; ocuerayevi mo ahe. Peyemomahenduha iñehengagüer ivi Galilea rupi omombehu vahecuer rese,

⁷ “Che, Ava Riquehir, imondoprira ava angaipa viyar povrive, iyavei che aticara curusu rese yuvireco. Mbosapi ari pare rumo acuerayevira” ehi acoi —ehi cuña upe yuvireco.

⁸ Evocoyase cuña oyemomahenduha voi Jesús ñehengagüer rese yuvireco.

⁹ Oyevise tuvipa sui yuvireco, omombehu opacatu co once apóstol yuvirecoi vahe upe, opacatu ambuae upe avei.

¹⁰ Co omombehu vahe Jesús resendar ñehesa yuvireco apóstol eta uve, ahe: María Magdalena, Juana, Santiago si María iyavei ambuae cuña eta no.

¹¹ Apóstol upe rumo oyeupe mombehuse aviye aipo ehi tēi vahe; ndoviroyai eté yuvireco.

¹² Pedro rumo yandu ramoseve voi, osé, oña oso tuvipave. Omahese tuvipa pipe, turucuar güeraño osepia co cotimi tuisse. Evocoyase oyepihamondi tēi ‘¿mara ehi rutei paha?’ oya oyevi oive oso.

Jesús oyemboyecua ñuvirío güemimbohe upe tecua Emaús piar rupi

¹³ Ahe ari pipeve caharuse, ñuvirío semimbohe yuviraso tecua Emaús ve. Ahe once kilómetro tecua Jerusalén sui.

¹⁴ Ahe perí rupi oñemoñeta yuviraso opacatu co mbahe oime vahecuer rese.

¹⁵ Oñemoñeta viteseve, Jesús teieté oyemboya sese, oguata supi.

¹⁶ Yepe osepia tēi, ahe rumo ndoyepiacua ucai eté chupe.

¹⁷ Evocoyase Jesús oporandu chupe:

—¿Mbahe rese vo pe ñehe etepri pe guatasa rupi peico? —ehi.

Aipo hese, opita, ndovihal yuvinoha.

¹⁸ Ipāhu pendar Cleofas serer vahe omboyevi chupe:

—Nde güeraño revo Jerusalén ve ereico vahe ndereicuai mbahe oime vahe tecua pipe —ehi.

¹⁹ Evocoyase,

—¿Mbahe vo oime yandeu? —ehi.

—Jesús mo Nazaret pendar, ahe Tūpa ñehe mombehusar seco pīrata vahe opacatu mbahe apo āgua, mbahe mombehu āgua avei Tūpa rovaque iyavei opacatu ava rovaque.

²⁰ Omondo pahi rerecuar iyavei yande rerecuareta yamotarēhisave yuca uca āgua curusu rese yuvireco.

²¹ Ore rumo oroyeroya ité sese. “Ahe yande pīsīrora yande amotarēhimbar sui” oröhe chupe viña. Cūrītei rumo opa mbosapī ari yucare.

²² Ore pāhu pendar cuña ndore mbovīhai eté oyevise suvīpa sui yuvireco. Esepia, yipendar yuvirasose añihiveive tuvīpave,

²³ ndoyosui eté sehögüer yuvireco. Ahese aipo osepia Tūpa rembiguai aipo ehi vahe yuvireco chupe: “Jesús mo oicove cūrītei” ehi. Ahe evocoiyase yugüeru imombehu oreu.

²⁴ Iyavei ambuae ore ndugüer yuvirasose tuvīpave cuña remimombehu rupi tupri avei. Ndosepia eté rumo Jesús yuvireco —ehi Cleofas chupe tupri ité.

²⁵ Evocoiyase aipo ehi ahe ñuvirío mbia upe:

—ñNdapeicuai eté rumo pe piha pipe seroya tupri āgua opacatu Tūpa ñehe mombehusar remimombehugüer!

²⁶ ¿Ndapeicuai vo Poropīsīrosar iparaisu rane itera mbahe-mbahe tēi virecosa pipe güecua porañetesave güeique āgua renondeve? —ehi.

²⁷ Ipare opa omombehu icuachiapri Moisés cuachiar pipendar iyavei opacatu Tūpa ñehe mombehusar cuachiar pipendar oyese ñehe agüer.

²⁸ Oyepotase ahe tecuave yuviraso, Jesús rumo aviye oguataño vite vaheerā senonde.

²⁹ Co mbia rumo oñehe yuvireco chupe:

—Epitaño ore piri, caharu etepri. Pītura moco ndeu —ehi yuvireco chupe.

Evocoiyase oique, opitaño ipiri yuvireco.

³⁰ Oguapise yuvirinoi mesave, oipisi pan, “Aviye ndeu” ehi Tūpa upe. Ipare ombohi co ñuvirío mbia upe imondo.

³¹ Ahese voi semimbohe omahecua ramo yuvireco sese, ahe rumo cūrīteimi ndoyemboyecua iri sovai chupe.

³² Evocoiyase aipo ehi oyeupe yuvireco:

—Yande mbopihañemoñeta pīratami eté peri rupi oñehese yandeu co tecocuer icuachiapri rese —ehi yuvireco.

³³ Ipare ndopita pucu iri; oyeviño voi yuviraso tecua Jerusalén ve. Aheve osepia once tupri vahe apóstol, omboetasa avei.

³⁴ Ahese oñemonuha vahe aipo ehi yuvireco:

—Supi eté rumo yande Yar ocuerayevi. Esepia, oyemboyecua ité Simón upe —ehi.

³⁵ Evocoiyase ahe avei omombehu, “Oreu avei oyemboyecua oroguatase peri rupi. Ombohise pan ore piri, ahese ramo oroicua” ehi yuvireco omboetasa upe.

Jesús oyemboyecua güemimbohe eta upe

³⁶ Ahe oñehe viteseve yuvireco co tecocuer rese, ahese Jesús oyemboyecua chupe aipo ehi:

—Avirave, mbahe tupri pipe tapeico —ehi güemimbohe eta upe.

³⁷ Ahe rumo oyembosiquiye guasu yuvireco ‘hägüer revo’ oyapave.

³⁸ —¡Mahera pesiquiye! ¡Mahera pereco vite pe poreroyaēhisa pe piha pipe!

³⁹ Pemahe che po rese, che pi rese avei. Che ité niha co aico. Pepoco ru che rese. Tache reroya ru peye. Esepia, ava hā ndovirecoi voho iyavei ocangüer; che rumo areco ité —ehi güemimbohe eta upe.

⁴⁰ Aipo ohe viteseve omboyecuapa opo, opi avei chupe.

⁴¹ Ahe rumo vorivetesa pipe iyavei oyepihambosiquiye vitesa sui ndoviroya tupri vitei eté yuvireco. Evocoiyase aipo ehi:

—¿Perecomi vo mbahe yande caru āgua? —ehi güemimbohe upe.

⁴² Evocoiyase omondo pira apiremi oyī vahe yuvireco chupe.

⁴³ Ipare oipisi, ohu opacatu güemimbohe rovaque.

⁴⁴ Ipare aipo ehi:

—Co rese acoi añehe vichico cuese pe rese aico vitese che mano renondeve. Yaviye ranera opacatu ñehesa che resendar Moisés porocuita cuachiapri pipe, iyavei Tūpa ñehe mombehusar yuvirecoi vahe rembicuachiagüer pipe, Salmo pipe avei —ehi.

⁴⁵ Egüe ehi evocoiyase opacatu osenducua uca aracahendar icuachiapirer güemimbohe upe

⁴⁶ aipo ehi:

—Co icuachiasa Poropīsīrosar iparaisura omano āgua. Ipare mbosapī ari pare ocuer-ayevira.

⁴⁷ Jerusalén sui tupri opacatu ivi yacatu rupi imombehusara serer pipe, “Pemboasi pe angaipa, peyevi Tūpa upe pēu ñeroi āgua” hesara.

⁴⁸ Pe niha peico opacatu co nungar mbahe repiasar imombehu āgua.

⁴⁹ Che amboura che Ru remimombehu pe harive. Pepitañora rumo cohove tecua Jerusalén ve acoi peipisise voi pīratasa iva suindar —ehi güemimbohe eta upe.

Ivave Jesús so agüer

⁵⁰ Evocoiyase Jesús yuvinose tecua sui yuviraso tecua Betania popive. Aheve ñuvirio opo omopuha, osovasa mbahe tupri reime āgua chupe.

⁵¹ İpare oyepipi güemimbohe sui. Ahe ramoseve serasosa ivave.

⁵² Semimbohe evocoiyase osapucaı imboetisave. İpare oyevi Jerusalén ve vorivetesave pipe yuvireco.

⁵³ İyavei ahe ari yacatu rupi yuviraso tūparo guasu pipe osapucaı Tūpa mboetisave yuvireco yepi. Aipo rupive.

JUAN REMBICUACHIA JESUS RECOUER RESENDAR SAN JUAN

Tūpa Ñehe oyeapo ava

¹⁻² Jesús yipisuive ité Tūpa Ñehe secói. Ahe oicove mbahe apoēhi viteseve Tūpa rese. Esepia, ahe niha Tūpa secói.

³ Ipípe avei Tūpa opacatu mbahe oime vahe oyapo; ndipoi eté mbahe sembiapoēhi.

⁴ Jesús niha vireco tecovesa apirēhi vahe oyesé. Ahe tecovesa tesapesa nungar secói opacatu ava upe.

⁵ Ahe tesapesa omboyecua tecocuer supi eté vahe pītumimbi nungar mbahe naporai vahe aposar pāhuve. Ahe mbahe tēi aposar rumo ndoicatu eté secopí yuvireco.

⁶ Oime mbia Tūpa remimbou. Ahe Juan serer vahe.

⁷ Ahe rumo ou co tesapesa cua uca āgua ‘toviroya opacatu ava yuvireco’ ohesave.

⁸ Ahe rumo ndahei eté tesapesa; imombehusar tēi rumo secói.

⁹ Co tesapesa supi eté vahe osesape opacatu ava. Ahe ou ité co ivi pipe.

¹⁰ Yepe tie ipípe yapopri opacatu ava viña, sembiapo rumo ndoicuai co ivi pipe secoise yuvireco.

¹¹ Supi eté ouse güecuave, secua pendar ae rumo ndoipisii yuvireco.

¹² Opacatu rumo acoi oipisi vahe seroyasave yuvireco, ahe chupe omondo ñecuñaosa Tūpa rahir seco āgua yuvireco.

¹³ Ndahei rumo co ivi pipendar rahir nungar que oha vahe ambuae ava remimbotar pipe tēi. Ahe rumo Tūpa rahir ité yuvirecoi.

¹⁴ Ipare ahe Tūpa Ñehe, oyeapo ava, oicove yande pāhuve co ivi pipe oporoaisusave mbahe supi eté vahe aposa pipe. Iyavei orosepia ité seco porañetesá. Co seco porañetesá oipisi vahe Vu sui Tahir ñepe vahe güeco pipe.

¹⁵ Juan niha oñehe sese ava upe aipo ehi: “Co uve niha acoi aipo ahe vahe cuese: ‘Acoi ou vaherā che raquicuei, ahe ivate catu vahe che sui. Esepia, yipive ité secói che yesuēhi viteseve’ ahe” ehi.

¹⁶ Esepia, opacatu ité yaipisiño iporovasasa tuvichá vahe ombouño vahe ité yandeu ari yacatu rupi yepi.

¹⁷ Mborocuaíta yaipisi Moisés sui; porovasasa rumo iyavei mbahe supi eté vahe, ahe güeru Jesucristo yandeu.

¹⁸ Ndipoi eté ava osepia vahe Tūpa; Tahir ñepe vahe, secói vahe ité ipiri, ahe oicua uca yandeu.

Juan Oporoāpiramo vahe oñehe Jesucristo rese

¹⁹ Judío rerecuar guasu tecua Jerusalén pendar oyocuai pahi eta iyavei ipītiviisareta imondo Juan uve ‘¿Ava vo nde? tehi yuvireco chupe’ oyapave icua āgua.

²⁰ Ahe rumo oyemombehu ité aipo ehi:

—Che ndahei eté Poropísirosar aico —ehi.

²¹ Evocoyase oporandu iri yuvireco:

—¿Ava ité vo nde? ¿Nde tie Elías ereico? —ehi.

—Ndahei eté che ahe aico —ehi.

Evocoyase,

—¿Nde tie acoi Tūpa ñehe mombehusar ou vaherā? —ehi yuvireco chupe.

—Aní eté —ehi.

²² —¿Ava rutei vo evocoyase nde? ¡Emombehu oreu ore oromombehu vaherā ore mbousar uve! ¿Mbahe ité vo eromombehura ndeyesuindar oreu? —ehi yuvireco chupe.

²³ —Che aico oñehe vahe ivi iporupirēhisa rupi aipo ahe: ‘Pemoingatu pe recocuer yande Yar yepotase nara’ ahe pēu. Ahe inungar acoi Tūpa ñehe mombehusar Isaías aipo ehi vahe aracahe —ehi.

²⁴ Ahe yuviraso vahe chupe, fariseo remimondo yuvirecoi,

²⁵ oporandu yuvireco chupe:

—Evocoyase ndahei niha aipo nde Poropísirosar, ndahei avei Elías, ndahei eté Tūpa ñehe mombehusar imombehupri ereico. ¿Mahera ru evocoyase ereporoāpiramo? —ehi yuvireco chupe.

²⁶ Evocoyase fariseo upe aipo ehi:

—Che rumo i pipe aporoāpiramo; oime rumo mbia pe pāhuve ndapeicuai vahe.

²⁷ Ahe co ivi pipe ou vaheṛā che raquicuei. Che rumo ndahei eté seco catupri vahe aico ipitaquisā yora āgua —ehi.

²⁸ Co opacatu mbahe yaposā tecua Betania ve, iai Jordán rovai añihivei coti. Aheve Juan oporoāpiramo yepi.

Tūpa remimbou Ovesa nungar opacatu ava angaipa repirā

²⁹ Ahere ayihive Juan osepia Jesús oyemboyase oyese aipo ehi: “¡Pesepia, co Tūpa remimbou Ovesa nungar seropovēhepirā opacatu ava angaipa mocañi āgua!

³⁰ Añehese sese aipo ahe: ‘Che raquicuei oura mbia ivate catu vahe che sui. Esepia, yipive vahe ité che sui’ ahe acoi cuese.

³¹ Che rumo yipindar ndaicuai ahe yande remiaro ou vaheṛā. Sese niha aporoāpiramo i pipe vichico imboyecua āgua che mu judío yuvirecoi vahe upe” ehi.

³² “Che asepia Espiritu Santo ogüeyise iva sui inungar apicasu, opita tupri iharive” ehi.

³³ “Yipindar rumo ndaicuai eté. Tūpa che cuai vahe rumo che poroāpiramo āgua i pipe, aipo ehi cheu: ‘Acoi eresepiase Espiritu Santo ogüeyise, opitase mbia harive, ahe mbia oporoāpiramora Espiritu Santo pipe’ ehi.

³⁴ Che niha asepia ité. Sese, ‘Co Tūpa Rahir ité secoi’ ahe pēu” ehi.

Yipindar vahe Jesús remimbohe

³⁵ Ahere ayihive Juan secoi avei ore ñuvirío mbia oroico vahe reseve.

³⁶ Jesús ore cuāse, Juan aipo ehi oreu:

—¡Pesepia, ndo co mbia Tūpa remimbou Ovesa nungar seropovēhepirā! —ehi oreu.

³⁷ Aipo ihe ramoseve, oroguata voi eté supi.

³⁸ Evocoyase omahe guaquicuei coti. Ore repiase, oporandu oreu:

—¿Mbahe vo pesecami peico? —ehi oreu.

Ore evocoyase,

—Porombohesar, ¿que vo nde recosa? —orohe chupe.

³⁹ —Yaso, tapesepia ru —ehi oreu.

Evocoyase oroso, oroyepota las cuatro pipe secosave. Aheve ore pītu ité ipiri.

⁴⁰ Simón Pedro rivri, Andrés, ahe che ndugüer ahese.

⁴¹ Ahe rane aipo oseca viquehir Simón aipo ehi chupe:

—Orosepia ité Poropisrosar —ehi (‘Cristo’ oyapave).

⁴² Ipare voi, viraso Simón Jesús uve. Osepiase, Jesús aipo ehi chupe:

—Nde Simón, Juan rahir, ndererguā rumo Cefas —ehi (‘Pedro’ oyapave).

Jesús oñhe Felipe upe, Natanael upe avei oyeupi iguata āgua

⁴³ Ahere ayihive voi Jesús ipihañemoñeta oso āgua ivi Galilea rupi. Aheve osepia Felipe, aipo ehi chupe:

—Erio che rupi —ehi.

⁴⁴ “Aviye” ehi Felipe, ahe Pedro iyavei Andrés recua Betsaida pendar secoi.

⁴⁵ Ipare oso Natanael reca, aipo ehi chupe:

—Orosepia Poropisrosar, sesendar acoi Moisés oicuachía cuachiar porocuaita resendar pipe aracahe, oicuachía avei sesendar Tūpa ñehe mombehusareta yuvireco. Ahe Jesús, José rahir, tecua Nazaret pendar —ehi.

⁴⁶ Natanael rumo aipo ehi:

—¿Oime pīha yuvinose vahe ava aviye vahe Nazaret pendar? —ehi.

—Yaso, teresepia ru —ehi Natanael upe.

⁴⁷ Acoi oyepota senise Natanael ou, Jesús sepiase, aipo ehi voi chupe:

—Co mbia secoi judío ete ité, ndoporombopai vahe —ehi.

⁴⁸ —¿Mara ere che cua eve? —ehi Natanael chupe.

—Che oroepia yipive Felipe nde reca renondeve ivira higeravrive ereicose —ehi Natanael upe.

⁴⁹ —Porombohesar, ¡nde niha Tūpa Rahir ereico, Israel iguar rerecuar guasu! —ehi Natanael chupe.

⁵⁰ —¡Che reroya voi eté acoi, “Oroepia iviravrive” che he sui tēi eve! Eresepiara rumo co mbahe sui aviye catu vahe —ehi.

⁵¹ Iyavei aipo ehi opacatu upe:

—Supi eté pesepiara iva oyemboi tuprise iyavei Tūpa rembiguai eta igüeyise che, Ava Riquehir, upe, iyevise avei ivave yuvireco —ehi.

2

Mendasa tecua Caná ve

¹ Ipape imombosapisa ari pipe, oime mendasa tecua Caná ve, Galilea ivi rupi. Jesús si avei secoi aheve,

² iyavei Jesús ore semimbohe oroico vahe reseve ore soho avei yuvireco aheve.

³ Ēgüe ehi rumo opa tēi uva ricuer. Evocoyase Jesús si,

—Ndipo iri uva ricuer —ehi chupe.

⁴ —Cuña, ¿mahera vo aipo ere cheu? Che remimbotar rumo ari ndoyepota vitei cheu —ehi osi upe.

⁵ Ichi rumo aipo ehi ava igua rese ihañeco vahe upe:

—Peyapo opacatu semimbotar pe cuaise —ehi.

⁶ Aheve oime seis cambuchi guasu ita cuhi apopri, ñepi-pei cambuchi pipe oique cincuenta litro, amove oique setenta litro i ipipe. Ahe judío oiporu pietase oyepoi água yuvireco Túpa porocuita mboaviye água yepi.

⁷ Evocoyase ahe ava igua rese ihañeco vahe upe aipo ehi:

—Pemboapipopa co cambuchi i pipe —ehi.

Omboapipopa tupri yuvireco.

⁸ Evocoyase aipo ehi ava ihañeco vahe upe:

—Penosemi chíhi, peraso pieta rese hañecosar uve —ehi.

Ēgüe ehi eté yuvireco.

⁹ Ihañeco vahe pieta rese osāha i oyeapo vahe uva ricuer. Ndoicuai eté que sui osē ahe uva ricuer; igua rese ihañeco vahe güeraño tupri oicua yuvireco. Evocoyase pieta rese hañecosar oñehe cuimbahe omenda vahe upe

¹⁰ aipo ehi chupe:

—Opacatu ava omondo uva ricuer aviye catu vahe yipindar. Ipape accoi ava hitaropase yuvireco, omondo ndasepii vahe. Nde rumo ereyapocatupaño aviye catu vahe, ahe cūritei ramo erenose —ehi.

¹¹ Co yipindar vahe poromondiisa Jesús oyapo vahe aheve. Ipipe omboyecua güeco pīratasa. Sese semimbohe viroya ité yuvireco.

¹² Ipape oso tecua Capernaum ve, ichi avei, tivri reseve supive, iyavei ore semimbohe eta oroso supi. Aheve oroico moviro ari tēi.

Jesús ombopava mbahe rerecosar tūparo pipe sui

¹³ Ipape judío upendar Pascua pieta yepota senise, Jesús oso Jerusalén ve.

¹⁴ Aheve osepiā tūparo guasu pipe corero ivipi rupi guarepochi rese mbahe mimba eta mondosar; guaca, ovesa iyavei apicasu. Aheve avei mbia guarepochi recuñarosar yuvinoi.

¹⁵ Co mbahe repiase rumo, Jesús oyapo tucumbo ombopava tupri tūparo sui opacatu ava imbahe reseve-seve, seimba ovesa, seimba guaca avei. Guarepochi recuñarosar sui otiapi-pii iguarepochi ivi rupi, iyavei imesa opa omombo.

¹⁶ Apicasu mondosareta uve aipo ehi:

—¡Penosepa co mbahe cūritei ave sui! —ehi—. ¡Aní che Ru rēta mbahe mondosā tēi pereco! —ehi.

¹⁷ Aipo hese, ore oroyemomahenduha ñehesa icuachiapri arachendar aipo ehi vahe rese: “Nde rēta rese che recatēhisa sui che mocañira” ehi vahe.

¹⁸ Evocoyase judío mborerecuar yuvirecoi vahe oporandu yuvireco chupe:

—¿Mbahe vo ereyapora nde mborerecuasa moporēhi água oreu cūritei? —ehi yuvireco chupe.

¹⁹ Evocoyase,

—Pemondurupa co tūparo, che evocoyase mbosapi ari rupive amopuha irira —ehi judío eta upe.

²⁰ Aipo hese, mborerecuar aipo ehi yuvireco chupe:

—Co tūparo rumo imopuhasa cuarenta y seis araviter rupi, ¿ereicatura pīha aipo nde imopuha iri mbosapi ari rupive? —ehi yuvireco chupe.

²¹ Oñehese Jesús tūparo rese, güete upe tēi rumo aipo ehi.

²² Ocuerayevise rumo manosa sui, ore oroyemomahenduha iñehe agüer rese. Sese oroviroya sesendar ñehesa icuachiapri pipe iyavei semimombehugüer.

Jesús oicua opacatu ava recocuer

²³ Jesús secoi vitese Jerusalén ve Pascua pieta pipe, setá ité ava viroya osepiase poromondiisa sembiapo yuvireco.

²⁴ Ndoyeroyai eté rumo ahe ava eta rese. Esepia, opacatu ité ava recocuer oicua.

²⁵ Ndipoi eté que ambuae ava pihañemoñeta mombehu água chupe. Esepia, ahe ité opa oicua.

3

Nicodemo omoñeta Jesús

¹ Oime mbia fariseo, Nicodemo serer vahe, ahe mbia mborerecuar judío pãhuve secói vahe.

² Ahe oso Jesús piri pĩtu pipe, aipo ehi chupe:

—Porombohesar, oroicua ité Tũpa nde mbose ore mbohe ãgua —ehi—. Esepia, ndipoi eté que ava oicatu vahe evocói nungar poromondiãsa apo Tũpa oyese secoñhise —ehi.

³ Evocoiyase,

—Supi eté aipo ahe ndeu: acói ava ndoyesu piasu iri vahe, ndoiqueei chietera Tũpa mborerecuasave —ehi Jesús chupe.

⁴ Oporandu rumo aipo ehi:

—¿Mara ehira vo aipo ava oyese piasu iri ocuacua pipe viña? —ehi—. ¿Oicatu irira pĩha osi aviterve oi que oyese iri ãgua? —ehi Jesús upe.

⁵ Jesús omboyeví chupe:

—Supi eté aipo ahe ndeu: acói ava i pipe iyavei Espĩritu pipe ndoyesui vahe, evocói nungar ndoyuviroiquei chira Tũpa mborerecuasave.

⁶ Acói oyese vahe co ivi pipendar oyesupa sui, inungar tupri avei ahe; Espĩritu pipe oyese vahe rumo, ahe espĩritu.

⁷ Ereyepihamondĩ rene, ‘Peyesu piasu irira’ ahesa ndeu.

⁸ Co rumo inungar ivitu oipeyu vahe güemimbotar rupi. Yepe sendusa siapu, ndicuasai rumo que sui turi, que oso no. Ëgüe ehi avei ava oyese vahe Espĩritu pipe —ehi Jesús chupe.

⁹ —¿Mara ehi pĩha aipo evocoiyase? —ehi Jesús upe.

¹⁰ —¿Nde niha porombohesar ivate vahe Israel pendar ereico, nderesenducuai eté rumo co nungar mbahe! —ehi chupe—.

¹¹ Supi eté aipo ahe ndeu: ore oromombehu mbahe oroicua vahe, orosepia vahe ité. Pe rumo ndaperoyai eté ore remimombehu.

¹² Añehe tẽi niha mbahe co ivi pipendar rese pẽu; ndache reroyai eté rumo peye. Tahetru revo mbahe iva pendar amombehuse pẽu ndaperoyai chietera viña —ehi.

¹³ “Esepia, ndipoi eté ambuae ava ivave oyepui vahe; che güeraño, Ava Riquehir, iva sui agüeyi vahe pẽu.

¹⁴ Inungar Moisés osupi ivate mboi rahanga ivi iporupirẽhisa rupi aracahe. Ëgüe ehi aveira che, Ava Riquehir, rerecosa ivate che rupira yuvireco

¹⁵ opacatu ava che reroyasar tecovesa apirẽhi rereco ãgua yuvireco” ehi Jesús Nicodemo upe.

Tũpa poroaisusa ava upe nara

¹⁶ “Supi eté Tũpa osaisũ iteanga opacatu ava. Sese ombou Guahir ñepeí vahe ‘tocañi tẽi eme che Rahir reroyasar yuvireco’ oya, ‘tovireco tecovesa apirẽhi vahe’ ohesave.

¹⁷ Esepia, nombouí Tũpa Guahir co ivi pipe ava mocañi tẽi ãgua; ahe rumo ombou ava pĩsiro ãgua.

¹⁸ “Ava viroya vahe Tũpa Rahir, ndahei eté ocañi tẽi vaherã; acói ava ndoviroyai vahe rumo, oipisi itera cañisa yuvireco Tũpa Rahir ñepeí vahe reroyaẽhisa pipe.

¹⁹ Ëgüe ehi etera chupe yuvireco. Esepia, tesapesa supi eté vahe ou co ivi pipe, ahe ava rumo oipota catu mbahe Caruguar suindar pĩtumimbi vahesave güeco ãgua yuvireco.

²⁰ Supi eté acói opacatu ava oyapo vahe angaipa, ndosepia potai tesapesa, iyavei ndoyemboyai tesapesa rese yuvireco oangaipa mboyecua potaẽhisave.

²¹ Acói ava yuvirecoí vahe rumo mbahe supi eté vahe aposa pipe, oyemboya tesapesa rese yuvireco mbahe Tũpa remimbotar oyapo vahe cua uca ãgua opacatu ambuae ava upe —ehi.

Juan Oporoãpiramo vahe oñehe iri Jesús rese

²² Ipare Jesús oso güemimbohe eta rese ambuae tecua rupi-rupi ivi Judea ve. Aheve secói pucu raimi oporoãpiramo.

²³ Iyavei Juan oporoãpiramo vite Enón ve, Salim rerovicave. Esepia, aheve tuvichá i oime. Aheve ava yugüeru oñeapiramo uca ãgua.

²⁴ Co rumo mbahe yaposa Juan roquendaẽhi viteseva.

²⁵ Evocoiyase Juan remimbohe omboipi ambuae omu judío rese oyecopi-copi vaherã i pipe ñeapiramosa resendar sui tẽi yuvireco.

²⁶ Sese yuviraso Juan uve aipo ehi:

—Ore mbohesar, acói secói vahe nde rese iai Jordán rovai, sese acói ereñehe oreu, cüritei ahe oporoãpiramoño tẽi iyavei opacatu yuviraso supi —ehi semimbohe yuvireco chupe.

²⁷ Evocoiyase aipo ehi güemimbohe upe:

—Ava ndoicatu mbahe apo Tūpa nombouise chupe.

²⁸ Pesendu tupri ité che ñehe cuese: “Che ndahei Porop̄isrosar aico, che rumo senonde imboupri tēi aico” ahehe pēu.

²⁹ Esepia, acoi mendasa oimese, vireco vahe güembirecovi ahe imevi, osenduse rumo imboripar ñehe yivii ohã, oyemboviharete sese. Ēgüe ahe avei che cūrítei, ayemboviharete Jesús rese.

³⁰ Ahe niha seco ivate catu-catuño itera ari rupi oico; che rumo ivi coti catu aicora ichui —ehi Juan güemimbohe upe.

Iva suindar ou vahe

³¹ Iva suindar ou vahe ivate catu ité opacatu sui. Co ivi pipe oyesu vahe rumo co ivi pipendar ité. Sese niha mbahe ivi pipendar rese tēi oñehe. Acoi ou vahe rumo iva sui, ivate catu ité opacatu sui.

³² Iyavei mbahe güembiepia osendu vahe reseño ité oñehe. Ndipoi eté rumo semimombehu viroya vahe yuvireco.

³³ Acoi ava viroya vahe rumo ñehe, “Supi tupri ité Tūpa omombehu mbahe” ehi.

³⁴ Co Tūpa remimbou niha omombehu Tūpa ñehe. Esepia, Tūpa omondo ité oEspíritu sese.

³⁵ Tūpa osaisu Guahir iyavei opacatu mbahe omondo ipove.

³⁶ Opacatu ava viroya vahe Tūpa Rahir, vireco ité tecovesa apirēhi; acoi ndoviroya vahe rumo, ndovirecoi chietera co tecovesa. Ahe rumo oipisira Tūpa ñemoirosa ip̄rata vahe ité yuvireco.

4

Jesús oñehe Samaria pendar cuña upe

1 Fariseo eta oyandu yuvireco Jesús vireco catuse ava oyeupi uguata vahe iyavei oporoāpiramo catuse avei Juan sui

² (ndahei eté rumo Jesús oporoāpiramo; semimbohe tēi rumo Ēgüe ehi yuvireco).

³⁻⁴ Jesús oicuase aipo nungar, osē Judea sui, oyevi iri ivi Samaria rupi, Galilea ve yuviraso.

⁵ Aheve Samaria ivi rese oyepota tecua Sicar serer vaheve yuvireco. Ahe tecua rerovicave oime ivi Jacob omondo vahecuer guahir José upe aracahe.

⁶ Aheve oime ivicuar, chupe, “Jacob iguagüer” ehi yuvireco. Ahe igua rembe rese Jesús uguapi mb̄ter ari potase ocueraise oī.

⁷⁻⁸ Semimbohe eta rumo opacatu yuviraso tecuave mbahe tembihu rerocua. Aheseve cuña, Samaria pendar, oyepota iguave i renose. Ahese Jesús aipo ehi chupe:

—Emboumi ch̄hi nde i taihu —ehi.

⁹ Cuña, Samaria pendar, rumo omboyevi chupe:

—¿Mahera vo, “Embou i taihu” ere cheu? Nde rumo judío; che cuña coha pendar aico —ehi chupe. (Esepia, judío noñehei vahe ité ava Samaria pendar upe yuvireco yepi.)

¹⁰ Evocoyase omboyevi cuña upe:

—Ereicuase Tūpa porerecosa ndeundar viña iyavei ereicuase ahe ava ndeu i rese oporandu vahe, nde evocoyase ereporandura sese chupe. Ahe evocoyase omondora i ndopai vahe ndeu viña —ehi cuña upe.

¹¹ —Ndererecoi rumo i renose āgua. Esepia, co igua ipicucú ité. ¿Que sui vo aipo evocoyase eremboura i ndopai vahe cheu viña? —ehi cuña chupe—.

¹² Esepia, co igua ore ramoi Jacob oseya oreu. Cohave suiño ité niha ahe oihu, tahir avei oihu yuvireco ichui iyavei opacatu seimba. ¿Nde p̄ha ivate catu ereico ichui? —ehi cuña chupe.

¹³ —Opacatu ava oihu vahe co i, ihuseiño itera yepi, —ehi cuña upe—.

¹⁴ Acoi ava oihu vahe rumo i che remimondo, ndihusei iri chietera. Esepia, che amondo vahe i ndopai vahe r̄a ité. Ahe omboura tecovesa ndopai vahe ava upe —ehi cuña upe.

¹⁵ —Nde ava, emboumi ahe i taihu che husei iriñi āgua, tanose iri eme i cohava sui —ehi.

¹⁶ —Eso rane nde mer reca, seseve peyu cohava —ehi cuña upe.

¹⁷ —Ndarecoi rumo che mer —ehiño cuña chupe.

—Supi eté aipo ere, ndererecoi eté nde mer.

¹⁸ Esepia, cinco tupri erereco nde mer iyavei cūrítei erereco vahe nde resendar tēi. Supi eté aipo ere: “Ndarecoi che mer” ere cheu —ehi cuña upe.

¹⁹ —Nde ava aviye moco Tūpa ñehe mombehusar ereico cheu —ehi—.

²⁰ Ore ramoi eta omboetei Tūpa co ivitri rese yuvireco. Pe rumo, judío peico vahe, “Jerusalén ve yamboeteira Tūpa yepi” peye —ehi.

²¹ —Che reroya eve cuña, virov̄i ari pēu peso iriñi āgua Tūpa mboetei co ivitri rese iyavei Jerusalén ve.

²² Pe Samaria pendar peico vahe pemboetei tēi pe rembiguaēhi. Ore rumo oroicua oromboetei vahe. Esepia, ñepisiroso ou judío sui.

²³ Oyepota rumo ari cute, ahe ité co cūrítei co pipe suive supi eté Tūpa omboetei vahe, Tūpa Espiritu pipe omboeteira yuvireco. Supi eté Tūpa, “Ēgüe tehi che mboetei yuvireco” ehi.

²⁴ Esepia, Tūpa niha Espiritu seci. Sese acoi omboetei vahe oyapora Espiritu pipe supi tupri vahe ité yuvireco —ehi cuña upe.

²⁵ Cuña evocoiyase aipo ehi chupe:

—Che aicua Poropisirosar yu āgua (ahe ‘Cristo’). Acoi ahe ouse, omombehu tuprira opacatu mbahe yandeu —ehi cuña chupe.

²⁶ —Che niha ahe aico añehe vahe ndeu —ehi cuña upe.

²⁷ Aheseve semimbohe eta oyevi yuvireco, nombovihaipri güemimbohe cuña rese oñemoñetase. Ndipoi eté rumo que “¿mbahe rese vo peñemoñeta?” ehi vahe, que “¿mahera vo ereñehe co cuña upe?” ehi vahe yuvireco chupe.

²⁸ Ahese cuña oseya tupriño ocambuchi, oso güecuave aipo ehi ava eta upe:

²⁹ —Perio, tapesepia pe ava omombehupa tupri vahe che recocuer cheu. ¿Ndahei pīha ahe Poropisirosar? —ehi omu eta upe.

³⁰ Evocoiyase ava rehi yuvinoso tecua sui, yuviraso Jesús recosave sepia.

³¹ Ava yepotaēhi viteseve, semimbohe eta,

—Ore mbohesar, ecarumi —ehi tēi yuvireco chupe.

³² —Oimera rumo ambuae mbahe cheu che moviracua āgua. Ahe ndapeicuai vahe —ehi güemimbohe eta upe.

³³ Semimbohe aipo hese oporandu-randu tēi oyeupe yuvireco:

—¿Oime pīha que ava güeru vahe mbahe semihura? —ehi tēi yuvireco.

³⁴ Güemimbohe upe rumo aipo ehi:

—Che moviracuaa rumo che mbousar porocuita, ahe ayapora iyavei amboaviye rane itera iporaviqui —ehi—.

³⁵ Esepia, pe aipo peye: ‘Ipane vite irungatu yasi mbahe miti ha monuha āgua’ peye yepi; che rumo aipo ahe pēu: pemahe pe ivirindar ava eta rese. Opa ité opiha omoingatu yuvireco, ahe inungar mbahe miti ha yaviye vahe.

³⁶ Acoi oporaviqui vahe Tūpa upe ava hā pisi āgua rese, ahe oipisira sepri yuvireco iyavei semimonuha tecovesa ndopai vaheve nara ité yuvirecoira. Evocoiyase ava upe oñehe vahe iyavei oipisi vahe ava hā ivave nara, oyoya guasu oviharetera ipisipri rese yuvireco.

³⁷ Supi eté co ñehesa aipo ehi vahe: ‘Ñepeí eté omaheti vahe; imonuhasar rumo ambuae ité’ ehi.

³⁸ Che opocuai ava hā pisi āgua ambuae ava poraviquisave; yipindar rumo ambuae oporaviqui ité yuvireco sese. Pe evocoiyase peique iporaviqui agüer rupi —ehi güemimbohe eta upe.

³⁹ Setá ava tecua Sicar pendar Samaria pipe viroya cuña ñehe sui yuvireco, “Opacatu mbahe che rembiapo omombehu cheu” ihesa sui.

⁴⁰ Evocoiyase ava rehi Samaria pendar yuviraso chupe ‘epitami ore piri’ oya. Evocoiyase opita ipiri ñuvirío ari rupi.

⁴¹ Setá catu iri ava viroya yuvireco iñehe ité renduse.

⁴² Evocoiyase ava eta aipo ehi cuña upe yuvireco:

—Cūrítei oroviroya ité cute, ndahei nde ñehe suiño oroviroya. Esepia, ore ité orosendu iñehe cute, oroicua avei ahe supi eté opacatu ava pisirosar ou vahe —ehi ava eta cuña upe yuvireco.

Jesús ombogüera mborerecuar rahir

⁴³ Ñuvirío ari pare, Jesús osē ivi Samaria sui, osoño ivi Galilea ve.

⁴⁴ Ahe ae ité aipo ehi: “Tūpa ñehe mombehúsar ndasaísusai ivi rese yuvireco yepi” ehi.

⁴⁵ Oyepotase oivi Galilea ve, ahe pendar ava oipisi tupri yuvireco. Esepia, setá osepia opacatu mbahe sembiapo Pascua pietase Jerusalén ve.

⁴⁶ Evocoiyase oyevi iri tecua Caná ve Galilea ivi rese, aheve acoi i tēi oyapo uva ricuer. Tecua Capernaum ve oime mbia mborerecuar guasu ivirindar. Ahe vireco guahir imbaheasi vahe.

⁴⁷ Oyanduse co mbia mborerecuar Jesús yepota Judea sui ivi Galilea ve, ahe ramoseve oso voi seca ‘toso che rētave, tombogüeramí che rahir omano pota vahe cheu’ oya.

⁴⁸ Evocoiyase aipo ehi ahe mborerecuar upe:

—Pe ndache reroyai eté peye ndapesepiaise mbahe poromondiisa che rembiapo —ehi.

⁴⁹ —Che Yar, eyu poyavañomi tēi che rahir mano viteēhiseve —ehi mborerecuar chupe.

⁵⁰ —Eyevi nde rētave; nde rahir oicove —ehi mborerecuar upe.

Ahese viroya voi oyeupe ñehesa. Sese oyevi voi eté güëtave.

⁵¹ Amombri seco vitesese, yuvinoña voi sovaichi sembiuai imombehu:

—¡Nde rahir oicove! —ehi yuvireco chupe.

⁵² Evocoyase oporandu: “¿Mbahe hora pipe tupri ocuera?” ehi.

—Irapipe caharuse, la una pipe, ndasohi iri —ehi yuvireco chupe.

⁵³ Ahese mborerecuar ipihañemoñeta: “Ahe hora pipe tupri niha Jesús aipo ehi cheu: ‘Nde rahir oicove’ ehi” ehi. Evocoyase ahe iyavei opacatu imu eta viroya Jesús yuvireco.

⁵⁴ Co imoñuviriosa poromondiisa oyapo Jesús güecocuer cua uca água ivi Judea sui oyevise Galilea ve.

5

Jesús ombogüera ava ndoguatai vahe tecua Betzata pendar

¹ Ipare oime judío pieta guasu Jerusalén ve, aheve Jesús oso.

² Ahe tecua roquendipi, Ovesa serer vahe coti, oime ivicuar i vireco vahe, serer hebreo ñehe pipe Betzata. Ahe sese oyere tupri poyandepo oquendipi yapayere vahe päve.

³ Aheve ava eta imbaheasi vahe oñeno yugüeru ivi rupi: ndasesapisoi vahe, ndoguatai vahe, ndipindugüei vahe avei i ñemomiisa osáro yuvireco yepi.

⁴ Esepia, amove tēi Tūpa rembiuai ogüeyi ahe ivicuarve i momii água, “Acoi ahe rane ocui vahe i ñemomiiseve ive, ocuera voi eté ombaherasisa sui” ehi yuvireco chupe.

⁵ Aheve oime mbia ombaherasisa vireco vahe treinta y ocho araviter rupi.

⁶ Osepiase Jesús, oicua voi eté vireco pucuse ombaherasisa. Evocoyase oporandu chupe:

—¿Ereipota vo nde cuera água? —ehi chupe.

⁷ Imbaheasi vahe omboyevi:

—Nde mbia, ndipoi eté que ava che mongui vaherā i pipe i ñemomiise. Asāha tēi ‘tacui’ viya. Ambuae rane-raneño rumo yuvirocui che sui yepi —ehi.

⁸ Evocoyase,

—Epūha, esupi nde rupa, eguata —ehi imbaheasi vahe upe.

⁹ Ahe ramoseve ahe mbia ocuera tupri, osupi vupa, oguata voi oico. Mbituhusa ari pipe tupri rumo ēgüe ehi.

¹⁰ Evocoyase judío aipo ehi ocuera vahecuer upe yuvireco:

—Co pipe rumo mbituhusa ari, nande cuaitai nde rupa rese ndevosii água —ehi yuvireco chupe.

¹¹ Ahe mbia evocoyase,

—Che mbogüerasar rumo aipo ehi cheu: ‘Esupi nde rupa, eguata’ ehi cheu —ehi judío eta upe.

¹² —¿Uma vo aipo ehi ndeu? —ehi judío yuvireco chupe.

¹³ Ahe mbia rumo ndoicua iri ombogüerasar. Sese ndoicatu imboyevi água. Esepia, Jesús aviyeteramo tēi ndoyecua iri ava rehii pähuve.

¹⁴ Coiye rumo Jesús osepia iri tūparove ahe mbia, aipo ehi chupe:

—Ereicua co nde cuerasa cūritei, aní ereyemboangaipa iri mbahe tēi catu reime iri água ndeu —ehi chupe.

¹⁵ Ahe mbia evocoyase oso voi eté judío eta rerecuar upe ‘Jesús che mbogüera’ oya.

¹⁶ Sese judío osaquicue moña iyavei oyuca pota yuvireco mbituhusa ari pipe iporombogüera rese tēi.

¹⁷ Ahe rumo aipo ehi:

—Che Ru niha oporaviquiño ité co ari rupi iyavei che aporaviquiño avei —ehiño judío upe.

¹⁸ Aipo hese, judío, “Yayuca ité” ehi. “Esepia, ndahei mbituhusa ari güeraño nomboyeroyai, ahe rumo oyeapo Tūpa nungar, Tūpa uve ‘che Ru’ ohe angahu tēisa pipe” ehi yuvireco chupe.

Tūpa Rahir mborerecuasa

¹⁹ Evocoyase Jesús aipo ehi judío upe: “Supi eté aipo ahe: Tūpa Rahir ndoicatu eté mbahe apo oyesui tēi, Vu rembiapo mbahe oicua; aheño tupri avei oyapo yepi.

²⁰ Esepia, Tu Guahir raisupave omboyecua opacatu mbahe güembiaipo chupe iyavei omboyecuaño vite itera mbahe poromondiisa tuvicha catu vahe sembiaporā, ‘¡Mara ehi rutei col!’ pehe tēi água chupe.

²¹ Esepia, che Ru ombogüerayevi omano vahe iyavei omondo tecovesa chupe. Ēgüe ehi avei Tahir omondo tecovesa ava upe güemimbotar rupi.

²² Iyavei Tu nomondo iri ava upe sembiapo repri. Esepia, ombou Guahir upe opacatu pīratasa ava upe sembiapo repri mondo água.

²³ Ēgüe ehi Guahir upe opacatu ava imboetei água yuvireco inungar Tu imboeteipri. Acoi ava Tahir nombotei vahe, Tu imbousar avei nombotei yuvireco.

²⁴ “Supi eté aipo ahe pēu: acoi oyapısaca vahe che ñehe rese, viroya vahe avei che mbousar, ahe vırecora tecovesa apırēhi vahe; ndahei chietera imocañipri. Esepia, osē manosa sui oipisi tecovesa.

²⁵ Supi eté aicua uca pēu: oura ari imombehupri, cūrıteı eté co ari oyepota, ava eta omano vahecuer osendura Tūpa Rahır ñehe. Acoi osendu vahe, oicoveño itera.

²⁶ Esepia, Tu vıreco tecovesa oyese. Ēgüe ehi avei Guahır upe imondo tecovesa rereco āgua.

²⁷ Ombou avei imborerecua āgua chupe ava recocuer rese iporandu āgua. Esepia, ahe Ava Rıquehir secoi.

²⁸ Peyepıhamondıı rene aipo che hesa sui. Esepia, oyepotara ari imombehupri, ahese opacatu ava omano vahecuer osendura ñehe.

²⁹ Ahese yuvınosera vuvıpa sui. Oyapo vahe mbahe tupri, ocuerayevıra yuvıreco tecovesa apırēhi rereco āgua; acoi oyapo vahe rumo mbahe naporai vahe, ocuerayevıra yuvıreco Tūpa ñemoirosa pısi āgua” ehi Jesús judıo rerecuar upe.

Jesús omboyecua tupri omborerecuaşa

³⁰ “Che ndaicatui mbahe apo cheyesui tēi. Che, ‘Pe peyavi vahe mbahe, peıpisira che Ru ñemoirosa’ ahe ava ndaseco pōrai vahe upe che cuaita rupi iyavei che amombehu vahe supı tuprı ité. Esepia, che ndaipotai che remıbotar tēi mbahe apo āgua. Che Ru, che mbousar remıbotar rumo ayapo.

³¹ Que cheyese ae tēi añehese, ahese ndache reroyai chıra peye viña.

³² Oıme rumo ambuae che mombehusar. Ahe supı eté che mombehu pe seroya āgua; ahe Juan.

³³ Pe niha, pemondo ava chupe imboporandu mbahe rese. Ahe semımombehu niha supı tuprı vahe ité.

³⁴ Yepe ahe supı eté viña, che rumo ndayeroyai ava tēi che mombehusa rese. Che rumo aıpota peñepısiro āgua. Sese aipo ahe pēu.

³⁵ Juan niha inungar tataendi, ēgüe ehi omboyecua mbahe supı eté vahe. Sese pe peyembovıha raimi tēi iporombohesa tesapesa nungar pıpe peico.

³⁶ Che rumo areco che yecua ucasar aviye catu vahe Juan sui. Ahe niha co mbahe ayapo vahe yepı. Ahe sese che Ru che cuai yapo āgua. Co mbahe ayapo vahe, ahe ité omboyecua che Ru Tūpa che mbousar.

³⁷ Iyavei che Ru avei eté che cua ucasar. Ahe ñehe rumo ndapesendui vahe ité, iyavei ahe ndapesepıai eté.

³⁸ İñehengagüer icuachiapri avei ndoıqueı eté pe rese. İpıpe niha ndache reroyai eté peye che Ru che mbouse.

³⁹ Pe peıcua tuprı pota icuachiapri ‘ıcuapa tuprı pıpe revo tecovesa apırēhi yarecora’ peye viña. Co rumo cuachıar che mombehu vahe:

⁴⁰ pe rumo ndapeyu potai eté cheu co tecovesa apırēhi rereco āgua.

⁴¹ “Ndaıpısiı eté ava che mboeteısa tēi.

⁴² İyavei opocua Tūpa ndapesaisıise.

⁴³ Che niha ayu che Ru rer pıpe. Pe rumo ndache reroyai eté peye. Ouse rumo que ambuae ava oyese tēi oñehe vahe, evocoi nungar tēi peroyara.

⁴⁴ Ndapeıcatui eté che reroya āgua peye. Esepia, pe ae tēi peyemboeteı; ndapesecai eté Tūpa ñepeı vahe suındar yemboeteısa.

⁴⁵ Ndapepıhañemoñetaı chıra che pe recocuer mombehu āgua rese che Ru rovai. Moısés peroya vahe ité niha oıcuachıa pe Tūpa reroyañısa chupe imombehu āgua.

⁴⁶ Peroyase rumo Moısés ñehe viña, che avei che reroyara peye viña. Esepia, Moısés niha oıcuachıa che resendar ñehesa.

⁴⁷ Ndaperoyaise ahe sembicuachıa, evocoyıase ndapeıcatui chietera che remımombehu reroya āgua” ehi Jesús oamotarēhimbar upe.

6

Jesús oyopoi cinco mil ava

¹⁻⁴ İpare Pascua pıeta İpıımi aipo Jesús osasa İpa Galılea serer vahe oso, ahe serer avei Tıberıas. Ava rehıı avei yuvıraso saquıcueı. Esepia, osepıa ité yuvıreco oyapose mbahe poromondıısa guasu imbaheası vahe mbogüerese. Oyepotase İvı rese yuvıraso, evocoyıase oyepı İvıtrı rese. Aheve oguapı opacatu güemımbohe eta reseve yuvınoı.

⁵⁻⁶ Omahese ava rehıı oyepındar rese, ahese aipo ehi Felipe upe:

—¿Que vo yarocuara mbahe tembıhu co opacatu ava upe nara? —ehı secoãhasave.

Ahe rumo oıcua ité mbahe güemıaporã.

⁷ Evocoyıase Felipe omboyevı chupe:

- Dosciento denario pan ndosupitii chietera que chīhi-chīhimi ava retacuer viña —ehi.
⁸ Aipo hese, ñepeí semimbohe pāhu pendar, Simón Pedro rívrí, Andrés aipo ehi chupe:
⁹ —Co chīhivahe víreco cinco pan, iyavei ñuvírío pira, ¿iyacatura vo co ava retacuer? —ehi.
¹⁰ Evocoyase aipo ehi:
 —Pemombehu opacatu upe toguapi yuvireco —ehi güemimbohe upe.
 Capihi reimesave opa omboguapi yuvireco cinco mil ava.
¹¹ Evocoyase oipisí cinco vahe pan, “Aviye ndeu” ohe pare Vu Tūpa upe, opa ombohi-
 mbohi imondo ava rehii upe. Ēgüe ehi avei pira upe, imondopa semimbotar rupi-rupi
 yuvireco.
¹² Opase ava ihītaró,
 —Pemonuhapa sumbirer iyemombucaēhi āgua —ehi güemimbohe upe.
¹³ Evocoyase omonuha doce iruova sumbirer yuvireco pan cincomi vahe sui.
¹⁴ Evocoyase ava eta co poromondiisa guasu Jesús rembiapo repiase, aipo ehi yuvireco:
 —Supi eté co uve revo acói: “Oura Tūpa ñehe mombehusar ivi pipe” ehi icuachiapri
 aracahendar pipe —ehi yuvireco.
¹⁵ Jesús rumo oicuase ava opīratasa pipe tēi güeraso pota āgua mborerecuar guasu víreco
 āgua oyeupe nara yuvireco, ahese oyeupi iri oso ivate catu. Aheve ahe ae güeco āgua.

Jesús oguata i hari rupi

- ¹⁶ Pītu ramosé ogüeyi yuviraso Jesús remimbohe ipave,
¹⁷ yuviroha carite pipe sasa āgua yuvireco tecua Capernaum ve yuviraso. Ahese pītu ité.
 Jesús rumo ndoyeví víte eté.
¹⁸ Ahese oipeyu pīrata ivítu, i avei ohitu pīrata.
¹⁹ Yuviraso pucumi tēi cinco, anise seis kilómetro rupi. Ahese osepia Jesús yuvireco
 osupití senise carite. Ahe i hari rupi oguata oso chupe. Evocoyase osiquiye ité yuvireco
 ichui.
²⁰ Ahe rumo aipo ehi güemimbohe upe:
 —¿Che Jesús aico, pesiquiyei rene! —ehi.
²¹ Evocoyase sorivete yuvireco carite pipe seroha. Iparemi tēi oyepota yuviraso
 oyuvirasosave.

Ava eta oseca Jesús

- ²² Ahere ayihive ava rehii opita vahe sovai yuvireco, “Semimbohe año rumo yuviraso
 ñepeí vahe carite pipe. Jesús rumo ndosoi eté güemimbohe rupi” ehi tēi yuvireco.
²³ Aheseve rumo ambuae carite viroyepota seru yuvireco tecua Tiberias pendar, acói
 Jesús ava remihura pan reroyeroqui agüer rerovicave.
²⁴ Evocoyase ava rehii oicuase Jesús semimbohe reseve iporēhise yuvireco, yuviroha
 yuviraso āgua co ambuae carite pipe tecua Capernaum ve seca.

Jesús, pan nangar, tecovesa apirēhi vahe secoi

- ²⁵ Oyepotase ava rehii ipa rovai, aheve osepia Jesús yuvireco.
 —Ore mbohesar, ¿marase vo ereyepota cohava? —ehi yuvireco chupe.
²⁶ Evocoyase aipo ehi chupe:
 —Supi eté aipo ahe pēu. Pe rumo che reca peye che pe mbocarusa rese tēi,, ndahei co che
 poromondiisa rerozasave ité peico pota che rupi.
²⁷ Pepraviqui eme catu tembihu ndasecosei vahe rese; iyacatu rumo pepraviqui
 tembihu secose vahe rese omondo vahe tecovesa apirēhi. Co tembihu che, Ava Riquehír,
 amondora pēu. Esepia, che Ru Tūpa omboyecua ité che ichuindar aicose —ehi.
²⁸ Aipo hese,
 —¿Mbahe mboraviqui vo oroyapora Tūpa upe? —ehi yuvireco.
²⁹ —Tūpa oipota pe che reroyara peye che semimbou che recose —ehi ava eta upe.
³⁰ Evocoyase,
 —¿Mbahe poromondiisa vo eremboyecua irimira oreu orosepia vaherā nde reroya tupri
 catu āgua?
³¹ Esepia, aracahe ore ramoi eta yuvirohu ivi iporupirēhisa rupi. Icuachiapri aracahen-
 dar pipe omombehu: ‘Omondo pan íva pendar semihura’ ehi —ehi ava eta yuvireco chupe.
³² —Supi eté amombehu pēu: ndahei Moisés omondo pan íva pendar chupe, che Ru rumo
 omondo chupe. Cūrítei che Ru ombou pēu pan supi eté vahe íva sui.
³³ Esepia, co pan ombou vahe Tūpa íva suindar ité. Ahe omondora tecovesa ivi pipendar
 upe —ehi ava eta upe.
³⁴ Evocoyase,
 —Ore mbohesar, embouño catu co pipe suive aipo pan oreu —ehi yuvireco chupe.

³⁵—Che ité ahe pan aico tecovesa mondo ãgua. Acoi ou vahe cheu ndiyumbiasi iri chietera iyavei acoi che reroya vahe ndihusei chiveira.

³⁶Aipo ahe niha acoi pëu. Yepe pe che repia peye viña, pe rumo ndache reroyai eté peye.

³⁷Opacatu ombou vahe ava che Ru cheu, cheu ité yugüerura; acoi yugüeru vahe cheu, aipisira; ndamomboi chietera cheyesui.

³⁸Esepia, ndayui iva sui mbahe che remimbotar apo ãgua tēi; ayu rumo che mbousar porocuaita apo ãgua.

³⁹Che Ru che mbousar ndoipotai que ñepeí ava ombou vahe cheu amocañira. Ahe semimbotar rumo che ambogüerayevira ahe ari ipa vahe pipe.

⁴⁰Che Ru oipota avei opacatu ava oyeroya vaheñā che, Tūpa Rahir, che recosa rese. Ipipe vireco aveira tecovesa apirēhi vahe yuvireco. Supi eté ambogüerayevira ari ipa vahe pipe curi —ehi ava eta upe.

⁴¹Evocoyase judío eta oñehe-ñehe tēi sese yuvireco, “Che pan aico, agüeyi vahe iva sui” ihesa rese

⁴²aipo ehi:

—Co niha acoi Jesús, José rahir. Yande yaicua ité tu, ichi avei. ¿Mahera ru, “Che agüeyi vahe iva sui” ehi no? —ehi yuvireco chupe.

⁴³Evocoyase judío eta upe aipo ehi:

—Pepoiño che roerōrosa sui.

⁴⁴Ndipoi chietera que oicatu vahe ou cheu, nomonguerēhiise che Ru che mbousar; omonguerēhi vahe rumo oicatu yugüeru cheu. Ahe ambogüerayevira ari ipa vahe pipe.

⁴⁵Tūpa ñehe mombehusar cuachiar pipe aipo ehi: ‘Tūpa pe mbohera opacatu’ ehi. Sese acoi osendu vahe che Ru ñehe, oyembohe vahe avei sese, evocoi nungar yugüerura cheu.

⁴⁶“Ndipoi eté que ñepeí ava osepia vahe che Ru; acoi ichui ou vaheño ité, ahe güeraño tupri ité osepia.

⁴⁷Supi eté aipo ahe pëu: acoi che reroya vahe vireco tecovesa apirēhi.

⁴⁸Che pan nungar aico amondo vahe tecovesa.

⁴⁹Aracahe pe ramoí eta niha yuvirohu ité tembihu maná serer vahe ivi iporupirēhisa rupi. Ahe rumo opa iriño ité omano yuvireco.

⁵⁰Che rumo añehe pan iva sui ogüeyi vahe rese, acoi ava ohu vahe, nomanoi chietera.

⁵¹Ahe pan oicove vahe niha che aico iva sui ogüeyi vahe; acoi ohu vahe co pan, oicovera apirēhi vaheñā ité. Co pan amondo vaheñā, ahe che rete ité. Ahe amondora ava recouer rese” ehi judío eta upe.

⁵²Aipo hese, judío rerecuar oyeecopi-copi yuvireco aipo ehi:

—¿Mara ehira vo aipo co imbou tēi güete yande tohu viña? —ehi yuvireco.

⁵³—Supi eté aipo ahe pëu: ndapehuisse Ava Riquehir rete, ndapeihuisse avei suvi, ndaperecoi chietera tecovesa.

⁵⁴Acoi ohu vahe che rete, oiñu vahe avei che ruvi, vireco tecovesa apirēhi iyavei che ambogüerayevira ari ipa vahe pipe.

⁵⁵Esepia, che rete supi eté vahe tembiñu; che ruvi supi eté vahe avei igua.

⁵⁶Acoi ohu vahe che rete, oiñu vahe avei che ruvi, secoi che rese, che avei aico sese.

⁵⁷Che Ru, che mbousar, vireco tecovesa. Ichui che aicove; egüe ehi aveira che husar che sui yuvirecovera.

⁵⁸Añehe pan iva sui ogüeyi vahe rese. Co pan ndaheí maná pe ramoí eta yuvirohu vahe nungar. Esepia, yande ramoí opaño ité omano yuvireco. Acoi ohu vahe rumo co che rete, oicovera apirēhi vaheñā ité —ehi ava eta upe.

⁵⁹Jesús oporombohe co mbahe rese judío ñemonuhasave tecua Capernaum ve.

Ñehesa tecove apirēhisa resendar

⁶⁰Osenduse co yembohesa, setá Jesús rupi uguata vahe aipo ehi oyeupe yuvireco:

—Aipo semimombehu yavai eté seroya ãgua; ¿ava vo viroya tēira viña? —ehi yuvireco.

⁶¹Jesús rumo oicua voi eté ñehe-ñehe tēise co mbahe rese yuvireco, evocoyase oporandu:

—¿Pemboasiño tie che ñehe?

⁶²¿Mara peyera pñha che repiase peye che, Ava Riquehir, ayeupise che reco agüerve vicho viña?

⁶³Espíritu ité niha omondo tecovesa; yande retecuer rumo egüe ehi tēi vahe. Co amombehu vahe pëu ahe espíritu iyavei tecovesa.

⁶⁴Oime vite rumo amove pe pñhuve ndache reroyai vahe —ehi ava rehi upe.

Esepia, Jesús oicua ité yipisuive uma ndoviroyai chira, oicua avei uma ava omondora yamotarēhimbar upe

⁶⁵aipo ehi:

—Sese niha acoi aipo ahe pëu: “Ndipoi chietera que ava ou vaheṛã cheu che Ru nomonguerëhiise imbou” ahe —ehi.

⁶⁶ Ichuive tupri Jesús rupi uguata vahe setá oseya yuvireco; ndoguata iri eté yuvireco supi.

⁶⁷ Evocoyase oporandu doce tupri vahe güemimbohe upe:

—¿Pe avei vo che reyapa pota peye? —ehi.

⁶⁸ Simón Pedro rumo omboyeví chupe:

—Che Yar, ¿ava upe vo oroso irira? Nde güeraño ité niha erereco ñehesa tecovesa apirëhi vahe.

⁶⁹ Ore nde reroyasar ité oroico iyavei oroicua nde ndaseco marai vahe, Tüpa supi eté vahe remimbou ereico —ehi Pedro chupe.

⁷⁰ —Che niha opoporavo doce peico vahe, ñepe rumo pe pãhu pendar carugar ité —ehi Simón upe.

⁷¹ Jesús oñehe Simón Iscariote rahir, Judas, rese. Yepe doce semimbohe pãhu pendar viña, ahe rumo omondora ava yamotarëhimbar upe.

7

Jesús ndoviroyai tivri yuvireco

¹ Ipape Jesús uguata ivi Galilea rupi. Ndoico potai eté ivi Judea rese. Esepia, aheve ava judío eta oseca ité ‘yayuca’ oya yuvireco.

²⁻³ Virovise judío pieta guasu teyupa apo água yuvireco, ahese tivri aipo ehi yuvireco chupe:

—Erepita eme cohave. Eso ivi Judea ve; ahe pendar nde rupi uguata vahe avei tosepia poromondiisa nde rembiapo yuvireco.

⁴ Esepia, acoi oyapo pota vahe mbahe, noñomi eté mbahe güembiapo. Nde ereyapo ité mbahe poromondiisa. Sese iya eremboyecua opacatu ava upe —ehi tivri yuvireco chupe.

⁵ Seroyaëhisave tēi avei tivri aipo ehi yuvireco chupe.

⁶ Evocoyase vivri upe aipo ehi:

—Ndehi vitei rumo ari che so água. Pe guata água rumo opacatu ariño tēi aviyē.

⁷ Esepia, pe ndape amotarëhi eté ava co ivi pipendar; che rumo che amotarëhi ité yuvireco. Esepia, che amboyecua ité mbahe sembiapo naporai vahe chupe.

⁸ Pesoño pe pieta repia; che rumo ndaso vitei chira. Esepia, ndosupiti vitei ari cheundar —ehi vivri upe.

⁹ Evocoyase Jesús opitaño Galilea ve.

Jesús oso omu judío eta pietasave

¹⁰ Vivireta so pare, Jesús avei oso pietasave. Ndoyemboyecuai eté rumo ava upe.

¹¹ Judío eta oseca tēi yuvireco pietasave aipo ehi:

—¿Que pãha acoi mbia? —ehi tēi yuvireco.

¹² Ava rehii pãhuve setá iteanga oñehe yuvireco sese. Amove aipo ehi yuvireco: “Ahe mbia aviyē vahe”; ambuae rumo aipo ehi: “Ndahe aviyē vahe; ahe rumo ombopa tēi vahe ava” ehi yuvireco.

¹³ Nomboyecuai eté rumo oñehe yuvireco sese güerecar sui osiquiyepave.

¹⁴ Pieta mbiterse, Jesús aviyeteramo tēi oi que ava pãhuve tüparo pipe ava mbohe.

¹⁵ Judío eta rerecar evocoyase,

—¡Too, mara ehi rutei! —ehi tēi—. ¿Mara ehi vo co mbahecuá iteanga? ¡Ndoyembohe vahe niha yande yeroquisave! —ehi tēi yuvireco.

¹⁶ Judío rerecar upe rumo aipo ehi:

—Che porombohesa ndahe cheyesundar tēi, ahe rumo che mbousar suindar —ehi—.

¹⁷ Que ñepe pe pãhu pendar oyapo potase Tüpa remimbota, oicua che porombohesa ndahe vahe che suindar, ahe Tüpa suindar ité.

¹⁸ Esepia, acoi ava oñehe vahe oyesui tēi, ahe ‘tache mboetei ava yuvireco’ ohesave tēi ãgüe ehi. Co ava rumo “tomboetei che mbousar” ehi vahe, ahe supi eté vahe; ndipoi eté porombopasa iporombohesa pipe.

¹⁹ “Moisés niha omondo tēi mborocuita pëu. Que ñepe pe pãhu pendar rumo ndipoi eté omboyero vahe. ¿Mahera ru che yuca pota peye?” ehi.

²⁰ —¡Nde erereco carugar ndeyese! ¿Ava vo nde yuca pota? —ehiño ava eta yuvireco chupe.

²¹ Aipo ehi ava upe:

—Cuese acoi ayapose mbahe mbihusa ari pipe, ahese, “¡Too, mahera ãgüe ehi!” peyeño acoi cheu.

²² Pe avei rumo amove peporaviçui mbituhusa ari pipe peporombocircuncidase porocuaita Moisés omondo vahe reroyasave. (Ahe circuncisión rumo ndahei Moisés suindar, ahe rumo yipive vahe pe ramo suindar ité.)

²³ Oyepotase rumo çhìhivahe mbocircuncida àgua mbituhusa ari pipe tupri pèu, peyapoño rane ité mborocuaita mboaviye àgua. ¿Mahera ru cheuño pemboasi ñepe mbia mbituhusa ari pipe ambogüera tupri vahe rese?

²⁴ “Oyavi evocoi” peye voi rene catu ava upe; peicua tupri rane ‘¿supi eté pìha?’ pe yapave —ehi Jesús ava eta upe.

Jesús oñehe güecocuer Tüpa suindar rese

²⁵ Evocoiyase amove Jerusalén pendar mbia aipo ehi oyeupe yuvireco:

—¿Ndahei vo acoi co osea tõi yuca àgua yuvireco? —ehi—.

²⁶ Ahe ité co niha co ava pãhuvè oñehe oico, ndipoi eté que mara ehi vahe yuvireco chupe. ¿Omoha pìha mborerercuar co mbia Poropisiosar seco àgua yuvireco?

²⁷ Yande rumo yaicua que sui turi. Acoi ose rumo Poropisiosar ité coiye, ndipoi chietera que ava oicua vahe iyusa —ehi yuvireco.

²⁸ Evocoiyase aipo renduse oporombohe vitesevè tũparove, oñehe pìrata aipo ehi:

—¡Pe niha aipo, “Oroicua vahe” peye; “Oroicua avei iyusa” peye cheu! Ndayui rumo che remimbotar sui tõi. Oime rumo che mbousar, ahe seroyapri ité. Ahe pe ndapeicuai vahe.

²⁹ Che rumo aicua ité. Esepia, che ichui ayu iyavei ahe ité che mbou pèu —ehi.

³⁰ Aipo ihese, oipisi pota yuvireco soquenda àgua viña. Aní eté rumo. Esepia, ndoyepota vitei ihari chupe.

³¹ Setá iteanga rumo ava viroya iyavei aipo ehi yuvireco:

—Ouse Poropisiosar, ¿oyapo catura pìha mbahe poromondiisa co mbia sui? —ehi yuvireco.

Fariseo oyocuai sundao tũparo rãrosareta Jesús pisi àgua

³² Fariseo eta osendu ava ñehesa Jesús resendar yuvireco. Ahe ité iyavei pahì eta rerecuar omondo sundao tũparo rãrosar Jesús pisi àgua yuvireco.

³³ Jesús rumo aipo ehi:

—Aicove vitemira pe rese çhìhi rupive. Ipare voi ayevíra che mbousar pìri vicho —ehi—.

³⁴ Che reca tẽira peye, ndapeicatu chietera rumo che reca. Esepia, ndapeicatu chiaveira peso vahe rã che recosave —ehi ava eta upe.

³⁵ Evocoiyase judío oporandu-randu oyeupe yuvireco:

—¿Que pìha aipo osora yande sui seca iriẽhi àgua? ¿Osora tie que amombri yande mu oñemosai vahe pãhu rupi ambuae ava ndahei vahe yande mu mbohe àgua?

³⁶ ¿Mara oya pìha evocoiyase aipo, ‘Che reca tẽira peye, ndapeicatu chietera rumo che reca. Esepia, ndapeicatu chiaveira peso vahe rã che recosave’ ehi yandeu? —ehi-ehi tõi oyeupe yuvireco.

Espíritu iai ndopai vahe nungar

³⁷ Pieta ipa, ahe imboeteisa catu vahe, ahe ari pipe Jesús oñehe pìrata ohã aipo ehi:

—Acoi que ava ihusei vahe, toyugüeru cheu. Che evocoiyase tamboihu —ehi—.

³⁸ Esepia, inungar aipo ehi vahe icuachiapri pipe, che reroyasar piha sui osẽra iai ndopai vahe nungar —ehi.

³⁹ ‘Che reroyasar oipisira Espiritu curi’ ohesave aipo ehi. Espiritu rumo ndou vitei ahese. Esepia, Jesús ahese ndoyevi vitei avei güecosa porañetesave.

Ava rehii oyemboyaho Jesús recocuer sui yuvireco

⁴⁰ Osenduse ava rehii aipo nungar, amove aipo ehi:

—Supi eté co mbia Tüpa ñehe mombehúsar imombehupri ou vahe —ehi yuvireco chupe.

⁴¹ Ambuae aipo ehi:

—Co Poropisiosar ité —ehi yuvireco.

Ambuae rumo aipo ehi yuvireco:

—¿Mahera aipo Galilea sui tõi oura Poropisiosar viña? —ehi—.

⁴² Icuachiapri pipe rumo aipo ehi Poropisiosar oyesura mborerercuar guasu David sui iyavei ahera Belén pendar, David recua pendar itera —ehi.

⁴³ Evocoiyase ava oyemboyaho-yaho yuvireco Jesús recocuer sui tõi.

⁴⁴ Amove ava viraso pota tõi yuvireco soquenda; ndipoi eté rumo ègüe ehi vahe yuvireco chupe.

Judío rerecuar ndoviroyai Jesús yuvireco

⁴⁵ Sundao tũparo rãrosar oyevi yuvireco Jesús recosa sui. Fariseo eta iyavei pahì eta rerecuar evocoiyase oporandu yuvireco chupe aipo ehi:

—¿Mahera vo ndaperui! —ehi yuvireco chupe.

⁴⁶ Sundao tūparo rārosar evocoiyase aipo ehi:

—¿Ndipoi eté que ava oñehe vahe ahe mbia nungar! —ehiño yuvireco.

⁴⁷ Fariseo eta iyavei mborerecuareta evocoiyase aipo ehi yuvireco:

—¿Pe avei eté rumo peyembopa uca chupe? —ehi—.

⁴⁸ Ndipoi eté niha ore mboetas mborerecuar iyavei fariseo viroya vahe yuvireco.

⁴⁹ Co ava rehii tēi ěgüe ehi yuvireco. Ahe rumo ndoicua vahe Tūpa porocuita yuvireco, sese inemoirosavrive ité yuvirecoi —ehi sundao tūparo rārosar upe yuvireco.

⁵⁰ Evocoiyase Nicodemo, acoi oso vahe pītu pipe Jesús piri, ahe avei eté fariseo pāhuve secoi, ahe aipo ehi:

⁵¹ —Yandeundar porocuita mboaviye āgua ndiyai, “Ereyavi mbahe” yahe voiño tēi que ava mbahe sembiapocuaēhi viteseve —ehi.

⁵² Evocoiyase omboyeve yuvireco:

—¿Nde avei tie ereico Galilea pendar? Eyembohe tupri icuachiapri pipe. Ipípe eresepiara ndipoi eté que ñepei ou vahe Galilea sui Tūpa ñehe mombehusar —ehi mborerecuareta Nicodemo upe yuvireco.

Cuña oyemboaguasa tēi vahe resendar

⁵³ Ipáre opa yuvirasos ñepei-peí güeta rupi.

8

¹ Jesús rumo oso ivitri Olivo ve.

² Ahere ayihive cōhese, oyeve tūparove. Ahesse opacatu ava oyemboya yuvireco sese. Ahe evocoiyase oguapi oī oporombohe.

³ Evocoiyase Moisés porocuita rese oporombohe vahe, fariseo eta avei güeru Jesús upe cuña oyemboaguasa tēi vahe yuvireco ava rehii rovai,

⁴ aipo ehi yuvireco chupe:

—Pporombohesar, co cuña iyemboaguasase cuimbahe rese osesapiha ñepei ava.

⁵ Moisés porocuita rumo ore cuai co nungar cuña yuca āgua ita pipe. ¿Mara ere vo catu nde co nungar upe? —ehi fariseo eta yuvireco chupe.

⁶ Ahe rumo secoāhasave tēi aipo ehi yuvireco ‘toyavi angahu oñehe yandeu’ oya tēi. Ahe rumo oyaivi, ombahecuachía ocuā pipe ivi rese.

⁷ Evocoiyase oporandu vitese ava yuvireco, opūha aipo ehi:

—Que ñepei pe pāhu pendar ndoyemboangaipai vahe, ahe rane toyapi ita pipe —ehi.

⁸ Oyaivi iri, ombahecuachía ivi rese.

⁹ Osenduse rumo judío rerecuareta, omboipi ñepei-peí yuvinosse yuvireco, cuacua catu vahe sui rane yuvinosse. Opacatu yuvinossepase, Jesús güerañomi cuña rese opita yuvireco.

¹⁰ Evocoiyase opūhase, ahesse aipo ehi chupe:

—Cuña, ¿que que ru ava? ¿Ndipoi eté que ñepei opita vahe nde mocañi āgua? —ehi

¹¹ —Aní eté, che Yar, ndipoi eté —ehi.

Evocoiyase aipo ehi chupe:

—Che avei ndoromocañi tēi potai. Sese cūrítei eso, ereyapo iri eme angaipa —ehi cuña upe.

Jesús tesapesa ava upe secoi

¹² Jesús oñehe iri ava eta upe aipo ehi:

—Che aico tesapesa ava eta upe. Acoi che rupi secoi vahe virecora tesapesa omondo vahe tecovesa apirēhi vahe iyavei ndaseco iri chietera pītumimbisa nungar mbahe-mbahe tēi vahe pipe —ehi.

¹³ Evocoiyase fariseo eta aipo ehi yuvireco:

—Nde ereñehe ndeyese ae tēi. Sese nde ñehesa ndaseroyapri eté —ehi yuvireco chupe.

¹⁴ —Che ñehe rumo supi vahe ité. Yepe cheyese ae añehe viña, che rumo aicua que sui ayu, que asora no. Pe rumo ndapeicuai eté.

¹⁵ Pe peseca ava rembiapo cua tupri āgua ava tēi pihañemoñeta rupi. Che rumo ndayui evocoi nungar mbahe apo.

¹⁶ Asecase ava rembiapo cua tupri āgua, ahe supi tupri vahe ité. Esepia, ndahei che ae tēi ěgüe ahe, che Ru, che mbousar rumo secoi che rese.

¹⁷ Porocuita pēu icuachiapri pipe aipo ehi: “Que oimese ñuvirío ava oyoya tupri omombehu vahe mbahe, ahesse voi seroyasara” ehi.

¹⁸ Supi eté che ae ité niha añehe cheyese viña, che Ru, che mbousar, reseve rumo oyoya tupri oroñehe —ehi.

¹⁹ Aipo ihese, oporandu yuvireco chupe:

—¿Que vo aipo nde Ru? —ehi yuvireco.

—Pe ndache cuai eté peye, che Ru avei ndapeicuai. Che cuase rumo peye viña, che Ru avei peicuaru viña —ehi fariseo eta upe.

²⁰ Jesús aipo ehi tũparo pipe, guarepochi monuhapri riru ipive oporombohe ohã. Ndoi eté rumo ahese osoquenda vaheerã. Esepia, ndoyepota vitei eté ahese ihari chupe.

Jesús, “Che sosave pe ndapeicatu chira peso” ehi

²¹ Jesús aipo ehi iri:

—Che asose, che reca tẽira peye. Pe rumo opara pemaño pe angaipa reseve. Che sosave ndapeicatu chiera peso vaheerã —ehi.

²² Aipo ihese, judío eta aipo ehi yuvireco:

—¿Oyeyucara pĩha ahe ae; ayeve pĩha aipo ehi yandeu? —ehiño yuvireco chupe.

²³ —Pe rumo ivi pendar peico; che rumo ivatendar ité aico. Iyavei pe co ivi pipendar tẽi avei peico; che rumo ndahei eté co ivi pipendar aico.

²⁴ Sese niha acoi aipo ahe pẽu: “Pemaño itera pe angaipa reseve” ahe. Esepia, ndache reroyaise peye, pe angaipa reseve ité pemañoia —ehi fariseo eta upe.

²⁵ Aipo ihese,

—¿Ava ité vo nde ereico? —ehiño yuvireco chupe.

—Yipisuive niha acoi amombehu vichico pẽu.

²⁶ Setã iteanga areco che ñehe ãgua pẽu mbahe pe rembiavi rese. Che mbousar niha supi eté vahe. Ahe ñehe asendu vahe, amombehu opacatu ava upe —ehi fariseo eta upe.

²⁷ Ahe rumo ndosenducuai eté Vu rese ñehese yuvireco.

²⁸ Sese aipo ehi fariseo upe:

—Pesupise rumo Ava Riquehir ivira rese, ahese voi peicuaru che recocuer, ahese avei peicuaru cheyesui tẽi mbahe ndayapoise; che rumo amombehu che Ru che mbohesa güeraño.

²⁹ Che mbousar niha che rupive ité secoi; ndache reyai eté. Esepia, ayapoño ité mbahe semimbotar yepi —ehi ava eta upe.

³⁰ Aipo ihese, setã iteanga ava viroya yuvireco.

Ava Tũpa rahir ité yuvirecoi vahe iyavei ava angaipa pipe tẽi yuvirecoi vahe

³¹ Evocoyase Jesús aipo ehi judío eta viroyasar upe:

—Peico tuprise che ñehe rupi, peicora che remimbohe supi eté vahe.

³² Peicua aveira mbahe supi eté vahe. Ahe evocoyase pe renosera mbiguai nungar pe recosa sui —ehi.

³³ Judío evocoyase aipo ehi:

—Ore rumo Abraham suindar ité oroico, ndoroicoi vahe ité que ava rembiguai tẽi. ¿Mahera ru aipo nde, “Pesẽra mbiguai nungar pe recosa sui” ere oreu? —ehiño judío eta yuvireco chupe.

³⁴ Evocoyase aipo ehi:

—Supi eté aipo ahe pẽu: acoi opacatu ava oyemboangaipa vahe, inungar mbiguai tẽi, ãgüe ehi oangaipa rereco yuvireco.

³⁵ Mbiguai tẽi ndahei güerecar rẽta pipe nara ité; tahir rumo opitaño itera güeta pipe nara.

³⁶ Sese Tahir pe renosese mbiguai tẽi pe recosa sui, supi eté ndapeico iri mbiguai nungar.

³⁷ Aicua niha Abraham suindar pe recosa. Pe rumo che yuca potaño peye. Esepia, ndaperoyai eté che ñehe.

³⁸ Che niha amombehu che Ru mbahe omboyecua vahe cheu, pe avei peyapo mbahe pe yesupa remimombehu —ehi judío eta upe.

³⁹ —¿Ore yesupa rumo Abraham! —ehi judío eta yuvireco chupe.

—Abraham suindar ité peicose, peyapora mbahe sembiapo nungar viña.

⁴⁰ Che rumo, “Tũpa che mbohe mbahe supi eté vahe rese” ahe tẽi pẽu. Pe evocoyase che yuca potaño ité peye. ¡Abraham rumo ndoyapoi eté co nungar mbahe!

⁴¹ Esepia, pe peyapo mbahe peyesupa rembiapo tẽi eté —ehi.

Evocoyase ava aipo ehi yuvireco:

—¿Ndahei rumo ore oyesu tẽi vahe oroico; ore rumo orovireco ñepeño ité ore yesupa, ahe Tũpa! —ehiño yuvireco.

⁴² Evocoyase aipo ehi co judío eta upe:

—Tũpa ité pe yesupase rumo, che raisura peye viña. Esepia, che ayu Tũpa sui. Sese cũritei cohava aico. Ndahei cheyesui tẽi ayu, Tũpa rumo che mbou.

⁴³ ¿Mahera pĩha ndapesenducua catui eté mbahe che remimombehu? Esepia, ndapeyapisaca potai eté che ñehe rese.

⁴⁴ Peyesupa niha Carugar ité, sese niha pe ahe tupri avei peico. Peyapo pota mbahe semimbotar tẽi. Esepia, Carugar yipisuive ité oporoyuca serai vahe. Ndoiapo vahe ité

mbahe supi tupri vahe, noñehei avei mbahe supi eté vahe rese. Semirasa iñehe ité. Esepia, semirañete ai vahe ité; ahe ité niha yipindar semira tēi vahe.

⁴⁵ Che rumo añehese mbahe supi tupri vahe rese, ndache reroyai eté peye.

⁴⁶ ¿Ava pīha pe pāhu pendar oicua mbahe che rembiavi? ¡Aní eté! Che añehe mbahe supi eté vahe rese pēu, ¿mahera ru evocoyase ndache reroyai eté peye?

⁴⁷ Acoi ava Tūpa suindar, ahe osendu pota rai iñehe; pe rumo ndahei eté Tūpa suindar peico. Sese ndapesendu potai eté iñehe —ehi Jesús judío eta upe.

Poropīsirosar yipive catu vahe Abraham sui

⁴⁸ Evocoyase judío eta aipo ehi Jesús upe yuvireco:

—Supi eté, ore oroicua nde Samaria iguar tēi ereico, carugar ité erereco ndeyese —ehi yuvireco chupe.

⁴⁹ —Che ndarecoi eté carugar cheyese. Che rumo che Ru amboetei; pe rumo ndache mboetei eté peye.

⁵⁰ Iyavei che ndasecai ava che mboetei āgua. Oime rumo ñepeoi oipota vahe. Ahe niha omondora ava rembiapo repri chupe.

⁵¹ Supi eté aipo ahe pēu: acoi omboyeroa vahe che ñehe, nomanoi chietera yuvireco —ehi judío eta upe.

⁵² Evocoyase judío omboyeví yuvireco chupe aipo ehi:

—Cūrítei oroicua ité cute nde erereco carugar ndeyese. Esepia, Abraham iyavei opacatu Tūpa ñehe mombehusar omanopa ité yuvireco. ¿Mahera ru aipo nde, ‘Acoi che ñehe reroyasar nomanoi chietera’ ere?

⁵³ ¿Nde tie ivate catu ereico ore ramoi Abraham sui? Esepia, ahe omano ité iyavei ambuae Tūpa ñehe mombehusar omanopa ité yuvireco. ¡Mbahe angahu vo co evocoyase eremoha ndeyese! —ehi yuvireco chupe.

⁵⁴ —Che ae tēi ayemboeteise mbahe che rembiapo pipe, ahese ndahei chira supi vahe viña. Che Ru rumo che mboetei, chupe ité: “Ore Tūpa” peye.

⁵⁵ Pe rumo ndapeicuai eté. Che rumo aicua. “Ndaicuai” ahese, evocoyase semirañete ai vahe aicora viña inungar pe peico. Che rumo supi eté aicua. Sese niha amboyeroa iñehe.

⁵⁶ Esepia, pe ramoi Abraham oyemboviha ‘asepiara ihari oyepotase’ oya cheu. Osepia ité niha. Sese oviharete ité —ehi judío eta upe.

⁵⁷ Evocoyase judío eta:

—¿Mara erera vo aipo Abraham repia ndererecomi viteise cincuenta araviter? —ehiño yuvireco chupe.

⁵⁸ —Supi eté aipo ahe pēu: che aicove vahe Abraham yesuēhi viteseve —ehi.

⁵⁹ Aipo ihese, oipisipa ita yuvireco yapi āgua. Ahe rumo ahe ramoseve oñemi ava eta pāhuve, osēño ité oso tūparo sui.

9

Jesús ombogüera mbia ohasa suive ndasesapisoi vahe

¹ Jesús oguatase ocar rupi, osepia mbia ohasa suive ndasesapisoi vahe.

² Ore semimbohe oroico vahe, oroporandu chupe:

—Ore mbohesar, ¿mahera pīha co mbia ndasesapisoi eté oha? ¿Oyesupa angaipa sui pīha? ¿Oangaipa sui ae tie? —orohe chupe.

³ —Ndahei eté oangaipa sui, ndahei avei oyesupa angaipa sui; co rumo ēgüe ehi Tūpa mbahe sese mboyecua āgua.

⁴ Sese oime vitesa ari yandeu che mbousar poraviquisa apo āgua, iya ité ahe yayapo. Esepia, pītura, ahese ndayaicatui chietera mbahe apo.

⁵ Co ivi pipe che recove vitesa rumo, che aico ava upe tesapesa nungar —ehi oreu.

⁶ Aipo ohe pare, ondivi ivive, güendi pipe omoaqui vahe ivi omondo ndasesapisoi vahe resa rese.

⁷ Ipare aipo ehi chupe:

—Eso, tereyovai igua Siloé serer vahe pipe —ehi (ahe serer ‘imondopri’ oya aipo ehi).

Ndasesapisoi vahe evocoyase oso, oyovai. Oyevise ichui, omahe tupri ité.

⁸ Evocoyase sēta ivirindar iyavei ava oicua vahe sesapisoēhise oporanduse guarepochi rese aipo ehi yuvireco:

—¿Ndahei vo acoi co uguapi oī guarepochi rese oporandu yepi? —ehi yuvireco.

⁹ Amove ambuae ava aipo ehi:

—Taa, ahe ité —ehi.

Ambuae rumo aipo ehi yuvireco:

—Ndahei ahe. Aviye tupri ité rumo ahe —ehi.

Ahe mbia rumo aipo ehi:

—Taa, che ité niha ahe aico —ehi.

¹⁰ Evocoyase oporandu yuvireco chupe:

—¿Mara ere vo co esareco? —ehi.

¹¹ —Acoi mbia, Jesús serer vahe, ahe omoaquimi güendi pipe ivi, oipichi che resa rese aipo ehi cheu: ‘Eso igua Siloé ve, eyovai’ ehi. Evocoyase aso, ayovaise, ahese amahe tupri ité —ehi.

¹² —¿Que vo ahe mbia? —ehi yuvireco chupe.

—Ndaicuai, ¿que vo catu? —ehiño ava güeta cotindar uve.

Fariseo oporandu ndasesapisoi vahe cuera agüer rese yuvireco

¹³⁻¹⁴ Mbituhusa ari pipe aipo Jesús omoaquimi güendi pipe ivi ndasesapisoi vahe mbogüera água. Sese viraso ndasesapisoi vahecuer fariseo eta rovai yuvireco.

¹⁵ Fariseo oporandu iri yuvireco co mbia upe: “¿Mara ere ité vo co esareco?” ehi. Ahe mbia aipo ehi:

—Omondo ivi güendi pipe omoaqui vahe che resa rese. Ichui ayovai. Ipare voi asareco —ehi.

¹⁶ Evocoyase ambuae aipo ehi yuvireco chupe:

—Aipo mbia ndahei eté revo Tüpa suindar. Esepia niha, nomboetei eté mbituhusa ari —ehi yuvireco.

Ambuae evocoyase aipo ehi yuvireco:

—¿Mara ehira aipo poromondiisa apo ava yangaipa vahe viña? —ehiño yuvireco.

Oyevirati tēi ipihañemoñetasa.

¹⁷ Sese oporandu iri ndasesapisoi vahecuer upe yuvireco aipo ehi:

—Nde no, ¿mara ehi nde pihañemoñeta co mbia rese? —ehi.

Ahe evocoyase aipo ehi:

—Che amoha ité Tüpa ñehe mombehusar secose —ehi.

¹⁸ Ahe fariseo rumo ndoviroyai eté icuerala yuvireco, oichoho uca rane ité iyésupa yuvireco.

¹⁹ Chupe oporandu aipo ehi:

—¿Pe rahir ité vo co? ¿Ndasesapisoi oha? ¿Mara ehi vo co cüritei osareco no? —ehi iyésupa upe yuvireco.

²⁰ —Ore rahir ité niha co, ndasesapisoi oha.

²¹ ¿Mara ehi vo catu co cüritei osareco? iyavei ¿ava vo catu ombogüera? ¿Ndoroicuai eté! Peporandu chupe. Ocuacua niha; ahe ae oicua ucara pēu —ehiño iyésupa yuvireco fariseo upe.

²² Iyésupa rumo osiquiyepave tēi aipo ehiño yuvireco. Esepia, fariseo opa ité oye-moingatu yuvireco ava “Jesús Poropisirosar secoi” ehi vahe oñemonuhasa sui ñepeí reseve imombo água.

²³ Sese niha iyésupa aipo ehiño yuvireco: “Peporandu chupe. Ocuacua niha” ehiño.

²⁴ Evocoyase fariseo güeru uca iri acoi mbia imbogüerapri yuvireco, aipo ehi yuvireco chupe:

—Emombehuño oreu Tüpa rovaque mbahe supi tupri vahe. Esepia, ore oroicua ité evocoi mbia angaipa viyar seco rese —ehi.

²⁵ Ahe evocoyase omboyevi chupe:

—Che ndaicuai eté angaipa viyar tie revo. Co güeraño catu che aicua: che ndacheresapisoi vahecuer aico; cüritei rumo asareco —ehi.

²⁶ Evocoyase oporandu iri yuvireco chupe:

—¿Mbahe vo oyapo ndeu? ¿Mara ehi vo nde mbosareco? —ehi yuvireco chupe.

²⁷ —Amombehu niha acoi pēu. Pe rumo ndache reroyai eté peye. ¿Mahera vo peipota amombehu vite vahe rā pēu? ¿Pe avei tie peguata pota supi? —ehi fariseo eta upe.

²⁸ Ahese oñehe rai tēi yuvireco chupe:

—Nde ahe mbia rupindar tēi ereico. Ore rumo yande ramoí aracahendar Moisés rupi oroguata vahe.

²⁹ Esepia, oroicua ité Tüpa oñehese Moisés upe. Aipo mbia rumo ndoroicuai eté que sui osé —ehi yuvireco chupe.

³⁰ —¿Mara peye rutei pe ndapeicuai que suindar ahe! Che rumo che mbosareco.

³¹ Supi eté, yaicua Tüpa ndosendui eté ava angaipa viyar ñehe; ava omboteisar iyavei viroyasar ñehe güeraño ité niha osendu.

³² Esepia, ndipoi eté que avaño tēi ava oyesu sui ndasesapisoi vahe ombogüera vahe.

³³ Ahe rumo ndaheise Tüpa suindar ou vahe viña, ndoicatui chietera revo mbahe apo viña —ehi fariseo eta upe.

³⁴ Evocoyase fariseo eta aipo ehi yuvireco chupe:

—¿Nde co oangaipa reseve oha vahe tēi, ore mbohe pota mbahe rese eve? —ehi.
Ipare omose ñepeí reseve oñemonuhasa sui yuvireco.

Jesús reroyasarēhi ndasesapisoi vahe nungar tēi

³⁵ Jesús oicua ndasesapisoi vahecuer mombosa. Vupitise aipo ehi chupe:

—¿Ereyeroya nde Ava Riquehir rese? —ehi.

³⁶ Mbia evocoyase aipo ehi chupe:

—Che mbohesar, emombehumi cheu; tayeroya catu ru sese —ehi.

³⁷ —Eremahe niha co sese; che ité ahe aico —ehi ndasesapisoi vahecuer upe.

³⁸ Evocoyase mbia oñenopiha sovai:

—Oroviroya, che Yar —ehi chupe.

³⁹ Ichui aipo ehi:

—Che ayu co ivi pipe mbahe supi tupri vahe apo água; ava ndasesapisoi vahe nungar upe mbahe supi eté vahe che Ru suindar mboyecua água iyavei ava oicua tēi vahe mbahe Tupa suindar mboesapisoēhi iri água —ehi.

⁴⁰ Evocoyase ambuae fariseo eta yuvirecoi vahe cōimi ichui osenduse aipo ñehesa, oporandu yuvireco chupe:

—¿Ore avei tie ndasesapisoi vahe nungar oroico? —ehi.

⁴¹ Evocoyase omboyevi ahe fariseo upe:

—Peicose ndasesapisoi vahe nungar viña, “Peyavi mbahe” ndehi chietera Tupa pe angaipa rese pēu viña. Pe rumo, “Ore oroicua tupri Tupa suindar mbahe” peye tēi. Sese Tupa, “Peyavi mbahe” ehi eté pēu —ehi Jesús fariseo eta upe.

10

Jesús ovesa rārosar nungar

¹ “Supi eté aipo ahe pēu: acoi ava co coti rupi tēi yuviroique vahe ovesa rēta pipe, ahe imonda rai vahe tēi yuvirecoi.

² Oique vahe rumo oquendipi rupi eté, ahe sārosar ité secói.

³ Oquendipi rārosar omboi chupe. Evocoyase ovesa rārosar oñehe serer rupi güeimba ovesa upe senose água sēta sui. Ahe evocoyase oicua iñehe yuvireco.

⁴ Güeimba ovesa renose pare oguata senonde; seimba ovesa evocoyase oguata saquicuerive. Esepia, oicua ité iñehe yuvireco.

⁵ Ndoguatai eté rumo oyarēhi rupi yuvireco; yuvinoña-noñaño ichui. Esepia, ndoicuai eté iñehe” ehi

⁶ omboyoya güecocuer ovesa rārosar rese. Ava rumo ndosenducuai eté yuvireco.

Jesús ava rārosar aviye vahe

⁷ Evocoyase Jesús aipo ehi iri: “Supi eté, aipo ahe pēu: che año ité oquendipi nungar aico ovesa upe.

⁸ Opatatu ava yugüeru vahe che renonde, imonda rai vahe nungar tēi yuvirecoi. Ava cheundar rumo ndoviroyai eté yuvireco.

⁹ Che rumo oquenda nungar aico. Acoi oique vahe che rupi, ahera ipisiropirā yuvirecoi. Iyavei inungar acoi ovesa oique vahe güeta pipe, ichui osē capihí reca água igua yepi, egüe ehira che reroyasar yuvireco.

¹⁰ “Imonda rai vahe rumo omonda água tēi ou, oporoyuca água, mbahe mocañi água tēi avei. Che rumo ayu ‘tovireco ava tecovesa ndopai vahe rā ité yuvireco’ viya.

¹¹ Che ité ava rārosar aviye vahe aico. Sese ayemoingatu tupri che recocuer mondo água ava cheundar repirā;

¹² acoi guarepochi repirā tēi oporaviqui vahe rumo, osepiase mahembiar oñaro ai vahe, oseypaño güemiaro, oña oso. Esepia niha, ovesa ndahei eté seimba, ndahei avei eté ahe sārosar ité secói. Evocoyase mahembiar oñaro ai vahe omondi-mondii eté ipisi água.

¹³ Evocoi mbia oñaño. Esepia, guarepochi repirā tēi oporaviqui. Sese niha ndosaisui eté güemiaro ovesa.

¹⁴⁻¹⁵ “Che rumo ava rārosar aviye vahe ité aico; che Ru che cua ité. Che evocoyase aicua avei che Ru. Sese che avei aicua che reimba ovesa eta. Ahe avei che cua yuvireco. Che niha amondo che recocuer sepirá yuvireco.

¹⁶ Areco avei ambuae ité che reimba ovesa. Ahe avei aru pota che mboyeroya vahe rā yuvireco. Ahese ñepeí reseve guasu che remiaro yuvirecoira.

¹⁷ “Che Ru niha che raisu ité. Esepia, amondo itera che recocuer manosave. Ipare rumo acuerayevira.

¹⁸ Ndoicatui chira ava ahe ae tēi che yuca água; che tietei rumo amondora che récocuer che remimbotar rupi eté. Che areco ité píratasa imondo água, che cuerayevi iri água avei. Sese ité niha che Ru che cuai” ehi güemimbohe eta upe.

¹⁹ Osenduse judío eta aipo nungar ñehesa, opa ipihañemoñeta yoavirati yuvireco.

²⁰ Setá iteanga ipáhu pendar aipo ehi:

—¿Mahera vo co pemboyeroya? Vireco ité carugar oyese, ndayaracuai eté —ehi yuvireco chupe.

²¹ Ambuae rumo aipo ehi yuvireco:

—Ndipoi eté rumo que ava na ehi vahe oñehe carugar rerecosar. ¿Omboesapiso tie carugar rerecosar ava? —ehi amove judío yuvireco Jesús upe.

Judío rerecuar ndoyambotai Jesús yuvireco

²² Ari sôhisa vahe pipe tecua Jerusalén ve tûparo rovasagüer pieta oyepota.

²³ Ahese Jesús oguata oico tûparo Salomón oyapo vahecuer rocupe ivi rupi.

²⁴ Evocoyase judío rerecuareta oyere tupri yuvireco sese aipo ehi yuvireco chupe:

—¿Marase rutei vo eremombehu tupira Poropísiosar nde recosa oreu? Emombehu tupri catu ñepe reseve oreu —ehi yuvireco chupe.

²⁵ —Amombehu niha acoi pëu, ndache reroyai eté rumo peye. Mbahe ayapo vahe che Ru mborerecuasa pipe omboyecua ité Poropísiosar che recosa;

²⁶ pe rumo ndache reroyai eté peye. Esepia, pe ndahei eté che remiaro ovesa peico.

²⁷ Che remiaro ovesa rumo oicua che ñehe. Che avei aicua ahe yuvireco. Ahe evocoyase che rupi oguata yuvireco.

²⁸ Amondo avei tecovesa apirêhi yuvireco chupe icañiêhi âgua; ndipoi chietera que ava virocua iri vaheâ che sui.

²⁹ Che Ru niha ombou cheu. Esepia, ahe ipîrata catu opacatu ava sui. Ndipoi chietera que ñepe ava oicatu vahe serocua che Ru sui.

³⁰ Che Ru iyavei che oroico ñepeñi ité —ehi judío rerecuareta upe.

³¹ Aipo ihese, judío rerecuareta osupipa iri ita yuvireco yapi âgua.

³² Ahe chupe rumo aipo ehi:

—Setá mbahe poromondiisa aviye vahe pe rovaque ayapo che Ru pîratasa pipe. ¿Uma che rembiapo aviye vahe sui che api-api pota peye ita pipe? —ehi judío rerecuareta upe.

³³ Judío rerecuareta omboyevi yuvireco chupe:

—Nande api-apisai chira ita pipe que mbahe nde rembiapo aviye vahe rese. Co rese rumo êgüe orohera ndeu. Esepia, nde ereñehe rai têi Tûpa rese. Nde moco ava têi ereico. Nde rumo ereyeapo Tûpa ndeyeupe ae —ehi yuvireco chupe.

³⁴ Evocoyase aipo ehi ahe ava upe:

—Pëundar mborocua ita icuachiapri pipe niha aipo ehi: ‘Che aipo ahe pëu: pe tûpa pâve ité peico’ ehi.

³⁵ Yaicua niha icuachiapri pipendar ndiyai yayamotarêhi. Esepia, Tûpa aipo ehi: ‘Pe tûpa pâve ité peico’ ehi evocoi ava oñehe pîsaris upe.

³⁶ Che niha che Ru Rembiporavo aico. Ahe che mbou co ivi pipe. ¿Mahera ru evocoyase, ‘Nde ereñehe rai têi Tûpa rese’ peye cheu, ‘Che Tûpa Rahir aico’ ahese pëu?

³⁷ Esepia, acoi ndayapoise mbahe che Ru remimbotar, ahese ndache reroyai chietera peye viña.

³⁸ Yepe ndache reroyai chira che recocuer rese peye viña, mbahe ayapose rumo ahe têi peroyara. Sese tapeicua ñepe reseve che Ru secoise che rese iyavei che sese che recosa —ehi oamotarêhimbareta upe.

³⁹ Osoquenda pota iri yuvireco viña; Jesús rumo osoño ipáhu sui.

⁴⁰ Oyevi iai Jordán rovai. Aheve acoi Juan yipindar oporoâpiramo. Aheve opita.

⁴¹ Ava rehii yuviraso sepia, aipo ehi yuvireco:

—Yepe Juan ndoyapoi mbahe poromondiisa viña. Opacatu mbahe omombehu vahe rumo co mbia resendar supi eté —ehi yuvireco.

⁴² Setá iteanga ava Jesús viroya yuvireco aheve.

11

Lázaro mano agüer

¹ Oime ava imbaheasi vahe serer Lázaro, tecua Betania pendar. Güeindri Marta iyavei María reseve yuvirecoi aheve.

² Ahe María, oipiyere vahe mbahe siacua vahe yande Yar pi rese. Ipape oiquiti oha pipe.

³ Ahe seindri omondo oñehe Jesús upe yuvireco aipo ehi:

—Ore Yar, nde mboripar, nde rembiaisu, imbaheasi ou —ehi.

⁴ Ahe osenduse aipo ehi:

—Co mbaherasisa rumo ndahei ahe imano âgua ité. Êgüe ehi rumo Tûpa reco porañetesa mboyecua âgua iyavei Tahir reco porañetesa mboyecua âgua avei —ehi.

⁵ Yepe osaisú iteanga Marta icupihir reseve iyavei iquivri Lázaro viña,

⁶ oyanduse rumo Lázaro mbaherasisa, opita viteño ité ñuvirío ari güecosave.

⁷ Ipare omombehu ore supi oroico vahe upe:

—Yavevi iri ivi Judea rupi —ehi.

⁸ Ore rumo aipo orohe chupe:

—Ore mbohesar, cuesemi tēi acoi judío rerecuareta ahe pendar nde yuca pota ita pipe yuvireco; ¿cūritei co ereso pota iri aheve? —orohe chupe.

⁹ Oreu rumo aipo ehi:

—Ñepeí ari niha vireco doce hora. Supi eté acoi uguata vahe ari pipe ndoyepiapi eté. Esepia, osepia ité co ivi resapesa;

¹⁰ acoi uguata vahe rumo pítu pipe, oyepiapi eté. Esepia, ipane tesapesa chupe —ehi oreu.

¹¹ Ipare aipo ehi:

—Yande mboripar Lázaro oque tēi. Che rumo amomahera —ehi.

¹² Evocoyase ore aipo orohe chupe:

—Ore Yar, oque tēise, ocuerara —orohe.

¹³ ‘Omano ité’ oyapave tēi aipo ehi. Ore rumo orepíhañemoñeta: “Oque tēi revo” orohe chupe viña.

¹⁴ Ipare rumo omombehu tupri ité aipo ehi oreu:

—Lázaro omano ité.

¹⁵ Aviharete che ndaicoise aheve. Esepia, ēgüe ehise ité aviye catura pēu pe che roroya āgua. Yaso ru catu sepia —ehi oreu.

¹⁶ Evocoyase Tomás, Gemelo serosa vahe, aipo ehi ore imboetasa oroico vahe upe:

—Yaso avei ru yande yamano vaheerā supi —ehi.

Jesús cuerayevisa seci iyavei tecovesa

¹⁷⁻¹⁸ Betania namombriimi Jerusalén sui, tres kilómetro tupri. Evocoyase ore oroyepota senise ahe tecuave, orosendu “cūritei irungatu ari opa Lázaro tīre” ehi vahe.

¹⁹ Setá judío yuviraso Marta iyavei María piri iquivri mano agüer sui imboviha āgua.

²⁰ Oicuae Marta Jesús yepota seni, oso voi eté sapeve; María rumo opitaño oi pipe.

²¹ Evocoyase Marta aipo ehi voi chupe:

—Che Yar, ehi cohava ereicose, nomanoi chietera revo ore quivri viña.

²² Che rumo aicua Tūpa omboura opacatu nde porandusa ndeu —ehi Marta chupe.

²³ —Nde quivri rumo ocuerayevi irira —ehi Marta upe.

²⁴ —Supi eté aicua niha ocuerayevira opacatu omano vahecuer reseve ari ipa vahe pipe —ehi Marta.

²⁵ —Che niha cuerayevisa aico iyavei tecovesa. Acoi ava che roroya vahe, yepe omano tēira viña, oicoveño itera rumo.

²⁶ Acoi che roroya vahe güecovesave, nomanoi chietera. ¿Ereroya aipo che hesa? —ehi Marta upe.

²⁷ —Oroviroya ité, che Yar. Nde niha Poropísirosar ereico Tūpa Rahir, ore remiaro ereyu vaheerā co ivi pipe oreu nara —ehi Marta Jesús upe.

Jesús oyaseho Lázaro ruvipa rovai

²⁸ Aipo ohe pare, Marta oso ocupihir María reca, chupeñomi aipo ehi:

—Porombohesar oicove cohava, “Tou” ehi ndeu —ehi chupe.

²⁹ Evocoyase María oso voi eté sepia.

³⁰ Jesús rumo ndoique vitei eté tecua pipe; Marta rese oyoepiasave viteño ité seci.

³¹ Osepia María sē poyava, judío eta sētave yuvirecoi vahe imbovihasar yuviraso voi saquicuerive, “Oquivri ruvipave revo osora oyaseho” ehi yuvireco viña.

³² Evocoyase María oyepotase chupe, oñenopiha sovai aipo ehi:

—Che Yar, ehi revo ereicoveño itese cohava, che quivri nomanoi chietera viña —ehi María chupe.

³³ Osepia María yaseho iyavei judío eta yuviraso vahe supi, opiha pipe oyandu ité oviharēhisa.

³⁴ Evocoyase oporandu:

—¿Que vo peñoti? —ehi chupe.

Ahe aipo ehi yuvireco chupe:

—Ore Yar, erio, teresepia —ehi.

³⁵ Ahese Jesús oyaseho.

³⁶ Judío evocoyase aipo ehi yuvireco:

—¡Esepia, osaisu ité! —ehi oyeupe yuvireco.

³⁷ Ambuae rumo ipāhu pendar aipo ehi yuvireco:

—Co mbia omomahe vahe acoi mbia ndasesapisoí vahe, ¿ndoicatuí chira pīha Lázaro manoēhi āgua mbahe apo cuese rahe viña? —ehi yuvireco.

Lázaro mbogüerayevi agüer

³⁸ Jesús oyemboya suvipave oviharēhisa pīpe; ahe suvipa ita hopri, sovapisa ita avei.

³⁹ —Perocua sovapisa ita ichui —ehi.

Marta, omano vahe reindri, rumo aipo ehi:

—Che Yar, iné ité revo. Esepia, opa niha irungatu ari imanore —ehi.

⁴⁰ —¿Che reroyase eve, Tūpa pīratasa eresepiara” ndahei vo acoi ndeu? —ehi Marta upe.

⁴¹ Aipo ihe pare, virocua ita yuvireco ichui. Evocoyase omahe iva rese aipo ehi:

—Che Ru, “Aviye ndeu” ahe ndeu. Esepia, eresendu che ñehe.

⁴² Che aicua nde eresenduño ité che ñehe yepi, che rumo aipo ahe co ava eta rembiepiave ‘toviroya avei nde che mbousa co ivi pipe yuvireco’ che yapave —ehi.

⁴³ Aipo ohe pare, oñehe pīrata aipo ehi:

—¡Lázaro, esē eipeve sui! —ehi.

⁴⁴ Omano vahe evocoyase osē voi opacatu turucuar omamasa reseve. Jesús evocoyase aipo ehi ava upe:

—Peyorapa imamasa ichui, toguata —ehi.

Judío rerecuareta oyemomborandu Jesús pisi āgua yuvireco

⁴⁵ Osepiase co poromondiisa, judío eta yuviraso vahe María rupi setá ité Jesús viroya yuvireco.

⁴⁶ Ipāhu pendar rumo moviro yuviraso voi ava fariseo rerecuareta uve sembiapo mombehu āgua.

⁴⁷ Evocoyase fariseo rerecuareta iyavei pahi rerecuareta oñemonuha guasu yuvireco aipo ehi:

—¿Mara yahera vo sereco? Co mbia setá ité oyapo poromondiisa oico.

⁴⁸ Ndayayapoise mbahe chupe, opacatu tiēte ava viroyara yuvireco viña iyavei aviyeteramo mborerecuar Roma iguar yanduse, yugüerura yande tūparo mondurupa iyavei omocañi tēi uca aveira yande recua yande sui —ehi oyeupe yuvireco.

⁴⁹ Ñepe rumo mbia ipāhu pendar Caifás serer vahe, ahe ité pahi eta rerecuar ivate catu vahe ahe araviter pipe, aipo ehi ava upe:

—Pe ndapeicuai eté mbahe,

⁵⁰ ndapesenducuai avei co tecocuer; aviye catura ñepe mbia omanose yande recocuer rese, ndahei que opacatu yande mocañi tēi āgua —ehi omboetasa eta upe.

⁵¹ Ahe rumo ndahei oyesui tēi aipo ehi; Tūpa ité aipo ombohe uca. Esepia, ahe ité mborerecuar guasu chiní ahese. Sese aipo ehi: “Jesús omanora yande recocuer rese” ehi.

⁵² Iyavei ndahei chira ahe ava reseño, omanora opacatu ava Tūpa Rahir oñemosai tēi vahe ñepe reseve imonuha āgua.

⁵³ Ēgüe ehi ahe ari pipeve judío eta rerecuar oyemoingatupa voi yuca āgua yuvireco.

⁵⁴ Sese ndoguata iri ava judío eta pāhu rupi. Ahe rumo osē ivi Judea sui, oso ivi iporupirēhi vahe rerovicave, tecua Efraín ve. Aheve opacatu oropita supi.

⁵⁵ Virovise judío Pascua pieta apo āgua, setá iteanga ava ambuae tecua rupindar yuviraso tecua Jerusalén ve oyeecocuer moatiro ahe pieta mboetei āgua renondeve.

⁵⁶ Oseca tēi Jesús yuvireco. Ipare tūparove yuviroiquese, oporandu-randu oyeupe yuvireco:

—¿Mara peye pe, oura pīha pieta repia, aní chira tie? —ehi-ehi oyeupe yuvireco.

⁵⁷ Yipive rumo fariseo rerecuar iyavei pahi rerecuar oyocuai ava, “Pesepiase Jesús, pemombehu voi oreu ipisi āgua” ehi yuvireco chupe.

12

Ñepe cuña omondo Jesús rese mbahe śiacua vahe

¹ Seis ari ipane vitese Pascua pieta āgua, Jesús oso tecua Betania ve, aheve acoi Lázaro ombogüerayevi.

² Eipeve ocaru yuvireco Jesús mboetisave. Marta ihañeco sese; Lázaro evocoyase ocaru yuvinoi mesave ipiri.

³ Evocoyase María güeru medio litro mbahe śiacua vahe nardo, sepí iteanga vahe. Omondo ipi rese. Ipare oiqiti ohavapri pīpe ichui. Śiacuá iteanga evocoyase opacatu oi pipe.

⁴ Evocoyase ore mboetasa Judas Iscariote, ahe acoi omondo vaheerā ava yamotarēhimbar uve, aipo ehi:

⁵ —¿Mahera vo ndimondosai co mbahe śiacua vahe tresciento denario rupi ava iparaisu vahe pītivii āgua? —ehi.

⁶ Judas rumo ndahei ava iparaisu vahe raisupave aipo ehi. Ahe rumo imonda rai vahe tēi. Setá rupi guarepochi virocua güembiporuguā tēi.

⁷ Evocoiyase Jesús aipo ehi:

—Toyapoño cheu. Esepia, ahe che mano água renonde êgüe ehi cheu.

⁸ Yuvirecoveño itera ava iparaisu vahe pe pâhuve yepi; che rumo ndaico pucu iri chira pe pâhuve —ehi Judas upe.

Pahi rerecuar oyamotarêhi Lázaro yuvireco

⁹ Setá iteanga ava judío oyandu yuvireco Jesús rerâcua Betania ve secoise. Sese yuviraso aheve; ndahei Jesús repia güeraño yuviraso, êgüe ehi rumo imbogüerayevipri Lázaro repia avei.

¹⁰ Evocoiyase pahi rerecuar, “Yayuca avei Lázaro” ehi yuvireco oyeupe.

¹¹ Esepia, ahe ichui têi niha setá iteanga judío oyepepi pahi rerecuar sui Jesús reroya água yuvireco.

Jesús oique Jerusalén pipe

¹² Ava rehii yuviraso tecua Jerusalén ve Pascua pieta repia yuvireco. Ahere ayihive voi oicua Jesús yepota água ahe tecuave yuvireco.

¹³ Ahese oyasia pindo yuvireco. Oyacatu viraso Jesús rovaïchi água, osapucaí yuvireco chupe:

—¡Imboeteipri, sovasapri secói ou vahe yande Yar Tûpa rer pipe! ¡Tûpa tosovasa Israel rerecuar guasu! —ehi yuvireco.

¹⁴ Yipindar rumo opa Jesús oseca uca guaricumí. Ipare oyeupi sese icuachiapri aracahendar rupi tupri ité aipo ehi vahe:

¹⁵ “Pesiquirei rene, Sión pendar; pesepia, pe rerecuar guasu guaricumí harive ou pëu” ehi.
¹⁶ Yipindar, ore semimbohe eta, ndorosenducuai eté co aracahendar imombehupri. Ipare rumo oyevise güecosa porañetesave, ahese oremahenduha aracahendar sesendar icuachiapri rese, “Supi eté omombehu” orohe têi sepiase.

¹⁷ Acoi ava yuvirecoi vahe Jesús rupi, Lázaro mbogüerayevisa osepia vahecuer, ahe opa omombehu-mbehu ambuae ava upe yuvireco.

¹⁸ Sese ava eta yuvinose voi sovaïchi ipisi água. Esepia, oicua ité ahe mbahe poromondiisa guasu yapose yuvireco.

¹⁹ Evocoiyase fariseo rerecuareta aipo ehi oyeupe yuvireco:

—Indó, peicua niha ndayaicatu iri eté mbahe apo chupe cute. Pesepia ru, ¡opacatu guasu ité ava oguata cûritei yuvireco supi! —ehi yuvireco.

Oime griego oseca vahe Jesús yuvireco

²⁰ Griego oime ava rehii pâhuve yuviraso vahe pieta repia Tûpa mboetei água tecua Jerusalén ve.

²¹ Ahe oyemboya Felipe, Betsaida pendar rese, ahe tecua Galilea pipendar. Ipare aipo ehi yuvireco chupe:

—Nde mbía, orosepia potami aipo Jesús —ehi.

²² Felipe evocoiyase oso imombehu Andrés upe; ichui yuviraso ñuvirío voi Jesús upe imombehu.

²³ Evocoiyase chupe aipo ehi:

—Oyepota arí cheundar che, Ava Riquehir, che yevi iri água che recua porañetesave.

²⁴ Supi eté aipo ahe pëu: inungar acoi trigo rãhii nañotisaise, ahese ndihai chietera; ñotise rumo, ahese iha vaira.

²⁵ Acoi ava osaisuse rumo güecocuer têi, ocañi têira; ahe ndosaisui vahe rumo güecocuer co ivi pipendar têi che recocuer rese, evocoi nungar virecora tecovesa apirêhi.

²⁶ Acoi ava che mboyeroya pota vahe, toguata che rupi yuvireco. Esepia, acoi che mboyeroyasar yuvirecoi vahe, ahe avei yuvirecoira che pirí ivave. Che Ru Tûpa evocoiyase omboeteira ahe sereco —ehi chupe.

Jesús omombehu omano água

²⁷ “¡Cûritei ayandu ité mbahe-mbahe têi oime vaheerã cheu! ‘¿Mara ahera pïha?’ ahe têi. ¿Aipo ahera: ‘Che Ru, che písiro eve cûritei cheu oime vaheerã mbahe têi sui’ ahera viña? ¡Che rumo aicua evocoi nungarã ité ayu!

²⁸ Che Ru, emboyecua nde pîratasa nde rer porañetesa mboetei água” ehi oyerogui.

Ichui oyeendu íva sui ñehesa aipo ehi vahe: “Êgüe ahe niha amboyecua che pîratasa vichico, êgüe ahe iri aveira” ehi.

²⁹ Aheve ava yuvirecoi vahe, “Osunu revo” ehi yuvireco viña; ambuae ava,

—Tûpa rembiguai revo oñehé Jesús upe —ehi yuvireco.

³⁰ Evocoiyase aipo ehi ava eta upe:

—Ndahei cheundar ñehesa pesendu, ahe rumo pëundar.

³¹ Cūritei oimera ñemoirosa co ivi pipendar ndache reroyai vahe upe, cūritei avei imombosara Carugar co ivi pipendar imborerecuasa sui.

³² Acoi che rupise ivate, opacatu ava arura cheyeupi —ehi.

³³ Aipo ñehesa pipe omboyecua tupri ité mara ehira omano.

³⁴ Aipo ihese ava eta aipo ehi:

—Ore rumo orendu mborocuaita icuachiapri pipe aipo ehi vahe: “Poropísiosar apirēhi vaheṛā ité” ehi. ¿Maheṛa ru aipo nde: “Ava Riquehir osupira ivate yuvireco” ere no? ¿Uma ru aipo Ava Riquehir, ambuae tie? —ehi ava eta yuvireco chupe.

³⁵ Evocoyase aipo ehi ava upe:

—Pe pereco vitemira chīhi rupive tesapesa pe pāhuve. Peguata catu supi seime viteseve. Aviyeteramo pe resapiha tēira pītumimbi vahe. Esepia, acoi uguata vahe pītumimbisa rupi, ndoicuai que güecosa.

³⁶ Peroya co tesapesa cūritei pereco viteseve, ipipe ité pe reco āgua —ehi.

Aipo ohe pare, Jesús osē ava rehi pāhu sui; ndoyemboyecua iri chupe.

Setá judío rerecuar ndoviroya vitei eté Jesús yuvireco

³⁷ Yepe Jesús setá iteanga oyapo mbahe poromondiisa judío rerecuar rovaque viña, ahe rumo ndoviroyai eté yuvireco.

³⁸ Esepia, imboaviyesa rane itera Tūpa ñehe mombehusar Isaías rembicuachigüer aipo ehi vahe:

“Che Yar, ava ndoviroyai yande ñehe yuvireco iyavei ndoviroyai nde pīratasa eremboyecuaese chupe” ehi.

³⁹ Co rese avei ava ndoicatui eté senducua yuvireco. Inungar oicuachía Isaías aipo ehi:

⁴⁰ “Tūpa nomboesapisoi ava iyavei nombopihañemoñeta tupri iri mbahe rese yuvireco.

Sese ndosepiacuai eté mbahe, ndosenducuai avei mbahe, ndoyevi catui yuvireco chupe ombogüera āgua” ehi.

⁴¹ Isaías aipo ehi. Esepia, osepia ité Jesús reco porañetesa. Evocoyase ahe oñehe sese.

⁴² Setá ité rumo judío viroya yuvireco, seco ivate vahe avei. Ahe rumo nomboyecuai eté seroyasa yuvireco fariseo rerecuar sui osiquiyepave ‘aviyeteramo yande mombora ñemonuhasa sui ñepeiseve yuvireco’ oya.

⁴³ Esepia, ahe oipota catu ava tēi suindar yemboeteisa Tūpa suindar yemboeteisa sui yuvireco.

Jesús ñehe reroyasa rese porandusara

⁴⁴ Yipindar rumo, Jesús oñehe vitesese ava rehi upe, oñehe pīrata aipo ehi: “Acoi che reroya vahe ava, ndahei che güeraño che reroya, ahe rumo che Ru avei, che mbousar, viroya yuvireco.

⁴⁵ Iyavei acoi che repia vahe, che mbousar avei osepia.

⁴⁶ Che tesapesa aico. Ayu co ivi pipe ava che reroyasar pītumimbisave yuvirecoiēhi āgua.

⁴⁷ Acoi osendu vahe che ñehe, nomoinguei vahe rumo oyese, ndahei che amocañira. Esepia, ndayui ava co ivi pipendar mocañi āgua, che rumo ayu ipísiro āgua.

⁴⁸ Acoi ava che reroiro vahe, ndoviroyai vahe avei che ñehe, oime rumo imocañi āgua: Co che ñehesa supi eté vahe reroyaēhisa pipe oyemocañi ucara ari ipa vahe pipe.

⁴⁹ Esepia, che nañehei eté cheyesui tēi; che Ru, che mbousar rumo che cuai che ñehe āgua, che porombohe āgua avei.

⁵⁰ Che aicua co cheundar porocuaita güeru tecovesa apirēhi ava upe. Sese niha amombehu che Ru che cuaisa” ehi Jesús ava rehi upe.

13

Jesús oyosei güemimbohe pi

¹ Pascua pieta renonde Jesús oicua ité ohari yepota co ivi reya āgua oso vaheṛā Vu piri. Ahe osaisu vahe ité ava oyeupendar co ivi pipe yepi. Ēgüe ehi saisu ari ipa vahe rupi.

²⁻⁴ Carugar oique ité Simón rahir, Judas Iscariote, piha pipe imondo āgua yamarēhimbar uve. Jesús rumo oicua ité Vu Tūpa sui ousa, oicua avei oyevi iri āgua Vu Tūpa piri iyavei Tu omondo opacatu omborerecuasa chupe. Sese ocaruse güemimbohe eta reseve, mesa sui opūha, osequi oturucuar yohasa. Ipare omonde ambuae turucuar vumbicuasa rese.

⁵ Evocoyase omondo i yepoisa riru pipe, oyosei güemimbohe pi, omombiru turucuar vumbicuasa rese vireco vahe pipe oico.

⁶ Ichui Simón Pedro pi oyosei potase, ahe aipo ehi chupe:

—Che Yar, ¿nde co ereyoseira che pi? —ehi chupe.

⁷ —Nde rumo nderesenducuai mbahe che rembiapo cūrítei. Ipare rumo eresenducuará —ehi Pedro upe.

⁸ Pedro rumo aipo ehi chupe:

—¡Che pi rumo ndereyosei chietera! —ehi.

—Ndayoseise rumo nde pi, ndahei chietera evocoiyase che rupindar ereico —ehi Pedro upe.

⁹ Pedro evocoiyase aipo ehi:

—¡Che Yar, aní catu che pi año ereyosei; eyosei che po, che rova avei! —ehi chupe.

¹⁰ —Acoi oyasupa ramo vahe rumo, ahe ndiquihai eté. Sese ndiyai oyasu iri. Ipi güeraño rumo iya yoseia. Ēgüe peye ndipoi eté mbahe pe rese; ndaopacatui rumo Ēgüe peye —ehi.

¹¹ Ahe aipo ehi: “Ndaopacatui rumo Ēgüe peye” ehi. Esepia, oicua ité uma omondora yamotarēhimbar upe.

¹² Güemimbohe pi sei pare, omonde iri oturucuar yohasa, oguapi mesave aipo ehi:

—¿Peicua vo co mbahe ayapo vahe pēu? —ehi—.

¹³ Pe niha, “Ore mbohesar, ore Yar” peye cheu. Supi eté niha. Esepia, ahe ité che aico.

¹⁴ Yepe supi eté, che pe mbohesar, pe Yar avei aico viña, ayosei rumo pe pi. Sese pe avei ñepeí-peí peyacatu peyosei aveira pe pi.

¹⁵ Che niha ‘na tehi avei yuvireco’ viya opombohe pe rereco, Ēgüe ahe pēu.

¹⁶ Supi eté aipo ahe pēu: ava mbugai tēi, ahe ndahei ivate catu güerecuar sui; Ēgüe ehi avei imboupi ndahei ivate catu secoi ombousar sui.

¹⁷ Pesenducuae co nungar mbahe, peyapo tuprise, ahese peviharete catura peico —ehi.

¹⁸ “Che nañehi opacatu pe rese, che rumo aicua uma yuvirecoi vahe che rembiporavo. Icuachiapri rumo yaviyera: ‘Acoi ocaru vahe che piri, oyemboyere che amotarēhi’ ehi vahe.

¹⁹ Senondeve amombehu pēu. Evocoiyase Ēgüe ehise ité cheu, che reroyara peye che ité niha aipo ahe vahe vichico.

²⁰ Supi eté aipo ahe pēu: acoi che remimondo oipisi tupri vahe, ahe che pisi tupri avei; acoi ava che pisi vahe, oipisi tupri avei che Ru yuvireco” ehi.

Jesús omombehu: “Ñepeí pe pāhu pendar che mondora che amotarēhimbar upe” ehi

²¹ Aipo ohe pare, Jesús ndoyembovihai eté iyavei mbahe oime vaherā omboyecua tupri ité,

—Supi eté aipo ahe pēu: ñepeí pe pāhu pendar che mondora che amotarēhimbar upe —ehi.

²² Evocoiyase ore oromahe-mahe tēi oreyses, “¿Ava upe pīha aipo ehi?” orohe tēi oreyeupe.

²³ Che sembiaisu catu yípive acaru vīte.

²⁴ Ipare Pedro oyaiti-ití ‘¿Ava upe vo aipo ere? tehi chupe’ oyapave cheu.

²⁵ Evocoiyase che asiri catu irimi yípive, aporandu chupe:

—Che Yar, ¿ava ité vo? —ahe.

²⁶ Ahe aipo ehi cheu:

—Cūrítei amoaquira pan rahicuer imondo tohu, ahe ité che mondora —ehi cheu.

Aipo ohe pare omoaqui pan rahicuer imondo Simón Iscariote rahir, Judas, upe.

²⁷ Judas oipisise pan, oguapi voi eté Carugar sese. Evocoiyase aipo ehi Judas upe:

—Evocoi ereyapo pota vahe, eyapo voiño ité ru —ehi chupe.

²⁸ Que ñepeí rumo mesave orocarua vahe, ndorosenducuai eté aipo ihesa.

²⁹ Esepia, Judas guarepochi riru rārosar secoi yepi. Sese amove ore pāhu pendar ipihañemoñeta: “ ‘Tererocua mbahe pietase nara’ anise, ‘omondo mbahe ava iparaisu vahe upe nara’ aipo oya revo omose imondo” ehi yuvireco chupe viña.

³⁰ Pan pisi pare, Judas osē voi eté oso pītuse.

Porocuaíta ipiasu vahe

³¹ Judas sē pare, Jesús aipo ehi:

—Cūrítei oyecuarua che, Ava Riquehir, reco porañetesa. Che Ru Tūpa reco porañetesa avei oyecuarua che rese.

³² Acoi amboyecuae che Ru Tūpa reco porañetesa, ahe avei omboyecuarua che reco porañetesa, Ēgüe ehira imboyecua pihavi.

³³ Che rahireta, che rembiaisu, ndaico pucu iri chira pe rese. Che reca tēira peye; inungar acoi judío rerecuar upe aipo ahe: “Ndiyai chietera peso che sosave” ahe.

³⁴ Sese co amondo porocuaíta ipiasu vahe pēu ñepeí-peí peyeaisu āgua inungar che opoaisu.

³⁵ Peyeaisuse ñepeí-peí, opacatu tupri ité ava oicuarua yuvireco che remimbohe supi eté pe recosa —ehi.

Jesús, “ ‘Ndaicuai eté co mbia’ erera cheu” ehi Pedro upe

- ³⁶ Pedro oporandu Jesús upe:
—Che Yar, ¿que vo aipo eresora? —ehi chupe.
Ahese omboyeví Pedro upe:
—Cūrítei ndiyai peso vaheṛā che sosave che rupi; pesorera rumo che rupi curi —ehi.
³⁷ —Che Yar, ¿mahera ru cūrítei voi ndiyai nde rupi che so āgua? ¡Ayemoingatu ité amano vaheṛā nde rese! —ehi Pedro chupe.
³⁸ —¿Supi eté pīha ereyemoingatu ité che rese nde mano āgua? Nde rumo cōhe potase tacura ñehe renondeve, mbosapí oyupagüer rupi, “Ndaicuai eté co mbia” erera cheu —ehi Pedro upe.

14

Jesús, Tūpa raper yandeu

- ¹ Ipare Jesús aipo ehi opacatu oreu: “Pepihañemoñeta atii rene; peyeroya Tūpa rese, che rese avei peyeroya.
² Esepia, che Ru rētave setá oime pe reco āgua; ěgüe ndehise rumo, namombehui chira aipo pēu viña. Sese che asora pe recuarā moingatu.
³ Imoingatu pare ayevíra pe reca che recosave pe reraso āgua cheyepiri.
⁴ Pe peicua que vo asora iyavei peicua mara peyera pe yepota āgua che recosave” ehi oreu.
⁵ Tomás rumo aipo ehi chupe:
—Che Yar, ndoroicuai rumo que vo eresora. ¿Mara orohera vo aipo icua ore so āgua? —ehi.
⁶ —Che niha perí aico supi eté vahe iyavei tecovesa. Che rupi güeraño ité peyepotara che Ru upe —ehi—.
⁷ Pe peicua tuprise ité che recocuer viña, peicua aveira che Ru viña no. Cūrítei suive rumo peicua, pesepia avei cute —ehi oreu.
⁸ Evocoyase Felipe aipo ehi chupe:
—Che Yar, torosepia ité ru aipo nde Ru. Ahese aviýera oreu —ehi.
⁹ —Felipe, setá ari aico pe rese, ¿ndapeicua vitei eté vo che recocuer? Acoi ava che repia vahe, ahe osepia ité che Ru; ¿mahera ru evocoyase, “Torosepia rane ité nde Ru” ere vite cheu no?
¹⁰ ¿Ndache reroyai vo peye che Ru rese ité aicose, che rese avei che Ru secoise? Opacatu mbahe amombehu vahe pēu, ndahei cheyesui tēi amombehu. Che Ru secoi vahe che rese, ahe ité oyapo güemimbotar che recocuer rese —ehi—.
¹¹ Che roroya peye che Ru rese che recose, ahe avei secoise che rese. Anise, che reroyañomi tēi catu peye mbahe che rembiapo rese —ehi—.
¹² Supi eté aipo ahe pēu: acoi ava che roroya vahe, ahe avei oyapora mbahe che rembiapo nungar, tuvicha catura rumo. Esepia, che asora che Ru piri —ehi—.
¹³ Acoi peporanduse que mbahe rese che rer pipe, che amondoño itera pēu. Ipípe che amboyecua che Ru reco pīratasa.
¹⁴ Che ayapora que mbahe che rer pipe pe porandusa —ehi oreu.
Jesús, “Che amboura Espíritu Santo pēu” ehi viroyasar upe
¹⁵ “Che raisuse ité peye, pemboyeroya catu che porocuaíta.
¹⁶ Che aporandura che Ru upe ombou vaheṛā Espíritu supi eté vahe pe pītivii āgua, ahe secoi vaheṛā ité pe rese.
¹⁷ Ava Tūpa ndoicuai vahe rumo, ndoicatu chietera ipisi. Esepia, ndosepiaí, ndoicuai avei yuvireco. Pe rumo peicua ité. Esepia, ahe ité secoi pe rese. Ipare oique itera pe piha pipe.
¹⁸ “Ndopoeyai chira pe güeraño tēi; ayevíra niha pe rese aico vaheṛā.
¹⁹ Chīhi tēi oime vite ari che reroyasarehi che repia vite vaheṛā yuvireco. Ipare rumo ndache repia iri chira yuvireco. Pe rumo che repiaño itera peye iyavei peicoveño itera. Esepia, che aicoveño avei.
²⁰ Ahe ari pipe peicuara che Ru rese che recosa, che rese pe recosa avei iyavei che aicose pe rese.
²¹ Acoi oicua vahe che porocuaíta, omboyeroya vahe avei, ahe omboyecua ité che raisusa yuvireco. Che Ru osaisura che raisusar; che avei asaisura, ayemboyecua aveira chupe” ehi.
²² Judas (ndahei vahe rumo Iscariote) aipo ehi:
—Che Yar, ¿mahera oreuño ereyemboyecua; mahera ru ndereyemboyecua iri chira ava nde reroyasarehi upe? —ehi chupe.
²³ Evocoyase aipo ehi Judas upe:
—Acoi che raisu vahe, omboyeroya vahe che ñehe yuvireco, che Ru evocoyase osaisura iyavei che Ru reseve oroyura oroico vaheṛā sese.

²⁴ Acoi ndache raisui vahe, ahe ndoviroyai avei che ñehesha yuvireco. Co ñehesa pesendu vahe ndahei cheyesui tēi; ahe rumo che Ru, che mbousar suindar —ehi.

²⁵ “Pe rese che reco vitesse, opa co mbahe amombehu vichico pēu.

²⁶ Espiritu Santo rumo, Poropitviisar, che Ru ombou vahe che rer pipe, ahe pe mbohera opacatu mbahe avīye vahe rese. Pe momahenduha aveira opacatu pēu che ñehesha agüer rese.

²⁷ “Aseyateco tuprisa pēu, ahe che reco tuprisa; ndahei rumo avaño tēi rembiapo nungar amondo pēu. Aní, ‘¿Mara yahera pīha?’ peyera; aní chiveira pesiquiye.

²⁸ Pesendupa niha acoi, ‘Asora, ipare ayevi irira pe rese aico vaherā’ che hesa. Supi eté che raisuse peye, peviharetera peicuaase che Ru piri che sosa. Esepia, ahe ivate catu vahe ité che sui.

²⁹ Sese amombehupa voi co mbahe tenondeve pēu, ēgüe ehise ité, ahese peroyara.

³⁰ “Namombehu pucu iri chira mbahe pēu. Esepia, ou ité co ivi pipe oporocuai tēi vahe. Ahe rumo ndahei ivate catu vahe che sui

³¹ ‘toicua ava che reroyasarēhi che Ru raisusa yuvireco’ che hesa pipe. Ayapoño ité che Ru che cuaita.

“Pepūha. Yaso cohava sui” ehi güemimbohe eta upe.

15

Jesús uva hi nungar

¹ Ipore Jesús oñehesha iri oreu aipo ehi: “Che aico inungar uva hi supi eté vahe; che Ru evocoiyase inungar sese ihañeco vahe secoi.

² Ahe oyasia sāca ndihai vahe ichui yepi; iha vahe rumo omoatiro tupri iha catu āgua.

³ Pe pe recocuer imoatiropri ité che pe mbohesa pipe.

⁴ Peicoño ité catu che rese inungar che aicoño ité avei pe rese. Uva rāca oise ohī sui, ndiha iri ahe ae tēi; pe avei ēgüe peyera peyepēise che sui” ehi oreu.

⁵ “Che niha uva hi nungar aico; pe evocoiyase sāca nungar peico. Acoi secoi vahe che rese, che avei aico sese. Inungar mbahe miti iha ati vahe, ēgüe ehira ahe. Supi eté ndapeicatu chietera che porēhi mbahe apo.

⁶ Acoi ndasecoi vahe che rese, ahe imombosara inungar acoi uva rāca yipi vahe. Ipore imonuhasa sapi āgua” ehi oreu.

⁷ “Pe peicoñose ité che rese ndaperesaraise avei che porombohesa sui, peporanduño mbahe pe remimbotar rese, ahese imondosara pēu” ehi.

⁸ “Che Ru oipisira omboeteisa pe sui acoi peyapo tuprise opacatu che remimbotar. Pemboyecua evocoiyase che remimbohe supi tupri vahe pe recosa.

⁹ Che opoaisu ité, inungar che Ru che raisu. Sese peicoño ité catu che poroaisusa pipe.

¹⁰ Esepia, pemboyeroyase che porocuaite, peicoño itera co che poroaisusa pipe. Inungar che che Ru amboyeroya che cuaisa iyavei aicoveño ité che Ru poroaisusa pipe vichico.

¹¹ “Che aipo ahe pēu ‘tovireco che vihasa oyese yuvireco’ viya; ‘toyemboviharete catu yuvireco’ che hesa pipe.

¹² Co che porocuaite: Peyeaisu ñepepepe, inungar che opoaisu.

¹³ Ndipoi eté que poroaisusa ivate catu vahe co sui omondose que ava güecocuer omboripar rese nara.

¹⁴ Pe che mboyeroyase peye, ahese che mboripar peico.

¹⁵ ‘Pe mbiguai peico’ ndahe iri pēu. Esepia, mbiguai ndoicuai eté mbahe güerecuar pihañemoñetasa. Sese, ‘Che mboripar’ ahe pēu. Esepia, aicua ucapa ñehesha che Ru cheu ombombehu vahe pēu.

¹⁶ Pe niha ndache poravoi peye. Che rumo opoporavo iyavei opocuai peporaviqui vaherā ava reru āgua cheu ‘che rese ité toyuvirecoi’ che yapave. Evocoiyase che Ru omboura mbahe pe porandusa che rer pipe pēu.

¹⁷ Co rese opocuai: Peyeaisu catu ñepepepe peyacatu” ehi Jesús güemimbohe upe.

Jesús amotarēhimbar; supindar amotarēhimbar avei

¹⁸ “Acoi ava ndoicuai vahe Tūpa pe amotarēhise, peicuaño che rane che amotarēhi yuvireco yipindar.

¹⁹ Pe peico vitesse ava Tūpa ndoicuai vahe pāhuve, evocoiyase pe raisu aira yuvireco viña. Che rumo opoporavo ipāhu sui yuvireco. Sese tēi ndape ambota iri yuvireco. Esepia, pe ndahe iri ipāhu pendar peico.

²⁰ Peyemomahenduha pēu aipo che hesa rese: ‘Ndipoi eté que mbiguai ivate catu vahe güerecuar sui’ ahe. Che niha yipindar yamotarēhimbar aico, pe avei pe amotarēhira yuvireco. Acoi omboyeroya vahe rumo che porombohesa, pe porombohesa avei omboyeroyara yuvireco.

²¹ Co opacatu mbahe che recocuer sui tēi ēgüe ehira pēu. Esepia, ndoicuai niha che mbousar yuvireco.

²²⁻²⁴ “Che ndayuisse ahe ava upe mbahe sembiavi mombehu viña, evocoyase, ‘Peyavi mbahe’ ndelhi chira Tūpa chupe yuvireco viña. Che rumo ayu ité, amombehu mbahe sembiavi yuvireco chupe, ayapo avei mbahe ava ndoyapoi vahe yuvireco ipāhuvē; ahe rumo yepē osepia co mbahe yuvireco viña, che amotarēhiño, che Ru avei oyamotarēhi yuvireco. Sese, ‘Pereco ité mbahe pe rembiavi peyese’ ehi Tūpa chupe. Esepia, acoi che amotarēhi vahe, che Ru avei oyamotarēhi yuvireco.

²⁵ Co rumo ēgüe ehi. Esepia, imboaviyasa rane itera ñehesa sesendar icuachiapri pipe aipo ehi vahe: ‘Mbahe apoēhi pipe sui tēi che amotarēhi yuvireco’ ehi vahe.

²⁶ “Acoi ambouse rumo Poropitiviisar, Espiritu supi eté vahe che Ru sui pēu, ahe omombehura che recocuer.

²⁷ Pe avei pemombehura che recocuer. Esepia, yipisuive ité peico che rupi” ehi.

16

¹⁻² “Pe mocañehi āgua che rese pe yeroyasa aipo ahe opacatu co mbahe imombehu pēu: pe mombora judío rerecuar oñemonuhasa sui yuvireco, pe yuca aveira yuvireco. Ahe rumo omohara, ‘Tūpa uve nara revo na vahe’ ehira yuvireco viña.

³ Evocoi rumo ēgüe ehira yuvireco che Ru cuaēhi pipe iyavei che cuaēhi pipe yuvireco.

⁴ Amombehu aipo pēu acoi ēgüe ehise, peyemomahenduhara che remimombehugüer rese.

Espiritu Santo rembiapo

“Yipisuive rumo namombehui co mbahe pēu. Esepia, aicoveño ité pe rese.

⁵ Cūrítei rumo asora che mbousar piri iyavei ndipoi que ñepeí pe pāhu pendar ‘¿que vo aipo eresora?’ ehi vahe cūrítei cheu.

⁶ Pe rumo ndapeyembovihaiño aipo mbahe amombehuse pēu.

⁷ Supi eté rumo aipo ahe pēu: aviye catura pēu che asose. Esepia, ndasoise viña, ndoui chietera pe rese Poropitiviisar. Asose rumo, che amboura pēu.

⁸ Ouse ahe, oicua ucara ava che cuaēhisar upe yangaipa, oicua uca aveira tecocuer ñvisa iyavei cañisa ndaseco pōrai vahe upendar.

⁹ Oicua ucara yangaipa chupe ndache reroyaise yuvireco;

¹⁰ oicua rumo che reco ihivi tupri vahe yuvireco. Esepia, asora che Ru recosave, ahese pe ndache repia iri chietera peye;

¹¹ iyavei oicua Tūpa poromocañisa. Esepia niha, Caruguar, ahe co ivi pipendar rerecuar oipisira che Ru Tūpa ñemoirosa.

¹² “Setá iteanga mbahe oime amombehu vaheṛā pēu. Pe rumo ndapeicatu chira cūrítei senducua.

¹³ Ouse rumo Espiritu supi eté vahe, ahe pe mbohera mbahe supi eté vahe rese. Esepia, noñehi chira oyesui tēi, ahe rumo omombehura mbahe osendu vahe güeraño, oicua uca aveira mbahe coiye oime vaheṛā.

¹⁴ Ahe che mboeteira. Esepia, oicua ucara opacatu mbahe cheundar pēu.

¹⁵ Opacatu mbahe che Ru vireco vahe, che mbahe. Sese niha, ‘Espiritu oipisira opacatu mbahe cheundar, oicua uca aveira pēu’ ahe.

¹⁶ “Aviyeteramo tēi ndache repia iri chira peye. Ipare rumo coiye catumi che repia irira oreu.

Yepe semimbohe ndovihai chira viña, coiye catu rumo oviharetera yuvireco

¹⁷ Evocoyase ore oroporandu-randu tēi oreyeupe aipo orohe:

—¿Mara oya pīha: ‘Aviyeteramo tēi ndache repia iri chira peye’ ehi yandeu; ipare rumo aipo coiye catumi yasepiara iyavei aipo osora Vu piri no?

¹⁸ ¿Mara oya vo aipo: ‘Aviyeteramo tēi’ ehi? Ndayasenducuai mo aipo iñehesa —orohe oreyeupe.

¹⁹ Ipare rumo ‘oporandura co mbahe rese yuvireco cheu’ oya aipo ehi voi oreu:

—¿‘Ipare rumo coiye catumi che repia irira peye’ che he agüer rese co pe porandu vite peyeupe? —ehi—.

²⁰ Supi eté aipo ahe pēu: peyasehora pe viharēhisa pipe, ava angaipa viyar rumo ovihareteñora yuvireco. Yepe pe, ndapevihai chira viña, coiye catu rumo peviharetera.

²¹ Inungar acoi que cuña imembira potase, tasi chupe oyepotase ari imembira āgua; pītani oha pare rumo, nimahenduha iri tasicuer rese; soriveteño omembri rese.

²² Ēgüe peye avei; pe cūrítei tasi avei pēu, ayevi irira rumo pe repia āgua, ahese peviharetera. Ahe viharetesa ndipoi chietera que ava virocua vaheṛā pe sui.

²³ “Ahe ari pipe, ndapeporandu iri chiera mbahe rese cheu. Supi eté aipo ahe pēu: che Ru omboura opacatu mbahe pēu che rer pipe peporanduse.

²⁴ Cūrítei rumo ndapeporandu vitei mbahe rese che rer pipe. Peporandu catu sese, ahes peipisira. Ipípe sui perorivete catura.

Jesucristo mbahe-mbahe tēi recopisar

²⁵ “Opacatu mbahe rese niha amboyoya tecocuer pēu. Oimera rumo ari namboyoya iri chira ambuae mbahe rese tecocuer; ipa voi amombehu itera mbahe pēu che Ru recocuer resendar.

²⁶ Ahe ari pipe pe peporandura mbahe rese che rer pipe; che rumo, ‘Ayerquirá pe rese che Ru upe’ ndahei pēu.

²⁷ Esepia, che Ru ae ité pe raisu. Pe raisu ité niha. Esepia, pe che raisu peye, che reroya avei che Ru Tūpa sui che yuse peye.

²⁸ Asē che Ru sui co ivi pipe vitu; cūrítei rumo aseyara co ivi, ayevira che Ru upe” ehi oreu.

²⁹ Evocoyase ore aipo orohe chupe:

–Indó, aipo rupi ereñehe tupri catu ité; nderemboyoya iri ambuae mbahe rese imombehu oreu.

³⁰ Supi eté ericua opacatu mbahe, ericua avei ore porandusa. Evocoyase ndiya iri ore porandu água mbahe rese ndeu. Sese oroviroya Tūpa sui nde yusa –orohe chupe.

³¹ –¿Evocoyase che reroya ité peye? –ehi–.

³² Supi eté oyepota ari cute, co pipe ité peyemosaipara che sui; che reyara che aemi peye. Ndahei rumo che ae aico. Esepia, che Ru secó che rese.

³³ Amombehu co opacatu pēu che rese mbahe tupri pipe pe reco água. Peparaisu itera co ivi pipe; peyemonguerēhi catura rumo. Esepia, che opa ité ascopi co ivi pipendar mbahe tēi –ehi.

17

Jesús oyeróqui güemimbohe rese

¹ Aipo ohe pare, Jesús omahe iva rese aipo ehi: “Che Ru, oyepota ari cute. Che mboetei eve, ipípe sui avei che nde Rahir toromboetei.

² Supi eté niha, nde erembou che mborerecua água opacatu ava ivi pipendar harive iyavei tecovesa apirēhi mondo água opacatu ava nde cheu erembou vahe upe.

³ Co niha tecovesa apirēhi, tande cua nde Tūpa ñepeí supi eté vahe nde recose yuvireco, tache cua avei nde che mbose yuvireco.

⁴ “Che niha oromboetei co ivi pipe, iyavei ayapo nde che cuaisa.

⁵ Sese che Ru, embou irimi cūrítei che reco porañete água, inungar acoi yipindar areco vahe nde rese ivi apoēhiseve.

⁶ “Co nde rembiporavo ava co ivi pipendar pāhu sui erembou vahe cheu; orocua ucapa chupe. Yipindar ndeundar yuvirecoí. Ipape nde erembou cheu. Ahe viroya ité nde ñehe yuvireco.

⁷ Cūrítei oicuapa opacatu mbahe nde suindar cheu erembou vahe yuvireco.

⁸ Esepia, amombehu ité nde ñehe erembou vahe cheu; ahe viroya ité yuvireco, viroya avei nde che mbousa yuvireco.

⁹ “Che ayeroqui cheu nde remimbou rese ndeu. Esepia, ndeundar ité yuvirecoi; ndayeroquíi rumo ambuae ava che reroyasarēhi rese.

¹⁰ Opacatu ava cheundar, ndeundar avei; ndeundar evocoyase cheundar. Ahe sese che reco porañetesa oyecua.

¹¹ “Che ndapitai chira co ivi pipe; ahe rumo opitara cohawe yuvireco. Che evocoyase asora nde píri. Che Ru, seco maranehi vahe, esáro nde píratasa pipe nde remimbou cheu oyese yuvirecoi tupri água inungar yande yaico.

¹² Aicose co ivi pipe, asáro tupri nde rer píratasa cheu erembou vahe pipe; chemahemoha yuvireco sese mbahe tēi sui. Ndiipoí eté que ñepeí ocañi tēi vahe; acoi yipive ocañi vaheño ité rumo ocañi tēi; nde ñehe rupi tupri ité égüe ehi.

¹³ “Cūrítei asora nde recosave. Co ivi pipe che reco vitese rumo, amombehu co mbahe chupe ‘tovireco che viharetasa yuvireco’ che yapave.

¹⁴ Che niha amombehu nde ñehe yuvireco chupe. Ava che reroyasarēhi rumo oyamotarēhiño yuvireco. Esepia niha, ndahe iri Carugar povri pendar yuvirecoi inungar che ndahei ipovri pendar aico.

¹⁵ ‘Enose ava Carugar povri pendar pāhu sui’ ndahei ndeu, che rumo aipota eresepira Carugar sui.

¹⁶ Inungar che ndahei Carugar povri pendar aico, égüe ehi avei ahe yuvireco.

¹⁷ Eipeha tupri angaiapa sui ndeyeupe nara yuvireco ñehesa supi eté vahe reroyase. Nde ñehesa niha supi tupri vahe ité.

¹⁸ Inungar nde che mbou eve ava co ivi pipendar pãhuve, ãgüe ahe avei che imondo ava pãhuve yuvireco.

¹⁹ Amondo ité che recocuer ndeu nara ‘toyemondo catu yuvireco chupe co ñehesa supi tupri vahe reroya pipe’ viya.

²⁰ “Ndayeroqui co che remimbohe reseño ndeu, ayeroqui avei rumo ambuae ava che reroyasar ñehesa sui che reroya vaheã rese.

²¹ Aporandu avei ndeu toyuvirecoi tupri ité yuvireco oyese inungar ñepei vahe, ãgüe tehi avei yuvireco yande rese, che Ru, inungar nde ereico che rese, che avei aico nde rese. Toyuvirecoi tupri ité catu yuvireco oyese. Ipipe sui ava co ivi pipendar toviroya nde che mbousa yuvireco.

²² Che reco porañetesa nde erembou vahe cheu, ahe tupri avei amondo yuvireco chupe ñepei vahe nungar yuvirecoi água, inungar yande ñepei vahe yaico.

²³ Che aico yuvireco sese, nde evocoyase ereico che rese ahe yuvirecoi tupri água inungar ñepei vahe. Ipipe sui ava co ivi pipendar toicua nde che mbousar ereico iyavei eresaisu che remimbohe yuvireco inungar nde che raisu eve.

²⁴ “Che Ru, nde niha erembou co che remimbohe cheu. Aipota rumo ahe yuvirecoi che piri che recosave osepia vaheã teco porañetesa cheu erembou vahe yuvireco. Nde niha yipive ité che raisu eve ivi apoñehiseve.

²⁵ Che Ru, seco catupri vahe, ava co ivi pipendar tēi nande cuai yuvireco; che rumo orocua ité, co avei oicua nde che mbousa yuvireco.

²⁶ Orocua uca chupe, orocua ucaño vite itera rumo. Evocoyase nde che raisusa toviroco avei yuvireco, che avei taico yuvireco sese” ehi Jesús oyeroqui güemimbohe recocuer rese.

18

Jesús oipisi yuvireco

¹ Aipo ohe pare, Jesús ore renose ore reraso iembi Cedrón rovai. Aheve oime mbahe miti rêta, ipipe Jesús ore reroique ore reraso.

² Iyavei Judas omondo vaheã yamotarẽhimbar upe oicua avei aheve secosa. Esepia, setá rupi Jesús rese oroñemonuha aheve yepi.

³ Sese Judas oyepotaño ité aheve sundao rehii reseve iyavei sundao tũparo rãrosar pahi rerecuar iyavei fariseo eta remimondo opacatu oyoeписа reseve yuvirecoi, guataendi reseve-seve avei yuviraso.

⁴ Yipive ité rumo oicua oyeupe mbahe oime vaheã. Sese osẽ voi eté yuvireco chupe oporandu:

—¿Ava vo peseca? —ehi.

⁵ Ahe ava rehii omboyevi yuvireco chupe:

—Jesús, Nazaret pendar, oroseca —ehi.

—Che niha ahe aico —ehi ava rehii upe.

Judas ipãhuve secoi imondo água yamotarẽhimbar upe.

⁶ “Che niha ahe aico” ehise ava upe; guaquicuei coti pãve opa oviapi yuvireco.

⁷ Evocoyase oporandu iri ava upe:

—¿Ava vo peseca? —ehi.

Ahe aipo ehi yuvireco:

—Jesús, Nazaret pendar —ehi.

⁸ Aipo ihese,

—“Che niha ahe aico” ahe pẽu —ehi—. Che che recase peye, pepocoi rene catu co ambuae rese, toyuvirasopaño —ehi.

⁹ Co rumo ñehese mboaviye água ãgüe ehi: “Acoi che Ru ombou vahe cheu, nocañii eté que ñepei che sui” ehi.

¹⁰ Evocoyase Simón Pedro víreco vahe quise, vínose, oyasia Malco serer vahe nambi yasú cotindar, ahe pahi rerecuar ivate catu vahe rembiguai.

¹¹ Pedro upe rumo aipo ehi:

—Emondo iri quise siru upe —ehi—. Che Ru niha co mbahe yavai vahe ombou cheu. Añemosañe itera chupe —ehi.

Jesús serasosa mborerecuar Anás rovai

¹² Evocoyase sundao rerecuar, osundao eta reseve iyavei judío tũparo rãrosar oipisi Jesús yuvireco, oipocua.

¹³ Yipindar víraso Anás rêtave yuvireco. Esepia, ahe Caifás rovayar. Ahe araviter pipe aipo Caifás pahi eta rerecuar ivate catu vahe secoi.

¹⁴ Caifás ité aipo ehi omboetasa upe: “Yandeu aviye catu itera que ñepeí mbia omanose yande rese” ehi.

Pedro, “Ndaicuai co mbia” ehi Jesús upe

¹⁵ Ore Pedro rese orosoño ité Jesús raquicuei. Che rumo pahi eta rerecuar rēta pipendar opa ité che cua yuvireco. Sese aiqueño ité Jesús raquicuei mborerecuar rētave vicho.

¹⁶ Pedro rumo opitaño oquendipive ocarve. Che rumo pahi eta rerecuar che cua ité yuvireco. Evocoiyase asē, aporandu oquendipi rārosar uve Pedro reique āgua rese.

¹⁷ Evocoiyase oquendipi rārosar oporandu Pedro upe:

—¿Ndahei vo nde avei co ava rupindar? —ehi chupe.

—Aní, ndahei che ahe —ehi oquendipi rārosar upe.

¹⁸ Sōhisá iteanga ahe pītu pipe. Evocoiyase mborerecuar rembiguai iyavei sundao eta oyatapi yuvireco oyepehe āgua. Pedro avei aheve ipāhuve oyepehe tata ipive ohā.

Pahi eta rerecuar ivate catu vahe oporandu Jesús upe secocuer rese

¹⁹ Pahi eta rerecuar ivate catu vahe, “¿Uma-uma vo nde remimbohe yuvirecoi iyavei mbahe rese vo erembohe?” ehi oporandu Jesús upe.

²⁰ Jesús rumo aipo ehi chupe:

—Che niha añehe opacatu rupi, opacatu ava eta rovaque avei. Esepia, aporomboheño ité niha ava ñemonuhasa rupi, tūparo guasu pipe avei. Indó, che nañemi eté añehe vahe rā.

²¹ ¿Mahera vo evocoiyase cheu tēi ereporandu? Eporandu catu che ñehe rendusar upe. Ahe tomombehu che oyeupe ñehesa yuvireco ndeu. Ahe niha oicua che ñehe agüer yuvireco —ehi.

²² Aipo ihese, ñepeí mbia sundao osovapete aipo ehi chupe:

—¿Aipo ere rutei pahi rerecuar ivate catu vahe upe imboyeví? —ehi chupe.

²³ Evocoiyase omboyeví ahe mbia upe:

—Añehese mbahe tēi rese, emombehu che ñehe raisa; che rumo añehe tupri ité, ¿mahera vo evocoiyase che rovapete eve? —ehi.

²⁴ Evocoiyase Anás omondo pahi eta rerecuar ivate catu vahe Caifás upe ipocuasa reseve.

Pedro, “Ndaicuai co mbia” ehi vite Jesús upe

²⁵ Ahese Pedro oyepeheño vite ohā tata ipive. Aheve aipo ehi yuvireco chupe:

—¿Ndahei vo nde ité evocoi ava rupindar ereico? —ehi.

Pedro rumo,

—Aní, ndahei che ahe aico —ehiño.

²⁶ Ipare mbia pahi rerecuar ivate catu vahe rembiguai, inambi asiapri mu aipo ehi chupe:

—¿Aviye acoi nde ité oroepia vahe mbahe miti rēta pipe supi! —ehi chupe.

²⁷ Pedro rumo, “Aní, ndahei eté che” ehi iriño. Aipo iheseve, tacura oñehe.

Jesús serasosa Pilato rovai

²⁸ Evocoiyase viraso Jesús Caifás rēta sui Roma pendar mborerecuar guasu recosave yuvireco. Cōhe potase ēgüe ehi. Judío rumo ndoyuviroiquei eté mborerecuar recosave oyemboangaipaēhi āgua. Esepia, ahe icuaita yuviroique, ndiyai chietera Pascua resendar ovesa roho hu āgua yuvireco chupe viña.

²⁹ Sese Pilato osē ava upe aipo ehi:

—¿Mbahe vo sembiapo naporai vahe? —ehi.

³⁰ Ahe omboyeví yuvireco chupe:

—Seco catuprise, ndorogüerui chietera ndeu viña —ehi yuvireco chupe.

³¹ Evocoiyase aipo ehi ava upe:

—Peraso, pe ae peyapo mbahe pēundar ité porocuita rupi sese —ehi.

Judío rerecuar evocoiyase omboyeví yuvireco:

—Ore judío oroico vahe upe rumo ndipotasai oroyuca vahe rā que ava —ehi.

³² Ēgüe ehi Jesús ñehe imano āgua resendar yaviye.

³³ Ahese Pilato oi que iri oi pipe, güeru uca Jesús oyeupe oporandu chupe:

—¿Nde ité vo judío rerecuar ivate catu vahe ereico? —ehi.

³⁴ —¿Ndeyesui eté aipo ereporandu cheu, anise, oime tie que ambuae ava che mombehu vahe ndeu? —ehi Pilato upe.

³⁵ —¿Che ndahei eté judío aico! Nde recua pendar ae niha pahi eta rerecuar nde reru yuvireco cheu. ¿Mbahe vo evocoiyase ereyapo? —ehi Pilato chupe.

³⁶ —Che mborerecuasa rumo ndahei co ivi pipendar. Co ivi pipendarse viña, che rupindareta ovavara che amotarēhimbar upe che repisave yuvireco viña. Che mborerecuasa rumo ndahei eté coha pendar —ehi.

³⁷ Ahese Pilato aipo ehi chupe:

—Evocoiyase nde mborerecuar guasu ité ereico —ehi.

—Nde niha aipo, “Mborerecuar guasu ereico” ere cheu. Aherã niha che aha co ivi pipe mbahe supi eté vahe mombehu água. Opacatu ava viroya vahe mbahe supi eté vahe, osenduño ité che ñehesa yuvireco —ehi Pilato upe.

³⁸ Pilato rumo,

—¿Mbahe vo aipo supi eté vahe? —ehi chupe.

“¡Tayaticasa!” ehi ava eta Jesús uve yuvireco

Aipo ohe pare, Pilato osẽ iri judío eta upe oñehe aipo ehi:

—Che ndayosui eté co mbia rese mbahe sembiavi.

³⁹ Pe rumo peicua amose ñepepe ava soquendapri Pascua pieta pipe yepi; ¿peipota amose vaherã judío rerecuar? —ehi.

⁴⁰ Aipo ihese, opacatu osapucái pĩratá yuvireco aipo ehi:

—¡Evocoi aní! ¡Barrabás catu emose! —ehiño yuvireco.

Barrabás rumo imonda rai vahe secoi.

19

¹ Evocoiyase Pilato oporocuai Jesús nupa água.

² Sundao eta omonde ñaca rese yu piapri iyavei omboyemonde turucuar pĩraumbi vahe pipe yuvireco.

³ Ipare oyemboya sese aipo ehi:

—¡Imboeteipri judío Rerecuar tasecoi! —ehi angahu sovapete-pete yuvireco.

⁴ Pilato evocoiyase osẽ iri ava upe aipo ehi:

—Pesepia, anose pẽu pe icua água che ndayosui eté mbahe sembiavi —ehi.

⁵ Evocoiyase vinose yu piapri oãca rese turucuar pĩraumbi vahe reseve senoha ava upe. Ahe se Pilato aipo ehi:

—¡Ndo co aipo mbia cute! —ehi.

⁶ Osepiase pahí eta rerecuar, sundao rerecuar avei, omboipi osapucái:

—¡Tayaticasa! ¡Tayaticasa! —ehi pãve voi yuvireco chupe.

Pilato evocoiyase aipo ehi ava upe:

—Peraso, peyatica pe ae. Esepia, che ndayosui eté mbahe sembiavi —ehi.

⁷ Judío rerecuar rumo omboyevi yuvireco:

—Ore rumo orovireco mborocuaíta. Ipipe omanoño itera. Esepia, oyeapo tẽi Tũpa Rahir —ehi yuvireco.

⁸ Ahe ñehesa renduse, Pilato oyembosiquiyé catu.

⁹ Viroique iri oi pipe seraso. Aheve oporandu chupe:

—¿Que pendar ité vo nde ereico? —ehi.

Ahe rumo nomboyevi iri eté iñehe chupe.

¹⁰ Evocoiyase Pilato aipo ehi chupe:

—¡Mahera ndereñehei eté cheu! ¿Ndereicuai vo che mborerecuar aico nde atica uca água, mbahe tẽi sui nde renose água avei? —ehi Pilato chupe.

¹¹ —¡Aní! Ndererecoi chietera nde mborerecuasa che harive Tũpa nombouise ndeu viña. Sese niha ava che mondosar ndeu oyemboangaipa catu nde sui yuvireco —ehi Pilato upe.

¹² Ahe ramoseve, Pilato osãha iri tẽi Jesús renose água; judío rerecuar rumo osapucái voĩño yuvireco chupe:

—¡Acoi eremose se co mbia, ndahei chietera nde mborerecuar ivate catu vahe mboripar ereico! ¡Opacatu oyemomborerecu tẽi vahe, ahe evocoiyase mborerecuar ivate catu vahe amotarẽhimbar tẽi yuvireco! —ehiño yuvireco chupe.

¹³ Evocoiyase Pilato osenduse aipo ihesa, vinose uca Jesús ocarve, oguapi mborerecuar guasu renda harive. Ahe mbahe rese porandusa rer hebreo ñehe pipe Gabata ‘ita apopri’ oya.

¹⁴ Mbiter ari Pascua pieta água Pilato aipo ehi judío eta upe:

—¡Ndo co pe rerecuar cute! —ehi.

¹⁵ Ahe rumo osapucái pĩratá aipo ehi yuvireco:

—¡Tomanó! ¡Tomanó ité! ¡Tayaticasa! —ehi yuvireco chupe.

Pilato rumo aipo ehi chupe:

—¿Evocoiyase ayatica ucara pe rerecuar? —ehi.

Pahí eta rerecuar rumo omboyevi yuvireco chupe:

—¡Ore ndorovireco iri ambuae mborerecuar, Roma pendar mborerecuar ivate catu vahe gũeraño ité orovireco! —ehi yuvireco.

¹⁶ Ipare Pilato omondo sundao upe yatica uca água. Ichui viraso yuvireco.

Jesús yaticasa curusu rese

¹⁷ Evocoiyase Jesús vinose curusu seraso “Ava Ácagüer” serer vahesave (ahe serer hebreo ñehe pipe Gólgota).

¹⁸ Aheve oyatica yuvireco. Seseve avei oyatica ñuvirío ava yuvireco, ñepeipei yique ivii.

¹⁹ Pilato oicuachía uca omondo curusu rese aipo ehi vahe: “Co Jesús, Nazaret pendar, judío Rerecuar guasu” ehi.

²⁰ Setá iteanga ava oyoeróqui co icuachiapri rese yuvireco. Esepia, icuachiasa hebreo, latín iyavei griego ñehe pipe. Iyavei yaticasa namombriimi eté tecua sui.

²¹ Sese pahí eta rerecuar aipo ehi Pilato upe yuvireco:

—Aní, ‘judío Rerecuar guasu’ ere icuachía; iyacatu rumo, ‘Oyeapo pota tēi vahe judío Rerecuar guasu’ erera icuachía imoi —ehi yuvireco chupe.

²² Pilato rumo omboyeví:

—Co aicuachía vahe, ěgüe ehiño itera oĩ —ehi.

²³ Jesús atica pare evocoi irungatu sundao, omonuha iturucuar oyeupe imboyaho água yuvireco. Oipisi avei iturucuar ivri pendar nimbovívísai vahe, ñepeí reseve pucuño tēi vahe.

²⁴ Sundao eta aipo ehi oyeupe yuvireco:

—Yamondoro eme; aviye catu yandeguayíño sese, ¿ava ité pīha oipísira? —ehi yuvireco.

Ěgüe ehi icuachiapri imboaviye yuvireco aipo ehi vahe: “Omboyaho-yaho ava che turucuar iyavei iguayí yuvireco sese” ehi vahe. Supi tupri ité ěgüe ehi sundao yuvireco.

²⁵ Curusu ivípive yuvirecoi ichi, ichi cupihir, María Cleofas rembireco, María Magdalena avei.

²⁶ Osepiase osi iyavei che repiase yípive, che güembiaisu, aipo ehi osi upe:

—Che sí, evocoi nde membirā ererecora —ehi chupe.

²⁷ Ipare voi aipo ehi cheu:

—Evocoi nde sí —ehi.

Ichuive tupri amoingue ichi che rētave asāro vaherā.

Jesús mano agüer

²⁸ Ipare Jesús oicua ité Vu remimbotar yaviyepa iyavei icuachiapri mboaviye água aipo ehi:

—Che husei —ehi.

²⁹ Aheve oime mbahe riru. Ipipe savapipo vinagre oĩ. Co vinagre pipe omoaqui mbahe saviyu vahe yuvireco omondo ivira rese, osupi, imondo iyuruve yuvireco.

³⁰ Osupite pare aipo ehi:

—Opa yaviye cute —ehi.

Ipare voi ñaca ivíso omano.

Sundao oñaruca cutu lanza pipe Jesús

³¹ Ñepeí ari Pascua pieta uve ipane vahe pipe aipo ěgüe ehi. Sese judío ndoipotai ava retecuer pita curusu rese mbítuhusa ari pipe. Esepia, ahe mbítuhusa ari imboeteipri guasu ité. Sese Pilato upe oporandu yuvireco ahe oyocuai vaherā sundao curusu rese yaticapri rētima mope água ‘tomano’ oyapave curusu sui setecuer reroyipa água yuvireco.

³² Evocoiyase sundao yuvirasopa ñuvirío mbia Jesús rese yaticasa vahe yuvireco. Ahe sētima rane opa omope yuvireco.

³³ Oyemboyase rumo Jesús rese, “Omano ité” ehiño yuvireco chupe. Sese nomopei sētima yuvireco.

³⁴ Ñepeí sundao rumo oicutu yiqueve lanza pipe. Ahe ramoseve voi osē suví, i reseve.

³⁵ Che asepiya vahe ité; supi eté aipo ahe. Evocoiyase amombehu pēu pe seroya água.

³⁶ Esepia, co mbahe ěgüe ehi icuachiapri mboaviye água aipo ehi vahe: “Ndimopesai chietera que ñepeí icangüer” ehi vahe aracahe.

³⁷ Iyavei ambuae icuachiapri aipo ehi: “Osepiara ava eta icutupri yuvireco” ehi.

Jesús yapocatusa ita hopri pipe

³⁸ Ipare José, tecua Arimatea pendar, oporandu Pilato upe Jesús rehögüer reraso água rese. José aipo Jesús rupindar. Ndoyecua ucai rumo omboetasas judío eta upe pahí rerecuar sui osiqüeyepave. Pilato evocoiyase, “Aviye, eraso” ehi chupe. Evocoiyase José oso viraso sehögüer.

³⁹ Nicodemo avei oipítivii, acoi oso vahe Jesús upe pītuse. Ahe güeru mbahe síacua vahe mirra, áloe rese oyeseha vahe, treinta kilo, sehögüer rese nara.

⁴⁰ Ěgüe ehi José, Nicodemo reseve viraso sehögüer yuvireco iyavei oimama tupri turucuar secose vahe imoiacuapri pipe yuvireco. Ěgüe ehi judío oyapo ava omano vahe tī água yuvireco yepi.

⁴¹ Namombrii Jesús atícasea sui oime mbia remiti rēta. Aheve ité oime tuvipa ita hopri, ipiasu vahe iporupirēhi.

⁴² Ipipe omoingue Jesús rehōgüer yuvireco. Esepia, ahe tuvipa cōimi eté ichui iyavei viroví ité judío pítuhusa ari.

20

Jesús cuerayevisa

¹ Domingu pipe María Magdalena oso tuvipave pítu vitemiseve. Ahe osepia ita tuvipa rovpasa ndahe irise güendave ihāi.

² Evocoyase ahe cuña oña oso Simón Pedro upe, cheu avei aipo ehi:

—¡Viraso tuvipa sui yande Yar yuvireco! ¡Ndoroicuai que vo catu omondo yuvireco! —ehi.

³ Evocoyase Pedro rese oroña oroso tuvipave.

⁴ Che rumo aña catu Pedro sui. Che rane evocoyase ayepota tuvipave.

⁵ Aiviro tēi, turucuar güeraño rumo asepia aheve. Ndaiquei rumo ipipe.

⁶ Ipare Pedro oyepota che raquicuei, oique voi tuvipa pipe. Ahe avei osepia turucuar imama agüer tēi.

⁷ Iyavei osepia turucuar ñaca mamasa. Ndahei eté setecuer mamasa rese tui; ahe rumo co cōti ité ipoquesa tupri ou.

⁸ Evocoyase che avei aique; asepia ēgüe ehi vahe. Ahe se aroya voi eté.

⁹ Ore rumo ndorosenducua vitei eté icuachiapri: “Ocuerahevira omano vahe pāhu sui” ehi vahe.

¹⁰ Ipare oroyevipa oroso ore rētave.

Jesús oyemboyecua María Magdalena upe

¹¹ María rumo, ore raquicuei ou vahe, opitaño ité tuvipa ipive, oyaseho. Oyasehoseve oiviro iri tuvipa pipe,

¹² ahe se osepia ñuvirío Tüpa rembiguai iturucuar morochí vahe oguapi yuvinoi sehōgüer rupagüerve. Ñepi oguapi oi ñaca rupagüer coti, ambuae ipi rupagüer coti.

¹³ Ahe Tüpa rembiguai oporandu yuvireco chupe:

—Cuña, ¿mahera vo ereyaseho? —ehi.

Ahe aipo ehi:

—Esepia, che Yar rehōgüer viraso yuvireco iyavei ndaicuai que vo catu omondo yuvireco —ehi.

¹⁴ Aipo oheseve, oyemboyere, osepia Jesús aheve secoise; “Jesús co secoi” ndehi eté rumo chupe.

¹⁵ Evocoyase oporandu María upe:

—Cuña, ¿mahera vo ereyaseho? ¿Ava vo eresece? —ehi chupe.

Ahe omoha ‘co mbahe miti rēta rārosar revo’ oya viña, aipo ehi chupe:

—Nde ererasose sehōgüer, emombehuñomi tēi cheu que vo eremondo. Aheve taso seca —ehi chupe.

¹⁶ Evocoyase,

—¡María! —ehi chupe.

Ahe aipo hese, oyemboyere, aipo ehi hebreo ñehe pipe chupe:

—¡Rabuni! —ehi (‘Porombohesar’ ohesave).

¹⁷ Evocoyase María upe,

—Erepocoi rene che rese. Esepia, ndayeupi vitei che Ru recosave. Esoño, emombehu che reroyasar upe: “Jesús oyeupira Vu Tüpa recosave” erera chupe. Che Ru, pe Ru avei; che Tüpa, pe Tüpa avei —ehi.

¹⁸ Evocoyase María Magdalena ou imombehu: “Asepia yande Yar” ehi iyavei opa omombehu mbahe semimombehu oreu.

Jesús oyemboyecua güemimbohe upe

¹⁹ Ahe ari pipeve, domingu pipe, pítuse, ore ore ñemonhasave oroyeoquenda tupri judío rerecuareta sui ore siquiypave. Ahe se Jesús oique ore pāhuve. Ore mboavirave.

—¡Peico tupri! —ehi oreu.

²⁰ Aipo ohe pare, omboyecua opo, oique avei oreu. Ahe se orerorivete yande Yar repiase oroico.

²¹ Ipare aipo ehi iri:

—¡Peico tupri! Inungar che Ru che mbou, ēgüe ahe aveira co che pēu —ehi oreu.

²² Ichui ore peyu:

—Peipisi Espiritu Santo —ehi—.

²³ Peñeroise que ava upe, ahese ahe oipisira ñeroisa; napeñeroise rumo que ava upe, ahe evocoiyase ndoipisii chira ñeroisa —ehi oreu.

Tomás osepia yande Yar icuerayevisé

²⁴ Ñepeí ore mboetasa rumo Tomás icōi vahe, ndipoi eté ore pãhuve Jesús oyemboyecuase oreu.

²⁵ Ipare ore aipo orohe chupe:

—Orosepia yande Yar —orohe.

Tomás rumo aipo ehi:

—¡Too! Acoi asepiase voi eté quiravo cuarer ipo rese iyavei amoinguese che cuã quiravo cuarer pipe iyavei amoinguese che po yique cutu agüerve, ahese ramo aroyara —ehiño oreu.

²⁶ Ocho ari pare, ore oroñemonuha iri oi pipe oroico. Aheve ramo Tomás secoi ore pãhuve. Yepe oroyeoquenda tupri ité viña, Jesús rumo oi queño ité ou ore pãhuve, ore mboavirave aipo ehi:

—¡Peico tupri! —ehi oreu.

²⁷ Ipare aipo ehi Tomás upe:

—Esepia che po, emoingue nde cuã quiravo cuarerve; embou ave nde po, emoingue avei che ique cutu agüerve. “Tachequerēhi eme seroya āgua” nderei chira cheu; ¡che reroya eve! —ehi.

²⁸ Evocoiyase Tomás aipo ehi:

—¡Che Yar Tūpa! —ehi chupe.

²⁹ Ahese aipo ehi Tomás upe:

—¿Cūrítei che reroya che repiase eve cute? ¡Aviye catu ava che repiāhi pipe che reroya vahe! —ehi chupe.

Co icuachiapri Jesús reroya āgua

³⁰ Jesús oyapo setá ambuae poromondiisa ore rovaque. Ahe rumo ndaicuachiai co cuachiar pipe.

³¹ Co rumo aicuachía ‘toviroya Jesús, Poropísirosar, Tūpa Rahir secosa; ipipe tovíreco tecovesa yuvireco’ che yapave.

21

Jesús oyemboyecua siete güemimbohe upe

¹ Ore sore ivi Galilea ve, Jesús oyemboyecua iri oreu ipa Tiberia ve.

² Ahese oyeseve Simón Pedro yuvirecoi, Tomás ahe acoi icōi vahe, Natanael, ahe aipo tecua Caná pendar ivi Galilea rese, ñuvirío ore Zebedeo rahir oroico vahe iyavei ambuae ñuvirío Jesús remimbohe.

³ Simón Pedro aipo ehi:

—Asora pira mboha —ehi.

Ore avei aipo orohe:

—Toroso nde rupi —orohe chupe.

Orosoño, oroha carite pipe. Ahe pítu pipe rumo ndorombohai eté pira.

⁴ Cōhe potase rumo, Jesús oyemboyecua imbehí ivii. Ore rumo ndoroicuai eté Jesús secose.

⁵ Evocoiyase aipo ehi oreu:

—Mbia chíhivahe, ¿ndapembohaimi eté pira? —ehi.

—Aní eté —orohe chupe.

⁶ Evocoiyase aipo ehi:

—Pemondo pira mbohasa ive pe asu coti. Ahese pembohara —ehi.

Ēgüe orohe, ipare voi, “¡Too!” orohe, ndorovinose catui eté ipi sui pira mbohasa oroico. Esepia, savapipo tupri ité pira ipipe.

⁷ Evocoiyase che, sembiaisui, aipo ahe Pedro upe:

—¡Yande Yar niha evocoi! —ahe.

Pedro che ñehe rendu ramoseve voi, omonde oturucuar. Esepia, yipindar nani secoi; oyo ive oso chupe.

⁸ Ore evocoiyase oroviroyepota ité carite ndatipiimisave, oroichoho pira rehii imbohasa pipe seraso, cien metro tēi oroico imbehí sui.

⁹ Orovinosese ivi ātasave, orosepia tātapii harive pira, pan reseve.

¹⁰ —Peru moviro evocoi pira penose ramo vahe —ehi oreu.

¹¹ Evocoiyase Simón Pedro oha carite pipe, oichoho ndatipiisave pira guasu rehii imbohasa pipe, ciento cincuenta y tres tupri; yepe setá viña, imbohasa rumo ndosoroí eté.

¹² Evocoiyase aipo ehi:

—Perio, tapecarumi rane —ehi oreu.

Ndipoi eté que ñepeí ore pãhuve “¿ava vo nde ereico?” ehi vahe chupe. Esepia, orocuaño ité yande Yar secose.

¹³ Chupe ore sore, oipisi pan, ombou oreu, ãgüe ehi avei pira imbou oreu.

¹⁴ Co rese Jesús oyemboyecua mbosapí rupi oreu ocuerayevire.

Jesús oseoãha Pedro

¹⁵ Ore caru pare, Jesús oporandu Simón Pedro upe:

—Simón, Juan rahír, ¿che raisu catu ité eve co mbahe sui? —ehi.

—Taa, che Yar, ereicua niha che nde raisusa —ehi Pedro chupe.

—Ndehañeco tuprí ru catu che reroya ramomi vahe rese yuvireco —ehi.

¹⁶ Imoñuviriosa rupi oporandu iri chupe:

—Simón, Juan rahír, ¿che raisu catu ité eve? —ehi.

—Taa, che Yar, nde ereicua che nde raisusa —ehi Pedro chupe.

—Evocoiyase esãro tuprí che reroysar yuvireco —ehi.

¹⁷ Imobosapísa rupi oporandu iri chupe:

—Simón, Juan rahír, ¿che raisu vo eve? —ehi.

Aipo oyeupe hese, Pedro ndoyembovíhai eté aipo ehi:

—Che Yar, nde niha opacatu ereicua, nde avei ereicua che nde raisusa —ehi.

—Evocoiyase ndehañeco tuprí catu che reroysar rese —ehi—.

¹⁸ Supi eté aipo ahe ndeu: nde chíhivahe catu vitesse, ereyemonde vite nde ae, ereguata vite avei nde remimbotar rupi; nde cuacua catuse rumo, ereyeyivamoatara, ambuae evocoiyase nde mboyemondera, nde reraso aveira nde so potaẽhisave —ehi.

¹⁹ Jesús rumo omboyecua aipo ohe pipe mara ehira Pedro omano Túpa mboeteisave curi. Ipare,

—¡Erio che rupi! —ehi Pedro upe.

Jesús remimbohe saisuprí

²⁰ Che Jesús rembiaisu ité aico, che ité acoi carusa ipa vaheve yípive añ acoi aporandu chupe: “Che Yar, ¿ava vo nde mondora nde amotarẽhimbar upe?” ahe acoi chupe. Aguatase Pedro raquícuei, oyemboyere che repia.

²¹ Ahese oporandu chupe:

—Che Yar, evocoi no, ¿mbahe oimera chupe? —ehi cheu.

²² Evocoiyase omboyevi Pedro upe:

—Che aipotase secove vite água che yevise nara, ¿mara vo nde ererecora viña? Nde catu, eguataño che rupi —ehi.

²³ Sese ambuae Jesús reroysar ipihañemoñeta tẽi aipo che namanoi chivaherã ité yuvireco viña. Jesús rumo ndahei ‘nomanoi chietera’ ohesave aipo ehi cheu; ahe rumo, “Aipotase secove vite água che yevise nara, ¿mara vo nde ererecora viña?” ehi.

²⁴ Che ité amombehu co mbahe, che avei aicuachía iyavei yaicua supi tuprí vahe ité che remimombehu.

²⁵ Oime avei ambuae mbahe setá Jesús rembiapo, que opacatú icuachiasase viña, ndiyai chietera revo ivi viña. Aipo rupive.

APOSTOL REMBIAPO LOS HECHOS

Tüpa omboura Espiritu Santo viroyasar upe

¹ Imboeteipri Teófilo, cuese amondo evocoi che rembicuachía Jesús recocuer resendar ndeu. Opa yipindar sembiapocuer amombehu ndeu iyavei yipisui iporombohe agüer.

² Ocueraeyevire, ivave oso renondeve, Jesús omombehu oporocuita Espiritu Santo pīratasa pipe güembiporavo apóstol upe sembiaporã.

³ Oyemboyecua güembiporavo upe omanore. Setá rupi omboyecua tupri ocueraeyevisa chupe. Semimbohe osepia yuvireco imanore cuarenta ari rupi. Ahese omombehu Tüpa mborerecuasa resendar güemimbohe upe.

⁴⁻⁵ Oicove vītese yuvireco sese, aipo ehi chupe:

—Pesēi rene Jerusalén sui. Tomboaviye rane che Ru Tüpa güemimombehu, ahe acoi amombehu pēu. Juan niha pe āpiramo i pipe tēi; Tüpa rumo Espiritu Santo pipe pe āpiramora. Moviom i tēi ari ipane vite imondo āgua pēu —ehi güemimbohe upe.

Jesús oso ivave

⁶ Oñemonuhase apóstol yuvireco sese, oporandu yuvireco chupe:

—Ore Yar, ¿erembou irira vo cūritei Israel iguar upe pīratasa iyeyecuai āgua? —ehi semimbohe yuvireco chupe.

⁷ Ahe rumo aipo ehi chupe:

—Ndiyai ahe ari cua āgua pēu. Esepia, Tüpa año ité vireco omborerecuasa ahe mbahe apo āgua.

⁸ Peipisira rumo Tüpa pīratasa oiquese Espiritu Santo pe piha pipe. Ahese pemombehu tuprira che recocuer Jerusalén pendar upe, Judea pendar, Samaria pendar iyavei opacatu co ivi pipendar upe avei no —ehi chupe.

⁹ Aipo ihe pare, omahe apóstol yuvireco sese, aheseve Tüpa vīraso ivave. Ichui Jesús oi que iva quihā pāhuve. Evocoyase ndosepia iri eté yuvireco cute.

¹⁰ Omahe vītesevē yuvīnoha ivave ichosa rese, aviyeteramo tēi ñuvirío mbia, iturucuar morochi vahe, oyemboyecua apóstol ipive yuvīnoha

¹¹ aipo ehi yuvireco chupe:

—Galilea iguar, ¿mahera vo pemahe vite iva rese pehā? Evocoi Jesús, inungar Tüpa vīraso ivave pe sui, ēgüe ehi aveira niha ogüeyi ou co ivi pipe co iye —ehi yuvireco chupe.

Jesús remimbohe oiporavo Matías, Judas recuñara yuvireco

¹² Evocoyase apóstol oyevi yuvīraso Jerusalén ve ivitri Olivo sui, ahe ihamombrigüer ñepe i kilómetro tēi. Supivemi imombehusa judío guata āgua mbituhusa ari pipe yepi.

¹³ Yuvīroiquese Jerusalén ve, oyeupilo oquesa oi ivateve yuvireco. Aheve Pedro, Juan, Santiago, Andrés, Felipe, Tomás, Bartolomé, Mateo, Santiago ahe Alfeo rahir, Simón ahe Zelote iyavei Judas, Santiago rahir yuvirecoi.

¹⁴ Co opacatu ari yacatu rupi oñemonuha oyoya guasu oyerōqui āgua yuvireco yepi Jesús rivri, ichi, ambuae cuña reseve avei.

¹⁵ Evocoyase ñepe i ari pipe oñemonuha guasu ciento veinte ava yuvireco. Ipāhuve Pedro opūha aipo ehi ava upe:

¹⁶ “Che mu eta Jesucristo reroysar, iya ité co imboaviyesa Tüpa Ñhengagüer Judas recocuer resendar. Ahe imombehupri David upe Espiritu Santo pipe aracahe. Evocoi Judas vīraso vahe Jesús amotarēhimbar ipisi uca āgua.

¹⁷ Ahe acoi secoi yande pāhuve co mboraviquisa rese yande pītivi āgua avei viña.

¹⁸ Evocoi güembiapo ai repri pipe omboepi ivi. Ipare ñaca iviso oviapi oso ivive, oyetiapiipa.

¹⁹ Opacatu ava Jerusalén pendar oicua Judas recocuer yuvireco. Sese co ivi upe, ‘Acéldama’ ehi yuvireco oñehe pipe ‘Ivi Tuvī resendar’ oyapave.

²⁰ Esepia, icuachiapri Salmo pipe aipo ehi:

‘Taseyasa sēta yuvireco.

Tipo iri eme ava ipipe’ ehi.

Iyavei ambuae aipo ehi:

‘Toime ambuae secoyar iporaviqui rāgüer pisi āgua’ ehi vahe.

²¹ “Evocoyase cohavē oime ava yande Yar Jesús secoi vītese yande pāhuve

²² ñāpiramosa suive yuvirecoiño vahe ité yande rupi iyavei ivave ichosa osepia vahe avei yuvireco. Ahe tiporavosa ñepe ipāhu pendar yande rupi icueraeyevi agüer mombehu āgua” ehi omboetasa upe.

²³ Evocoyase oiporavo ñuvirío mbia yuvireco: ahe José Barsabás, serosa Justo; ambuaer Matías.

²⁴ Ipare oyoerqui yuvireco aipo ehi: “Nde, ore Yar, opacatu ava piha ereicua. Emboyecua cohawe nde rembiporavo oreu; ¿uma vo ereipota

²⁵ eremondo vaheerā icuaitarā apóstol seco água Judas recuñara? Ahe oangaipa pipe oyemocañi uca tēi vahe oico” ehi Tūpa upe yuvireco.

²⁶ Evocoyase osāha iporavo yuvireco. Matías ité vinose iporavopri sui yuvireco. Ichui tupri ité oique once apóstol pāhuve.

2

Espíritu Santo güeyi agüer

¹ Oyepotase Pentecostés pieta, opacatu Jesús reroyasar oñemonuha oi guasu pipe yuvireco.

² Aheve oi pipe aviyeteramo tēi ivitu ipĩrata vahe nungar siapu guasu ou iva sui. Ahe siapugüer oyendupa tupri oi pipe.

³ Ahese oyecua tata rendigüer nungar opacatu aheve yuvirecoi vahe harive.

⁴ Ahese avei Tūpa omoingue evocoi ava piha pipe oEspíritu Santo. Ichui ahe Espiritu omofehe uca ambuae ñehesa pipe yuvireco.

⁵ Ahe ari pipe setá iteanga judío yuvirecoi Jerusalén ve omboaviye vahe ocuaita Tūpa mboeteisa, ahe oñemonuha vahe opacatu ivi rupindar yuvireco.

⁶ Mbahe siapu guasu vahe renduse, oñemonuha ati tēi yuvireco oyese. Ndoyemboaracuai tēi yuvireco ambuae ava oñehe pipe ñehese.

⁷ “¡Too!” ehi tēi oyepihamondiisa pipe yuvireco. Sese aipo ehi oyeupe:

—¿Ndahei vo acoi co ava Galilea iguar oñehe vahe yuvireco?

⁸ ¿Mahera pĩha co ñepeí-peí oñehe yande ñehe pipe yuvireco? —ehi tēi oyeupe yuvireco—.

⁹ Esepia, cohawe yuvirecoi vahe: Partias pendar, Media pendar, Elam pendar, Mesopotamia pendar, Judea pendar, Capadocia pendar, Ponto pendar, Asia pendar,

¹⁰ Frigia pendar, Panfilia pendar, Egipto pendar, Libia cotindar, ahe Cirene cõquivotindar. Iyavei Roma pendar,

¹¹ judío yuvirecoi vahe, ambuae judío aracuasa reroyasar avei, Creta pendar, Arabia pendar. ¡Yande yasendu opacatu yandeu ñehe yuvireco yande ñehe pipe Tūpa rembiapo icatupri vahe! —ehi.

¹² Opacatu oyepihamondií, ndoicuai opihañemoñeta água yuvireco.

—¿Mara ehi pĩha co na oya yuvireco? —ehi-ehi tēi yuvireco oyeupe.

¹³ Ambuae ava rumo seroĩrosa pipe aipo ehiño yuvireco:

—¡Osavaipo mo evocoi yuvireco! —ehi.

Pedro oñehe ava upe

¹⁴ Evocoyase Pedro opũha opacatu once vahe apóstol pāhuve, oñehe pĩrata aipo ehi: “Che mu judío eta, opacatu Jerusalén pendar avei, peicua co mbahe amombehu vaheerā pēu; peyapisaca tupri che ñehe rese:

¹⁵ ndosavaipoi moco co mbia yuvireco. ¿Ndapesepiaí vo añihivei vite cūrítei?

¹⁶ Co niha Tūpa ñehe mombehusar Joel oicuachía vahe aracahe:

¹⁷ “Tūpa aipo ehi:

Coíye, ari cañi renonde, amondora che Espiritu Santo opacatu ava upe.

Ipĩratasa pipe pe rahir, pe rayri oñehera yuvireco.

Mbia chíhivahe osepiara oquer pendar nungar mbahe yuvireco.

Oime aveira queraisa supí eté vahe cuacua vahe upe.

¹⁸ Supí eté ahe ari pipe amondora che Espiritu che rembiguai cuimbahe upe, che rembiguai cuña upe avei.

Ipare oñehera yuvireco che rese ipĩratasa pipe.

¹⁹ Amoyecuara poromondiisa iva rese.

Ēgüe ahe aveira poromondiisa mboyecua ivi pipe:

tuví, tata iyavei tātachi.

²⁰ Yande Yar ari tuvichá vahe imboeteipri renonde ohara pĩtu, yasi oyeapora tuví nungar.

²¹ Opacatu ava, che Yar che pĩtívii eve, ehi vahe, ahe oñepisirora yuvireco’ ehi Joel icuachía aracahe.

²² “Pe Israel suindar, pesendu che ñehe: Jesús, Nazaret pendar, oyapo poromondiisa tuvichá vahe, mbahe yavai vahe Tūpa pĩratasa pipe pe pāhuve güeco marañehi mboyecua água. Ahe niha peicua opacatu.

²³ Ipare rumo evocoi Jesús imondosa pēu yuca água. Ahe rumo Tūpa remimbotar rupi. Esepia, yipive ité Tūpa oicua pe peipisira yuca uca água curusu rese ava naporai vahe upe.

- ²⁴ Tūpa rumo ombogüerayevi manosa sui. Esepia, manosa ndoicatui sereco āgua.
- ²⁵ Supi eté mborerecuar guasu David oñehe Jesús recocuer rese aracahe aipo ehi: ‘Che aicua che Yar che rese secói che acato coti mbahe tēi pīpe che viapiēhi āgua yepi.
- ²⁶ Sese avihaño ité vichico, asapucai avei che rorivetesá pīpe. Iyavei che yeroya tuprisave asārora mbahe aviye vahe che recove iri āgua.
- ²⁷ Esepia, nde ndereseyai chira che hā omano vahe pāhuve, nderemonduyu ucai chiaveira nde rembiguai seco maranēhi vahe retocuer.
- ²⁸ Co tecovesá ereicua uca cheu. Che mbovihara eve nde rese che recose’ ehi David aracahe.
- ²⁹ “Che mu eta, supi eté yande ramo David omano, ñotisa ita hopri pīpe aracahe. Ahe suvīpa ouve vite cohove yande pāhuve.
- ³⁰ David rumo Tūpa ñehe mombehusar, oicua Tūpa oyeupe aipo ehi vahe: ‘Supi eté aipo ahe ndeu: nde suindar oimera mborerecuar guasu nde recuñara’ ehi vahe.
- ³¹ Ahe ndoyavī osepia vahe ité Poropīsīrosar cuerayevisa. Evocoiyase aipo ehi oñehe sese: ‘Ihā ndopitai chira omano vahe pāhuve iyavei setecuer ndituyui chira’ ehi aracahe.
- ³² Evocoi Jesús, Tūpa remimbogüerayevi secói. Ahe imombehusar opacatu ore oroico.
- ³³ Ipare Tūpa víraso oacato coti imboguapi. Ahe oipīsī imombehupri Espírītu Santo Vu sui. Evocoiyase ahe opa omondo co ava yuvirecói vahe upe. Ahe pesepia, pesendu avei cūrītei peico.
- ³⁴ Esepia, evocoi oso vahe ivave ndahei David. Ahe ae rumo aipo ehi aracahe: ‘Yar aipo ehi che Yar upe: Eguapi cohove che acato coti che pīri.
- ³⁵ Ascopīpa uca ranera nde amotarēhimbar ndeu, ehi Yar che Yar upe’ ehi David aracahe.
- ³⁶ “Pe tapecuasapa, ticuasapa avei opacatu Israel recua rupi, supi eté evocoi Jesús curusu rese peyática vahecuer, ahe Tūpa omoingo opacatu yande Yarā iyavei yande pīsīro āgua” ehi Pedro ava rehī upe.
- ³⁷ Aipo renduse, tasí iteanga ipiha pīpe yuvireco. Evocoiyase oporandu chupe, ambuae imboetasá upe avei yuvireco: —Ore mu, ¿mbahe vo oroyapora evocoiyase? —ehi.
- ³⁸ Evocoiyase aipo ehi ahe ava upe: —Pemboasi pe angaipa; peyevi Tūpa upe. Iyavei peñeapiramo opacatu Jesucristo rer pīpe. Evocoiyase Tūpa iñerora pe angaipa rese. Iyavei omondora Espírītu Santo pēu.
- ³⁹ Esepia, co ñehesa imombehupri, ahe pēu nara, pe suindar upe nara iyavei opacatu amombri Tūpa sui yuvirecói vahe upe nara avei, ahe acói opacatu yande Yar Tūpa oyeupe nara güeru pota vahe —ehi.
- ⁴⁰ Egüe ehi oñehe vite ava mboaracua aipo ehi: —¡Peyepēpi co ava secocuer co coti tēi vahe sui! —ehi chupe.
- ⁴¹ Acói ava víroya vahe co ñehesa, oñeapiramo uca yuvireco. Ahe arī pīpe oyemboeta iri tres mil ava yuvireco Jesús víroya vahe rese.
- ⁴² Opacatu víroya tupri ité apóstol porombohesa. Opacatu guasu avei oyeaisu tupri yuvireco, oyerocuī iyavei oñemonuha oyeupe pan mboyaho-yaho āgua yuvireco yepi.
- Yipīndar vahe Jesús reroyasar recocuer*
- ⁴³ Opacatu oyembosiquiye imboeteisa pīpe yuvireco. Esepia, apóstol oyapo setá poromondiisa ‘toicua Tūpa suindar yande porombohesa yuvireco’ oyapave.
- ⁴⁴ Opacatu Jesús reroyasar ipihañemoñeta tupri ité ombahe rese yuvireco güecocuer upe nara.
- ⁴⁵ Omondo ambuae ava upe oivi iyavei ombahe eta yuvireco. Sepri omondo oyeupe mbahe panesa rupi-rupi.
- ⁴⁶ Ari yacatu rupi judío tūparove oñemonuha yuvireco. Iyavei oi yacatu rupi avei oñemonuha oyoya guasu pan mboyaho āgua. Ipare oyoya guasu ocaru yuvireco oyembovihasa pīpe, opihañemoñeta tuprisa pīpe avei.
- ⁴⁷ Osapucai yuvireco Tūpa upe yepi iyavei opacatu ava osaisu Jesús reroyasar yuvireco. Yande Yar evocoiyase arī rupi omboeta catu ava iñepīsīro āgua Jesucristo víroya vahe pāhuve.

3

Ndoguatai vahe cuerasa

¹ Ñepeī arī aipo, caharuse las tres pīpe, Pedro, Juan reseve oyoya yuviraso judío tūparove. Ahe hora pīpe judío oyerocuī yuvireco yepi.

² Ahe tūparo roquendipi rer Porañete. Aheve ari yacatu rupi vıraso ñepeı ava oyesu suıve ndoguataı vahe 'tomondo guarepochi ava tūparove yuvıroique vahe yuvıreco chupe' oyapave.

³ Ahe ndoguataı vahe omahe Pedro, Juan rese tūparove seique potase, oporandu guarepochi rese chupe.

⁴ Pedro, Juan aveı rumo omahengatu yuvıreco sese. Pedro aıpo ehi chupe:

—Emahe ore rese —ehi.

⁵ Evocoiyase ahe mbıa omahengatu sese 'omboura revo que mbahe cheu' oya viña.

⁶ Aıpo ehi rumo ndoguataı vahe upe:

—Che ndarecoı guarepochi, oro aveı. Co areco vahe rumo amondora ndeu: Jesucristo, Nazaret pendar, rer pipe epūha, eguata —ehi chupe.

⁷ Evocoiyase oıpısi ipo yası cotındar imopuha. Ahe ramoseve opa tuprı ipı, ipıñuha aveı ovıracua.

⁸ Evocoiyase opūha, opo, oguata; oıque oso tūparove supı. Opo-opo vorıvetesave iyaveı osapucaı Tūpa upe.

⁹ Opacatu ava osepiya yuvıreco iguatase iyaveı Tūpa upe isapucaise.

¹⁰ Omahecuase sese, "¡Too!" ehi tēi yuvıreco. İyaveı ndoyembovıhai avıyeteramo tēi icuerase yuvıreco. Esepia, evocoi ava oıcuapa tūparo roquendipi Porañete serer vahesave chinise mbahe rese iporanduse yuvıreco yepı.

Pedro oñehe ava rehıı upe tūparo Corero Salomón serer vahevıre

¹¹ Ndoguataı vahecuer ndoyepipi potai Pedro, Juan sui. Yuvınoña atı, oyepıhamondıı ava sepiya tūparo Corero Salomón serer vaheve yuvırecoıse.

¹² Pedro evocoiyase aıpo ehi ava upe: "Che mu, ¿mahera vo peyemondıı? ¿Mahera vo ore repia atı peye? Ndoıyavıı co ore pıratasa pipe tēi iyaveı Tūpa rese ore pıhañemoñeta tuprısa pipe tēi orombogüera vahe co mbıa pēu viña.

¹³ Tūpa, ahe acoı Abraham, Isaac iyaveı Jacob vıroya yuvıreco aracahe iyaveı opacatu yande ramoı eta aveı no, ahe niha omondo güeco pıratasa tvıchı catu vahe Guahır Jesús upe. Pe rumo acoı pemondoño mborerrecuar Pilato povrıve. Acoı omose potase, pe evocoiyase ndapeıpotaiño imose água chupe.

¹⁴ Ahe seco maranehi vahe, seco İvi vahe renose rãgüer pipe, peporandu: 'Tosē oporapıchı vahe' peye.

¹⁵ Ęgüe peye acoı tecovesa ombou vahe yuca. Tūpa rumo ombogüerayevi omano vahe pāhu sui. Ahe niha ore oromombehu oroico pēu.

¹⁶ Co Jesús rer rese yeroya pipe itē niha oıpısi pıratasa co mbıa ndoguataı vahecuer opacatu pe pesepia vahe iyaveı peıcuva vahe. Jesús rese yeroyasa pipe itē niha co pe rembiepiave ocuera tuprı" ehi ava upe.

¹⁷ "Che mu eta, che aıcuva acoı pe peıpıtıvıı vahe pe rerecuvar Jesús yuca uca água pe icıva tuprıehı pipe cuese.

¹⁸ Ęgüe ehi Tūpa imboavıye aracahendar opacatu oñehe mombehusar upe güemimombebugüer: 'Che Rembıporavo Poropısirosar oıporarara mbahe-mbahe tēi rasıcuvar omano' ehi vahe.

¹⁹ Sese pemboası pe angaıpa; peıyevi Tūpa upe. İpıpe sui tomocañı pe angaıpa pe sui. Avıyeteramo co sui omboura yande Yar pe reco morohısa água,

²⁰ ombou aveıra Jesús, ahe yıpisıve iporavoprı pe pısiro água.

²¹ Cūriteı rumo Jesucristo İvave vite secoı acoı Tūpa opase voi omoıngatu opacatu mbahe İyevi água. Aıpo ehi acoı imoñehe uca aracahendar oñehe mombehusar ndaseco marai vahe.

²² Moısés yande ramoı yuvırecoı vahe upe aıpo ehi imombehu aracahe: 'Yande Yar Tūpa omopuhara ñepeı oñehe mombehusar pe pāhuve che nungar. Ahe İñehe pesendura, pemboyeroıya catu aveıra.

²³ Opacatu ndovıroyai vahe İñehe Tūpa omocañıra güembıporavo pāhu sui' ehi.

²⁴ "Ęgüe ehi opacatu Tūpa ñehe mombehusar Samuel suıve aracahe omombehu aveı co ari cūriteı yasepiya vahe yuvıreco.

²⁵ Pēu nara niha Tūpa ñehe mombehusar remimombebugüer aracahendar. Pēu nara aveı acoı Tūpa omombehu vahe güemımbotar yande ramoı eta upe. Esepia, aıpo ehi Abraham upe aracahe: 'Opacatu ava co İvı pıpendar ahe soıvasaprı yuvırecoıra nde suındar sui' ehi.

²⁶ Acoı Tūpa Guahır ombogüerayevıse, pēu rane ombou pe rovasa água 'toseıyapa ñepeı-peı güecocuvarı yuvıreco' oıya" ehi Pedro ava rehıı upe.

4

Pedro, Juan serasosa mborerrecuar rovai

¹⁻² Pedro, Juan reseve oñehe vitesese ava rehii upe, ahese oñemoirosa pipe pahi eta, tũparo rãrosar sundao rerecuar, saduceo avei oyugũeru yuvireco chupe. Esepia, Pedro iyavei Juan ombohe ava yuvireco aipo ehi: “Jesús ocuerayevi; sese oime cuerayevisa omano vahe pãhu sui” ehi.

³ Ichui oipisi seraso soquenda yuvireco ‘ayihive voi yanosera mbahe rese porandu ãgua’ ohesa pipe. Esepia, caharuse tẽi osoquenda yuvireco.

⁴ Setã rumo ava iñehesa osendu vahe viroya yuvireco. Ahe cuimbahe seroyasar retacuer güeraño seni cinco mil.

⁵ Ahere ayihive mborerecuareta oñemonuha yuvireco Jerusalén ve: judío rerecuar, pahi eta rerecuar, Moisés porocuaite rese oporombohe vahe,

⁶ pahi rerecuar ivate catu vahe Anãs, Caifãs, Juan, Alejandro, opacatu omu reseve.

⁷ Evocoyase güeru ucase Pedro iyavei Juan opãhuve yuvireco, oporandu yuvireco chupe: —¿Ava pe cuaite pipe vo, ava rer pipe avei vo co mbahe peyapo? —ehi.

⁸ Evocoyase Pedro, Espíritu Santo pĩratasa pipe, aipo ehi chupe:

—Pe, mborerecuareta co tecua pipendar, pe avei pahi rerecuar:

⁹ peporandu niha co ava imbaheasi vahe ndoguata catui vahe mbogũera agũer rese oreu —ehi chupe—.

¹⁰ Evocoyase tapeicuapa opacatu pe Israel suindar peico vahe ocuera co ava ndoguata catui vahecuer Jesucristo, Nazaret pendar, rer pipe. Ahe niha peyatica uca vahecuer curusu rese. Tũpa rumo ombogũerayevi iri omano vahe pãhu sui.

¹¹ Co Jesús pe remieroĩro, ahe rumo yande víracuasa. Pe evocoyase inungar oi mopuhasar omomboño vahe ita aviye catu vahe oi moviracuasa rãgũer yepi.

¹² Ndipoi que ambuae ava sui poropĩsirosa, Jesús güeraño itẽ oicatu oporopĩsiro. Esepia, Tũpa nomboui ambuae ava tẽi co ivi pipe yande pĩsiro ãgua —ehi.

¹³ Mborerecuar osepiane iyembosiquiyeẽhisa yuvireco, “¿Mara ehi pĩha co mbia? ¿Ava tẽi, ndoyembohei vahe niha!” ehi tẽi yuvireco chupe. Ichui oicua Jesús remimbohegũer secose yuvireco.

¹⁴ Iyavei acoi ava semimbogũeragũer supive itẽ secoise, sese ndoicatui chupe oñehe mara ãgua yuvireco.

¹⁵ Ipare, “Pesẽ ocarve” ehi mborerecuareta yuvireco chupe. Ahe güeraño evocoyase opita oi pipe oñemoñeta yuvireco sese

¹⁶ aipo ehi:

—¿Mara yahera vo co ava rereco? Esepia, opacatu ava Jerusalén pendar oicua co mbahe poromondiãsa oyapose yuvireco. Ndiyai etẽ, “Ègũe ndehi” vahe chupe.

¹⁷ Yambosiquiye ava upe Jesús rer rese iñehe iriẽhi ãgua yuvireco. Ipipe sui ava tosendu iri eme Jesús resendar ñehesa yuvireco —ehi.

¹⁸ Aipo ohe pare, “Perio” ehi yuvireco chupe. “Pesendu, co pipe suive peñehe iri eme tupri iyavei pembohe iri eme avei ava Jesús rer pipe” ehi yuvireco chupe.

¹⁹ Omboveyiño rumo oñehe yuvireco chupe:

—¿Mara ehi pe pihave? ¿Uma pĩha aviye catu Tũpa rovai? ¿Pe porocuaite tie oroviroya catura Tũpa ore cuaisa sui!

²⁰ Ndiyai rumo mbahe ore rembiepia, mbahe orosendu vahe avei mombehuẽhi ãgua oreu —ehi.

²¹ Aipo ihese, mborerecuar ombosiquiye catu tẽi yuvireco. Ichui rumo omose tupriño. Esepia, ava omboetei guasu Tũpa yuvireco co imbaheasi vahe mbogũera repiase. Sese ndoicatui etẽ mbahe apo yuvireco chupe.

²² Evocoi ava oipisi vahe Tũpa poromondiãsa ocuera ãgua, ahe oñiaro catu cuarenta araviter vireco vahe sui.

Jesús reroyasar oporandu Tũpa upe siquiyeẽhisa rese yuvireco

²³ Yuvinosese Pedro, Juan avei, oyevi yuvirasos omboetasas pĩri. Aheve oñemonuhasave opa omombehu pahi rerecuar oyeupe ñehe mara-mara tẽisa yuvireco.

²⁴ Aipo rendu pare, oyoya guasu oyoerqui yuvireco Tũpa upe aipo ehi: “Ore Yar, nde niha Tũpa opacatu iva, ivi, para guasu, opacatu ipor reseve aposar ereico.

²⁵ Nde Espíritu Santo pipe aipo erembobehu uca nde rembiguai mborerecuar David upe aracahe:

‘¿Mahera vo co ava ndahei vahe judío oyamotarẽhi yuvireco?

¿Mahera vo ipihañemoñeta rai tẽi yuvireco?

²⁶ Mborerecuar guasu eta, ambuae mborerecuar reseve co ivi pipendar oñemonuha yuvireco yande Yar Tũpa iyavei sembiporavo amotarẽhi ãgua’ ehi aracahe.

²⁷ “Ēgüe ehi eté oñemonuhase Herodes, Poncio Pilato avei, ava ndahei vahe judío, judío eta reseve yuvireco co tecua Jerusalén ve. Esepia, oñemonuha yuvireco nde rembiguai aracaheve nde Rembiporavo Poropísirosar Jesús, seco maranehi vahe, amotarēhi āgua.

²⁸ Ēgüe ehi yapo opacatu nde pihañemoñeta arachendar rupi tupri ité yuvireco.

²⁹ Iyavei cūritei, ore Yar, emahe ore amotarēhisar rese. Embou nde pīratasa nde rembiguai oroico vahe upe siquiyeēhisa pipe nde ñehengagüer mombehu vite āgua.

³⁰ Īpare, nde pīratasa pipe, embogüera imbaheasi vahe iyavei eyapo mbahe poromondiisa yavai vahe nde rembiguai Jesús rer maranehi pipe” ehi yuvireco oyerogüi.

³¹ Iyerogüi pare, Tūpa omboriri opacatu mbahe iñemonuhaseve yuvireco chupe. Ahese Espiritu Santo opa oique yuvireco sese. Sese osiquiyeēhisa pipe omombehu tupri Tūpa Ñehengagüer yuvireco.

Jesús reroyasar ombahe opacatu oyeupe nara vireco yuvireco

³² Setá iteanga Jesús reroyasar yuvireco. Opacatu oyoya tupri ipihañemoñeta yuvireco. Ndipoi eté “co güeraño co che mbahe” ehi vahe; opacatu seroyasar mbahe rumo opacatu mbahe.

³³ Jesucristo apóstol omombehu vite ipīratasa pipe icuerayevi agüer yuvireco. Ipipe Tūpa osvosa catu vite opacatu yuvireco.

³⁴ Ndipoi eté ipāhu pendar mbahe ndovirecoi vahe. Esepia, opacatu ivi vireco vahe iyavei oi omondo,

³⁵ ahe seprī omondo apóstol upe yuvireco yepi. Ahe evocoiyase omboyaho-yaho opacatu upe mbahe ipane vahe rupi-rupi yuvireco.

³⁶ Ēgüe ehi ava judío ramoi Leví suindar, Chipre pendar, José serer vahe, apóstol osero, “Bernabé” ehi yuvireco chupe (‘porombovihasar’ oya aipo ehi),

³⁷ ahe mbia omondo oivi, güeru seprī apóstol upe.

5

Ananías iyavei Safira yemboangaipa agüer

¹ Ambuae ava rumo, Ananías serer vahe, güembireco Safira reseve omondo ivi yuvireco.

² Ahe mbia rumo omboyaho seprī, ñepei iyahocuer vireco oyeupe nara, ambuae iyahocuer viraso apóstol upe, sembireco avei oicua tēi opacatu.

³ Evocoiyase Pedro aipo ehi chupe:

—Ananías, ¡mahera ereroya Carugar nde piha pipe Espiritu Santo mbopa āgua, eremboyahoño tēi nde ivi reprī guarepochi ndeyeupe nara!

⁴ ¿Ndahei vo nde mbahe ité ivi viña? Eremondo ité niha, evocoiyase nde mbahe ité guarepochi. ¡Mahera ereyapo co nungar! Ndahei ava upe nde remira, Tūpa upe ité rumo nde remira —ehi chupe.

⁵ Osenduse Pedro ñehesa, oviapi sehögüer oso sovai. Ahese opacatu oyandu vahe osiquiye tēi yuvireco.

⁶ Īpare mbia chīhivahe yugüeru, osupi sehögüer, oipoque seraso yuvireco ñoti āgua.

⁷ Mbosapi hora pare, sembireco Safira serer vahe oique oi pipe. Ndoicua vitei rumo omer mano.

⁸ Ahese Pedro oporandu chupe:

—Emombehu cheu: ¿Co guarepochi retacuer rupi eté vo pemondo pe ivi? —ehi chupe.

—Evocoi rupive ité niha oromondo —ehiño avei cuña chupe.

⁹ Evocoiyase aipo ehi ahe cuña upe:

—¡Mahera peyemboyoya pe pihañemoñetasa rese pe secoāha āgua yande Yar Espiritu! Coi yugüeru nde mer tisarer. Nde avei nde reraso āgua yuvireco eipeve —ehi chupe.

¹⁰ Ahe ramoseve avei oviapi sehögüer Pedro rovai. Mbia chīhivahe yuviroique, oipoque voñiño ité sehögüer seraso imer iviñi ñoti āgua yuvireco.

¹¹ Opacatu Jesús reroyasar, ambuae ava avei oyembosiquiye guasu yuvireco yanduse.

Setá poromondiisa yaposa

¹² Evocoiyase apóstol pipe Tūpa omboyecua uca setá poromondiisa ava pāhuve yuvireco. Opacatu Jesús reroyasar oñemonuha judío tūparo ique, Salomón serer vahesave yuvireco.

¹³ Opacatu ambuae ndoyemboyai yuvireco sese osiquiyepeve. Ava rehi rumo, omboetei eteanga apóstol yuvirecoi vahe yuvireco.

¹⁴ Oyemboeta catu yande Yar reroyasar setá cuimbahe, setá avei cuña.

¹⁵ Iyavei ava rehi vinose yuvireco imbaheasi vahe supa reseve-seve Pedro renonera, “Oñocuase Pedro, aviyeteramo omohara ihägüer. Ahese revo ombogüerara” ehi yuvireco oyeupe.

¹⁶ Ava Jerusalén ivirindar avei güeru omonuha setá imbaheasi vahe, carugar rese yuvirecoi vahe apóstol upe imbogüerapirã. Ahe evocoiyase opacatu imbogüera yuvireco.

Apóstol yamotarêhipri yuvirecoi

¹⁷ Ichui tēi pahi rerecur ivate catu vahe, saduceo yuvirecoi vahe oñemoiro yuvireco apóstol upe ava rese güecatêhisave.

¹⁸ Sese oipisi osoquendapa uca yuvireco.

¹⁹ Ipare rumo, pítu pipe, Tüpa rembiguai iva pendar ou omboi oquenda, vinose ichui, aipo ehi chupe:

²⁰ “Peso tüparo guasuve, pemombehu avei ava upe co ñehesa tecocuer piasu resendar” ehi chupe.

²¹ Co mbahe rendu pare, supi tupri ité oyapo yuvireco. Cõhe ramoseve yuviraso judío tüparo guasuve ava mbohe água.

Aheseve pahi rerecur ivate catu vahe, supindar avei osenoi opacatu tecua pipendar mborerecur ñemonuha água ivate catu vahesave; omondo yuvireco güembiguai apóstol reru água soquendasa sui aheve nara viña.

²² Oyepotase rumo sembiguai yuvireco, oseca tēi soquendapri. Ichui oyevi tēi yuvireco imombehu

²³ aipo ehi:

—Oroyepotase ava roquendasave, orosepia opacatu oquenda imboyapri tupri iyavei orosepia opacatu oquendipi rupi sãrosar osãro tupri ité viña. Oromboise rumo oquenda, ndipoi eté ava soquendapri ipipe —ehi tēi yuvireco.

²⁴ Osenduse, pahi rerecur ivate catu vahe, tüparo rãrosar rerecur, pahi rerecuareta avei yuvireco, ipihañemoñeta tēi: “¿Que rupi vo opoira co mbahe sui yuvireco?” ehi tēi yuvireco oyeupe.

²⁵ Aheseve ñepeí mbia oyepota imombehu:

—Evocoi pesoquenda vahecuer, ahe mbia cūrítei oporombohe tüparove yuvireco —ehi chupe.

²⁶ Evocoiyase tüparo rãrosar rerecur, sembiguai avei yuviraso seru água mbahe tupri pipe, “Aviyeteramo yande api-api tiētera ava yuvireco yaru raise” ehi yuvireco.

²⁷ Viroyepotase yuvireco ñemonuhasa ivate catu vahesave, ahese evocoi pahi rerecur ivate catu vahe aipo ehi chupe:

²⁸ —Ore mborerecur tecua pipendar, ndoroipotai peporombohe evocoi mbia recocuer rese. Pe rumo pembohe opacatu Jerusalén pendar secocuer rese serer pipe. Pemombehu avei ava rehii upe ore mborerecur oroyuca uca evocoi mbia —ehi pahi rerecur chupe.

²⁹ Pedro, omboetas reseve, omboyevi pahi rerecur ivate catu vahe upe yuvireco:

—Ore cuaita ité Tüpa mboyeroya, ndahei chira rumo ava tēi rane oromboyeroyara —ehi yuvireco chupe—.

³⁰ Yepe peyatica, peyuca uca Jesús curusu rese viña, yande Ru Tüpa rumo acoi yande ramoi eta viroya vahe, ahe ité ombogüerayevi.

³¹ Ipare osecomboivate ivave oacato coti imboguapri imoi. Ahe niha Mborerecur guasu, Poropisirosar avei ‘tomboasi oangaipa, toyevi cheu, toipisi angaipa resendar ñeroisa yuvireco’ oya Tüpa Israel suindar upe.

³² Ore Tüpa rembiapo repiasarer imombehu água oroico, Espíritu Santo avei oñehe ore ñehe rupi ava upe, ahe acoi Tüpa ombou vahe viroyasar upe —ehi.

³³ Osenduse mborerecur aipo ñehesa, oñemoiró iteanga yuvireco. Oyucapa pota opacatu apóstol yuvireco viña.

³⁴ Mborerecur pãhu pendar rumo oime mbia fariseo, Gamaliel serer vahe, ahe Moisés porocuita rese oporombohe vahe iyavei imboeteipri catu vahe. Ahe opüha oporocuai, “Toyuvinose raimi ocarve apóstol” ehi.

³⁵ Ipare aipo ehi ambuae mborerecuareta upe:

—Che mu, judío, peicua catu, yandepihañemoñeta tupri rane mbahe apo água renondeve co mbia upe yuvireco —ehi—.

³⁶ Peyemomahenduha Teudas recocuer rese. Esepia niha, acoi oyemboivate aisa pipe viroguata cuatrociento ava oyepi aracaco. Ipare acoi oyuca yuvireco. Ahese supindar opa oñemosai tēi yuvireco. Ahe peve secocuer opa.

³⁷ Coiye catu, omombehuse mborerecur Roma pendar ava retacuer cua água, ahese Judas, Galilea pendar, oyemomborecua. Setá avei ava oguata yuvireco supi. Ahe avei rumo oyuca yuvireco, opa tupriño avei supindar oñemosai tēi yuvireco —ehi—.

³⁸ Sese cūrítei peyapoi rene mbahe co ava upe. Yaseyaño. Esepia, evocoi mbahe rembiapo ndipocopii chira oyapose opiratasa pipe tēi yuvireco.

³⁹ Tūpa suindarse rumo ndapemombituhu catui chietera. Peicua catu, aní chira yayamotarēhi Tūpa ipipe —ehi omboetasa upe.

Aipo ihese, opacatu imboetasa viroya yuvireco.

⁴⁰ Ichui rumo güeru iri apóstol inupa uca āgua iñehe iriēhi āgua Jesucristo rese yuvireco. Inupa pare opa omose yuvireco.

⁴¹ Ipipe apóstol ovihareté iteanga yuvireco. Esepia, Tūpa ombou chupe iparaisu āgua yuvireco Jesús rer rese iyeroyasa sui tēi.

⁴² Ipore ndopoi eté ari yacatu Poropísirosar Jesús recocuer mombehusa sui yuvireco. Omombehuño ité tūparo pipe iyavei opacatu ava rēta rupi yuvireco.

6

Siete iporavosa iparaisu vahe pītivī āgua yuvireco

¹ Ahe araviter pipe aipo oyemboetase Jesús reroyasar yuvireco, griego pipe oñehe vahe oñehe rai oyeupe hebreo pipe oñehe vahe rese yuvireco: “Nihañeco tuprii ore mu imer mano vahecuer rese ari yacatu mbahe poropītiviisa imondosase chupe” ehi oñehe yuvireco.

² Evocoyase doce apóstol omonuhapa uca opacatu Jesús reroyasar. Aheve aipo ehi yuvireco chupe:

—Ndiyai rumo ore oropoi tēi Tūpa Ñehengagüer mombehusa sui mbahe poropītiviisa mondo āgua rese tēi —ehi yuvireco—.

³ Sese ore rivireta, peiporavo siete mbia seco aviye vahe pe pāhu sui, yaracua vahe iyavei Espiritu Santo viroya vahe ité opiha pipe. Ahe mbia tihañeco co mboraviquisa rese yuvireco.

⁴ Ore evocoyase, oroyerureñora iyavei oroporomboheño itera Tūpa Ñehengagüer rese —ehi yuvireco.

⁵ Opacatu oipotañō yuvireco ñehesa oyeupendar. Ichui osenoi Esteban yuvireco, ahe oyeroya ité Tūpa rese iyavei viroya ité Espiritu Santo opiha pipe. Ichui oiporavo Felipe, Prócoro, Nicanor, Timón, Parmenas iyavei Nicolás evocoi mbia Antioquia pendar, ahe viroya vahecuer judío aracuasa.

⁶ Ichui virasopa apóstol upe yuvireco. Ahe omondo opo iharive oyerōqui yuvireco sese.

⁷ Ahese Tūpa Ñehengagüer oyemosai catu tecua pipe. Ichui oyemboeta catu iri avei Jesús reroyasar yuvireco Jerusalén ve. Setá avei judío pahí viroya iñehengagüer yuvireco.

Esteban pisisa

⁸ Co mbia, Esteban, vireco ité Tūpa pīratasa iyavei Tūpa porovasasa oyese. Oyapo avei mbahe poromondiisa, yavai vahe opacatu ava pāhuve.

⁹ Evocoyase Jerusalén ve oime judío tūparo Mbiguigüer serer vahe. Ahe pendar tecua Cirene iguar, Alejandría iguar, Cilicia iguar iyavei Asia ivirindar yuvirecoi vahe reseve oñehēpoepepi-epi Esteban yuvireco.

¹⁰ Ndoicatu rumo iñehe recopi āgua yuvireco. Esepia, ahe oñehe mbahecua Espiritu Santo omondo vahe pipe.

¹¹ Evocoyase yamotarēhimbar omboepi ambuae ava upe semira tēi āgua sese yuvireco. “Ore orosendu co mbia oñehese mbahe naporai vahe rese Moisés amotarēhisave, Tūpa amotarēhisave avei” aipo peyera peñehe” ehi yuvireco chupe.

¹² Evocoyase ahe ava oyamotarēhi uca opacatu ava mborerecuar reseve iyavei judío porocuaite rese oporombohe vahe upe avei yuvireco. Ichui oipisi yesapiha Esteban seraso mborerecuar uve porandusa ivate catu vahesave yuvireco.

¹³ Iyavei oseca mbia semira tēi vahe oñehe vahe rā sese yuvireco. Ahe aipo ehi:

—Co mbia oñehe-ñehe tēi yande tūparo guasu imaranehi vahe amotarēhisave, Moisés porocuaite amotarēhisave avei.

¹⁴ Ore orosendu iñehe: “Jesús Nazaret pendar omocañira tūparo guasu iyavei Moisés yande mbohesa avei aipo osecañarora” ehi —ehi yuvireco chupe.

¹⁵ Ahese opacatu mborerecuar oñemonuha vahe yuvinoi aheve omaha Esteban rese yuvireco. Omahese aipo yuvireco sese, ndoyavi sepiaca Tūpa rembiguai iva pendar rova.

7

Esteban oñehe oyeepisa pipe

¹ Evocoyase pahí rerecuar ivate catu vahe oporandu chupe: “¿Supi eté vo aipo nde ñehe mara eico?” ehi chupe.

² Ahese omboyevi chupe: “Che mu eta, peyapisaca che ñehe rese: Tūpa imboeteipri oyemboyecua yande ramoi Abraham upe aracahe. Mesopotamia ve secoi vitese, icho renondeve Harán ve seco āgua,

³ aipo ehi chupe: 'Eso nde recua sui; eseyapa nde mu; eso evocoi tecuave che amboyecua ndeu' ehi Tūpa chupe.

⁴ Evocoiyase osē Caldea ivi sui oso tecua Harán ve güeco āgua. Omano pare tu Harán ve, Tūpa ombou cohawe yande recosave.

⁵ Yepe oyeypota tēi cohawe aracahe, Tūpa rumo nomondoimi eté que chīhi ivi chupendar chupe. 'Co ivi amondora ndeu nde mano pare nde suindar upe nara' ehi Tūpa chupe (ahe rumo ndatahi vīte ahese).

⁶ Tūpa aipo ehi avei chupe: 'Nde suindar yuvirecoira ambuae ava recua rupi, ahe pendar ava secua vahe rembiguirā semimombaraisugā tēi avei yuvirecoira cuatrociento araviter rupi' ehi.

⁷ Tūpa rumo aipo ehi avei Abraham upe: 'Che rumo, aicua evocoi ava nde suindar mombaraisusar upe yuvireco. Ipare yuvinosera ipovri sui che mboetei iri āgua cohawe yuvireco' ehi Tūpa chupe aracahe.

⁸ Tūpa oyocuai güemimbotar pipe Abraham guahir mbocircuncida āgua rese. Sese Abraham ombocircuncida guahir Isaac iha pare ocho ari pipe. Isaac ēgüe ehi avei guahir Jacob upe. Jacob ēgüe ehi avei guahireta upe, ahe doce vahe Israel suindar" ehi.

⁹ "Ipare yuvirecoi vahe yande ramoi Jacob rahir omondo vivri guarepochi repirā yamotarēhisa pipe yuvireco. Ahe tivri rer José omondo vahe Egipto pendar upe yuvireco. Tūpa rumo secoiño ité sese.

¹⁰ Ichui vinose opacatu iparaisusa sui. Omondo ombahecuasa chupe iyavei seco aviye tupri āgua Egipto pendar mborerrecuar guasu faraón upe. Evocoiyase faraón ipotasa pipe omoingue mborerrecuar seco āgua opacatu ava ivi Egipto pendar cuai āgua iyavei güēta pipendar cuai āgua avei.

¹¹ "Ipare ou tiavor opacatu Egipto ivi rupi, Canaán ivi rupi avei. Iparaisu yuvireco. Ahese yande ramoi ndoyosui mbahe güemihura yuvireco.

¹² Oyanduse rumo Jacob Egipto ve oime vītese trigo, ahese omondo guahir aheve seca, ahe yande ramoi yuvirecoi vahe. Ahe yipindar ichosa Egipto ve yuvireco.

¹³ Ichui yuviraso yupagüe irise Egipto ve, ahese José oyecua uca viquehir upe. Ēgüe ehi faraón upe oicua uca uma sui oyesu.

¹⁴ Evocoiyase José güeru uca oyesupa Jacob iyavei opacatu omu, ahe imu retacuer setenta y cinco tupri.

¹⁵ Ēgüe ehi Jacob yuviraso Egipto ve yuvirecoi āgua opacatu guahir reseve. Aheve omano iyavei opacatu yande ramoi eta omano yuvireco aracahe.

¹⁶ Imano pare rumo, suminogüer viraso icangüer yuvireco tecua Siquem ve. Aheve oñoti yuvireco. Aheve acoi Abraham vīrocua tuvīpa Hamor rahir sui aracahe" ehi mborerrecuar upe.

¹⁷ "Ipare, virovisé ari ipapapri Tūpa Ñhengagüer Abraham upendar, ahese yande ramoi setá catu-catu iri oyesu Egipto ve yuvireco aracahe.

¹⁸ Ipare oporocuai ambuae mborerrecuar guasu Egipto ve. Ahe ndoicuai vahe ité yande ramoi José.

¹⁹ Evocoi mborerrecuar guasu ombopa yande ramoi eta aracahe. Omombaraisu avei oyucapa uca israelita rahir cuimbahe pītani. Ahe oyocuai iyesupa aipo ehi: 'Peseya pe rahir oha ramomi vahe, tomanoño' ehi yande ramoi upe aracahe.

²⁰ Aheseve avei aipo Moisés oha. Ahe pītani aviye ité Tūpa uve. Ihare, iyesupa mbosapi yasimi rupive vireco oyese güētave yuvireco.

²¹ Oseyase rumo iyesupa ive yuvireco, ahese faraón rayri oseca ahe i rupi sui. Ichui vinose seraso güētave, omboacua omembri nungar ité sereco.

²² Ichui Egipto pendar yaracua vahe opacatu ombahecuasa rese ombohe tupri Moisés sereco yuvireco. Evocoiyase Moisés ipirata ité oñehese iyavei oyapose mbahe.

²³ "Virecose rumo Moisés cuarenta araviter, ipihañemoñeta: 'Tasepia rane che mu israelita cohawe yuvirecoi vahe' ehi.

²⁴ Ipare aheve osepia Egipto pendar oinupa-nupa imu sereco yuvireco. Ahese oyuca Egipto pendar omu repicave.

²⁵ Ahe rumo, 'Oicua revo che mu Tūpa vinose uca āgua Egipto sui yuvireco cheu' ehi viña. Imu rumo nomohai eté Moisés vinose āgua yuvireco evocoi ava po sui.

²⁶ Ahere ayihive oso omu pāhve. Aheve osepia ñuvirío mbia ovavase oyeupe yuvireco. Ahe rumo oipota tēi iñero āgua oyeupe yuvireco viña, aipo ehi chupe: 'Che mu, oñemu mo peico, ¿mahera vo pevava peyese ae?' ehi tēi chupe.

²⁷ Oyemoviracua catu vahe rumo omombo oyesu. Ichui ahe aipo ehi chupe: '¿Ava vo nde moingue ore pāhve ore rerecuarā ore recocuer moingatu āgua?' ehi chupe.

²⁸ '¡che yuca pota avei tie eve inungar ereyuca evocoi Egipto pendar irapipe!' ehi chupe.

²⁹ Osenduse rumo co iñehe, oñemi voi eté oso Egipto sui ambuae ivi Madián ve. Aheve opita pucu. Ahe ivi rumo ndahei secua ité. Aheve oyesu ñuvirío tahir.

³⁰ “Omboaviyese cuarenta araviter Madián ve, Tüpa rembiguai oyemboyecua ivitri Sinaí rerovicave ivi iporupirêhisave caha rese tata rendigüer pâhuve chupe.

³¹ Osepiase mbahe sendi vahe oyepihamondií, oyemboya catu sese sepia tupri ãgua viña. Aheve osendu Yar ñehe aipo ehi vahe:

³² “Che nde ramoi Tüpa aico. Nde ramoi Abraham, Isaac iyavei Jacob che reroya vahecuer yuvireco’ ehi. Evocoyase Moisés oriríi osiquiyesa pipe nomahe pota iri sese.

³³ Evocoyase Yar aipo ehi chupe: ‘Esequíi nde pitaquí. Esepia, ivi nimarai vahesave ereico’ ehi chupe.

³⁴ “Che asepiya tupri ité Egipto ve nde mu che rembiporavo paradisuse; asendu avei ipoãse téisa yuvireco yepi. Sese agüeyi ndeu nde oromondora aheve senosepa ãgua’ ehi Tüpa Moisés upe aracahe.

³⁵ “Yepe yande ramoi ndoviroya potaiño ité yuvireco, ‘¿Ava vo nde moingue ore rerecurarã ore recocuer moingatú ãgua?’ ehiño yuvireco chupe, Tüpa ité rumo oyocuai güembiguai imbogüeyi tata rendigüer pâhuve imoñehe Moisés upe iporocuai ãgua, ava renosepa ãgua avei ivi Egipto pendar mborerrecuar povri sui.

³⁶ Ipape ahe ité vinose yande ramoi eta Egipto sui, oyapo avei mbahe poromondiisa aheve ‘toicua Tüpa yuvireco’ oya, para guasu Pira vaheve avei oyapo poromondiisa iyavei ivi iporupirêhisa rupi avei cuarenta araviter rupi.

³⁷ Ahe avei aipo ehi israelita upe: ‘Tüpa vinosera pe pâhu sui ñepeí oñehe mombehusar che nungar’ ehi.

³⁸ Ahe avei acoi ivi iporupirêhisa rupi ava pâhu rupi secoi. Chupe avei oñehe Tüpa rembiguai ivitri Sinaí ve yande ramoi rese; ahe avei oipisi ñehesa tecovesa resendar yandeu imbou ãgua.

³⁹ “Yande ramoi eta rumo nombroyera potai eté Moisés yuvireco. Ipihañemoñetaño ité Egipto ve oyeví ãgua rese yuvireco.

⁴⁰ Evocoyase aipo ehi Aarón upe yuvireco: ‘Eyapomi catu ava tüpa rahanga oreu ore reroguata ãgua’ ehi yuvireco chupe. ‘¿Que vo catu Moisés, ore renosesarer Egipto sui, secoi? Omano tie revo’ ehi tēi israelita yuvireco aracahe.

⁴¹ Ipape oyapo uca mbahe rahanga guaca repiaca nungar oyeupe yuvireco. Oyuca mbahe mimba ahe mbahe rahanga upe viropovêhe vaheerã yuvireco iyavei oyemboviha pieta apo yuvireco güembiapo ucagüer rese tēi.

⁴² Sese Tüpa opoiño ahe ava sui, ‘Toyerure evocoyase yasi, yasitata upe yuvireco’ ehiño chupe. Aipo ehi niha oñehe mombehusar icuachiapri pipe:

‘Pe peico vahe israelita, ndahei cheu peyuca mbahe mimba seropovêhe ãgua cuarenta araviter pipe ivi iporupirêhisa rupi.

⁴³ Pe rumo che mboeteiêhisa pipe peraso tüpa rahanga Moloc rêta iyavei yasitata rahanga Refán pe ae tēi peyapo vahe pe tûpagaü.

Sese che opovinosera pe recua sui pe mondo Babilonia cupe coi coti’ ehi Tüpa chupe aracahe.

⁴⁴ “Ivi iporupirêhisa rupi yande ramoi eta vireco Tüpa porocuita rêta oyeupive yuvireco aracahe mbahe mimba pিরer apopri. ‘Na peyera yapo’ ehi Moisés upe. Evocoyase iñehe rupi tupri oyapo uca.

⁴⁵ Aheve coiye catu yande ramoi eta vireco co oi Tüpa rêta mbahe pিরer apopri yuvireco iyavei Josué rupi yugüeru vahe güeruño ité avei yuvireco, omosepase Tüpa ambuae ava co yande recuavi sui. Ëgüe ehiño vite ité ahe sereco yuvireco mborerrecuar guasu, David, secoise aracahe.

⁴⁶ Ahe David aviye ité Tüpa upe, oyapo pota setarã ‘toime tûparogaü yande ramoi Jacob rembieroya upe’ oya.

⁴⁷ Tahir Salomón rumo omopuha ité ahe tûparo.

⁴⁸ Tüpa rumo, seco ivate vahe, ndasecoi vahe tûparo ava tēi rembiapo pipe. Inungar acoi omombehu vahe Tüpa ñehe mombehusar aracahe aipo ehi:

⁴⁹ Iva che renda iyavei ivi che pirunga.

¿Mbahe nungar oi vo peyapora cheu? ehi yande Yar.

¿Que vo evocoyase che pituhu ãgua?

⁵⁰ Che niha opacatu co mbahe aposar aico’ ehi Tüpa icuachiapri pipe” ehi mborerrecuar upe Esteban.

⁵¹ Ichui aipo ehi chupe: “Pe rumo ndapeyapisaca potai vahe ité peico. Oime tēi pe nambi, pe piha avei, ipipe rumo ndapeicuai eté Tüpa. Peico Espiritu Santo amotarêhimbar tēi inungar pe ramoi aracahe yuvirecoi.

⁵² ¡Uma profeta revo ndovireco meguai pe ramoi yuvireco! Ahe avei oyucapa yipindar omombehu vahe ndaseco marai vahe yusa resendar yuvireco. Cũritei ou ndaseco marai vahe cute. Pe avei evocoyase ahe yuca uca ãgua peporocuai.

⁵³ Pe pereco tẽi Tũpa procuaita acoi Tũpa rembiguai güeru vahe yuvireco; ahe rumo ndaperoyaiño ité peico” ehi Esteban opacatu mborerecuar upe.

Esteban mano agüer

⁵⁴ Osendupase mborerecuar iñehe, omboasí iteanga yuvireco; oñeaimboterepri ité yamotarẽhisave yuvireco.

⁵⁵ Esteban rumo vireco ité Espĩritu Santo oyese. Evocoyase iva rese omahese, osepia Tũpa porañetesa. Osepia avei Jesús opũha ohã Tũpa acato coti.

⁵⁶ Evocoyase aipo ehi:

—¡Pesepia! Asepia inungar iva imboipri. Aheve asepia Ava Riquehir Vu acato coti ihãi — ehi.

⁵⁷ Mborerecuareta rumo osapucui pĩrata, oyopiño oapisacuar yuvireco ichui. Aheve yuvinoña guasu yuvireco chupe.

⁵⁸ Viraso güecua ivii yuvireco. Aheve oseya oyeaosa Saulo pive ‘tosãro’ oya yuvireco chupe. Ipare oyapi-yapi ita pipe yuca yuvireco.

⁵⁹ Oapi-apiseve, Esteban oyerure Tũpa upe: “Che Yar Jesús, eipisi che hã” ehi.

⁶⁰ Ipare oñenopiha, oñehe pĩrata Tũpa upe: “¡Che Yar, ndeñero co ava che amotarẽhisar angaipa upe!” ehi.

Aipo ohe pare, omano.

8

¹ Iyavei Saulo, “Peyuca ité” ehi catu-catu aheve ohã.

Saulo oseca Jesús reroyasar mocañipa ãgua oico

Ahe ari pipeve ombopi Jesús amotarẽhimbar seroyasar reca mara-mara tẽi catu sereco ãgua yuvireco Jerusalén ve. Evocoyase opacatu seroyasar oñemosai yuviraso Judea ivi rupi, Samaria rupi avei. Apóstol güeraño opita Jerusalén ve yuvireco.

² Oime ava Tũpa mboeteisar yuvirecoi vahe, ahe víraso Esteban rehögüer ñoti yuvireco. Iti pare, oyasehó iteanga yuvireco sese.

³ Ahe pipeve avei aipo Saulo omombaraisu ava Jesús reroyasar yuvirecoi vahe seroya ucaẽhi ãgua viña. Yuviroique-iqueño tẽi aipo sêta rupi cuimbahe, cuña mbotiriri senose soquenda ãgua yuvireco.

Samaria pendar osendu ñehesa Jesucristo recocuer resendar yuvireco

⁴ Ava oñemosai vahecuer rumo Jerusalén sui omombehuño ité ñehesa pĩsirosa resendar que yuvirasosa rupi yuvireco.

⁵ Felipe oso Samaria rupi. Aheve omombehu ava upe: “Evocoi Jesús Tũpa Rembiporavo ava pĩsiro ãgua” ehi.

⁶ Aheve ava rehii oñemonuha Felipe ñehe rendu ãgua yuvireco. Oyapisaca tupri iñehe rese yuvireco. Esepia, osepia mbahe sembiapo poromondiisa.

⁷ Iyavei setã ava carugar rerecosar sui omose carugar. Osẽse ava sui, sãse yuvireco. Iyavei setã ava nomii vahe, ndoguatai vahe avei ombogüera.

⁸ Evocoyase oviharete ahe tecua pipendar yuvireco.

⁹ Aheve rumo mbia, Simón serer vahe, yipive ipaye ai oico, ombosiquiye-quiye ava Samaria pendar. “Che seco ivate vahe aico” ehi angahu ava mbopa.

¹⁰ Evocoyase opacatu ava, cuacua vahe iyavei chĩhivahe catu vahe oyapisaca tupri iñehe rese, aipo ehi yuvireco: “Co niha Tũpa pĩratasa tuvicha vahe” ehi oyeupe yuvireco.

¹¹ Omboyeroya pucu ité yuvireco. Esepia, opayesa pipe ava ombosiquiye etepri oico yepi.

¹² Oyepotase rumo Felipe Samaria ve omombehu ñehesa aviye vahe Tũpa mborerecuasa resendar, Jesucristo recocuer resendar avei. Aheve ava rehii viroya yuvireco. Ipare oñeapiramo ité yuvireco cuimbahe, cuña avei.

¹³ Ahe Simón avei viroya. Oñeapiramo pare, oso Felipe rupi. Co mbahe poromondiisa iyavei Tũpa suindar ndayasepiai vahe rese oyepihamondi.

¹⁴ Jerusalén ve apóstol yuvirecoi vahe oyandu Samaria ve setã ava oipisise Tũpa Ñehengagüer yuvireco. Evocoyase omondo aheve omboetasa Pedro iyavei Juan yuvireco.

¹⁵ Oyepotase aheve yuvireco, oyerure opacatu ava Jesús reroyasar rese ‘Espĩritu Santo toipisi yuvireco’ oya.

¹⁶ Esepia, Espĩritu Santo ndogüeyi vitei yuvireco sese; oñeapiramofño tẽi vite yande Yar Jesús rer pipe yuvireco.

17 Pedro iyavei Juan oyerurese, omondo opo iharive yuvireco. Ahese Espíritu Santo ogüeyi yuvireco sese.

18 Ahe osepiase, Simón omondo pota guarepochi chupe,

19 aipo ehi:

—Cheu avei pemboumi tēi evocoi pīratasa, amondose che po que ava harive, togüeyi avei Espíritu Santo sese yuvireco —ehi Simón.

20 Omboyevi rumo Simón upe:

—¡Tocañipa nde guarepochi nde reseve! Esepia, ndepihañemoñeta co Tūpa ombou vahe oreu, ererocua vaheṛā nde guarepochi pipe viña —ehi chupe—.

21 Ndeu ndiyai co nungar mbahe apo āgua. Esepia, nde pihañemoñetasa ndahei ihīvi vahe Tūpa rovaque.

22 Sese epoi nde pihañemoñeta raisa sui, eyerure Tūpa upe. Aviyeteramo iñerora ndeu —ehi—.

23 Aicua nde piha naporai vite iyavei nde pihañemoñeta raisa pipe vite ereico —ehi chupe.

24 Evocoyase Simón omboyevi chupe:

—Peyeruremi catu yande Yar upe che rese; tipo eme acoi mbahe pe remimombehu cheu —ehi chupe.

25 Yande Yar ñehesa mombehu pare ahe tecua pendar upe, apóstol omombehu-mbehu co ñehesa pīsirosa resendar Samaria pipendar tecua rupi yuvireco. Ēgüe ehi oyepota yuviroyevi Jerusalén ve yugüeru.

Felipe omombehu Jesucristo recocuer Etiopía pendar upe

26 Ipare Tūpa rembiguai oyemboyecua Felipe upe aipo ehi chupe: “Epūha, eso irohi coti nde yepota āgua evocoi perī ogüeyi vahe oso Jerusalén sui, Gaza ve” ehi. Evocoi Gaza piar osasa ivi iporupirēhi rupi oso.

27 Evocoyase opūha oso perī rupi. Aheve osovaīchi ñepeī ava, ahe seco ivate vahe guarepochi apocatusar Etiopía pendar cuña mborerrecuar upe nara yepi, ahe mbia oso vahe Jerusalén ve Tūpa mboetei āgua.

28 Oyevise ocāreto pipe, oyeruqui Tūpa ñehe mombehusar Isaías rembicuachiagüer rese ou.

29 Evocoyase Espíritu aipo ehi Felipe upe: “Eyemboya cāretomi rese” ehi.

30 Evocoyase virovise ahe ava, osendu iyeroqui Isaías rembicuachiagüer pipe oī. Ahese oporandu chupe:

—¿Eresenducua aipo Tūpa Ñehengagüer nde yeroquisa eī? —ehi chupe.

31 Etiopía pendar mbia omboyevi chupe:

—¿Mara ahera vo che senducua viña ndipoise imombehu tuprisar cheu? —ehi chupe.

Ipare, “Erio, eyeupi, tereguapi cohava che piri” ehi Etiopía pendar chupe.

32 Ahe Isaías rembicuachia oyeruqui vahe pipe aipo ehi:

“Inungar ava viraso ovesa yuca āgua, ēgüe ehi avei ahe mbia seraso yuca āgua yuvireco. Iyavei inungar ovesa nasasei eté guagüer reroquase, ēgüe ehi avei ahe mbia noñehei eté.

33 Osecomomini yuvireco, ndipoi ava sepiar.

Ndipoi ichuindar.

Esepia, omocañi co ivi sui yuvireco” ehi Isaías rembicuachia pipe.

34 Oyeruqui pare ahe Etiopía pendar oporandu chupe:

—Emombehumi cheu: ¿Ava rese piha aipo Isaías oñehe: oyese ae piha, ambuae ava rese tie? —ehi.

35 Evocoyase co ñehesa sui omombehu ñehesa aviye vahe Jesús recocuer resendar Etiopía pendar upe.

36 Ipare uguata cature yuvireco, Etiopía pendar osepia i. Aheve ahe aipo ehi chupe:

—Esepia co i tui. ¿Ndiyai vo cohava che āpiramomi tēi eve viña? —ehi.

37 Ahese omboyevi chupe:

—Eeroya itese opacatu nde piha pipe, iya ité ndeu —ehi.

—Aroya ité niha Jesucristo ahe Tūpa Rahir secoi —ehi.

38 Evocoyase omombita uca ocāreto, ichui ogüeyi ive yuviraso. Aheve Etiopía pendar Felipe oñapiramo.

39 Yuvinosese i sui, yande Yar Espíritu viraso ahe Etiopía pendar sui. Ahese ndosepia iri; ēgüe ehiño vorivete oso perī rupi.

40 Felipe rumo oyemboyecua Azoto ve. Ichui oso co tecua Cesarea piar rupi, omombehu Jesús recocuer opacatu tecua rupi. Ēgüe ehi oyepota Cesarea ve oso.

¹ Jerusalén ve rumo Saulo oñemoiró iteanga vite yande Yar reroyasar upe oico. Oyucapa potaño ité. Sese oso pahi rerecurar ivate catu vahe upe,

² oporandu chupe: “Ereyapomira mbahe icatupri vahe cheu” ehi. “Taso Damasco ve, taseca co Tecocuer Piasu rupi cuimbahe, cuña yuvirecoi vahe” ehi. “Taipisipa seru cohava nde rer pipe” ehi, “evocoyase eremombehura cuachiar pipe Damasco pendar tũparo rerecurar upe” ehi pahi rerecurar ivate catu vahe upe.

³ Ēgüe ehi yuvinose Jerusalén sui, yuviraso Damasco ve ambuae ava reseve. Virovi potase rumo Damasco yuviraso, aviyeteramo tēi osesape guasu iva sui chupe.

⁴ Evocoyase oviapi oso ivive. Osendu iva pendar ñehesa aipo ehi vahe: “Saulo, Saulo, ¿mahera vo che moña-moña eve?” ehi chupe.

⁵ Evocoyase oporandu chupe: “¿Ava vo nde ereico, nde mbia?” ehi. “Che Jesús, che niha co che moña che rereco eve” ehi chupe.

⁶ “Epũha, eique Damasco ve. Aheve amombehu ucara mbahe nde rembiapoguã ndeu” ehi chupe.

⁷ Ava rumo, yuviraso vahe supi, osiquiyé iteanga osenduse ñehesa iva suindar yuvireco. Esepia, ndosepiaí eté ivate oñehe vahe yuvireco.

⁸ Ipare Saulo opũha, omahe tēi; ndoicatui rumo mbahe repia. Ichui supindar oipisi iyiva rese seraso Damasco ve yuvireco.

⁹ Aheve mbosapi ari ndasesapiso, ndocarui, ndoihui avei oico.

¹⁰ Aheve mbia Jesucristo reroyasar Ananías serer vahe secoi. Ahe iquer nungarve oyemboyecua yande Yar aipo ehi chupe: “¡Ananías!” ehi. “Co aico, che Yar” ehi imboyeví chupe.

¹¹ Evocoyase yande Yar aipo ehi chupe: “Epũha, eso calle Ihivi serer vahe rupi. Eporandu Judas rētave Saulo, tecua Tarso pendar, rese. Ahe oyerogui cūrítei.

¹² Oquerve angahu osepia mbia Ananías serer vahe omondose opo iharive omboesapiso iri” ehi.

¹³ Evocoyase omboyeví chupe: “¡Too! Che Yar, setá rumo evocoi mbia recocuer omombehu yuvireco cheu. Mbahe tēi oyapo vahe nde reroyasar reco maranehi upe Jerusalén ve.

¹⁴ Cūrítei ou rutei ahe mbia pahi rerecurar porocuita rupi opacatu nde rer rese oyeroya vahe roquendapa āgua” ehi.

¹⁵ Yande Yar rumo aipo ehi chupe: “Eso. Esepia, aiporavo evocoi mbia che recocuer rese oñehe vaheṛā ava ndahe vahe judío upe iyavei serecurar guasu yuvirecoi vahe upe, judío upe avei.

¹⁶ Che ae amboyecua setá mbahe tēi chupe oiporara vaheṛā che remimbotar mboaviye āgua” ehi yande Yar chupe.

¹⁷ Evocoyase oso secosave. Oiquese ahe oi pipe, oso, omondo opo Saulo rese aipo ehi chupe:

—Che rivri, Saulo, yande Yar Jesús oyemboyecua vahe ndeu peri rupi nde yuse, ahe che mbou ndeu nde mboesapiso iri āgua. Toique avei catu Espiritu Santo nde rese —ehi Saulo upe.

¹⁸ Ahese voi eté pira pírer nungar mbahe oviapipa sesa sui. Ahese voi sesapiso iri. Ichui opũha. Ipare voi Ananías oñapiramo.

¹⁹ Ipare Saulo ocaruse, ipĩrata catu iri. Moviro ari tēi opĩta iri Jesús reroyasar pĩri Damasco ve.

Saulo omombehu Jesús recocuer Damasco ve

²⁰ Ipare voi oso oñehe judío tũparo yacatu rupi Damasco ve aipo ehi: “Jesús Tũpa Rahir ité secoi” ehi ahe pendar ava upe.

²¹ Ava opacatu osendu vahe iñehe,

—¿Mara ehi pĩha cō? —ehi tēi yuvireco—. ¿Ndahe vo acoi co mbia Jerusalén ve Jesús reroyasar mara-mara tēi vireco vahe? ¿Ndahe vo acoi co avei ou cohava ava Jesús reroyasar ha pendar pĩsi āgua serasopa āgua avei Jerusalén ve pahi rerecurar upe viña? —ehi yuvireco chupe.

²² Saulo rumo omombehu tupri catu Jesús recocuer. Osecopi opacatu omu Damasco pendar. Omboyecua catu chupe Jesús Tũpa Rembiporavo ava pĩsiro āgua secosa. Sese ndoicatui judío iñehe mboyeví yuvireco.

Saulo oñemi omu sui oamotarēhise

²³ Setá ari pare judío ahe pendar omboguai yuca āgua Saulo yuvireco viña.

²⁴ Ahe rumo oyandu omboguaisa judío osārose tecua āchisa roquendipive ari, pĩtu momba yuvireco yuca āgua viña.

²⁵ Jesús reroyasar rumo p̄itu pipe tecua tapia ãchisa oyere tupri vahe tecua rese, icupe rupi ombogüeyi iruova guasu pipe imoñemi imondo yuvireco.

Saulo Jerusalén ve secoi

²⁶ Coiye Saulo oyepota Jerusalén ve. Aheve oyemboya pota t̄ei Jesucristo reroyasar rese. Osiquiye rumo yuvireco ichui. “Aviyeteramo co Saulo, ‘Aroya Jesucristo cute’ ehi tupri t̄eira yandeu” ehiño oyeupe yuvireco.

²⁷ Ipare rumo Bernabé viraso Saulo apóstol yuvirecoi vahe upe. Aheve Bernabé omombe-hupa chupe aipo ehi: “Co mbia Saulo osepia yande Yar peri rupi iyavei yande Yar oñehe chupe. Ichui co oñehe osiquiyeẽhisa pipe Damasco ve Jesús recocuer rese” ehi.

²⁸ Evocoyase Saulo opita aheve ipiri. Ari yacatu rupi apóstol rupi uguata yepi, iyavei omombehu yande Yar recocuer osiquiyeẽhisave.

²⁹ Oñehepoepi avei recocuer rese judío griego pipe oñehe vahe yuvireco. Ichui rumo oyuca potaño yuvireco.

³⁰ Oicuase rumo Jesucristo reroyasar yuvireco, viraso voi eté Saulo Cesarea ve. Ichui omondo Tarso ve yuvireco.

³¹ Evocoyase opacatu Jesús reroyasar yuvirecoi vahe Judea rupindar, Galilea rupindar iyavei Samaria rupindar, chupe oime mbahe tupri. Iyavei oyemoviracua tupri catu yuvireco yande Yar mboeteisa pipe, Espiritu Santo oip̄itiviñ iyemboeta catu ãgua yuvireco.

Eneas mbogüera agüer

³² Pedro uguata opacatu rupi oso Jesucristo reroyasar repia. Ahe oso, osepia avei tecua Lida pendar Jesús reroyasar.

³³ Aheve osepia mbia Eneas serer vahe, ahe ndoguatai vahe. Vupave t̄ei tui vahe ocho araviter rupi.

³⁴ Pedro aipo ehi chupe:

—Eneas, Jesucristo nde mbogüera —ehi—. Eñarapuha, emoingatu nde rupa —ehi chupe.

Eneas evocoyase oñarapuha voi.

³⁵ Osepiase opacatu Lida pendar, Sarón pendar co ndoguatai vahecuer guatase, viroyapa voi eté yande Yar yuvireco.

Dorcas cuerayevi agüer

³⁶ Ahe araviter pipe Jope ve cuña Tabita serer vahe secoi, griego ñehe pipe rumo Dorcas serer. Ahe Jesucristo reroyasar secoi. Ahe secocuer aviye vahe oporop̄itiviñ yepi.

³⁷ Imbaheasi guasu rumo. Coiye omano. Ipare ava sehögüer oyosei yuvireco. Ichui viroyeupi oi ivate vahesave seraso yuvireco.

³⁸ Jope namombriimi Lida sui. Evocoyase oyanduse Jesús reroyasar Jope pendar Pedro Lida ve secoise, ahese omondo ñuvirio mbia seru poyava ãgua Jope ve yuvireco.

³⁹ Evocoyase Pedro oso supi yuvireco oyepota yuviraso Jope ve. Aheve viroyeupi oi ivateve seraso tehögüersave yuvireco. Opacatu cuña imer mano vahecuer oyere ati voi, oyaseho Pedro iviñ yuvireco. Omboyecua avei oturucuar ihari pendar reseve Dorcas rembiapogüer yuvireco chupe.

⁴⁰ Ipare Pedro omosepa rane opacatu ava ocarve. Ahese ahe ae oñenopiha, oyerure Tüpa upe. Ichui omahe ahe cuña omano vahe rese aipo ehi chupe:

—¡Tabita, eñarapuha! —ehi sehögüer upe.

Aipo oyeupe hese, Tabita omboi güesa. Pedro repiase, oñarapuha oñ.

⁴¹ Ahese oip̄isi Tabita po rese imoñarapuha. Ipare, “Perio” ehi opacatu Jesús reroyasar, cuña imer mano vahecuer upe avei, “Pesepia ocuerayevi” ehi chupe.

⁴² Serãcua oyanduse opacatu Jope rupi yuvireco, setá ava yande Yar viroya yuvireco.

⁴³ Evocoyase Pedro opita setá ari aheve, mbia mbahe p̄irer mopitasar, Simón serer vahe, piri.

10

Pedro iyavei Cornelio

¹ Tecua Cesarea ve mbia Cornelio serer vahe secoi, ahe cuartel Italiano serer vahe pendar cien sundao rerecuar.

² Ahe mbia omboetei Tüpa opacatu guahir, güembireco reseve yepi. Iyavei omondoño ité judío p̄itiviñ ãgua guarepochi, oyerocuñi avei Tüpa upe yepi.

³ Ñepeñi ari, caharuse las tres rupi, osepia oquer nungar pipe Tüpa rembiguai güecosave aipo ehi chupe: “¡Cornelio!” ehi.

⁴ Omahengatuse sese, “¿Mbahe, che Yar?” ehi osiquiyepave. Tüpa rembiguai rumo omboyevi chupe: “Tüpa oip̄isi nde yeruresa; osepia avei nde poroparisuerecosa” ehi chupe.

⁵ “Emondo mbia Jope ve Simón reca. Ahe serer avei acoi Pedro.

⁶ Ahe secói ambuae Simón, mbahe pírer mopítasar píri. Ahe sêta para guasu popíve chini” ehi chupe.

⁷ Osose Tûpa rembiguai ichui, Cornelio oñehe ñuvirío güembiguai upe iyavei ñepeí sundao Tûpa mboeteisar upe, sese acoi oyeroya vahe yepi.

⁸ Opacatu Tûpa rembiguai ñehe mombehu pare, omondo Jope ve.

⁹ Ahere ayihive virovise Jope yuviraso, Pedro oyeupi oi ipe vahe harive mbíter ari senise oyerogui água.

¹⁰ Vieporêhise ocaru pota viña. Omoingatu viteseve rumo semihura yuvireco, aviyeteramo tēi osepia mbahe oquer pendar nungar:

¹¹ Ahese osepia íva oyemboise, ahe ichui turucuar tuvicha vahe pípe ogüeyi mbahe, ñapichimbri ipopi yacatu ou chupe.

¹² Ahe turucuar pípe, osepia opacatu mahembiar vai, mboi, vírai vai tēi avei.

¹³ Ahese osendu ñehesa aipo ehi vahe: “Pedro, epüha, eyuca, ichui ehu” ehi chupe.

¹⁴ Ahere rumo omboyeví chupe: “Aní, che Yar, che rumo ndahui vahe ité co mbahe roho ava remimbotarēhi ndihusai vahe yepi” ehi chupe.

¹⁵ Osendu iri ñehesa aipo ehi vahe chupe: “Tûpa remimbotatupri upe, ‘Ava remimbotarēhi, ndihusai vahe’ nderei chira” ehi.

¹⁶ Égüe ehi mbosapi oyupagüer rupi chupe. Ipare turucuar oyevi ivave oso.

¹⁷ Pedro ipihañemoñeta vitese mbahe osepia vahecuer rese oquer nungar pípe: “¿Mbahe rese píha co oyemboyecua cheu?” ehi vite oico. Aheseve Cornelio remimondo oporandurandu pare yuvireco, oyepota Simón rēta roquendipíve yuvireco.

¹⁸ Oñehe pucu oi pipendar upe yuvinoha: “¿Ave vo Simón, ahe Pedro serer vahe, secói?” ehi yuvireco.

¹⁹ Ipihañemoñeta viteseve Pedro mbahe oyemboyecua vahecuer rese, Espíritu Santo aipo ehi chupe: “Pedro, esendu rane, pe mbosapi mbia nde reca yuvireco.

²⁰ Eyemoingatu, egüeyi chupe, eso supi. ¿Asora píha?” erei rene. Esepia, che ambou evocoi mbia nde reca” ehi Espíritu Santo Pedro upe.

²¹ Evocoiyase ogüeyi oso chupe.

—Che, che reca vahe peye. ¿Mbahe rese vo peyu cheu? —ehi chupe.

²² Ahe evocoiyase omboyeví ñehe yuvireco chupe:

—Ore oroyu sundao rereucuar Cornelio ore cuaisa pípe, ahe mbia seco ívi vahe, Tûpa mboeteisar opacatu judío osaisu, oipota rai yuvireco. Tûpa rembiguai oyocuai nde rese ereso vaheerá sêtave, ahe osendu vaheerá nde ñehesa —ehi yuvireco Pedro upe.

²³ Evocoiyase omoinguepa, omombitapa oyepiri ñepeí pítu. Ahere ayihive oso supi, moviro Jesús reroiyasar Jope pendar yuviraso avei supi Cesarea ve yuvireco.

²⁴ Ahere ayihive oyepotase Cesarea ve, yuviraso sêtave. Cornelio rumo osáro opacatu omu eta rese yuvireco iyavei omboriparete güembisoho reseve avei.

²⁵ Oyepotase sêtave oso, Cornelio rane osê voi, osovaíchi, oñenopiha sovai imboeteisa pípe.

²⁶ Pedro rumo aipo ehi chupe:

—Epüha, che niha nde nungar avei aico —ehi chupe.

²⁷ Evocoiyase ahe omoñeta seroique seraso oi pípe. Aheve ava oñemonuha vahe setá osepia yuvireco.

²⁸ Ahe ava upe aipo ehi:

—Pe peicua judío porocuaíta aipo ehi vahe: “Peiquei rene ndahei vahe judío píri. Aní chiveira pembori evocoi ava peico” ehi acoi —ehi Cornelio rēta pipendar upe—. Tûpa rumo omombehu cheu che quer nungar pípe: “ ‘Ava remimbotarēhi peico’ erei rene ambuae ava upe” ehi cheu.

²⁹ Pe pemondo ava che reca. Che evocoiyase nacheatēhi che yu água pēu. Sese che aicua pota, ¿mahera vo che reru uca peye? —ehi.

³⁰ Evocoiyase Cornelio aipo ehi chupe:

—Opa co irungatu ari, charuse co hora rupi tupri avei, che cohava che rêtave aicose, ndacarui eté che yerure água Tûpa upe. Aheseve oyemboyecua mbia Tûpa rembiguai iturucuar rendí iteanga vahe cheu.

³¹ Ahe aipo ehi cheu: “Cornelio, Tûpa osendu nde yeruresa iyavei oicua avei nde poroparaisuerecosa.

³² Emondo nde rembiguai Jope ve Simón Pedro serer vahe reca. Ahe oicove ambuae Simón rêtave, ahe mbahe pírer mopítasar. Ahe sêta para guasu popíve chini” ehi cheu.

³³ Sese amondo voi eté nde reca água. Aviye nde ereyu cohava. Cûritei co opacatu yaico cohava Tûpa rovaque. Orosendu pota opacatu nde ñehe yande Yar nde cuai vahe nde ñehe água oreu —ehi Cornelio chupe.

Pedro oñehe Cornelio rētave

³⁴ Evocoyase Pedro aipo ehi chupe:

—Aicua cute, supi eté Tūpa nomboyahoi yande raisu.

³⁵ Sese ambuae ivi pipendar omboetei vahe Tūpa, oyapo vahe avei mbahe tupri yuvireco, ahe oipisira Tūpa.

³⁶ Aracahe Tūpa oñehe avei Israel suindar upe, omombehu ñehesa tupri yeamotarēhiñehisa resendar Jesucristo rembiaporā sui, ahe opacatu ava co ivi pipendar yuvirecoi vahe Yar.

³⁷ Pe peicua tupri ité co mbahe oime vahe opacatu judío ivi rupi. Ahe omboipi Galilea ve Juan ñeapiramosa mombehu pare.

³⁸ Peicua revo Tūpa omondo Jesús Nazaret pendar upe opīratasa, oEspíritu Santo avei. Ipare Jesús oguata opacatu rupi mbahe tupri apo oico. Ombogüera avei opacatu ava iparaisu vahe carugar povrive yuvirecoi vahe. Esepia, Tūpa seci sese.

³⁹ Ore orosepia opacatu Jesús rembiapogüer Judea ivi rupi, tecua Jerusalén pipe avei. Aheve imu oyatica uca curusu rese yuca yuvireco.

⁴⁰ Tūpa rumo ombogüerayevi imombosapisa ari pipe. Ipare omboyecua iri oreu.

⁴¹ Nomboyecuai rumo opacatu ava upe, omboyecua ore sembiporavo oroico vahe upeñomi. Ore piri niha ocaru, oiha avei ocuerayevi pare.

⁴² Iyavei ahe ore cuai: “Pemombehu ava upe. Co che Jesucristo, Tūpa Rembiporavo, aico opacatu ava recocuer rese porandu āgua oicove vite vahe, omano vahe avei” ehi oreu.

⁴³ Ahe secocuer avei opacatu Tūpa ñehe mombehisar omombehu yuvireco aracahe aipo ehi: “Opacatu acoi seroyasar, ahe virecora Tūpa ñeroisa serer pipe angaipa rese yuvireco” ehi —ehi Pedro Cornelio rēta pipe yuvinoi vahe upe.

Espíritu Santo oique ava ndahei vahe judío piha pipe

⁴⁴ Pedro oñehe viteseve, Espíritu Santo ogüeyi opacatu ava osendu vahe rese.

⁴⁵ “¡Tool Evocoyase ndahei vahe judío upe avei Tūpa omondo Espíritu Santo inungar ombou yandeu” ehi Jesús reroyasar judío yuvirecoi vahe Pedro rupi yugüeru vahe yuvireco.

⁴⁶ Esepia, osendu ahe oñehese ñehesa ndicuasai vahe pipe yuvireco Tūpa upe.

⁴⁷ Evocoyase aipo ehi vupindar upe:

—¿Oime pīha ndoipotai vahe co ava ñeapiramo āgua yande pāhu pendar? Esepia, co oipisi Espíritu Santo yuvireco inungar yande —ehi vupindar upe.

⁴⁸ Sese,

—Yañapiramopa Jesucristo rer pipe yuvireco —ehi.

Ipare Cornelio rēta pipe yuvinoi vahe aipo ehi: “Epita vitemi moviro ari ore piri” ehi yuvireco chupe.

11

Pedro remimombehu Jerusalén pendar Jesús reroiyasar upe

¹ Evocoyase ambuae apóstol iyavei Jesús reroiyasar Judea ve yuvirecoi vahe oyandu yuvireco ava ndahei vahe judío viroya avei Tūpa Ñehengagüer yuvireco.

² Oyevise rumo Pedro Jerusalén ve oso, ahese setá judío Jesucristo reroiyasar viroiro sovai eté yuvireco,

³ aipo ehi:

—¡Mahera eresño tēi eté ndahei vahe judío piri! Iyavei nde erocarüño tēi eté ipāhuve yuvireco no —ehi yuvireco chupe.

⁴ Pedro rumo omombehu tupri yipisui opacatu mbahe güembiepia yuvireco chupe aipo ehi:

⁵ —Che, tecua Jope ve aicose, ayerure. Ahese che quer nungarve asepia turucuar tuvicha vahe nungar ipopi yacatu ñapichisa vahe ogüeyi ou che rovai iva sui.

⁶ Asepia ipipe opacatu mahembiar ihupirēhi, mbahe mīmiba, mboi, vīrai vai tēi avei —ehi—.

⁷ Iyavei ahese asendu ñehesa aipo ehi cheu: “Pedro, epūha, eyuca, ehu” ehi cheu.

⁸ Che rumo aipo ahe chupe: “Aní, che Yar, che rumo ndahui vahe ité co mbahe roho ava remimbotarēhi yepi” ahe cheu.

⁹ Ichui asendu iri ñehesa: “Tūpa remimbocatupri upe, ‘Ava remimbotarēhi’ erei rene” ehi cheu.

¹⁰ Ēgüe ehi mbosapi oyupagüer rupi cheu. Ipare opacatu oyeve iri ivave oso.

¹¹ Aheseve avei mbosapi mbia imbouprī Cesarea sui oyepota yuvireco che recosave che reca.

¹² Espiritu Santo che cuai che so āgua che atēhiñehisa pipe supi yuvireco. Co seis mbia Tūpa reroiyasar, yande mu, yuviraso avei che rupi. Ipare aheve oroyepotase oroso, oroique Cornelio rētave.

¹³ Ahe omombehu oreu osepia vahecuer güetave Tüpa rembiguai oyemboyecua vahe sovai iyavei aipo ehi vahe chupe: “Emondo mbia tecua Johe ve Simón Pedro reru ägua.

¹⁴ Ahe omombehura ndeu nde ñepisiro ägua iyavei opacatu nde rêta pendar ñepisiro ägua avei” ehi Tüpa rembiguai Cornelio upe —ehi—.

¹⁵ Añehe ramoseve chupe, Espíritu Santo ou sese yuvireco inungar yande rese ou aracaco.

¹⁶ Evocoyase che chemahenduha voi eté yande Yar ñehengagüer rese aipo ehi vahecuer: “Supi eté i pipe Juan oporoäpiramo, pe rumo Espíritu Santo pipe peñeapiramora” ehi vahe.

¹⁷ Tüpa Espíritu Santo omondo chupe inungar ombou yandeu yayeroyase yande Yar Jesucristo rese. Sese ndaipotai eté Tüpa ayamotarëhira —ehi Pedro omu upe.

¹⁸ Osenduse rumo co Pedro ñehe, imu noñehe iri sese yuvireco. Ahe rumo, —jToo, evocoyase Tüpa ombou avei ndahei vahe judío upe secocuer recuñaro ägua, tecovesa apirëhi vahe rereco ägua! —ehi Tüpa mboeteisa pipe yuvireco.

Ava Jesús reroyasar Antioquia ve

¹⁹ Iyavei Esteban yucare, Jesús reroyasar oñemosai Jerusalén sui yuvireco. Esepia, Jesús amotarëhimbar oyamotarëhi catu yuvireco. Evocoyase amove Jesús reroyasar yuviraso oñemi Fenicia ve, ambuae Chipre ve, ambuae Antioquia ve. Oguatasa rupi omombehuño ité judío upe güeraño Jesús recocuer yuvireco.

²⁰ Amove oñemosai vahe Chipre pendar iyavei Cirene pendar oyepota tecua Antioquia ve yuvireco. Omombehu rumo ndahei vahe judío upe avei ñehesa aviye vahe yande Yar Jesús recocuer resendar yuvireco.

²¹ Yande Yar piratasa vireco yuvireco. Evocoyase setá ava viroya; oseyá ité yipindar güembieroya yuvireco yande Yar reroya ägua.

²² Seräcua oyepotase Jesús reroyasar upe Jerusalén ve, ahese omondo Bernabé yuvireco Antioquia ve.

²³ Oyepotase aheve, osepia Tüpa sovasase. Ahese sorivete aipo ehi chupe: “Peyemoviracua catu yande Yar rese. Peyapo semimbotar opacatu pe piha pipe” ehi chupe yuvireco.

²⁴ Bernabé aviye etepri vahe, viroya ité Espíritu Santo iyavei oyeroya ité yande Yar rese. Evocoyase setá ava oyemboya yande Yar rese yuvireco.

²⁵ Ipare oso Tarso ve Saulo reca.

²⁶ Oyosuse, güeru Antioquia ve. Aheve oyemboya yuvireco ambuae viroya vahe rese imbohe ägua ñepe araviter rupi. Setá ava oyembohe ipiri yuvireco. Ahese Jesús reroyasar Antioquia pendar upe yipindar, “Cristo reroyasar” ehi yuvireco.

²⁷ Aheseve Tüpa ñehe mombehusar yugüeru Antioquia ve Jerusalén sui.

²⁸ Ñepe ipähu pendar, Agabo serer vahe, opüha aipo ehi Espíritu Santo piratasa pipe chupe: “Oura tiavor guasu opacatu ivi rupi” ehi, (ahe tiavor oyepota mborerecuar guasu Claudio recose).

²⁹ Evocoyase Jesús reroyasar Antioquia pendar omondo pota voi guarepochi Jesús reroyasar Judea pendar pitivii ägua yuvireco ocatugüer rupi.

³⁰ Egüe ehi yande Yar reroyasar rãrosar Judea pendar upe porrecosa mondo. Bernabé, Saulo ahe porrecosa viraso yuvireco.

12

Santiago mano agüer iyavei Pedro roquenda agüer

¹ Ahe araviter pipe avei mborerecuar guasu Herodes omboipi Jesús reroyasar mombaraisu.

² Ahese oyuca uca quise pucu pipe Santiago, ahe Juan riquehir.

³ Oyanduse mborerecuar guasu rembiapo, sorivete judío rerecuar yuvireco. Sese Herodes oipisi uca Pedro Pascua pieta pipe. Ahe ari rupi ohu judío pan ndayapepoi vahe yuvireco yepi.

⁴ Pedro roquenda pare omondo irungatu imar sui irungatu-ngatu sundao omondo sãro ägua yuvireco. Mborerecuar ipihañemoñeta: “Opase co Pascua pieta, amboyecua ucara ava rovaque” ehi viña.

⁵ Evocoyase Pedro opita voquendasave sãrombri tupri chini. Jesús reroyasar rumo oyerogui pirata Tüpa upe yuvireco sese.

Tüpa omose uca Pedro soquendasa sui

⁶ Ahe ari vinose potase Herodes Pedro soquendasa sui, ahe pütu pipe Pedro oque ñuvirío sundao guãrosar rese. Ñapichisa ñuvirío carena pipe ou, ñuvinohambe avei sãrosar soquendasa roquendipive.

⁷ Aviyeteramo tēi Tūpa rembiguai oyemboyecua ique viteseve chupe. Ahese sendi guasú iteanga soquendasa pipe. Ahe oñatoi Pedro iqueve imomahe: “¡Epūha poyava!” ehi chupe. Ipūhase, opa voi oyera carena ipo sui.

⁸ Ahese Tūpa rembiguai aipo ehi chupe: “Eyemonde, emonde nde pitaqui” ehi. Evocoyase Pedro omonde. Ipare aipo ehi iri: “Emonde avei nde yeasa, eyu che raquicuei” ehi chupe.

⁹ Ēgüe ehi oso saquicuei. Ahe rumo ndoicuai Tūpa rembiguai oyeupe ēgüe ehise. Ndoyaviñ iquerve tēi ēgüe ehi vahe chupe.

¹⁰ Ichui yuvínose, oñocua yipindar guãrosar yuvireco. Ipare yuviraso catumi ambuae imoñuviriosa guãrosar oñocua avei. Oyepota oquenda guasu guarepochi apoprive ocarve yuvínose āgua yuvireco. Ahe oquenda oyemboi ahe ae ité chupe yuvireco. Ipare yuvínose yuviraso pucumi ocarusu rupi. Aviyeteramo tēi Tūpa rembiguai ndoyecua iri chupe.

¹¹ Evocoyase Pedro aipo ehi oyeupe: “¡Too! Supi eté Tūpa ombou cheu güembiguai che renose āgua Herodes povri sui. Tūpa che pĩsiro judío rerecur che yuca rāgüer sui” ehi oyeupe.

¹² Macos opihañemoñeta pare, oso, oyepota Juan Marcos si María rētañe oso. Aheve setá ava oñemonuha oyerogui yuvireco sese.

¹³ Oñehese Pedro oquenda ocar cotindarve, cuñatai, Rode serer vahe, osē imboi āgua chupe.

¹⁴ Osenduse rumo Pedro ñehe, oquenda omboi rāgüer sui, oña oi que oi pipe vorivetesave, omombehu: “Pe Pedro ihāi oquendipive” ehi oi pipendar upe.

¹⁵ Ahe rumo,

—¿Nanderocoi vo eico? —ehiño yuvireco chupe. “¡Aní! Supi eté” ehiño Rode chupe.

—Ndahei ahe, Tūpa rembiguai mo aipo sãrosar —ehiño yuvireco chupe.

¹⁶ Aheseve Pedro oñehe viteño ité oquendipive ohā. Ichui omboise oquenda yuvireco chupe cute, oyembosiquiye iriño tēi sepiase yuvireco.

¹⁷ Pedro rumo opo omopuha imonguiriri āgua. Ichui opa omombehu yande Yar opĩsiro agüer voquendasa sui chupe yuvireco. Ipare aipo ehi chupe:

—Pemombehupa Santiago upe iyavei ambuae Jesús roroyasar upe —ehi.

Ichui oseño, ambuaeve oso.

¹⁸ Cōhese sundao oyepihamondii eteanga yuvireco. “¿Que pĩha Pedro?” ehi tēi oyeupe yuvireco.

¹⁹ Ipare Herodes omondo sundao Pedro reca. Ndoyosui eté rumo yuvireco. Evocoyase Herodes porocuaíta rupi oporandu tupri sãrosar upe: “¿Que vo secoi?” ehi tēi chupe. Sese oyocuai ambuae sundao opacatu ahe sãrosar yucapa āgua. Ipare Herodes osē Judea sui oso Cesarea ve oyemboerecua.

Herodes mano agüer

²⁰ Yipindar rumo Herodes ndasori eté ava Tiro pendar upe, Sidón pendar upe avei. Evocoyase ahe pendar oyoya ipihañemoñeta yuviraso vajerā mborerecur rovai. Ahe evocoyase oyembori Blasto rese yuvireco, ahe mborerecur Herodes mboyoyasar. Ahe oporandu Blasto upe Herodes moñero uca āgua rese yuvireco. Esepia, Herodes porocuaíta sui oipisi mbahe güemihura yuvireco.

²¹ Herodes evocoyase omombehu ari oñehe vajerā chupe. Osupitise ahe ari, omonde sese iturucuar mborerecur secosa resendar yivirindar yuvireco. Ipare güenda imboeteipri harive oguapí oí. Aheve oñehe ava rehii upe.

²² Evocoyase ava rehii osapucaí pĩrata yuvireco aipo ehi: “¡Co mbia oñehe vahe ndahei ava tēi, Tūpa ité!” ehi yuvireco Herodes upe imboeteisave.

²³ Ava aipo iheseve voi, ñepeí Tūpa rembiguai oyapo mbaherasi guasu chupe. Ichui mbahe rasoí ocaru yavirer rupi yuvireco. Esepia, nombotei eté Tūpa. Sese omano.

²⁴ Tūpa Ñehengagüer rumo imombehusa catu opacatu rupi.

²⁵ Iyavei Bernabé, Saulo ocuaíta mboaviye pare, viroyevi Juan Marcos seraso yuvireco.

13

Tūpa oiporavo Bernabé, Saulo oyeupe mboraviqui apo āgua

¹ Evocoyase Jesús roroyasar Antioquía pendar pāhuve oime Tūpa Ñehengagüer mombehusar, sese oporombohe vahe avei. Ahe Bernabé, Simón (chupe, “Avaü” ehi yuvireco), Lucio evocoi Cirene pendar, Manaén (ahe mbia oyoya ocuacua mborerecur Herodes, Galilea pendar reseve) iyavei Saulo.

² Ñepeí ari opacatu Jesús reroyasar oñemonuhase yande Yar mboetei água, oyecuacu avei, ahese Espiritu Santo aipo ehi chupe: “Peiporavo Bernabé iyavei Saulo. Evocoi mbia aiporavo cheyeupe mboraviqui apo água” ehi Espiritu Santo yuvireco chupe.

³ Evocoiyase oyoerqui pare, omondo opo yuvireco iporavopri áca harive sovasa água. Ipare omondo yuvireco ambuae tecua rupi Jesús recocuer mombehu água.

Apóstol yuvirecoi Chipre rupi

⁴ Evocoiyase Bernabé, Saulo Espiritu Santo remimondo yuviraso Seleucia ve. Ichui yuviraso carite pipe caha páhu Chipre ve.

⁵ Oyepota yemboyasa Salamina ve yuviraso. Aheve omombehu Tüpa Ñehengagüer judío tūparo rupi yuvireco. Juan avei oso supi ipítivii água.

⁶ Opase ité oguata caha páhu Chipre pipe yuvireco, oyepota ambuae tecua Pafos serer vahesave yuviraso. Aheve judío ipaye vahe Barjesús serer vahe osepia yuvireco. Ahe oporombohe tēi: “Che añehe Tüpa Ñehengagüer rese” ehi tupri tēi vahe.

⁷ Ahe ipaye vahe oicove Chipre pendar mborerecuar Sergio Paulo serer vahe piri, ahe mborerecuar yaracua vahe. Ahe güeru uca Bernabé, Saulo avei Tüpa Ñehengagüer rendu potasave oyeupe.

⁸ Ipaye vahe rer griego ñehe pipe Elimas. Ahe ndoviroya ucai güerecuar upe ñehesa supi eté vahe.

⁹ Evocoiyase Saulo, Pablo serer vahe, vireco ité vahe Espiritu Santo opiha pipe, omahe tupri sese.

¹⁰ Ipare aipo ehi chupe:

—ñde iporombopa serai vahe ereico! ¡Ndipihai vahe, Carugar rahir tēi ereico! Opacatu mbahe avíye vahe amotarēhisar tēi avei ereico no. ¡Mahera nderepoi potai yande Yar porombohesa supi eté vahe roeroirosa sui.

¹¹ Eyapisaca, cūrítei yande Yar nde mombaraisura. Nande mboesapisoí chira moviro ari rupi. Ichui nderecatu iri chietera ari rendigüer repia água —ehi Pablo chupe.

Aipo ehi ramoseve voi, opacatu pítumimbi chupe. Oñehe tēi ava güeraso água upe.

¹² Ahe mbahe repiase, mborerecuar viroya yande Yar. Oyepihamondii porombohesa yande Yar resendar renduse.

Pablo, Bernabé reseve yuvirecoi Antioquía ve Pisidia ivi pipe

¹³ Evocoiyase Pablo, supindar avei, yuviraso carite pipe Pafos sui Panfilia rupindar Perge ve. Juan rumo oseya oyevi Jerusalén ve oso.

¹⁴ Perge sui yuviraso Antioquía ve, ahe namombrii Pisidia sui. Aheve, mbituhusa ari pipe, yuviroique judío tūparove oguapi yuvinoi.

¹⁵ Oyoerqui paré Tüpa porocuita resendar cuachiar pipe, Tüpa ñehe mombehusar cuachiar pipe avei, tūparo pendar rerecuar omondo oñehe Pablo upe:

—Ore mu, perecose mbahe pemombehu vahehá co ava monguerēhi água, pemombehumi andeu cūrítei —ehi.

¹⁶ Evocoiyase Pablo opūha ohā. Omopuha avei opo ‘toyapisaca che ñehe rese yuvireco’ oya aipo ehi:

—Che mu eta, Israel iguar, iyavei pe ndahei vahe judío Tüpa mboeteisar, pesendu che ñehe —ehi—.

¹⁷ Israel iguar Tüpa oiporavo yande ramoi oyeupe nara, ahe Egipto ivi pipe omboeta secua ambuae vahe secosa pipe. Ipare opiratasa pipe vinosepa ahe ivi sui aracahe.

¹⁸ Ipare Tüpa oñemosañi yande ramoi reco ai upe cuarenta araviter rupi, oguatase yuvireco ivi iporupirēhisa rupi.

¹⁹ Ipare omocañi ava eta Canaán pipendar siete tupri yuvirecoi vahe serecuar reseve-seve. Ipare omondo Canaán ivi yande ramoi upe nara.

²⁰ Egüe ehi cuatrocientos cincuenta araviter rupi yapo yuvireco —ehi.

“Ipare Tüpa ombou ava recocuer moingatusar oporocuai vahehá. Ipa vahe ipáhu pendar serer Samuel aracahe. Ahe Tüpa ñehe mombehusar avei.

²¹ Ahese yande ramoi eta oporandu yuvireco Tüpa upe mborerecuar guasu rese. Evocoiyase Tüpa omondo Saúl chupe, ahe Cis rahir, ahe yande ramoi Benjamín suindar secoi. Oporocuai cuarenta araviter rupi oico.

²² Ipare Tüpa virocua imborerecuasa ichui; omondo David upe yande ramoi cuai água. Ahe secocuer rese aipo ehi: ‘Co David, Isaí rahir, oyapo che remimbotar yepi. Ahe omboaviyera che porocuita’ ehi Tüpa.

²³ Ahe David suindar sui, Tüpa ombou Jesús Israel iguar pĩsiro água. Aracaheve Tüpa omombehu co yande ramoi upe.

²⁴ Yande Yar yu renondeve, Juan omombehu opacatu Israel iguar upe: ‘Pemboasi pe angaipa, peyevi Tüpa upe pe ñeapiramo ägua’ ehi chupe.

²⁵ Juan omboaviye senimise ocuaita, aipo ehi ava upe imombehu: ‘Pepihañemoñeta revo: co ité yande písirora, peye cheu viña. Oura rumo ambuae che raquicuei. Ahe che sui ivate catu vahe sese cheu ndiyai ipitaquisã yora ägua ipi sui’ ehi Juan” ehi judío tûparo pendar upe imombehu.

²⁶ “Che mu eta, pe Abraham suindar iyavei ndahei vahe Abraham suindar Tüpa mboeteisar, opacatu yandeu nara ombou Tüpa co ñehesa písirora resendar.

²⁷ Jerusalén pendar rerecuar avei ndoicuai evocoi Jesús Tüpa remimbou secoise yuvireco. Iyavei ndosenducuai Tüpa ñehhe mombehusar cuachiar pipe oyerouise mbituhusa ari yacatu yuvireco. Ichui ahe ae oyuca uca yuvireco. Êgüe ehi imboaviye Jesús rese Tüpa ñehhe mombehusar rembicuachiagüer pipendar yuvireco.

²⁸ Yepe ndoyosui mbahe sembiapo rai yuca uca ägua yuvireco viña, ahe rumo oporandño Pilato upe yuca uca ägua rese yuvireco” ehi.

²⁹ “Ichui omboaviyese opacatu icuachiapri pipendar yuvireco, oviroyi uca curusu sui ñoti ägua yuvireco.

³⁰ Tüpa rumo ombogüerayevi iri.

³¹ Setá ari rupi oyemboyecua oyeupi oguata vahe upe, evocoi ava yugüeru vahe supi Galilea sui, Jerusalén ve. Cüritei ahe ava ité omombehu Jesús recocuer ava upe yuvireco” ehi tûparo pendar upe.

³² “Sese che mu eta, cüritei oromombehu pëu evocoi ñehesa aviye vahe Tüpa omondo vahe yande ramo upe aracahe.

³³ Tüpa omboaviye ramo güemimombegüer yande Israel suindar yaico vahe upe, ombogüerayevise Jesús. Evocoi güemimombehu oicuachía uca Salmo moñuviriosa pipe aipo ehi: ‘Co pipe nde che Rahir ereico; che nde Ru aico’ ehi Tüpa chupe.

³⁴ Tüpa omombehu avei güemimbogüerayevi sete tuyuëhi ägua icuachiapri pipe aracahe aipo ehi: ‘Che niha oroovasara acoi David upe che ñehhe maranehi supi tupri vahe mboaviye ägua’ ehi.

³⁵ Sese omombehu avei ambuae icuachiapri pipe: ‘Nde, Tüpa, ndereseyai chira nde rembiguai Ava seco maranehi vahe rete ituyupa ägua’ ehi.

³⁶ Supi eté, David omboaviye ocuaita ava rese ohañecosa pipe yepi. Ipare omano. Evocoiyase oyapocatu tuvipave imu pähuve yuvireco. Ahe setecuer rumo opaño ité ituyu” ehi.

³⁷ “Acoi Tüpa ombogüerayevi vahe retecuer rumo ndituyui eté” ehi tûparo pendar upe imombehu.

³⁸ “Sese, che mu eta, peyapisaca, tapeicua evocoi Jesús recocuer sui oime ñeroisa angaipa rese yandeu. Ahe co amombehumí pëu. Moisés porocuita sui ndipoi ñeroisa angaipa rese yande reco mohivi ägua.

³⁹ Jesús recocuer sui rumo oime ñeroisa ñepeipei viroya vahe upe” ehi.

⁴⁰ “Peicua catu co mbahe sui, toviapi eme pe harive acoi Tüpa ñehhe mombehusar rembicuachiagüer pipe aipo ehi vahe:

⁴¹ ‘Esepia, pe seroïrosar peico vahe. Peyepihamondii, ipare pecañi tëira. Esepia, che ayapora mbahe pe recovesave. Yepe ambuae omombehu tupri itera pëu che rembiaporã viña, pe rumo ndaperoyai chietera’ ehi Tüpa” ehi Pablo tûparo pendar upe.

⁴² Yuvinosé potase tûparo sui, omombita Pablo yuvireco: “Teremombehu irimi eromombehu vahe ñehesa ambuae mbituhusa ari pipe oreu” ehi yuvireco chupe.

⁴³ Yuvinosese ava rehii tûparo sui, setamí judío iyavei ambuae oyembojudío vahe yuviraso Pablo, Bernabé rupi yuvireco. Ahese, “Peico tupri catu Tüpa pe rovasasa pipe” ehi ava upe yuvireco.

⁴⁴ Ambuae mbituhusa ari pipe seni opacatu ava ahe pendar oñemonuha yuvireco Tüpa Ñhengagüer rendu ägua.

⁴⁵ Osepiase ava rehii, judío rerecuar oñemoiró iteanga Pablo upe, supindar upe avei yuvireco. Viroïro Pablo ñehhe ava upe yuvireco.

⁴⁶ Evocoiyase Pablo, Bernabé reseve oñehhe yuvireco judío upe osiquiyeehisave:

—Tüpa ore cuai pëu rane ore ñehhe ägua. Pe rumo ndapeyapisaca potai ñhengagüer rese. Ipípe sui ndiyai peípisi tecovesa apirëhi vahe. Evocoiyase orosora, oroñehhe ava ndahei vahe judío upe.

⁴⁷ Esepia, yande Yar ombou ore cuaitarã co ñehesa rese aracahendar aipo ehi vahe: ‘Che oroporavo tataendi nungar nde reco ägua ndahei vahe judío yuvireco vahe upe písirora reroguata ägua opacatu ivi rupi’ ehi.

⁴⁸ Ava ndahei vahe judío osenduse co ñehesa, oviharete yuvireco, omboetei avei Tüpa Ñehengagüer. Opacatu ava iporavopri tecovesa apirêhi vahe pisi âgua, ahe viroya yuvireco.

⁴⁹ Evocoiyase Tüpa Ñehengagüer omombehu opacatu ahe ivi rupi yuvireco.

⁵⁰ Judío rumo omonguerêhi cuña imboyeroyapri Tüpa mboeteisar iyavei mbia seco ivate vahe Pablo, Bernabé mose uca âgua güecua sui yuvireco yamotarêhisave.

⁵¹ Ahese Pablo, Bernabé oipipete opitaqui ivi sui yuvireco 'Tüpa toicua mbahe sembiapo ai rese yuvireco chupe' oya. Ichui yuviraso Iconio ve.

⁵² Jesús reroyasar rumo oviharete yuvireco, vireco ité Espíritu Santo oyese yuvireco.

14

Pablo, Bernabé reseve omombehu Tüpa Ñehengagüer Iconio ve yuvireco

¹ Pablo, Bernabé oyepota Iconio ve yuviraso. Aheve yuviroique judío tüparo pipe, omombehu tupri yande Yar recocuer yuvireco. Sese setá ava viroya ñehesa yuvireco judío, ndahei vahe avei judío.

² Judío ndoviroyai vahe rumo oipihañemoñeta rerova yuvireco ava ndahei vahe judío Pablo, Bernabé iyavei ambuae Jesús reroyasar amotarêhi âgua.

³ Ahe rumo opita pucu yuvireco Iconio ve, omombehuño yande Yar recocuer osiquiyeeñhisave yuvireco. Aheve Tüpa ombou opíratasa mbahe yavai vahe apo âgua chupe 'ichui toicua yuvireco Pablo, Bernabé che poroaisusa mombehuse' oyapave.

⁴ Ahe tecua pendar rumo ipihañemoñeta yoivi yuvireco: ñepeí judío pihañemoñetasa rupindar; ambuae evocoiyase apóstol pihañemoñetasa rupindar yuvireco.

⁵ Oime judío iyavei ndahei vahe judío oyemboyoya mborerecuar rese mara-mara tēi sereco âgua yuvireco, "Ita pipe avei yayapi-yapi" ehi yuvireco chupe viña.

⁶ Oyanduse rumo yuvireco, oñemi voi yuviraso Licaonia rupi, Listra ve, Derbe ve, ipopi rupi avei.

⁷ Supi omombehu ñehesa aviye vahe Jesús resendar yuvireco.

Pablo yapi-yapisa ita pipe Listra ve

⁸ Listra ve yuvirecoise, oime mbia oha ramomi suive ndoguatai vahe. Ahe mbia oguapi oí

⁹ oyapisaca Pablo ñehe rese. Ahese Pablo omahengatuse sese, oicua ndoguatai vahe oyeroya ité Tüpa rese ocuera âgua.

¹⁰ Evocoiyase aipo ehi pírata chupe:

—jEpūha! —ehi.

Ahese opo, opūha, uguata voi.

¹¹ Osepiase ava rehii mbahe sembiapo yuvireco, osapucai pírata Licaonia ñehe pipe yuvireco:

—jTüpa ité ava nungar ogüeyi yuvireco yandeu! —ehi yuvireco Pablo, Bernabé upe viña.

¹² Ipihñemoñeta yuvireco Bernabé ahe tüpa Zeus iyavei Pablo ahe tüpa Hermes viña. Esepia, Pablo oñehe vahe.

¹³ Ahese co tüpa Zeus pahi güeru tivi, mbahe potri avei. Ahe tecua tapia roquendave, ahe Zeus tüparo tecua pipe ava reiquesa rupi chini. Oyuca pota tivi Pablo, Bernabé mboetei âgua yuvireco viña.

¹⁴ Oicuase rumo Bernabé, Pablo, ahese omondo oturucuar yuvinoña ava pāhuvē; oñehe pírata yuvireco:

¹⁵ —Mbia, ¿mahera êgüe peye oreu? —ehi—. Ore rumo ava tēi pe nungar avei oroico. Oromombehu: "Pepoi co mbahe êgüe ehi tēi vahe mboeteisa sui; peroya Tüpa supi eté vahe" orohe pēu. Ahe oyapo vahe iva, ivi, para guasu, opacatu ipor reseve.

¹⁶ Aracahe rumo Tüpa, "Êgüe tehi uguata ndahei vahe judío opihñemoñetasa rupi yuvireco" ehi viña.

¹⁷ Tüpa rumo ndasesarai ava upe mbahe tupri apo âgua sui. Ahe ombou amar pēu mbahe miti ha aviye âgua yepi. Êgüe ehi mbahe tembihu imbou iyavei viharetēsa pēu —ehi ava upe yuvireco.

¹⁸ Yepe aipo omombehu yuvireco chupe, ava rehii rumo seniño ité tivi oyuca yuvireco chupe imboetei âgua viña.

¹⁹ Ahese oyepota moviro judío Antioquía sui, Iconio sui avei. Oipihñemoñeta rerova ava rehii yuvireco. Ichui oyapi-yapi ita pipe Pablo yuvireco. Ipare ombotiriri seraso yuvireco tecua ivii. Ipihñemoñeta: "Yayuca ité" ehi yuvireco chupe viña.

²⁰ Oyere tupri Pablo rese Jesús reroyasar yuvireco. Ahe rumo oñarapuha, oique iri oso tecua pipe. Ahere ayihive yuvinosē oyevi yuviraso Bernabé reseve Derbe ve.

²¹ Omombehu tuprise co ñehesa icatupri vahe Derbe rupi, setá ava viroya yande Yar yuvireco. Ipape oyevi yugüeru Lистра rupi, Iconio rupi avei, oyepota Antioquia ve yuvireco.

²² Ahe supi omonguerêhi catu opacatu Jesús reroyasar yuvireco, aipo ehi imombehu: “Yepe ava yandê mombaraísura yuvireco viña, yaroyaño itera rumo Jesucristo. Sese peseya eme ité seroyasa. Yandeu aviye catu ité mbahe-mbahe têi pipe yande recose Tüpa mborerecuasave yande reique água” ehi yuvireco Jesús reroyasar upe.

²³ Ipape oiporavo ava Jesús reroyasar rãro água ñepeí-peí ñemonuhasa rupi. Oyeroqui iyavei oyecuacu. Ipape viropovêhe yande Yar upe iporaviqui água yuvireco.

Pablo, Bernabé oyevi yuvireco Antioquia ve Siria ivi rese

²⁴ Ipape yuviraso Pisidia rupi, oyepota Panfilia ivi rese.

²⁵ Omombehu Tüpa Ñehengagüer yuvireco Perge ve. Ipape yuviraso Atalia ve.

²⁶ Ahe ichui yuviraso carite pipe Antioquia ve, ahe tecua pipe yipandar imondopri Tüpa upe sovasapri yuvirecoi mboraviqui apo água. Aheve tupri avei imboaviye pare oyevi yuvireco.

²⁷ Oyepotase Antioquia ve yugüeru, omonuha opacatu Jesús reroyasar yuvireco. Aheve omombehu opacatu Tüpa mbahe oyapo vahe oyese yuvireco iyavei aipo ehi: “Yande Yar ombou avei ava ndahei vahe judío upe Guahir reroya água yuvireco” ehi yuvireco omboetasa upe.

²⁸ Aheve Pablo, Bernabé opita pucu yuvireco ipiri.

15

Jesús reroyasar oñemonuha Jerusalén ve yuvireco

¹ Evocoyase moviro mbia Jesús reroyasar judío yugüeru Judea sui Antioquia ve. Ahe ombohe Jesús reroyasar yuvireco aipo ehi: “Aracahe Tüpa oyocuai Moisés yande ramoi cuai água: ‘Pembocircuncida opacatu pe mu cuimbahe cheu nara’ ehi Tüpa aracahe” ehi yuvireco. “Cūrítei acoi êgüe ndapeyese Jesús reroyasar upe, noñepisiroi chietera yuvireco” ehi Antioquia pendar upe yuvireco.

² Pablo, Bernabé reseve rumo oñehe pĩrata yuvireco chupe. Nomoingatu catuise rumo mbahe yuvireco, ahese Jesús reroyasar omondo Pablo, Bernabé iyavei ambuae omboetasa Jerusalén ve apóstol upe iyavei Jesús reroyasar rãrosar upe aipo mbahe moingatu água yuvireco.

³ Êgüe ehi Jesús reroyasar Antioquia pendar yocuai imondo yuvireco. Oñocuase Fenicia, Samaria avei yuviraso, oguatasa rupi omombehu-mbehu Jesús reroyasar upe ndahei vahe judío recocuer yuvireco aipo ehi: “Setá ava ndahei vahe judío opa oseya arachendar aracuasa Tüpa rupi oguata água yuvireco” ehi. Ahese opacatu Jesús reroyasar oyemboviharete yuvireco senduse.

⁴ Yuviroyepotase Jerusalén ve, apóstol, Jesús reroyasar rãrosar iyavei ambuae Jesús reroyasareta oipisi tupri yuvireco. Aheve omombehu Tüpa mbahe oyapo vahe oyese yuvireco.

⁵ Osenduse rumo, moviro Jesús reroyasar fariseo opüha voi aipo ehi yuvireco chupe:

—Aní—ehi—. Pembocircuncida rane ité catu opacatu Jesús reroyasar ndahei vahe judío—ehi yuvireco—. Peyocuai avei opacatu ambuae Moisés porocuita mboaviye água yuvireco—ehiño ité yuvireco.

⁶ Ahese apóstol, Jesús reroyasar rãrosar avei oñemonuha oyemomborandu água aipo mbahe rese yuvireco.

⁷ Yemomborandu viteseve, Pedro opüha ipãhuve aipo ehi:

—Che mu, peicua niha aracaco Tüpa che poravo pe pãhu sui co ñehesa poropisirosa resendar mombehu água ava ndahei vahe judío upe ‘toviroya yuvireco’ oyapave.

⁸ Tüpa oicua ité opacatu ava pihañemoñetasa. Chupe avei omondo Espiritu Santo inungar yandeu. Ipipe sui yaicua Tüpa oipisi avei ahe ava oyeupe nara—ehi—.

⁹ Evocoyase, “Judío aviye catu vahe ava ndahei vahe judío sui” ndehi Tüpa. Esepia, opacatu oyoya pãve Tüpa upe yaico. Sese omoatiro ipihañemoñeta rai sui oyese yeroyasa pipe.

¹⁰ ¡Pe tie pesecoãha pota Tüpa! ¡Mahera peyocuai uca pota co Jesús reroyasar mbahe yavai rai vahe apo água! Aní rumo. Esepia, yande ramoi ndoicatu Tüpa porocuita mboaviye água yuvireco, yande avei êgüe yahe—ehi—.

¹¹ Co rumo, yaroyase yande Yar Jesucristo, yande pĩsirona oporoaisusa pipe, inungar co ava ndahei vahe judío yuvirecoi—ehi Pedro.

¹² Evocoyase opacatu oyemonguiriri yuvireco, osendu Bernabé, Pablo ñehesa, mbahe semiapo avei yuvireco. Evocoyase omombehu ndayasepia vahe poromondiisa Tüpa oyapo uca ava ndahei vahe judío pãhuve yuvireco chupe.

- ¹³ Osendupase iñehe yuvireco, ahese Santiago aipo ehi:
 –Che mu, Jesús reroyasar, peyapisacami che ñehe rese:
- ¹⁴ Simón omombehu yandeu Tūpa osaisu avei ava ndahei vahe judío. Sese oiporavo ahe ava oyeupe nara –ehi–.
- ¹⁵ Oyoya tupri Tūpa ñehe mombehugar rembicuachigüer rese. Ñepeí ipāhu pendar oicuachía aracahe aipo ehi:
- ¹⁶ ‘Coiye catu ayevíra vitu. Ahese ayapo piasu irira che rēta David oyapo uca vahecuer, ahe oi imocañipirer. Ambopiasu irira oitīpa vahecuer yuvireco.
- ¹⁷ Ēgüe ahera yapo opacatu ambuae ava, toseca oYar yuvireco, che yapave opacatu ava ndahei vahe israelita cheu nara ipehapri reseve.
- ¹⁸ Evocoi yande Yar rembiaporā icuapri aracahe suive’ ehi Tūpa ñehe mombehugar aracahe.
- ¹⁹ “Sese chepihañemoñeta iya ndayayocuai chira Moisés porocuita rupi oñecuñaro va-herā ndahei vahe judío Tūpa rupi uguata āgua yuvireco” ehi.
- ²⁰ “Aviye rumo yaicuachias chupe co mbahe resendar güeraño: Pehui rene mbahe mimba yucapri mbahe rahanga tēi upe seropovēhepri iyavei ndapeaguasai chira, pehui rene mbahe mimba yucapri suvi renosepirēhi, mbahe ruvi avei” ehi.
- ²¹ “Esepia, opacatu tecua rupi yuvirecoi ava omombehu vahe Moisés porocuita ñepeí-peí mbítuhusa arí pipe judío tūparo pipe aracahe suive. Aipo rupive” ehi Santiago.

Icuachiapri ndahei vahe judío upe nara

²² Ahese apóstol, Jesús reroyasar rārosar, ambuae Jesús reroyasar avei omondo pota opāhu pendar Pablo, Bernabé rupi Antioquía ve yuvireco. Oiporavo yuvireco ñuvirío mbía, ahe Judas Barsabás iyavei Silas. Ahe imboyeroyapri omboetasā pāhuve yuvireco.

²³ Ahe supi aipo ehi icuachía imondo yuvireco:

“Ore apóstol, Jesús reroyasar rārosar, pe mboetasā oroico vahe. Pe mboaviravesā, ndapemarai revo pe ndahei vahe judío Antioquía pendar, Siria pendar, Cílicia pendar avei.

²⁴ Oroyandu amove ava ore pāhu pendar pe mañeco tēi aipo oporombohesa pipe yuvireco. Ahe ava ndahei ore ocuaita pipe yuviraso pēu pe pihañemoñeta rerova.

²⁵ Sese oyoya orepihañemoñeta oroiporavo ñuvirío mbía ore rembiaisu ore rivri Bernabé, Pablo rupi imondo eipeve pēu.

²⁶ Ahe acoi oyemondo vahe mbahe-mbahe tēi povrīve yande Yar Jesucristo recocuer rese yuvireco.

²⁷ Oromondo Judas, Silas avei pēu: ahe teieté omombehura opacatu cuachiar pipendar pēu yuvireco.

²⁸ Aviye Espiritu Santo upe, oreu avei co porocuita güeraño oromondo vahe rese pēu. Ndape cuaisa pota iri rumo ambuae mborocuita rese.

²⁹ Pehui rene mbahe mimba yucapri seropovēhepri mbahe rahanga tēi upendar, ndapehū chiveira mbahe ruvi, mbahe mimba yucapri suvi renosepirēhi vahe iyavei ndapeaguasai chira. Pepoise evocoi mbahe naporai vahe sui, oimera mbahe tupri pēu. Aipo rupive. Peico tupri” ehi.

³⁰ “Aviye” ohe pare, yuviraso, oyepota Antioquía ve. Aheve opase omonuha Jesús reroyasar yuvirecoi vahe omondo cuachiar yuvireco chupe.

³¹ Ahe cuachiar rese oyoerquise, oyemboviharete yuvireco.

³² Judas, Silas Tūpa suindar ñehesa mombehugar avei yuvirecoi. Sese omboviharete catu iyavei omonguerēhi catu avei ahe ava yuvireco oñehe pipe.

³³ Opitase moviro ari aheve, Jesús reroyasar Antioquía pendar aipo ehi: “Aviye. Peyevi tupri pe mbousar upe” ehi yuvireco chupe.

³⁴ Silas rumo opita potaño ité aheve.

³⁵ Pablo, Bernabé avei opita viteño ité aheve yuvireco, ahe setá ambuae Jesús reroyasar reseve imbohe vite āgua yande Yar resendar ñehesa rese yuvireco.

Imoñuviriosa Pablo guata agüer Jesús recocuer mombehu āgua

³⁶ Coiye Pablo aipo ehi Bernabé upe:

–Yaso, yasepia iri Jesús reroyasar opacatu yande Yar ñehengagüer yamombehu vahecuer rupi, ¿mara ehi pīha ahe yuvireco? –ehi.

³⁷ Ahese Bernabé viraso pota Juan Marcos oyeupi viña.

³⁸ Nomboyoyai rumo Pablo ipihañemoñeta rese. Esepia, cuese Juan Marcos oseyaño oyepotase yuvireco Panfilia ve. “Taipitiviño iporaviquisa rese” ndehi chupe.

³⁹ Nomoingatuise mbahe oyeupe yuvireco, oyepipiño yuvireco oyesui. Ahese Bernabé viraso Marcos oyeupi carite pipe Chipre ve.

⁴⁰ Pablo rumo oiporavo Silas oyeupi icho ãgua. Yuvínose ãgua Antioquía sui, Jesús reroiyasar ahe pendar aipo ehi yuvireco chupe: “Tape rovasa Tüpa oporoaisusa pipe” ehi yuvireco imondo.

⁴¹ Ipare yuviraso Siria, Cilicia rupi Jesús reroiyasar monguerêhi catu ãgua yuvireco.

16

Timoteo oso Silas ndugüerã Pablo rupi

¹ Pablo ondugüer reseve yuviraso Derbe ve, Listra ve avei. Aheve osepia Jesús reroiyasar, Timoteo serer vahe, judía, Jesús reroiyasar membri. Iyesupa rumo griego.

² “Evocoi Timoteo aviye etepri” ehi Jesús reroiyasar Listra pendar, Iconio pendar avei yuvireco chupe.

³ Pablo viroguata potaño ité Timoteo oyeupi. Sese seroguata renondeve, ombocircuncida uca seroïroêhi ãgua judío yuvirecoi vahe upe. Esepia, opacatu oicua Timoteo ru griego secose yuvireco.

⁴ Evocoiyase opacatu tecua iguatagüer rupi omombehu ahe mborocuaita apóstol, Jesús reroiyasar rãrosar Jerusalén pendar ombou vahe yuvireco chupe.

⁵ Sese Jesús reroiyasar ahe tecua rupindar oyemoviracua catu yuvireco Jesús reroiyasa pipe iyavei oyemboeta catu yuvireco ari rupi.

Tüpa omondo uca Pablo Macedonia ve iquer nungar pipe

⁶ Espiritu Santo ndoipotai Asia rupi yuviraso vaheerã Tüpa Ñhengagüer mombehu ãgua. Sese oyahuva yuviraso Frigia rupi, Galacia rupi avei.

⁷ Ègüe ehi oyepota Misia popive yuvireco. Ichui yuviraso pota tēi Bitinia ve. Jesús Espiritu rumo ndoipotai icho ãgua supi.

⁸ Aheve osasaviño yuviraso Misia sui carite guasu yemboyasa Troas ve oyepota ãgua yuvireco.

⁹ Oyepotase aheve, ahe pïtu pipe Pablo oquer nungar pipe osepia mbia, Macedonia pendar, “Ereyumira Macedonia ve ore pïtivii ãgua viña” ehi ohã chupe.

¹⁰ Ipare ore oroyemoingatu voi eté Macedonia ve ore so ãgua. Esepia, ore oroicua ité Tüpa aheve ore mondora ñehesa pïsirosa resendar mombehu ãgua.

Pablo, Silas Filipino ve yuvirecoi

¹¹ Oroso carite pipe Troas sui oromohiviño voi oroso evocoi ivi para guasu Samotracia ve. Ahere ayihive oroyepota Neápolis ve.

¹² Ichui oroso ivi rupi Filipos ve, ahe tecua seroyapri catu vahe ambuae tecua sui, ahe ivi Macedonia rupindar. Aheve Roma iguar oyeyecuai, oyocuai avei opacatu tecua ivirindar ava yuvireco. Aheve moviro ari tēi oroico.

¹³ Mbituhusa ari pipe orosē evocoi tecua sui iai popive. “Aheve oñemonuhara judío oyerocu ãgua” orohe. Aheveve cuña oñemonuha yugüeru. Aheve oroyepota chupe, oroguapi ipãhuve. Ipare oromombehu co ñehesa pïsirosa resendar yuvireco chupe.

¹⁴ Ñepei imboetasã, Lidia serer vahe, Tiatira pendar, oyapisaca ore ñehere rese oï. Ahe Tüpa mboeteisar secoi, turucuar suendi vahe mbovendesar avei secoi. Yande Yar omohivi ipihañemofetasã iyapisaca ãgua Pablo remimombehu rese.

¹⁵ Sese ñapiramosa, opacatu sēta pendar reseve. Ipare ore mombita pota güetave.

—Che reroiyase peye yande Yar reroiyasar che recose, pepitara che rētave —ehi oreu.

Ègüe ehi ore monguerêhi. Sese oropita sētave ipiri.

¹⁶ Ipare ambuae ari oroso irise oroyeroqui ãgua, cuñatai ore rovaïchi, ahe cuñatai carugar piratasa pipe mbahe mombehusar. Oïcatu ava upe mbahe oime vaheerã mombehu. Omombehuse mbahe, setã oipisi sepri guarepochi güerecuar yuvirecoi vahe upe nara yeipi.

¹⁷ Ahe cuñatai ou ore raquicuei,

—¡Co ava Tüpa ivate catu vahe upendar oporaviqui yuvireco omombehu: “Na ehira Tüpa yande pïsiro” ehi yuvireco! —ehi pucu-pucu ore mombehu ava upe.

¹⁸ Setã ari ègüe ehi oico oreu. Omañeco tēise rumo Pablo, oyemboyere chupe cute, aipo ehi icarugar upe:

—Che orocuai Jesucristo rer pipe: esē co cuñatai sui —ehi.

Aheveve voi carugar osē ichui.

¹⁹ Evocoiyase cuñatai rerecuar oyanduse, “Ndoipisi uca iri chira guarepochi yandeu” ehi yuvireco. Imboasipave oipisi Pablo, Silas mborerecuar upe ocarusuve seraso yuvireco.

²⁰ Ipare mborerecuar yuvirecoi vahe upe aipo ehi yuvireco:

—Co ñuvirío mbia orogüeru vahe peu, judío tēi yuvirecoi. Ayeve omboaiyu guasu tēi yuvireco yande recua pipe.

²¹ Oporombohe güecocuer rese yuvireco. Secocuer rumo naporai oreu. Ore Roma iguar oroico, sese ndoroicatui secocuer moña água —ehi yuvireco mborerecuar upe.

²² Evocoiyase ava eta oyamotarêhi Pablo iyavei Silas yuvireco iyavei mborerecuar, “Pesequi iturucuar ichui. Ipare peinupara ivira pipe” ehi.

²³ Inupá iteanga pare, osoquenda yuvireco. Oyocuai pîraita soquendapri rãrosar yuvireco, “Esãro tupri” ehi yuvireco chupe.

²⁴ Aipo oyeupe he ramoseve, soquendapri rãrosar omoingue Pablo, Silas oi ava nose catui vahesa pipe. Aheve omopaha cepo pipe.

²⁵ Ahe pîtu mbiter rupi rumo Pablo, Silas oyeruqui, osapucaí Tûpa mboeteisave yuvireco. Ambuae ava soquendapri evocoiyase osenduño têi yuvireco isapucaí.

²⁶ Ahese aviyeteramo têi ivi oririi eteanga. Opa omomara ava roquendasa moviracuasa, opacatu oquenda oyemboi iyavei opacatu carena oyera soquendapri sui.

²⁷ Ahese soquendapri rãrosar omahe yesapiha. Osepiase oquenda imboipri, ahese vinose oquise pucu siru sui oyeyuca água viña. Esepia niha, “Opacatu ité revo soquendapri yuviraso” ehi viña.

²⁸ Pablo rumo,

—¡Ereyapoi rene mbahe têi ndeyeupe! ¡Esepia, opacatu oroicoveño cohavel —ehi pucu soquendapri rãrosar upe.

²⁹ Evocoiyase soquendapri rãrosar, “Emboumi tataendi” ehi ondugier upe. Ichui oña oique, oririi, osiquiyepave oñenopiha Pablo, Silas rovai oso.

³⁰ Vinose pare soquendasa sui oporandu chupe:

—Mbía, ¿mara ahera vo che ñepisiro água vichico? —ehi chupe.

³¹ —Eroya yande Yar Jesucristo. Ichui ahe nde písirora, nde rêta pendar avei —ehi yuvireco chupe.

³² Ahese omombehu yuvireco Tûpa Ñehengagüer soquendapri rãrosar upe, opacatu sêta pendar upe avei.

³³ Ahe pîtu pipeve avei soquendapri rãrosar viraso oyeupi, yapichasa oyoseipa chupe. Ahese Pablo, Silas oñapiramo guãrosarer, sêta pendar avei yuvireco.

³⁴ Viraso pare sãrosar güetave, ombocarú. Ahe sêta pendar avei oviharete ité yuvireco Tûpa reroyasa rese.

³⁵ Cõhese mborerecuareta omondo sundao ava rese icuaiipri soquendasave yuvireco. Oyepotase yuvireco, aipo ehi: “Emosepa evocoi mbia judío” ehi.

³⁶ Ahese soquendapri rãrosar omombehu co ñehesa Pablo upe:

—Mborerecuar ombou yuvireco ñehesa cheu pe mose água. Peso tupriño peico —ehi chupe.

³⁷ Omboyevi rumo chupe,

—Ore niha romano oroico viña, ore nupasa rumo opacatu ava rovaque. Ndoporandu rane angai eté rumo mbahe rese oreu. Ore roquendapa voíño têi yuvireco. Ipare aipo ava rembiepiaêhive têi ore mosepa uca pota viña. ¡Aní eté rumo! Ahe teieté ru toyugüeru ore mose água —ehi soquendapri rãrosar upe.

³⁸ Ipate sundao ava rese icuaiipri omombehu güerecuareta upe Pablo ñehes. Oyanduse Pablo, Silas romano secose, osiquiyé iteanga yuvireco.

³⁹ Ahese ahe teieté yuviraso Pablo, Silas oyeupe ñero água rese yuvireco: “Peso tupriño ore recua sui” ehi yuvireco chupe.

⁴⁰ Pablo, Silas yuvinosese voquendasa sui, yuviraso iri Lidia rêtave. Oñemonuha irise ambuae Jesús reroyasar pãhuve, omonguerêhi catu yuvireco. Ipate yuviraso ichui.

17

Ava yaivu guasu têi Tesalónica ve yuvireco

¹ Oguatase Pablo iyavei Silas, oñocua Anfípolis iyavei Apolonia rupi yuviraso. Êgüe ehi oyepota tecua Tesalónica ve yuvireco. Aheve oime judío tûparo.

² Secocuer rupi eté mbituhusa ari pipe Pablo oique judío tûparove, oñemoñeta ava eta upe mbosapi mbituhusa ari rupi Tûpa Ñehengagüer rese.

³ Omboyecua tupri imombehu Tûpa Rembiporavo ava písiro água iparaisu rane itera, omanora, ipare rumo ocuerayevi iriño itera. Ipate aipo ehi:

—Jesús, acoi amombehu vahe pëu, ahe ité niha Tûpa Rembiporavo ava písiro água —ehi.

⁴ Amove ipãhu pendar seroyasa pipe oyemboya sese yuvireco. Setá avei ava griego yuvirecoi vahe, Tûpa mboeteisar judío aracuasa reroyasar avei. Ipãhuve setá avei cuña oyemboetei vahe oyemboya sese yuvireco.

⁵ Judío rumo ndoviroyai vahe oñemoirombave secatêhi ava rese yuvireco. Sese omonuha ava yuvireco têi vahe, ndipihai vahe yuvireco. Imonuha pare, ahe omboaiyu guasu uca têi

ahe ava upe opacatu güecua pipe yuvireco. Yuviraso Jasón rêtave Pablo, Silas reca, vinosu pota ava rehii pâhuve yuvireco viña.

⁶ Ndoyosuse rumo aheve yuvireco, virasoño Jasón, ambuae Jesús reroyasar avei güecua rerecuar rovai yuvireco. Viroãse guasu sereco yuvireco,

—¡Evocoi mbia Pablo iyavei Silas virova vahe ava recocuer opacatu tecua rupi yuvireco, cûritei oyepotapa yuvireco çohave!

⁷ Co Jasón omombituhu güêtave. ¡Opacatu co yuvirecoi vahe ndoviroyai Cesar porocuaita yuvireco iyavei omombehu yuvireco: “Oime ambuae mborerecuar guasu, ahe Jesús” ehi niha aipo yuvireco! —ehi yuvireco mborerecuar upe.

⁸ Aipo ñehesa renduse, oyepihamondii guasu ava eta, mborerecuar avei tecua pipendar yuvireco.

⁹ Mborerecuar rumo oipisipase guarepochi Jasón sui, ambuae Jesús reroyasar sui avei, ahese opa mose.

Pablo, Silas omombehu Tûpa Ñehengagüer Berea ve yuvireco

¹⁰ Ahe pîtu pipeve voi ava Jesús reroyasar omondo Pablo, Silas tecua Berea ve yuvireco. Oyepotase aheve, yuviroique judío tûparo pipe.

¹¹ Berea pendar ava aviye catu ava Tesalónica pendar sui. Êgüe ehi ipisi ohâpisiêhisa pipe ñehesa yuvireco iyavei ari yacatu rupi oseca Tûpa Ñehengagüer pipe ‘¿supi eté pîha Pablo ñehesa?’ oyapave yuvireco.

¹² Evocoyase setá avei Pablo ñehese reroyasar iyavei setá griego viroya yuvireco, ndahei cuimbahe güeraño, cuña oyemboetei vahe avei.

¹³ Judío Tesalónica pendar rumo oyandu yuvireco Pablo porombohesa Tûpa Ñehengagüer rese Berea ve. Sese yuviraso aheve imboaivu guasu têi uca âgua ava upe yuvireco.

¹⁴ Evocoyase Jesús reroyasar Berea pendar Pablo viroguata poyava voi tecua sui para guasu coti yuvireco. Silas iyavei Timoteo rumo opita viteño aheve yuvireco.

¹⁵ Evocoyase Pablo rupi yuviraso vahe viroyepota Atenas ve seraso. Ahe ichui viroyevi Pablo ñehese Silas upe iyavei Timoteo upe avei yuvireco yuviraso voi âgua Pablo piri ahe tecuave yuvireco.

Pablo Atenas ve secoi

¹⁶ Pablo osâro viteseve Silas iyavei Timoteo Atenas ve oico, ndoyembovhai osepiase opacatu rupi tûpa rahanga-anga têi.

¹⁷ Sese judío tûparo pipe omombehu Jesús recocuer judío eta upe iyavei ambuae Tûpa mboeteisar upe avei. Iyavei ari yacatu omoñeta ava osepia vahe ocarusu rupi ava ñemonuhasave ahe tecua pipe.

¹⁸ Evocoyase amove mbia oyembohe vahe epicüreo aracuasa rese iyavei mbia oyembohe vahe estoico aracuasa rese oñemoñeta Pablo rese yuvireco. Amove aipo ehi Pablo upe yuvireco seroïrosave:

—¿Mbahe rese angahu pîha co mbia iñehese papa rai ava upe oico? —ehi.

Ambuae aipo ehi yuvireco:

—Ndoyavil co mbia oñehese vahe ambuae ava Tûpa rese têi —ehi yuvireco.

Esepia, omombehu Jesús recocuer iyavei cuerayevisa resendar.

¹⁹ Evocoyase ahe oyembohe vahe viroyeupi Pablo Areópago serer vahesave seraso yuvireco. Aheve ava oñemonuhasave aipo ehi yuvireco çupe:

—¿Ndiyai vo eresenducua uca tupri catumira co porombohesa piasu resendar oreu viña?

²⁰ Supi eté niha eremombihu mbahe ndorosendu vitei vahe, ore oroicua tupri pota, çmara oyapave ité vo aipo ehi? —ehi yuvireco Pablo upe.

²¹ Atenas pendar iyavei yugüeru vahe Atenas ve, oyembohe pota serai vahe yuvireco. Ahe oñemoñetaño, omombehuño mbahe oyeupe yuvireco yepi iyavei osendu pota rai ñehesa ipiasu vahe. Aheño ité ipihañemoñetasa yuvireco.

²²⁻²³ Evocoyase Pablo opûha ahe ava pâhuve aipo ehi:

“Pesendu rane Atenas iguar. Aguatase ocar rupi asepia pe tûpa eta pemboetei vahe. Ahese asepia ñepeï tûpa upe seropovêhepri renda. Sese asepia icuachiapri aipo ehi oï: ‘Tûpa ndicuasai vahe upendar’ ehi. Evocoi Tûpa ndapeicua vitei vahe, ahe secocuer niha amombehu pëu” ehi.

²⁴ “Evocoi Tûpa oyapo vahe co ivi, opacatu mbahe ipor avei. Ahe niha ivi, iva Yar secoi. Sese ndasecoi tûparo ava têi rembiapo pipe.

²⁵ Ndahei ava rembiapo pipe sui têi oïcove. Esepia, ndipoi mbahe ipane vahe çupe. Ahe ité niha opacatu upe ombou tecovesa, pîthuesa iyavei opacatu mbahe oime vahe ivi, ivave” ehi.

²⁶ “Tūpa oyapo opacatu-catu tēi ava ñepei ava sui ava yesu āgua opacatu ivi rupi. Omondo ivi ava yemboerecua āgua ñepei-peí upe. Ari avei omondo co ivi pipe iyemboerecua āgua yuvireco chupe.

²⁷ Ēgüe ehi ava upe ‘tache reca yuvireco’ oya, ‘ipipe sui aviyeteramo che reroyara yuvireco’ oyapave. Ēgüe ehi rumo Tūpa yande resevemi eté.

²⁸ Esepia niha, Tūpa sui yaicove, ipíratasa pipe yayembovava, ichui avei yareco yande recovesa, inungar oicuachia amove pe recua pendar yuvireco, aipo ehi: ‘Yaico ité Tūpa suindar’ ehi yuvireco.

²⁹ Sese yande Tūpa suindar yaicose, ‘Co mbahe rahanga oro apopri iyavei guarepochi, ita apopri, ahe revo Tūpa’ ndayaheí chira. Esepia, mbahe rahanga ava rembiapo tēi, ndahei Tūpa” ehi.

³⁰ “Pe ramoi ndoicua tupriise yuvireco aracahe, Tūpa oñemosaño mbahe sembiapo rese chupe. Cūritei rumo oyocuai opacatu ava co ivi pipendar ‘tomboasi oangaipa, toyeví yuvireco cheu’ oya.

³¹ Esepia, ahe oiporavo ari opacatu ava recocuer rese porandu uca āgua güecocuer ívi tuprisa pipe ñepei güemboporavo upe. Ahe ombogüerayeví güemboporavo omano vahe pāhu sui ‘toicua opacatu ava güecocuer rese iporandu āgua’ oya” ehi Atenas pendar upe.

³² Osenduse yuvireco cuerayevisa resendar, ahese oime ava oyoyai catu yuvireco seroírosave. Ambuae rumo aipo ehi yuvireco:

—Torosendu irimi aipo ñehesa curi —ehi yuvireco.

³³ Sese Pablo osé ipāhu sui oso.

³⁴ Moviro rumo mbia oyemboya sese, viroya ité vahe iñehesa yuvireco. Ahe ipāhuve secoi mbia Dionisio serer vahe, ahe Areópago pāhu pendar iyavei cuña Dámaris serer vahe. Ambuae oime vite yuvireco seroyasar.

18

Pablo Corinto ve secoi

¹ Coiye catu Pablo osé Atenas sui, oso Corinto ve.

² Aheve oyoepia mbia judío, Aquila serer vahe rese yuvireco. Ahe mbia aipo Ponto ve oha vahecuer. Yugüeru ramo rumo Italia sui güembireco Priscila reseve. Yuvínose ñepei tecua Italia rupindar Roma sui oyocuaise mborerecuar guasu Claudio: “Toyuvínose ité opacatu judío Roma sui” ehise. Pablo oso,

³ opita Aquila piri oporavíqui āgua. Esepia, Pablo, Aquila avei ahe mbahe pírer mbovívar pāve yuvirecoi.

⁴ Mbituhusa ari yacatu rupi Pablo omombehu Jesucristo recocuer ava upe judío tūparo pipe ‘toviroya Jesús judío iyavei ndahei vahe judío yuvireco’ oyapave.

⁵ Oyepotare rumo Silas, Timoteo Macedonia sui yuvireco, ahese Pablo oyemondo ité Jesús recocuer mombehu āgua rese güeraño judío eta upe aipo ehi: “Jesús niha Tūpa Rembivoravo ava písiro āgua secoi” ehi.

⁶ Iñehe-ñehe tēi rumo seroírosave yuvireco chupe. Sese Pablo oipipete oturucuar sovaque ‘oimera mbahe tēi pēu’ oya, iyavei aipo ehi chupe yuvireco:

—Pe ae niha peseca Tūpa ñemoirosa peyeupe pe recocuerai sui. Ndahei rumo che resera mbahe. Esepia, che amboaviye tupri che cuaita pēu. Che rumo, co pipe suive, amombehu catuño itera co ñehesa ava ndahei vahe judío upe vichico —ehi Pablo judío upe.

⁷ Evocoyase Pablo osé judío tūparo sui, oique mbia Ticio Justo serer vahe rêtave, ahe Tūpa mboetisar avei secoi. Ahe sēta judío tūparo iqueve.

⁸ Crispo, ahe judío tūparo rerecuar viroya avei yande Yar, opacatu sēta pendar avei viroya yuvireco. Setá ambuae Corinto pendar avei viroya osenduse iñehesa yuvireco. Seroya pare, oñeapíramopa uca yuvireco.

⁹ Ñepei pítu pipe yande Yar oñehe Pablo upe iquer nungarve: “Eresiquívei rene, ereñehe ava upe, che mombehuño eve, erepoi rene che mombehusa sui.

¹⁰ Esepia, che nde reseve aico. Sese ndiyai ava upe nde momara uca āgua. Supi eté che areco setá che rahirā co tecua pipe” ehi yande Yar chupe.

¹¹ Evocoyase opita ñepei aravíter yemombitesa rupi Corinto ve oico. Aheve ombohe Tūpa Ñhengagüer rese ahe pendar ava.

¹² Galión mborerecuar secose opacatu Acaya rupi, judío oñemonuha Pablo amotarēhisave. Ichui víraso ahe mborerecuar upe porandusa ivate catusave yuvireco,

¹³ aipo ehi yuvireco chupe:

—Co mbia oipíhañemoñeta rerova tēi ava oTūpa mboetei āgua. Ndahei rumo Roma pendar porocuaíta rupi Ēgüe ehi yuvireco —ehi yuvireco seroírosave chupe.

¹⁴ Oñehe pota tēi viña, Galión rane rumo oñehe judío upe:

—Peyapisaca mbia judío. Pemombehuse cheu ava rembiapo naporai vahe, ahese ayemonguerêhira che yapisaca âgua pe remimombehu rese viña.

¹⁵ Pe rumo peporandu cheu mbahe pe yembohesa resendar, pe Tûpa rer resendar iyavei pe Tûpa porocuaita resendar rese têi. Pemoingatu pe ae pe recocuer; ndaipotai aipo nungar mbahe moingatu âgua —ehi Galión ahe ava upe.

¹⁶ Ipare opa omboyepipi porandusa sui.

¹⁷ Ahese opacatu griego oipisi judío tûparo rerecuar Sóstenes yuvireco. Ipare yuvirocua-rocua Galión rovai ahe peve yuvireco sese. Galión rumo, “Mara etemo che areco viña” ehiño chupe.

Pablo yevi irisa Antioquia ve

¹⁸ Pablo secoi pucu vite pare Corinto ve, “Asora vichico cute” ehi Jesús reroyasar upe. Ipare yuviraso Aquila, Priscila reseve. Oyepotase Cencrea ve yuvireco para guasu popive, aheve Pablo oñeapipa tupri oñehe mboaviye âgua. Ipare yuviraso carite pipe Siria ve.

¹⁹ Siria piar rupi yuviraso Efeso ve. Aheve opita Aquila, Priscila yuvireco. Ichui Pablo oi que judío tûparo pipe Jesús resendar ñehesa mombehu âgua chupe yuvireco.

²⁰ Ahe pendar omombita pota vite têi yuvireco viña, Pablo rumo ndopita potai aheve.

²¹ Evocoyase, “Aviye, taso rane” ehiño chupe yuvireco. “Tûpa oipotase cheu, ayevi irira vitu pe piri” ehi.

Ipare oso Efeso sui carite pipe.

²² Oyepotase Cesarea ve, oso Jerusalén ve “avirave” apo âgua Jesús reroyasar upe. Ipare oso Antioquia ve.

²³ Opita pucu pare aheve, osê, oguata iri Galacia rupi, Frigia rupi opacatu Jesús reroyasar monguerêhi catu âgua.

Apolos omombehu Jesús recocuer Efeso ve

²⁴ Aheseve avei judío Apolos serer vahe oso Efeso ve, ahe Apolos, Alejandría iguar. Oñehe tupri ai vahe, oicua tupri avei Tûpa Ñehengagüer.

²⁵ Ahe oyembohe vahe avei yande Yar recocuer rese. Omombehu oquerêhisa pipe secocuer ava upe, oporombohe tupri ai avei sese. Ahe rumo oicua Juan oâpiramo agüer güeraño têi.

²⁶ Ahe osiquiyêhisave judío tûparo pipe omombehu Tûpa Ñehengagüer. Osenduse Aquila, Priscila ñehesa, omombita yuvireco oyepiri. Ahese omombehu tupri catu Tûpa recocuer chupe yuvireco.

²⁷ Oso potase Apolos Acaya coti, ahese Jesús reroyasar Efeso pendar omonguerêhi catu. Oyapo cuachiar Acaya pendar upe imondo yuvireco sese hañeco tupri âgua. Ipare oyepota oso Acaya ve. Aheve oime ava Tûpa guaisusa pipe sui viroya vahe Jesús yuvireco. Ahe ava Apolos oipitivi seroya tupri catu âgua yuvireco.

²⁸ Omboyecua opacatu rovaque judío pihañemoñetasa co coti têi vahe. Ahese opa osecopi oñehe pipe ahe ava. Esepia, Tûpa Ñehengagüer pipe omboyecua ité: “Jesús Tûpa Rembiporavo ava písiro âgua secoi” ehi eté judío eta upe.

19

Pablo omombehu Jesús recocuer Efeso ve

¹ Evocoyase Apolos Corinto ve ipitaseve, ahe tecua Acaya rupindar, Pablo oñocua ivivaté vahe oyepota Efeso ve oso. Aheve osepia setá Jesús reroyasar.

² Evocoyase oporandu ahe ava upe:

—¿Peipisi vo Espíritu Santo pe piha pipe peroyase Jesús? —ehi chupe.

—Ore ndorosendui eté aipo Espíritu Santo resendar ñehesa —ehiño yuvireco chupe.

³ Ichui oporandu iri chupe:

—Evocoyase, ¿mbahe nungar vo âpiramosa peipisi? —ehi.

—Juan poroâpiramosa oroipisi —ehi ahe ava yuvireco chupe.

⁴ Evocoyase aipo ehi ahe ava upe:

—Juan niha oñapiramo acoi omboasi vahe oangaipa oyevisé Tûpa upe. Ipare rumo omombehu ava upe: “Peroya ahe eté vahe ou vaherâ che raquicuei” ehi. Ahe ou vaherâ, “Jesús upe” aipo ehi —ehi Pablo chupe.

⁵ Osenduse Pablo ñehe, opacatu oñeapiramo uca Jesucristo rer pipe yuvireco.

⁶ Omondose Pablo opo iharive yuvireco, ahese ogüeyi Espíritu Santo, oi que ipiha pipe yuvireco. Ipare aviyeteramo têi oñehe ambuae ñehesa pipe iyavei omombehu Tûpa suindar ñehesa yuvireco.

⁷ Egüe ehi Tûpa ahe doce mbia yuvirecoi vahe upe.

⁸ Mbosapí yasi rupi Pablo oi que omombehu Tüpa Ñehengagüer judío upe osiquiyeehisave itüparó pipe ipihañemoñeta rerova água Tüpa mborerecuasa resendar reroya água rese.

⁹ Amove rumo judío ipihavíracua ité seroyaéhi água yuvireco. Ipípe ñeñe-ñeñe tēñiño co tecocuer ipiasu vahe mombehua rese yuvireco ava rehí rovaque. Evocoyase Pablo oyepepi ichuí, vino sepa oyeupi Jesús reroysar yeroquisa Tirano serer vahesave seraso. Aheve ari yacatu rupi oñehe yepi.

¹⁰ Ēgüe ehi ñuvirío araviter rupi. Sese opacatu ava Asia rupindar judío, ava ndahei vahe judío avei osendu yuvireco yande Yar ñehengagüer.

¹¹ Tüpa omondo güeco pīratasa Pablo upe poromondiisa apo água.

¹² Sese pañueru iyavei turucuar Pablo rese imboyapri, ahe serasosa imbaheasi vahe upe imbogüera água. Caruguar avei opa yuvínose yuvireco ichuí.

¹³ Amove oime judío oguata vahe ocar rupi caruguar mose água ava sui. Sese nara oiporu pota yande Yar Jesús rer yuvireco.

¹⁴ Evocoyase aipo ehi caruguar upe: “Pablo Jesús recocuer omombehu vahe rer pipe, ‘Peyepipi co mbia sui’ ahe pēu” ehi. Ēgüe ehi pota avei siete Esceva rahir mbahe apo yuvireco viña. Ahe iyepupa judío pahi rerecuar secói.

¹⁵ Caruguar rumo omboyevi chupe: “Che aicua Jesús recocuer, aicua avei Pablo; pe rumo ndopocuai, ¿ava vo catu pe peico?” ehiño caruguar chupe.

¹⁶ Aheseve ahe cuimbahe caruguar vireco vahe opo ipāhuvé oso. Opacatu opīratasa pipe opa ité osecopi siete mbia yuvirecoi vahe. Omomara-mara tēi oguayíehisa pipe imonanipa tupri imondo.

¹⁷ Co mbahe sembiapo rēracua opa oyepota opacatu Efeso pendar upe, judío upe, ava ndahei vahe judío upe avei. Evocoyase oyembosiquiye guasu yuvireco. Ipípe sui opacatu oicua yande Yar Jesús rer yuvireco.

¹⁸ Setá Jesús viroya ramo vahe yugüeru opacatu mbahe güembiapocuer naporai vahe mombehu yuvireco

¹⁹ iyavei setá ipaye vahe Jesucristo viroyase, omonuhapa ocuachiar ombopayesa resendar sapi água opacatu ava rovaque yuvireco. Sapi pare, opa ahe cuachiar repri vino se yuvireco. Ahe sepri cincuenta mil tupri ari mboraviqui repri.

²⁰ Ēgüe ehi Tüpa opīratasa pipe ombouvicha oñehengagüer iyavei ñeñe pīratasa oyecua catu ava rese.

²¹ Ipape Pablo ipihañemoñeta Jerusalén ve oso água ivi Macedonia, Acaya rupi. “Coipe catu aheve che reco viteseve, ichuive che asora Roma ve” ehi.

²² Evocoyase omondo ñuvirío opitiviisar Timoteo, Erasto Macedonia ve güenonera. Ahe rumo opita vitemi Asia rupi oico.

Ava Efeso pendar yaivu guasu yuvireco

²³ Ahe ari pipe Efeso pendar yaivu guasu yuvireco co tecocuer ipiasu vahe rese.

²⁴ Aheve mbia Demetrio serer vahe secói. Ahe oyapo Artemisa rēta rahanga guarepochi apopri guarepochi pisi água. Ambuae ava mbahe rahanga aposar oipisi tupri avei oporaviqui repri ipiri yuvireco.

²⁵ Sese Demetrio omonuha mbahe rahanga aposar, omonuha avei ambuae oporaviqui vahe Artemisa rahanga rese, ava mboaivu guasu uca água. “Pe mbia, peicua yayapose mbahe Artemisa nungar, yaipisi tupri yande poraviqui repri” ehi omboetasa upe.

²⁶ “Peicua avei Pablo opa ovirova ava eta piha Artemisa mboeteisa sui ‘ndahei Tüpa ité’ ohesa pipe yande rembiapo uve. Ndahei rumo cohapeño ēgüe ehi, opacatu Asia rupi ēgüe ehi avei imombehu.

²⁷ Aviyeteramo mbahe tēi oimera yandeu yande poraviquisa mocañi tēi água, tüparo guasu Artemisa upendar aviyeteramo ocañi tēi aveira. Opacatu Asia pendar iyavei ava opacatu ivi rupindar omboetei acoi Artemisa rahanga guasu yuvireco viña. Aviyeteramo rumo ava nomboetei iri chira, iyavei viroirora yande rembiapo catuprisa yuvireco” ehi.

²⁸ Osenduse aipo ihe ava yuvireco, oñemoirosa pipe virosapucái aipo ehi yuvireco: “¡mboeteipri catu Artemisa yande recua pendar tasecoi!” ehi yuvireco.

²⁹ Opacatu Efeso rupi ava yaivu guasu tēi. Osapucái vahe oipisi Gayo iyavei Aristarco, ahe ñuvirío Pablo rupindar yugüeru vahe Macedonia sui. Oipisise, omombo-mombo seraso yuvireco ava ñemonuha guasusave.

³⁰ Pablo oi que pota tēi ava rehí pāhuvé, ambuae Jesús reroysar rumo nomoingue uca potai yuvireco.

³¹ Iyavei moviro mborerecuar imboripar Asia rupindar omondo oñehe chupe aipo ehi: “Ereiquei rene ava ñemonuhasa guasuve” ehi avei yuvireco chupe.

³² Ñemonuhasave amove ava osapucaí pĩrata ñepeí mbahe rese, amove osapucaí ambuae mbahe rese. Esepia, yaivu tẽi yuvireco. “¿Mahera vo evocoiyase yañemonuha?” ehi tẽi setá ipãhu pendar yuvireco.

³³ Amove rumo ava rehii pãhuve yuvirecoi vahe judío, ahe ombohe-mbohe imoafiña ñi mondo Alejandro mbahe mombehu ãgua ava rehii rovaque yuvireco. Alejandro evocoiyase omopuha tẽi opo ava monguiriri ãgua viña. Osepi pota omu judío ava rehii rovaque viña.

³⁴ Ava rehii rumo oicuaese Alejandro judío secose yuvireco. Opacatu guasu osapucaí pĩrata yuvireco. “¡Imboetepri catu Artemisa yande recua pendar tasecoi!” ehi pucu-pucu yuvireco. Ëgũe ehi ahe osapucaí ñuvirío hora rupi rutei yuvireco.

³⁵ Evocoiyase tecua pendar mbahe cuachiasar oicatuse ava monguiriri ãgua, aipo ehi chupe: “Peyapisaca mbia pe Efeso pendar, ndipoi ava ndoicuai vahe yande Artemisa tũparo rese yande hañecosa iyavei sahanga iva sui oviapi vahe rese avei hañecosa.

³⁶ Ndipoi niha ava, ‘Aní’ ehi vaheerã che remimombehu rese. Sese peyemonguiririño, peyapoi rene mbahe pe yapisacãhisave.

³⁷ Peruño tẽi eté co ñuvirío mbia cohove, ndoyapoi rumo mbahe tẽi Artemisa upe yuvireco. Nimondai mbahe rese itũparove, ndoviroiroi avei serer yuvireco.

³⁸ Sese Demetrio iyavei oporaviqui vahe supi ahe oñemoirose que ava upe, toyuviraso rane ava recocuer moingatusar upe yuvireco; aheve tomoingatu gũecocuer yuvireco.

³⁹ Pemoingatu potase que ambuae mbahe, peso ranera yemomborandusave imoingatu ãgua.

⁴⁰ Mborerrecuar revo oyandura yande rembiapo co pipe, ‘¿Mahera peaivu guasu tẽi? ¿Che amotarẽhimbave tie Ëgũe peye?’ ehi tiẽtera yandeu. Oporanduse yandeu, ndayaicatu chitiẽtera imboyevi ãgua iñehe chupe. Esepia niha, co yañemonuha yande remimbotar tẽi cohove” ehi chupe.

⁴¹ Aipo ihe pare, omomba aheve oñemonuhasa yuvireco.

20

Pablo guata agüer Macedonia, Grecia rupi

¹ Ava aivu guasu pare, Pablo, “Toyugüeru” ehi ava Jesús reroyasar upe. Ahese omboaracua ahe ava. Chupe, “Aviye” ohe pare, oso Macedonia ve.

² Oguatase Macedonia rupi, omonguerẽhi-rẽhi avei ambuae Jesucristo reroyasar yuvirecoi vahe tecua-tecua rupi. Ipare oyepota Grecia ve oso.

³ Aheve opita mbosapi yasi. Oso potase Siria ve carite pipe, judío ipihañemoñeta mara sereco ãgua rese yuvireco. Oyanduse, carite pipe oso rãgüer sui, oyeveí iri oso Macedonia ve ivi rupi.

⁴ Yuviraso moviro mbia supi, ipãhuve ñepeí Berea pendar; Pirro rahir Sópater; ñuvirío Tesalónica pendar; Aristarco, Segundo; ñepeí Derbe pendar, Gayo; ñuvirío Asia pendar; Tíquico, Trófimo. Timoteo oso avei supi.

⁵ Evocoi mbia yuviraso Pablo renondeve sãro ãgua Troas ve.

⁶ Pieta pan ndayapepoi vahe hu pare, orosẽ tecua Filipino sui carite pipe, cinco ari rupi oroyepota Troas ve. Ahe tecuave oropita siete ari rupi.

Pablo Troas ve secoci

⁷ Domingu pipe, ore oroñemonuha pan hu ãgua. Ahese Pablo oporombohe oico pĩtu mbiter rupi. Esepia, ahe osẽ pota ahere ayihive voi ichui.

⁸ Ahe oi ivate vahesave ñemonuhasa pipe setá tataendi.

⁹ Mbia chĩhivahe, Eutico serer vahe, metanave uguapi oĩ. Pablo rumo oñehe pucú iteanga. Evocoiyase ombopesii ahe chĩhivahe. Ipare oquẽ; aviyeteramo tẽi oviapi oi ivate vahe mbosapisa sui. Ahese ava ogüeyi sehõgüer rupi ivi sui yuvireco.

¹⁰ Evocoiyase Pablo ogüeyi ou chupe, oñeno oso sese icuhaguã. Ipare aipo ehi Jesús reroyasar upe:

—Pesiquiyei rene; nomanoi moco —ehi.

¹¹ Ipare oyeupi iri oso ombohi pan igua. Ichui oñehe pucu vite. Omomba cõhe senise; ipare oso cute.

¹² Evocoiyase co mbia chĩhivahe viroyevise secosave, opacatu oyemboviha guasu catu yuvireco. Esepia, nomanoi eté.

Pablo yuviraso Troas sui Mileto ve

¹³ Pablo oso pota ivi rupi, ore ranengatu rumo oroso carite pipe Aso ve. Aheve oroyepota Pablo reraso ãgua semimbotar rupi.

¹⁴ Oroyoepiase aheve, oha carite pipe ore piri. Ichui oroso cute Mitilene ve.

¹⁵ Ahere ayihive carite pipe oroñocua Quío oroso. Ambuae ari rese oroyepota Samos ve. Ichui oroso no oroyepota Mileto ve.

¹⁶ Pablo ipoyava. Esepia, oipota Jerusalén ve Pentecostés pieta pipe tupri güeco água. Sese Efeso oroñacuasaño oroso.

Pablo ñehesa Jesús reroyasar rãrosareta Efeso pendar upe

¹⁷ Mileto ve ore recose, Pablo omondo oñehe Efeso ve 'toyugüeru Jesús reroyasar rãrosar cheu' oya.

¹⁸ Oyepotase yuvireco chupe, aipo ehi: "Peicua niha che recocuer aviye ité yipisuive ari che reique ramosa resendar co Asia ve.

¹⁹ Ari yacatu rupi aporaviqui yande Yar upe pe pãhuve vichico che reco asiëhisave che yasehosa pipe. Yepe judío che mbogauí etepri che recoãhasave pe recuave yuvireco viña,

²⁰ che rumo ndaicutai ñehesa aviye vahe mombehuëhi pëu mbahe aviye água yepi. Che opombohe ava rehii rovaque, opombohe avei ñepeí-peí pe rëta rupi yepi" ehi.

²¹ "Amombehu ñehesa judío upe, ava ndahei vahe judío upe avei aipo ahe: 'Pemboasi pe angaipa; peyevi Tüpa upe, peroya avei yande Yar Jesús' ahe" ehi.

²² "Cüritei asora Jerusalén ve vichico. Aheve che so água Espiritu che cuai che piha pipe. '¿Mara ehira piha yuvireco peve cheu?' aipo ahe.

²³ Co güeraño che aicua: opacatu tecua che sosa rupi Espiritu Santo aipo ehi cheu che roquenda água iyavei che mombaraisu água yuvireco yepi" ehi.

²⁴ "Ndacherecatëhii rumo cheyese che mano água. Che rumo amboaviye potaño ité che poraviquisa Tüpa upe, ahe yande Yar Jesucristo che cuai vahe co ñehesa icatupri vahe mombehu água. Co Tüpa oporoaisusa pipe ombou ñepeí vahe Guahir ava písiro água" ehi.

²⁵ "Opa niha Tüpa mborerecuasa amombehu pëu. Che rumo aicua ndache repia iri chira peye.

²⁶ Sese tapeicua cüritei: ndayavii eté che cuaita mboaviye água co tecocuer aviye vahe mombehu pipe pëu.

²⁷ Esepia, ndaicuacui eté Tüpa Ñehengagüer mombehu; che rumo amombehuño ité opacatu Tüpa recocuer pëu.

²⁸ Sese peñearo tupri, pesãro avei opacatu Jesús reroyasar Espiritu Santo porocuita rupi. Inungar ovesa rãrosar, ëgüe peye tuprira sãro. Ahe Tüpa remimboepi yuvirecoi. Esepia, Jesús oipiyere vuvi opacatu ava angaipa repirã.

²⁹ Aicua che opoeyare, oyugüerura ambuae ava mahembiar oñaro ai vahe nungar pe pãhuve opacatu Jesús reroyasar mocañipa pota água.

³⁰ Oime aveira que ava pe pãhu pendar pe mbopa pota aveira yuvireco pe reraso água oyeupi.

³¹ Sese pemahemoha tupri peyese. Pemahenduha acoi opomboaracua tuprise mbosapi araviter rupi, piü, ari yacatu rupi avei che yasehosa pipe pe rereco" ehi.

³² "Sese, che rivireta, opoeyara Tüpa povriye iyavei ñehesa iporovasasa resendar pipe. Ahe pe moviracua catura pe rereco iyavei omboura opacatu mbahe güemimombehu pëu opacatu ambuae güembiporavo reseve.

³³ Ndahei pe guarepochi, que oro iyavei pe turucuar pota raisa pipe aso pe pãhuve.

³⁴ Peicua niha acoi che po pipe ité aporaviqui che recove água, che rupindar recove água avei.

³⁵ Ëgüe ahe amboyecua che recocuer pëu. Supi avei ëgüe peyera; yaporaviqui tupri iparaisu vahe rese hañeco água. Pepihañemoñeta acoi yande Yar Jesús remimombehu rese: 'Sorivete catu ava iporeroco vahe, mbahe oipisi vahe sui' ehi aracahe" ehi Efeso pendar Jesús reroyasar rãrosar upe.

³⁶ Oñehe pare, oñenopiha oyerure água opacatu omboripar reseve.

³⁷⁻³⁸ Ndoyembovihal eté, "Ndache repia iri chira peye" oyeupe ihese. Sese opacatu oyasehó iteanga yuvireco, oyaco-yaco, osovaupite-pite iri téi avei yuvireco saisupave. Ipare yuvirasoño ité yuvireco supi carite yemboyasave.

21

Pablo so agüer Jerusalén ve

¹ Evocoiyase oroseyase ore rivireta yuvireco, oromohivi voi oroso carite pipe Cos ve. Ahere ayihive oroyepota Rodas ve, ichui oroyepota Pátara ve oroso.

² Aheve orosepia carite oso vahe rã Fenicia ve, ahe ipipe oroha, oroso.

³ Orosasase para guasu oroso, orosepia caha pãhu guasu Chipre serer vahe. Ahe oroñocua yande mbahe rese pocoëhisa coti, oroso ivi Siria ve, para guasu rovai. Carite rumo seroyemboyasata tecua Tiro ve ipipendar mbahe reya água.

⁴ Aheve orosepia Jesús reroyasar yuvirecoi vahe. Ahese oropita siete ari ipiri. Yepe ahe Jesús reroyasar aipo ehi Pablo upe yuvireco: “Espíritu Santo oñehe oreu. Evocoiyase eresoi rene Jerusalén ve” ehi yuvireco chupe viña,

⁵ siete ari pare rumo, orosoño ité para guasu popive. Opacatu Jesús reroyasar yugüeru, güembireco, guahir reseve-seve ore rupi. Aheve oroñenopiñapa ore yerure ãgua.

⁶ “Aviye, toroso rane” ore he pare chupe yuvireco, oroha carite pipe. Ahe evocoiyase oyevi yuviraso güetave.

⁷ Tiro sui oroso Tolemaida ve. Oroyepotase, oroso Jesús reroyasar repia ãgua. Aheve oropita ñepe ari.

⁸ Ahere ayihive oroso Cesarea ve. Aheve oroique, oropita Felipe rëta ve, ahe oguata vahe Jesús recocuer mombehu. Ahe mbia iporavopri secoi aracaco ambuae seis yuvirecoi vahe pãhuve.

⁹ Evocoi Felipe vireco irungatu guayri ndomendai vahe. Tayri Tüpa ñehe mombehusar päve yuvirecoi.

¹⁰ Oropitase setá arimi ipiri, ahese oyepota Judea sui mbia Agabo serer vahe oreu. Ahe avei Tüpa ñehe mombehusar secoi.

¹¹ Ouse ore pãhuve, vïrocua Pablo rumbicuasa ichui. Ipipe oñapichi opi, opo avei. Ahese aipo ehi oreu:

—Espíritu Santo oicua uca cheu, na ehira judío Jerusalén pendar co tumbicuasa yar ãpichi yuvireco iyavei omondora ava ndahei vahe judío upe —ehi Agabo imombehu oreu.

¹² Orosenduse aipo ihe, ore, evocoi Cesarea pendar avei, oromombehu Pablo upe: “Eresoi rene Jerusalén ve” orohe tēi chupe.

¹³ Omboyevi rumo oreu:

—¡Mahera peyaseho che rese, ndache mbovihai peye! Che rumo ayemoingatu voi che ãpichi uca ãgua, che mano ãgua rese avei Jerusalén ve yande Yar Jesús recocuer rese —ehi oreu.

¹⁴ Ndoroicatuise ipihañemoñetasa rerova ãgua, oropoiño ichui aipo orohe:

—Tayaposa ayase yande Yar remimbotar —oroheño chupe.

¹⁵ Ipare cute oroyemoingatu ore so ãgua Jerusalén ve.

¹⁶ Ichui yuviraso avei moviro ore rupi Jesús reroyasar Cesarea pendar. Ahe ore reraso Chipre pendarer Mnasón rëtave. Ahe oremoingue oyepiri. Ahe yipive ité vïroya yande Yar oico.

Pablo ombori Santiago

¹⁷ Oroyepotase Jerusalén ve, ahe pendar Jesús reroyasar nihapisii ore pisi yuvireco.

¹⁸ Ahere ayihive Pablo, ore avei oroso Santiago repia. Aheve yuvirecove avei opacatu Jesús reroyasar rãrosar Jerusalén pendar.

¹⁹ Pablo, “Avirave” ehi opacatu oñemonuha vahe upe. Ipare omombehu tupri yipisuive oyeupe Tüpa mbahe oyapo uca vahe ava ndahei vahe judío pãhu rupi.

²⁰ Osenduse, omboetēi guasu Tüpa yuvireco. Omombehu Pablo upe yuvireco:

—Che mu, ereicua setá iteanga judío vïroya Jesús yuvireco. Ahe setacuer setá catu mil vahe sui cute. Opacatu evocoi ava iquerēhi vahe Moisés porocuaita arachendar mboaviye ãgua yuvireco —ehi—.

²¹ Osendu tēi nde rembiapo yuvireco. Omombehu tēi avei aipo nde he yande mu ambuae tecua rupindar yuvirecoi vahe upe: “ ‘Peseya Moisés porocuaita. Pembocircuncida iri rene pe rahir. Peico iri rene yande recocuer arachendar pipe’ aipo ehi tēi oico” ehi nde mombehu yuvireco —ehi Pablo upe yuvireco—.

²² ¿Mara yahera vo? Esepia, oyandura nde yepotasa cohava yuvireco.

²³ Aviye catu ereyapora ore porocuaita oromombehu vahe ndeu. Oime irungatu mbia ore pãhuve. Ahe mbia omboaviyera güemimombehu Tüpa upe yuvireco.

²⁴ Eraso co mbia ndeyeupi, eñemoatiro supi eso, emboepi avei mbahe Tüpa upe icuavēhepri. Ahese ahe mbia oicatura oñeapi yuvireco. Eremboaviyese evocoi mborocuaita, opacatu judío nde reroyara, oicuaara ava semira tēise mbahe nde rembiapo rese yuvireco. Oicua aveira, nde ereroya vite Moisés suindar mborocuaita —ehi yuvireco chupe—.

²⁵ Ndoroyocuai rumo ava Jesús reroyasar ndahei vahe judío evocoi nungar mbahe rese. Esepia, opa icuachiasa chupe: “Pehui rene mbahe mimba yucapri mbahe rahanga tēi upendar seropovēhepri, pehui rene mbahe ruvi, pehui rene mbahe mimba yucapri suvi renosepirēhi vahe iyavei peaguasai rene” orohe chupe —ehi yuvireco.

Judío oipisi Pablo tüparo guasu pipe yuvireco

²⁶ Evocoiyase Pablo viraso ahe irungatu mbia yuvirecoi vahe oyeupi. Ahere ayihive oyoya oñemoatiro yuvireco. Ipare yuviroique judío tüparo guasu pipe, omombehu yuvireco

pahi upe: “Oroñemoatiro ramo. Sese oroyevira siete ari pipe oromombase ore ñemoatirosa. Ahese oromondo pota ndeu porerecosa Tüpa porocuaíta rupi icuavêhepirã” ehi yuvireco pahi upe.

²⁷ Opa potase evocoi siete ari, judío Asia pendar osepia Pablo tūparo pipe yuvireco. Ahese omñemoiro uca opacatu ava rehii tūparo pendar. Ipare ipisise,

²⁸ sãse yuvireco: “¡Ore mu, ore pítivii peye co mbia oroipisi vahe rese! Esepia, oguata opacatu rupi. Oñehe tēi yande rese, Moisés porocuaíta rese, yande tūparo rese avei iyavei viroi que ava ndahei vahe judío yande tūparo pipe. Sese omonguiha tēi yande tūparo maranehi” ehi yuvireco chupe.

²⁹ Co rese aipo ehi. Esepia, cuese osepia Pablo viroguatase Tróximo oyeupi, ahe mbia Efeso pendar ndahei vahe judío. Sese ipihañemoñeta ‘Pablo viroguata ava ndahei vahe judío yande tūparo pipe’ oya yuvireco viña.

³⁰ Opacatu Jerusalén pendar ndasorii yuvireco. Cūríteimi ava yuvinoña guasu tūparove. Oipisi Pablo ombotiriri senose tūparo pipe sui yuvireco. Ahese omboya voi guaquícuei tūparo roquenda yuvireco.

³¹ Oyuca potase yuvireco, ahese yaivu rēracua oyepota sundao rerecuar guasu upe.

³² Cūríteimi serecuar viraso sundao, yuvinoña yaivu vahe upe yuviraso. Osepiase ava sundao rerecuar guasu, isundao avei yuvireco, ndoyuvirocua iri Pablo rese yuvireco.

³³ Ahese ahe sundao rerecuar guasu oyemboya oso Pablo rese, oipisi uca. Ipare oyocuai osundao, “Tapeicuhacua ñuvirío carena pipe” ehi. Evocoyase oporandu ava upe: “¿Ava vo co mbia? ¿Mbahe vo oyapo pēu?” ehi judío eta upe.

³⁴ Ahese amove ava ñepeí mbahe rese oñehe, ambuae, ambuae mbahe rese tēi yuvireco. Evocoyase sundao rerecuar ndoicatuí supi eté vahe mbahe rendu água yaivu guasu vahe pãhuve. Sese, “Peraso cuartelve” ehi.

³⁵ Viroyepotase yeupisave, ichuí osupi sundao oachihive seraso yuvireco ava rehii ñemoiró iteangasa sui.

³⁶ Ava rehii rumo yuvirasoño ité saquícuei, “¡Tomano!” ehi pucu-pucu yuvireco chupe.

Pablo oyoepi ava rehii rovaque

³⁷ Omoingue potase Pablo cuartel pipe yuvireco, aipo ehi sundao rerecuar guasu upe:

—¿Iyacatu vo yañemoñeta raimi? —ehi.

Evocoyase, omboyeví mborerecuar chupe:

—¿Ereicua vo griego ñehe? —ehi—.

³⁸ ¿Ndahei vo nde Egipto pendar, vavasa oyapo vahecuer ereico? Nde revo acoi ereraso oporoyuca vahe pãve cuatro mil tupri ivi iporupirêhisa rupi —ehi sundao rerecuar chupe.

³⁹ Evocoyase,

—Che judío, tecua Tarso pendar aico. Ahe tecua Cilicia pípendar imboeteipri vahe secói. Eypomí mbahe icatupri vahe cheu, tañehemi rane catu ava upe —ehi.

⁴⁰ Evocoyase mborerecuar, “Aviye” ehi chupe. Ipare opũha yeupisa harive, omopuha opo ava eta monguiriri água. Ahese oyapisaca tupri ava rehii yuvireco. Ahe ava upe oñehe hebreo ñehe pipe aipo ehi:

22

¹ “Che mu eta, peyapisaca, che añehemira che yoepi água pēu cūrítei” ehi.

² Oñehe hebreo ñehe pipe. Sese osenduse, oyapisaca tupri catu yuvireco.

³ “Che judío aico. Aha Cilicia ivi pipe Tarso ve. Cohave rumo acuaqua, Jerusalén pipe, Gamaliel che mbohe oyerquisave. Aheve ayembohe tupri yande ramoí porocuaíta rese. Ahe che mbohessa pipe avei ayembohe Tüpa mboetei água rese vichico inungar pe peico cūrítei.

⁴ Che yipindar aseca-seca catu ava co Tecocuer Piasu rupi oguata vahe yamotarêhisave. Supitísave, añapichi-pichi yuvireco yepi, asoquenda-quenda cuimbahe, cuña avei. Ayuca uca pota rai ahe ava yuvireco.

⁵ Pahi rerecuar ivate catu vahe iyavei opacatu tecua pendar rerecuar oicua che reco yuvireco. Ichui niha aipisi cuachiar aru vahe rã yande mu tūparo rerecuar Damasco pendar upe, ‘Taso Damasco ve pahi rerecuar rer pipe ava Jesús reroyasar pisi água. Ichui tarupa cohava imombaraisu água’ ahe viña.

Pablo omombehu oñecuñaro agüer

⁶ “Evocoyase aso Damasco ve. Ahe ipiar rupi arovisé vicho mbiter ari rupi, aviýeteramo tēi osesape guasu iva sui oreu.

⁷ Ahese aviapi ivive. Asendu avei ñehesa: ‘Saulo, Saulo, ¿mahera vo che amotarêhi etepri eve?’ ehi vahe cheu.

⁸ Ahese aporandu: ‘¿Ava vo nde ereico, Mbia?’ ahe chupe. ‘Che Jesús, Nazaret pendar aico. Che niha che amotarêhi etepri che rereco eve’ ehi cheu.

⁹ Che rupindar osepia sendigüer, osiquiye avei yuvireco ichui. Ndosendui rumo ñehesa cheundar yuvireco.

¹⁰ Aipo ahe chupe no: ‘¿Che Yar, mara ahera vo vichico?’ Ahese ahe aipo ehi cheu: ‘Epüha, eso Damasco ve. Aheve ava opara omombehu mbahe nde rembiaporã’ ehi cheu.

¹¹ Sendí iteanga vahe, ndache mboesapisoise, ahese che rupindar che po pisi che reraso Damasco ve yuvireco” ehi.

¹² “Aheve mbia, Ananías serer vahe, ou cheu. Ahe Tüpa mboyeroyasar ité, viroya tupri vahe avei iporocuaita; sese opacatu judío secua pendar: ‘Co mbia aviye vahe ité’ ehi yuvireco chupe.

¹³ Oyepotase, aipo ehi: ‘Che rivri, Saulo, esareco iri’ ehi. Aheseve iporêhi iri mbahe cheu.

¹⁴ Ipare aipo ehi: ‘Yande ramoí rembieroya, yande Ru Tüpa, nde poravo güemimbotar cua ägua. Oipota avei eresepia vaherã ichuindar ava seco ñvi vahe, eresendu aveira ññehé’ ehi.

¹⁵ ‘Nde evocoiyase eremombehura secocuer opacatu ava upe; eremombehura nde rembiepia, eresendu vahe avei’ ehi cheu.

¹⁶ ‘Evocoiyase, cüritei ndiya iri eresãro’ ehi. ‘Epüha, toroãpiramo. Eporandu yande Yar upe nde reco moatiro ägua nde angaipa sui’ ehi Ananías cheu.

“Tüpa che mondo ava ndahei vahe judío upe” ehi Pablo

¹⁷ “Coiye catu, avevi irise Jerusalén ve, ayerure tüparo guasu pipe. Ahese che quer nungarve asepia mbahe.

¹⁸ Asepia yande Yar. Ahe aipo ehi cheu: ‘Nde poyava, eso voi Jerusalén sui. Esepia, Jerusalén pendar ndoyapisaca potai chira eremombehuse ñehesa che resendar’ ehi Jesús cheu.

¹⁹ Che aipo ahe chupe: ‘Che Yar, opacatu che cua nde reroyasar roquenda-quendase, ainupa-nupa ucase avei aguatase judío tüparo yacatu rupi’ ahe.

²⁰ Aipo ahe avei chupe: ‘Oyucase Esteban yuvireco, ahe nde recocuer mombehusar, che ahese asepia. Chepihañemoñeta rupi aviyeño oyucase yuvireco. Sese asãro yucasar yeaoa vihã’ ahe chupe.

²¹ Che Yar rumo omboyevi cheu: ‘Eso, oromondora coi rupi ava ndahei vahe judío pähuve’ ehi che Yar cheu” ehi Pablo ava rehii upe.

Pablo sundao rerecuar guasu povrive secoi

²² Aipo rupi osendu ññehé yuvireco. Ahese rumo osapucái pñrata yuvireco chupe: “¡Tomano co mbial! ¡Toicove vite iri eme co ñvi pipe!” ehi yuvireco chupe.

²³ Osapuca-pucaí, osequiipa oyeaosa oñemoirombave yuvireco iyavei omombo-mombo ñvi cuhi ñvate coti yuvireco yamotarêhimbave.

²⁴ Ahese sundao rerecuar guasu omoingue uca cuartelve, aipo ehi osundao upe: “Peinupa, ahese revo omombehura mbahe sui vo sãse ati yamotarêhimbave ava yuvireco chupe” ehi osundao upe.

²⁵ Oñapichise rumo inupa ägua yuvireco, Pablo omombehu ññepi sundao rerecuar upe: —Yepe che judío, che rumo romano avei aico. ¿Iyacatu pñha peinupara romano chupe mbahe rese poranduññehiseve? —ehi mborerecuar upe.

²⁶ Osenduse ññehé, oso voi omombehu güerecuar upe.

—Eicua catu, aipo mbia romano secoi —ehi.

²⁷ Evocoiyase sundao rerecuar guasu ou chupe:

—¿Supi eté vo aipo nde romano ereico? —ehi.

—Taa, ahe ité niha aico —ehi.

²⁸ Ahese sundao rerecuar guasu aipo ehi chupe:

—Che rumo setá guarepochi amondo romano che reco ägua —ehi.

—Che rumo che ha ramo suive, romano aico —ehiñño sundao rerecuar upe.

²⁹ Ahese oinupa pota vahe osiquiyepave oyepipi yuvireco ichui; sundao rerecuar guasu avei oicuase Pablo romano secosa rese, osiquiye ñapichi ucase.

Pablo oyoepi judío porandusa ñvate catu vahesave

³⁰ Ahere ayihive sundao rerecuar guasu oicua tupri pota: ¿Mbahe sui pñha judío oyamotarêhi Pablo yuvireco? Evocoiyase oyora. Ahese oyocuai porandusa pendar ñvate catu vahe ahe opacatu judío pahi rerecuar, opacatu ambuae judío rerecuar ññemonuha ägua yuvireco. Ahese oviraso uca Pablo yuvireco chupe.

23

¹ Aheve Pablo omahengatu ava oññemonuha vahe rese ohã aipo ehi chupe:

—Che mu, che rembiapo mbahe tupri Tūpa rovaque areco yepi che pīñañemoñeta tuprisa pipe —ehi.

² Ahese Ananías, ahe pahi rerecuar ivate catu vahe, yipi pendar uve, “Peiyurupete” ehi.

³ Ahese Pablo nomboyevi chupe:

—jTūpa nde nupara, nde aviye tupri tēi angahu vahe ereico! Nde mbahe rese porandu āgua cheu porocuita rupi erei. Evocoiyase, ¿mahera ereporocuai che yurupete āgua mborocuita mboyeroyaēhisa pipe? —ehi chupe.

⁴ Yivirindar aipo ehi yuvireco chupe:

—jEreñehe rai rutei seroñrosa pipe co Tūpa rembiporavo, co yande pahi rerecuar ivate catu vahe upe! —ehi yuvireco.

⁵ Ahese omboyevi chupe:

—Che mu, ndaicuai co oñehe vahe pahi rerecuar ivate catu vahe secose. Esepia, icuachiapri pipe aipo ehi yandeu: ‘Peñehe rai eme pe rerecuar upe’ ehi —ehi.

⁶ Ahese oicuase oñemonuha vahe pāhuve amove oime saduceo, amove fariseo. Ahese oñehe pīrata chupe:

—Che mu, che fariseo aico iyavei fariseo che yesupa yuvirecoi. Oroviroya avei ava ocuerayevi vaherā curi. Sese revo co imboasipave oporandu mbahe rese yuvireco cheu —ehi.

⁷ Aipo he ramoseve voi, fariseo, saduceo oñeñehopepi-epi yuvireco. Sese oyemboyaho yuvireco.

⁸ Esepia, saduceo ndoviroyai vahe cuerayevisa iyavei “ndipoi Tūpa rembiguai, que espíritu” ehi vahe yuvireco. Fariseo rumo viroyaño ité opacatu aipo mbahe yuvireco.

⁹ Sese sāse guasu yuvireco. Ahese oime amove opūha vahe Moisés porocuita rese oporombohe vahe fariseo Pablo repisave yuvireco aipo ehi:

—Co mbia ndoyapoi eté mbahe tēi. Aviyeteramo espíritu que Tūpa rembiguai revo oyemboyecua mbahe mombehu āgua chupe —ehi yuvireco.

¹⁰ Yaivu guasu catu-catu irise yuvireco, ahese sundao rerecuar guasu aipo ehi: “Aviyeteramo ombohi-mbohira Pablo yuvireco” ehi. Ahese oyocuai osundao, “Penose ava pāhu sui, pemoingue iri cuartel pipe” ehi.

¹¹ Ahe pītu pipe, yande Yar oyemboyecua chupe aipo ehi: “Eyemonguerēhi catu, Pablo, inungar che mombehu nde siquiyēhisa pipe cohava Jerusalén ve, ēgüe ere aveira che mombehu Roma ve” ehi.

Omboguai Pablo yuca āgua yuvireco

¹² Ahere ayihive setá judío oñemonuha, omboguai Pablo yuca āgua yuvireco: “Tūpa rovaque ndayayucase Pablo, ndayacarui chira, ndayaihui chiaveira; yayucase voi, yacarura, yaihura” ehi yuvireco.

¹³ Ahe ava aipo ehi vahe retacuer setá catu cuarenta sui.

¹⁴ Ichui yuviraso pahi rerecuar upe, tecua pendar rerecuar upe avei aipo ehi:

—Oromboguai Tūpa rovaque Pablo; ndorocarui chira ndoroyucase —ehi yuvireco chupe—.

¹⁵ Sese pe, ambuae porandusa ivate catu vahe pendar avei peporandu ahe sundao rerecuar guasu upe aipo peyera imombehu chupe: “Ayihive emose uca irimi Pablo oreu; oroicua uca pota iri mbahe sembiapo chupe” peyera —ehi yuvireco—. Osēse, oroquētirora sese. Oyepotase ou, oroyucara —ehi yuvireco.

¹⁶ Pablo rihir rumo oyanduse sēracua, oso cuartelve chupe imombehu.

¹⁷ Ahese Pablo oñehe sundao rerecuar upe aipo ehi imombehu chupe:

—Erasomi tēi co mbia chīhivahe sundao rerecuar guasu upe. Omombehu pota mbahe chupe —ehi.

¹⁸ Evocoiyase mborerecuar viraso ahe chīhivahe güerecuar upe aipo ehi:

—Pablo soquendapri oñehe cheu aipo ehi: “Eraso co mbia chīhivahe sundao rerecuar guasu upe” ehi. Co chīhivahe omombehu pota mbahe ndeu —ehi.

¹⁹ Ahese mborerecuar guasu oipisi ipo rese, viroyepipi ambuae sui, oporandu chupe:

—¿Mbahe vo eremombehu pota cheu? —ehi.

²⁰ Evocoiyase ahe aipo ehi:

—Judío rerecuar oyemboyoya yuvireco. Oporandu angahu tēira Pablo rese seraso iri āgua ñemonuhasa ivate catu vahesave ayihive yuvireco. “Oporandu pota iri Pablo upe sembiapo rese” aipo ehi tēira yuvireco ndeu —ehi—.

²¹ Ndereroyai chira ahe iporandusa yuvireco. Esepia, cuarenta sui setá catu ava oquētiro vaherā yuvireco sese. Omboguai eté yuca āgua yuvireco. Ndocarui, ndoihui chira aipo ndoyucase yuvireco. Cūritei oyemoingatu, osāro viteño nde porocuita yuvireco —ehi mbia chīhivahe chupe.

²² Ipape sundao rerecuar guasu omboyeve i mondo, aipo ehi chupe: “Eremombehu rene ambuae ava upe eremombehu vahe cheu” ehi.

Pablo imondosa mborerecuar guasu Félix rovai

²³ Sundao rerecuar guasu ñuvirio opovri pendar sundao rerecuar upe aipo ehi yocuai: “Pemoingatu dosciento sundao Cesarea ve yuviraso vahe rã opi rese, ambuae setenta sundao cavayu harive iyavei doscientos tupri toguata lanza resendar yuvireco. Ipape pesopara pītuse las nueve pipe” ehi.

²⁴ “Pemoingatu uca avei cavayu Pablo yeupi ãgua. Ēgüe peye pesãro tuprira seraso yande rerecuar Félix upe” ehi.

²⁵ Evocoyase sundao rerecuar guasu oicuachía Félix upe imondo. Aipo ehi chupe:

²⁶ “Imboeteipri ore rerecuar Félix. Che, Claudio Lisias, amondo che mahenduhasa ndeu.

²⁷ Iyavei co amombehu pota ndeu: judío oipisi co mbia yuvireco yuca ãgua viña. Che rumo aicua romano seco rese, ahese araso sundao sepi ãgua judío eta sui

²⁸ “¿mbahe rese pīha ndoyambotai yuvireco?” viya. Sese araso judío porandusa ivate catu vahe pendar upe ñemonuhase yuvireco.

²⁹ Ahese aicua yamotarēhisa judío porocuita sui tēi iyavei ndoyapoi mbahe tēi oreu. Sese ndiyai yuca ãgua oreu, soquenda ãgua avei.

³⁰ Ayanduse rumo judío oquētiro sese yuvireco, amondo voi evocoi mbia ndeu. Ipape amombehu yamotarēhisar upe: ‘Peporandu potase Pablo recocuer rese, pesora Félix rovai’ ahe chupe yuvireco. Aipo rupive” ehi.

³¹ Evocoyase ahe pītu pipe sundao viroguata Pablo ocuita rupi yuvireco, viraso Antipatris ve yuvireco.

³² Ahere ayihive sundao yuviraso vahe opi rese oyeve yugüeru cuartelve. Sundao cavayu ari pendar güeraño rumo yuvirasoño vite.

³³ Viroyepotase Cesarea ve, omondo cuachiar mborerecuar guasu upe yuvireco. Ahese avei Pablo omondo yuvireco chupe.

³⁴ Oyeroqui pare mborerecuar cuachiar rese, oporandu Pablo upe: “¿Que pendar vo nde ereico?” ehi. “Che Cilicia cotindar aico” ehi.

³⁵ —Oyepotase nde amotarēhisar yuvireco, asendura nde yoepisa —ehi Félix chupe.

Evocoyase oyocuai opītiviisar Pablo rãro ãgua güetave Herodes rembiapogüer pipe.

24

Pablo oyoepi mborerecuar Félix rovai

¹ Cinco ari pare, Ananías, ahe pahi rerecuar ivate catu vahe, tecua pipendar rerecuar avei yugüeru Cesarea ve. Ou avei mbia ava mbahe aposar pītiviisar oñehe vahe rã Pablo amotarēhi uca ãgua, ahe serer Tértulo. Ahe yugüeru Pablo recocuer mombehu ãgua mborerecuar Félix upe.

² Evocoyase Félix güeru uca Pablo. Ahese Tértulo omboipi sese oñehe aipo ehi Félix upe:

—Nde imboyeroyapri ereico. Aviye ndeu nde porocuai tuprisa rese. Esepia, ndipoi vavasa ore recua rupi. Ereyapo uca avei ore recua pipe mbahe iporañete vahe nde poroaisusa pipe.

³ Opacatu rupi nde ereyapo tupri vahe oroipisi. Sese, “Aviye ndeu” orohe ndeu, imboyeroyapri Félix.

⁴ Ndorombota pucu potai rumo che ñehe pipe. Sese eyapisaca raimi tēi catu che ñehe rese —ehi—.

⁵ Oroyandu co mbia ava mañeco tēisar oguata opacatu ivi rupi. Ore judío, ore mboyaho ore yeamotarēhi uca ãgua, ahe Jesús, Nazaret pendar, reroysar rerecuar —ehi—.

⁶ Viroique avei ava ndahe vahe judío ore tūparo pipe. Ēgüe ehi ore tūparo momara. Sese co oroipisi —ehi—.

⁷ Evocoi sundao rerecuar guasu Lisias rumo oyepota ore pãhuve. Ahe opīratasa pipe vinose ore po sui,

⁸ aipo ehiño oreu: “Peso, tapemombehu co mbahe sembiapo Félix upe” ehi. Nde avei ereporandura sembiapo rese mbahe sui eté vo Ēgüe orohe chupe —ehi Tértulo.

⁹ Aipo ehi tupri avei ambuae judío yugüeru vahe yuvireco supi.

¹⁰ Ipape Félix oyaiti Pablo upe ‘toñehe’ oyapave. Ahese oñehe:

—Aicua nde ereporocuai setá araviter ore recua rupi. Sese ayoepira nde rovaque che rorivetesa pipe —ehi Félix upe—.

¹¹ Nde ereicua tupri potase, ereporandura supi eté co pipe doce ari ramo opa che yepotare Jerusalén ve Tūpa mboetei ãgua.

¹² Co judío oicua yuvireco nañehengatai ava upe tūparo guasu pipe, namboaiyu ucai avei ava ambuae judío ñemonuhasa rupi iyavei que ambuae ava Jerusalén pendar —ehi—.

¹³ Co mbia ndoicatui eté mbahe che rembiavi mombehu seroya tupri água yuvireco ndeu.

¹⁴ Co rumo amombehu vahe ndeu: che amboetei Tüpa, ore ramoi rembieroya Tecocuer Piasu pihañemoñetasa rupi. Co judío upe rumo: “Co porombohesa co coti tēi vahe” ehi. Che rumo aroya ité opacatu icuachiapri porocuaita pīpendar iyavei Tüpa ñehe mombehusar rembiacuachiagüer avei —ehi—.

¹⁵ Inungar co mbia, ěgüe ahe tupri avei aicua Tüpa ombogüerayevira ava omano vahecuer seco aviye vahe, ndaseco pōrai vahe avei coiye.

¹⁶ Sese ayemoviracua tupri che pihañemoñetasa rereco tupri catu água yepi Tüpa rovaque, ava rovaque avei.

¹⁷ “Setá araviter pare ayevi che recua Jerusalén ve ava iparaisu vahe upe porerecosa mondo água. Ahese avei mbahe mimba ayuca uca Tüpa upe seropovēhe água.

¹⁸⁻¹⁹ Evocoyase moviro judío Asia pendar che repia yuvireco Jerusalén ve tüparo pīpe judío porocuaita rupi che ñemoatiro pare. Ndipoi ahese ava rehii che rupi, namboavü guasu ucai avei ava. Ahe che repia vahe rumo iya yugüeru ndeu che mombehu, que virecose che amotarēhisa yuvireco viña.

²⁰ Anise, aviyeteramo co oyepota vahe cohava yugüeru, omombehura ndeu que mbahe che rembiavi yuvireco pahī rerecuar guasu ñemonuhasave che reiquesendar” ehi.

²¹ “Co rese revo oñemoiro yuvireco cheu aipo ahe pīratase ipāhuve: ‘Che aroya ava ocuerayevira coiye. Sese che reraso pe rovai co pīpe che recoāha água yuvireco’ ahese” ehi Félix upe.

²² Félix oicua tupri co Tecocuer Piasu. Sese osendu pare aipo ñehesa, ndoyapo pota vitei mbahe, aipo ehiño ava upe:

—Oyepotase Lisias, ahe sundao rerecuar guasu, ahese voi aicua tupri catura aipo mbahe semiapio —ehi Félix ava upe.

²³ Evocoyase oyocuai sundao rerecuar Pablo rāro água: “Eremondomira rumo que mbahe semibotar apo água chupe iyavei imboripar yugüeruse, tihañecoño yuvireco sese. Ęgüe ere sāro” ehi Félix sārosar upe.

²⁴ Moviro ari pare Félix viroyepota güembireco Drusila, ahe judía avei. Ahese Félix güeru uca Pablo, osendu pota iñehe Jesucristo reroyasa resendar yuvireco.

²⁵ Pablo rumo omombehuse chupe teco ívisa resendar, teco ñearosa resendar avei iyavei aipo ehise: “Tüpa oporandura mbahe yande rembiapogüer rese yandeu ari cañise coiye” ehise, ahese Félix osiquiyepave aipo ehi Pablo upe:

—Esoño rane. Arecose ari nde ñehe rendu iri água, orogüeru uca irira —ehiño.

²⁶ Félix ipihañemoñeta yepi ‘Pablo revo omboura guarepochi cheu osē água’ oya viña. Sese osāro pucu tēi. Iyavei setá oyupagüer güeru uca oyeupe oñemoñeta água sese.

²⁷ Nuvirío araviter pare rumo, Porcio Festo oique Félix recuñara. Ahese Félix judío mboviha água, oseyá Pablo soquendasave.

25

Festo rovai Pablo imondosa

¹ Mbosapi ari oyepotare Festo osē Cesarea sui, oso Jerusalén ve.

² Aheve oyepotase, pahī rerecuareta, judío rerecuareta avei omombehu Pablo recocuer yuvireco chupe.

³ Ipare oporandu chupe: “Emboumi uca Pablo cohava oreu” ehi yuvireco ‘yayuca perī rupive’ oyapave yuvireco viña.

⁴ Festo rumo aipo ehi chupe: “Aní. Esepia, Pablo Cesarea ve soquendasa oico iyavei che ayevi piaivira vicho aheve” ehi.

⁵ —Sese pemondo pe rerecuar che rupi. Naporaise co mbia rembiapio, aheve tomombehu yuvireco cheu semiapocuerai sereco mara água —ehi Festo chupe.

⁶ Evocoyase Festo opita Jerusalén ve ocho ari rupi revo, anise diez ari. Ipare oyevi oso Cesarea ve. Ahere ayihive oguapí güendave ava reco moingatu água oī. Ahese oyocuai Pablo reru água.

⁷ Oyepotase Pablo oso, ahese judío yugüeru vahe Festo rupi, oyemboya yuvireco sese. Ahese omombehu-mbehu tēi Festo upe Pablo rembiapio yuvireco, ndoicatui eté rumo seroya uca água yuvireco.

⁸ Esepia, Pablo aipo ehi oyoepisave:

—Ndayemboangaipai judío porocuaita rese, judío tüparo rese, yande rerecuar guasu Roma pendar Cesar rese avei —ehi.

⁹ Festo rumo omboviha pota judío, sese oporandu Pablo upe:

—¿Ndequerēhi vo Jerusalén ve erso vaherā? Aheve co mbahe nde rembiapio rese aporandura ndeu —ehi chupe.

¹⁰ Ahe rumo omboyeveⁱ chupe:

—Cūritei aico cohava romano mborerecuar guasu porandusa rovai. Aheve ité iyacatu che rembiapo rese porandusara cheu. Nde niha ereicua ndipoi eté mbahe tēi ayapo judío amotarēhisave —ehi—.

¹¹ Ayapose que mbahe naporai vahe, aviyeño che yuca uca āgua eve; ndayapoise rumo co judío omombehu vahe yuvireco ndeu, ndiyai che mondo āgua evocoi ava povrive eve. Che rumo aso pota mborerecuar Cesar ivate catu vahe upe cheu mbahe rese porandu āgua —ehi—.

¹² Ahese Festo oñemoñeta opĩtiviisar oporomboaracua vahe rese, ipare omombehu Pablo upe:

—Ereso pota Cesar upe. Aviye, eresora evocoyase —ehi chupe.

Pablo mborerecuar Agripa rovai

¹³ Evocoyase moviro ari pare, evocoi mborerecuar guasu Agripa, cuña Berenice rese, oyeputa Cesarea ve “avirave” apo āgua Festo upe yuvireco.

¹⁴ Opitase yuvireco setá ari Cesarea ve, Festo omombehu Agripa upe Pablo recocuer. Aipo ehi chupe:

—Oime ñepeⁱ mbia soquendapri oseya vahe Félix cheu —ehi—.

¹⁵ Asose Jerusalén ve, judío pahi rerecuareta, tecua pendar rerecuareta avei omombehu yuvireco cheu secocuerai, ‘Tayucasa, tehi chupe’ oya yuvireco viña —ehi—.

¹⁶ Ahese aipo ahe yuvireco chupe: “Ndiyai eté romano mborerecuar omondo vaherā que ava uve sese oñemoñeta vahe rese mbahe moingatuēhi renondeve. Toyoeⁱ rane omombehusar rovai, tomombehu tupri rane opacatu güecocuer” ahe judío upe —ehi—.

¹⁷ Sese yugüeruⁱ cohava yuvireco, aporandu voi pota secocuer rese chupe. Evocoyase ñepeⁱ ari pare aguapⁱ che rendave porandusave. Ahese ayocuai che pitiviisar evocoi mbia reru āgua —ehi—.

¹⁸ Evocoyase opūha sese oñemoñeta vahe sembiapo ai mombehu āgua. Asendu renondeve che piñañemoñeta: “Oyapo revo mbahe naporai vahe” ahe viña. Ndipoi eté rumo mbahe sembiapo —ehi—.

¹⁹ Mbahe sembieroya tēi omombehu yuvireco. “Evocoi Jesús omano” ehi ava yuvireco. Pablo rumo aipo ehi imombehu: “Jesús oicoveño ité” ehi.

²⁰ “¿Mara ahera piha co sembiapo moingatu?” ahe tēi. Sese aporandu chupe: “¿Ndequerēhi vo Jerusalén ve mbahe nde rembiapo rese porandu āgua ndeu?” ahe chupe —ehi—.

²¹ Pablo rumo oporandu cheu Cesar upe oso āgua. Oipota mborerecuar ivate catu vahe oyeupe mbahe güembiapo rese porandu āgua. Sese asoquenda ucaño vite sereco imondo āgua Cesar upe —ehi Agripa upe.

²² Evocoyase Agripa aipo ehi chupe:

—Asendu pota avei ahe mbia ñehe —ehi.

Ahe aipo ehi chupe:

—Ayihive voi teresendu —ehi.

²³ Ahere ayihive, Agripa oyeputa, Berenice rese yugüeru chupe inungar opivondi vahe, ēgüe ehi yuviroique mborerecuar ñemoñetasave sundao rerecuar iyavei opacatu tecua pipendar ava secó ivate catu vahe reseve. Ahese Festo oyocuai opĩtiviisar Pablo reru āgua yuvireco,

²⁴ aipo ehi:

—Ore rerecuar guasu Agripa iyavei opacatu ambuae yuviroique vahe, peyapisaca: pesepia co mbia. Co mbia rese judío eta oñehe tēi yuvireco Jerusalén ve iyavei cohava Cesarea ve. Osapucui pĩrata tēi yuvireco ‘itomano ité evocoi!’ oya yuvireco cheu —ehi—.

²⁵ Ndayosui rumo mbahe sembiapo yuca uca āgua iyavei oporandu oso āgua mborerecuar ivate catu vahe Cesar upe. Sese che ayemoingatu ité imondo āgua chupe.

²⁶ Ndarecoi rumo mbahe naporai vahe aicuachia vaherā imondo āgua chupe. Sese aru uca co mbia pe rovai —ehi ava upe—. Iyavei nde ore rerecuar guasu Agripa, ndeu ité aru uca. Nde chupe mbahe rese porandu pare, aviyeteramo oimera mbahe icuachiapirā sesendar Cesar upe nara —ehi—.

²⁷ Chepiñañemoñeta amondose co mbia chupe, naporai cheu ndipoise mbahe sembiapo ai —ehi Festo Agripa upe.

26

Pablo omombehu güecocuer Agripa rovai

¹ Evocoyase Agripa aipo ehi Pablo upe:

—Emombehuño nde yoepisa cheu —ehi.

Ahese Pablo omopuha opo oñehe āgua aipo ehi:

² “Ore rerecuar Agripa, ayoepira che rorivetesave judío che rese ñemoñeta-ñeta tēisa sui mbahe che rembiapoñhi rese nde rovai.

³ Esepia, ereicua tupri opacatu judío recocuer, ipihañemoñetasa avei. Sese eyapisacami nde reco mbegüesa pipe che ñehe rese” ehi.

Pablo omombehura güecocuer oñecuñaro viteñhisendar

⁴ “Opacatu judío che cua vahe yuvireco, oicua tupri che recocuer che chñhivahe suive che recuave iyavei Jerusalén ve aicose yuvireco.

⁵ Omombehu potase che recocuer yuvireco viña, aipo ehira: ‘Pablo viroya tupri ité fariseo porombohesa. Ahe icuapri catu yande recua rupi’ ehira yuvireco viña.

⁶ Sese cūrítei che reru nde rovai yuvireco che recocuer rese nde porandu ägua. Esepia, aroya Tüpa remimobehugüer ore ramoi uve omombehu vahe aracahe” ehi.

⁷ “Doce ore ramoi suindar opacatu judío yuvirecoi, osãro vite evocoi Tüpa remimobehugüer aviye vahe yuvireco. Sese yuviroique tūparove ari, pītu pipe avei Tüpa mboetei ägua yuvireco. Ore rerecuar Agripa, eyapisaca tupri che ñehe rese. Evocoi Tüpa remimobehugüer roroyasa sui judío eta semira-mira tēi che amotarēhisave che rese yuvireco” ehi.

⁸ “Iyavei opacatu pe, ¿mahera pe avei ndaperoyai Tüpa porombogüerayevisa?” ehi.

Pablo omombehu yipindar Jesús reroiyasar amotarēhi agüer

⁹ “Yipindar che avei che pihañemoñeta rai aracaco mbahe tēi apo ägua rese ava Jesús, Nazaret pendar, rer amotarēhisave.

¹⁰ Ëgüe ahe Jerusalén ve. Ombouse pahi rerecuar oporocuaite cheu, ahese serer pipe setá Jesús reroiyasar asoquenda; iyavei ambuae ava oyucase Jesús reroiyasar yuvireco, ‘Toyucaño yuvireco’ ahe voñño ité che” ehi.

¹¹ “Setá rupi amombaraisu Jesús reroiyasar ‘tamomboipa ava seroyasa sui yuvireco’ che hesa pipe tēi. Ëgüe ahe aguata opacatu tūparo rupi, ambuae tecua rupi avei yamotarēhis pipe” ehi.

Pablo omombehu güeco recuñaro agüer

¹² “Evocoiyase aso avei Damasco ve Jesús reroiyasar mombaraisu ägua, pahi rerecuar ombouse oporocuaite apo ägua cheu” ehi.

¹³ “Mbiter ari rupi rumo, aguata Damasco piar rupi, asepia mbahe sendí vahe íva sui. Ari sui osesape catu cheu, che rupindar upe avei.

¹⁴ Orovipipase ivive, asendu ñehesa aipo ehi vahe hebreo ñehe pipe cheu: ‘Saulo, Saulo, ¿mahera vo ereyapo mbahe-mbahe tēi cheu? Ereyapose evocoi mbahe tēi, nde ae ereyemombaraisu’ ehi cheu.

¹⁵ Evocoiyase amboyevi: ‘¿Ava vo nde ereico, mbia?’ ahe chupe. Omboyevi cheu: ‘Che Jesús aico, che niha co che amotarēhi eve.

¹⁶ Epüha, co rese ayemboyecua ndeu, tasecoi che rembiguai, che yapave. Tomombehu avei co mbahe osepia vahe iyavei tomombehu avei co mbahe amboyecua vakerä chupe curi, viya ndeu’ ehi.

¹⁷ ‘Oropisirora judío sui iyavei oromondora ava ndahei vahe judío upe. Ereguatase ipähuve, oropisiro aveira’ ehi cheu.

¹⁸ ‘Oromondora, tache cua yuvireco, che yapave iyavei toguata iri eme pītumimbi vahe nungar rupi; toguata catu tesapasa rupi yuvireco. Ipīpe sui toyuvireco iri eme carugar povrive yuvireco; toguata catu Tüpa rupi; egüe tehí che reroiya yuvireco. Ahese oipisira ñeroisa oangaipa rese yuvireco iyavei oipisira Tüpa porerecosa oime vakerä opacatu che rembipeha rupive’ ehi Jesús cheu” ehi Agripa upe.

Pablo viroya mbahe güembiepia

¹⁹ “Evocoiyase, che rerecuar Agripa, che quer nungarve asepia vahe íva pendar, aroya ité.

²⁰ Aipo ahe ava upe: ‘Pemboasi pe angaipa; peyevi Tüpa upe. Peicove tupri, ipīpe sui toicua ava yuvireco pe ñecuñarosa’ ahe. Aipo ahe Damasco pendar upe rane añehe, ipare Jerusalén pendar upe iyavei Judea rupindar upe, coiye catumi ava ndahei vahe judío upe.

²¹ Sese tēi judío che pisi tūparo pipe che yuca pota yuvireco” ehi.

²² “Tüpa che pītiviisa pipe rumo aicoveño ité supi, amombehu-mbehu vite Tüpa recocuer opacatu ava seco ívi coti catu vahe upe, seco ívate catu vahe upe avei. Namombehui eté que mbahe co coti tēi Tüpa ñehe mombehusar iyavei Moisés, ‘Oimera mbahe aviye vahe’ ihe agüer sui.

²³ Aracahe omombehu yuvireco: ‘Tüpa Rembiporavo Poropisirosar omano ranera’ ehi. Ahe rumo yipindar ocuerayevi vakerä omano vahe pāhu sui. Omombehu aveira tesapasa ñepisirosa resendar ore mu judío yuvirecoi vahe upe iyavei ava ndahei vahe judío upe avei” ehi Agripa upe.

Pablo osecuñaro pota tēi Agripa recocuer

²⁴ Aipo ehise Pablo oñehe oyoepisave, Festo oñehengataño chupe aipo ehi:

—¡Nande mboaracuai moco nde mbahecua vaisa! —ehiño chupe.

²⁵ Ahe rumo omboyevi chupe:

—Imboyeroyapri Festo, ¿mara ahe vo ndache aracuai? Amombehu rumo ndeu mbahe supi eté vahe, ndahei che aracuañhisave —ehi Festo upe—.

²⁶ Co mborerecuar revo oicua tupri avei che remimombehu. Sese ndasiquiyei opacatu co mbahe mombehu ñgua chupe. Esepia, opacatu co mbahe yaposa vahe ndahei ñomipri tēi.

²⁷ Ore rerecuar Agripa, ¿ereroa vo evocoi Tūpa ñehe mombehusar rembicuachía? Che aicua ereroa ité —ehi Agripa upe.

²⁸ Ahese Agripa omboyevi chupe:

—Moviro tēi ñehesa ipane cheu Jesús reroa ñgua —ehi chupe.

²⁹ Ahe omboyevi Agripa upe:

—Ipanese que moviro tēi, anise setá vite ñehesa ndeu iyavei opacatu osendu vahe che ñehe co pipe, ñgüe ehi tarahu Tūpa pēu viña che nungar pe reco ñgua. Ndahei chira rumo soquendapirã peico —ehi.

³⁰ Aipo ihe pare, mborerecuar guasu iyavei ambuae mborerecuar Berenice reseve iyavei opacatu sendusar opūha yuvireco.

³¹ Oyepepi pare, oñemoñeta co coti aipo ehi yuvireco:

—Evocoi mbia ndoyapoi eté mbahe. Sese ndiyai yucapirã; ndiyai avei soquendapirã viña —ehi yuvireco oyeupe.

³² Ahese Agripa aipo ehi:

—Ahe ndoporanduise Cesar upe oso ñgua rese, yamoseño itera niha viña —ehi Festo upe.

27

Pablo imondosa Roma ve

¹ Evocoyase mborerecuar opihañemoñeta omboyoya yuvireco ore mondo ñgua carite pipe Italia ve. Sese omondo Pablo iyavei ambuae ava soquendapri yuvireco mbia Julio serer vahe upe. Ahe mbia sundao rehi rerecuar secoi, ahe yuvirecoi vahe rer Mborerecuar upendar.

² Oroha carite pipe, ahe Adramitio sui yuviraso pota vahe Asia ve. Mbia Tesalónica pendar, Aristarco serer vahe, oha avei ore rupi, ahe secua Macedonia ivi rupi.

³ Ahere ayihive oroyepota yemboyasa Sidón serer vahesave, aheve Julio saisupave Pablo upe aipo ehi: “Eguata tupri nde mboripar rēta rupi nde rese ihañeco tupri ñgua yuvireco” ehi chupe.

⁴ Sidón sui orosirise, oroso Chipre ivi rupi ivitu sui ore ñemoha ñgua. Oroso pota tēi ari sosa coti rupi, ndoroicatui rumo. Esepia, oipeyu pīrata ivitu icoti sui.

⁵ Evocoyase oroguata para guasu pipe Cilicia, Panfilia ivi rupi. Ipare oroyepota tecua Mira yemboyasave, ahe Mira, Licia ivi pipe.

⁶ Aheve sundao rerecuar oyosu carite ou vahe Alejandría sui, oso vaherã Italia ve. Evocoyase ahe ipipe opa voi ore mboha.

⁷ Ichui oroguata mbegüe setá ari. Oroporaviquí iteanga oreypota ñgua Gnido rovai. Ivitu oipeyu pīrata vite. Sese oroyahuva Creta coti, oroñocua tecua Salmón rovai rupi. Ñgüe orohe oroso Creta cupe rupi.

⁸ Supi yavai rai ore guata ñgua, ipare oroyepota yemboyasa Yemboyasa Aviye vahe serer vahesave. Ahe ichui namombrii tecua Lasea.

⁹ Ore yepota ñgua aheve, setá ari oromocañi. Ahese ivitu naporai catu oreu cute. Esepia, viroví ari naporai catu vahe. Sese Pablo aipo ehi carite pipendar upe:

¹⁰ —Mbia, naporai iri chira revo yande guata vite ñgua. Yaguata vitese, yamocañira carite, ivosiita reseve, yande avei eté aviyeteramo yacañi tēira —ehi.

¹¹ Sundao rerecuar rumo nomboyeroyai iñehe, ahe omboyeroa catu carite reroguatasar, carite yar avei.

¹² Ahe yemboyasa naporai ivitu ai rãro ñgua aheve. Sese setá catu “yasoño” ehi vahe yuvireco, “Tayayepota catu Fenice ve, aheve tayasãro ivitu ai” ehi yuvireco viña. Ahe Fenice Creta ivirindar yemboyasa aviye vahe. Aheve carite yuviroique norte ique rupi iyavei irohi ique rupi avei yepi.

Ivitu ai para guasu pipe

¹³ Oipeyu mbegüemise ivitu irohi coti sui, ipihañemoñeta yuvireco, “Yaicatuño ité yande yepota ñgua” ehi yuvireco viña. Ahese orosirise ore yemboyasa sui, oroso Creta ivi rupi.

¹⁴ Coiyemi tēi rumo oyepota ivitu ai oreu Creta coti sui. Ahe ivitu ai ou norte ique coti sui.

¹⁵ Oyepotase oreu, ndoroicatu iri eté sovaĩchi. Evocoyase, “Tayande rerasoño” orohe chupe.

¹⁶ Oroñoocua caha pãhumi serer Cauda. Ahe oroñoocuasave oroviroha sãi ore caritemi ore carite guasu pipe.

¹⁷ Orosupire, ahe oicuhacua carite guasu inicha pipe yuvireco. Ipape ipihañemoñeta yuvireco ‘carite oyeupi tiëtera ivi cuhi Sirte serer vahe harive’ oya. Sese opa viroyi imombitasa yuvireco. Ahese ivitu ore rerogutaño.

¹⁸ Ivitu rumo ombohitú iteanga para guasu. Sese ahese ayihive oporaviqui vahe omboipi carite vosiita mombo yuvireco.

¹⁹ Imombosapisa ari pipe, omombo vite mbahe carite resendar yuvireco.

²⁰ Setá ari ndoyecuai ari, yasitata avei oreu. Ivitu ai ndopaiño ité avei. Opa ité ore pihañemoñeta mocañi, “Yacañi tēi etera para guasu pipe” orohe viña.

²¹ Setá ari ore caruēhi pare, Pablo opūha aipo ehi carite pipendar upe:

—Mbia, ehi acoi che reroya vaira peye viña, nayasēise Creta sui, ahese ndipoi chira co mbahe yandeu cūritei viña —ehi—.

²² Cūritei, peyemonguerēhi catuño. Esepia, ndipoi chira yande pãhu pendar omano vahe, carite güeraño rumo ocañi tēira.

²³ Ayihĩ pisa oyemoporēhi cheu Tūpa rembiguai semimbou, chupendar che aico, chupe avei aporaviqui.

²⁴ Ahe aipo ehi cheu: “Pablo, eresiquiyei rene. Ereyepotaño itera Cesar upe. Tūpa oipisiro aveira opacatu nde rupindar carite pipendar” ehi cheu.

²⁵ Mbia, ayeroya Tūpa rese. Esepia, ahe omboaviye itera oñehesa cheu. Sese peyemonguerēhiño —ehi—.

²⁶ Yande mohañira rumo imbehi coti caha pãhumi rese yande mondo —ehi.

²⁷ Ñuvirío semana ivitu ore reroguta pare ahe pĩtu mbiter pipe para guasu Adriático rupi oroicoese, carite pipe oporaviqui vahe ipihañemoñeta yuvireco ‘yarovi revo ivi yaico’ oya.

²⁸ Sese osãha para guasu ripigüer yuvireco. Ahe tipigüer treinta y seis metros tupri. Ipape osiri irimi yuvireco. Aheve osãha iri, tipigüer veintisiete metros tēi. Ahese oicua, “Yarovi ivi” ehi yuvireco.

²⁹ Ipihañemoñeta yuvireco: “Aviyeteramo yayepotara itave” ehi. Sese yuviraso carite rupitave. Aheve osiquiyepave omombo irungatu carite mombitasa tuvicha vahe ipive yuvireco. “¡Omocohe voi tarahu Tūpa yandeu viña!” orohe tēi.

³⁰ Oñemi potase oporaviqui vahe carite guasu sui yuvireco, viroyi caritemi mbahe-mohasa. Ombopa pota tēi ambuae carite pipendar yuvireco viña, “Oromombora carite renonendar imombitasa” ehi tupri tēi yuvireco.

³¹ Pablo rumo aipo ehi sundao rerecuar upe, sundao eta upe avei imombehu:

—Ndopitaise carite pipe yuvireco co oñemi pota vahe, pe ndapeñepisiroi chietera —ehi.

³² Ahese sundao eta oyasia caritemi sã oiti ive imondo yuvireco.

³³ Cōhe ramosē Pablo aipo ehi opacatu upe:

—Cūritei ñuvirío semana pemomba pecaruēhi peico ‘¿mara yahera pĩha co yaico?’ pe hesa pipe.

³⁴ Evocoyase pehuñomi mbahe cute pe ñepisiro ãgua. Acoi ocañise carite, yande rumo nayacañi chira iyavei que ñepepe pe ha nocañi chietera —ehi Pablo.

³⁵ Aipo ehi pare, oipisi pan, “Aviye ndeu” ehi Tūpa upe ihu ãgua. Ahe imbohi pare, ohu.

³⁶ Evocoyase opacatu ava oyemonguerēhi yuvireco ocaru ãgua.

³⁷ Ore retacuer doscientos setenta y seis tupri.

³⁸ Ore caru pare, oporaviqui vahe opa omombo trigo carite vosiita para guasu pipe iposiñēhi ãgua yuvireco.

Carite ocañi

³⁹ Cōhese, osepiase ivi, “¿Que pĩha yaico?” ehi tēi yuvireco. Oyosuse rumo yãcua vahe, ipipe oime ivi cuhi ipuru vahe. Aheve yuviroique pota tēi yuvireco viña.

⁴⁰ Oyasia ahe carite mombitasa cuasa carite sui yuvireco, omonguhi carite mboyahuvasa, osupi carite resendar turucuar imboguatasa yuvireco. Evocoyase oroique oroso yãcua vahe pipe.

⁴¹ Oroguatase rumo, oroyapi ivi cuhi. Aheve carite opãha ité sese. Ndoicatu eté seroyevi yuvireco iyavei carite rupita i ohitu vahe opa tupri oyoca.

⁴² Ahese sundao eta, “Aviyeteramo soquendapri ohita tiëtera, oñemi yuvireco. Sese yayucapa” ehi yuvireco chupe viña.

⁴³ Sundao rerecuar rumo ndoipotai Pablo mano ãgua, sese, “Teheni” ehi, “peyucai rene soquendapri” ehi. “Ohita oicua vahe rane toyuvirocui ive, toyuvinose ivi rese yuvireco” ehi.

⁴⁴ “Ambuae evocoyase ivirape, carite yecacuer rese toyasecoño yuvínose água ivi rese” ehi. Ēgüe orohē orosēpa ivi rese oroso.

28

Caha pāhu Malta ve Pablo secōi

¹ Ore ñepisiropare, ahese ramo orocua caha pāhu rer Malta revo rahe.

² Ahe pendar ava nihapisii ore repiase yuvireco. Oquí iteanga, sōhisa avei. Ahese oyatapi guasu yuvireco, “Perio, tapeyephehemi” ehi yuvireco oreu.

³ Evocoyase Pablo omonuha yepēha seru, omondo potase rumo tatave, ahese osē aviyeteramo tēi sacucuer sui mboi ahe eté vahe chupe, oipomama ichuhu.

⁴ Osepiase mboi ichuhuse ahe pendar yuvireco, ahese, “Co mbia revo oporapichi vahe ité. Yepe oñepisiro para guasu sui viña, Tūpa rumo oichuhu uca mboi upe ‘toman’ oya” ehi yuvireco viña.

⁵ Ahe rumo omomboño mboi tatave imondo oyesui. Ipare nomomaraño ité.

⁶ Ahe pendar opacatu osāro tēi yuvireco, “Irrurura chupe, ahese oviapira, omanora revo” ehi yuvireco chupe viña. Osāro pucu tēi yuvireco, Pablo rumo nimararaño ité. Ahese, “Ndahei vo co mbia tūpa ité co secōi” ehi tēi yuvireco chupe.

⁷ Evocoyase mbia Publio serer vahe, ahe opacatu caha pāhu Malta pendar ava rerecuar secōi. Ivi namombriimi ichui. Ahe nihapisii ore repia güētave iyavei ihañeco tupri ai ore rese mbosapi ari rupi.

⁸ Aheve ore recoseve Publio yesupa sohí iteanga ou, sepochiuvi avei. Evocoyase Pablo oique chupe. Ahese oyerōqui Tūpa upe sese, omondo opo iharive. Ēgüe ehi imbogüera.

⁹ Oyanduse ahe icuera yuvireco, ahese ambuae imbaheasi vahe evocoi caha pāhu pendar yugüeru chupe, ahe ombogüerapa avei.

¹⁰ Ahe pendar oyemboava etepri yuvireco oreu. Ipare ore ha água ambuae carite pipe, opacatu mbahe ore guatasa rupi ipaneēhi água ogüeru yuvireco oreu.

Pablo oyepota Roma ve

¹¹ Co carite mbosapi yasi osāro vahe ari mbahe tēi vahe pituhu água. Ipipe oroso. Ahe carite yugüeru Alejandría sui. Ahe ichī rese ñuvirio itūpa rahanga yuvireco: ñepei rer Cástor, ambuae evocoyase Pólux.

¹² Ahese oroso oroyepota yemboyasa Siracusa ve. Aheve oropita mbosapi ari.

¹³ Ichui orosē oroso oroyepota Regio ve. Ahere ayihive ivitu oipeyu irohi coti sui. Sese oroyepota Puteoli ve ambuae ari pipeve.

¹⁴ Aheve orosepia ambuae Jesús reroyasar. Ore mombita güētave yuvireco ñepei semana. Ipare oroso Roma ve ivi rupi.

¹⁵ Jesús reroyasar Roma pendar yipive ore andu yuvireco. Sese moviro yugüeru Foro de Apio ve, ambuae yugüeru Tres Tabernas ve ore rape penda água yuvireco. Sepiase, Pablo, “Aviye ndeu” ehi Tūpa upe.

¹⁶ Oroyepotase Roma ve, sundao rerecuar co coti omondo Pablo ñepei sundao upe sāro uca água.

Pablo omombehu Roma ve Tūpa Ñehengagüer

¹⁷ Mbosapi ari pare Pablo omonuha opacatu judío rerecuar Roma pendar. Ahese oñehe chupe:

—Che mu eta, ndayapoi mbahe tēi judío Jerusalén pendar upe, narañoi avei yande ramoi recocuer viña. Che roquendasa rumo iyavei imondopri aico Romano sundao rerecuar povrive.

¹⁸ Ahe mborerrecuar oporandu che recocuer rese yuvireco. Oicuase che recocuer, opoi pota tēi che sui yuvireco viña. Esepia, ndoyosui eté mbahe che rembiapo che yuca água yuvireco.

¹⁹ Evocoi judío rumo ndoipotaiño ité chupe. Ahese ayu pota cohove Cesar upe che yoepi água. Nayamotarēhi uca potai rumo che mu Jerusalén pendar Cesar upe —ehi—.

²⁰ Che yoepi água oposoho uca. Opomofeta pota yande remiario rese. Co Tūpa Rembiporavo ava piñero água resendar reroyasa rese carena pipe ñapichimbri aico —ehi—.

²¹ Ahese ahe ava omboyevi yuvireco chupe:

—Ndroipisii eté cuachiar Judea sui nde resendar. Iyavei yande mu oyepota vahe Judea sui nomombehui mbahe naporai vahe nde recocuer resendar yuvireco oreu —ehi—.

²² Opacatu rupi ava viñero pe rembieroya piasu yuvireco. Sese orosendu pota nde pihañemoñetasa —ehi yuvireco chupe.

²³ Oiporavo ari iñehe água yuvireco. Osupitise ari chupe, setá catu ava oñemonuha yuvireco secosave. Ahese omombehu Tūpa mborerrecuasa resendar iyavei Jesús recocuer

Moisés porocuaita icuachiapri pipe sui iyavei Tūpa ñehe mombehusar rembicuachía pipe avei 'toviroya yuvireco' oyapave. Ēgüe ehi imombehu ari momba.

²⁴ Amove osendu vahe viroya yuvireco, ambuae rumo ndoviroyai eté yuvireco.

²⁵ Opíhañemoñetasa nomboyoyaise yuvireco, yuvinosepa pota. Ahese aipo ehi ahe ava upe:

—Supi eté Isaías omombehu Espíritu remimombehu pe recocuer resendar pe ramoí upe aracahe aipo ehi:

²⁶ “Eso nde mu pãhuve.

Emombehu aipo ere:

‘Yepe pesendu tēira mbahe viña,
ndapesenducuai chira rumo.

Iyavei pesepia tēira mbahe viña,
ndapemahecuaí chira rumo sese’ ere chupe.

²⁷ Esepia, co ava ipiharátá iteanga seroyaēhisave.

Ndoymboapisaiño yuvireco.

Iyavei osapívii tupriño mbahe sui, ndosepia potai mbahe aviye vahe yuvireco.

Ndosenducua catuí eté avei ñehesa supi eté vahe.

Evocoyase ndoyevi potai cheu güecocuer moingatu yuvireco” ehi Espíritu Santo remimombehu chupe aracahe —ehi—.

²⁸ Sese tapeicua co pipe suive Tūpa omboyecua ucara oporopísirosa ava ndahei vahe judío upe. Ahe niha oyapisacara imombehusa rese yuvireco —ehi chupe.

²⁹ Aipo ihe pare, judío yuvinose iñehe rese oyeecopi-copi yuviraso.

³⁰ Ipare Pablo opíta ambuae ava rētave ñuvirío araviter rupi omboepi oque ãgua oico. Aheve nihapisii opacatu ava rese oyepiri oyepotase yepi.

³¹ Omombehu Tūpa mborerecuasa resendar iyavei oporombohe opacatu yande Yar Jesucristo recocuer resendar osiquiyeēhisa pipe. Ndipoí eté que ava omombituhu vahe Pablo ñehese.

PABLO REMBICUACHIA ROMA PNDAR UPE ROMANOS

Pablo mahenduhasa Roma pendar Jesús reroiyasar upe

¹ Che Pablo, Jesucristo rembiguai, aicuachía co che ñehes pëu. Tüpa che poravo apóstol che reco água ñehesa poropísirosa resendar mombehu água.

² Tüpa niha yipisuive omombehu uca co ñehesa ava oñehes mombehusar upe icuachiapri maranehi pipe aracahe.

³ Ahe ñehesa Tüpa Rahir Jesucristo resendar. Ahe ava güecosa pipe ité oyesu ou mborere-
ciar guasu David suindar sui;

⁴ ocuerayevise oespíritu maranehi pipe, ahese opíratasa pipe omboyecua tupri ité Tüpa Rahir güecosa. Ahe niha yande Yar Jesucristo.

⁵ Ahe ichui Tüpa ombou cheu oporopítiviisa apóstol che reco água, che cuai avei ava ndahei vahe judío upe Guahir recocuer mombehu água opacatu ivi rupi sese yeroya uca água 'ipipe sui toviroya che Rahir yuvireco' oya.

⁶⁻⁷ Pe Roma pendar peico vahe, pe avei senoipri ipáhuve peico Jesucristo rese peico vaherá. Pe niha Tüpa rembiaisu peico. Oipota avei pe reco catupri água oyeupe nara. Peipisi catu porovasasa, teco tupri yande Ru Tüpa suindar, yande Yar Jesucristo suindar avei.

Pablo oso pota Jesús reroiyasar repia Roma ve

⁸ Che yipindar yande Yar Jesucristo rer pipe, "Aviye ndeu" ahe Tüpa upe pe rese. Esepia, opacatu ivi rupi icuapri sese pe yeroyasa.

⁹ Iyavei Tüpa oicua pe rese ari rupi che yeroquisa. Chupe ité niha mbahe ayapo opacatu che piha pipe, amombehu Tahir resendar ñehesa aviye vahe vichico.

¹⁰ Aporanduño ité semimbotar rupi pe piri che so água rese chupe yepi.

¹¹ Esepia, che aso pota ité Espíritu suindar mbahecuasa mondo pëu pe pítivii água 'toyemoviracua tupri catu Cristo rese yuvireco' che yapave.

¹² Che aipota ité yande ñepeipei yañepítivii catu água Cristo rese yande yeroyasa yareco vahe pipe.

¹³ Che rivireta, che aipota peicua setá rupi che so pota tēisa pe piri yepi. Cūritei rumo ndaicutiño vite ité. Che rumo aipota, "Toime que che poraviquisa sui Cristo rese oyemoviracua catu vahe yuvireco ipáhuve" ahe pëu, inungar opacatu ambuae ivi rupi egüe ahe ava ndahei vahe judío upe vichico.

¹⁴ Che cuaita ité niha opacatu ava upe che ñehes água, tecua pipendar yuvirecoi vahe upe iyavei ndayaracua vitei vahe upe, imbahecu vahe upe, nimbahecua vahe upe avei no.

¹⁵ Sese pe Roma ve peico vahe upe avei ayemonguerēhi voi eté co ñehesa písirosa resendar mombehu água.

Ñehesa písirosa resendar píratasa

¹⁶ Che nachī eté co ñehesa písirosa resendar aviye vahe sui. Esepia, ahe Tüpa píratasa opacatu viroyasar písiro água, judío rane yipindar, ipare opacatu ambuae ava-ava tēi avei.

¹⁷ Supi eté co ñehesa omboyecua Tüpa ava reco mbocatupri. Oyese yande yeroyasa pipeño ité egüe ehi yandeu. Esepia, icuachiapri aracahendar aipo ehi: "Acoi ava seco catupri vahe Tüpa rese oyeroyasa pipe sui oicoveño itera apirēhi" ehi.

Opacatu ava rembiavi resendar

¹⁸ Supi eté niha yande Aposar oñemoirosa ipírata vahe ombou itera iva sui opacatu ava viroyasarēhi upe, ndaseco pōrai vahe upe avei, mbahe güembiao ai sui ndoicua uca potai vahe co ñehesa supi eté vahe ambuae ava upe yuvireco.

¹⁹ Ahe oicua tupri tēi mbahe Tüpa suindar yuvireco. Esepia, Tüpa ité niha omboyecua chupe.

²⁰ Egüe ehi eté Tüpa recocuer ndoyecuai vahe oyecua rumo mbahe sembiapo pipe. Supi eté yamahe mbahe sembiapocuer ivi apo ramo suive oime vahe rese. Sese yaicua ahe Tüpa ité secoi iyavei ipíratasa apirēhi vahe. Sese ava angai pa viyar ndiyai, "Eñemosño tēi rane oreu" ehi vaherá yuvireco chupe.

²¹ Esepia, yepe ahe oicua tēi Tüpa yuvireco viña, nomboetei rumo Tüpa secosa rese. "Aviye ndeu" ndehi avei yuvireco chupe. Iyavei ipihañemoñeta mbahe egüe ehi tēi vahe rese. Ipipe sui mbahe ndosenducua catu iri eté yuvireco.

²² Yepe, "Ore mbahecua vai" ehi tēi viña, ndoicuai eté rumo mbahe ipipe yuvireco.

²³ Esepia, ahe Tūpa nomanoi vahe seco porañete vahe mboetei rāgüer sui, omboetei ava ocañi tēi vahe rā rahanga yuvireco iyavei vīrai, opacatu mbahe mimba, mboi tēi avei omboetei yuvireco.

²⁴ Sese Tūpa, “Toyapoño ité mbahe güemimbotarai yuvireco” ehi chupe. Ichui oyapo ité mbahe poromochisa guasu oyeupe oyemboeteiēhisa pipe yuvireco.

²⁵ Esepia, mbahe supi vahe reroya rāgüer sui temira tēi viroya catu yuvireco. Iyavei Tūpa ité mboyeroya rāgüer sui omboetei catu mbahe sembiapocuer tēi yuvireco. Yaposar ité ru timboeteisa catu yepi.

²⁶ Sese Tūpa opoi eté ichui, “Toyapoño poromochisa mbahe tēi güemimbotarai pipe yuvireco” ehi chupe. Evocoyase cuña avei cuimbahe rese güeco rāgüer sui yuvirecoi oyese ae.

²⁷ Cuimbahe avei cuña rese güeco rāgüer sui yuvirecoiño avei oyese ae iyavei oipota rainō ité evocoi güeco raisa yuvireco. Evocoi nungar aposa sui oyemomara ahe ae yuvireco.

²⁸ Iyavei, “Tūpa supi eté vahe” ndehise seroyaēhisa pipe yuvireco, Tūpa evocoyase opoi eté ichui ‘toyapoño ayase mbahe ndipotasai vahe güeco raisa pipe yuvireco’ oya chupe.

²⁹ Ahe evocoyase yuvirecoi opacatu mbahe-mbahe tēi pipe; oyemboaguasa-guasa tēi vahe cuimbahe, cuña avei, ambuae ava mbahe oipota rai iyavei oyapo mbahe-mbahe tēi ava upe. Ahe oñemoiro ambuae ava mbahe pota raisave tēi, oporapichi, ivava serai, iporombopa serai, ipihañemoñeta ava reco momara āgua tēi iyavei imahechiroi ai ipipe yuvireco.

³⁰ Iyavei ambuae ava cupe cotive mara ehi-ehi tēi vahe, ahe Tūpa amotarēhisar yuvirecoi, viroiro avei ava, oyemboivate ai, oyecomboivate ai tēi avei oñehe pipe yepi, oseca-seca tēi mbahe naporai vahe güembiaporā, nomboyeroyai avei oyesupa yuvireco,

³¹ ndoyapisaca potai eté Tūpa suindar ñehesa rese, nomboaviyei avei oñehe, ndosaisui avei que ava, niñeroi avei ava upe, ndoiparaisuercoi eté ava yuvireco.

³² Oicua tēi Tūpa “oimera evocoi nungar aposar upe cañisa” ehi vahe, oyapo viteño rumo mbahe tēi yuvireco iyavei ambuae ava oyapose mbahe tēi, ovihareteño sepiase yuvireco.

2

Tūpa omondo ava upe sembiapogüer rupi tupri ité

¹ Oimese que pe pāhu pendar ‘co oyapo mbahe tēi; tocañi’ ohesave ambuae upe, ahese ahe ae oyemocañi tēi uca. Esepia, ahe inungar tupri avei.

² Yaicua rumo Tūpa omocañise evocoi nungar mbahe tēi aposar recocuer, ahe evocoyase oyapo mbahe supi tupri vahe.

³ Pe opase ava recocuer pesenoi, pe avei rumo ēgüe peye tupri peico. Pe avei eté evocoyase ndapeñemi chietera Tūpa ñemoirosa sui.

⁴ ¿Peroiro tie Tūpa oyapo vitese mbahe aviye vahe oñemosase, seco mbegüe tupri ai vitese avei pēu? ‘Tosecuñaro güecocuer yuvireco’ oyapave rumo ēgüe ehi pēu.

⁵ Pe rumo pepiharāta viteño ité Tūpa upe pe yevi potaēhi āgua. Sese pereco catu viteño ité Tūpa ñemoirosa peyese, acoi ari oyepotase Tūpa güeco tuprisa pipe yande renoipara yande mocañi āgua, anise yande písiro āgua curi.

⁶ Ahese opara omboepi ñepe-pei yande rembiapogüer rupi yandeu.

⁷ Omboura tecovesa apirēhi vahe yandeu yasecase teco ori, Tūpa suindar poromboeteisa iyavei mbahe apirēhi vahe yande mbahe tupri aposa pipe.

⁸ Ombou aveira oñemoirosa ava ndiporomboyeroyai vahe upe, ahe acoi co ñehesa supi eté vahe reroya rāgüer sui viroya vahe mbahe tēi.

⁹ Judío opacatu mbahe-mbahe tēi aposar ranengatu oiporarara mbahe rasicuer yuvireco, iparera ndahei vahe avei judío.

¹⁰ Tūpa rumo opacatu seco catupri vahe upe omondora imboetei āgua ‘toipisi teco ori iyavei toyuvirecoi mbahe tupri pipe’ oya chupe. Yipindar rumo judío eta upe rane omondora, iparera ndahei vahe judío upe.

¹¹ Esepia, Tūpa ndayande mboyoaviratii yande rereco.

¹² Ēgüe ehi eté, opacatu oyemboangaipa vahe Moisés porocuaita porēhi oyemocañi tēira yuvireco. Acoi oyemboangaipa vahe Moisés porocuaita rereco pipe yuvireco, ahe porocuaita pipe avei opara ocañi tēi porandusave yuvireco coiye.

¹³ Esepia, osenduño tēi vahe porocuaita ndahei seco catupri vahe yuvireco. Viroya vahe ité rumo porocuaita, ahe seco catupri vahe yuvirecoi.

¹⁴ Supi eté acoi ndahei vahe judío yuvirecoi vahe yepi ndovirecoi co porocuaita yuvireco viña, ahe rumo co porocuaita rupi tupri oyapose mbahe, ahe evocoyase inungar porocuaita vireco vahe yuvireco.

¹⁵ Esepia, güembiapo catupri pipe omboyecua porocuita virecose opiha pipe. Opihañemoñeta pipe avei oyandu porocuita mboaviyesa. Ahe ipipe avei oyandu mbahe güembiavi, ichui avei oyemonguerēhi mbahe aviye vahe apose.

¹⁶ Ahe ari cañi pipe Tüpa oyocuai ucara opacatu ava rembiapo cuañehisa repri pisi ägua Jesucristo upe, co ñehesa pisirosa resendar amombehu vahecuer rupi tupri egüe ehira curi.

Ñehesa judío resendar, Moisés porocuita resendar avei

¹⁷ Pe rumo, “Judío aico” peye vahe, peyeroya opacatu Moisés porocuita mboaviyesa pipe pe reco catupri ägua Tüpa rovaque viña. Iyavei ipipe peyeecomboivate ai Tüpa rese peicose.

¹⁸ Peicua semimbotar. Ahe porocuita pe mbohe avei mbahe aviye catu vahe poravo ägua.

¹⁹ Pe, “Aicatu ité ndasesapiso vahe nungar ava ndayaracuai vahe mboaracua iyavei ava angaipa viyar pitumimbi vahe nungarsave tēi resape ägua” peye tēi.

²⁰ “Aicatu avei ava mbahe ndosenducuai vahe mboaracua iyavei ava chñihivahemi nungar mbohe ägua. Esepia, areco co mborocuita vireco vahe opacatu mbahecuaa iyavei mbahe supi tupri vahe ité” peye tēi avei.

²¹ Pe pembohe vahe ambuae ava, ¿mahera ru ndapeyembohei pe ae? Pe pemombehu vahe ambuae ava mondaēhi ägua, ¿mahera ru pe ae avei pemonda no?

²² Pe, “Ndiyai pe aguasa” peye; pe teieté avei rumo egüe peye. Ndapesepia potai eté mbahe rahanga; pe avei rumo opa peñomi mbahe sepi vahe itüparo pipe sui.

²³ Peyeecomboivate ai co mborocuita rerecosa rese; ndapemboetei rumo Tüpa ipipe ahe mborocuita mboaviyeēhi pipe.

²⁴ Supi eté icuachiapri aracahendar pipe aipo ehi: “Pe sui tēi ava ndoicuai vahe Tüpa iñehe-ñehe tēi serer maranehi rese yuvireco” ehi.

²⁵ Supi eté co tecocuer cuacua circuncisión resendar ahe aviye angara pēu, peroya tupri itese Moisés porocuita viña. Ndaperoya tupriise rumo, pe evocoyase inungar ndapeyembocircuncidai vahe peico.

²⁶ Acoi ava ndoyembocircuncidai vahe, ahe rumo viroyase porocuita, ahe seroyapri inungar imbocircuncidapri yuvirecoi.

²⁷ Acoi ndoyembocircuncidai vahe, oyapose rumo mborocuita yuvireco, ahe evocoyase omombehura pe cañi ägua yuvireco. Esepia, yepe pereco Tüpa porocuita viña, pe rumo ndapemboaviyei eté.

²⁸ Judío supi eté vahe yaicose, ndahei yande yesupa judío recocuer rupi güeraño egüe yahera. Iyavei circuncisión supi eté vahe ndahei yande retecuer rese güeraño tēi avei no.

²⁹ Judío ete ité rumo opihá pipe ité viroya Tüpa. Iyavei circuncisión supi eté vahe, Espiritu rembiapo yande piha pipe, ndahei porocuita icuachiapri rembiapo tēi. Evocoyase judío supi eté vahe oipisira omboeteisa Tüpa suindar ité, ndahei ava tēi suindar.

3

¹ Evocoyase, ¿mbahe vo co aviye judío yande reco ägua? ¿Yande yembocircuncidasa pñha aviyeera?

² Supi eté. Esepia, yipindar Tüpa omondo oñehe judío eta upe imboaviye ägua.

³ Amove yepe ipáhu pendar nomboaviyeise ocuita viña, ¿Tüpa avei tie egüe ehira?

⁴ ¡Aní eté! Tüpa rumo supi tupri vahe ité secoi, yepe que ava opacatu semirañete ai tēi yuvireco. Esepia, icuachiapri aracahendar pipe aipo ehi:

“‘Supi tupri vahe Tüpa’ ehira nde ñehe rese yuvireco.

Sese ereiquese ava porandusave, eresē tupriñora eso ichui” ehi.

⁵ Yande reco rai pipe tēi yamboyecuae Tüpa reco tupriisa, ¿mara yahera vo evocoyase? ¿“Tüpa ndahei supi tupri vahe yande reco raisa rese yande nupa” yahera tie? (Che rumo aipo ahe inungar-ra ava co ivi pipendar tēi viña.)

⁶ ¡Aní eté! Esepia, Tüpa ndaheise supi tupri vahe viña, ndiyai chietera yande recocuer rese porandupa tupri ägua chupe viña.

⁷ Aviyeteramo oimera ava aipo ehi vahe: “Yande remira pipe sui tēi ava omboetei catuse Tüpa supi eté vahe, ¿mahera pñha evocoyase angaipa viyar nungar yande rerecora viña?” ehi.

⁸ “Yayapora ayase mbahe naporai vahe mbahe tupri reime ägua” ehi. Amove ava, “Pablo onduguer reseve aipo ehi eté oporombohe” ehi tupri tēi yuvireco oreu. Aipo ehi tēi vahe rumo. Iya ité oipisira cañisa yuvireco.

Opacatu yande angaipa viyar yaico

⁹ ¿Mara ehi ru evocoyase? ¡Yande judío yaico vahe ndahei eté ivate catu yande recocuer opacatu ambuae ava-ava tēi sui! Esepia, opa amboyecua Tüpa rovaque opacatu angaipa viyar yaico que judío, que ndahei vahe judío avei.

¹⁰ Supi eté icuachiapri aracahendar pipe aipo ehi:

“¡Ndipoi eté ava seco catupri vahe, que ñepei angara viña!

¹¹ Ndipoi avei que ava Tüpa recocuer osenducua tupri vahe.

Ndipoi avei Tüpa oseca vahe yuvireco.

¹² Opacatu ava oguata mbahe tēi pipe yuvireco, co coti tēi avei secocuer yuvireco.

¡Ndipoi eté que ava mbahe tupri aposar, que ñepei angara viña!

¹³ Iñehesa mbahe tēi eté, inungar tuvüpa ndasovapisai vahe.

Oñehesa pipe oporombopa yuvireco.

Ahe ñehesa evocoyase inungar mboi naporai vahe oporomocañi tēi vahe.

¹⁴ Ipipe oñehe rai opihavíracuá iteangasa pipe yuvireco.

¹⁵ Ndayipitii oporapichi água yuvireco.

¹⁶ Setá ava omomara, omombaraísu avei oguatasa rupi yuvireco.

¹⁷ Iyavei ndoicuai eté güeco tupri água yuvireco.

¹⁸ Ndipihañemoñetai eté Tüpa sui osiquiye água yuvireco” ehi.

¹⁹ Yande niha opa yaicua opacatu co mbahe omombehu vahe mborocuita aracahendar pipe, omombehu co porocuita pipe yuvirecoi vahe upe ‘Che ndayapoi eté mbahe, tehi eme opacatu ava yuvireco’ oyapave, iyavei ‘toicua opacatu ivi rupindar ava Tüpa ñemoirosa pisi água yuvireco’ ohesave aipo ehi.

²⁰ Esepia, ndipoi chietera que ñepei seco aviye vahe Tüpa rovaque co porocuita mboaviye pipe. Ahe mborocuita rumo oicua uca yande angaipa viyar yande reco.

Cristo rese yande yeroya pipe Tüpa yande písirora

²¹⁻²² Cüritei rumo Tüpa oicua uca yandeu ndahe iri mborocuita mboaviye pipe seco catupri vahe nungar yande rerecora. Cristo rese yande yeroyasa pipe sui niha seco catupri vahe nungar yande rereco. Ahe niha ndayande mboyoavii eté. Yipive ité ahe imombehupri secoi porocuita aracahendar pipe, iñehe mombehusareta rembicuachiagüer pipe avei.

²³ Supi eté yande opacatu yayapo angaipa, ndayasupitii eté Tüpa reco porañetesa.

²⁴ Ahe rumo oporoaisusa pipe, “Ereyavi mbahe che ñemoirosa pisi água” ndehi iri yandeu. Esepia, ahe yande písiro uca Guahir Jesucristo upe. Yande rumo ndayamboepii eté yande raisusa chupe.

²⁵⁻²⁶ Tüpa rumo ombou Guahir Cristo oipiyere vahe rā vuvü yande angaipa rese ñero água. Sese yande yeroya pipe oime ñeroisa yandeu. Ipipe omboyecua güeco ivi tuprisa. Yipisuive rumo güeco asiñehisa pipe oñemosañi aracahendar ava angaipa upe; cüritei rumo omboyecua ité güeco ñvisa yandeu, seco ñviño ité seco catupri vahe yande rerecose Tahir rese yande yeroya pipe.

²⁷ ¡Evocoyase ndiyai eté yande yeecomboivate ai água sovaque! Esepia, ndahei porocuita mboaviye rese égüe ehi, ahe rumo Cristo rese yande yeroya pipe égüe ehi yandeu.

²⁸ Sese yaicua Tüpa, “Ereyavi mbahe che ñemoirosa pisi água” ndehi iri Cristo rese yande yeroyasa yandeu, ndahei mborocuita mboaviyesa sui tēi.

²⁹ ¡Tüpa niha opacatu ité ava Tüpa, ndahei ore judío oroico vahe Tüpa güerañi!

³⁰ ¡Supi eté ñepeiño ité secoi: sese yayeroyase Cristo rese, oyoya guasuño ité, “Ereyavi mbahe che ñemoirosa pisi água” ndehi chira yandeu, yepera imbocircuncidapri viña, anise que ndahei vahe imbocircuncidapri viña no!

³¹ Ndahei rumo, “Égüe ehi tēi vahe” vahe evocoi mborocuita upe Jesucristo reroyasa pipe. Ipipe rumo yamboyecua evocoi mborocuita égüe ndehi tēi vahe.

4

Abraham recocuer sui yembohesa

¹ Iyavei, ¿mara ehi pñha yande ramoi Abraham recocuer aracahe?

² Acoi mbahe güembiapo pipe sui tēi oipisise güeco tupri água Tüpa sui, oyemboivate aira oico ipipe viña. Ndiyai eté rumo égüe ehi Tüpa rovaque.

³ Esepia, icuachiapri aracahendar pipe aipo ehi: “Abraham oyeroya ité Tüpa rese. Sese Tüpa, ‘Co seco catupri vahe’ ehi chupe” ehi.

⁴ Co rumo yande yayapose mboraviqui, ahe yaipisi vahe ndahei porerecosa tēi, ahe rumo mboraviqui reprí ité yaipisi.

⁵ Yande rumo, yayeroyase Tüpa rese, Tüpa evocoyase yande písira, ‘co seco catupri vahe’ ohesave. Esepia, ahe égüe ehi vahe ité oyese oyeroya vahe upe, yepe ndoyapoi chira mbahe aviye vahe chupe viña.

⁶ David mborererecuar aracahendar avei oñehe ava rorivetesa rese Tüpa seco catupri vahe nungar pisisa rese. Ahe rumo ndahei mbahe sembiapogüer rese tēi oipisi.

⁷ Ahe aipo ehi aracahe:

“¡Sorivete acoi ava Tūpa iñeroise yangaipa rese, iyavei ndoyemomahenduha irise yangaipa rese chupe!

⁸ ¡Sorivete avei ava, ‘Nde angaipa viyar ereico’ ndehi irise Tūpa chupe!” ehi.

⁹ Co mbahe tupri rumo ndahei judío upeño, ahe rumo ava ndahei vahe judío upe avei. Supi eté Tūpa, “Co seco catupri vahe secoi” ehi Abraham upe oyese iyeroyasa rese.

¹⁰ ¿Marase pīha oipisi oyeupe nara sereco? ¿Oyembocircuncida renondeve pīha, anise ipare tie? Yīpive ité.

¹¹ “Toicua ava co seco catupri vahe che rese iyeroyase yuvireco” ehi Tūpa chupe. Sese imbocircuncidapri secoi. Ēgüe ehi Abraham opacatu ava oyeroya vahe Tūpa rese, ndoyembocircuncidai vahe yesupa nungar secoi. Ēgüe ehi Tūpa, “Co seco catupri vahe yuvirecoi” ehi avei ahe ava upe.

¹² Supi eté yande ramoi Abraham opacatu ava oyembocircuncida vahe, Tūpa rese oyeroya vahe yesupa avei secoi. Abraham rumo oyeroya vahe Tūpa rese ndoyembocircuncida viteiseve.

Tūpa remimombehu imboaviyesara sese yeroyasa pipe

¹³ Esepia, aracahe Tūpa aipo ehi Abraham upe, ichuindar upe avei: “Peipisira opacatu co ivi pe mahera” ehi. Ndahei Moisés porocuaíta mboyeroya pipe ěgüe ehi chupe, oyese yeroyasa pipe sui eté rumo ahe oipisi ‘co seco catupri vahe’ ohesave.

¹⁴ Supi etese co mborocuaíta mboyeroyasar güeraño oipisise co mbahe oime vaherā chupe viña, evocoiyase yande yeroyasa Tūpa rese ěgüe ehi tēi etera, Tūpa remimombehugüer evocoiyase ěgüe ehi tēi vahe aveira viña no.

¹⁵ Esepia, co mborocuaíta mboaviyeēhisa pipe ñemoirosa oime ava upe. Ndipoise rumo mborocuaíta, ndipoi chietera ahe porocuaíta mboyeroyaēhisa.

¹⁶ Sese mbahe Tūpa remimombehugüer porerecosa yaipisira sese yande yeroyasa pipe, ahe semimombehugüer supi tupri vahe opacatu yande Abraham suindar upe nara. Esepia, ndahei mborocuaíta mboyeroyasar upe güeraño, ahe rumo opacatu yande Abraham nungar Tūpa rese oyeroya vahe upe nara. Evocoiyase ahe opacatu yande ramoi secoi.

¹⁷ Icuachiapri aracahendar pipe aipo ehi: “Orombou ava eta ivi rupindar ramoirā” ehi. Co Tūpa niha Abraham rembieroya, ahe avei omoingove vahe omano vahecuer iyavei oyapo vahe mbahe ndipoi vahe yīpindar.

¹⁸ Yepe yavai eté seroya āgua viña, Abraham rumo oyeroya ité Tūpa oyeupe ñehesa rese; sese ava eta ivi rupindar ramoi eté secoi Tūpa ñehe: “Setā oimera ava nde suindar” ehi vahe rupi tupri ité.

¹⁹ Abraham evocoiyase ndasesarai eté oyeroya tuprisa sui, yepe vireco pota ité cien araviter viña. Iyavei oyoya güembireco reseve nañaroi eté guahī āgua yuvireco viña.

²⁰ Ndopoi eté Tūpa oyeupe ñehesa reroyasa sui. Ahe rumo oyeroya catu ité sese iyavei omboetei eté.

²¹ “Supi eté Tūpa vireco opīratasa opacatu oñehengagüer mboaviye āgua” ehiño ité opiha pipe.

²² Sese Tūpa, “Co seco catupri vahe secoi” ehi iyeroyasa rese chupe.

²³ Co ñehesa ndahei Abraham upe güeraño.

²⁴ Yandeu avei niha. Esepia, “Co seco catupri vahe” ehi avei yandeu yayeroyase sese. Ahe niha acoi ombogüerayevi vahe yande Yar Jesús.

²⁵ Esepia, ahe imondopri secoi yande angaipa repirā. Ipore Tūpa ombogüerayevi yande pisi āgua seco catupri vahe nungar oyeupe.

5

Tūpa, “Peyavi mbahe” ndehi iri

¹ Sese yaico mbahe tupri pipe Tūpa, “Peyavi mbahe” ndehi irise yandeu yande Yar Jesucristo rembiapo sui sese yande yeroyasa pipe.

² Esepia, Jesucristo sui niha yareco co Tūpa suindar porovasasa yayeroyase sese. Ipipe avei yayemoviracuaño ité yaico, yayemboviha avei. Esepia, yaicua Tūpa piri yande reco āgua imborerecuasave.

³ Ndahei rumo sese güeraño yayemboviha, yande yemombaraisusa rese avei niha yayemboviha yaico. Esepia, yaicua ahe yande mbohe yande ñemosā āgua,

⁴ iyavei yañemosañose, yasē tuprira yande recoāhasa sui, ahese yaicua yaipisi vaherā mbahe aviye vahe Tūpa suindar yepi.

⁵ Iyavei ahe yande remiaro nayamoha tēi chira sereco. Esepia, Tūpa ombou ité oporoaisusa yandeu oEspíritu Santo yandeu ombou vahe pipe.

⁶ Yande ae ndayaicatui yande ñepisiro āgua yande recocuerai sui, Cristo rumo osupitise ari chupe, omano opacatu yande angaipa rese.

⁷ Aviyeteramo oimera que ñepeí ava omano vaheṙā ambuae ava aviye vahe upe nara; yepe que ava recocuer supí eté aviye aira viña, seni rumo ndipoi eté que ava, “Che tamano sepirā” ehi vaheṙā chupe.

⁸ Yepe yande angaípa viyar yaico yipindar, Tūpa rumo omboyecua yande raisusa; ombou Cristo imano āgua yande angaípa repirā.

⁹ Ipeí sui cūrítei, “Peyaví mbahe” ndehi iri chira. Sese nomboui chietera oñemoirosa yandeu.

¹⁰ Esepia, yamotarēhimbar yaico vitesé, ahe Guahir manosa pípe sui yande reroyeví iri oyeupe mbahe tuprí pípe; ocuerayevisa pípe evocoyase oicatu ité yande písiro.

¹¹ Ndahei co reseño ēgüe yahera, yaviha catu aveira Tūpa rese, yande Yar Jesucristo rese avei. Ichui niha ndipo iri mbahe Tūpa rovaque yande rese.

Adán iyavei Cristo resendar ñehesa

¹² Supí eté Adán sui oime angaípa iví pípe, ichui avei oime manosa opacatu ava upe. Esepia, opacatu ité oyapo angaípa yuvireco.

¹³ Ndipo vitesé Moisés porocuita, oime voi eté angaípa co iví pípe. Yepe tie ndicuasa vitei angaípa porocuita ndipoise viña,

¹⁴ Adán reco sui tuprí ité rumo ava omanoño ité oangaípa pípe yuvireco. Ēgüe ehiño ité yuvireco Moisés recose, yepe ahe ava yuvirecoi vahe angaípa ndahoyoyai Adán angaípa mborocuita mboaviyeēhisa resendar rese viña. Ahe Adán rese omboyecua mbía ou vaheṙā.

¹⁵ Tūpa porerecosa ombou vahe rumo yandeu ndahoyoyai eté Adán angaípa rese. Esepia, Adán rembiaví sui setá ava omano; Jesucristo rembiapo sui rumo Tūpa ombou oporerecosa poropísírosa yandeu. Ahe rumo aviye catu vahe ava eta upe nara.

¹⁶ Ahe ñepeí ava angaípa rumo ndoyoyai eté Tūpa poropísírosa ombou vahe rese yandeu. Esepia, ñepeí ava angaípa sui ou Tūpa ñemoirosa; oporerecosa rumo Tūpa ombouño ité ava eta mbahe oyaví ati vahe upe nara yangaípa mocañi āgua.

¹⁷ Supí eté ñepeí ava angaípa sui oimeño ité manosa opacatu yandeu. Yande rumo yaipísi mbahe ipírata catu vahe ichui, ahe Tūpa porovasasa tuvichá vahe ité iyavei iporerecosa, “Peyaví mbahe” iheēhisa resendar. Sese yareco ité tecovesa apirēhi vahe yandeyeupe nara ñepeí ava sui, ahe Jesucristo.

¹⁸ Evocoyase inungar Adán rembiapo ai güeru Tūpa ñemoirosa opacatu ava upe, Jesucristo rembiapo aviye vahe avei güeru opacatu ava upe Tūpa ñemoirosa písiēhi āgua ‘tovireco tecovesa apirēhi yuvireco’ oya.

¹⁹ Esepia, ñepeí ava Tūpa reroyāēhisa sui setá oime ava angaípa viyar; ēgüe ehi aveira ñepeí ava mboyeroyasa sui setá aveira ava vireco güeco catuprisa Tūpa rese yuvireco.

²⁰ Supí eté porocuita ouse aracahe, ahe angaípa yaposa catu ité. Yepe ēgüe ehi viña, Tūpa porovasasa rumo ivate catu ité ichui.

²¹ Evocoyase inungar angaípa ipírata yandeu yande mano āgua viña, ēgüe ehi avei rumo Tūpa oporovasasa ipírata vahe pípe yande písi seco catuprí vahe nungar yande rereco ‘toipísi tecovesa apirēhi vahe che Rahír Jesucristo rembiapo sui’ oya.

6

Angaípa upe omano vahe nungar yaico; Cristo rese yaicose rumo oicove vahe ité yaico

¹ Evocoyase, ¿iya iri píha yayapo vite angaípa yaico Tūpa yandeu oporovasasa mboyecua catu āgua?

² ¡Aní chietera! Esepia, yande niha senoseprí angaípa sui. Evocoyase ndiira iri eté yayapo vitei angaípa yaico.

³ ¿Ndapeicuai vo pe yañeapiramose Jesucristo rer pípe, ndoyaví yamano vahe ité sese?

⁴ Yande ñeapiramose, aviye acoi ñotimbrí yaico Cristo rupíve yande mbogüerayeví iri āgua iyavei yande recocuer mopiasu āgua avei, inungar acoi Cristo ocuerayeví Vu reco píratasa pípe.

⁵ Yande omano vahe nungar yaicose supíve, ēgüe yahe aveira yande yacuerayeví supí.

⁶ Yaicua avei niha yipindar yande recocuerai yaticaprí nungar curusu rese Cristo rupíve, “Che recocuerai tocañipa che sui” yande hesa pípe, iyavei yande angaípa pípe mbiguai téi nungar yande recoēhi āgua.

⁷ Esepia, acoi omano vahe ndoyapo iri angaípa yuvireco.

⁸ Yande avei niha omano vahe nungar Cristo rese yaico. Evocoyase yayeroya avei yaicove vaheṙā sese.

⁹ Yande niha yaicua, Cristo ñepeí reseve ocuerayeví, nomano iri chietera. Esepia, manosa ndoicatu iri eté chupe.

¹⁰ Supi eté omanose Cristo, omano ñepeí reseve opacatu angaipa mocañi água; cūrítei rumo oicove Tūpa upe nara.

¹¹ Ēgüe peye avei pe, “Che omano vahe nungar aico angaipa upe” peyera; “Che rumo Tūpa upeño ité aicovera yande Yar Jesucristo rese che recosa pipe” peye aveira.

¹² Sese aní peico vite angaipa pīratasavrive pe cuai água pe remimbotarai mboyeroyasa pipe.

¹³ Aní peyemondo angaipa upe mbahe tēi apo água. Peyemondo catu Tūpa upe. Esepia, pe inungar ava ocuerayevi iri vahe peico. Sese peyemondo tupri ité Tūpa upe mbahe tupri apo água.

¹⁴ Evocoyase, pe angaipa ndape cuai iri chira pe rereco. Esepia, ndapeicoi Moisés porocuaita pipe; pe rumo Tūpa porovasasa pipe peico.

Yembohesa mbiguai tēi recocuer sui

¹⁵ Ndayaico iri mborocuaita pipe tēi, yaico rumo Tūpa porovasasa pipe. Evocoyase, ¿“Tayapo vite angaipa” yahera pīha? ¡Aní chietera!

¹⁶ Pe niha peicua que ava pemboyeroyase, ipovri pendar evocoyase peico. Pemboyeroyase Carugar angaipa apo água, ahe evocoyase pe reco mocañi tēira. Tūpa pemboyeroyase rumo, ahe evocoyase pe reco mohivira.

¹⁷ Aviye Tūpa upe. Esepia, pe yipindar mbiguai tēi nungar peico angaipa pipe viña, cūrítei rumo pemboyeroya pe pihave ité porombohesa peipisi vahe.

¹⁸ Ñepeí reseve pe angaipa sui Tūpa pe renosese, pe evocoyase mbiguai nungar mbahe supi tupri vahe apo água peico.

¹⁹ (Che amboyoya tecocuer mbahe co ivi pipendar rese imombehu pēu. Esepia, yavai vite ité pēu co ñehesa renducua tupri água.) Yipindar pe retecuer pereco mbahe tēi pipe mbahe naporai vahe apo água. Ēgüe peye rumo pe cūrítei pe reco mohivi água peico mbahe tupri pipe ñepeí reseve Tūpa upe pe reco água.

²⁰ Pe peico vitesese mbiguai tēi nungar pe angaipa pipe, ahese ndapeyapo vite mbahe supi tupri vahe;

²¹ Cūrítei rumo pechī tēi ichui, ahe niha ndape pītivi ité pe recocuer rese, iyavei pe reraso pota manosa apirēhi vahesave yepi.

²² Cūrítei rumo angaipa sui senosepri peico Tūpa povrive pe reco água. Ichui mbahe tupri oime pēu. Ahe niha ombou oyeupe nara ité pe reco tupri água. Ipipe sui peicora apirēhi vaherā.

²³ Angaipa niha ombou manosa tēi yandeu, Tūpa rumo oporerrecosa ombou tecovesa apirēhi vahe yandeu yande Yar Jesucristo rese yande recose.

7

Mendasa sui yembohesa

¹ Che rivireta, pe niha peicua tupri mborocuaita, peicua avei ahe porocuaita povriveño ité opacatu yaico yaicove vitesese co ivi pipe.

² Esepia, inungar cuña omenda vahe, imer oicove vitesese, iporocuaítavrive viteño ité secói yepi. Omanose rumo imer ichui, ahe cuña ndahe iri omer porocuaítavrive secói.

³ Acoi cuña omer recove vitesese, virecose ambuae cuimbahe, oyemboaguasa tēi evocoyase; acoi omanose rumo imer ichui, ndaseco iri ipovrive. Ahe iyacatu ité omenda yupagüe iri; ahese ndahei yaguasa tēi cute.

⁴ Che rivireta, pe niha Ēgüe peye avei Cristo rese peico vahe; Cristo manosa sui ndahe iri Moisés porocuaítavrive peico Cristo rese peico água. Ahe niha acoi ocuerayevi vahe. Sese yande recocuer Ēgüe ndehi tēi vahe Tūpa upe.

⁵ Esepia, yandé yaicove vitesese yandé reco ai pipe, ahe porocuaita renduse, yaipota catu mbahe tēi pipe yandé reco água. Ipare rumo ahe manosave tēi yandé reraso ucara viña.

⁶ Cūrítei rumo yandé omano vahe nungar yaico acoi porocuaita pipe yaico vahecuer sui. Ēgüe yahe, yasē ichui Tūpa upe mbahe apo água Espiritu sui yandé reco piasu pipe. Ndahe iri mborocuaita icuachiapri yipindar vahe pipe yaico.

Angaipa oime vahe yandé rese

⁷ ¿“Tūpa porocuaita angaipa” yahera pīha? ¡Aní eté; ndahei eté ahe angaipa! Co rumo ndaicuai chietera che angaipa Tūpa porocuaita ndipoise viña. Supi eté che ndaicuaise, “Ndapeipota rai chira ambuae ava mbahe” ehi vahe mborocuaita pipe, ahese ndaicuai chiaveira che mbahe pota raisa viña.

⁸ Aicuse mborocuaita, ahese angaipa ipirata catu cheu. Ahe mborocuaita apo potaēhisa pipe che querēhi catu opacatu che remimbotarai tēi apo água. Esepia, mborocuaita porēhi angaipa aviye ndipoi vahe viña.

⁹ Yipindar Tūpa porocuaita ndaicua viteise, ndoyavi aviyē vahe ité che reco areco viña. Porocuaita aicuae rumo, aipota rai angaipa apo āgua.

¹⁰ Che evocoyase acañi tēi vaherā aico ipipe viña. Ahe porocuaita che recove apirēhi āgua mbou rāgüer sui, che mondo ucaño itera manosa apirēhi vahe pipe tēi viña.

¹¹ Esepia, angaipa ahe porocuaita pipe che mbopa ité. Ahe ipipe avei che mocañi tēira viña.

¹² Evocoyase co porocuaita ndaseco marai vahe ité, supi tupri vahe ité, aviyē vahe avei.

¹³ ¿Co porocuaita aviyē vahe pīha che rereco che mano āgua tēi? ¡Aní eté! Angaipa tēi rumo ēgüe ehi che rereco. Evocoyase co porocuaita cuasa sui oipota catu uca mbahe tēi apo āgua cheu. Ipipe aicua angaipa oime vahe che rese. Ēgüe ehi avei ahe porocuaita omboyecua tupri ité angaipa mbahe tēi vahe yandeu.

¹⁴ Yaicua niha porocuaita Tūpa suindar, che tēi rumo imondopri aico angaipa mboyeroya āgua.

¹⁵ Che rumo ahese ndaicuai mbahe oime vahe cheu. Esepia, che remimbotar ayapo pota vahe ndayapo; mbahe che remimbotarēhi rumo ayapo.

¹⁶ Che rumo ayapose mbahe ndayapo potai vahe, ahese aicua co porocuaita aviyē vahe.

¹⁷ Evocoyase ndahei cheyesui eté ēgüe ahe, angaipa tēi rumo ēgüe ehi che mbohe uca.

¹⁸⁻¹⁹ Esepia, che aicua ndipoi eté mbahe aviyē vahe che reco ai rese; sese yepe che ayapo pota ité mbahe aviyē vahe viña, ndaicatui eté rumo yapo. Iyavei yepe ndayapo potai mbahe tēi viña, che rumo ayapoño ité.

²⁰ Sese ayapo viteño itese mbahe ndayapo potai vahe, ndahei rumo che ité ayapo, che pīha pipe angaipa oime vahe, ahe tēi rumo oyapo uca cheu.

²¹ Sese che aicua oime che cuaisar che rese. Esepia, ayapo potase mbahe aviyē vahe yepi viña, ahe rumo oyapo uca pota voñño ité mbahe naporai vahe cheu yepi.

²² Che pīha pipe rumo Tūpa porocuaita aipotá iteanga tēi,

²³ che rumo aicua che pīha pipe oime ambuae mbahe, mbahe tupri apo potaēhisar cheu, ahe angaipa tēi oime vahe che rese. Ahe mbiguañi nungar tēi che rereco.

²⁴ “¡Che paraisu ité!, ndaicatu iri eté, ¿uma pīha co mbahe tēi sui che renosera viña?” ahe cheyupe vichico.

²⁵ Tūpaño ité oicatu Guahir Jesucristo rese. “Aviyē” yande Ru Tūpa upe. Ēgüe ehi ahese mbahe cheu; Tūpa porocuaita amboaviye pota viña, che remimbotarai tēi rumo che rereco uca angaipa povrive.

8

Yaico vaherā Tūpa Espiritu rese

¹ Cūrteitē rumo ndipoi iri Tūpa ñemoirosa yandeu Jesucristo rese yaicose.

² Esepia niha, Jesucristo rese yaicose, yande cuaisar Espiritu tecovesa mondosar yande renose angaipa povri sui, manosa sui avei.

³ Esepia, yande remimbotarai rese ndayaicatui Moisés porocuaita mboyeroya āgua, ahe avei evocoyase ndoicatui eté yande reco moingatu. Tūpa rumo oicatuño ité. Esepia, Guahir ombou yande nungar tupri ité ‘toyemondo ava angaipa repirā’ oya. Ēgüe ehi imocañi opacatu yande angaipa yande sui, yande remimbotarai avei.

⁴ Ahe ēgüe ehi yande yamboaviye vaherā mborocuaita. Esepia, ndayaico iri yande remimbotar tēi pipe. Yaico rumo Espiritu aviyē vahe rese.

⁵ Esepia, acoi yuvirecoi vahe rumo güemimbotar tēi pipe, güecocuerai reseño tēi ipihañemoñeta yuvireco; Espiritu rese yuvirecoi vahe rumo semimbotar rese ipihañemoñeta catu yuvireco.

⁶ Iyavei acoi güemimbotarai rese tēi ipihañemoñeta vahe, ahe omano itera apirēhi yuvireco. Ipihañemoñeta vahe rumo Espiritu suindar mbahe rese, virecora tecovesa apirēhi vahe mbahe tupri pipe yuvireco.

⁷ Esepia, acoi güecocuerai reseño tēi ipihañemoñeta vahe, ahe Tūpa amotarēhimbar yuvirecoi. Ndoipotai eté iyavei ndoicatui Tūpa porocuaita mboyeroya āgua yuvireco.

⁸ Ēgüe ehi eté, acoi yuvirecoi vahe güemimbotarai pipe, ndoicatui eté Tūpa remimbotar apo āgua yuvireco.

⁹ Pe rumo ndapeico iri pe remimbotarai pipe. Peico rumo Tūpa Espiritu rese, ahe perecose peyese. Acoi ndovirecoi vahe rumo Espiritu Cristo suindar, ndahei eté chupendar.

¹⁰ Cristo secoise rumo pe rese, yepe pe rete ocañi tēi vaherā angaipa sui viña, pe espíritu rumo oicoveño ité. Esepia, Tūpa, “Peyavi mbahe” ndehi iri pēu.

¹¹ Acoi Tūpa Espiritu secoise pe rese, Tūpa evocoyase omondora tecovesa piasu pe retecuer upe oEspiritu pe rese secoi vahe pīratasa pipe. Esepia niha, ipipe ité ombogüerayevi Guahir Jesucristo.

¹² Ēgüe ehi che rivireta, yareco yande cuaita, ndahei rumo yande remimbotarai pipe yande reco água.

¹³ Esepia, pe peicoño itese pe remimbotarai pipe, ahese pecañi tēira; pemombopase rumo Espiritu pipe peyesui, ahese peicovera apirēhi vaheṛā.

¹⁴ Esepia, opacatu Tūpa Espiritu ombohe vahe, Tūpa rahir ité yuvirecoi.

¹⁵ Supi eté pe Espiritu peipisi vahe ndapembosiquiye uca iri pe rereco, ahe rumo pemoiingo Tūpa rahir ité pe reco água. Ahe avei, “¡Che Ru!” pe mbohe uca chupe.

¹⁶ Co Espiritu avei oicua uca yande espíritu upe Tūpa rahir yande recose.

¹⁷ Evocoyase yaipisi aveira mbahe yande Ru Tūpa ombou vaheṛā yandeu; ahe oyoya Cristo reseve yaipisira, Cristo paraisu agüer pipe ité yaicose yareco vaheṛā teco porañetesa ipiri curi.

Teco porañetesa ou vaheṛā curi

¹⁸ Cūritei rumo yande paraisusa ndoyoyai eté teco porañetesa yande rese ou vaheṛā rese.

¹⁹ Opacatu Tūpa rembiapocuer osāro vite ité opacatu oquerēhisa pipe, osepia pota ité teco porañete vahe tahir yuvirecoi vahe rese.

²⁰ Esepia, Tūpa rembiapo ndahe iri eté yipindar nimarai vahe nungar. Ndahei rumo oyesui tēi ēgüe ehi, Tūpa ité, “Ēgüe tehi” ehi chupe, ombouse angaipa repri ava upe. Mbahe sembiapocuer rumo osāroño ité

²¹ güeco opa tēi vaheṛā sui ñepisiro água teco porañete vahe Tūpa rahir vireco vahe rupiti água curi.

²² Yande niha yaicua aracahe suive opacatu mbahe Tūpa rembiapo oiporara mba-herasicuer yuvireco cuña imembi rasi vahe nungar.

²³ Ndahei rumo ahe güeraño ēgüe ehi yuvireco, yande avei ēgüe vahe. Yande yareco ité Espiritu, ahe yipindar vahe yaipisi vaheṛā ichui curi. Yayemombaraisu, yasāro vite yande querēhisa pipe Tūpa guahir ité yande rereco água, yande retecuer recuñaro água avei.

²⁴ Esepia, yande niha yañepisiro ité yande remiaro reroya pipe; sese acoi yasepia vahe mbahe yande remiaro, nayasāro iri. Ndipoi ava osāro vite tēi vahe mbahe güembiepia.

²⁵ Acoi mbahe yande remiaro ndayasepia viteise rumo, yasāro vite yande ñemosasa pipe sereco.

²⁶ Ēgüe ehi avei Espiritu yande pītivii ndayaicatu irise. Esepia, ndayaicuai eté mara yahera yayeroqui, co Espiritu Santo rumo oporandu ité Tūpa upe yande rese oyemopoasesa pipe.

²⁷ Iyavei Tūpa, ahe oicua vahe opacatu yande pihañemoñetasa, oicuaño ité Espiritu mbahe omombehu pota vahe oyeupe. Esepia, Espiritu oporandu chupe semimbotar rupi yande seroyasar yaico vahe rese.

Yasecopipa itera mbahe tēi

²⁸ Tūpa niha yande poravo güemimbotar rupi. Yepe yaicua mbahe tēi oime yandeu viña, Tūpa rumo opacatu mbahe oyapo yandeu mbahe tupri reime água yande raisusave.

²⁹ Esepia, yipive Tūpa yande cua, yande poravo Guahir Jesucristo nungar ité yande reco água ‘ahe che Rahir tenonde catu vahe tasecoi opacatu ambuae che rahir sui’ oya.

³⁰ Iyavei Tūpa yipisuive ahe yuvirecoi vahe oiporavo. Chupe oñehe oyeupe nara seco água. Ipare, “Co seco catupri vahe” ehi chupe; ahe chupe avei omondo teco porañetesa.

³¹ ¿Mara vahe irira vo chupe? ¡Tūpa niha yande repisar secoi, sese ndoicatu iri eté yande amotarēhimbar yuvireco!

³² Tūpa niha ombou ité Guahir imano água opacatu yande rese. Sese yaicua ombou aveira opacatu mbahe yandeu yande pītivii água Tahir rese yande recose.

³³⁻³⁴ Sese ndiyai eté ava upe, “Pecañi tēira, peyavi pe recocuer” ihe água yande iporavopri yaico vahe upe yuvireco. Esepia, Tūpa opa omocañi yande angaipa yande sui Cristo omanose separā, iyavei ocuerayevise. Cūritei Cristo Vu acato coti, “Co cheundar ité yuvirecoi” ehi yande rese oyerure yepi.

³⁵ ¿Mbahe piha yande mboyepepira Cristo yande raisusa sui viña? ¿Que yande paraisusa, mbahe yavai vahe yandeu, yande momara-mara tēisa, que tieporēhi, anise que yande turucuarā ndipoise, que mbahe tēise yandeu, yande yuca potase tie yuvireco?

³⁶ Inungar icuachiapri aracahendar pipe aipo ehi:

“Oyemoingatu voi arí rupi yande yuca água yuvireco ndeundar yaicose, ovesa yucapirā nungar tēi yande rereco yuvireco” ehi

aracahe.

³⁷ Opacatu rumo co mbahe oimese yandeu, yasecopipa ité ahe yande raisusar recocuer pipe sui.

³⁸ Sese che aroya ité Tūpa yande raisu viteño itera yepi yepe que yamanora, anise que mbahe oime vahe yandeu yande recove viteise. Ndayande mboyepepi chiaveira ichui que

Tūpa rembiguai, que seco ivate vahe, seco pīrata vahe ndayasepiai vahe, que cūritei mbahe oime vahe yandeu, anise que mbahe oime vahe rā curi.

³⁹ ¡Ndayande mboyepepi chiaveira que iva pendar mbahe, anise que mbahe ivi pipendar, que ambuae mbahe Tūpa rembiapo iporoaisusa sui omboyecua vahe opacatu yande Yar Jesucristo recocuer pipe yandeu!

9

Tūpa oiporavo Israel oyeupe nara arācahe

¹ Che Cristo reroyasar che reco pipe supi eté añehe, ndopombopai. Tūpa Espīritu oicua ité che pīhañemoñetasa supi vahe.

² Ndavīhai eté che pīha pipe; oime mbahe tasi vahe cheu yepi.

³ Che aipota tēi opacatu che mu judío ñepisiro āgua yuvireco viña. “Tacañi tēi Cristo porēhi icañi tēiēhi āgua yuvireco” ahera viña.

⁴ Ahe niha Israel suindar yuvirecoi, aracahe Tūpa oiporavo vahe guahirguā. Ahe ipāhuve avei secoi güendigüer porañetasa pipe, iyavei omondo ité oñehe güemimbotar, oporocuaite avei chupe nara viña ‘tache mboetei oyeruresa pipe che rētave yuvireco’ oya, iyavei, “Amboaviye itera che ñehe pe rese” ehi yuvireco chupe.

⁵ Ahe avei niha yande ramoi yipindar vahe suindar yuvirecoi, Tūpa Rembiporavo Poropisirosar avei ahe ichuindar oyesu vahe. Ahe Poropisirosar niha Tūpa ité, ivate catu vahe secoi opacatu sui. Sese, ¡timboeteisa catu yepi! ¡Ēgüe tehi apirēhi!

⁶ “Tūpa nomboaviyei Israel upe oñehe imombehupri?” ndapeyei chira. Esepia, ndahei opacatu Israel suindar supi tupri vahe.

⁷ Iyavei ndahei opacatu Abraham suindar tahir supi tupri vahe yuvireco. Esepia, Tūpa aipo ehi: “Nde rahir Isaac sui rumo oimera nde suindar sovasapri” ehi chupe.

⁸ Co rumo osenducua uca yandeu ndahei Abraham suindar yuvireco vaheño ité Tūpa rahir yuvirecoi, Tūpa remimombehu rupi yuviroha vahe güeraño rumo ichuindar ité yuvirecoi.

⁹ Esepia, Tūpa Abraham upe aipo ehi aracahe: “Co ari rupi avei ayevíra curi, ahease oimera Sara membri ndeu” ehi.

¹⁰ Ndahei rumo co reseño, tahir Isaac rese avei. Esepia, oacuacuse sembireco Rebeca imembi cōi, ahe icōi vahe yesupa rumo ñepeño ité.

¹¹⁻¹³ Ahe ndoyuviroha viteise, ndoyapo viteise mbahe que aviye vahe, que naporai vahe yuvireco, Tūpa aipo ehi ichi Rebeca upe: “Yipindar oha vahe nde membri ahe omboyeroyara ipandar” ehi. Co oyoya ité icuachiapri rese acoi aipo ehi vahe: “Che asaisu ité Jacob, Esaú rumo ayamotarēhi” ehi. Sese yaicua iya ité Tūpa upe ava poravo güemimbotar rupi, ndahei seco aviye vahe rese.

¹⁴ ¿Sese pīha Tūpa upe, “Ndaseco tupri vahe” yahera? ¡Aní eté!

¹⁵ Esepia, acoi Moisés upe aipo ehi: “Aiparaisueredora ava, asaisu aveira che remimbotar rupi” ehi.

¹⁶ Supi eté ndahei yande remimbotar rupi tēi, ndahei avei yande pīratasa rupi Tūpa oyapo mbahe; ahe rumo oporoparaisueredora pipe mbahe oyapo yandeu.

¹⁷ Supi eté Tūpa aipo ehi mborerecuar guasu Egipto pendar upe aracahe: “Che oromoiingue uca mborerecuar nde reco āgua che pīratasa mboyecua āgua nde sui, che rer mboetei āgua avei opacatu ava upe co ivi pipe” ehi.

¹⁸ Ēgüe ehi oporoparaisuereco güemimbotar rupi. Güemimbotar rupi avei omboavai viroya āgua ava upe.

¹⁹ Aviyeteramo oimera que amove pe pāhu pendar aipo ehi vahe, “Ndiyai evocoyase Tūpa upe, ‘Pe peyavi mbahe’ he āgua yandeu. Esepia, ndipoi eté niha ava, ¡Aní! ehi vahe rā Tūpa remimbotar upe” ehira.

²⁰ “Ndiyai eté rumo Tūpa poepi āgua ndeu” ahera aipo ehi vahe upe. Inungar ñaihu mbahemoinda ndiyai, “¿Mahera che apo rai tēi eve?” ihe āgua oaposar upe.

²¹ Ñaihu rese oporaviqui vahe rumo güemimbotar rupi oyapora mbahe yuvireco sese. Oicatu ichui aviye catu vahe apo, oicatu avei ambuae iporupirā tēi apo āgua.

²² Tūpa rumo oñemoso pare iya ité oñemoirora, opīratasa mboyecua āgua ocañi tēi vahe rā upe.

²³ Ēgüe ehi avei yapo güemimbotar rupi güeco porañetasa ivate vahe mboyecua āgua yandeu. Esepia, yande paraisuereco iyavei yipisuive teco ori porañetasa omoingatu yandeu aheve yande reique āgua.

²⁴ Yande avei yande renoi oyeupe, que judío, anise que ndahei vahe judío yande recose.

²⁵ Esepia, Oseas rembicuachigüer pipe aipo ehi:

“Acoi ava ndahei vahe cheundar, chupe,

'Cheundar ité' ahera, iyavei acoi ava ndahei vahe saisupri yuvirecoi, chupe, 'Che rembiaisu ité' ahera" ehi.

²⁶ "Pe ndahei vahe cheundar peico' ehi vahesave, ahe chupe, 'Tüpa oicove vahe rahir ité' hesara" ehi.

²⁷ Isaías rumo aipo ehi israelita upe: "Yepe Israel suindar setá iteangara viña inungar ivi cuhi, moviro tēi rumo oñepisiora yuvireco.

²⁸ Esepia, yande Yar omboaviye voira oñehe ava viroyasarēhi mocañi ñgua co ivi pipe" ehi.

²⁹ Oyoya avei ambuae Isaías remimombehuguer yipindar vahe rese:

"Yande Yar seco pñrata catu vahe noipisiroise que moviro yande ramoi yandeu, yacañipa tēira viña inungar tecua guasu Sodoma, Gomorra reseve yuvireco" ehi.

Judío yuvirecoi vahe iyavei ñehesa pñsirosa resendar

³⁰ ¿Mara yahera vo evocoyase? Yaicua ava ndahei vahe judío, yepe ndahei osecá vahe güeco catupri ñgua yuvireco viña, Cristo rese oyeroyasa pipe rumo vireco ité güeco catuprisa Tüpa rovaque.

³¹ Judío yuvirecoi vahe rumo oipota tēi güeco tupri ñgua ité Tüpa porocuita mboyeroya pipe viña, ndoicatu ité rumo supiti yuvireco.

³² Esepia niha, ndahei oyeroyasa pipe ité osecá oñepisiro ñgua, ahe rumo co mborocuita mboyeroysa sui tēi Tüpa rese yuvirecoi pota viña. Ahe evocoyase ndoyavi oyeipi vahe "ita yepiapisá" rese yuvireco.

³³ Aipo ehi tupri icuachiapri aracahendar pipe:

"Che amondo Sión ve ñepe ita yepiapisá, ahe oporoieiti vahe.

Acoi sese oyeroyá vahe rumo, nomochi ucai chietera oyesui" ehi Jesús recocuer upe.

10

¹ Che rivireta, che aipota che piha pipe ité iyavei ayerure Tüpa upe che mu judío recocuer rese 'toñepisiro yuvireco' che yapave.

² Supi eté iquerēhi ité Tüpa upe mboraviqui apo ñgua yuvireco viña. Oquerēhisa sui rumo oyavi senducuaēhisa pipe yuvireco.

³ Esepia, ndoicua potai mara ehi Tüpa ava pisi oyeupe. Sese oyesui tēi osecá güecocuer tuprisa pipe 'tomoingatu Tüpa opiha yande pisi ñgua' ohesave yuvireco viña. Ipipe sui nomboyeroi eté Tüpa remibotar güeco mbocatupri ñgua ité yuvireco.

⁴ Esepia, Cristo recocuer pipe imboaviyesa tupri Moisés porocuita, "Peyavi mbahe che ñemoirosa pisi ñgua" ehiēhi ñgua Tüpa oyese oyeroyá vahe upe.

⁵ Co yande reco catupri ñgua porocuita pipe sui, Moisés aipo ehi icuachia: "Acoi ava omboaviye tupri vahe opacatu co mborocuita, ipipe sui yuvirecovera" ehi.

⁶ Tüpa, "Peyavi mbahe che ñemoirosa pisi ñgua" heēhi ñgua rumo yande yeroyasa pipe, "Ava vo oyeupira ivave Tüpa Rembiporavo reroyi ñgua" ndapeyei chira.

⁷ Iyavei, "Ava vo ogüeyira omano vahe pñhuve Tüpa Rembiporavo mboyeupi uca ñgua" ndapeyei chiaveira.

⁸ ¿Mara peyera evocoyase pe piha pipe? "Co ñehesa namombriveimi pe sui, pe yuru pipe ité, pe piha pipe avei secoi" peyera.

⁹ "Jesús, che Yar" peyese, pe piha pipe peyeroyase avei Tu imbogüerayevisa rese, ahese ipñsiropri peicora.

¹⁰ Esepia, yande piha pipe yayeroyá Jesús rese. Ahese Tüpa, "Co seco catupri vahe" ehira yandeu. Iyavei yamombehuse sese yande yeroyasa, ahese ipñsiropri yaicora.

¹¹ Esepia, icuachiapri aracahendar pipe Tüpa aipo ehi: "Acoi sese oyeroyá vahe rumo, nomochi ucai chietera oyesui" ehi.

¹² Sese oyoya tupri judío ndahei vahe judío recocuer rese. Esepia, ñepeño ité niha Yar opacatu ava upe nomopanei vahe oporovasasa tuvichá vahe oyeupe oporandusar upe.

¹³ Esepia, icuachiapri aracahendar pipe aipo ehi: "Acoi opacatu osenoi vahe yande Yar rer, ipñsiropri yuvirecoira" ehi.

¹⁴ Ava rumo ndoporandui chira pñsirosa rese Jesús upe, sese ndoyeroyaise yuvireco. Iyavei sese ndoyeroyai chira sesendar ñehesa ndosenduisse yuvireco. Iyavei ndosendui chira ndipoise ñehesa mombehúsar yuvireco chupe.

¹⁵ Iyavei mara ehira co ñehesa mombehu yuvireco ndipoise imondosar chupe. Aipo ehi avei niha acoi icuachiapri aracahendar pipe: "¡Aviye ai eté acoi ava güeru vahe ñehesa aviye vahe pñsirosa resendar!" ehi.

¹⁶ Ndahei rumo opacatu che mu judío viroya co ñehesa pñsirosa resendar yuvireco. Isaías niha aipo ehi avei aracahe: "Che Yar, ¿uma pñha viroya ore ñehe yuvireco?" ehi.

¹⁷ Sese yayeroyá Jesucristo rese co ñehesa pñsirosa rendusa pipe.

¹⁸ ¿Osendu pīha judío co ñehesa yuvireco? ¡Osendu ité! Esepia, aipo ehi avei acoi icuachiapri aracahendar pīpe:

“Sendusa niha opacatú ivi rupi ñehe” ehi.

¹⁹ Iyavei, ¿osenducua pīha yuvireco? ¡osenducuaño ité! Esepia, yipindar Moisés omombehu icuachiapri pīpe aipo ehi:

“Perecatēhira che porovasasa rese oipisise ava ndahei vahe judío iyavei peñemoirora ayapose mbahe aviye vahe acoi ava, ndayaracuai vahe upe” ehi.

²⁰ Ipare omombehu tupri ité Isaías osiquiyeēhisave Tūpa ñehe aipo ehi vahe:

“Acoi ava ndache recaí vahe, ahe che pisi ité yuvireco.

Iyavei ayemboyecua acoi ava che rese ndoporandui vahe upe” ehi.

²¹ Judío recocuer rese avei rumo aipo ehi: “Ari rupi ñehe tēi ava che reroyasarēhi ndiporeroyai vahe upe vichico” ehi aracahe.

11

Moviŕo tēi ava Israel pendar Tūpa oiporavo oyeupe nara

¹ Evocoyase, ¿omombo pīha Tūpa ava Israel güembiporavo eta oyesui? ¡Aní eté! Esepia, che avei niha ichuindar aico. Abraham niha che ramoí eté, Benjamín suindar avei aico.

² Yipisuive ité niha Tūpa, “Co ava cheundar ité” ehi ore ramoí israelita upe. Sese cūrítei ndore momboí eté oyesui. Peicua niha acoi Elías resendar icuachiapri aracahendar oyerocuí tēise omu israelita rese aipo ehise Tūpa upe:

³ “Che Yar, nde ñehe mombehusareta opa oyuca yuvireco. Ndeu porerecosa reropovēhesa renda avei opa omombo yuvireco. Che güeraño aicove vitemi nde reroyasar. Che yuca potaño avei eté rumo yuvireco” ehi.

⁴ Tūpa rumo omboyeví chupe: “Aipeha rumo siete mil tupri ava che mboyeroyasar cheyeupe nara noñenopihai vahe Baal rahanga rovai yuvireco” ehi.

⁵ Ēgüe ehi avei cūrítei opita viteño moviŕo judío, ahe niha Tūpa oiporavo oporoaisusa pīpe.

⁶ Ipipe ité niha Ēgüe ehi, ndahei eté que ava rembiapo sui oiporavo. Ava rembiapo suise rumo, ahese ndahe iri chira poroaisusa pīpe viña.

⁷ Evocoyase judío eta ndosecai eté mbahe oipotá catu vahe Tūpa suindar yuvireco. Sembiporavo ete ité rumo oipisi yuvireco. Ambuae upe rumo Tūpa omboavai catu viroya āgua.

⁸ Icuachiapri pīpe aipo ehi aracahe: “Tūpa nomboyecua uca iri mbahe secocuer pīpe. Cūrítei Ēgüe ehiño vite ité yuvireco. Omondo tēi sesarā; ipipe rumo ndosepia ucai mbahe chupe. Omondo tēi avei yapisaguā; ipipe ndosenducua ucai mbahe chupe” ehi.

⁹ Iyavei David aipo ehi aracahe:

“Ipietasa ivonde nungar iyavei pira mbohasa nungar tasecoi chupe.

Ipipe sui toyuviroha mbahe tēi pīpe yuvireco, toyemombaraisu uca avei ipipe yuvireco.

¹⁰ Toicua eme mbahe inungar ndasesapisoi vahe yuvireco.

Icuhapapri nungar ayase toyuvirecoi apirēhi vaheŕā” ehi.

Ndahei vahe judío ñepisiro agüer

¹¹ Evocoyase areco iri che porandusa pēu: ¿Apirēhi vaheŕā ité pīha judío eta ndoyeroyai Jesucristo rese oñepisiro āgua yuvireco? ¡Aní eté! Ahe rumo Ēgüe ehi ava ndahei vahe judío pīsirosa pisi āgua yuvireco. Ipipe sui oyemonguerēhi catura judío ipisi āgua yuvireco curi.

¹² Evocoyase judío eta rembiavi sui tuvichá Tūpa poroparaisuerecosa oime opacatu ava ndahei vahe judío upe. Coiye rumo tuvicha catu itera Tūpa poroparaisuerecosa opacatu ava upe oyevise yuvireco chupe.

¹³ Che rumo areco che ñehesa pēu pe ndahei vahe judío. Tūpa niha che cuai oñehe mombehu āgua ndahei vahe judío upe. Sese, “Aviye ai eté che poraviquisa” ahe che mu judío rovaque yepi.

¹⁴ Sendusa sui aviyeteramo oimera ipāhuve oyemonguerēhi vahe pīsirosa Tūpa suindar pisi āgua oyeupe nara yuvireco.

¹⁵ Esepia, judío mombosa pīpe sui Tūpa omoime ñerosa opacatu ava co ivi pipendar upe. ¿Mara ehira pīha evocoyase Tūpa ipisise? Ahese oipisira tecovesa apirēhi vahe yuvireco, evocoyase ndoyuvireco iri chira omano vahe nungar Tūpa upe.

¹⁶ Esepia, yipindar panguā sui yapopri seropovēhese Tūpa upe, opacatu panvī evocoyase sovasapri avei ichuí. Iyavei inungar ivira rapo seropovēhese Tūpa upe viña, sāca avei evocoyase opacatu Ēgüe ehi aveira viña.

¹⁷ Amove che mu judío inungar Olivo rāca yasiapri. Pe evocoyase ndahei vahe judío ivira caha pipendar rāca nungar peico vahe, peso yasiapri rendagüerve, ipipe sui peipisi viracuasa pe recove āgua.

¹⁸ Aní chira rumo, “Yande aviye catu vahe yaico ivira rāca nungar yipindar yuvirecoi vahe sui” peye pe yeecomboivate aisa pipe. Esepia, ndahei pe sui judío oipisi oyemoviracua āgua yuvireco, pe rumo yipindar ichui eté peipisi pe yemoviracua āgua.

¹⁹ Iyavei, “Co judío rumo imombosa ité ivira rāca asiapri nungar yande sendagüerve yapita vaherā” peye revo.

²⁰ Supi eté, co rumo Tūpa reroyaēhi pipe ahe imombosa ichui yuvireco, pe rumo seroya pipe suño ité pepita sendagüerve. Sese peicua catu, aní chira peyemboivate ai ipipe.

²¹ Esepia, Tūpa oiporavo co judío oyeupe nara ité viña, ndoviroyaise rumo, ndoipisii eté. Pēu avei ēgüe ehira ndapemboyeroyaise.

²² Peyapisaca tupri, Tūpa niha aviye vahe ité. Seco pīrata vahe avei rumo ava viroyaēhisar upe. Pēu rumo aviye ité. Peicoño catu iporoaisusa pipe; aviyeteramo ndapeicoise supi, pe avei yasiapri nungar tēi peicora.

²³ Opoipase rumo judío eta Cristo reroyaēhisa sui, Tūpa evocoyase viroyevi irira oyeupe nara. Esepia, chupe iya ité ipisi iri āgua.

²⁴ Pe ndahei vahe judío ivira caha yipendar rāca yasiapri nungar peico, Tūpa rumo pe mondo ivira aviye vahe nungar rese. ¡Evocoyase judío ete ité inungar ahe ivira aviye vahe rāca yasiapri, ahe ivate catu oipisi irira oyeupe nara!

Ipa vahe judío ñepisiro agüer

²⁵ Che rivireta, che aipota, “Toicua Tūpa remimbotar icuapirēhi oyemboivate aiēhi āgua yuvireco” ahe pēu. Esepia, amove Tūpa judío upe omboavai viroya āgua. Ahe rumo, “Tache reroyapa rane ité ndahei vahe judío che rese yuvirecoi pota vahe” ehi vite pēu.

²⁶ aheses ramo opacatu ava judío yuvirecoi vahe Tūpa oipisirora. Esepia, icuachiapri arachendar pipe aipo ehi:

“Oura ava Pīsiosar judío recua Sión pāhu sui, ahe oipehara mbahe naporai vahe opacatu judío sui.

²⁷ Evocoi niha che remimbotar chupe nara, amocañise yangaipagüer yuvireco ichui” ehi.

²⁸ Ēgüe ehi cūrteite judío eta ndosendu potai ñehesa pīsirosa resendar yuvireco. Sese Tūpa amotarēhisar yuvirecoi. Pēu mbahe tupri āgua rumo ēgüe ehi. Tūpa rumo osaisu vite. Esepia, yipive ité oiporavo tamoi eta oyeupe.

²⁹ Supi eté, Tūpa ndoviroyevi iri eté mbahe güemimondo iyavei ndovirova-rova tēi vahe opihañemoñetasa güembiporavo sui.

³⁰ Yipindar niha pe ndapemboyeroyai eté Tūpa. Cūrteite rumo judío eta ndoviroyaise yuvireco, pe paraisuereco Tūpa.

³¹ Ēgüe ehi avei judío eta cūrteite ndoviroyai yuvireco. Tūpa pe paraisuereco uca āgua rumo ēgüe ehi yuvireco. Coiye inungar pe, judío avei osupitira Tūpa poroparaisuerecosa yuvireco.

³² Esepia, Tūpa ité, “Opacatú oyavi mbahe che reroyaēhisa pipe” ehi ‘oicuae mbahe güembiavi, tiquerēhi opacatú che poroparaisuerecosa pisi āgua yuvireco’ oya.

³³ ¡Mara ehi rutei Tūpa aracuasa, imbahecuasa avei? Ndipoi chietera que ava yaracuasa mombehu tupri āgua. Ndayaicatui avei secocuer cuapa tupri āgua.

³⁴ Ndipoi eté que ava oicua vahe yande Yar pihañemoñetasa iyavei ndipoi eté que ambuae ava tēi ombohe vahe no.

³⁵ Ndipoi que ava mbahe omondo vahe yande Yar upe ‘tomboyevi cheu’ ohesave.

³⁶ Esepia, Tūpa suiño ité niha opacatu mbahe oime, oyeupe nara avei mbahe oyapo opiratasa pipe. ¡Sese imboeteipri ité Tūpa tasecoi yepi! Ēgüe tehi apirēhi.

12

Yande recocuer imondopri Tūpa upe nara

¹ Sese che rivireta, che Tūpa poroparaisuerecosa pipe aipota pe yemondo ité pe recove-seve chupe nara, inungar mbahe Tūpa upe seropovēhepri ité, ahe aviye itera chupe. Ahe niha pe cuaita pe piha pipe sui eté peyapo vaherā chupe.

² Peico iri eme co ivi pīpendar pihañemoñetasa tēi rupi. Iyacatu rumo pesecuñaro pe pihañemoñetasa. Ipipe sui opacatu pe recocuer oñecuñarora. Ēgüe peyese, peicuara Tūpa remimbotar ahe mbahe aviye vahe, semimbotar supi tupri vahe ité.

³ Tūpa niha oporovasasa pipe che cuai, sese aipo ahe pēu: pepihañemoñeta eme pe yemboivate ai āgua rese. Iyacatu rumo peicua tupri pe pihañemoñetasa peyesendar Tūpa pēu mbahe imbougüer rupi sese pe yeroyasa pipe.

⁴ Inungar yande rete ñepeño ité, sesendar rumo setá, iyavei ndahoyoyai mbahe sembi-apo.

⁵ Ēgüe yahe avei yande, yepe que yande retara viña, Cristo rese yayemboyase rumo, ñepeí vahe nungar yaico. Evocoyase yande ñepeí-peí opacatu upendar yaico.

⁶ Tūpa niha omboyeavirati mbahecuasa imbou oporoaisusa pipe ñepeí-peí upe. Evocoyase Tūpa ombouse oñehe mombehu āgua yandeu, yamombehura ñepeí-peí iñehe sese yande yeroyagüer rupí.

⁷ Que ombouse mbahecuasa ambuae ava pñitívii āgua yandeu, yaipñitívii tuprí aveira. Ombouse yande porombohe āgua, yaporombohe tupríño itera.

⁸ Iyavei ombouse yandeu ambuae ava monguerēhi āgua, yaporomonguerēhiño itera. Ombouse yande poropñitívii āgua ava mbahe ndovirecoi vahe upe, yamondoño itera mbahe chupe yande recatēhiēhisave. Acoi oporocuai vahe, toyapoño oquerēhisa pipe; iparaisu vahe pñitíviiisar, toipñitíviiño avei vorivetesá pipe.

Cristo reroyasar cuaita

⁹ Iyavei peyeaisu tuprí ité; aní pesepia potara mbahe tēi, iyacatu rumo peicoño itera mbahe aviye vahe pipe.

¹⁰ Peyeaisu catu ñepeí-peí oyeivri nungar tuprí pe recosa pipe. Pe ae peyemboetei rāgüer sui pemboetei catura ambuae ava Jesús reroyasar.

¹¹ Peyemonguerēhi, aní ndapequerēhii chira iyavei peyapo yande Yar upe mbahe opacatu pe recoete pipe.

¹² Peicoño pe viharetasave mbahe íva péndar rārosa pipe; peñemosañño mbahe rasicuer peiporarasé iyavei aní chira peseya pe yeruresa yepi.

¹³ Peipñitívii ambuae ava Cristo reroyasar mbahe ipanese chupe, pemohapisira ava oyepota vahe pe piri.

¹⁴ Peyerure pe amotarēhimbar rese; peporandu Tūpa porovasasa rese ahe ava upe nara; aní pe avei peñehe mara chupe.

¹⁵ Peyembovíha acoi ava oyembovíha vahe rupive; peyaseho avei ava oyaseho vahe rupive.

¹⁶ Peico tuprí oyoya guasu ñepeí-peí oyese pe yeaisusa pipe. Aní chira peyecomboivate ai. Iyacatu rumo peyemoingatu ava seco mbegüemi vahe mbori āgua. Aní peñemoha imbahecua vai vahe nungar.

¹⁷ Aní pēu mbahe tēi aposar upe pembojevira mbahe tēi avei. Peyapo catu mbahe tuprí opacatu ava rembiepiave.

¹⁸ Peicatu vahe rupí peseca pe reco tuprí āgua opacatu ava upe.

¹⁹ Che rivireta, aní pe ae pembojevi mbahe tēi pipe pe rereco momarasar upe. Peseyaño Tūpa upe. Ahe oicura chupe. Esepia, icuachiapri pipe aipo ehi: “Che ité aicura ava mbahe tēi aposar upe. Che amboepira” ehi yande Yar.

²⁰ Iyavei aipo ehi: “Acoi nde amotarēhimbar ndasiepoise, emondo mbahe itohu, iyavei acoi ihuseise, eremondora itoihu. Esepia, ēgüe peyese pe amotarēhimbar upe, ochíra pe sui” ehi.

²¹ Aní mbahe tēi upe peyecopi uca. Iyacatu rumo pesecopira mbahe-mbahe tēi mbahe tuprí aposa pipe.

13

¹ Opacatu mborerecuar yuvirecoi vahe pemboyeroyara. Esepia, ndipoi mborerecuar ndovirecoi vahe ocuaita Tūpa suindar. Co oime vahe rumo semimbou ité.

² Sese acoi mborerecuar upe que mara ehi vahe, Tūpa porocuita roroyaēhisar yuvirecoi. Ēgüe ehi vahe inupambri yuvirecoira.

³ Esepia, mborerecuar yuvirecoi vahe ndahei ava seco tuprí vahe mbosiquiye āgua yuvirecoi, ahe rumo yuvirecoi ava mbahe tēi aposar mbosiquiye āgua. Ndayasiquiye potaise mborerecuar sui, iya yaicora mbahe tuprí pipe. Mborerecuar evocoyase, “Aviye” ehira yande reco catuprisa rese yandeu.

⁴ Esepia, ahe Tūpa rembiguai mbahe tuprí apo āgua yandeu. Acoi mbahe tēi yayapose rumo, yasisiquiyera ichui. Esepia, ahesé mborerecuar yande nupaño itera yuvireco. Ahe niha Tūpa remimbotar rupí eté icuaita ava mbahe tēi aposar nupa āgua yuvireco.

⁵ Sese iya yamboyeroya ité mborerecuar; ndahei rumo ahe yande nupaēhi āgua reseño, yande pihañemoñetasá momaraēhi āgua rese avei.

⁶ Sese avei yamondora guarepochi mborerecuar upe yuvireco yandeu oporanduse. Esepia, ahe mborerecuar Tūpa rembiguai yuvirecoi. Evocoyase aheño ité iporaviquisa yuvireco.

⁷ Yamondo ñepeí-peí ava upe mbahe chupendar. Iya ité yamondo mborerecuar upe guarepochi oporanduse sese, yamboetei avei ava imboyeroyapri.

⁸ Aní yandereve. Ahe yande cuaita. Yande cuaita avei yande yeaisu água, supi eté acoi ava osaisu vahe ambuae ava, omboaviye ité Tüpa porocuaita.

⁹ Aipo ehi acoi Tüpa porocuaita: “Ndapeyemboaguasai chira, ndapeporoyucaí chira, ndapemondai chira, ndaperemirai chira, ndapeipota rai chiaveira ambuae ava mbahe” ehi. Co iyavei opacatu ambuae Tüpa porocuaita sendusa tupri ité co ambuae ñehesa rese: “Pesaisu ava pe yeaisu nungar” ehi.

¹⁰ Acoi vireco vahe oporoaisusa, ahe ndoyapoi eté mbahe ava upe; sese poroaisusa pipe imboaviyesa tupri ité porocuaita.

¹¹ Iyavei peicua tupri co mbahe oime vahe yandeu. Cūrítei ari osupiti ité yandeu yande yemopoase água. Esepia, yande Yar yevi água cōimi catu yandeu ñehengagüer yipindar seroyasa sui.

¹² Supi eté osupiti senimi ari yandeu; sese iyacatu yapoi pītumimbi vahe nungar mbahe-mbahe tēi aposa sui mbahe icatupri vahe pipe yande reco água. Evocoiyase tayaico sundao oyopeisa omonde vahe nungar.

¹³ Yande catu yaguata yande reco ñi tuprisa pipe, inungar yaguatase ari pipe. Aní catu yaico caguar pipe tēi iyavei pieta siapu tēi vahe rupi, ndayande poropota rai chiaveira, iyavei ndayayapoi chira mbahe tēi, ndayaicoi chiaveira yande pihañemoñeta ndahoyoyai vahe pipe, ambuae ava mbahe pota raisa pipe avei no.

¹⁴ Iya rumo yarecora yande Yar Jesucristo recocuer yande yese, aní yande pihañemoñeta mbahe-mbahe tēi apo água yande remimbotarai pipe.

14

Aní peroïro ambuae Jesús reroyasar

¹ Acoi ava ndoyeroa tupri vitei vahe yande Yar rese que oiquese pe piri, peipisi tuprira; aní peiñehepoepira ipihañemoñetasa ndahoyoyaise pe pihañemoñeta rese.

² Esepia, amove evocoi nungar ava ihupri pãve tēi yuvirohu, oime rumo amove ava ipihañemoñeta opacatu mbahe hu água rese.

³ Acoi ava opacatu mbahe ohu vahe, toviroïro eme amove ndohui vahe mbahe iyavei acoi amove ndohui vahe mbahe, toviroïro eme acoi ohu vahe opacatu mbahe. Esepia, evocoi nungar ava Tüpa oipisi ité.

⁴ Supi eté pe ndiyai eté peroïro vaheã ambuae ava rembiguai. Esepia, ahe yande Yar povri pendar secói. Yepe ndoyaviise mbahe ipipe, anise ichui oviapise mbahe tēi pipe, serecuar ité oicuaru chupe. Esepia, yande Yar opíratasa pipe osecomoingatuño itera.

⁵ Oime avei amove ava ñepeí ari omboetei catu yuvireco ambuae ari sui, iyavei ambuae oime aipo ehi: “Oyoya guasũño ité niha ari” ehi vahe. Ñepeí-peí opihañemoñeta rupi, “Co supi tupri vahe” ehira opiha pipe yuvireco.

⁶ Acoi que ñepeí ari ava omboetei vahe, yande Yar mboeteisa pipe rumo ègüe ehi. Iyavei ohu vahe opacatu mbahe, Yar mboeteisave avei ègüe ehi. Esepia, ahe güembiapo rese, “Aviye ndeu” ehi Tüpa upe; iyavei acoi amove ndohui vahe mbahe, Yar mboeteisave ègüe ehi, iyavei, “Aviye ndeu” ehi avei Tüpa upe.

⁷ Esepia, yande ñepeí-peí ndayaicoi yandeyeupe nara tēi, ndayamanoi avei yandeyeupe nara.

⁸ Esepia, yaicove vitese, yaico yande Yar upe nara; yamanose, yamano yande Yar upe nara avei. Ègüe vahe yande yaicove vitese, anise yamanose, opacatu chupe nara ité yaico.

⁹ Sese niha Cristo omano, ipare ocuerayevi opacatu ava Yar güeco água que omano vahe, anise que oicove vite vahe upe avei.

¹⁰ ¿Mahera evocoiyase peroïro pe mboetasa Cristo reroyasar iyavei mahera ndapesepia potai? Esepia, supi eté niha yande opacatu yasora Tüpa rovai. Ahe evocoiyase opara oporandu yande recocuer rese yandeu.

¹¹ Esepia, icuachiapri arachendar pipe omombehu: “Supi eté che reco pipe aipo ahe, ehi yande Yar, opacatu ava oñenopihara che rovai yuvireco, iyavei che mboeteira yuvireco, ehi” ehi.

¹² Evocoiyase yande ñepeí-peí yamombehura yande recocuer Tüpa upe.

Aní pe rivireta mbahe tēi pipe pereco uca

¹³ Sese yande ndiyai yañeroïro. Iyacatu rumo ñepeí reseve pereco tupri ambuae pe rivri, angaipa pipe sereco ucañhi água, iyeroyasa momarañhi água avei.

¹⁴ Che yande Yar reroyasar che reco pipe aicua ndipoi eté que tembihu yande reco momara vahe. Amove rumo ava, “Mbahe tēi co tembihu, ndiyai yahu” ehise, ahe chupe evocoiyase mbahe tēi, ndiyai eté ihu água.

¹⁵ Iyavei yande que mbahe yahuse, ipipe yamomara tēise yande rivri pihañemoñetasa Tūpa rese, ndahei evocoyase yande poroaisusa pipe ité ěgüe yahe. ¡Aní ahe yamocañi tēi uca Cristo sui evocoi nungar mbahe yahu vahesa pipe! Esepia, secocuer rese Cristo omano.

¹⁶ Yepe que mbahe aviye yande uca viña, ndayayapoi chira rumo evocoi nungar yande rembiapo rese ava ñehe-ñehe tēiēhi āgua.

¹⁷ Esepia, ndahei ivate catu vahe Tūpa upe yande carusa, yande igua avei ipovrive yande recose. ěgüe ehi rumo co ivate catu vahe chupe yande recocuer mohivisa, yande reco tuprisa ambuae Tūpa reroyasar pāhuve iyavei yande rorivetes yareco vahe Espiritu Santo sui.

¹⁸ ěgüe yahese Cristo mboeteisave, aviye aira Tūpa upe iyavei opacatu ava rembiepiave avei no.

¹⁹ Sese opacatu yande recoeté pipe yasecara yaico tupri vahe rā yandeyeupe. Ipipe sui yande yaicatura yañepitivi yande yemoviracua tupri āgua yande Yar rese.

²⁰ Aní pemocañi uca tēi ava recocuer Tūpa remipisiro tembihu sui tēi. Opacatu niha co tembihu aviye aiño ité; ndiyai eté rumo yahu que tembihu ambuae ava Cristo reroyasar pihañemoñetasa momara āgua.

²¹ Aviye catu ndayahuse mbahe roho, que ndayahuse uva ricuer iyavei que ambuae mbahe ndayayapose, ambuae ava Cristo reroyasar angaipa pipe seiti uca iriēhi āgua.

²² Yande pihañemoñetasa yareco vahe rumo yarecoñi itera yandeyeupe ité Tūpa rovaque. ¡Aviye ai catuño ité ava acoi, “Aviye yayapose evocoi nungar mbahe” he pare, “¿Mara ehi pīha?” ndehi irise opihañemoñetasa pipe!

²³ Acoi que ava, “¿Mara ehi pīha?” ehise tembihu upe. Ipare rumo ohuse, ahe evocoyase oyemboangaipa ipipe. Esepia, ndohui Tūpa rese oyeroyasa pipe. Iyavei ava, “¿Mara ehi pīha?” ehi vitesse que mbahe upe, ipare oyapose ité, ahe angaipa.

15

Yambovihara ava yande cotindar, ndahei chira yande ae tēi yayembovihara

¹ Yande yayemoviracua catu vahe Cristo rese yande yeroyasa pipe, iyacatu yande teieté yañemosañora ava Tūpa rese ndipihañemoñeta tupri vitei vahe rese. Ndahei chira rumo yande ae tēi yayemboviha.

² Iyacatu rumo opacatu yande yambovihara ava yande cotindar, yayapo aveira mbahe aviye vahe seco aviye āgua yuvireco chupe ‘toyeroya catu opihañemoñeta pipe Tūpa rese yuvireco’ yande yapave.

³ Esepia, Cristo ndahei ahe ae oyemohapisi, ahe rumo oyapo mbahe, icuachiapri mombehusa rupi tupri ité acoi omombehu vahe: “Nde rese ñehe-ñehe tēi opa aipisi” ehi.

⁴ Supi eté co opacatu omombehu vahe aracahe opa icuachiasa yande mbohe āgua, yande yasāro vahe rā Tūpa reco porañetesa yande ñemosasa pipe iyavei yande pihamonguerēhisa pipe avei ahe yareco vahe ichuindar.

⁵ Tūpa, acoi ombou vahe yande ñemosasa, yande pihamonguerēhisa avei yande, tape pītivi oyoya guasu pe reco tupri āgua ñepepe-peyese Jesucristo recocuer rupi.

⁶ Ipipe sui pe opacatu oyoya guasu ñepepe pe pihanemoñetasa pipe, pe ñehe pipe avei tapemboetei Tūpa, yande Yar Jesucristo Ru.

Ñehesa pīsirosa resendar inombehusa ava eta ndahei vahe judío upe

⁷ Yepypisi tupri ñepepe-pe, inungar Cristo pe pisi tupri oyeupe nara Vu mboetei āgua.

⁸ Che rumo aipo ahe pēu: Jesucristo ou judío pītivi Tūpa remimombehugier mboaviye āgua judío ramo aracahendar upe. ěgüe ehi Tūpa oñehe mboaviyesa mboyecua

⁹ ‘tomboetei ava ndahei vahe judío yuvirecoi vahe che Ru Tūpa iporoparaisuerocosa rese yuvireco’ oyapave. Ahe ěgüe ehi icuachiapri rupi tupri ité aipo ehi vahe:

“Sese che oromboeteira opacatu ava ndahei vahe judío pāhu rupi, iyavei asapucaira nde rer mboeteisa pipe” ehi.

¹⁰ Iyavei acoi ambuae icuachiapri pipe omombehu avei no:

“¡Peyemboviha catu pe opacatu ndahei vahe judío peico vahe judío Tūpa rembiporavo reseve!” ehi.

¹¹ Ambuae pipe avei aipo ehi no:

“Pe opacatu ivi pipendar ava, ¡pemboetei yande Yar!” ehi.

¹² Isaías avei aipo ehi icuachía:

“Oimera niha ava Isaí suindar, opacatu ava rerecuarā secoira.

Ava ndahei vahe judío seseño ité oyeroyara yuvireco” ehi.

¹³ Tūpa acoi ombou vahe mbahe oyesuindar rāro āgua, tayande mboviharete catu iyavei mbahe tupri tayareco sese yeroyasa pipe. Ipipe sui tombou yasāro vahe rā ahe mbahe aviye vahe Espiritu Santo pīratasa pipe.

¹⁴ Che rivireta, ayeroya ité pe reco aviyesa rese, opacatu mbahe peicuapa tupri, peicatu avei pe ñepeí-peí peyeupe pe yemboaracua água.

¹⁵ Co tecocuer rese rumo aicuachía opacatu che siquiyeêhisa pipe pëu pe resaraiêhi água ichui. Esepia, ayapo Tüpa che cuaita ombou vahe che raisusa pipe cheu

¹⁶ Jesucristo rese che poraviqui água ava ndahei vahe judío recocuer aviye água. Evo-coiyase judío pahi nungar che cuaisa pipe amombehu co ñehesa Tüpa ombou vahe písirosa resendar yuvireco chupe imoporêhi água Tüpa rovai inungar mbahe seropovêhepri aviye vahe Tüpa upe Espiritu Santo pipe yepi.

¹⁷ Supi eté che Jesucristo reroyasar che recosa pipe aviharete Tüpa che cuaita rese.

¹⁸ Esepia, cheu ndiyai añehe vaheerã que ambuae mbahe rese: co mbahe Cristo oyapo uca vahe cheu ava ndahei vahe judío recocuer rese, seseño ité iyacatu cheu añehe vaheerã. Esepia, amonguerêhi Tüpa reroya água yuvireco che ñehe rese, che rembiapo sui avei.

¹⁹ Êgüe ahe poromondiisa mbahe yavai vahe apo Tüpa pîratasa pipe. Ahe ayapo Espiritu Tüpa suindar pîratasa pipe. Ipipe che amboaviye ñehesa Cristo resendar mombehu vichico. Tecua Jerusalén sui tupri aguata opacatu rupi, ayepota ivi Iliria ve avei no.

²⁰ Chequerêhi avei co ñehesa písirosa resendar mombehu água ava Cristo recocuer ndosendui vahe upe yepi. Ndahei rumo ambuae ava imboaracua pare têi,

²¹ che rumo ayapo inungar icuachiapri pipe omombehu vahe:

“Ava ndocuai vahe ité, ahe osepiara yuvireco curi, acoi ndosendui vahecuer, osenducua tupri aveira secocuer yuvireco no” ehi.

Pablo ipihañemoñeta Roma ve oso água

²² Co rese têi che ndaicatui aso pe pîri, yepe setá rupi aso pota têi viña.

²³ Cûritei rumo opa amboaviye che poraviqui co ivi rupi, iyavei opa têi setá araviter pe piri che sosa rãgüer.

²⁴ España ve che soseve, apita pucumira vicho pe pîri yande yemboviha água. Iyavei pe sui che sê potase, che pîtiviimira peye aheve che so água.

²⁵ Cûritei rumo che asora Jerusalén ve. Arasora porerecosa ahe pendar yande mboetasa Jesús reroyasar pîtivii água.

²⁶ Esepia, ivi Macedonia pendar iyavei Acaya pendar Jesús reroyasar, ahe omonuha guarepochi yuvireco Jerusalén ve yande rivri iparaisu vahe pîtivii água yuvireco.

²⁷ Ahe êgüe ehi güemimbotar rupi yuvireco iyavei iya ité imboyevi água yuvireco chupe ahe mbahe tupri oyeupe apo agüer rese. Esepia, yîpindar Jesús reroyasar judío yuvirecoi vahe oicua uca co tecocuer Tüpa suindar ahe ava ndahei vahe judío yuvirecoi vahe upe. Sese iya ité imboyevi água co ivi pipendar porerecosa chupe.

²⁸ Opase che co porerecosa amondo yuvireco chupe, España ve che sose, ahese apitara vicho pe pîri.

²⁹ Che amoha voi eté asose eipeve, tuvichá omboura Cristo oporovasasa yandeu.

³⁰ Che rivireta, yande Yar Jesucristo rer pipe iyavei yeaisusa Espiritu ombou vahe pipe avei aporandu pëu opacatu che rese peyeroqui pîrata vaheerã Tüpa upe che pîtivii água co mboraviqui rese.

³¹ Peporandu Tüpa upe, tache repi ava Jesús reroyasarêhi sui ivi Judea ve, iyavei Jerusalén pendar yande rivireta co porerecosa pisi tupri água avei.

³² Ahese Tüpa oipotase, che aviharetera ayepotase pe repia, iyavei toime pîthusa yandeu che pe pîri che sose.

³³ Êgüe tehi Tüpa güeco tuprisa pipe tasecoi opacatu pe rese.

16

Pablo mahenduhasa ñepeí-peí ava upe

¹ Co yande reindri Febe serer vahe, ahe oipîtivii tecua Cenrea pendar Cristo reroyasar oico.

² Peipisi tupri catu yande Yar rer pipe; ahe niha yande cuaita Cristo reroyasar yande recose, iyavei peipîtiviiño que mbahe chupe ipane vahe rese. Esepia, ahe setá ité oporopîtivii iyavei che avei eté che pîtivii no.

³ Pemombehu che mahenduha Prisca upe, Aquila upe avei, ahe niha che pîtivii mboraviqui Jesucristo recocuer resendar rese yuvireco.

⁴ Ahe avei niha mbahe têi pipe omondo güecocuer che repicave yuvireco, sese, “Aviye” ahe chupe, iyavei ndahei che güeraño aipo ahe, opacatu yande rivri ndahei vahe judío aipo ehi avei yuvireco chupe.

⁵ Pemombehu avei che mahenduha sêtave oñemonuha vahe upe yuvireco. Pemombehu avei che mahenduha che rembiaisu Epeneto upe. Ahe rane niha yîpindar ivi Asia pendar Cristo reroyasar.

⁶ Pemombehu avei che mahenduha María upe. Ahe niha oporaviquí iteanga vahe pe recocuer rese.

⁷ Pemombehu avei che mahenduha che mu Andrónico iyavei Junias upe. Ahe niha che mboetasa yuvirecoi che roquendasave; ahe avei apóstol remimboyeroya yuvirecoi, ahe rane avei yipindar Cristo reroyasar yuvirecoi che sui.

⁸ Pemombehu avei che mahenduha che rembiaisu Ampliato upe yande Yar rese secosa pipe.

⁹ Pemombehu avei che mahenduha Urbano upe. Ahe niha yande ndugüer oporaviquí vahe Cristo recocuer rese, che mboripar Estaquis upe avei.

¹⁰ Pemombehu avei che mahenduha Apeles upe. Ahe niha güecoãhasa sui osê tupri vahe Cristo rese oyeroyasa pipe. Iyavei pemombehu che mahenduhasa ava Aristóbulo rêta pipendar yuvirecoi vahe upe avei.

¹¹ Pemombehu avei che mahenduha che mu Herodión upe, ava Narciso rêta pipendar yande Yar reroyasar upe avei.

¹² Pemombehu avei che mahenduha Trifena upe iyavei Trifosa upe. Ahe niha oporaviquí vahe yande Yar upe nara yuvireco, iyavei yande rembiaisu yande reindri Pérsida. Ahe avei niha oporaviquí ité yande Yar upe nara.

¹³ Pemombehu avei che mahenduha Rufo upe, ahe niha icuapri ité Jesús reroyasar seco rese. Iyavei ichi, ahe che si nungar ité secoi.

¹⁴ Pemombehu avei che mahenduha Asíncrito upe, Flegonte upe, Hermes upe, Patrobas upe, Hermas upe iyavei opacatu ambuae yande rivireta supi yuvirecoi vahe upe avei.

¹⁵ Pemombehu avei che mahenduha Filólogo upe iyavei Julia upe, Nereo upe iyavei seindri upe, Olimpás upe, opacatu yande rivri yande Yar rese yuvirecoi vahe ipirindar upe avei.

¹⁶ Peyeovaupite catu pe reco maranehisa pipe che mahenduha mombehuse peyeupe. Opacatu Cristo reroyasar cohava omondo avei omahenduhasa yuvireco pëu.

¹⁷ Che rivireta, peicua catu pe pâhu pendar omboyaho pota serai vahe sui. Oime ava êgüe ehi vahe, oiti uca vahe ava mbahe têi pipe. Esepia, ahe ndahei eté co ñehesa pe yembohesa rupi yuvirecoi. Sese evocoi nungar ava sui peyepipiño itera.

¹⁸ Esepia, ahe ava ndahei yande Yar Jesucristo upe nara oyapo mbahe yuvireco. Êgüe ehi rumo ahe oyeupe nara têi oipota rai mbahe yuvireco. Iyavei ombopa ava ndayaracua tupri vahe; oñehe tupri ai angahu oporomohapisi aisa pipe têi yuvireco.

¹⁹ Opacatu ité icuasa pe poreroyasa. Sese che aviharete vichico. Che rumo aipota pemboyecua vahe rã pe mbahecua mbahe aviye vahe apo âgua, ndahei mbahe têi apo âgua.

²⁰ Evocoiyase Tüpa güeco tuprisa pipe pihaivi Carugar osecopiã tupri itera. Pe avei evocoiyase pesecoreroyira. Yande Yar Jesucristo tape rovasa.

²¹ Omondo avei omahenduhasa Timoteo pëu. Ahe che pitivii che poraviquisa rese yepi. Iyavei che mu Lucio, Jasón, Sosípater, ahe avei imahenduha yuvireco pe rese.

²² Che, Tercio, aicuachía vahe co ñehesa pëu, che avei che mahenduhasa amondo yande Yar reroyasa pipe pëu.

²³ Omondo avei omahenduhasa Gayo pëu. Ahe sêtave ité niha aque yepi, ipiri avei ambuae Jesús reroyasar oñemonuha yuvireco yepi. Iyavei Erasto omondo omahenduhasa opacatu pëu, ahe tecua mbahe guarepochi apocatusar. Yande rivri Cuarto avei omondo omahenduhasa pëu.

²⁴ Aviye, yande Yar Jesucristo tape rovasa opacatu.

Pablo omboetei Tüpa

²⁵ ¡Yamboetei Tüpa! Ahe niha oicatu pe moviracua co ñehesa ñepisirosa resendar amombehu vahe rupi iyavei co porombohesa Jesucristo recocuer resendar rupi avei. Ahe oyoya tupri ité Tüpa omboyecua ramo vahe cheu co ivi apoñhi suive mbahe ndicuasai vahe rese.

²⁶ Cüritei rumo oyecua uca oñehe mombehúsar rembicuachía pipe Tüpa apirêhi vahe porocuaita rupi cute. Ahe ñehesa ndicuasai vahe omboyecua uca opacatú ava upe 'toviroya sese oyeroyasa pipe yuvireco' oya.

²⁷ ¡Tüpa güeraño imbahecua vahe yepi, êgüe tehi ahe yande Yar Jesucristo rer pipe imboeteipri tasecoi!

YIPINDAR PABLO REMBICUACHIA CORINTO PENDAR UPE CORINTIOS

Pablo mahenduhasa Jesús reroyasar Corinto pendar upe

¹ Che Pablo, yande riviri Sóstenes reseve, oromondo co ore mahenduhasa opacatu pëu. Tüpa niha, güemimbotar rupi, che poravo apóstol che reco ägua.

² Aicuachía co che ñehe pëu, pe Jesús reroyasar peñemonuha vahe Tüpa upe tecua Corinto ve. Peicua niha pe ipehapri peico Tüpa upe nara ité Jesucristo rese peicose. Peicua avei niha Tüpa pe poravose oyeupe nara pe reco catupri ägua, inungar opacatu ambuae seroyasar co ivi pipendar omboetei vahe yande Yar Jesucristo rer yuvireco. Supi eté niha Jesucristo, ahe opacatu ava Yar, yande Yar avei.

³ Yande Ru Tüpa, yande Yar Jesucristo tape rovasa pe reco tupri ägua.

Jesucristo suindar porovasasa seroyasar upe

⁴ Che, “Aviye ndeu” aheño ité Tüpa upe pe recocuer rese yepi. Esepia, Tüpa pe rovasa ité Jesucristo rese peicose.

⁵ Ègüe ehi secocuer pipe sui Tüpa ombou opacatu pe reco tupri catu ägua, pemombehu tupri vahe rä imbahecuasa, opacatu mbahe supi eté vahe cua tupri ägua avei.

⁶ Esepia niha, ore co ñehesa Jesucristo resendar pëu imombehusa pipe sui pe recuñaro uca ité.

⁷ Sese ndipoi eté que porovasasa Tüpa Espiritu suindar ipane vahe pëu yande Yar Jesucristo yevi ägua pesärose.

⁸ Tüpa niha pe moviracuaño itera pe rereco ari cañisa pipe Jesucristo yevise voi curi ‘tipo eme que mbahe tēi secocuer rese yuvireco’ ohesave.

⁹ Ahe acoi omboaviye vahe ité oñehengagüer yande poravo Guahir yande Yar Jesucristo rese yande reco ägua.

Jesús reroyasar pihañemoñetasa ndahoyoyai vahe resendar

¹⁰⁻¹¹ Che rivireta, che amombehu potami mbahe pëu yande Yar Jesucristo rer pipe. Esepia, Cloé mu pe mombehu yuvireco cheu: “Oñemoiro-iro yuvireco oyeupe ae” ehi. Sese aipo ahe pëu: pemboyoya catu pe pihañemoñetasa, ndapeyemboyahoi chira peyesui. Peico catu pe yeaisusa pipe. Ichui tahoyoya pe pihañemoñetasa, tahoyoya avei mbahe pe remimbotar.

¹² Supi eté amove aipo, “Ore Pablo rupindar oroico” peye tēi; ambuae evocoyase, “Aní, ore rumo Apolos rupindar oroico” ehi; ambuae, “Ore Pedro rupindar oroico” ehi; ambuae, “Ore Cristo rupindar oroico” aipo peye-peye tēi aipo peico.

¹³ Cristo rumo vireco porombohesa ndoyaho-yaho tēi vahe! ¿Che tie amano curusu rese pe angaipira repirã? anise, ¿che rer pipe tie peñepiramo uca peico?

¹⁴ ¡Aviye Tüpa upe che ndopoãpiramoise! Crispo iyavei Gayo, ahe güeraño rumo añapiramo yuvireco cuese.

¹⁵ Sese ndipoi chira “serer pipe ñapiramosa” ehi vahe yuvireco cheu.

¹⁶ Estéfanas rêta pendar avei añapiramo yuvireco, ipare ndipo iri revo ambuae ava añapiramo vahecuer.

¹⁷ Cristo niha nomombehui che poroãpiramo ägua. Ègüe ehi rumo che cuaita ñehesa ñepisirosa resendar mombehu ägua tēi. Iyavei ndahei ñehesa yavai catu vahe aiporu. Esepia, nañomi potai eté que chíhi co ñehesa pīratagüer Jesucristo curusu rese imano agüer resendar ava sui.

Cristo Tüpa pīratasa, imbahecuasa avei

¹⁸ Esepia, acoi ava ocañi tēi vahe rä upe co ñehesa curusu rese Cristo manosa resendar aviye ègüe ehi tēi vahe viña. Yande ipisiroproi yaico vahe rä upe rumo co ñehesa vireco ité Tüpa pīratasa,

¹⁹ inungar Isaías rembicuachiagüer pipe aipo ehi:

“Amocañira co ivi pipendar ava tēi mbahecuasa iyavei arocuara ava yaracua vai tēi vahe sui yaracuasa” ehi.

²⁰ ¿Mara ehi evocoyase co ivi pipendar ava imbahecuasa vai vahe, ava-ava tēi aracuasa cuapar avei, iyavei ñehe cua tupri ai vahe co ivi pipendar mbahe rese yuvireco? ¡Tüpa niha osecuñaro evocoi nungar mbahecuasa ègüe ehi tēi vahe pipe!

²¹ Ègüe ehi eté oaracuasa pipe ‘toicua eme che recocuer ava oaracuasa pipe tēi’ oya. Yepe, “Co ñehesa Cristo resendar ègüe ehi tēi vahe” ehi tēi ava yuvireco chupe viña, Tüpa rumo co ñehesa mombehusa sui ‘toñepisiro che Rahir rese yeroyasa pipe yuvireco’ oyapave yandeu.

²² Che mu judío osepia pota tēi mbahe poromondiisa ipīratá vahe iva pendar yuvireco. Griego evocoiyase osendu pota tēi ñehesa aracuasa resendar yuvireco no.

²³ Yande rumo, “Cristo omano curusu rese” yahe ava upe yaico. Amove judío upe mbahe tēi co ñehesa. Iyavei amove ndahei vahe judío, co ñehesa osenduse, aviye acoi ěgüe ehi tēi vahe yuvireco chupe.

²⁴ Yande rumo, Tūpa rembiporavo yaico vahe, que judío, anise que griego avei, yandeu co ñehesa Tūpa Rembiporavo Cristo resendar Tūpa pīratasa ité, imbahecuaasa avei.

²⁵ Esepia niha, ava upe, Tūpa suindar mbahe aviye acoi ěgüe ehi tēi vahe viña. Co Tūpa suindar rumo mbahecuaasa aviye catu vahe ité ava tēi mbahecuaasa sui iyavei acoi mbahe Tūpa suindar aviye nipiratai vahe ava upe viña, ahe rumo ipīrata catu ité opacatu ava tēi pīratasa sui.

²⁶ Che rivireta, peyemomahenduha catu co rese: Tūpa pe poravo, yepe pe pāhu pendar ndasetaimi imbahecuaa vai vahe ava rovaque yuvireco viña. Ndasetaimi avei pereco pe mu seco ivate vahe viña no.

²⁷ Evocoi ava, “Ndoicuai vahe mbahe yuvireco” ehi yuvireco pēu viña. Tūpa rumo pe poravo evocoi ava imbahecuaa vai vahe mochi āgua. Iyavei oiporavo ava pe pāhu pendar ndoicatu tuprii vahe yuvireco ava ipīrata vahe Tūpa cuaparēhi mochi āgua.

²⁸ Oiporavo avei co ivi pipe ava remieroiro seco mbegüemi vahe, ava seco ivi coti catu vahe pe pāhu pendar co ava seco ivaté vahe reroi āgua

²⁹ ‘toyemboivate ai eme que ava che rovaque yuvireco’ oya.

³⁰ Tūpa ité rumo yande mboyemboya Guahir Jesucristo rese, ahe avei ombou Guahir yande mboaracua āgua, yande reco mohivi āgua avei ‘toyuvirecoi cheu nara’ ohesave iyavei ‘ipīsipropi toyuvirecoi’ oya yandeu.

³¹ Sese inungar aipo ehi ñehesa icuachiapri aracahendar pipe: “Acoi ava oyecomboivate ai pota vahe, toyecomboivate catu yande Yar rembiapo rese” ehi.

2

Pablo omombehu curusu rese Cristo mano agüer

¹ Iyavei, che rivireta, che asose cuese, añehese pēu Tūpa suindar ñehesa supi eté vahe yipindar ndicuasai vahe pipe, nañehei co ivi pipendar tēi ava mbahecuaasa pipe, ñehesa ivate ai vahe pipe avei.

² Esepia, acoi aicose pe pāhuve cuese, ndachepihañemoñetai eté que ambuae mbahe rese; Jesucristo recocuer rese, yatica agüer rese catu ité che pihañemoñeta vichico.

³ Iyavei ndachepīratatai, aririi avei che siquiyepave pēu che sose.

⁴ Iyavei acoi añehese ñehesa pīsirosa resendar rese pēu, ndaiporui eté rumo ñehesa ivate ai vahe pe pihañemoñetasa rerova āgua. Che rumo Tūpa Espiritu pīratasa pipe añehe pēu

⁵ ‘toyeroya catu Tūpa pīratasa rese yuvireco’ che yapave pe yeroyaēhi āgua ava tēi mbahecuaasa rese.

Tūpa oEspiritu pipe oicua uca mbahe yandeu

⁶ Ore rumo oromombehuño ité aracuasa pēu, pe peyemoviracua vahe Jesús rese pe yeroyasa pipe. Co aracuasa rumo aviye vahe ndahei ava suindar tēi, ndahei avei ava mborerecuar co ivi pipendar tēi aracuasa nungar. Esepia, ahe imborerecuaasa ocañi tēi vaherā.

⁷ Oroñehe catu aracuasa Tūpa suindar ndicuasai vahe rese, ahe yipive vireco vahe ivi apoēhi viteseve, ahe co omboyecua ramo vahe yandeu yaico vaherā teco ori apirēhi vahesave.

⁸ Co ivi pipendar ava mborerecuaeta rumo ndosenducuai eté co ñehesa. Osenducuaase rumo mborerecuar Jerusalén pendar yuvireco viña, ndoyatica ucai chira yande Yar seco ivate, porañete vahe curusu rese yuvireco viña.

⁹ Icuachiapri aracahendar pipe aipo ehi:

“Tūpa omoingatu mbahe ava guaisupar upe. Ahe rumo mbahe ndosepia vahe ité ava yuvireco yepi, ndosendui vahe ité, iyavei ndoyembopihañemoñetaimi eté sese yuvireco no” ehi aracahe.

¹⁰ Tūpa rumo oicua uca Espiritu pipe yandeu cute. Esepia, Espiritu oicua tupri catu ité opacatú secocuer oico.

¹¹ ěgüe ehi eté, inungar opacatu ava pāhuve ndipoi eté que ñepepe ava pihañemoñetasa oicua vahe, iespíritu güeraño ité oicua mbahe oime vahe ipiha pipe. ěgüe ehi avei Tūpa Espiritu güeraño ité oicua Tūpa pihañemoñetasa.

¹² Yande evocoiyase ndahei co ivi pipendar tēi espiritu yaipisi, ěgüe ehi rumo Espiritu Tūpa suindar yaipisi yaicua vaherā iporerrecosa oporoaisusa pipe ombou vahe yandeu.

¹³ Ahe niha oromombehu Tūpa Espiritu ore mbohe vahe, ndahei ñehesa ava tēi aracuasa sui. Ēgüe orohe co supi eté vahe ñehesa Espiritu suindar oromombehu Espiritu rese yuvirecoi vahe upe yepi.

¹⁴ Acoi ava ndovirecoi vahe rumo Tūpa Espiritu opiha pipe, ndoipisii eté mbahe Tūpa Espiritu suindar yuvireco. Esepia, chupe evocoi mbahe aviye ěgüe ehi tēi vahe, iyavei ndosenducua catui eté yuvireco. Esepia, evocoi nungar mbahe senducua Espiritu pipeño ité.

¹⁵ Acoi ava vireco vahe rumo Tūpa Espiritu opiha pipe oicatu opacatu mbahe cua āgua. Ndipoi chira rumo ambuae ava ndovirecoi vahe Espiritu opiha pipe ahe ava recocuer cua tupri āgua.

¹⁶ Esepia, icuachiapri arachendar pipe aipo ehi: “¿Ava vo oicua tēira yande Yar pihañemoñetasa viña? ¿Ava vo ombohe tēira viña?” ehi. Yande rumo yareco yande Yar Cristo pihañemoñetasa.

3

Pablo iyavei Apolos Tūpa upe oporaviqui vahe yuvirecoi

¹ Che rivireta, ndapeguata tuprii Espiritu reroyasa pipe; pe rumo peguataño vite ava tēi pihañemoñetasa rupi peico. Sese namombehu catui ñehesa yavai vahe Espiritu suindar pēu. Esepia, pe pñanimi nungar vite tēi pe pihañemoñetasa Cristo rese.

² Sese che opombohe mbahe ndayavaimi vahe rese. Esepia, pñanimi ndoicatu vitei ocaru. Sese ocambu viteño tēi. Cūrutei rumo ěgüe peye vite ité. Esepia, pe ndapesenducua catu vitei eté Tūpa Ñehengagüer yavai vahe.

³ Peguata viteño co ivi pipendar pihañemoñetasa tēi rupi. Esepia, peyemoecatēhi-tēhi oyeupe, iyavei peñemoiro peyeupe pe pihañemoñeta ndahoyoyai vahesa pipe. Pe evocoiyase peyapo ava ndoicuai vahe Tūpa rembiapo nungar.

⁴ Esepia, aipo peyeño tēi, “Ore Pablo rupindar oroico”; ambuae evocoiyase, “Ore Apolos rupindar oroico” peye-peye tēi pe yembohesa rese pe yeecopisa pipe. Aipo ehi vahe pe pāhuve inungar ava Tūpa ndoicuai vahe pihañemoñetasa.

⁵ Pesendu che ñehes: ¡Che Pablo iyavei Apolos Tūpa rembiguai tēi oroico! Esepia, yande Yar niha ombou ñepe-pe mboraviqui yandeu chupe yayapo vaherā. Tūpa upe ore poraviquisa pipe sui niha peroya yande Yar peico:

⁶ che rane inungar añoti vahe mbahe rāhi pe piha pipe; Apolos evocoiyase inungar imboihusar; Tūpa rumo inungar omboori vahe pēu.

⁷ Evocoiyase ndiyai peyeroya mbahe t̄sar rese tēi, imboihusar rese tēi avei. Peyeroya catura rumo Tūpa rese. Ahe niha pe reco momirata catu pe rereco.

⁸ Ore rumo oyoya tupri oroyapo mbahe pēu nara. Sese ñepe-pe Tūpa omboura porerecos pe rese ore poraviquigüer rupi oreu.

⁹ Ore oroporaviqui vahe Tūpa upe. Pe evocoiyase ivi nungar peico Tūpa poraviqui āgua iyavei pe inungar Tūpa omopuha ramomi vahe oi peico.

¹⁰⁻¹² Che inungar oi apo cuapar oyapo rane vahe oi v̄racua āgua, ěgüe ahe imombehu Cristo resendar ñehesa pēu seroya tupri āgua. Ndiyai eté yaroya que ambuae ava tēi, Jesucristo güeraño ité yaroyara. Ambuae evocoiyase inungar oi aposar omopuha vahe iv̄racuasa harive, ěgüe ehi ahe pe monguerēhi catu pe mbohe co ñehesa rese. Evocoiyase inungar oi aposar amove oiporu mbahe ipocopi vahe oi apo āgua yuvireco oro, guarepochi, anise ita aviye vahe. Amove rumo oiporu avei ndipocopi vahe mbahe que iv̄rape tēi, capihí, anise tacuar tēi oiguā yuvireco. Ēgüe ehi aveira pe mbohesar yuvireco. Ahe ñepe-pe rumo iya oicua tuprira pe mbohe āgua yuvireco.

¹³ Ahe iporaviqui agüer rumo ari cañise icuasa tuprira ñepe-pe yuvireco. Esepia, ahe ari pipe yande Yar oura tata reseve ñepe-pe mbohesar poraviqui agüer cua āgua.

¹⁴ Acoi ava oporombohe tupri vahe inungar ava oyapo oi ndocai vahe, ahe oipisira oporaviqui repri;

¹⁵ ambuae oporombohe rai vahe rumo inungar oi oyapo ocaci vahe tēi, iporombohe agüer opa tēi etera ocañi. Ahe güeraño evocoiyase oñepisiro s̄aira tata guasu sui.

¹⁶ ¿Ndapeicuai vo pe yande Jesús reroyasar Tūpa rēta nungar yaico? IEspiritu niha secoi eté yande piha pipe.

¹⁷ Oimese que ava yande pāhuve omomara vahe Tūpa rēta, Tūpa evocoiyase omboura oñemoirosa ahe ava upe. Esepia, Tūpa rēta nimirai vahe ité; yande teieté niha Tūpa rēta yaico.

¹⁸ Peyembopa eme catu pe ae. Oimese que pe pāhu pendar oyeupe aipo “che yaracua tupri vahe aico” ehi vahe co ivi pipendar pihañemoñetasa rupi tēi, toyecomombegüemi rane oaracua āgua.

¹⁹ Esepia, ava tēi aracuasa Tūpa upe ēgüe ehi tēi vahe. Inungar icuachiapri aracahendar pipe aipo ehi: “Ava oaracua raisa pipe oyeiti uca mbahe tēi pipe Tūpa upe yuvireco” ehi.

²⁰ Iyavei aipo ehi no: “Yar rumo oicua ava tēi yaracua rai vahe pihañemoñetasa, ahe ēgüe ehi tēi vahe” ehi.

²¹ Sese ndapeyecomboivate ai chira que ava tēi porombohesa rupi peico. Esepia, opacatu mbahe pēundar ite:

²² Ēgüe ehi eté che Pablo, iyavei Apolos, Pedro avei, opacatu ivi pipendar mbahe Tūpa omoime vahe yandeu, tecovesa, manosa avei, yasepia vahe, iyavei mbahe oime vaherā, ahe niha opacatu pēu nara,

²³ pe niha Cristo upendar, Cristo evocoiyase Tūpa upendar secoi.

4

Apóstol yuvirecoi vahe poraviqui agüer

¹ Iya aipo peye: “Co mbia Cristo povri pendar yuvirecoi, icuaita ité niha Tūpa suindar ñehesa oyecua ramo vahe rese iporombohe āgua” peyera oreu viña.

² Acoi ndireco vahe ocuaitarā, iya ité omboyecua ocuaita mboaviye tuprisa.

³ Mara etemo che areco pe che recocuer rese peporanduse viña. Iyavei cheu mbahemi tēi che reraso potase que ava tēi porandusave che recocuer rese porandu āgua yuvireco. Che avei ndaicuai eté che recocuer cuapa tupri.

⁴ Yepe ndaicuai que mbahe che rembiavi che cuaita sui viña, ndiyai chira rumo, “Che amboaviye tupri che cuaita” ahe vaherā pēu. Yande Yar rumo oicua.

⁵ Sese pe, “Ahe ava recocuer aviye ai”; anise, “Ahe ava recocuer naporai vahe” ndapeye voi tēi chira. Pesāro ranera rumo yande Yar yevi āgua. Ahe niha omboyecua opacatu mbahe ndoyecuai vahe, iyavei omboyecua para ñepe-pei yande pihañemoñetasa. Ipare aipo ehira yandeu: “Aviye, nde eremboaviye tupri nde cuaita” ehira; anise, “Nderemboaviyei nde cuaita” ehira ñepe-pei yandeu.

⁶ Che rivireta, che añehe cheyese ae, Apolos rese avei pēu mbahe tupri āgua rese ‘ore recocuer sui toyembohe yuvireco Tūpa remimbotar icuachiapri rupi tupri yuvirecoi āgua’ ore yapave pēu. Pe evocoiyase, “Co mbia seco ivate catu vahe co ambuae mbia sui” ndapeyei chira pe yemboivate aisa pipe oreu.

⁷ ¿Pe tie aviye catu vahe peico ambuae ava sui? Opacatu rumo mbahe pe rembiereco, ahe Tūpa suindar. ¡Sese ndiyai peyecomboivate etepri co mbahe pereco vahe rese! ¡Aviye opacatu mbahe peyesui tēi pe reco vahe viña!

⁸ Ndoyavii pereco ité vahe opacatu mbahe pe remimbotar viña, ndoyavii avei nipanei vahe ité Tūpa suindar mbahe pēu. Peyeupe revo ndoyavii mborerecuar guasu peico ore sui viña. ¡Ēgüe peye itera tarahu viña! Ahese, ore avei mborerecuar oroicora pe pāhuve viña.

⁹ Ore rumo apóstol oroico vahe ndoyavii cheu Tūpa ore renoi ipa tēi vahe ore mano tēi āgua. Sese seroïrombri oroico inungar ava imboguai pri yucapirā. Ēgüe orohe oroico opacatu ava rovaque, Tūpa rembiguai eta iva pendar rovaque avei.

¹⁰ Iyavei, “Co ndayaracuai vahe” ehi rutei ava yuvireco oreu Cristo rese ité ore recose; ahese avei rumo pe yeapo imbahecia etepri vahe peico Cristo rese pe recosa pipe. Iyavei ore ndoyavii ndaseco píratai vahe oroico ava rembiepiave; aheseve avei rumo peyecomomirata tēi peico. Ore seroïrombri tēi oroico, pe evocoiyase ava pe mboetei guasu pe rereco yuvireco.

¹¹ Cūrítei ore oroicove vite ité ore rieporehi pipe, ore husei tēi iyavei ndore turucuai eté. Ava rumo evocoiyase mara-mara tēi ore rereco yuvireco. Iyavei ndorovirecoi ore rēta ité.

¹² Ore oroporaviquiño ité, oroyembogüerai tēi ipipe. Ava rumo ñehe mara-mara tēi eté yuvireco oreu; ore evocoiyase oromboyeviño ñehe mbahe tupri pipe chupe. Ore reca-reca catuño ité ore momara āgua yuvireco; ore rumo oroñemosañiño ité yuvireco chupe.

¹³ Ñehe-ñehe tēi ore rese yuvireco; ore rumo saisusa pipe oromboyevi ñehe yuvireco chupe. Ore rereco iti nungar tēi iyavei ore rereco inungar ava ēgüe ehi tēi vahe yuvireco. Cūrítei ēgüe ehi viteño ité yuvireco oreu.

¹⁴ Ndahei pe mochi āgua aipo ahe icuachía pēu, ēgüe ehi rumo pe mboaracua āgua tēi. Inungar che rahir ité, che rembiaisu opovireco.

¹⁵ Esepia, yepe pereco ati pe pñivisar Cristo rese pe reco āgua viña, ndaperecoi rumo setá pe yesupa. Esepia, che amombehuse niha ñehesa písirosa resendar pēu, ahese ramo peroya Jesucristo. Seroyasa pipe evocoiyase che inungar pe yesupa ité aico pēu.

¹⁶ Sese che apota ité che recocuer moña peye.

¹⁷ Sese che amondo che rembiaisu Timoteo pëu, che rahir nungar omboaviye vahe ocuaita yande Yar suindar. Ahe pe momahenduhara Cristo rupi che guatasa rese. Ahe oyoya che porombohe agüer rese che sose opacatu Jesús reroyasar ñemonuhasa rupi yepi.

¹⁸ Amove oime pe pãhuve oyecomboivate ai vahe. “Ndou iri chietera revo cohava yande repia” ehi yuvireco cheu viña;

¹⁹ aso pihaiviño itera rumo pe repia yande Yar oipotase cheu. Ahese aicua tuprira oyemboivate ai vahe reco pĩratasa yuvireco. Ndahei chira iñehe güeraño tẽi aicuara.

²⁰ Esepia, Tũpa omborerecuasave, ndahei oñehe pipe tẽi oporocuai, opĩratasa pipe rumo ěgũe ehi.

²¹ ¿Mbahe pĩha peipota peico? ¿Peipota pĩha che aso vaherã pëu che ñehe pĩrata pe mboaracua ãgua mbahe pe rembiavi rese? Anise, pemoingatu rane pe recocuer, ahese asora mbahe tupri pipe pe piri.

5

Pablo oñehe ñepej Jesús reroyasar pãhu pendar oyemboaguasa vahe rese

¹ Ambuae mbahe, oroyandu ñepej mbahe tẽi pe pãhu pendar rembiapo oroico: oime aipo osi recoyar rese secoi vahe. Ahe angaipa guasu oyapo oico. Tũpa reroyasarẽhi itẽ ndoyapoi evocoi nungar mbahe tẽi yuvireco.

² ¡Pe rumo peyecomboivate ai peico! ¡Iyacatu rumo ndapeyembovihi chira evocoi nungar mbahe tẽi repiase viña! Evocoi nungar ava iyacatu itẽ pemboyepepira pe pãhu sui.

³ Yepe niha che teietẽ ndaicoi pe pãhuve viña, pe rese che mahenduhasa pipe rumo aicove itẽ pe pãhuve iyavei aicua voi etẽ aipo oyapo vahe mbahe tẽi recocuer inungar-ra aico vahe itẽ pe pãhuve viña.

⁴ Acoi peñemonuhase, che avei niha aicora pe pãhuve che mahenduhasa pipe, yande Yar Jesucristo pĩratasa avei secoira pe rese.

⁵ Evocoiyase ahe ava timondosa Carugar povrive secocuerai mocañi ãgua. Ipipe sui iespĩritu oñepisirora yande Yar Jesucristo yevise curi.

⁶ Ndapeyecomboivate ai chira peico co mbahe tẽi oimese pe pãhuve. Esepia, peicua niha co ñehesa aipo ehi vahe: “Yepe chĩhimi imondosa pan mboapeposa panguã rese viña, ahe rumo oiunquepa tupri panguã rese” ehi.

⁷ Evocoi ava rembiapo ai inungar pan mboapeposa pe pãhuve. Sese pemombopa pe pãhu sui peicoẽhi ãgua angaipa pipe peico vaherã inungar panguã ipiasu vahe ndovirecoi vahe omboapeposa oyese. ěgũe peye itẽ niha. Esepia, yande Yar Jesucristo iparaisu omano yande repirã. ěgũe ehi ahe inungar ovesa yucapri angaipa mocañi ãgua judio pieta Pascua pipe yepi.

⁸ Sese inungar judio omboetei vahe Pascua pieta yuvireco yepi omombopaño pan mboapeposa cuacua vahe oyesui pan ipiasu, ndayapepoi vahe rereco ãgua, ěgũe yahe aveira yaico yande reco piasu supi etẽ vahe pipe; yamombopara yande recocuerai yandeyesui, ahe ava reco momara-mara tẽisa, mbahe naporai vahe avei.

⁹⁻¹⁰ Ambuae aicuachia vahe pipe aipo ahe pëu: “Ndapemborii chira ava oyemboaguasa-guasa tẽi vahe, acoi ava oipota rai vahe ambuae ava mbahe, imonda rai vahe, iyavei ava mbahe rahanga upe tẽi oyerure vahe” ahe. Co che ñehesa rumo ndahei Tũpa ndoicua vitei vahe upendar. Esepia niha, pe yepipi ãgua ñepej reseve evocoi nungar ava sui, pesẽ itera co ivi pipe sui viña.

¹¹ Che niha aipo ahe icuachia pëu: ndapemborii chira que ava acoi “che Jesucristo reroyasar aico” ehi angahu tẽi vahe, que oyemboaguasase, anise oipota raise que ambuae ava mbahe, oyeroku tẽi vahe que mbahe rahanga upe, iyavei imahechiroi ai vahe, caguar tẽi vahe, anise imonda rai vahe. Evocoi nungar ava piri ñepej yepi ndapecarui chietera.

¹²⁻¹³ Cheu ndiyai etẽ ava ndoyuvirecoi vahe Tũpa rese recocuer rese porandu ãgua. Tũpa ahe ava yuvirecoi vahe recocuer opara oicua coiyẽ. Pe rumo pe cuaita itẽ Tũpa rese yuvirecoi vahe upe pe porandu ãgua secocuer rese. ¡Sese pemboyepepiño itẽ osi recoyar rese secoi vahe pe pãhu sui!

6

Ndiyai Jesús reroyasar serasosa ndahei vahe Jesús reroyasar mborerecuar rovai

¹ Ambuae mbahe no: Oime pe pãhu pendar “co mbia oyapo mbahe tẽi cheu” ehi vahe ambuae Jesús reroyasar upe. ¡Mahera peraso mborerecuar Tũpa reroyasarẽhi upe tẽi evocoi mbia rembiapo ai rese porandu ãgua! Iyacatu rumo Tũpa reroyasareta upe perasora secocuer moingatu ãgua yuvireco viña.

² Peicua niha pe Tũpa reroyasar peporandura ava ndoicuai vahe Tũpa upe secocuer rese yuvireco curi. Evocoiyase, ¿ndapeicatu pĩha co tecocuer mbahemi tẽi moingatu peico?

³ ¿Ndapeicuai vo yande avei yaporandura Tūpa rembiguai recocuer rese curi? Evocoiyase, ¡peporandu catu itera co ivi pīendar tecocuer rese peyeupe yepi!

⁴ Perecose evocoi nungar mbahe tēi peyeupe, ¡mahera peiporu ava ēgüe ehi tēi vahe tūparo pendar upe mbahe moingatu āgua!

⁵ Che aipo ahe ité pēu pe chí āgua: ¿Ndipoimi eté vo pe pāhuve que ñepeí yaracua vahe oicatu vahe que mbahe tēi peyeupendar moingatu āgua?

⁶ ¡Amove pevava peyeupe! ¡Ndahei co güeraño, oime avei pe pāhu pendar Tūpa reroyasar viraso ambuae omboetasa mborerecuar Tūpa reroyasarēhi upe tēi mbahe moingatu āgua!

⁷ Supi eté evocoiya pe reco pipe peyavi guasu ité. Iya peñemosañora co mbahe tēi pe mboetasa suindar upe viña. Ēgüe ehi eté, iya mbahe pe reco vahe, “Toñomiño yuvireco” peyera chupe pe raso rāgüer sui Tūpa reroyasarēhi mborerecuar upe viña.

⁸ Amove rumo pe avei peyapo mbahe-mbahe tēi eté; peñomi avei pe mboetasa Tūpa reroyasar mbahe.

⁹⁻¹⁰ ¡Pe niha peicua acoi ava mbahe-mbahe tēi aposar ndoyuviroiquei chietera Tūpa mborerecuasa pipe curi! Peyembopa ucái rene chupe. Esepia, acoi ava oyemboaguasaguasa tēi vahe, mbahe rahanga upe tēi oyeruqui vahe, omendasa sui oyemboaguasa vahe, cuimbahe pāve oyapo vahe mbahe oyese ae yuvireco, imonda rai vahe, oipota rai vahe ambuae ava mbahe, osavaipo serai vahe, imahechiroi ai vahe, iyavei ava vírocua yesapiñaño tēi vahe mbahe tēi pipe ambuae ava mbahe, ahe opacatu ndoyuvirasoi chira ivave Tūpa mborerecuasave curi.

¹¹ Oime avei niha acoi pe pāhu pendar yipindar ēgüe ehi vahe yuvireco viña, cūrítei rumo opa pe angaipa imocañisa pe sui iyavei pe ¡pehapri peico Tūpa upe nara ité. Ahe, “Peyavi mbahe” ndehi iri pēu yande Yar Jesucristo rer pipe iyavei yande Ru Tūpa Espíritu pīratasa pipe avei no.

Yande rete ¡pehapri Tūpa upe nara yaguasaēhi āgua

¹² Iyavei ambuae mbahe: Supi eté niha “aviye que mbahe che remimbotar ayapo vaherā” ehi vahe. Amove rumo co mbahe ndahei aviye vahe yandeu iyavei yandeu ndiyai evocoi nungar mbahe povrive nara tēi yande reco āgua.

¹³ Supi eté niha aipo ehi vahe: “Yande rembihu yande aviter upe nara, yande aviter evocoiyase yandé rembihu upe nara” ehi. Coiye rumo Tūpa opara omocañi evocoi nungar mbahe. Yande retecuer rumo ndicuitai yaguasa tēi vaherā, ahe rumo yande Yar upe nara. Yande Yar evocoiyase yande retecuer upe nara secói.

¹⁴ Inungar Tūpa ombogüerayevi yande Yar, ēgüe ehi aveira yande mbogüerayevi opīratasa pipe coiye.

¹⁵ Peicua niha yande rete Jesucristo upendar ité. Ndiyai eté evocoiyase Jesucristo upendar yande rete mondo āgua cuña güetecuer omondo-mondo tēi vahe upe.

¹⁶ Peicua niha pe aipo nungar cuña ndipihai vahe rese peicose, pe retecuer evocoiyase ñepeí vahe nungar ité pereco. Esepia, icuachiapri aracahendar pipe aipo ehi yandeu: “Yepe ñuvirío ava yuvirecoi vahe viña, ñepeí vahe nungar ité rumo secocuer yuvireco” ehi.

¹⁷ Acoi ava secói vahe rumo yande Yar rese, ahe secocuer evocoiyase ñepeíño ité.

¹⁸ Peyepipi voíño catu ava yemboaguasa-guasa tēisa sui. Opacatu ambuae angaipa ndahei yande retecuer rese nara ité. Acoi ava rumo oyapo tēi vahe mbahe cuña rese, güetecuer ae evocoiyase omomara catu güembiaipo pipe sui tēi.

¹⁹ ¿Ndapeicuai vo pe retecuer Espíritu Santo upendar ité secói, iyavei ahe Espíritu Tūpa remimbuo pe rese ité secói? Sese pe retecuer ndahei pēundar ité.

²⁰ Esepia, Tūpa yande rerocua oyeupe nara. Yande rumo yande repi chupe. Sese peyapo mbahe aviye vahe pe retecuer pipe Tūpa mboetei āgua.

7

Poromboaracusa mendasa resendar

¹ Cūrítei amboeyvira pēu acoi cuese pe porandusa mendasa resendar peicuachía vahe imbou cheu. Aviyeño ité niha que ava ndomendaise viña.

² Pe aguasa-guasa tēiēhi āgua rumo peyacatu perecora pe rembireco, cuña avei evocoiyase tovireco oyacatu omer yuvireco.

³ Cuimbahe tomoaviye omendasa güembireco rese iyavei cuña omenda vahe, tomoaviye avei mendasa omer rese. Ahe niha yande cuaita yamendase.

⁴ Esepia, cuña omenda vahe güetecuer ndahe iri oyeupe nara víreco, omer upe nara ité rumo. Iyavei cuimbahe omenda vahe, ndahei avei güetecuer oyeupe nara víreco, ahe rumo güembireco upe nara ité víreco.

⁵ Ndiyai peatêhi oyeupe. Oyoya rumo, “Yayapo eme mbahe” peyese peyeupe pe yeroqui âgua Tûpa upe, ahe aviyêño. Ndiyai rumo peyoeya pucura, aviyeteramo ndapeñemosai chira, ipipe sui aviyeretamo Carugar pe âtoi tiêtera.

⁶ Ndahei che opocuai ‘tomenda yuvireco’ viya pëu.

⁷ Che rumo aipota che nungar pe mendaêhi âgua viña. Tûpa rumo ombou yande yacatu yande recorã.

⁸ Iyavei ndomenda vitei vahe upe, cuña imer mano vahecuer upe avei amombehu pota mbahe: iyacatu revo ndapemendai peico che nungar.

⁹ Ndapeicatuise rumo pe ñemosâ âgua, pemendaño. Esepia, aviye catu itera pemenda poropota rai rãgüer sui.

¹⁰ Che rumo amombehu omenda vahe upe ‘topoi eme cuña omer sui’ viya. Ndahei cheyesui têi aipo ahe. Ahe rumo yande Yar porocuita ité.

¹¹ Acoi opoise cuña omer sui, tomenda iri eme, anise toyevi iri omer upe. Iyavei cuimbahe omenda vahe, topoi eme avei güembireco sui.

¹² Ambuae ava opacatu upe rumo cheyesui eté aipo ahe. Esepia, ndipoi eté yande Yar ñehe sesendar: acoi Jesús reroyasar virecose güembireco ndahei vahe Jesús reroyasar, ahe cuña secoi potaño itese sese, evocoyase ahe topoi eme ité güembireco sui.

¹³ Iyavei acoi cuña Jesús reroyasar, virecose omer ndahei vahe Jesús reroyasar, ahe cuimbahe secoi potaño itese sese, evocoyase ahe cuña topoi eme ité ichui.

¹⁴ Esepia, co cuña Jesús reroyasar virecose omer ndahei vahe Jesús reroyasar, ndahei eté angaipa yuvireco Tûpa rovaque. Êgüe ehi aveira cuimbahe Jesús reroyasar virecose güembireco Jesús reroyasarêhi. Êgüe ndehise rumo, tahir avei ndoyavi chira ndahei vahe Jesús reroyasar rahir yuvireco viña. Ahe tahir rumo Tûpa upendar yuvirecoira.

¹⁵⁻¹⁶ Sese pe, pemenda vahe ndahei vahe Jesús reroyasar rese, pepoi eme catu ichui; aviyeteramo pe recocuer sui pe mer oñepisirora. Iyavei pe cuimbahe, aviyeteramo pe recocuer sui avei pe rebireco oñepisirora. Acoi cuña ndahei vahe Jesús reroyasar opoi potase omer Jesús reroyasar sui, topoiño ichui. Iyavei cuimbahe ndahei vahe Jesús reroyasar opoi potase güembireco Jesús reroyasar sui, topoiño avei ichui. Esepia, Tûpa oipota mbahe tupri pipe yande reco âgua.

¹⁷ Co rumo mbahe: peicoveño yipindar pëu Tûpa ombou vahe rese seroyaêhi vitesendar pipe. Ahe aporocuai opacatu Cristo upendar ñemonuhasa rupi yepi.

¹⁸ Acoi Tûpa osenoise ava judío oyeupe nara, ahe judíoño ité secoira. Acoi osenoise rumo, ndahei vahe judío, ahe ndoyembocircuncida ucai chira judío güeco âgua.

¹⁹ Esepia, ndahei chira que judío, anise que ndahei vahe judío yaicose aviye catura yaico. Co rumo Tûpa oipota catu, “Tomboaviye opacatu che porocuita amondo vahe chupe yuvireco” ehi yandeu.

²⁰ Sese peicoveño peyacatu pe recocuer pëu Tûpa ombou vahe rese pe renoiêhi viteseve.

²¹ Pe mbiguai têi peico vahe pe renoise Tûpa, pepihañemoñeta etepri eme evocoyia pe recosa sui pesê vaheerã rese. Peicatuse rumo, peyepiño itera ichui.

²² Esepia, yepe pe mbiguai têi peico viña, peroyase rumo yande Yar, ahese inungar ndahe iri vahe mbiguai peico chupe. Iyavei pe no, ndahei vahe mbiguai têi peico vahe, yepe êgüe peye viña, peroyase rumo Cristo, ahese sembiguai peico.

²³ Tûpa upe rumo perepí iteanga, sese ndiyai eté ambuae ava povrive têi peico.

²⁴ Sese, che rivireta, peicoveño itera pe recocuer pipe inungar yipindar Tûpa pe renoise.

²⁵ Cuñatai ndomenda vitei vahe resendar rese rumo ndarecoi Yar suindar che ñehe âgua. Che rumo amondora che pihañemoñetasa yuvireco chupe. Esepia, yande Yar che parañesuerecosa pipe imboyoyapri aico.

²⁶ Cheu aviye catuño ité ndomendai vahe êgüe ehiño têise yuvireco viña. Esepia niha, tecocuer yavaí eteanga cūrítei.

²⁷ Acoi pemendase, pepoi eme ité oyesui. Acoi ndapemendaise, ndapeseica iri chietera peyeupe.

²⁸ Pemendase rumo, ndahei angaipa iyavei cuñatai omendase, ndoyapoi avei angaipa. Acoi omenda vahe upe rumo yavaí catura co ivi pipe yuvireco chupe. Sese che ndaipotai evocoi nungar mbahe pipe yuvireco vaheerã.

²⁹ Che rivireta, aipo mbahe amombehu pota pëu: ndipucuvei co ari naporai vahe yepota âgua yandeu. Sese co pipe suive tupri omenda vahe toyuvirecoi ndomendai vahe nungar yande Yar rese opihañemoñetasa pipe.

³⁰ Acoi ndovihai vahe, toyuvirecoi eme oviharêhisa pipe iyavei acoi oviharete vahe, ahe toyuvirecoi eme avei oviharetesa pipe, iyavei virocua vahe mbahe omahera, toyuvirecoi inungar mbahe ndovirocui vahe omahera viña yande Yar rese opihañemoñetasa pipe.

³¹ Acoi ava ipihañemoñeta catu vahe co ivi pipendar mbahe poru āgua, tipihañemoñeta eme evocoi nungar mbahe tēi rese yuvireco. Esepia, co ivi pipendar mbahe yasepia vahe, ocañi tēira.

³² Che ndaipotai co ivi pipendar recocuer rese tēi pe pihañemoñeta etepri peico. Acoi mbia ndomendai vahe rumo, ipihañemoñeta catuño ité yande Yar rese imbovīha āgua;

³³ omenda vahe rumo ipihañemoñeta avei co ivi pipendar recocuer rese tēi, güembireco mbovīha āgua rese avei.

³⁴ Evocoiyase ndahei ñepe i opihañemoñetasa vireco. Ēgüe ehi avei cuña opihañemoñeta rereco; cuña ndomendai vahe, ipihañemoñeta yande Yar upendar mbahe rese, güetecuer iyavei oespíritu rereco tupri āgua Tūpa upe. Cuña omenda vahe rumo ipihañemoñeta co ivi pipendar recocuer rese tēi omer mbovīha āgua oico.

³⁵ Che aipo ahe pēu ‘mbahe tupri pipe toyuvirecoi’ viya, ndahei mbahe yavai vahe pipe pe reco āgua. Che aipota ité pe reco catuprisa pipe yande Yar upeño ité mbahe peyapo vaherā pe recoet pipe peico.

³⁶ Acoi ava ipihañemoñeta vahe güembirecovi rese omenda āgua, “Aviyeteramo ayavira mbahe ichui iyavei niha osupiti ité imenda āgua, sese aviye catu yamenda” ehise, toyapoño güemimbotar. Tomendaño ité güembirecovi rese. Esepia, mendasa niha ndahei angaipa.

³⁷ Acoi mbia rumo ndovirecoise que ocuaita omenda āgua iyavei oicatu ité güemimbotar apo, ipihañemoñetase ñepe reseve güembirecovi rese omendaēhi āgua, ahe aviyeño ité.

³⁸ Evocoiyase acoi omenda vahe aviyeño; acoi ndomendai vahe rumo, aviye catuño ité.

³⁹ Iyavei acoi cuña omenda vahe, ahe ndiyai eté iyepepi āgua omer sui imanōēhi viteseve. Omanose royoa ichui, ahese ramo ahe cuña upe aviyeño imenda iri āgua güemimbotar rupi. Yande Yar reroyasar rese avei rumo omdara.

⁴⁰ Ndomenda irise rumo, aviye catuño itera. Ahe che pihañemoñetasa, iyavei revo ahe che pihañemoñetasa Tūpa Espiritu suindar.

8

Pablo oñhe tembihu mbahe rahanga upe tēi seropovēhepri rese

¹ Cūrítei ambuae mbahe amombehura pēu mbahe rahanga upe mbahe mimba yucapri seropovēhepri rese. Supi eté aipo ehi vahe: “Yande opacatu yareco yande mbahecuasa” ehi. ¡Yande rumo, “Aicua tupri opacatu mbahe” yande hesa pipe yayecomboivate ai tēi! Yayaaisuse rumo, ahese yañepitívii catu Cristo reroya tupri āgua.

² Supi eté yande, “Che aicua ité co mbahe” yahe tēise que mbahe upe, ipane vite ité rumo icua tupri āgua yandeu.

³ Yande rumo yasaisuse Tūpa, ahese Tūpa, “Co ava cheundar ité secoi” ehira yandeu.

⁴ Evocoiyase co mbahe rahanga upe tēi seropovēhepri mbahe mimba yucapri hu āgua rese añehe. Yande niha yaicua co mbahe rahanga ēgüe ehi tēi vahe co ivi pipe, iyavei oime ñepe güeraño ité Tūpa.

⁵ Esepia, yepe ava upe setá tūpa ivave, ivive avei viña (setá iteanga niha oime tūpa angahu tēi, yar angahu tēi avei).

⁶ Yande rumo yaicua ñepeño ité Tūpa oime, ahe niha yande Ru opacatu mbahe aposar. ¡Evocoiyase yande chupe nara ité yaico! Oime avei yande Yar ñepe vahe, ahe Jesucristo. Ahe ichui oime opacatu mbahe, ichui avei yaicove.

⁷ Ndahei rumo opacatu oicua aipo mbahe yuvireco. Amove Jesús reroyasar yipindar güecocuer vireco vahe sui ndasesarai viteño yuvireco; imahenduhaño vite mbahe rahanga rese oyeroya agüer rese yuvireco. Esepia, yuvirohuse mbahe roho seropovēhepri, ipihañemoñeta, “Co mbahe roho tūpa rahanga upe seropovēhepri” ehi viteño yuvireco oyeupe. Ipé sui omomara uca Tūpa rese opihañemoñetasa yuvireco.

⁸ Supi eté tembihu ndayande pítívii Tūpa rese yaico vaherā. Ndahei mbahe roho husa pipe sui tēi aviye catura yaico iyavei ndayahuisse, ndahei chira mbahe tēi catu yaico.

⁹ Pēu niha aviyeño pehu viña; peicua catura rumo, aviyeteramo que Jesús reroyasar ndoicatu tupri vitei vahe pemboangaipa ucara.

¹⁰ Esepia, pe co mbahe peicua vahe, pehuse co tembihu mbahe rahanga upendar carusave ahe Jesús reroyasar rembiepiave, aviyeteramo pemonguerēhi aveira ihu uca āgua chupe.

¹¹ Evocoiyase co pe mbahecuasa pipe pemocañi uca yande rivri Tūpa rese noviracua tupri vitei vahe peico. ¡Cristo rumo omano ipisiro āgua!

¹² Esepia, pemomarse Tūpa rese ipihañemoñetasa, ahese pe ae peyemboangaipa uca Cristo amotarēhisa pipe peico.

¹³ Sese yande mbahe roho husa pipe sui yamboangaipa ucasa yande rivri viña, ndayahu iri chietera evocoi mbahe roho yande rivri mboangaipa ucaēhi āgua.

9

Apóstol Pablo ndoporandu potai oyeupe nara apóstol upendar mbahe rese ava upe

¹ Supi eté che aicatu avei apóstol upendar mbahe pisi água viña. Esepia, che apóstol aico. Supi eté che asepia yande Yar Jesús iyavei che poraviquisa pipe sui niha peroya yande Yar peico.

² Yepe, “Pablo ndahei apóstol” ehi ambuae ava yuvireco cheu viña, pe rumo, “Ahe co secoi” peye voño itera cheu. Esepia, che remimombehu pipe sui niha yande Yar peroya peico. Ipípe sui avei icuasa tupri apóstol che recosa pëu.

³ Ahe ñehesa ambovevi tupri ava che recoãha potasar upe yuvireco yepi.

⁴ Iya ité che remihura pisi, che iguarã avei pe sui viña.

⁵ Iyavei inungar ambuae apóstol víraso ité güembireco oyeupi yuvireco yepi, Jesús rivireta avei êgüe ehi yuvireco, êgüe ehi avei Pedro, êgüe ahe aveira niha che viña.

⁶ ¿Ore güeraño tie Bernabé rese oroporaviquira ambuae mbahe rese ore recove água?

⁷ Esepia, sundao nomboepi sundao güeco água, ahe rumo oporaviquisa repri oipisiño. Iyavei ava uva tísar, ahe avei yaviyese, ohu güemitigüer. Iyavei ovesa rãrosar, ahe avei omhe ovesa cambi igua.

⁸ Che ndahei cheyesui tēi aipo ahe pëu. Esepia niha, Moisés porocuita pipe avei aipo ehi yandeu:

⁹ “Pemondo eme tivi yuru rese mbahe icaruêhisa mbahe rãhi oicambese yuvireco pëu” ehi. Supi eté co Tüpa aipo ehi vahe ndahei tivi upeño.

¹⁰ Yande reco tupri água rese niha aipo ehi yandeu. Esepia, acoi ava omonguhi vahe ivi iyavei acoi oicambe vahe mbahe rãhi, oyoya osãro mbahe oipisi vahe rã oporaviquisa sui oyeupe nara yuvireco yepi.

¹¹ Evocoyase ore avei oroñoti Tüpa Ñehengagüer pe piha pipe ore pe mbohese. Sese aviyeño aveira oropisise mbahe pe sui oreyeupe nara viña.

¹² Esepia, ambuae oicatu mbahe pisi água oyeupe nara yuvireco pe sui. Evocoyase ore avei niha orocatu mbahe pisi água pe sui ore poraviquisa pipe viña.

Ore rumo êgüe ndorohei eté. Esepia, ore oroñemosañi ité ‘tiñehe mara eme co ñehesa Cristo resendar rese yuvireco’ ore yapave.

¹³ Pe niha peicua ité acoi oporaviqui vahe judío tũparove, ichui ocaru yuvireco. Esepia, yuvirohu mbahe roho Tüpa upe seropovêhepri tũparo rocarve yuvireco yepi.

¹⁴ Êgüe ehi avei yande Yar ore cuai ‘toipisi mbahe ipane vahe co ñehesa mombehusa pipe sui yuvireco oyeupe’ oyapave oreu.

¹⁵ Che rumo ndaporandui eté mbahe pe rembiereco rese vichico pëu yepi. Ndahei ‘tombou mbahe yuvireco cheu’ che yapave aipo aicuachía imondo pëu. Che rumo evocoi nungar mbahe rese ayemboviñaño ité. ¡Yepe che yucapri tēira tieporêhi viña, ndaporandui chietera rumo mbahe rese pëu! Esepia, namocañi potai eté co che yemboviñasa cheyesui.

¹⁶ Che rumo amombehuse co ñehesa pĩsirosa resendar ava upe, ndiyai ayeecomboivate ai ipipe. Esepia niha, che cuaita ité yapo água iyavei, ¡cheparaísu itera ndamombehuse ava upe co ñehesa viña!

¹⁷ Tüpa ndache cuaise oñehe mombehu água viña, che rumo che querêhisa pipe amombehuse, ahese aipisira Tüpa suindar porerecosa. Êgüe ndahei rumo. Esepia, Tüpa che cuaisa pipe niha amombehu.

¹⁸ Ndaporandui mbahe rese pëu amombehuse co ñehesa pĩsirosa resendar, ipipe ayemboviña ahe che viñasa porerecosa nungar cheu. Yepe aicatu mbahe rese che porandu água viña, che rumo êgüe ndahei eté.

¹⁹ Yepe che ndahei ava povrive tēi aico viña, che rumo che remibotar rupi opacatu ava rembiguai nungar ayeereco ‘tasetá catu ava iquerêhi vahe Cristo reroya água’ che yapave.

²⁰ Esepia, aicose judío pãhuve, secocuer rupi aicoveño Yar upe imonguerêhi catu água yuvireco. Êgüe ahe ité, aicose ava Moisés porocuita povrive yuvirecoi vahe pãhuve, che avei eté mborocuitavrive nungar aico. Ndahei rumo Moisés porocuita povrive ité aico imboaviye água.

²¹ Iyavei ava ndoyuvirecoi vahe Moisés porocuita povrive, ipãhuve aicose, inungar ahe yuvirecoi, Êgüe ahe tupri avei imonguerêhi água yande Yar upe vichico. Ndahei rumo Tüpa porocuita mboyeroaêhisa pipe aico. Esepia, Cristo porocuitavrive che recocuer.

²² Iyavei no, aicose ava yande Yar ndoviroya tupri vitei vahe pãhuve, secocuer nungar tupri avei aico Yar upe imonguerêhi catu água. Êgüe ahe opacatu ava upe ‘toñepisiro catu ahe avei yuvireco’ viya.

²³ Che ayapo co opacatu mbahe ‘tasetá catu co ñehesa pĩsirosa reroyasar yuvireco’ che hesa pipe, ‘taipisi avei co porovasasa oime vahe co ñehesa reroyasa pipe’ che yapave avei.

²⁴ Peicua niha guayisa oimese, ava opacatu guasu yuvinoñase yuvireco, ivava catu vahe güeraño rumo oipisi porerecosa yepi. Evocoyase inungar co ivava catu vahe, ñgüe peye avei pe recocuer pipe Tüpa porerecosa pisi ñgua peico.

²⁵ Iyavei opacatu oyemoingatu vahe oguayí ñgua oñearo tupri opacatu mbahe tēi sui oyemomaraēhi ñgua yuvireco. Ahe ñgüe ehi porerecosa ndipocopii vahe pisi ñgua tēi yuvireco. Yande rumo yayemomborarara porerecosa apirēhi vahe pisi ñgua yaico.

²⁶ Evocoyase che avei, ndahei ava oyahuva-huva tēi vahe nungar aico Tüpa remimbotar apo ñgua iyavei che ndaicoi ava iguayí tēi vahe nungar.

²⁷ Che rumo mbiguai nungar che retecuer areco, amboyeroya uca piñañemoñeta tupriasa upe. Esepia, ndaipotai ambuae ava mbohe pare imombopri tēi nungar guayisa sui che yereco ñgua.

10

Ndiyai aracahendar ava recocuerai rupi yaguata

¹ Che rivireta, che aipota pe judío peico vahe peyemomahenduha vitera aracahe yande ramoi guatasa rupi mbahe pítu Tüpa imboguata agüer rese. Iyavei para guasu Píra vahe avei osasa opacatu yuvireco aracahe.

² Ñgüe ehi eté opacatu oguatase mbahe pítuvri rupi iyavei para guasu osasase yuvireco, ndoyavii ñapiramombri yuvirecoi Moisés recocuer rupi oguata ñgua aracahe.

³ Iyavei oyoya guasu yuvirohu tembihu Tüpa ombou vahe chupe nara yuvireco,

⁴ opacatu guasu avei oihu ita sui Tüpa ombou vahe ihiguará yuvireco. Ahe ita rumo inungar Cristo secói opacatu iguatasa rupi yuvireco.

⁵ Yepe ñgüe ehi Tüpa opacatu yande ramoi judío upe viña, setá iteanga rumo ava ipáhu pendar ndahei aviye vahe ipiha rupi yuvireco. Ipipe sui opa omano ivi iporupirēhisa rupi aracahe.

⁶ Co opacatu mbahe sembiapogüer yuvireco ahe yande mbohe ñgua ‘toipota rai eme mbahe-mbahe tēi inungar ahe ava yuvirecoi’ oyapave yandeu.

⁷ Sese yande ndayamboetei chira mbahe rahanga tēi, inungar ahe ipáhu pendar yuvirecoi aracahe. Aipo ehi eté niha icuachiapri aracahendar pipe: “Co ava ocaru vahe, yuviroihu avei yuvinoi. Ichui yuviropüha, oyemovihaño pieta apo yuvireco” ehi.

⁸ Ndayayemboaguasa-guasa tēi chiveira inungar ahe amove ñgüe ehi yuvireco. Ipipe sui tēi ñepeí ari pipe ahe opa omano veintitrés mil tupri yuvireco aracahe.

⁹ Ndayasecoáha-áha tēi chiveira yande Yar, inungar ahe yuvireco. Ipipe sui oyeyucapa uca mboi osuhusa pipe yuvireco.

¹⁰ Iyavei ndayande ñehe mara-mara tēi chira yande Aposar rese, inungar ahe ñgüe ehi yuvireco. Ipipe sui Tüpa ombou güembigui ava yucasar íva sui ahe ava yucapa ñgua aracahe.

¹¹ Co opacatu yande ramoi upe mbahe oime vahe aracahe icuachiapri yande ipa yaico vahe upe nara: “¡Peicua catu aipo nungar mbahe sui!” he ñgua yandeu.

¹² Sese yande “che aico tupri ité Tüpa rese” vahe vahe, yaicua catura rumo. Aviyeteramo yaviapira mbahe tēi pipe.

¹³ Pe recoáhasa rumo oyoya tupri ité ambuae ava recoáhasa rese. Pe rumo peyeroñaño itera Tüpa rese, ahe niha oicua pe yemoviracuasa, noñocuai chira tecoáhasa imbou péu. Acoi mbahe tēi oimese pe recoáhase, Tüpa ombou voiñora píratasa evocoi mbahe tēi sui pe sē ñgua, chupe pe ñemoso ñgua.

¹⁴ Sese che rivireta, che rembiaisu, peyepipi mbahe rahanga mboeteisa sui.

¹⁵ Ava niha peico pesenducia vaherá mbahe, evocoyase peporandu co che remimombe-hugüer rese peyeupe icua tupri ñgua.

¹⁶ Yaihuse uva ricuer sovasapri, “Aviye ndeu, che Yar” yande hesa pipe, ahese oyoya guasu Cristo rese yaico suví pipe sui. Yahuse co pan imboyaho-yahopri, ahese oyoya guasu yaipisi Cristo retecuer yandeyeupe nara.

¹⁷ Yepe yande reta yaico viña, opacatu rumo yahu ñepeí pan sui. Sese yande ñepeí vahe ité yaico.

¹⁸ Peyapisaca acoi ava aracahendar Israel recocuer rese. Esepia, acoi yuvirohu vahe Tüpa upendar mbahe seropovēhepi, ahe evocoyase chupendar ité yuvirecoi.

¹⁹ Che rumo, “Mbahe rahanga aviye vahe ité” ndahei, iyavei, “Mbahe roho icuavēhepi mbahe rahanga upe, aviye catu ité” ndahei avei.

²⁰ Co rumo, acoi ava ndoicuai vahe Tüpa oicuavēhe mbahe caruguar upe tēi yuvireco yepi. Ndahei rumo Tüpa upe nara ité ñgüe ehi yuvireco. Che evocoyase ndaipotai eté caruguar upe nara tēi ñgüe peye vahe ité peico.

²¹ Peihuse rumo yande Yar upendar igua, ndiyai peihu avei caruguar upendar igua; iyavei pehuse yande Yar upendar mbahe, ndiyai avei pehu caruguar upendar mbahe.

²² ¿Yasecara pñha yande ae yande Yar ñemoiro ñgua yandeyeupe? ¡Yande rumo ndahei chira ipñrata catu vahe yaico ichui!

Yande renosesa mbiguai tñi nungar yande recosa sui mbahe tupri apo ñgua

²³ Amove ava, “Aviyeño opacatu mbahe yayapo yande remimbotar rupi” ehi yuvireco viña. Ëgüe ehi eté niha, ndahei rumo opacatu aviye, ndahei avei co opacatu mbahe yande pñtivii catu Cristo rese yande reco ñgua.

²⁴ Ndapesecai chira que mbahe aviye vahe peyeupe nara tñi, pesecara rumo ambuae ava upe nara.

²⁵ Pehuño mbahe tembihu opacatu mbahe mboepisa rupi sui perocua vahe. Ndapeporandui chira rumo sese Tũpa rese pe pñhañemoñetasa momarañhi ñgua.

²⁶ Esepia, ivi opacatu ipor reseve, ahe yande Yar upendar.

²⁷ Acoi Tũpa reroyasarñhi pe soho ucase oyepiri pe mbocarua ñgua, peso potase ipiri, pehuñora mbahe imboupri pñu. Ndapeporandui chira rumo sese chupe Tũpa rese pe pñhañemoñetasa momarañhi ñgua.

²⁸ Acoi ava, “Co mbahe roho icuavñhepri mbahe rahanga upe” ehise pñu, ndapehuy chira ahe mbahe roho. Ëgüe peyera pñu imombehusar rereco meguañhi ñgua, ava pñhañemoñetasa momarañhi ñgua avei.

²⁹ Supi eté che añehe co ambuae ava pñhañemoñetasa rese, ndahei pe pñhañemoñetasa rese.

Oimera rumo oporandu vahe sese “¿mahera aipo ndiyai chira cheu mbahe apo, ndaheise ambuae ava pñha rupi?” ehi vahe.

³⁰ Iyavei aipo ehira no: “ ‘Aviye ndeu’ ahese Tũpa upe mbahe ahu vahe rese, ¿mahera pñha che rohoñora yuvireco ahuse viña?” ehira.

³¹ Iyacatu rumo pehuse que mbahe, peihuse avei, anise que mbahe peyapose, peyapo ru opacatu Tũpa mboeteisa pipe.

³² Supi eté ndapemboyecuai chira pe recocuerai, que judío upe, que ndahei vahe judío yuvirecoi vahe upe, anise que Jesús reroyasar yuvirecoi vahe upe avei.

³³ Che opacatu che rembiapo pipe aipota ité mbahe tupri apo ñgua opacatu ava upe nara. Ndahei cheyeupeño mbahe tupri aseca, ambuae ava upe avei mbahe tupri aipota iñepisiro ñgua yuvireco.

11

¹ Che raquicue moñá catu peye inungar che asaquicue moña Cristo vichico.

Mara ehira cuña Jesús reroyasar ñemonuhasave yuvireco yepi

² Che rivireta, che, “Aviye ité yuvirecoi” ahe pñu yepi che rese pemahenduha vitese iyavei peguataño vitese che opombohe vahe agüer rupi.

³ Che rumo aicua uca tupri pota pñu, Cristo niha secoi ñepeipei cuimbahe cuaisar, cuimbahe evocoyase güembireco cuaisar secoi. Ëgüe ehi avei Tũpa Guahñr Cristo upe.

⁴ Acoi cuimbahe Cristo upe ñemonuhasave oñca ndirudosequiise oyerure ñgua, anise Tũpa Ñhengagüer mombehu ñgua, ahe Ëgüe ehi güerecuar Cristo mboeteiñhisa pipe.

⁵ Iyavei acoi cuña ndoyopiise oñca oyerocuñi ñgua, anise Tũpa Ñhengagüer mombehu ñgua, ahe Ëgüe ehi omer mboyeroyañhisa pipe. Ahe cuña evocoyase ndoyavii oñeapipa tupri vahe.

⁶ Acoi cuña ndoyopi potaise oñca, tayapecñraisa tupri. Ochñse rumo oapecñraisa ñgua, evocoyase toyopiño oñca sereco.

⁷ Cuimbahe rumo ndoyopii chira oñca sereco. Esepia, ahe Tũpa rahanga ité secoi iyavei iporañetesa omboyecua ité oyese. Cuña rumo omboyecua omer recocuer oyese yuvireco.

⁸ Esepia, Tũpa oyapose cuimbahe, ndahei cuña sui vinose, cuimbahe sui niha cuña oyapo.

⁹ Iyavei ndahei cuña upe nara Tũpa oyapo cuimbahe, ahe rumo oyapo cuña cuimbahe upe nara.

¹⁰ Co rese cuña virecora oñcapisa omer mboyeroyasa mboyecua ñgua omahese Tũpa rembiguai eta yuvireco sese.

¹¹ Yande, yande Yar reroyasar yaico vahe co tecocuer rese, yañepitívii oyoya yaico. Evo-coyase cuimbahe ndoicatui cuña porñhi; cuña avei ndoicatui cuimbahe porñhi yuvireco.

¹² Esepia, yepi supi eté cuimbahe sui yapopri cuña. Ipare rumo cuña sui oha cuimbahe; opacatu rumo oyoya Tũpa suindar yuvirecoi.

¹³ Evocoyase peyapisaca tupri co rese: ¿Iya pñha cuña noñeacapii vahe oyerure Tũpa upe?

¹⁴ Yande ité yaicua yemochisa cuimbahe oyemboha vucuse.

¹⁵ Cuña rumo oviharete oha vucu porañetesa rese. Esepia, chupe imondopri ité ñacapi água.

¹⁶ Acoi ava iñehe-ñehe tēi pota vahe co tecocuer rese, toicua ore ndoroicoi ambuae reco pipe. Iyavei opacatu ambuae Jesús roroyasar éguē ehi avei yuvireco.

Yande Yar rese yemomahenduha raisa

¹⁷ Co ambuae mbahe rese rumo ndaicatui eté, “Aviye tupri yuvirecoi” che he água pēu. Esepia, aipo pe ñemonuhasave, mbahe tēi eté aipo peyapo.

¹⁸ Esepia, yipindar che ayandu peñemonuhapase aipo oyese yande Yar mboetei água pe pihañemoñetasa ndahoyoyai pipe peico. Amove ayanduse pe rerácia, aroya ité.

¹⁹ ¡Iya ité revo pihañemoñetasa ndahoyoyai vahe reime água pe pāhuve Jesús roroyasar supi tupri vahe cua tupri água!

²⁰ Peñemonuhase pe pihañemoñetasa ndahoyoyai vahe pipe pe caru água, ndahei yande Yar rese pe yemomahenduhaseve éguē peye.

²¹ Espia, aipo pecaruse, pe rane aipo pepoyava pecaru. Ambuae aipo evocoiyase ndasiepoi tēi yuvireco; ambuae rumo pe pāhu pendar aipo oyembosavaipoño yuvireco.

²² Pereco niha pe rēta aheve pe caru água iyavei pe ihu água. Pe rumo pe reco pipe opa peroíro ambuae Jesús roroyasareta peico. Ipipe avei pemochi ava ndovirecoi vahe mbahe. ¡Che evocoiyase, “Aviye yuvireco” ndahei chietera co mbahe pe rembiapo ai rese pēu!

Yande Yar rese yemomahenduhasa supi ité vahe resendar

²³ Co ñehesa aipisi vahe yande Yar suindar amombehu vahe pēu: ahe pītu pipe acoi Jesús mboguaisar opisi água renonde, ahe oipisi pan.

²⁴ “Aviye ndeu” ohe pare Vu upe, ombohi-mbohi, ahese aipo ehi güemimbohe eta upe: “Co che rete amondo vahe manosave mbahe tupri pe reco água. Éguē peyera che rese pe mahenduhasa pipe peico” ehi.

²⁵ Éguē ehi avei ocarure yuvireco, ahe oipisi igua riru aipo ehi: “Co uva ricuer omboyecua pēu Tüpa oyapora mbahe ipiisu vahe pe recorã. Che ruví pipe rumo yaposara. Evocoiyase co ari pipe suive peihuse co, peyemomahenduhara che rese yepi” ehi.

²⁶ Esepia, acoi pehuse co, peihuse avei, peyemomahenduhara, pemombehu aveira yande Yar mano agüer opacatu ava upe peico. Éguē peyera iyevi rãro peico.

Mara yahera yande Yar rese yayemomahenduhase

²⁷ Evocoiyase acoi ava ocaruño tēi vahe, yuviroihuño tēi vahe avei Yar mboeteiēhisave, ahe evocoiyase nomboetei yuvireco yande Yar rembiapocuer omondose güetecuer, iyavei oipiyerese vuvi.

²⁸ Sese tipiñemoñeta rane oyacatu güecocuer rese ava co pan hu água renonde, oihu água renonde avei co uva ricuer yuvireco.

²⁹ Esepia, acoi pe yemomahenduhaēhisave co setecuer rese pehuse iyavei peihuse, ahese mbahe naporai vahe peseca peyeupe nara peico.

³⁰ Ichui niha setá pemaheasi, oime setá nipirata iri vahe avei pe pāhuve, oime avei omano vahe pe pāhu pendar.

³¹ Yande pihañemoñeta tuprise rumo yande reco água rese, yande Yar evocoiyase nomoimeí chira mbahe tēi yandeu evocoiya yande recosa pipe.

³² Yande Yar rumo oicua yande rembiapo ai. Sese omoime mbahe tēi yandeu. Yande reco mohivi tupri água rumo éguē ehi yandeu, ndahei yande cañi água opacatu ava viroyasarēhi reseve.

³³ Sese, che rivireta, acoi peñemonuhase pe yemomahenduha água yande Yar rese, peñearo ranera oyoya guasu pe caru água.

³⁴ Acoi ava ndasiepoise yuvireco, tocaru rane güetave. Ahese yuvirasose ñemonuhasave, ndipoi chira mbahe chupe. Iyavei che asose eipeve pe repia, opara ambuae mbahe amoingatu vicho pēu.

12

Mbahecuasa Tüpa Espiritu suindar

¹ Che rivireta, che aicua uca pota pēu co mbahecuasa resendar ñepeí-peí pēu Espiritu omondo vahe.

² Pe niha cūrítei peicua tupri ité yipindar Tüpa rese peicoēhi vitese, peyembopa uca mbahe rahanga éguē ehi tēi, noñehei vahe upe peico.

³ Sese, che aipota peicua acoi ava iñehe mara Jesús upe ndahei Tüpa Espiritu pīratasa pipe éguē ehi. Iyavei ava ndoicatui chira, “¡Jesús che Yar secoi!” ohe água opiha pipe Espiritu Santo ndovirecoise.

⁴ Oime setá ambuae-ae tēi mbahecuasa Espiritu suindar yande Jesús reroyasar yaico vahe upe nara, ahe Espiritu rumo ñepeño ité imondosar secói.

⁵ Setá mbahe avei oime mbahe yayapo vaheṛā yande Yar upe. Ahe yande Yar rumo ñepeño ité secói.

⁶ Iyavei setá oime ambuae mbahe Tūpa oyapo vahe yande rese opīratasa pipe, Tūpa rumo ñepeño ité secói. Ahe oyapo opacatu co mbahe ñepe-pei yande rese.

⁷ Ahe omboyecua yande Espiritu rerecosa ñepe-pei yandeu opacatu yande reco tupri āgua.

⁸ Espiritu pīratasa pipe Tūpa omondo ñepe viroyasar upe iñehe āgua aracuasa rese iyavei ambuae upe omondo iporombohe tupri catu āgua ombahecuasa pipe.

⁹ Ambuae upe evocoyase omondo oyese yeroya tupri catu āgua oEspiritu pipe sui avei. Iyavei ambuae upe omondo opīratasa imbaheasi vahe mbogūera āgua.

¹⁰ Ambuae oipisi pīratasa mbahe poromondiisa oyapo vaheṛā yuvireco. Ahe ichui avei vireco ambuae ava omombehu vaheṛā ñehesa Tūpa suindar yuvireco. Ambuae upe Tūpa omondo mbahecuasa espīritu naporai vahe iyavei Espiritu supi tupri vahe cua tupri āgua. Ambuae evocoyase ichui avei oīcatu ñehesa ndicuasai vahe Tūpa suindar pipe oñehe āgua. Ahe ichui avei ambuae oīcatu ahe ñehesa ndicuasai vahe mombehu tupri āgua ava upe.

¹¹ Ēgüe ehi Espiritu ñepeño ité güemimbotar rupi omondo ñepe-pei yande Jesús reroyasar yaico vahe upe co mbahecuasa.

Opacatu Cristo rese yaico vahe ñepeño ité yande recocuer

¹² Inungar yande retecuer resendar setá mbahe oime viña, ahe rumo ñepeño ité; Ēgüe ehi avei Cristo.

¹³ Ēgüe yahe avei opacatu, yepe yande pāhuve oime: judío, ndahei vahe judío, mbiguai, ndahei vahe avei mbiguai, yande rumo opacatu ñapiramombri yaico ñepe vahe nungar yande reco āgua Espiritu ñepe vahe pipe. Ahe ñepe Espiritu avei opa yaipisi.

¹⁴ Supi eté yande rete resendar ndahei ñepe mbahe, setá rumo mbahe.

¹⁵ Iyavei yepe que yande pi revo aipo ehira yandeu viña: “Che ndahei nde po aico, sese ndahei nde rete resendar” ehira viña; ndahei chira rumo ichui tēi ndaseco iri chira yande rete rese.

¹⁶ Iyavei yepe que yande nambi aipo ehira viña: “Che ndahei nde resa aico, sese ndahei nde rete resendar” ehira yandeu viña. ¡Ndahei chiveira ichui tēi ndaseco iri chira yande rete rese!

¹⁷ Esepia, opacatu tupri yande rete sesa pāve tēise, ndayasendui chietera evocoyase mbahe viña. Anise, yande rete yapisacuar pāve tēise, ndayasētui chietera evocoyase mbahe viña.

¹⁸ Tūpa rumo ñepe-pei yande rese mbahe omondo senara rupi tupri güemimbotar rupi.

¹⁹ Yande opacatu ñepe ava rete resendar nungar pāve tēise, ndahei evocoyase opacatu tupri ava rete nungar yaico.

²⁰ Supi eté yepe setá mbahe yande rete rese, ñepeño ité rumo yande rete.

²¹ Iyavei que yande resa ndiyai aipo ehira yande po upe: “¡Nde Ēgüe ere tēi vahe eico!”; anise que yande āca avei, “¡Nde Ēgüe ere tēi vahe eico!” ndehi chira yande pi upe.

²² Esepia, yande rete resendar mbahe aviye nipiratai vahe yandeu, ahe sese rumo yayeroya catu.

²³ Iyavei yande rete rese mbahe ndayasaisu tuprii vahe, ahe rumo yamboyemonde tupri ai sereco. Iyavei no yande rete resendar mbahe ndayamboyecuai vahe ava rembiepiave, ahe yayopi tupri sereco.

²⁴ Oime rumo ambuae yande rete resendar ndayayoppi vaheṛā. Ēgüe ehi Tūpa yande rete resendar mbahe imoingatu tupri. Evocoyase yande rete resendar mbahe ndayasaisu tuprii vahe imboetepri catu secói.

²⁵ Tipo eme pihañemoñetasa ndoyoyai vahe pe pāhuve. Oyoya pehañeco tupri ñepe-pei peyese peico.

²⁶ Evocoyase que ñepe yande pāhu pendar upe mbahe tasise, opacatu ambuae upe avei tasi; anise que ñepe imboyeroyapri secoise, ambuae avei opacatu oyemboviha yuvireco sese.

²⁷ Supi eté pe inungar Cristo rete peico. Ēgüe peye ité ñepe-pei chupendar ité peico.

²⁸ Ēgüe ehi Tūpa iporavo viroyasar pāhuve, “Toime rane yipindar apóstol; ipare toime ava che ñehengagüer mombehu āgua, ichui ambuae upe iporombohe āgua, ipare ambuae mbahe ndayasepiai vahe apo āgua, iyavei ambuae ava imbaheasi vahe mbogūera āgua, ambuae ava pīviisar tasecoi, ambuae ava recocuer roeruata tupri āgua tasecoi, ambuae ava evocoyase toñehe ñehesa ndicuasai vahe pipe” ehi.

²⁹ Ndahei rumo opacatu ava apóstol yuvirecoi, iyavei ndahei opacatu Tūpa ñehe mombehusar yuvirecoi, ndahei opacatu oporombohe yuvireco, ndaopacatu avei oyapo mbahe ndayasepiai vahe yuvireco,

³⁰ ndahei opacatu vireco pīratasa oporombogüera āgua yuvireco, iyavei ndahei opacatu ndicuasai vahe ñehesa Espiritu suindar pipe oñehe yuvireco, ndaopacatu avei oicua evocoi ñehesa renducua uca āgua ambuae ava upe yuvireco.

³¹ Peseca ru Espiritu suindar mbahecuasa aviye catu vahe peyeupe nara.

Yembohesa yande poroaisu āgua resendar

Che rumo amombehura tecocuer aviye catu vahe pēu.

13

¹ Yepe yande yañeheño tēise ambuae ava ñehe ndayaicuai vahe pipe, iyavei Tūpa rembiguai ñehe pipe avei viña, ndayasaisuisse rumo ava ipipe, yande evocoyase ēgüe yahe tupri tēi inungar mbahe guarepochi apopri siapu iteanga vahe, iyavei inungar acoi platillo siapú rai tēi vahe, ēgüe yahe tēi yaico.

² Iyavei yepe yamombehuño tēise Tūpa suindar ñehesa ou vahe yandeu viña, iyavei yepe yaicuase mbahe opacatu icuapirēhi Tūpa suindar yaico, yarecose avei yande aracuasa opacatu yandeyese, iyavei yepe yande Tūpa rese yeroya pipe yarosirira ivitri guasu senda sui viña, ndayasaisuisse rumo ava ipipe, yande evocoyase ēgüe yahe tupri tēira yaico.

³ Iyavei yande mbahe opacatu yareco vahe yamboyaho-yaho tupri tēise ava iparaisu vahe upe viña, iyavei yayoapi ucapa tupri tēise viña, ndayasaisuisse rumo ava ipipe yaico, ndayande pītiví eté evocoyia yande reco agüer.

⁴ Acoi ava iporoaisu vahe, ahe seco mbegüe tupri, secocuer aviye ai eté iyavei ndoporoamotarēhi ambuae ava mbahe potasave; “Che aviye catu vahe aico” ndehi avei, ndoyecomboivate ai eté,

⁵ ahe ndovirecoi eté oporomboeteiēhisa, ndahei oyeupe güeraño mbahe oipota, niñemoiro serai vahe, ahe rumo iñero voño ambuae ava upe.

⁶ Ndahei mbahe tēi rese oyemboviha; ahe rumo oyemboviha mbahe supi tupri vahe rese.

⁷ Oporoaisusa virecose oñemosañi opacatu uve, oyeroya vite sese, osāro vite mbahe tupri ichui, iyavei seco mbegüe viteño chupe.

⁸ Poroaisusa niha ndopai vahe ité. Oyepotara ari ipapapri coiye, ahese ndayamombehu iri chira Tūpa suindar ñehesa ou vahe, ndayañehe iri chira ambuae ñehesa ndayaicuai vahe pipe, ndayaiporu iri chiaveira yande mbahecuasa.

⁹ Esepia niha, yaicua raimi tēi mbahe iyavei chīhi raimi tēi yamombehu Tūpa Ñehengagüer.

¹⁰ Acoi ouse rumo oicuapa tupri vahe mbahe, ahese ndahe iri chira yaicua raimi tēi vahe yaiporura.

¹¹ Esepia niha, chīhivahe vite yande recose, yañehe, yandepihañemoñeta, yasenducua mbahe chīhivahe nungar; yacuacuase ité rumo cute, yaseyapa chīhivahe yande reco agüer.

¹² Cūrítei yande ndayasenducua tuprii Tūpa resendar mbahe, inungar acoi yepiasa pipe yasepia hāvomi tēi que mbahe; oyeovai eté yaicose rumo, yasenducua tupri catu itera mbahe evocoyase. Cūrítei rumo yaicua raimi tēi mbahe Tūpa suindar yaico; coiye rumo yaicua tupri catu itera, inungar ahe oicua tupri ité yande recocuer.

¹³ Co oime mbosapi mbahe ndopai vaheerā, ahe: Tūpa rese yande yeroyasa, mbahe yande remiaro ivave oime vahe iyavei yande yeaisusa; co imombosapisa rumo aviye catú vahe ité ambuae sui yandeu, ahe yeaisusa.

14

Yaseca catura Tūpa suindar ñehesa mombehu āgua

¹ Peseca catu pe yeaisu tupri āgua peico; aheseve avei peipotara mbahecuasa Tūpa Espiritu remimbou. Ichuindar ñehesa mombehu āgua rese catu ité rumo peicora.

² Esepia, acoi ava oñehe vahe ñehesa ndayaicuai vahe pipe, Tūpa upe ité evocoyase oñehe; ndahei ava upe tēi oñehe. Esepia, ndipoi eté ava iñehe renducupar. Ahe rumo oñehe mbahe ndicuasai vahe rese oespíritu pipe.

³ Acoi ava omombehu vahe rumo Tūpa suindar ñehesa yasenducua vahe pipe, ahe oipītiví ambuae ava Tūpa rese iyeroya āgua, oporomonguerēhi catu, oporomboviha catu avei.

⁴ Acoi ava oñehe vahe rumo ñehesa ndayaicuai vahe pipe, ahe ae tēi vireco catu Tūpa rese opīhañemoñetasa. Acoi ava omombehu vahe rumo Tūpa suindar ñehesa icuapri ité, ahe ombopīhañemoñetá catu Tūpa rese Cristo reroyasar yuvirecoi vahe.

⁵ Yepe aipotara opacatu pe ñehe āgua ñehesa ndayaicuai vahe pipe pēu viña, aviye catu rumo pemombehura Tūpa suindar ñehesa icuapri vahe peico. Esepia, ahe aviye catu ñehesa

ndayaicuai vahe sui. Oimese rumo ava ñehesa ndayaicuai vahe renducua uca tupri água, ahese aviyeño oñehe Jesús reroyasar rovaque. Ipípe sui ipihañemoñeta catura Tüpa rese yuvireco.

⁶ Sese, che rivireta, asose pe repia, añehese co ñehesa ndayaicuai vahe pipe pëu, ndapesenducuai chira che ñehe viña. Amombehuse rumo Tüpa oicua uca vahe cheu que mbahecuaasa supi tupri vahe resendar, anise que ñehesa Tüpa suindar, anise que ambuae porombohesa, ahese pesenducua viña.

⁷ Mbahe yande remimombehu rumo inungar acoi mbahe porasei recasar imoñehepri viña, inungar mimbí, arpa avei. Esepia, ndoyoya tupriise ñehögüer yuvireco, ndayasenducuai eté evocoyase mbahe-mbahe sapucaisa osáha yuvireco.

⁸ Anise co inungar mimbí nomoñehe tupriise vavasave nara yuvireco viña, ndipoi chietera que ava oyemoingatu voi vaheerá ovava água viña.

⁹ Ëgüe peye avei niha peico peñehese ava upe ñehesa ndayasenducuai vahe pipe, ahe evocoyase osenduño tēi, ndosenducuai eté rumo pe ñehe yuvireco. ¡Evocoyase peñeheso tēi eté!

¹⁰ Supi eté, setá iteanga co ivi pipe oime ambuae-ae tēi ava ñehesa. Oime avei rumo ava osenducua vahe aipo nungar ñehesa.

¹¹ Acoi ndayasenducuaise rumo ambuae ava ñehe, yande evocoyase inungar ambuae tecua pendar tēi yaico vahe chupe; yandeu avei evocoyase ahe ava inungar ambuae tecua pendar tēi yuvirecoi vahe.

¹² Pe niha peipota ité pereco vaheerá mbahecuaasa Tüpa Espiritu suindar rese yepi. Sese peporandu catu mbahecuaasa Espiritu suindar rese opacatu Jesús reroyasar pñivivi água Tüpa rese yuvirecoi tupri catu vaheerá.

¹³ Sese acoi ava oñehe vahe ñehesa ndayaicuai vahe pipe, toporandu rane Tüpa upe ambuae ava upe senducua uca tupri água rese.

¹⁴ Esepia, acoi yayeroquiño tēise Tüpa upe ñehesa ndayasenducuai vahe pipe, yayeroqui yande espíritu pipe, ndayasenducuai rumo yande yeroqui.

¹⁵ ¿Mara yahera vo evocoyase? Yayeroquira yande espíritu pipe, yande aracuasa pipe avei. Yasapucaira yande espíritu pipe, yande aracuasa pipe avei no.

¹⁶ Esepia, acoi Tüpa upe, “Aviye ndeu” yahese yande espíritu pipe güeraño, evocoyase ava ndosenducuai vahe, oyemboyase yande rese iyavei osenduse yande yeroquisa, “Aviye ité” ndehi chietera yuvireco. Esepia niha, ahe ndosenducuai eté yande yeroqui yuvireco.

¹⁷ “Aviye ndeu” yande hesa, aviyeteramo aviyera Tüpa upe viña, ambuae ava rumo osenduse, noipñivivi chietera Tüpa rese imbopihañemoñeta catu água senducuaēhi pipe.

¹⁸ “Aviye ndeu” ahe Tüpa upe. Esepia, añehe catu ñehesa ndayaicuai vahe pipe opacatu pe sui.

¹⁹ Jesús reroyasar ñemonuhasave rumo aipota catu amombehu vaheerá moviromi tēi ñehesa yasenducua vahe ava mbohe água setá ñehesa ndicuaasi vahe pipe che ñehe rägüer sui.

²⁰ Che rivireta, pepihañemoñeta eme chñihavemi pihañemoñeta nungar pipe. Iyacatu rumo peicora cuacua vahe pihañemoñeta nungar pipe. Peyemochihivahe catuñora rumo peico mbahe naporai vahe apoēhi água.

²¹ Porocuaita resendar icuachiapri aracahendar pipe aipo ehi: “Añehera co ava yuvirecoi vahe upe ambuae ava ñehe pipe. Iyavei ava ambuae ivi pendar amoñehe ucara ñehe pipe yuvireco chupe. Ahe rumo ndache mboyeroyai chiño itera yuvireco, ehi yande Yar” ehi aracahe.

²² Evocoyase co ñehesa ndayaicuai vahe pipe oñehese ava Tüpa pñratasa pipe, ahe Jesús reroyasarēhi yuvirecoi vahe upe nara: “¡Peicua catu, co supi tupri vahe!” he água. Ndaheí rumo ava Jesús reroyasar yuvirecoi vahe upendar. Ñehesa Tüpa suindar senducupri yamombehuse rumo, ahe, “Co supi tupri vahe” he água Jesús reroyasar yuvirecoi vahe upe; ndaheí ava seroyasarēhi yuvirecoi vahe upendar.

²³ Evocoyase, acoi opacatu pe Jesús reroyasar pe ñemonuhasave oyoya guasu peñehese ñehesa ndayaicuai vahe pipe tēi, ipare yuviroiquese pe pñhuve Jesús reroyasarēhi ndosenducuai vahe Tüpa suindar mbahe yuvireco, “¡Opacatu co ndayaracuai vahe tēi yuvireco!” ehira yuvireco pëu.

²⁴ Opacatu rumo peñehese Tüpa suindar ñehesa yasenducua vahe pipe, yuviroiquese evocoi nungar ava yuvirasos pe pñhuve, ahe ae evocoyase, “Supi eté ayavi che recocuer Tüpa rovaque” ehira pe ñehe renduse yuvireco.

²⁵ Ëgüe ehira opihañemoñeta rai ndoyecuai vahe imboporēhipa uca oyeupe pe ñehe rendu ramose yuvireco. Ipípe sui omboeteira Tüpa yuvireco. Ahese, “Supi eté catu Tüpa ité pereco peyese” ehira yuvireco pëu.

Yayapora mbahe opacatu yande cuaita rupi ñemonuhasave

²⁶ Sese che rivireta, peñemonuhase, oime pe pāhu pendar osapucaí pota vahe sapucaisa Tūpa upendar, ambuae evocoiyase oipota ité ava mbohe yuvireco, anise ambuae omombehu pota ava upe mbahe oyeupe omboyecua uca vahe Tūpa, ambuae oipota ité oñehe ñehesa ndicuasai vahe pipe, anise ambuae osenducua uca pota avei ambuae ava upe ñehesa ndicuasai vahe. Opacatu rumo co mbahe yayapora ambuae Jesús reroyasareta seroya catu āgua yuvireco.

²⁷ Acoi ava oñehese ñehesa ndayaicuai vahe pipe, toñehe ñuvirío güeraño yuvireco, anise que mbosapí ñepeí-peí rupi; ñepeí evocoiyase osenducua ucara iñehe ava upe oico.

²⁸ Acoi ndipoise ité rumo ambuae ava ahe ñehesa ndayaicuai vahe renducua uca āgua, ndiyai ahe oñehera yuvireco pe ñemonuhase; oyeupeñomi evocoiyase ahe oñehera ipipe yuvireco Tūpa upe.

²⁹ Ēgüe peye tuprí aveira pemombehuse Tūpa suindar ñehesa ambuae ava upe, peñehera ñuviríomi, anise mbosapí. Ambuae evocoiyase pe pāhu pendar oyapisaca tupríra sese yuvireco ‘¿supi eté pīha?’ ohesave.

³⁰ Que ñepeí oñehe vitesé Tūpa oicua ucasa mbahe ambuae ava upe, topituhuño yipindar oñehe vahe, ambuae evocoiyase toñehe pēu.

³¹ Evocoiyase Ēgüe peyera peñehe ñepeí-peí opacatu ambuae osendu vahe mbohe āgua iyavei imongerēhi catu āgua.

³² Acoi omombehu vahe ñehesa Tūpa suindar, ahe oicatu oñehe mombituhu āgua.

³³⁻³⁴ Esepia, Tūpa secoi mbahe aviye vahe aposar, ndahei ndoyembohe catui vahe.

Ndiyai cuña upe iñehe āgua pe ñemonuhase. Esepia, Ēgüe ehi avei opacatu ambuae Jesús reroyasar ñemonuhasa rupi yuvireco. Evocoiyase ndiyai eté aheve iñehe āgua yuvireco chupe. Iyacatu rumo ahe imboyeroyapri yuvirecoira omer upe Tūpa porocuita rupi.

³⁵ Oicua potase que mbahe, iya omer upe oporandura güetave yuvireco. Esepia, cuña upe ndiyai eté iporandu āgua mbahe rese pe ñemonuhase.

³⁶ Peyapisaca catu co ñehesa rese. Ndahei niha pe rane pemombehu Tūpa Ñehengagüer ava upe peico, ndahei avei pēuñomi ou Tūpa suindar ñehesa.

³⁷ Acoi que pe pāhuve oimese “che Tūpa Ñehengagüer mombehusar aico” ehiño tēi vahe, anise que “aicua Espiritu suindar mbahe” ehi vahe, iya rumo oicua tuprí co aicuachía vahe imondo pēu, ahe yande Yar porocuita resendar.

³⁸ Ahe ndoyapisaca potaise rumo che ñehe rese, iñehe rese evocoiyase ndapeyapísacai chira.

³⁹ Sese, che rivireta, peyemongerēhi catu Tūpa suindar ñehesa icuapri vahe mombehu āgua peico. Ndiyai rumo ndapeipotai ambuae ava upe ñehesa ndayaicuai vahe pipe iñehe āgua.

⁴⁰ Peyapora rumo opacatu mbahe ñepeí-peí pe cuaita rupi mbahe tuprí pipe.

15

Cristo cuerayevi agüer

¹ Che rivireta, che aipota peyemomahenduha acoi ñehesa pīsirosa resendar pēu mombehu vahecuer rese. Co ñehesa niha peipisi. Ipipe sui avei niha peyemoviracua peyese.

² Seroya pipe niha peñepisiro peico peyemoviracuase sese. Ēgüe ndapeyese rumo, peroya tuprí tēi.

³ Acoi ñehesa aipisi vahe, opa uca aicua pēu. Esepia, ahe aviye catu vahe: Cristo omano yande angaipa repirā Tūpa Ñehengagüer icuachiapri rupi eté

⁴ iyavei oñoti sehögüer yuvireco. Ipare rumo, imombosapisa ari pipe, ocuerayevi iri icuachiapri rupi eté avei.

⁵ Ichui oyemboyecua Pedro upe. Ipare voi oyemboyecua apóstol yuvirecoi vahe upe.

⁶ Ichui oyemboyecua quiniento sui setá catu vahe viroyasar upe. Evocoiyase oyoya guasu osepia yuvireco. Setá vite rumo sepiasarer yuvirecove vite cūrítei; amove rumo ambuae opa omano yuvireco.

⁷ Coiye oyemoporēhi Santiago upe. Ipare opacatu apóstol once yuvirecoi vahe upe.

⁸ Cheu avei ipa ité oyemboyecua cute, aviye evocoiyase che ipá oha vahe aico seroya āgua.

⁹ Esepia, che seco ivi coti catu vahe opacatu ambuae apóstol sui aico. Iyavei ndacheñaroi eté apóstol che reco āgua viña. Esepia, che yipindar seroyasar aseca-seca catu vahe mara-mara tēi sereco āgua.

¹⁰ Che rumo apóstol ité aico. Esepia, Tūpa oyapo mbahe aviye vahe ité cheu; che rovasa oico. Evocoiyase che recocuer osecañaro ité sereco. Ichui che aporaviqui catu ité opacatu ambuae apóstol sui. Ndahei rumo cheyesui tēi Ēgüe ahe vichico, Tūpa rumo oporovasasa pipe secoi che rupi.

¹¹ Ndapepihañemoñetai chira rumo acoi oporaviqui catu vahe rese tēi. Co ñehesa Cristo recocuer resendar ore oromombehu vahe rese rumo pepihañemoñeta catura. Esepia niha, ahe peroya vahe ité peico.

Ava omano vahe cuerayevisa

¹² Oromombehu ité niha Cristo cuerayevi agüer resendar pēu. Oime rumo amove pe pāhu pendar, “¿Mahera aipo ocuerayevira omano vahe yuvireco viña?” ehiño yuvireco.

¹³ Ndocuerayeviise ité rumo ava omano vahe viña, Cristo avei evocoiyase ndocuerayevii chietera viña;

¹⁴ Iyavei Cristo ndocuerayeviise viña, ore secocuer oromombehu vahe evocoiyase ēgüe ehi tēi etera viña. Iyavei pe yeroyasa Cristo rese ēgüe ehi tēi aveira viña.

¹⁵ Acoi ēgüe ehise ité rumo viña, ore avei evocoiyase oroñehēño tēi etera Tūpa resendar ñehesa rese oroico viña. Esepia, “Tūpa Cristo ombogüerayevi” orohe ité imombehu ava upe oroico. Ndocuerayeviise ité rumo omano vahe yuvireco viña, ahese Tūpa nombogüerayevii chiaveira Cristo viña.

¹⁶ Ēgüe ehi eté, acoi omano vahe ndocuerayeviise yuvireco viña, Cristo avei evocoiyase ndocuerayevii chietera viña;

¹⁷ Tūpa rese pe yeroyasa evocoiyase ēgüe ehi tēi vahe itera viña; angaipa pipe viteño tēi evocoiyase pe recocuer viña.

¹⁸ Iyavei acoi ēgüe ehise ité viña, evocoiyase omano vahe Cristo reroyasar, ahe avei ocañi tēira viña.

¹⁹ Ndipoise yasāro vāherā Cristo suindar mbahe yamanose, yande evocoiyase imbopapri tēi catu itera yaico opacatu ambuae ava sui yuvireco viña.

²⁰ Cristo rumo supi eté ocuerayevi omano vahe pāhu sui; ahe rane yipindar ocuerayevi vahe.

²¹ Esepia, ñepeí ava rembiapo sui oime manosa yandeu. Evocoiyase ñepeí ava rembiapo sui avei yacuerayevira.

²² Esepia, inungar acoi Adán rembiapo ai sui ava opacatu omano yuvireco, ēgüe ehi aveira Cristo rembiapo sui opacatu ava sese yuvirecoi vahe virecora tecovesa yuvireco.

²³ Ñepeí-peí yandeu imombehusa rupi; yipindar Cristo ocuerayevi, ichui yande seroyasar yaico vahe yacuerayevi aveira sese acoi ahe oyevisse curi.

²⁴ Ahese oura ari ipa vahe cute. Yipindar rumo Cristo omocañipara opacatu seco pĩrata ēgüe ehi tēi vahe. Ipare omondora opovri pendar Vu Tūpa upe.

²⁵ Ahe rane ité rumo opacatu oporocuaíra oico acoi Tu opase voi eté omondo opacatu yamotarēhimbar ipovrive.

²⁶ Ahese ipa manosa opa itera.

²⁷ Esepia, Tūpa osecopi opacatu mbahe imondo ipovrive, “Opacatu ité mbahe secopipri” ehise. Ndahei rumo Tu Tūpa avei secoi ipovrive. Esepia, Tu ité opacatu mbahe osecopi imondo ipovrive.

²⁸ Evocoiyase, opase mbahe imondosa ipovrive, ahe ae evocoiyase oyemondora Vu Tūpa povrive. Tu evocoiyase secoira ivate catu vahe opacatu mbahe sui.

²⁹ Ndipoise omano vahe cuerayevi āgua yuvireco viña, ¿mbahe rese pīha evocoiyase omanose ava, amove chupe nara tēi ambuae oñeapiramo uca yuvireco? Esepia, omano vahe ndocuerayeviise yuvireco viña, ¿mahera ru evocoiyase ahe ava oñeapiramo uca chupe yuvireco?

³⁰ Iyavei ore no, ¿mahera ru evocoiyase oroyemondora mbahe tēi upe ari rupi viña?

³¹ Supi eté, che rivireta, ari yacatu aviye che amano vāherā opacatu co mbahe tēi sui. Ahe pipeve avei rumo che arco ité che vīharetesa pe rese yande Yar Jesucristo rese che recose.

³² Oime mbia Efeso pendar mbahe tēi eté oyapo yuvireco cheu. Aviye acoi mahembiar oñaro ai vahe rese avava vahe vichico. Acoi omano vahe ndocuerayeviise rumo yuvireco viña, evocoiyase ichui ndipoi chietera mbahe aviye vahe cheu viña. Sese che ayapoño itera inungar ava aipo ehi vahe yuvireco viña “yacaruño, yaihuño avei. Esepia, ayihive yamanora” ehi vahe.

³³ Peyembopa uca eme evocoi nungar ava upe peico. Supi eté ñehesa aipo ehi vahe: “Ava naporai vahe piri peicose, ahe evocoiyase vīrovara pe reco tuprisa” ehi vahe.

³⁴ Pepihañemoñeta tupri iri, peyemboangaipa uca iri eme. Esepia, amove pe pāhu pendar oime ndoicuai vahe ité Tūpa yuvireco. Che aipo ahe ité pēu ‘toyuvinochi che ñehese osenduse yuvireco’ viya.

Yande retecuer cuerayevisa resendar

³⁵ Aviyeteramo pe pāhu pendar oimera oporandu vahe: “¿Mara ehira pīha omano vahe ocuerayevi irise yuvireco coiyē? ¿Mara ehi angahura pīha setecuer ahese yuvireco?” ehira yuvireco oyeupe.

- ³⁶ ¡Pe aipo peye-peye tēi peico! Esepia, mbahe rāhii yañotise, ituyu rane ité sori āgua.
- ³⁷ Yañotise mbahe, sāhii rane ité yañoti; ndahei ihi opacatu reseve yañoti.
- ³⁸ Ipare rumo Tūpa omondo ahe mbahe rāhii upe ihiguā güemimbotar rupi, iyavei ambuae mbahe rāhii yacatu omondo ihiguā.
- ³⁹ Ndahoyoyai rumo que ñepeí mbahe miti hi ambuae mbahe miti hi rese. Ēgüe yahe avei yande yaico vahe ambuae ité yande rete mbahe mimba sui; vīrai rete ambuae ité iyavei pira rete ambuae ité no.
- ⁴⁰ Ēgüe ehi avei niha, oime iva pendar rete, ivive ava yuvirecoi vahe rete avei no. Iva pendar rete catuprigüer rumo ndahoyoyai eté ivi pipendar rete rese.
- ⁴¹ Ari rendigüer avei ndahoyoyai yasí rendigüer rese, yasitata rendigüer rese avei. Ñepeí yasitata ambuae yasitata rese ndahoyoyai avei sendigüer yuvireco.
- ⁴² Ēgüe ehi aveira niha omano vahe cuerayevisa; yañotise sehögüer, ahe ituyu vaheerā. Ocuerayevise rumo ndituyu iri chietera; apirēhi vaheerā ité secoira.
- ⁴³ Tehögüer ñotimbrí nimomburusai vahe; coiye ocuerayevise rumo, imboeteipri ité secoi. Acoi ava rehögüer oñoti vahe yuvireco, nipirata iri eté oico, coiye ocuerayevise rumo, ipirata itera.
- ⁴⁴ Supi eté, acoi ava rehögüer ñotisa vahe, ahe co ivi pipendar tēi setecuer. Ocuerayevise rumo, setecuer iva pendar secoira. Esepia, oime ité ivi pendar setecuer, oime avei iva pendar setecuer.
- ⁴⁵ Supi eté aipo ehi icuachiapri aracahendar pipe: “Yipindar ava Adán serer vahe. Ahe sete upe ombou Tūpa secove āgua co ivi pipe” ehi. Ichui rumo ambuae ité ipa Adán nungar ou vahe, ahe rumo vireco ité tecovesa iva pendar ava upe imbou āgua.
- ⁴⁶ Yipindar oime co ivi pipendar tecovesa. Ipare rumo oime co tecovesa iva pendar yandeu.
- ⁴⁷ Ēgüe ehi yipindar ava ivi sui yapopri, ivi rese nara ité icuaita oico; coiye catu ava ou vahe evocoyase iva pendar.
- ⁴⁸ Inungar yipindar ava ivi suindar, ēgüe ehi avei opacatu ava ivi suindar tecovesa rereco yuvireco. Iyavei inungar Jesús iva suindar, ēgüe ehi aveira opacatu iva suindar tecovesa vireco vahe yuvireco.
- ⁴⁹ Iyavei inungar cūrítei Adán nungar tupri yaico; ēgüe yahe aveira yande Jesucristo iva pendar nungar tupri yaico curi.
- ⁵⁰ Che rivireta, co mbahe amombehu potami pēu: acoi ava upe güetecuer reseve, ndiyai eté seique āgua ivave Tūpa mborerecuasave. Esepia, co yande rete ocañi tēi vaheerā, ndoipisii chira tecocuer apirēhi vahe.
- ⁵¹ Iya, peicua co mbahe oyecua ramo vahe: ndahei chira opacatu yamano. Opacatu rumo yande rete aviyeteramo tēi eté secuñarosapara.
- ⁵² Mimbí moñehese voi yande resapihara inungar yande resapiqui vahe, ēgüe ehira secuñarosapa yande rete. Aheseve avei omano vahe ocuerayevipara apirēhi vaheerā ité yuvireco; yande evocoyase nayamano vītei vahe, opaño tēira yande rete secuñarosa.
- ⁵³ Esepia, co yande rete ocañi tēi vaheerā, ahe yande rete niha opara oñecuñaro apirēhi vaheerā yuvireco.
- ⁵⁴ Ēgüe ehise yandeu, ahese ramo osupitira Tūpa ñehe icuachiapri pipe imombehupri yandeu curi: “Manosa opara imocañisa” ehi vahe.
- ⁵⁵ Iyavei aipo ehi: “Ndayasiquie iri chira yande mano āgua. Esepia, manosa ndovireco iri chira oyeroyasa oyese inungar acoi cau popiar opa vahe serocuasā ichui” ehi.
- ⁵⁶ Angaipa niha inungar mbahe popiar omoime vahe manosa yandeu. Moisés porocuaíta aracahendar evocoyase ombou pīratasa angaipa upe angaipa aposar mocañi uca āgua.
- ⁵⁷ Che rumo, “¡Aviye ndeul!” ahe Tūpa upe. Esepia, ahe ombou angaipa recopi āgua yandeu yande Yar Jesucristo rembiapo sui.
- ⁵⁸ Sese, che rivireta, peico tupriño ité Cristo rese iyavei peyemoviracua opacatu mbahe tēi upe; peporaviqui catuño yande Yar upendar mbahe rese peico. Esepia, peicua niha yande Yar rese peicose, pe poraviquisa ndahei ēgüe ehi tēi vahe.

16

Porerecosa Jesús reroyasar pītivii āgua resendar

¹ Iyavei co guarepochi monuha āgua iparaisu vahe Jesús reroyasar upe nara, pe avei catu peyapo mbahe inungar che amombehu Jesús reroyasar ivi Galacia rupindar upe.

² Domingu yacatu iya pe avei peipeha voimi guarepochi peico pe poraviqui repri sui yapocatu āgua. Eipeve che yepotase, ndapeyemañeco iri chira guarepochi monuha āgua rese peico.

³ Evocoiyase acoi ayepotase eipeve vicho, amondora ava pe rembiporavo Jerusalén ve. Che ñehe icuachiapri avei amondora chupe guarepochi pe remimonuha reraso água yuvireco ahe pendar yuvirecoi vahe upe.

⁴ Aviyeteramo, iyase cheu, che avei asora aheve. Evocoiyase ahe yuvirasora che rupi.

Pablo ipihañemoñeta oguata água rese

⁵ Che sose, asora ivi Macedonia rupi, ipare asora pe repia Corinto ve.

⁶ Aviyeteramo apita pucumira pe piri, anise aviyeteramo pe pirive ité mbahe porañehi che mombitañora. Ipape pe che pitiviñomira peye eipeve sui ambuae tecuave che so água rese.

⁷ Ndaipotai che opoepia raimi tēi eipeve vicho. Yande Yar rumo oipotase, aico pucu itera pe piri.

⁸ Che rumo cūrítei apitaño vitera cohava Efeso ve, asepia ranera Pentecostés pieta.

⁹ Esepia, oime ité yande Yar upe che poraviquisa aviye vahe ité cohava, yepe setá iteanga ava che amotarēhimbar yuvirecoi viña.

¹⁰ Acoi Timoteo oyepotase oso pe piri, taseco tupriño ité pe pāhuve. Esepia, ahe avei oporaviqui yande Yar upe nara oico che nungar.

¹¹ Tipo eme ñepe yepe sepia potaēhisar yuvireco, iya rumo peipitivi catura che piri iyepota tupri água rese. Esepia, che iyavei ambuae Jesús reroyasar rese orosāro ité iyepota água oroico.

¹² Yande rivri Apolos upe, “Eso ambuae Jesús reroyasar piri Corinto ve” ahe tēi. Cūrítei rumo niquerēhi oso pe repia; iyase chupe, ahese osora pe piri.

Pablo mahenduhasa ipa vahe

¹³ Pemahemoha peyese; peyemoviracua avei Jesús rese pe yeroyasa pipe. Peñemosaño catu pe cuaita upe. Peicoveño itera Tūpa pīratasa pipe.

¹⁴ Opacatu mbahe peyapo pota vahe, peyapora pe poroaisusa pipe ité.

¹⁵ Che rivireta, pe peicua Estéfanos opacatu güeta pendar reseve, ahe ranei yipindar ivi Acaya rupi viroya vahe ñehesa yande Yar resendar yuvireco. Oyemondo avei ambuae Jesús reroyasar rese hañeco tupri água yuvireco no.

¹⁶ Evocoiyase che aipota peyemboyeroyara evocoi nungar ava rese iyavei opacatu ambuae yande Yar upe oporaviqui vahe rese avei.

¹⁷ Pe pāhu pendar Estéfanos, Fortunato iyavei Acaico cohava oyepotase che mboviha yuvireco. Esepia, ahe oyapo ité pe ndapeicatu tuprii vahe apo yuvireco.

¹⁸ Ahe che monguerēhi catu yuvireco, ēgüe ehi avei revo pēu no. Pemboeteira evocoi nungar ava peico.

¹⁹ Jesús reroyasar Asia pendar opacatu ombou omahenduhasa yuvireco pēu. Aquila, Priscila avei imahenduhá iteanga yuvireco pe rese iyavei opacatu ambuae ava oñemonuha vahe ahe sētave yuvireco, ahe avei ombou omahenduhasa yande Yar rer pipe yuvireco pēu.

²⁰ Opacatu Jesús reroyasar coha pendar avei omondo omahenduhasa yuvireco pēu. Peyeoavapite catu pe reco maranehisa pipe ahe mahenduhasa mombehu peyeupe pe viharetasave.

²¹ Che Pablo, che po pipe ité aicuachía co che mahenduhasa imondo pēu.

²² Acoi ava ndosaisui vahe yande Yar Jesucristo, ahe tocañi mbahe tēi pipe. ¡Toyevi pihavi voi yande Yar ou!

²³ Yande Yar Jesucristo tape rovasa ité yepi.

²⁴ Pēu opacatu amondo che poroaisusa opacatu Jesucristo rese yande recosa pipe. Aipo rupive che ñehesa pēu.

IMONŪVĪRIOSIA PABLO REMBICUACHIA CORINTO PNDAR UPE CORINTIOS

Pablo mahenduhasa Jesús reroyasar Corinto pndar upe

¹ Avirave, opacatu Jesús reroyasareta Corinto pndar peico vahe, pe Tūpa reroyasar ivi Acaya rupindar avei. Che Pablo, Tūpa remimbotar rupi Jesucristo apóstol aico. Aicuachía che ñehe pēu. Co yande rivri Timoteo avei omondo omahenduhasa pēu.

² Tapeipisi catu yande Ru Tūpa, yande Yar Jesucristo porovasasa avei pe reco tupri āgua.

Pablo paraisu agüer resendar

³ Yamboeteiño itera yande Ru Tūpa. Ahe niha yande Yar Jesucristo Ru seci, ahe yande paraisuereco vahe iyavei ombou vahe yande mboviha āgua yepi.

⁴ Ahe niha yande mbovihaño opacatu yande paraिसusa pipe, yande avei evocoyase yaicatura ava iparaisu vahe mboviha āgua yuvireco. Ēgüe ehi eté Tūpa imbou vihasa yandeu, ahe avei yande yamondora yuvireco chupe.

⁵ Esepia, inungar Cristo imombaraisupri seci, Ēgüe yahe aveira imombaraisupri yaico yaicose sese. Cristo sui avei rumo oime itera vihasa yandeu.

⁶ Ore paraisu pe mboviha āgua 'toñepisiro yuvireco' ore yapave. Iyavei Tūpa ore mboviha pe mboviha āgua avei. Supi evocoyase pe peñemosañora mbegüe rupi ore paraisu agüer nungar tupri pe recose.

⁷ Ore oroyeroya ité Tūpa pe pītivi āgua rese. Esepia, oroicua ore paraisu agüer nungar tupri peico, Ēgüe peye avei peipisi ore vihasa Tūpa suindar.

⁸ Che rivireta, opomomahenduha pota mara orohe oroico ivi Asia rupi. Ore recoāhasa yavai vahe ité oime aheve oreu. Ndroicatu iri eté oroñemoso ore pīrataēhise chupe, seni orepihañemoñeta: "Yamanoño itera co mbahe-mbahe tēi pipe" orohe viña.

⁹ Supi eté oromoha ore cañi tēi āgua viña, Ēgüe ehi rumo oreu oroyeroya catu āgua Tūpa rese, ndahei oreyses tēi. Esepia, ahe oporombogüerayevi vahe seci.

¹⁰ Ahe niha ore repi ore mano rāgüer sui, ore repi aveira curi evocoi nungar mbahe tēi sui. Supi eté oroyeroya viteño ité sese. Ahe ité niha ore repi viteño itera mbahe-mbahe tēi sui,

¹¹ pe ore pītiviise peye pe yeroqui pipe. Ahese setá, "Aviye ndeu" ehira yuvireco Tūpa oporopītiviisa ombou vahe rese oreu setá yeroquisa sui.

Mbahe sui Pablo ndosoi Corinto ve

¹² Oime mbahe ore mboviharete vahe: ore piha pipe ité oroicua oroico tupri Tūpa suindar ore reco catuprisa pipe, ore pihañemoñeta tuprisa pipe avei co ivi pipendar ava rembiepiave, pe rembiepiave avei eté. Tūpa porovasasa pipe niha Ēgüe orohe, ndahei ava co ivi pipendar mbahecuasa pipe tēi.

¹³⁻¹⁴ Esepia, che ñehe aicuachía vahe imondo pēu, aicuachía ñepeí reseve pe yeroqui tupri āgua, pe senducua tupri āgua avei no. Iyavei ore cua revo chíli peye cute. Acoi yande Yar Jesús yevise curi, ahese peyembovihara ore rese, inungar ore oroyembovihara pe rese.

¹⁵⁻¹⁶ Sese yipindar supi eté che pihañemoñeta aso vaheṛā ñuvirio yupagüer pe repia, pe mboviha catu āgua viña. Ēgüe ahe ité, che pihañemoñeta pe piri rane che so āgua che guatasa rupi Macedonia ve. Ichui ayevi pota iri pe piri viña, ipare pe che pītivimira peye ivi Judea rupi che so āgua rese viña.

¹⁷ Ndachepihañemoñeta voño tēi che so āgua, ndahei iporombopa serai vahe aico "che co mbahe ayapora" ehi tēi vahe, ipare rumo nomboaviyei eté.

¹⁸ Tūpa rumo oicua ore ndahei, "Aviye" ore he voisa pēu, ahe pipeve avei, "Aní" ore hesa.

¹⁹ Esepia, Tūpa Rahir Jesucristo avei ñepeí reseve vahe ité yayeroyá vahe sese. Ahe secocuer niha oromombehu oroico pēu, che, Silvano, Timoteo avei.

²⁰ Esepia, opacatu Tūpa remimombehugüer imboaviyesa sese. Sese niha serer pipe, "Ēgüe tehi" yahe Tūpa upe imboeteisave.

²¹ Tūpa niha opacatu yande momirata seseño ité yande reco āgua, yande poravo avei.

²² Güerer omondo yande rese 'cheu nara' oyapave. Ombou avei oEspíritu yande piha pipe 'ipipe toicua che remimombehugüer rupi tupri ité mbahe amondora chupe yuvireco curi' oyapave.

²³ Tūpa niha oicua acoi ndayeviise Corinto ve pe piri, Ēgüe ahe pēu mbahe aviye āgua rese.

²⁴ Ndahei opocuai pota mbahe pe rembieroyará rese. Esepia, pe Tūpa rese pe yeroyasa pipe peyemoviracuaño ité Cristo rese. Ore rumo oroipota pe pītiviisa pe yemboviha āgua.

2

¹⁻² Co rese ndaso catu iri pe piri. Esepia, che aso irise pe piri ndopomboviha catui chira viña, ¿ava vo evocoyase che mboviñara viña? Pe ité niha che mboviñasar peico.

³ Sese che aicuachía ñehesa ipirata vahe pëu cuese. Esepia, ndaipotai eipeve che sose, che mboviñaëhi água peye. Pe rumo iya ité che mboviña catura peye viña. Che ayeroya ité opacatu pe rese aviharetese, pe avei evocoyase opacatu peviharetera che rese.

⁴ Supi eté che aicuachise che ñehes pëu, che ae ayepihamboasi ité, ayaseho avei. Esepia, aicuachía vahe pëu ndahei pe mboviñaëhi água, che rumo aicuachía 'toicua che guaisu eteprisa yuvireco' che yapave pëu.

Oime ñerosa ava upe mbahe sembiavi rese

⁵ Acoi yande rivri omoime uca vahe viharëhisa co mbahe tēi apo pipe, ndahei che güeraño ndache mboviñai, pe avei rumo seni opacatu ëgüe peye. Che, "Seni" aipo ahe ité pëu. Esepia, ndaipotai che ñehes rasi água.

⁶ Co mbia upe setá mbahe peiporara uca ité, evocoi rupive iya ëgüe peye chupe.

⁷ Co suive ité rumo peñerora chupe, peipitivi aveira. Esepia, aviyeteramo oviharëhisa pipe oyemocañi tēira.

⁸ Sese cūritei opomonguerëhi ité pe mboyecua iri água pe poroaisusa chupe.

⁹ Cuese ambuae che ñehes aicuachía co che pe mbohesa resendar pëu pe recoña água, "¿Oyapo itera pñha che remimombehu yuvireco?" ahe pëu.

¹⁰ Cūritei cheñero avei que ava upe peñero vahecur upe. Esepia, oimese que mbahe rese che ñero água, Cristo rovaque ëgüe ahe pe raisusave

¹¹ Carugar yande mbopaëhi água. Esepia, yande yaicua tupri ité iporombopasa.

Tecua Troas ve Pablo nombohe catui opihañemoñetasa

¹² Ayepotase tecua Troas ve Cristo recocuer mombehu água, oime ité yande Yar upe nara aheve che poraviqui água viña.

¹³ Nambohe catui rumo che pihañemoñetasa. Esepia, ndasepiai eté yande rivri Tito. Sese, che, "Aviye" ahe pare ava Troas pendar upe, asoño ivi Macedonia rupi.

Cristo rese yaicose, yaicatu mbahe tēi recopi

¹⁴ Aviye yande Ru Tūpa upe. Esepia, yande Cristo rese yaico vahe yande renose oamotarëhimbar povri sui opacatu ava rembiepiave iyavei yande recocuer sui opacatu ava upe oicua uca güecocuer inungar mbahe siacua vahe yasëtu vahe opacatu rupi.

¹⁵ Esepia, inungar itaisi siacua vahe opacatu rupi, ëgüe vahe avei yande Tūpa upe Cristo yande reropovëhese yaico ava ipisiropirá upe, ava ocañi tēi vahe rā upe avei.

¹⁶ Ahe ava ocañi tēi vahe rā upe evocoi ñehesa yaru vahe inungar cañi tēisa resendar; ava ipisiropirá yuvirecoi vahe upe rumo evocoi ñehesa ombou tecovesa. Yande ae tēi rumo ndayaicatui evocoi nungar mbahe apo.

¹⁷ Ore rumo ndahei setá ambuae ava nungar tēi oroico. Esepia, oromombehuse Tūpa Ñehengagüer, ndahei mbahe pisi água tēi rese ëgüe orohe, ore rumo ore pihañemoñeta tuprisa pipe oromombehu co ñehesa Tūpa rovaque Cristo rese ore recosa pipe. Esepia niha, ore semimondo oroico.

3

Ñehesa Tūpa remimbotar ipiasu vahe resendar

¹ Ore aipo orohese, aviyeteramo pëu ndoyavii oroyecomboivate ai pota iri viña, ëgüe ndorohei rumo iyavei ndorosecai icuachía água ava ñehesa aviye vahe ore recocuer resendar oromondo vahe rā pëu. Ndrosecai avei aipo nungar cuachiar pe suindar, inungar co ambuae oyapo vahe yuvireco yepi.

² Esepia, pe ité inungar ore rembicuachía ore recocuer resendar ore oroipota vahe, ëgüe peye peico ore pñha pipe. Esepia, opacatu ava pe reco tupri repiase, oicua ore poraviqui tuprisa pe pñhuvu yuvireco.

³ Pe niha pemboyecua pe reco tupri pipe ore rembiapo Cristo porocuita pipe pe pñhuvu. Sese pe inungar Cristo rembicuachía aviye vahe oromondo vahe ava upe, ahe rumo ndahei tinta pipe ité icuachiapri itape rese, Espiritu Tūpa oicove vahe suindar pipe rumo yapopri ava pñha pipe.

⁴ Oroyeroya ité co rese Tūpa rese ore yeroyasa pipe. Cristo niha ëgüe ehi oreu.

⁵ Ndahei oreyesui tēi oroicatu co mbahe apo. Tūpa rumo ombou oreu opacatu co mbahe apo água.

⁶ Ahe niha ombou opirata oreu güemimbotar ipiasu vahe rese poraviqui água, ndahei Moisés rembicuachiagüer rupi oroporaviqui. Esepia, ahe imboaviyeëhisa pipe yamano

tēira viña. Ahe rumo Espiritu Tūpa suindar pipe oroporaviqui. Esepia, ahe ombou tecovesa yandeu.

⁷ Co Moisés recosendar porocuita icuachiasa ité itape rese, iyavei Tūpa reco porañetesa pipe ou. Israelita evocoyase Moisés rova rese nomahe catui eté yuvireco. Esepia, sendí iteanga, yepe sendigüer ogüe mbegüefo oso viña. Ahe Moisés recosendar porocuita ava upe manosa tēi güeru vahe iporañete ai eté yipindar oico viña.

⁸ Cūrítei rumo iporañeté catu ité ñehesa Tūpa remimbotar ipiasu vahe resendar Espiritu Santo ombou vahe yandeu!

⁹ Supi eté yepe iporañete ai eté Moisés porocuita acoi güeru vahe manosa yandeu viña, jco ñehesa ipiasu vahe rumo yande reco moingatu vahe iporañete catu ité ichui!

¹⁰ Esepia, co yipindar porañete vahe ndahoyoyai ñehesa cūríteindar porañete catu vahe rese.

¹¹ Acoi mborocuita yipindar ndipocopiimi vahe virecose Tūpa reco porañetesa, co ñehesa piasu ipocopi vahe rumo iporañete catu itera ichui.

¹² Ore oroyeroya ité co ñehesa ipocopi vahe rese. Sese oroñehe ava upe ore siquiyeehisa pipe ité.

¹³ Ore rumo ndahei Moisés nungar oroico. Esepia, ahe oyovapi turucuar pipe omu israelita sui güepiaēhi āgua ndogüe viteise sendigüer ichui aracahe.

¹⁴ Ēgüe ehi ahe ndosenducua ucai eté ndoyavii sovapisa vite vahe cūrítei, Ēgüe ehi vite oyoerquise Moisés porocuita icuachiapri yipindar vahe pipe yuvireco. Ñomipri vahe nungar tēi chupe ahe senducuaēhi pipe. Esepia, Cristo güeraño ité oicatu sovapisa nungar rerocua ichui senducua uca āgua chupe.

¹⁵ Ēgüe ehi vite cūrítei, senducuaēhi pipe Moisés porocuita pipe oyoerqui viteño tēi eté yuvireco inungar sovapisa vite vahe.

¹⁶ Supi eté que ava oyevise yande Yar upe, ahese ramo serocuasa sovapisa nungar ichui senducua tupri āgua.

¹⁷ Esepia niha, yande Yar Espiritu secoi. Ahe Espiritu ava rese secoise, ndahe iri mbiguai nungar yuvirecoi.

¹⁸ Sese opacatu yande ndahei Moisés oyeovapi vahe nungar yaico Tūpa porañetesa sendiyai vahe repiaēhi āgua. Yande rumo inungar yepiasa yamboyecua ité yande Yar porañetesa sendiyai vahe ava upe yaico. Yaico catuño ité yande Yar Cristo nungar ari yacatu rupi yepi. Esepia, Ēgüe yahese, yareco catu-catu iri seco porañetesa yandeyese. Yande Yar rumo acoi Espiritu secoi vahe Ēgüe ehi yandeu.

4

¹ Sese, “Ndorequerēhi iri” ndorohei eté. Esepia, Tūpa ore poravo ore paraisuerecosa pipe ore poraviqui āgua co ñehesa rese.

² Ore rumo oroseyapa opacatu mbahe tēi ore chī aisa, ndoromboyecuai vahe avei ore piha pipe sui; ndoroporombopa-mbopa tēi iyavei Tūpa Ñehengagüer ndorosecuñaro-ñaro tēi. Ore rumo oroñehe tupri mbahe supi tupri vahe rese güeraño. Ēgüe orohe opacatu ava upe Tūpa rovai ‘Supi eté, tehi yuvireco opiha pipe’ ore yapave.

³ Yavaise co ñehesa písirosa resendar ore remimombehu renducua āgua, ahe Ēgüe ehi ava ocañi tēi vaherā upe. Ahe aviye oyeovapi vite vahe.

⁴ Esepia, supi eté caruguar rerecuar inungar nomboesapisoi vahe ahe ava yuvireco, sese ndosenducua ucai chupe ‘toviroya eme ñehesa Poropísirosar Cristo resendar porañete vahe’ oyapave. Ahe niha Tūpa recocuer mboyecuar secoi.

⁵ Esepia, oromombehuse ñehesa pēu, ndahei ore yese tēi. Ore rumo, “Jesucristo yande Yar secoi” orohe oroico. Ore evocoyase mbiguai nungar tēi oroico pēu Jesús raisupave.

⁶ Esepia, Tūpa aipo ehi aracahe: “Toime tesapesa pítumimbi vahe resape āgua” ehi. Ahe avei osesape uca yande piha pipe ‘ipipe toicua che porañetesa che Rahir Cristo recocuer rese oime vahe yuvireco’ oya.

Yaicora Cristo rese yande yeroyasa pipe ité

⁷ Co tesapesa nungar porañete vahe Tūpa suindar rumo yareco yande retecuer pipe, inungar-ra que mbahe sepirusu vahe yapocatupri ivi mbahe moinda ndipocopi vahe pipe tēi viña. Ipipe toicua opacatu ava yuvireco co piratasa Tūpa suindar, ndahei ore yesuindar tēi.

⁸ Yepe mbahe-mbahe tēi oime opacatu rupi oreu viña, oimeño ité rumo ore sē āgua ichui. Yepe orepihañemoñeta-ñeta tēi mbahe rese, yande Yar rese ore pihañemoñetasa rumo ndoromocañi eté ore yesu.

⁹ Yepe ore reca-reca catu tēi ore amotarēhimbar yuvireco viña, Tūpa rumo ndore reyai eté; iyavei yepe ore reiti ore recopi āgua yuvireco viña, aní eté rumo.

¹⁰ Opacatu ore guatas rupi rumo orovirecoño ité Jesús mara-mara tēi sereco agüer ore mano água oreyses, “Toyecua avei secocuer ore rese” ore hesave.

¹¹ Esepia, ore recove viteseve imboguaipri oroico ore mano água Jesús rese. Ēgüe orohē secocuer mboyecua água ore retecuer ndipocopi vahe rese.

¹² Evocoyase co ñehesa mombehu pipe ore manosa ore ropeña, ipipe sui rumo pesopeña tecovasa apirēhi vahe peico seroyasa pipe.

¹³ Icuachiapri aracahendar pipe niha aipo ehi: “Ayeroya ité Tūpa rese, ipipe sui añehe” ehi; ēgüe orohē avei ore, sese oroyeroya ité, ichui oroñehe.

¹⁴ Esepia, yaicua niha acoi Tūpa yande Yar Jesús ombogüerayevi vahe, yande mbogüerayevi aveira supive. Ipare oyoya guasu pe reseve oyeipive yande rerecora.

¹⁵ Co opacatu mbahe tēi oime vahe oreu, pēu mbahe aviye água rese niha ‘tovireco catu Tūpa porovasasa yuvireco; ipipe sui, Aviye ndeu, tehi setá catu ava imboetisave yuvireco chupe’ ore yapave.

¹⁶ Sese orequerēhiño ité mbahe apo oroico pēu. Yepe ore rete ocañi pota tēi viña, ore recocuer rumo Tūpa ombopiasu-asuño ité ari yacatu rupi.

¹⁷ Esepia, co mbahe oroiporara vahe co ivi pipe, ahe ēgüe ehi raimi tēi vahe, ipare rumo opañora; ahe ichui rumo oimera mbahe tupri ivate catu vahe oreu ivave apirēhi orovireco vahe.

¹⁸ Sese ore ndorepihanemoñeta atii chira co ivi pipendar mbahe rese; ore rumo orepihanemoñeta mbahe iva pendar ndayasepiai vahe rese. Esepia, co mbahe yasepia vahe, ahe ēgüe ehi raimi tēi vahe; co mbahe rumo ndayasepiai vahe, apirēhi vahe ité.

5

¹ Yaicua niha yande retecuer ndipocopi vahe, inungar oi ndipocopi vahe avei. Sese imocañisase, aviyeño. Esepia, Tūpa opa omoingatu ambuae yande rete ndopai vahe ivave yandeu. Ndahei ahe ava rembiapo tēi.

² Supi eté yaicove vitesese co yande rete ndipocopi vahe rese, yande poāsesa pipe yaipota ité yande rete iva pendar.

³ Aheve yande rete ipiasu vahe yarecose, ahese ndahei chira yande hã nani tupri vahe nungar yuvirecoira.

⁴ Ēgüe ehi eté yande retecuer pipe vite yaicose, yande poāse yande viharēhisa pipe. Esepia, ndayaipotai yande hã nani tupri vahe nungar seco água, yande rumo yaipota yande retecuer ipiasu vahe, ndopai vahe. Evocoyase, “Tocañipa co mbahe ocañi tēi vahe yande resendar tecovesa piasu, ndopai vahe rereco água” vahe.

⁵ Tūpa niha yande apo ‘na tehi yuvireco’ oyapave, ombou avei oEspíritu Santo yandeu ‘ipipe toicua opacatu yuvireco che amondo aveira co opacatu tecocuer ipiasu vahe chupe’ oya.

⁶ Sese niha yayeroyaño ité yepi; iyavei yaicuaño yande yaicove vitesese yande rete rese, ndayaico vitei eté ivave yande Yar piri.

⁷ Esepia, cūrítei yande Yar rese yeroyasa pipe ité yaguata, ndahei mbahe yande rembiepia pipe.

⁸ Yande rumo yayeroyaño ité sese, iyavei yaipota ité yande retecuer reya água yande Yar piri yande so água ivave.

⁹ Sese yaseca yande Yar mboviha água yepi, que yaicove vitesese yande rete rese, anise que yasēse ichui.

¹⁰ Esepia, yande opacatu yañecuavēhera Cristo rovai iporandusave yaipisi vahe rã ñepei-pe mbahe yande rembiapocuer rupi mbahe aviye vahe, anise que mbahe naporai vahe yande rete rese yaico vitesese.

Ñehesa yande reco moingatusa resendar

¹¹ Ore niha oroicua yande Yar sui ore siquiye água imboyeroyasave. Sese orosãha ava pihanemoñeta roerva Tūpa rese ipihanemoñeta água yuvireco. Tūpa niha ore cua tupri, tapeicua avei ru ore recocuer.

¹² Ndoroñehei pēu ore yemboivate ai água tēi. Ore rumo oroñehe pēu ‘toviharete catu ore rese yuvireco’ ore yapave. Ipipe sui peicatura ava güembiepia rese tēi oyemboivate ai vahe upe iñehe mboyevi água. Esepia, ahe ndahei ava piha pipendar rese oyemboviha yuvireco.

¹³ Ndayaracuai vahe nungar ore rerecose amove pe pāhu pendar yuvireco. Tūpa upe rumo ēgüe orohē oroico. Yaracua vahe nungar rumo, ore rerecose peye, pēu mbahe aviye água rese ēgüe orohē.

¹⁴ Cristo poroaisusa, ahe ité ore reroaguata catu. Esepia, supi eté ahe omano opacatu ava repirã, ipipe sui yaicua opacatu ava ocañi tēi vahe rã yuvireco viña.

¹⁵ Cristo niha omano opacatu yande repirā. Yande yaicove vite vahe evocoiyase ndahe iri yandeyeupe nara tēi yaico; yande rumo yaico chupe nara ité. Esepia, ahe omano, ocuerayevi yande rese.

¹⁶ Sese, iya ité oreu ore pihañemoñetañhi iri āgua que ava rese, ava tēi pihañemoñetasa rupi. Yepe yipindar inungar ava ivi pipendar tēi ěgüe orohē ore Cristo rese ore pihañemoñeta oroico viña, cūrītei rumo ěgüe ndorohē iri orepihñemoñeta sese.

¹⁷ Evocoiyase acoi ava Cristo rese ité secoi vahe, ahe secocuer ipiasu vahe ité; ndipo iri eté secocuerai yipindar vahe sese. Opacatu ité oyembopiasu iri.

¹⁸ Co mbahe opacatu Tūpa oyapo yandeu, ahe niha Cristo rembiapo sui yande recocuer moingatu oyeupe nara. Ipape oreu avei ombou co ñehesa mombehu āgua ambuae ava upe secocuer moingatu āgua avei.

¹⁹ Aipo oyapave aipo ehi: Tūpa ombou Guahir Cristo co ivi pipe ava recocuer moingatu āgua 'toyevi cheu' oya; ipipe sui avei ahe ava angaipagüer omocañi yuvireco ichui. Ore evocoiyase ore cuai ahe ñehesa ava recocuer moingatusa resendar mombehu āgua ava upe.

²⁰ Ore evocoiyase Cristo porocuaita rupi oroñehē vahe oroico, inungar Tūpa ité oñehera pēu viña. Sese, "Peyevi Tūpa upe, ahe pe recocuer moingatura oyeupe nara" orohē Cristo rer pipe pēu.

²¹ Yepe Cristo ndoyapoi eté angaipa, Tūpa rumo vireco uca angaipa viyar nungar yande repirā yande reco ivi āgua Cristo rupi yande guatase.

6

¹ Ore pe mboetas co Tūpa upendar mboraviqui resendar ore recosa pipe: "Peicua catu, pemocañi tēi rene Tūpa porovasasa peipisi vahe" orohē pēu.

² Esepia, Tūpa aipo ehi icuachiapri arachendar pipe: "Acoi ari aviye vahe pipe niha che asendu pe yeruresa; iyavei ahe ari poropisirosa pipe opopitivii" ehi.

¡Ahe ari oyepota cute! iyavei oime ité cūrītei ñepisirosa.

³ Ore niha ndoromboyecuai ore reco ai ava pāhuve. Esepia, ndoroipotai que ava Tūpa upe ore poraviquisa rese iñehē rai āgua yuvireco.

⁴ Ore rumo oromboyecua ité Tūpa rembiguai ore recosa. Esepia, ore reco mbegüesa pipe oroñemosañi mbahe-mbahe tēi upe yepe ipane mbahe oreu viña, iyavei mbahe yavaise;

⁵ ěgüe orohē avei ore nupa-nupase, ore roquendase avei iyavei omonguerñehise ava rehii ore amotarēhi āgua yuvireco. Oroypa avei mboraviqui ipirata vahe; amove ndoroquei eté, setá rupi ndoreriepoi tēi avei.

⁶ Oromboyecua avei ore reco maranehisa, ore mbahecuasa supi eté vahe, ore reco mbegüe tuprisa, yeaisusa orovireco avei no. ěgüe orohē ité niha Espiritu Santo pīratasa pipe, ore poroaisusa supi eté vahe pipe avei.

⁷ Ore remimombehu supi eté vahe pipe iyavei Tūpa pīratasa pipe avei oroico. Ore niha ore reco tupri pipe orosecopi mbahe-mbahe tēi. Ipipe avei oroyoepi.

⁸ Amove ava ore mboetei ai, amove rumo oñemoiro yuvireco oreu; amove avei oñehē tupri ai ore rese yuvireco, ipape rumo iñehē-ñehē tēi ore rese yuvireco yepi no. Iyavei amove oporombopa tēi vahē nungar ore rereco yuvireco, yepe oromombehu tēi mbahe supi eté vahe viña.

⁹ Amove ndicuasai vahe nungar tēi ore rereco yuvireco, icuapri ité tie oroico viña; amove ore yuca seni yuvireco, oroicoveño ité rumo; iyavei amove ore mombaraisusa catu tēi, ndore yuca eté rumo ipipe yuvireco.

¹⁰ Amove ndoyavii ndorovihai vahe yuvireco chupe, ore rumo orovihaiño ité yepi; iyavei yepe ndoyavii iparaisu vahe oroico viña, ore rumo oromondo catuño ité mbahe aviye vahe ava eta upe. Yepe ndoyavii ndorovirecoi eté mbahe viña, opacatuño ité rumo mbahe aviye vahe Tūpa suindar oime oreu.

¹¹ Che rivireta Corinto pendar, ore ñehesa pipe opacatu mbahe oromboyecua pēu iyavei pe raisu āgua orovireco ore piha pipe tuvichá pe rese.

¹² Ndorehāpisii pe rese pe raisu āgua; pe rumo ěgüe ndapeyei ore rese.

¹³ Che niha opovireco che rahir nungar; pemboyeve avei catu ore pe raisusa oreu.

Tūpa oicove vahe rēta nungar ité yaico

¹⁴ Ndapeyovaichoī chira ava Tūpa ndoviroyai vahe rese. Esepia, ndoyoyai eté pe pihañemoñetasa. ěgüe ehi eté teco ñvīsa ndoyoyai teco rai rese inungar tesapesa ndoyoyai pītumimbi vahe rese.

¹⁵ Ndahoyoyai eté niha Cristo pihañemoñetasa Carugar pihañemoñetasa rese yuvireco. ¿Oyoya tie Tūpa reroyasar Tūpa reroyasarēhi rese yuvireco? ¡Aní eté!

¹⁶ ¿Oyoya tie mbahe rahanga tēi Tūpa rēta rese? Yande niha Tūpa oicove vahe rēta nungar ité yaico. Ahe ité niha aipo ehi icuachiapri pipe aracahe:

“Che aicovera seseve iyavei aguatarā ipāhu rupi yuvireco; che avei aicora iTūpa ité; ahe evocoyase cheundar yuvirecoira” ehi.

¹⁷ Iyavei aipo ehi:

“Sese peyepēpi evocoi nungar ava naporai vahe sui; peyemboyai rene que mbahe naporai vahe rese.

Ahese che opopisira.

¹⁸ Che aicora pe yesupa; pe evocoyase peicora che rahir, che rayri avei aipo ehi yande Yar güeco pīratasa pipe” ehi.

7

¹ Che rivireta, che rembiaisu, co Tūpa remimombehu imboaviyepirā yandeu. Sese yande yamoingatu tuprira yande recocuer chupe yarecoēhi āgua yande retēcuer iyavei yande espíritu mbahe tēi pipe. Iyavei Tūpa mboeteisa pipe yasecara yande reco catupri āgua chupe nara güeraño ité.

Corinto pendar ava recocuer recuñarosa resendar

² ¡Che pisi peye pe piha pipe! Ndoroyapoi niha mbahe tēi que ava upe, ndoromomaraí eté que ava recocuer, ndoroporombopai avei.

³ Ndahei pe recocuer rese che ñehe raisave aipo ahe pēu. Supi eté yipīndar, “Che pihave ité opoaisu, pēu nara avei aicove, amano aveira pēu” ahe acoi pēu cuese.

⁴ Ayeroya ité pe rese, pe rese avei aviharete. Che paraisu pāhuve ayemonguerēhi iyavei ayembovihareteño.

⁵ Ore yepotasa suive rumo Macedonia ve, ndopituhui eté mbahe tēi ore sui; oime viteño ité rumo mbahe-mbahe tēi oreu opacatu rupi: oime ore amotarēhimbar iyavei oime ore yepihamondiisa.

⁶ Tūpa rumo, ava ndoyemonguerēhi vahe, omonguerēhi iri yepi. Ahe ore monguerēhi catu iri Tito yepotase.

⁷ Ndahei rumo Tito yepotaseño oroviharete, ahe avei oyemboviha guasu pe rese. Ahe aipo ehi oreu pe aipo che repia pota ité peye yepi; omombehu avei che rese pe viharēhi agüer cheu, pemahenduhaño ité aipo che rese pe che raisusave yepi. Aipo nungar renduse ayembovihā catu.

⁸ Yepe che ñehe aicuachía vahēcuer imondo pēu ndape mbovihai viña, cheu rumo aviyeño cūrítei. Yipīndar rumo ayepihamboasi aicuase che ñehe tasí iteanga vahe pēu; chíhi rupi tēi rumo ndapevihai peyeroqui pare sese.

⁹ Cūrítei che avihareté. Ndahei rumo pe viharēhisa rese ēgüe ahe. Esepia, co pe viharēhisa sui pemboasi pe angaipa Tūpa upe pe yevi āgua, evocoi nungar Tūpa oipota. Evocoyase ore ñehe ndoyapoi mbahe naporai vahe pēu.

¹⁰ Esepia, co nungar viharēhisa Tūpa oipota vahe yande angaipa mboasi uca, chupe yande yevi āgua. Ipipe sui niha yañepisiro yande pihañemoñeta rerovaēhisa pipe. Co ivi pipendar tēi viharēhisa rumo manosa tēi vireco yandeu.

¹¹ Pe rumo peñemosañe pe viharēhisa upe; ahe aviye Tūpa upe. ¡Pesepia ru co mbahe aviye vahe pe recocuer pipe oime vahe evocoi Tūpa remimbou pe viharēhisa sui cute! Supi eté rumo, peyapisaca iyavei pe querēhisa pipe peyoepi, pemboasi pe piha pipe ité co mbahe tēi oimese pe pāhuve, iyavei peyembosiquiye peico. Ichui che repia pota ité peye, iyavei pequerēhi ité mbahe moingatu āgua. Sese pemboyepepi ité evocoi mbahe tēi aposar peyesui. Che aicua cute pēu ndahei pe piha rupi co nungar mbahe tēi oimese.

¹² Cuese aicuachiasse evocoi che ñehe imondo pēu, ndahei ava mbahe tēi aposar reseño, ndahei avei mbahe tēi oiporara vahe reseño, che rumo aipota catu peicua pe ore raisusa pereco vahe oreu nara Tūpa rovaque.

¹³ Co rese ore oroyemboviharete.

Iyavei oroviha catu Tito yembovihasa repiase. Esepia, pe avei niha opacatu pemboviha catu ité pe recocuer pipe.

¹⁴ “Co Corinto pendar ava aviye ité” ahe Tito upe pe mombehu cuese. Che ñehe pe resendar aviye ité, ipipe nachí eté. Inungar oromombehu mbahe supi tupri vahe pēu yepi; inungar tupri avei supi eté mbahe oromombehu vahe pe rese yeroyasave Tito upe.

¹⁵ Iyavei cūrítei ahe pe raisu catu ité pe rese omahenduhase opacatu pe poreroyasa rese. Iyavei peipisi tupri ité imboeteisave sereco.

¹⁶ ¡Ayeroya ité pe rese, sese aviha ité!

8

Ava querēhisa porerecosa mondo āgua Jerusalén pendar upe

¹ Che rivireta, cūrītei che amombehu potami pēu mara ehi mbahe tupri apo Tūpa ava viroyasar upe ivi Macedonia rupi.

² Yepe ahe ava recocuer yavaí eté yuvireco chupe secoāhasa pipe viña, ovihareteño rumo ipipe yuvireco; yepe iparaisu vahe pāve tēi, iporerecoño ité rumo yuvireco.

³ Supi eté oquerēhisa pipe omondo ité ocatugüer rupi; amove oseca iri mbahe güemimbotar rupi yuvireco.

⁴ Ahe, “Ore avei catu toroipitīvii ambuae Tūpa reroyasar” ehi yuvireco.

⁵ Ahe rumo oñocua iri ore pihañemoñetasa yuvireco. Yande Yar upe rane oyemondo. Ipare Tūpa remimbotar rupi ēgüe ehi avei oreu yuvireco.

⁶ Evocoiyase ore aipo orohe Tito upe pēu: “Tomboyeapi iri co porerecosa monuha āgua ava upe” orohe. Esepia, yipindar ahe osose pe pāhuve, ahe pe pītīvii imboipi āgua.

⁷ Aicua peyapo tupri ité opacatu co ambuae mbahe: peyeroya tupri ité yande Yar rese, pemombehu tupri ai Tūpa ñehesa, pereco ité Tūpa suindar mbahecuasa, pequerēhi ité Tūpa upe mbahe apo āgua iyavei ore raisu ité peye. Evocoiyase ēgüe peye aveira co nungar poroaisusa apo.

⁸ Ndahei pe cuaisa pipe aipo ahe pēu, che rumo ‘toicua ambuae ava rembiapo oquerēhisa pipe oyapo vahe yuvireco’ che yapave. Sese niha peicuara, supi eté vahe pīha pe poroaisusa.

⁹ Peicua niha pe yande Yar Jesucristo poroaisusa. Yepe ahe mbahe yar secoi viña, opa rumo oseya ombahe pe recocuer rese; iparaisu pipe sui niha pe íva pendar mbahe pereco.

¹⁰ Pēu mbahe aviyē āgua che añehe co nungar mbahe rese. Cuese ambuae araviter pe niha yipindar pemboipi co mbahe apo. Ahe niha pe querēhisa pipe peyapo.

¹¹ Cūrītei pemboaviye catu pe porerecosa pe querēhisa yipindar pe reco vahe pipe; pemondoñora mbahe peicatugüer rupi.

¹² Esepia, acoi que ava omondo pota vahe mbahe, Tūpa oipisi ahe iporerecosa que mbahe virecomi vahe; ahe rumo ndoporandui mbahe ndayarecoi vahe rese yandeu.

¹³ “Toyemombaraisu ava pītiviisa pipe yuvireco” ndahei rumo pēu.

¹⁴ Cūrītei mbahe pe rembiereco eta pipe peipītīvii catu ambuae ava ipane vahe mbahe yuvireco chupe. Virecomise mbahe, ahe avei pe pītiviira yuvireco pēu mbahe ipanese. Evocoiyase pe recocuer oyoya tupri itera.

¹⁵ Inungar Tūpa ñehe mombehusar aipo ehi icuachiapri pipe aracahe: “Acoi omonuha ati vahe mbahe, ndasumbirei eté mbahe chupe; iyavei acoi moviromi tēi mbahe omonuha vahe, nipanei mbahe chupe” ehi.

Pablo omondo Tito indugüer reseve Corinto ve

¹⁶ Aviyē Tūpa upe ombopihañemoñeta Tito pe rese inungar che pihañemoñetasa pe rese yepi.

¹⁷ Ahe viroya ité che ñehe. Güemimbotar rupi eté rumo iquerēhi oso āgua pe repia.

¹⁸ Supi oromondo yande rivri, ahe opacatu ambuae Jesús reroyasar oicua iporaviqui tupri aise ñehesa písirosa rese yuvireco.

¹⁹ Sese opacatu oiporavo yuvireco ore rupi iguata āgua ore pītīvii vaherā avei co porerecosa reraso āgua. Ore ēgüe orohe oroico yande Yar mboetei āgua rese ‘toicua ore querēhisa pipe ité oroporopitīvii yuvireco’ ore yapave.

²⁰ Ore ndoroipotai que ava oñehe tēira ore rese yuvireco co porerecosa monuhasa pipe sui.

²¹ Esepia, ore oroyapo pota mbahe aviyē vahe, ndahei Tūpa rovaque güeraño, opacatu ava rembiepiave avei.

²² Supi avei oromondo ambuae yande rivri. Ahe omboyecua ité oreu oquerēhisa opacatu mbahe güembiapo pipe. Ahe cūrītei iquerēhi catu ité. Esepia, oyeroya ité pe rese.

²³ Acoi oporanduse que ava Tito rese yuvireco pēu, “Ahe oyoya Pablo rese oporaviqui vahe pe pītīvii āgua” peyeñora. Acoi oporanduse avei ambuae yande rivri rese yuvireco pēu, “Ahe ambuae Jesús reroyasareta remimbou Cristo mboeteisar yuvirecoi” peyeño aveira chupe.

²⁴ Sese, pe recocuer cua āgua, pemboyecua catu pe poroaisusa supi eté vahe chupe yuvireco. Evocoiyase toviroya ité che ayeroyase iyavei ayembovihase pe recocuer rese yuvireco.

9

Porerecosa imonuhapri Jesús reroyasar upe

¹ Porerecosa imonuhapri Jesús reroyasar upe nara rese rumo nañehe iri pēu.

² Esepia, che aicua pequerēhi ité ipítivii āgua. Evocoiyase che viharetesa pipe Macedonia iguar Jesús reroyasar upe aipo ahe yepi: “Acaya iguar, ahe oyemoingatu voi eté ambuae Jesús reroyasareta pítivii āgua cuese ambuae araviter suive yuvireco” ahe yuvireco chupe. Evocoiyase pequerēhise ité ipítivii āgua, ahese setaño ité oyemonguerēhi yuvireco.

³ Che rumo amondo co yande rivri yuvireco pēu cūrteitē ‘ēgüe tehi tēi eme che ñehesa aviye vahe sesendar yuvireco’ viya pēu. Pe yemoingatu tupri āgua ité aipo ahe pēu;

⁴ aní acoi arasose Macedonia pendar cheyeupi, sembiepiave ndapeyemoingatu vitei chira peico. Ēgüe peyese ore mochi guasu uca tiētera peye. Esepia, che ayeroya ité pe rese. Pe avei evocoiyase pechīra.

⁵ Sese che pihañemoñeta yipindar añehe co mbosapi yande rivri upe yuvireco, ahe ranei ore renonde yuvirasō āgua pe piri pe pítivii āgua co porerecosā aviye vahe monuha āgua rese, acoi cuese pe remimombehugüer rupi. Evocoiyase ahe pe porerecosā pe remimonuha opara pemoingatu tupri ité pe avagüer mboyecua āgua, ndahei chira rumo pe recatēhisa pipe.

⁶ Peyemomahenduha co rese: acoi noñoti atiimi vahe mbahe, chupe moviromi tēi avei iha; acoi oñoti ati vahe rumo mbahe, ahe setá catu avei iha chupe.

⁷ Ñepeipei iya opihañemoñetasa rupi omondora oporerecosā Tūpa upe yuvireco, ndahei chira opiha viracuasa pipe tēi iyavei ndahei chiveira ambuae ava ocuai pīratasa pipe tēi. Esepia, Tūpa osaisu ava oviharetesa pipe omondo vahe oporerecosā chupe.

⁸ Tūpa niha oicatu opacatu mbahe aviye vahe mondo āgua pēu ari yacatu rupi pereco vaherā opacatu mbahe ipane vahe pēu iyavei sumbirer pipe opacatu ambuae mbahe aviye vahe rese pe poropítivii āgua.

⁹ Inungar icuachiapri pipe aipo ehi:

“Ahe iporeroco ai iparaisu vahe rese yepi. Ahe mbahe aviye vahe sembiapo nocañi chietera” ehi.

¹⁰ Tūpa niha ombou mbahe rāhii ava remitīra, mbahe semihura avei. Sese ombou catura mbahe pēu iyavei ombouvicha catura pe rembiapo aviye vahe ava pítivii āgua.

¹¹ Tūpa ombou catura opacatu mbahe pe rembiacorā ava upe imondo catu āgua pe avasa pipe. Ore orovirasose porerecosā pe remimbou yande rivireta upe, ahe evocoiyase, “Aviye ndeu” ehira Tūpa upe yuvireco.

¹² Esepia, co pemondo vahe yande rivireta pítivii āgua, ndahei peipítivii mbahe ipane vahe rese güeraño, ichui avei niha, “Aviye Tūpa upe” ehira yuvireco.

¹³ Ahe evocoiyase omboeteira Tūpa yuvireco. Esepia, co pe poropítiviisa pipe pemboyecua itera pe Cristo ñehe reroyasa peico. Ahe avei omboeteira Tūpa yuvireco. Esepia, pe pemondoño itera mbahe pe porerecosā chupe iyavei opacatu ambuae ava upe.

¹⁴ Evocoiyase ahe oyeroquira pe rese iyavei pe raisu etepirira yuvireco. Esepia, Tūpa pe pítivii eté oporovasasa pipe.

¹⁵ ¡Aviye Tūpa upe! ¡Esepia, ahe ombou mbahe tuvichá vahe aviye catu vahe yandeu, ndayaicatui vahe mombehu tupri āgua!

10

Pablo cuaita apóstol seco āgua

¹ Che Pablo añehe Cristo poroaisusa, seco asiēhisa pipe avei pēu. Amove ava pe pāhu pendar, “Seco mbegüemi tēi yande pāhuve oicose, amombri güecose rumo oñehe pīratá iteanga” aipo ehi tēi yuvireco cheu viña.

² Che rumo asose pe repia, ndaipotai che pīratasa mboyecua āgua pe pāhu pendar upe. Amove rumo ava pe pāhu pendar ipihañemoñeta: “Oyapo mbahe co ivi pipendar pihañemoñetasa rupi tēi” ehi yuvireco cheu. Sese che ayemoingatuño ité evocoi nungar ava upe añehe pīrata vaherā.

³ Supi eté, yepe co ivi pipe oroicove viña, ore rumo ndoroyapoi mbahe ava co ivi pipendar rembiapo nungar.

⁴ Esepia, ore yoepisa ndahei ava co ivi pipendar yoepisa nungar; orovireco rumo Tūpa pīratasa mbahe tēi seco pīrata vahe recopi āgua ava aracuasa tēi recopi āgua avei.

⁵ Ahe ipipe ore opa orosecopi yepoepi-episa iyavei opacatu semira-mira tēi vahe güeco ivate aisa pipe ndoicua uca potai vahe Tūpa recocuer ava upe. Iyavei opacatu ava pihañemoñeta raisa orosecopi Cristo reroya tupri āgua yuvireco.

⁶ Iyavei ore oroyemoingatu ité opacatu ndiporeroyai vahe recocuer roroyi āgua. Pe rane rumo peroya tuprira.

⁷ Pe rumo pemaheño tēi ahe ava recocuer rese. Acoi ava pe pāhu pendar oicua vahe Cristo rese güecosa, toicua tupri avei ore Cristo rese ore recosa yuvireco.

⁸ Yepe ayecomboivate che mborerecuasa rese pëu viña, ipipe rumo nachí eté. Esepia, yande Yar ombou mborerecuasa cheu pe recocuer moviracua tupri ãgua, ndahei rumo pe recocuer momara ãgua.

⁹ Aní chira, “Pablo yande mbosiquiye pota güembicuachía pipe” peye cheu.

¹⁰ Esepia, amove ava pe pãhu pendar; “Oñehe oicuchía vahe ombou yandeu, ahe ipíratá, yavai avei yandeu; ahe ité rumo aní angai vahe secói yande pãhuve iyavei ñehe ãgüe ehi tã vahe” ehi yuvireco cheu.

¹¹ Toicua catu ru yuvireco: eipeve oroso irise, inungar amombehu che rembicuachía pipe amombri che recose, ãgüe ahe tupri aveira yapo pe pãhuve.

¹² Ndoromboyoyai eté ore recocuer ava oyese tã ñehe vahe recocuer rese. Esepia, omboyoyase oyese, ndoyapisacai eté yuvireco.

¹³ Ore rumo ore remimombehu pipe ndoroyapirasai chietera ore cuaita ore yeecomboivatesa pipe. Tüpa rumo güemimbotar rupi ombou ore poraviqui ãgua oreu, eipeve pe rese ore poraviqui ãgua avei.

¹⁴ Ore rumo ndoroyapirasai ore cuaita mombehusa icuachía pëu. Esepia, supi eté ore ranei eté oroico pe pãhuve, ore ranei avei oroviraso Cristo resendar ñehesa imombehu pëu.

¹⁵ Ndoroyapirasai avei ore ñehe pipe ambuae ava poraviquisa sui tã. Ore rumo, orosãro ore oroporaviqui catu vaheã pe pãhuve Tüpa rese pe yeroyasa rupi. Ndoroyapirasai avei rumo ore cuaita.

¹⁶ Iyavei orosãro ñehesa písirosa resendar mombehu ava amombri catu yuvirecoi vahe upe. Ndahei chira rumo ambuae ava poraviqui agüer rese tã oroyecomboivate oroico.

¹⁷ Acoi ava oyecomboivate pota vahe, toyecomboivate catu yande Yar rese.

¹⁸ Esepia, acói ava “che aico tupri” ehi vahe ndahei ahe osë tupri güecoãhasa sui yande Yar rovaque; “Aviye ité co mbia” ehise rumo yande Yar chupe, ahe osë tupri güecoãhasa sui.

11

Pablo iyavei apóstol angahu tã yuvirecoi vahe

¹ Peñemosá iriñomi tãira cheu co che ñehe ndayaracuai vahe nungar pipe che ñehese!

² Esepia, che cherecatãhi ité pe rese, ahe tecatãhisa ou cheu Tüpa sui. Che aipota Cristo upe opomondo vaheã pe reco maranehisa pipe, inungar cuñatai ndaseco marai vahe imondopri cuimbahe upe imenda ãgua.

³ Che rumo asiquiye co mbahe sui, inungar mboi ombopa Eva oporombopasa pipe, aviyeteramo Carugar pe mbopa aveira pe pihañemoñetasa rerova ãgua Cristo mboeteisa supi eté vahe sui.

⁴ Esepia, peñemosañó ava ñehe vahe pëu ambuae Jesús rese ndoyoyai vahe ore remimombehu rese. Ichui peipisi pe querãhisa pipe ambuae espíritu peipisi vahecuer sui. Iyavei ambuae ñehesa písirosa resendar peipisi avei ndoyoyai vahe ore pëu oromombehu vahe rese.

⁵ Che rumo namohai eté ivi coti catu tã aicora evocoi supi peguata vahe apóstol yemboivate ai tã vahe sui.

⁶ Yepe ndayembohei che ñehe tupri ãgua ité, che rumo areco che mbahecuaa, ahe oromboyecuaño ité opacatu ore rembiapo pipe pe rembiepiave.

⁷ Ndamombehui eté niha ñehesa písirosa resendar pe cheu imboepi ãgua; pe recocuer mboivate catu ãgua rumo Tüpa rovaque ãgüe ahe che reco yemominisa pipe. ¿Mbahe tã pãha ayapo ãgüe ahe pëu?

⁸ Aipisi ambuae ava Jesús reroyasar sui guarepochi, pe recocuer rese che poraviqui ãgua.

⁹ Iyavei acói aicose pe pãhuve, ipane avei mbahe cheu. Ndopomañecoi eté rumo; yande rivri ivi Macedonia pendar yugüeru vahe ombou mbahe ipane vahe yuvireco cheu. ãgüe ahe che pepoisupave pe mañecoñhi vichico. Ndopomañecoi chietera niha mbahe ipanese cheu.

¹⁰ Supi eté aicua supi tupri vahe mbahe Cristo suindar. Evocoyase supi eté avei che aicua ndipoi chietera que ava ivi Acaya rupi virocua vaheã co che viharetasa che sui yuvireco.

¹¹ ¿Mbahe rese pãha aipo ahe pëu? ¿Pe raisuẽhisave pãha? ¿Tüpa rumo oicua che pe raisusa!

¹² Ayapoño itera rumo co mboraviqui cheu imboepiẽhisa pipe vichico co ambuae pe pãhu pendar ava pe mbopaẽhi ãgua yuvireco. Esepia, che nungar yuvirecoi pota tã viña.

¹³ Ahe rumo ndahei apóstol supi tupri vahe yuvirecoi, ahe oporombopa tã, “Ore apóstol oroico” ehi tupri tã yuvireco.

¹⁴ Yaicua niha Carugar rerecurar oporombopa. Esepia, oyeapo inungar Tüpa rembiguai amove.

¹⁵ Sese yaicua avei Carugar povri pendar oporombopasa pipe oyeapo inungar Tūpa ñehe mombehusar yuvireco. ¡Ahe chupe rumo oimera Tūpa ñemoirosa mbahe sembiapocuer rupi curi!

Pablo oiporara mbahe-mbahe tēi apóstol güecosa pipe

¹⁶ Aipo ahe iri pēu: tipo eme ava “ndayaracuai” ehi vahe cheu. Acoi, “Ēgüe ehi oico” peyese cheu, tañeñeño ayase ndayaracuai vahe nungar, che avei evocoiyase tayecomboivateño vichico.

¹⁷ Ndahei rumo yande Yar che cuaisa pipe aipo ahe, che aracuaēhisa nungar pipe rumo aipo ahe che yemboivate aisa pipe.

¹⁸ Esepia niha, setá iteanga ava ahe ae tēi oyemboivate ai güecocuer aviye angahu vahe tēi pipe. Sese che avei ayemboivatera.

¹⁹ Esepia, yepe pe imbahecua vai vahe nungar peico, pemboyoyá catu pe querēhisa pipe ava ndayaracuai vahe.

²⁰ Pe niha pemboyoyañe acoi que mbiguai tēi nungar pe rereco vahe, que mbahe pe rembiereco sui tēi oicove vahe, que pe mbopa tēisar, pe reroirosar, que pe rova pete-petasar avei.

²¹ Che chīsa pipe aipo ahe co imombehu, jore reco mbegüe etepri evocoi nungar apo āgua pēu!

Acoi oñehese ambuae ava oyeupendar mbahe rese oyemboivate aisa pipe, che avei evocoiyase ēgüe ahera. Aipo ahese rumo aviye ndayaracuai vahe nungar aico.

²² Ahe, “Che hebreo aico” ehise yuvireco, che avei ahe aico; “Che israelita aico” ehise, che avei ahe aico; “Che Abraham suindar aico” ehise yuvireco, che avei ahe ichuindar aico.

²³ “Che Cristo rembiguai aico” ehi yuvireco, che rumo sembiguai catu aico ichui yuvireco, aipo añehese aviye che ndayaracuai vahe aico. Aporaviqui catu rumo ichui yuvireco, setá catu soquendapri itē aico yuvireco ichui, inupambri catu aico ichui yuvireco, setá rupi avei seni-seni che yuca uca che mombaraisusa pipe yuvireco.

²⁴ Cinco yupagüer judío che nupá iteanga treinta y nueve tupri tucumbo pipe yuvireco.

²⁵ Mbosapi yupagüer che nupasa ivira pipe, ñepe rupi evocoiyase che api-apisa ita pipe. Mbosapi yupagüer avei oñeapivii iar ipive che guatasa rupi cheu, ñepe pītu, ñepe ari avei avevui tēi para guasu aviter rupi vichico.

²⁶ Setá āguata opacatu rupi, iyavei iai rupi mbahe-mbahe tēi oime cheu, aico avei imonda rai vahe pāhuve; che mu judío mbahe tēi vahe pāhuve avei aico iyavei ndahei vahe che mu pāhuve no. Aico avei tecua guasu pipe mbahe tēisave, amombri vahesa rupi iyavei para guasu pipe, iyavei mbahe-mbahe tēisave Jesús reroyasar angahu tēi pāhuve aico.

²⁷ Aporaviqui itē iyavei ayapo mbahe cheu yavai vahe; iyavei setá yupagüer ndaquei eté; aiporara avei tieporēhi iyavei husei; setá rupi ndacarui; sōhisagüer avei aiporara, ndacheturucuai avei vichico.

²⁸ Ndahei co opacatu mbahe güeraño aiporara, ari yacatu rupi che mahenduñeño itē avei opacatu tecua rupindar Jesús reroyasar rese.

²⁹ Oimese que oiporara vahe mbaherasicuer, che avei ayandu co mbaherasisa. Acoi que oimese oyavi uca vahe mbahe, che moñemoiro uca.

³⁰ Iyase che yeecomboivate ai āgua cheu, co mbahe omboyecua vahe che pīrataēhisa rese ayecomboivate aiño itera.

³¹ Yande Yar Jesucristo Ru Tūpa, ahe imboeteipri apirēhi seci vahe, ahe oicua aipo che hesa supi tupri vahe.

³² Tecua Damasco ve aicose, mborerecuar guasu Aretas povri pendar mborerecuar oyocuai osundao co tecua roquendipive che rese osareco vahe rā che roquenda āgua yuvireco viña;

³³ Oime rumo ava iruova guasu pipe che mogüeyi vahe tecua āchisa metana rupi yuvireco. Ēgüe ahe añemi ichui yuvireco.

12

Tūpa omboyecua Pablo upe mbahe querais nungar pipe

¹ Ndipoi eté que ava mbahe oipisi vahe ahe ae tēi oyemboeteisa pipe. Che rumo amombehuño itera mbahe asepia vahe che quer nungar pipe iyavei yande Yar remimboyecua che aipisi vahe ichui.

² Che aicua mbia Cristo reroyasar, omomba cūrítei catorce araviter ahe imbosapisa ivave seraso agüer. Ndicuasai güetecuer rese tie revo oso, anise ihā güeraño tie revo. Tūpa rumo oicua.

³⁻⁴ Che rumo, “Ēgüe ehi tie revo oico” ahe aipo mbia upe, Tüpa güeraño oicua. Serasopri ivave teco orisave. Aheve osendu ñehesa ndicuasai vahe. Ahe niha que ava tēi upe ndipotasai imombehu āgua yuvireco.

⁵ Evocoi nungar mbia rese ayecomboivatara; cheyese ité rumo ndayecomboivate ai chira. Che recocuer nipiratai vahe reseño Ēgüe ahera vichico.

⁶ Yepe che añehe tupri aira cheyese viña, che revo ndahei chira ndayaracuai vahe nungar aico. Esepia, mbahe supi eté vahe amombehura viña. Ahe rumo ndayapoi. Esepia, ‘tipihañemoñeta catu che rembiapo rese, che remimombehugüer rese avei yuvireco che querve nungar mbahe mombehu rāgüer sui’ viya.

⁷ Sese che yemboivate aiñhi āgua che quer nungar mbahe che pihamondi vahe rembiepi-agüer rese Tüpa ombou teco asisa cheu. Ahe avíye yu che cutu guasu vahe, ndoyavii avei Carugar mara-mara tēi che rereco vahe.

⁸ Mbosapi yupagüer yande Yar upe aporandu ité teco asisa che sui serocua āgua rese viña.

⁹ Ahe rumo aipo ehi cheu: “Che porovasasa ndeu ambou vahe iyara nde ñemosa āgua. Esepia, che pīratasa oyecua catu ité ava nipiratai vahe recocuer rese” ehi. Evocoiyase che ayemboviha catuño itera che reco nipiratai vahe rese. Ēgüe ehira Jesucristo pīratasa oyecua che rese.

¹⁰ Sese Cristo rese che recosa pipe avíyeño ité ndache pīratase, que ambuae ava oñehe raise che rese, que mbahe ipanese cheu, ambuae che reca-reca tēise che reco momara āgua yuvireco iyavei que mbahe yavai vahe aporarase Cristo sui. Esepia, ayanduse che pīratañhisa, aheche pīrata catu.

Pablo ipihañemoñeta ité Jesús reroyasareta Corinto pendar rese

¹¹ Che ndayaracuai vahe nungar aico pēu, pe rese tēi rumo Ēgüe ahe. Iya rumo peñehe tupri che rese viña. Esepia, yepe ndahei seco ivate vahe aico viña, co apóstol angahu tēi rumo pe supi peguata vahe ndahei ivate catu vahe che sui yuvireco.

¹² Che ñemosa tupri pipe mboraviqui ayapo pe pāhuve. Ayapo mbahe poromondiisa mbahe pesepia yesapiha rai vahe imboyecua āgua che supi eté vahe apóstol che recosa.

¹³ Co mbahe reseño pe ivi coti catu peico ambuae Jesús reroyasareta sui, che ndopomañeco mbahe cheu pembou vahe rā rese. ¿Ayavi tie che cuaita, Ēgüe ahepe pēu? ¡Peñero sese cheu!

¹⁴ Cūrítei che ayemoingatu imombosapisa rupi che so āgua pe piri. Iyavei ndopomañeco chira mbahe rese. Esepia, ndasecai mbahe pe rembiereco; pe recocuer ité rumo aipota. Esepia, iyepi omonuha guarepochi guahir upe, ndahei tahir tēi Ēgüe ehi oyepi upe yepi.

¹⁵ Evocoiyase che querñhisa pipe amondora opacatu che mbahe areco vahe pe pītivii āgua iyavei opacatu che recocuer rese ayemondo pēu pe reco tupri āgua. Che rumo opoaisu ité, pe tie revo ndache raisu tupri eté peye.

¹⁶ Cheu mbahe ipanese, ndaporandui eté mbahe pereco vahe rese pēu. Amove rumo ava, “Yande mbopa āgua tēi Ēgüe ehi Pablo yandeu” ehi tēi yuvireco.

¹⁷ ¿Opombopa uca tie ava pēu che remimondo pipe?

¹⁸ Che Tito upe, “Eresora ipiri yuvireco” ahe. Supi avei ambuae yande rivri Tüpa reroyasar amondo. ¿Pembopa tie Tito? Oyoya tupri mbahe oroyapo Tüpa upe ñepi ore pihañemoñetasa pipe.

¹⁹ Che rivireta, che rembiaisu, pe revo pepihañemoñeta ore oroicuachía co pēu, ore yoepi āgua tēi. Ēgüe ndorohei eté rumo. Ore rumo Cristo rese ore reco pipe oroñehe Tüpa rovaque. Opacatu ité niha mbahe oroyapo pe recocuer moviracua catu āgua.

²⁰ Che asiquiye asose eipeve pe repia, aviyeteramo ndahei chira che piha rupi pe recocuer. Iyavei pe aviyeteramo Ēgüe peye aveira che repiase. Che asiquiye ité, oime revo pe pāhuve yepoepi-episa, pe pihañemoñeta raisa ava mbahe pota raisa pipe, pe ñemoirosa peyeupe. Iyavei aviyeteramo oimera pe pāhuve ava oyeupeño tēi mbahe oipota vahe, imahechiroi ai vahe iyavei oñehe-ñehe tēi vahe ambuae ava rese, seco ivate ai vahe iyavei ndiporoviroyai vahe.

²¹ Asiquiye avei aso irise pe repia, omboura Tüpa pe sui che chí āgua, che mboyaseho uca tiētera peye setá pe cueseve peyemboangaipa vahe rese iyavei ndapemboasi etese mbahe tēi, yemboaguasa-guasa tēisa iyavei que mbahe pe remimbotarai peyapo vahecuer.

13

Poromboaracuasa iyavei mahenduhasa

¹ Co niha imombosapisa yupagüer asora pe repia. Pemombehu potase que ava rembiapo ai cheu, toime que ñuvirío, anise mbosapi oicua vahe sembiapo ai.

² Co yipindar oyemboangaipa vahe upe opa aipo ahe: “Peicua catu” ahe che imoñuvirío yupagüesa pipe aicose pe piri. Cüritei amombri aico pe sui, amombehu irira rumo co pëu. Co yipindar vahe upe iyavei opacatu ambuae angaipa pipe yuvirecoi vahe upe aipo ahe: aso irise pe pãhuve, ndopoparaísuereco iri chira.

³ Esepia, pe peipota ité che recoãha ãgua ‘¿Cristo ité pãha omoñehe uca?’ pe yapave cheu. Cristo ndaseco mbegüemi pëu mbahe apo oico. Ahe rumo omboyecua opĩratasa pëu.

⁴ Supi eté niha ahe yaticasa, inungar ava nipiratai vahe. Cüritei rumo ahe oicove Tũpa pĩratasa pipe. Ëgüe orohe avei ore seco pĩrataẽhisa sereco. Oroicose rumo sese oroico Tũpa pĩratasa pipe pe rese hañeco ãgua.

⁵ Pemahecua tupri catu pe recocuer rese: ¿peico ité pãha pe Cristo rese yeroyasa pipe? ¿Ndapeicuai vo Jesucristo secoise pe rese, pesẽse pe recoãhasa sui?

⁶ Pe revo peicua ore ndorocañi tẽi vahe oroico ore recoãhasa pipe.

⁷ Iyavei oroyerure pe rese Tũpa upe ‘toyapo eme mbahe tẽi yuvireco’ ore hesave. Ndahei rumo ore ivate catu vahe mbahe tẽi rasa pare mboyecuasave ãgüe orohe; co catu ‘toyapo mbahe aviye vahe yuvireco’ ore yapave, yepẽ pëu ndoyavii orocañi tẽi vahe oroico viña.

⁸ Esepia, ndiyai mbahe supi tupri vahe amotarẽhi ãgua oreu; ãgüe ehi rumo sese catu ité oroñehe.

⁹ Sese orovihaño ité norepĩratase, ore rumo oroipota ité pe momirata; iyavei ore oroyerure catuño itera pe recocuer catupri catu ãgua rese.

¹⁰ Aicuachía co che ñehe imondo pëu pe piri che so ãgua renonde. Acoi asose, namboyecua pĩratai chira che mborerecuasa eipeve. Ahe niha yande Yar ombou vahe cheu pe reco momirata catu ãgua, ndahei pe reco momara ãgua.

¹¹ Imomba ãgua, che rivireta, aipota peviharetera peico. Peseca avei pe reco tupri catu ãgua peyeupe, peyemonguerẽhi catu, oyoya guasu peico tupri avei peyese mbahe tupri pipe. Evocoyase Tũpa oporoaisusa pipe, güeco tuprisa pipe avei secoira pe rese.

¹² Pemombehu che mahenduhasa ñepeipei peyeupe pe yeovaupitesa pipe.

¹³ Opacatu ambuae yande rivri, Tũpa reroyasar avei omondo omahenduhasa yuvireco pëu.

¹⁴ Peipisi yande Yar Jesucristo porovasasa, Tũpa poroaisusa iyavei Espiritu Santo tasecoi opacatu pe rese. Aipo rupive che ñehe pëu.

PABLO REMBICUACHIA GALACIA PENDAR UPE GALATAS

Pablo mahenduhasa Jesús reroyasar Galacia pendar upe

¹ Che, Pablo, imondopri aico apóstol che reco água. Ndahei ava tēi sui ayu pēu iyavei ndahei ava tēi che cuai; Jesucristo ité niha che cuai iyavei yande Ru Tūpa che mbou acoi ombogüerayevi vahecuer Guahir.

² Che, Pablo, iyavei opacatu Jesús reroyasar yuvirecoi vahe cohava oroicuachía co ore ñehe pēu, pe opacatu Jesús reroyasar Galacia pipe peico vahe.

³ Tapeipisi yande Ru Tūpa, yande Yar Jesucristo provasasa pe reco tupri água.

⁴ Ahe acoi oyemondo vahe omano água yande angaipá repirã. Ëgüe ehi cūrítei yande renose co ivi pipe mbahe-mbahe tēi sui yande Ru Tūpa remimbotar rupi.

⁵ ¡Imboeteipri apirēhi Tu tasecoi!

Ndipoi ambuae ñehesa poropīsirosa resendar

⁶ Che pihamondii etepri peye. Esepia, peyepipi poyava peico Tūpa sui. Ahe niha pe renoi Guahir Jesucristo pe raisusa pipe sui. Pe rumo, peroya pota ambuae tēi yembohesa pe ñepisiro água peico viña.

⁷ Supi eté ndipoi ambuae ñehesa pīsirosa resendar. Ëgüe ehi rumo, oime ava pe mañeco tēi vahe pe mbopa água ñehesa supi tupri vahe sui yuvireco. Iyavei virova pota co ñehesa Jesucristo resendar yuvireco.

⁸ Oimese rumo que ambuae ava oñehe vahe poropīsirosa angahu tēi rese ndoyoyai vahe che ñehesa rese pesendu vahe yipisuive, evocoi nungar ava upe “Toime Tūpa ñemoirosa” ahe yepe chera viña, anise que Tūpa rembiguai íva pendar avei no.

⁹ Amboyupagüe iri, “Evocoi nungar ava upe toime ité Tūpa ñemoirosa” ahe.

¹⁰ Aipo che he pipe, ndasecai ava tēi, “Co mbia aviye vahe” he água cheu, Tūpa rumo aseca cheu aipo he água. Esepia, java remimbotar rupi tēi mbahe ayapo vitesa, evocoiyase ndahei chietera Cristo rembiguai aico viña!

Mara ehi Pablo apóstol güeco água

¹¹ Che rivireta, tapeicua co ñehesa poropīsirosa resendar amombehu vahe ava upe ndahei ava tēi pihañemoñetasa.

¹² Ndahei avei ava tēi che mbohe; Jesucristo ité niha oicua uca cheu.

¹³ Pe niha pesendu yipindar che recocuer resendar, che mu judío yembohesa rupi aguata vitesa aracaco. Che pīratasa pipe tēi aseca opacatu Tūpa rembiporavo Jesús reroyasar momara água.

¹⁴ Ëgüe ahe che ayemboivate ai catu che mboetasa eta sui judío yembohesa pipe. Ayapó catu opacatu che recocuer pipe yipindar che ramoi eta yembohe agüer rupi eté vichico.

¹⁵ Tūpa rumo yipive che ha viteehiseve che poravo oyeupe nara. Iyavei oporoaisusa pipe che renoi güemimbotar rupi.

¹⁶ Ëgüe ehi ahe oicua uca Guahir cheu, che imombehu água co ñehesa Tahir recocuer resendar ava ndahei vahe judío upe. Ndasoi rumo ava tēi upe icua água;

¹⁷ ndasoi avei Jerusalén ve yipive apóstol yuvirecoi vahe repia água. Che rumo aso voi eté ivi Arabia ve. Coiyé ayevi tecua Damasco ve vitu.

¹⁸ Ichui mbosapi araviter che seroya pare, aso tecua guasu Jerusalén ve cute. Ahese ramo Pedro ambori quince arí rupi güerañomi tēi.

¹⁹ Ndasepiaí eté rumo ambuae apóstol. Yande Yar rivri Santiago güeraño asepia.

²⁰ Tūpa oicua co mbahe aicuachía vahe pēu, supi tupri vahe ité.

²¹ Ipare aso ivi Siria ve, Cilicia ve avei no.

²² Yande Yar reroyasar rumo oñemonuha vahe ivi Judea ve ndache cuai eté yuvireco.

²³ Co oyandüño tēi yuvireco ambuae ava aipo ehi vahe: “Acoi aracaco yande reca-reca catu vahe yandeu mbahe tēi apo água, cūrítei omombehu Jesucristo reroya água oico” ehi, “Ahe acoi yipindar yande mocañi pota rai vahe oico” ehi yuvireco cheu.

²⁴ Ahese, “Imboeteipri Tūpa tasecoi” ehi yuvireco che recocuer rese.

2

Ambuae apóstol, “Aviye ité Pablo porombohesa” ehi yuvireco

¹⁻² Coiye catorce araviter pare, Tūpa omboyecua cheu Jerusalén ve che yevi água. Evo-coiyase aso iri aheve. Ahese oroso Bernabé rese, Tito avei oroviraso oreyeupi. Aheve yipindar opacatu Jesús reroyasar rerecuar reseño rane oroñemonuha. Esepia, ndaipotai

che rembiapo opitara ěgüe ehi tēi vaherā. Evocoyase amombehu co ñehesa poropisirosa resendar chupe yuvireco acoi amombehu vahe ava eta ndahei vahe judío pāhuve.

³⁻⁴ Oime rumo amove yande rivri angahu tēi, ahe yuviroique mbegüe vahe ore pāhuve 'yasecoepia rane, ¿supi eté ndoviroyai Moisés porocuita Jesucristo reroyasa pipe yuvireco?' oyapave. Oipota ahe ore reroyevi iri Moisés porocuitavrive tēi yuvireco viña. Ahe se ndugüer Tito upe, "¡Eyembocircuncida Moisés porocuita rupi!" ehi yuvireco. Esepia, ahe ndahei vahe judío secoi.

⁵ Ore rumo ndoroipotai eté semimbotar apo āgua yuvireco chupe. Esepia, 'tovireco viteño oyese co ñehesa pisirosa resendar supi tupri vahe yuvireco' ore yapave pēu.

⁶ Co rumo acoi icuapri ité Jesús reroyasar rerecuar, nomombehui eté yembohesa ambuae vahe yuvireco cheu, oyoyaño ité che porombohesa rese. (Yepe ocuita virecora ivate yuvireco viña. Che rumo ñañecuñaroi chietera che recocuer sui. Esepia niha, Tūpa ndahei ava rete tēi osepia.)

⁷ Ahe rumo oicua yuvireco Tūpa che cuai oñhengagüer poropisirosa resendar mombehu āgua ndahei vahe judío yuvirecoi vahe upe, inungar omondo Pedro oñhengagüer poropisirosa resendar mombehu āgua judío upe.

⁸ Esepia, inungar Tūpa omondo Pedro upe apóstol seco āgua ava judío upe nara, ěgüe ehi avei imbou apóstol che reco āgua ava ndahei vahe judío upe nara.

⁹ Sese Santiago, Pedro iyavei Juan, ahe chupe, "Oyemoviracua vahe Jesús reroyasar pāhuve" ehi yuvireco, ahe oicua yuvireco Tūpa ombou vahe oporovasasa cheu. Ahe se imboetasa ore recosa pipe che po pisi yuvireco, Bernabé upe avei ěgüe ehi yuvireco. Iyavei ipiha rupi eté ore oroporaviqui vaherā ava ndahei vahe judío pāhuve oroico, inungar ahe oporaviqui judío pāhuve yuvireco.

¹⁰ Co reseño oporandu yuvireco oreu: "Peyemomahenduhami ava iparaisu vahe pītivii āgua rese" ehi. Yipive ité rumo che ěgüe ahe pota vichico yepi.

Pablo oñhe pĩrata Pedro upe sembiavi rese Antioquía ve

¹¹ Iyavei osose Pedro tecua Antioquía ve. Aheve oyavi güecocuer. Evocoyase añehe pĩrata sovai eté chupe mbahe sembiavi rese.

¹² Esepia, yipindar ahe ocaru ndahei vahe judío piri viña. Ipore rumo, oyepotase ambuae judío Jesús reroyasar Santiago mboetasa yuvireco, ahe se Pedro osiriño ichui osiquiyepave. Iyavei ndocarui iri ipiri. Esepia, ahe Jesús reroyasar judío yugüeru vahe "judío recocuer rupi yaguatara yande ñepisiro āgua" ehi vahe ité yuvireco viña.

¹³ Evocoyase ambuae Jesús reroyasar judío avei osiripaño tēi supive yuvireco. Bernabé avei eté supive ěgüe ehiño tēi.

¹⁴ Che asepiase rumo, ndahoyoyai secocuer yuvireco co ñehesa poropisirosa resendar supi tupri vahe rese. Ichui Pedro upe añehe opacatu Jesús reroyasar rovaque: "Nde niha judío, ereico rumo inungar ndahei vahe judío. Cūrítei rumo erembohe tēi nde rembiapo pipe evocoi ava ndahei vahe judío Jesús reroyasar judío rereco uca āgua" ahe chupe.

Judío, ndahei vahe judío oyoya oñepisiro yuvireco Cristo rese oyeroyasa pipe

¹⁵ Yande niha judío yande hasa suive yaico, ndahei ava ndahei vahe judío nungar yangaipa vahe yaico.

¹⁶ Cūrítei rumo yaicua, ndipoi eté que ava seco catupri vahe Tūpa rovaque Moisés porocuita mboaviyasa pipe. Jesucristo rese yeroyasa pipeño ité rumo yande reco catupri. Sese yande yayeroya ité Jesucristo rese, "Co seco catupri vahe" Tūpa he āgua yandeu. ěgüe ehi eté seroya pipe, ndahei acoi porocuita tēi reroyasa pipe. Esepia, ndipoi chietera que ñepeí ava seco catupri vahe Tūpa rovaque evocoi porocuita tēi aposa pipe.

¹⁷ Yasecase yande reco catupri āgua Cristo rese yande yeroyasa pipe, ipipe yaicua se angaipa viyar yande reco, ¿Cristo pĩha evocoyase yande mboangaipa? ¡Aní eté!

¹⁸ Che amocañise mbahe, ipare rumo amopuha irise, che evocoyase ayemboangaipa ipipe.

¹⁹ Esepia, ndaicatuise Moisés porocuita reroya tupri che ñepisiro āgua, ahe se ocañi tēi vahe aico ipipe. Ichui rumo Jesucristo reroyasa pipe asupiti Tūpa upe nara che recove āgua. Esepia, che aviye yaticapri aico Cristo rese.

²⁰ Sese ndahe iri che ité aicove; Tūpa Ráhir Cristo rumo che rese secoi. Sese ité ayeroya che retecuer pipe che recove āgua. Ahe niha oyemondo omano āgua che raisupave.

²¹ Naroiroi eté co Tūpa porovasasa. Esepia, ava seco catuprira Tūpa rovaque porocuita tēi reroya pipe viña, evocoyase Cristo mano agüer ěgüe ehi tēi etera viña.

3

Porocuita iyavei yeroyasa

¹ ¡Ndapembahecuai eté pe Galacia pendar! Pe ndoyavii ipaye vahe remimbopa peico. Oromombehu tupri niha pe rovai eté acoi Jesucristo curusu rese yatica agüer pëu.

² ¡Pemboyecua co che porandusa cheu! ¿Moisés porocuaita mboyeroya pipe pîha peipisi Espiritu Tüpa suindar, co ñehesa pesendu vahecuer reroya pipe tie?

³ ¡Ndapembahecuai eté! Yipîndar Espiritu pipe pemboipi Cristo rupi pe guata água. ¿Ëgüe peye aveira pîha pe pîratasa pipe tēi pe guata tupri água Cristo rupi cūrítei?

⁴ ¿Ndape pîtiviimi eté vo acoi opacatu pe paraisusa Cristo recocuer rese? ¡Pe pîtiviimira tarahu viña!

⁵ Tüpa niha omondo oEspiritu pe rese iyavei oyapo poromondiisa pe pâhuve. ¿Mahera pîha oyapo? Esepia, co ñehesa pesendu vahe peroya ité, sese ëgüe ehi pëu ndahei Moisés porocuaita tēi reroya pipe.

⁶ Esepia, aracahe Abraham oyeroya ité Tüpa rese, ipipe sui Tüpa oipisi seco catupri vahe nungar oyeupe nara.

⁷ Sese iya ité peicuara opacatu acoi oyeroya vahe Tüpa rese yuvireco, ahe Abraham suindar supi tupri vahe.

⁸ Iyavei Tüpa Ñehengagüer icuachiapri pipe omombehu ité senondeve Tüpa oipisi aveira opacatu oyese oyeroya vahe ndahei vahe judío co ivi pipendar oyeupe nara. Iyavei omombehu co ñehesa icatupri vahe Abraham upe: “Opacatu ava ivi pipendar sovasaprira yuvireco nde sui” ehi.

⁹ Evocoiyase Tüpa osovasara cūríteindar oyese yeroyasareta inungar Abraham aracahe.

¹⁰ Acoi seco catupri pota vahe Moisés porocuaita pipe tēi yuvirecoi vahe, ahe Tüpa ñemoirosavrive tēi yuvirecoira. Esepia, icuachiapri arachendar pipe aipo ehi: “Opacatu ava nomboaviyei vahe ité opacatu Tüpa porocuaita icuachiapri pipe yepi, ahe ñemoirosavrive tēi yuvirecoira” ehi.

¹¹ Sese, co omboyecua tupri yandeu ndahei Moisés porocuaita reroyasa pipe tēi Tüpa, “Co seco catupri vahe” ehi ava upe. Esepia, icuachiapri arachendar pipe aipo ehi: “Acoi ava seco catupri vahe oicovera Tüpa rese oyeroyasa pipe sui” ehi.

¹² Moisés porocuaita ndahoyoyai Cristo rese yeroyasa rese. Esepia, ahe porocuaita aipo ehi: “Acoi ava oico pota vahe co porocuaita pipe, tomboaviye tupri ité opacatu porocuaita güecove água” ehi.

¹³ Moisés porocuaita mboaviyeëhisa pipe yacañi tēira viña. Cristo rumo yande renose yande cañi tēi rägüer sui. Ahe ae opa oipisi ñemoirosa yande repirã. Esepia, icuachiapri arachendar pipe aipo ehi: “Opacatu ava imboyasecopri ivira rese, oipisi Tüpa ñemoirosa yuvireco” ehi.

¹⁴ Ëgüe ehi Cristo yandeu ‘toipisi ava ndahei vahe judío che Ru porovasasa che rembiapo sui’ oyapave. Ahe porovasasa Tüpa omombehu vahecuer Abraham upe aracahe. Ipipe sui yande opacatu yaipisi Espiritu imombehupri yayeroyase Cristo rese cūrítei.

Porocuaita iyavei Tüpa güemimombehugüer omboaviye vaheerã

¹⁵ Iyavei, che rivireta, amboyoya pota mbahe co ivi pipendar mbahe rese. Inungar acoi que ava ñepeí reseve oicuachiase güemimbotar omombehu vahe, ahese ndipoi que ambuae ava omboyeho vaheerã iyavei ndipoi que ambuae ava omboyepi iri vaheerã.

¹⁶ Ëgüe ehi avei Tüpa remimombehugüer Abraham upe aracahe. Esepia, oñehe ñepeí reseve chupe iyavei ichuindar upe avei. Tüpa Ñehengagüer icuachiapri pipe: “Nde suindareta upe” ndehi, inungar-ra que ava rehí upe viña. Ëgüe ehi rumo, “Nde suindar upe ité” ehi ‘ñepeí ava’ ohesa pipe, ahe Tüpa Rembiporavo Jesucristo.

¹⁷ Co mbahe amombehu pota pëu: evocoi porocuaita Tüpa ombou vahecuer cuatrocientos treinta araviter pare, ndoicatui chietera Tüpa ñepeí reseve Abraham upe omombehu vahecuer iyavei oñehe omboaviye vaheerã mboyeho água.

¹⁸ Supi eté acoi Tüpa suindar ou vaheerã porerecosa Moisés porocuaita mboaviyasa pipe suise viña, ahese ndahei chiveira Tüpa remimombehugüer sui. Ahe rumo ñepeí reseve Tüpa remimombehugüer rupi Abraham upendar porerecosa.

¹⁹ ¿Mahera pîha evocoiyase aviye Moisés porocuaita? Esepia, ava poreroyaëhisa cua água Tüpa ombou oporocuaita Moisés upe aracahe. Co porocuaítavrive rumo ava yuvirecoi acoi oyepotase voi Abraham suindar Jesús Tüpa remimombehugüer rupi. Yipîndar rumo Tüpa oyocuai güembiguai íva pendar oporocuaita mombehu água Moisés upe aracahe ‘tomombehu evocoiyase Moisés che porocuaita opacatu ava upe’ oyapave.

²⁰ Ñepeí ava rese oñemoñetase, ndipotasai ambuae imoingatu água. Tüpa niha ñepeí vahe secoi.

Mbahe sui Tüpa ombou oporocuaita

21 “Moisés porocuaita co coti tēi Tūpa remimombehugüer imboaviyepirã sui” aipo ndahei eté pēu. Esepia, acoi Tūpa omondose que porocuaita ombou vaheerã tecovesa apirēhi ava upe imboaviyesa pipe, evocoyase porocuaita reroya pipe yande reco catuprira Tūpa rovaque viña.

22 Icuachiapri aracahendar pipe rumo omombehu ité co: opacatu ava inungar mbiguai tēi oangaipa pipe yuvirecoi. Evocoi ēgüe ehi, Jesucristo rese yande yeroyasa pipe yasē vaheerã ichui mbahe imombehupri pisi āgua.

23 Yipindar rumo mbiguai nungar yaico Tūpa nomboyecua viteise Guahir rese yande yeroya āgua.

24 Inungar chihivahemi tēi, ēgüe yahe porocuitavrive yaico yipindar. Ahe porocuaita rumo yande mbohe Cristo yu āgua ‘toyeroya Cristo rese güeco catupri āgua curi’ oya yandeu.

25 Cūrítei rumo oime Jesucristo rese yeroya āgua cute. Evocoyase ndahe iri ahe porocuitavrive yaico.

26 Pe niha opacatu Tūpa rahir peico Jesucristo rese yeroya pipe.

27 Opacatu pe ñapiramombri peico vahe Jesucristo rupi pe guata āgua, secocuer avei pereco.

28 Iyavei ndipoi eté yemboyahosa Jesucristo rese yaicose, yepera que judío viña, ndahei vahe judío; anise mbiguai, ndahei vahe mbiguai; que cuimbahe, cuña avei. Esepia, opacatu ñepevi vahe nungar ité yaico Cristo rese.

29 Jesucristo rese peicose, pe evocoyase Abraham suindar nungar tupri ité peico. Evocoyase pe avei peipisira Tūpa remimombehu porerecosa yandeundar.

4

1 Amboyoapi vitera co che ñehesa pēu: inungar que ava omanose, oseya ombahe eta guahir upe chihivahemise. Yepe ahe tahir opacatu mbahe yar secoira viña, ahe rumo inungar tupri mbiguai tēi secoi vahe yepi.

2 Esepia, ahe guārosar povrivi secoi imboyeroya āgua. Ocuacuase voi eté, opoira tu remimombehugüer rupi ichui.

3 Ēgüe ehi avei yandeu. Yande chihivahemise, evocoyase mbiguai nungar yipindar vahe co ivi pipendar porocuitavrive yaico.

4 Oyepotase rumo ari imombehupri, Tūpa ombou Guahir, ahe oha cuña sui; evocoyase ahe Moisés porocuitavrive secoi.

5 Ēgüe ehi ou opacatu yande renose āgua evocoi mborocuitavrivi sui Tūpa rahir ité yande reco āgua.

6 Evocoyase Tūpa omboyecua Guahir yande recose ombouse Guahir Espiritu yande piha pipe, “¡Che Ru!” yande he āgua chupe.

7 Sese yande Tūpa rahir ité yaico, ndahe iri cūrítei mbiguai tēi nungar. Tūpa rahir yande reco pipe ahe ombou aveira oporerecosa yande mahera.

Pablo ipihañemoñetaño ité Jesús reroyasar rese oico

8 Yipindar tūpa angahu rembiguai tēi peico Tūpa ité cuaēhi pipe.

9 Cūrítei rumo peicua Tūpa, ēgüe ehi rumo Tūpa ité oicua pe recocuer. Sese niha aipo ahe cheyeupe: “¿Mara ehi piha oyevi iri mborocuaita tēi pipe mbiguai tēi güeco iri āgua yuvireco?” ahe pēu.

10 Esepia, pemboetei vite ari, yasi, araviter pieta eta tēi peico.

11 ¡Che ayembosiquiye pe rese, “Che porombohesa revo ēgüe ehi tēi vahe ipāhuve yuvireco chupe” ahe pēu!

12 Iyavei che rivireta, aipota che recocuer moña peye. Esepia, cuese che asē Moisés porocuaita povri sui inungar pe yipindar ēgüe ahe vichico pe pāhuve. Ahese ndapeyapoi eté mbahe cheu.

13 Peicua niha che yipindar chembaheasise vichico, ahese amombehu co ñehesa pīsirosa resendar pēu.

14 Yepe co che mbaherasisa yavai etepri pēu viña, pe rumo ndache roeroiroi eté peye iyavei ndache momboi peye. Ēgüe ehi rumo aviye acoi Tūpa rembiguai eté che rereco peye viña iyavei aviye Jesucristo itera aico pēu viña no.

15 ¡Mahera ru cūrítei ndapeyemboviharete vitei che rese peico eipeve! Esepia, supi eté, cuese acoi que pe resa teieté revo pemboura cheu viña.

16 ¡Evocoyase cūrítei che amotarēhi tie peye acoi pēu mbahe supi tupri vahe mombehusa sui tēi!

17 Evocoi ava iquerēhi ité pe rese, ndahei rumo mbahe aviye vahe apo āgua yuvireco. Ahe rumo oipota pe mboyepepi āgua tēi ore sui yuvireco pe querēhi āgua supi.

¹⁸ Aviye ité niha yande querêhise mbahe apo ambuae ava upe, mbahe aviye vahe apo âgua rumo. Ndahei chira pe pâhuvé che recoseño pereco pe querêhisa. Iyacatu rumo pequerêhiño itera yepi.

¹⁹ Che rahireta, che ayembopiharasi ité vichico pe rese. Inungar cuña imembirasi vahe; êgüe aheño itera ayemombaraisu vichico 'toico rane ité Cristo sese yuvireco' che yapave pêu.

²⁰ Cûritei rãgüer opoepiara viña ahehe tupri catu âgua pe rese. Esepia, "¿Mara ahera revo sereco yuvireco?" ahe pêu.

Agar, Sara recocuer resendar yembohesa

²¹ Pe peroya pota vahe Moisés porocuita pe reco catupri âgua, pemombehumi cheu: ¿Ndapesenducui tie co mborocuita aipo ehi vahe?

²² Esepia, aipo ehi: Abraham aipo víreco ñuvirío guahir, ñepeí tahir aipo sembiguai Agar membri, ambuae tahir evocoiyase sembireco Sara membri.

²³ Evocoi sembiguai membri oha que ava tēi yesu nungar; sembireco membri rumo oha Tûpa remimombegüer rupi eté.

²⁴⁻²⁵ Co tecocuer mboyoyasa yaracua vahe ité. Co ñuvirío cuña sui yayembohe ñuvirío Tûpa remimbotar rese. Yipindar sembiguai Agar omboyecua evocoi porocuita imondopri Arabia pipendar ivitri Sinaí ve aracahe. Ahe cuña mbiguai tēi inungar Jerusalén upendar ava. Esepia, ahe Moisés porocuitavriye yuvirecoi. Êgüe ehi avei opacatu Moisés porocuita pipendar, yuviroha mbiguai nungar güeco âgua, opacatu ichuindar êgüe ehi vite yuvireco.

²⁶ Yande rumo inungar-ra que Jerusalén iva pendar suindar yaico viña êgüe yahe yaico mbiguaiêhi.

²⁷ Esepia, icuachiapri aracahendar pipe aipo ehi:

"Eyembovîhareté, cuña nimembii vahe;

esapucái nde rorivetesá pipe, nde ndereiporará vahe nde membri rasicuer.

Esepia, acói cuña seyapri imembí atí catura cuña omer víreco vahe sui" ehi.

²⁸ Che rivireta, inungar Sara membri Isaac, êgüe yahe avei tahir ité yaico Tûpa remimombegüer rupi.

²⁹ Co rumo aracahe sembiguai membri oha vahe ava tēi yesu nungar, ahe ndoyambotai sembireco membri acói Espiritu píratasa pipe sui oha vahe; cûritei êgüe ehi tupri avei.

³⁰ ¿Mara ehi icuachiapri aracahendar pipe? "Pemboyepepi pe rêta sui cuña mbiguai tēi imembri reseve. Esepia, cuña mbiguai tēi membri ndiyai oyoya cuña ndahei vahe mbiguai membri rese vu mbahe písi âgua yuvireco" ehi.

³¹ Sese, che rivireta, yande ndahei sembiguai tēi membri nungar yaico, yande rumo sembireco membri nungar yaico. Esepia, ahe ndahei mbiguai.

5

Peyemoviracuaño ité Moisés porocuita pipe pe recoêhi âgua

¹ Jesucristo niha ombou yandeu mbiguai tēi nungar sui yande sē âgua. Sese peyemoviracua mbiguai tēi pe reco iriêhi âgua.

² Pesendu che ñehe. Che, Pablo, aipo ahe pêu: acói peyembocircuncida ucase, ahese êgüe ehi tēi vahe Cristo pereco.

³ Che amombehu pota irimi pêu, que ava oyembocircuncida uca vahe, víreco niha ocuaita opacatu Moisés porocuita mboyeroya âgua.

⁴ Pe pereco catupri pota tēi vahe Tûpa rovaque evocoi porocuita tēi reroya pipe, peyepepi ité Cristo sui. Evocoiyase Tûpa porovasasa avei pemocañi tēi peyesui.

⁵ Yande rumo yande querêhisa pipe yayeroya yande reco catupri âgua rese. Êgüe yahe Espiritu yande pítiviisa pipe iyavei Jesús rese yeroyasa pipe avei.

⁶ Esepia, acói yaicose Jesucristo rese, yepé yayembocircuncidase, anise ndayayembocircuncidaise, ahe ndayande pítivii eté yande reco catupri âgua Tûpa rovaque. Co güeraño rumo yande pítivii Jesús rese yande yeroyasa. Ahe niha yande mboyeaisu uca.

⁷ Peico tupri niha yipindar viña. ¡Ava ru ndoviroya uca iri mbahe supi tupri vahe pêu!

⁸ Ndahei eté rumo pe poravosar Tûpa êgüe ehi pêu.

⁹ ¿Ndapeicuai vo acói aipo ehi vahe: "Chílimi pan mboapeposa oso panguã rese opacatu rupi oicahopa tupri yepi" ehi?

¹⁰ Che rumo ayeroya yande Yar rese pe pihañemoñeta âgua che pihañemoñetasa rupi. Tûpa rumo omboura oñemoirosa que ava pe mbopihañemoñeta yoavirati uca vahe upe.

¹¹ Che rumo, che rivireta, "Iya yayembocircuncida yande reco catupri âgua" ahe vitese Jesús reroyasar upe viña, ahese revo ndipoi chira che amotarêhisar judío pâhuvé, ahese avei ndipoi chira ñehesa curusu rese Jesús manosa resendar amotarêhimbar ipâhuvé viña.

¹² Evocoi ava pe mbopihañemoñeta yoaviratí uca vahe circuncisión rese yuvireco, ¡mahera ahe ae ndoyeasiapa voi ñepeí reseve yuvireco!

¹³ Esepia, pe ore rivireta, Tüpa niha pe renoi mbuguai tēi nungar pe recosa sui pe renose āgua. Ndahei chira rumo pe remimbotarai tēi apo āgua, iyacatu rumo peñepitiviira pe yeaisusa pipe.

¹⁴ Esepia, opacatu evocoi mborocuita imboaviyesa yamboaviyese co ñehesa aipo ehi vahe: “Esaísu ambuae ava nde yeaisu nungar” ehi vahe.

¹⁵ Peyeseño tetei rene catu; peicua catu, aviyeteramo ēgüe peyese, pe recocuer pemomarpa tiētera.

Yaguatará Espíritu remimbotar rupi, ndahei yande remimbotar tēi rupi

¹⁶ Pesendu che ñehe: Espíritu pīratasa pipe catu peico yepi. Iyavei peyapoi rene mbahe pe remimbotarai.

¹⁷ Esepia, co pe remimbotarai ndahoyoyai eté Tüpa Espíritu remimbotar rese. Ndoymbohe catui eté. Sese ndapeyapo ucai mbahe pe remimbotar aviye vahe peyeupe.

¹⁸ Acoi Espíritu ité pe reroguatase, ahese ndahe iri chiaveira Moisés porocuitavriye peico.

¹⁹ Yande remimbotarai suindar yande rembiapo ai icuasa tupri ité. Ahe: yemboaguasa tēisa, teco quihasa, mbahe tēi aposa;

²⁰ mbahe rahanga upe yerure tēisa, yembopayesa, ñeroirosa, ñehepoepi-episa iyavei ambuae ava mbahe pota raisa; ñemoiro seraisa, yemboyaho-yahosa, pihañemoñeta yoyaēhisa,

²¹ iyavei ambuae ava mbahe pota raisa rese ñemoirosa, savaiposa, yembopieta tēisa iyavei ambuae mbahe co nungar tupri aposa. ¡Peicua catu! Esepia, evocoi nungar mbahe aposar ndoyuviroiquei chietera Tüpa mborerecuasave yuvireco curi.

²² Yayapose rumo Espíritu remimbotar, yande evocoiyase yayeaisura, yande rorivetera, yaicora mbahe tupri pipe, yande reco mbegüera, yaporoaisura yande reco aviyesa pipe, yamboycuara yande cuaita mboaviyesa,

²³ yayemominiñora iyavei yande recorã rese yañearo tuprira. Evocoi nungar yayapose, ndipoi eté que mborocuita pipe yande yeamotarēhi āgua.

²⁴ Jesucristo rese ité yuvirecoi vahe rumo, opa ité omombo güecocuerai co ivi pipendar tēi oyesui yuvireco, güemimbotarai, opihañemoñeta raisa avei no.

²⁵ Yande yaicose Espíritu pīratasa rese, ahese Espíritu rupi eté yaguatará.

²⁶ Ndayayemboivate ai chira. Esepia, ipipe sui yayeamotarēhi, yaipota rai avei yande mboetasa recocuer nungar yande reco āgua.

6

Peñepitivii ñepeí-peí

¹ Che rivireta, acoi que Jesús reroyasar pe pāhu pendar oyavise güecocuer, pe peico vahe Espíritu rese, peipitivii secocuer moingatu āgua pe recocuer mbegüemisa pipe. Peicua catura rumo, aviyeteramo oyoya voi peyemboangaipa uca tiētera.

² Peñepitivi-tivii catu que mbahe yayai rai vahe rese. Ēgüe peyese, Jesucristo porocuita pemboaviyera.

³ Amove ava, “Che ivate catu vahe aico” ehi tēi. Ēgüe ehi rumo ahe ae oyembopa aipo ohesa pipe oico.

⁴ Sese niha ñepeí-peí eté yaicua tuprira yande recocuer. Aviyese, evocoiyase sese yayiharetera. Ndahei acoi ambuae ava recocuer rese tēi yamboyyara yande recocuer.

⁵ Esepia, ñepeí-peí eté yande yacatu yareco yande cuaita imboaviye āgua.

⁶ Acoi oyembohe vahe Tüpa ñehe pīsirosa resendar rese, tomondo ombohesar upe mbahe güembireco ipitivii āgua.

⁷ Peyembopa eme catu pe ae. Ndiptoi chietera que ava viroiro vahe Tüpa ñemoirosa pisiēhisa pipe. Ēgüe ehi eté: yañotise mbahe, ichui avei mbahe yaipisira.

⁸ Acoi ava rumo oyapo vahe mbahe güemimbotarai pipe, ahe oipisira cañisa apirēhi vahe. Acoi oyapo vahe mbahe Espíritu remimbotar rupi, ahe oipisira tecovesa apirēhi vahe yuvireco.

⁹ Evocoiyase tayandecuerai eme mbahe tupri aposa pipe. Esepia, acoi ndayandecueraise, yaipisira mbahe tupri apo repri.

¹⁰ Sese yande catugüer rupi yayapo mbahe icatupri vahe opacatu upe; yande mboetasa Jesús reroyasar upe ité rumo yayapora.

Pablo, “Peicua catu pe mbocircuncida pota vahe sui” ehi iyavei ñehesa ipa vahe

¹¹ ¡Pesepia co ñehesa ipa vahe che pove ité aicuachía tuvicha vahe pēul!

PABLO REMBICUACHIA EFESO PNDAR UPE EFESIOS

Pablo mahenduhasa Jesús reroyasar Efeso pndar upe

¹ Che, Pablo, Jesucristo apóstol aico Tüpa remimbotar rupi. Che aicuachía co che ñehe pëu pe Efeso pndar, Tüpa upendar Jesucristo reroyasar peico vahe.

² Yande Ru Tüpa iyavei yande Yar Jesucristo tombou oporovasasa pe reco tupri ägua pëu.

Cristo suindar porovasasa

³ Yande Yar Jesucristo Ru Tüpa imboeteipri tasecoi. Ahe ombou opacatu porovasasa iva sui yande Cristo rese yaico vahe upe.

⁴ Sese niha Tüpa yande poravo yipivé ité ivi apoëhi viteseve 'toyuvirecoi cheu nara ité iyavei tasecomara eme yuvireco che rovaque' oyapave oporoaisusa pipe.

⁵ Ipipe avei yipisuive yande pisi guahirguã Jesucristo yande písirosa pipe güemimbotar rupi.

⁶ Sese yande yasapucaí chupe iporoaisusa porañete vahe rese yepi. Ahe ipipe niha yande rovasa Guahir güembiaisu sui.

⁷ Tüpa yande raisu eteprisa pipe yande písiro Guahir ruvi piyeresá pipe yande angaipa rese ñero ägua.

⁸ Yande raisu pipe avei ombou opacatu yande aracua ägua iyavei yande yapisaca ägua avei yandeu,

⁹ iyavei oicua uca güemimbotar yipisuive ndicuasai vahe yandeu co güembiaporã mboaviye ägua.

¹⁰ Oyepotase ahe ari imboaviye ägua, Tüpa opacatu mbahe iva pndar, co ivi pipendar avei opara omoingue ñepeí reseve Guahir Cristo povrive.

¹¹ Cristo rese yaicose, Tüpa yande poravo yipisuive ichuindar mbahe yandeundar pisi ägua. Opacatu rumo mbahe Tüpa remimbotar rupi. Ahe niha oicua ité güemimbotar apo ägua

¹² 'tomboetei che mborerecuasa ava yuvireco che Rahir rese yeroyasar yipindar yuvirecoi vahe recocuer replase' oya oreu.

¹³ Pe avei niha, pesenduse co ñehesa supi eté vahe písirosa resendar, Cristo peroya pe piha pipe sese peico vaherã. Tüpa ombou güemimombehugüer Espiritu Santo pe piha pipe 'cheundar ité yuvirecoi' oya.

¹⁴ Ipisisa pipe niha yaicua yande yaipisi vaherã yandeundar mbahe imoingatupri, acoi Tüpa opase oipísiro ava oyeupendar 'ipipe sui tomboetei che reco ivatesa ava yuvireco' oya.

Pablo oporandu Tüpa upe mbahecuasa Jesús reroyasareta upe mondo ägua

¹⁵ Ayandu peyeroya tupri yande Yar Jesús rese iyavei pesaisu ité ava opacatu Tüpa upendar.

¹⁶ Sese ndapoi eté Tüpa upe, "Aviye ndeu" che hesa sui chemahenduhase pe rese che yeruresa pipe.

¹⁷ Che aporandu yande Yar Jesucristo Ru Tüpa seco porañete vahe upe, pe recocuer resape ägua rese. Ipipe peicua tupri catura semimboyecua iyavei peicua tupri catura yande Yar.

¹⁸ Ëgüe ahe ité aporandu Tüpa upe pe piha resape ägua rese. Ipipe peicua catura co pesãro vahe ivave pe reique ägua; chupe nara ité Tüpa pe peha. Iyavei peicuara co mbahe imondopirã iva pndar iporañete vahe Tüpa upendar yuvirecoi vahe upe.

¹⁹⁻²⁰ Ipipe sui peicua tupri aveira Tüpa pĩratasa ndopai vahe yande seroyasar yaico vahe rese. Co pĩratasa ivaté vahe ité. Ahe pĩratasa Tüpa omboyecua, ombogüerayevise Guahir Cristo omano vahe pãhu sui, iyavei omboguapise oacato coti ivave.

²¹ Osecomboivate catu opacatu iva pndar, ivi pndar seco ivate vahe mborerecuar recuar tẽi pĩratasa sui iyavei opacatu cüriteindar sui, que oime vaherã sui avei.

²² Opacatu mbahe omondo Guahir Cristo povrive, Tahir upe avei ombou mborerecuar ivate catu vahe seco ägua opacatu viroyasar upe.

²³ Opacatu yande seroyasar yaico vahe recocuer rese Cristo secoi. Evocoyase yande setecuer nungar yaico. Ahe opacatu rupi secoi.

2

Tüpa oporovasasa pipe yande písiro

¹ Pe rumo, yipindar angaipa pipe peicose, inungar omano vahe peico Tüpa upe.

² Co ivi pipendar pihañemoñetas rupi tēi peico iyavei ivate rupindar carugar rerecuar porocuita tēi avei perya, ahe Jesús reroyasarēhi ombohe vahe.

³ Yipindar opacatu yande avei yaguata yande remimbotar rupi tēi yande recocuerai pipe. Yande pihañemoñeta raisa rupi tēi avei yayapo mbahe. Sese Tūpa ñemoirosa yaipisira opacatu ambuae ava rupive viña.

⁴ Tūpa rumo yande parañesucero ité, yande raisu etepri avei.

⁵ Yepe angaipa pipe yaico omano vahe nungar viña, ahe rumo ombou Guahir yande recove água. Ahe oporovasasa pipe yande pisiro.

⁶ Yande mbogüerayevi iri avei niha sese. Ipape seseve yande moingue oyepiri ivave

⁷ tamboyecua opacatu iva pendar upe che porovasasa iyavei che poroaisusa tuvicha vahe che Rahir rembiapo pipe sui curi' oya.

⁸ Esepia, oporovasasa pipe pe pisiro Jesús rese peyeroyase. Ndahei rumo pe recocuer sui tēi peñepisiro, ahe rumo ombou porerrecosa pēu.

⁹ Ndahei avei ava rembiapo sui tēi ou vahe. Evocoyase ndiyai chira yayemboivate ai ipipe.

¹⁰ Tūpa niha yande recocuer mohivi Jesucristo rese yande reco água mbahe icatupri vahe apo água. Ahe mbahe icatupri vahe yipisuive Tūpa omoime yande rembiaporã.

Cristo ombou yande reco tupri água

¹¹ Evocoyase peyemomahenduha yipindar pe recocuer rese. Ndahei rumo judío suindar peico: "Co ndoicuai vahe Tūpa, ndoyembocircuncidai vahe tēi yuvirecoi" ehi judío yuvireco pēu, (ahe judío oyembocircuncida vahe güete rese oyeupe, "Yande Tūpa rembiporavo imbocircuncidapri yaico" ehi yuvireco).

¹² Peyemomahenduha yipindar Cristo ndaperecoi vahe rese. Ahese ndapeicoi Tūpa rembiporavo Israel recua pendar iyavei ndapecuai Tūpa remimbotar semimombehu avei ombou vahe judío upe ipitivi água; ndaperecoi Tūpa iyavei ndaperecoi sãrosa pe ñepisiro água co ivi pipe viña.

¹³ Esepia, ahese amombri Tūpa sui peico. Cūritei rumo Jesucristo rese peico. Esepia, ahe vuví pipe pe reru Vu Tūpa upe.

¹⁴ Ahe avei niha teco tuprisa yandeu. Esepia, ahe yande mboyeseha judío, ndahei vahe judío ñepe vahe nungar yande yeamotarēhi iri água oyeupe. Yande ñemoirosa niha opa omocañi yande sui güetecuer mondososa pipe.

¹⁵ Cristo omomba opacatu Moisés porocuita. Ahe oipota ñepe vahe nungar teco piyasu pipe yande reco água, judío iyavei ndahei vahe judío. Ēgüe ehi imocañipa yande yeamotarēhisa yande sui yande reco tupri água.

¹⁶ Evocoyase ahe ae omanose curusu rese, ombou yandeu yandeyeupe ñero água judío, ndahei vahe judío ñepe vahe nungar Tūpa rupi yande reco água.

¹⁷ Ahe ou omombehu co tecocuer piyasu pēu pe amombri Tūpa sui peico vahe, omombehu avei ore namombri vahe judío oroico vahe upe 'tiñero yuvireco oyeupe' oya.

¹⁸ Esepia, Cristo rembiapo pipe sui niha oyoya yande judío iyavei ndahei vahe judío yaico vahe yayemboya vahe rã Tūpa rese Espiritu ñepe vahe pipe.

¹⁹ Sese pe ambuae ivi pendar peico vahe, ndahe iri amombri Tūpa sui peico cute. Cūritei rumo Tūpa upendar ité peico opacatu ambuae seroyasar reseve. Yande evocoyase ñepe reseve oñemu guasu vahe nungar yaico.

²⁰ Pe inungar tūparo marañehi imopuhambri ihivipirã hari pendar peico; apóstol iyavei Tūpa ñehe mombehusar evocoyase inungar ihivipi yuvirecoi tūparo moviracua água. Jesucristo rumo inungar ita yipindar vahe imohivisa yandeu.

²¹ Ichu Cristo opa yande mboyeseha oyese, inungar oi imopuhambri oyeupi catu-catu iri vahe tūparoguã, Ēgüe vahe ipehapri yaico yande Yar upe nara sese ité yande reco água.

²² Sese niha, Cristo rese peicose, pe ambuae viroyasar rese avei sētarã nungar peico. Ipipe Tūpa, oEspiritu pipe, secoira.

3

Pablo cuaita ñehesa pisirosa resendar mombehu água ava ndahei vahe judío upe

¹ Sese, che Pablo, soquendapri aico cohava Jesucristo recocuer mombehusa sui tēi. Ndahei vahe judío peico vahe pe recocuer aviye água rese Ēgüe ahe.

² Peicua tupri revo co che poraviquisa Tūpa ombou vahe cheu oporovasasa mombehu água pēu nara.

³ Co ñehesa yipindar ndicuasai vahe güemimbotar resendar Tūpa omboyecua uca vahe cheu, ahe niha aicuachía chíhi pēu.

⁴ Co rese peyeroquise peicua tupri catura co che aracuasa Cristo recocuer resendar yecua ramo vahe.

⁵ Co ñehesa icatupri vahe ndoicuai eté ava yuvireco aracahe. Cûritei rumo Tûpa oEspíritu pipe omboyecua güembipeha yuvirecoi vahe upe. Ahe sembipeha apóstol, iñehe mombehusar avei yuvirecoi.

⁶ Evocoi oyecua ramo vahe, ahe co: pe ndahei vahe judío upe avei Tûpa omboura judío upendar nungar tupri porovasasa co ñehesa poropísirosa resendar reroyasa pipe. Pe avei oñemu nungar tupri peico, oyoya ore judío oroco vahe rese. Pëu nara avei Tûpa remimombehugüer arachendar peyeroyase Jesucristo rese.

⁷ Yepe ndiyai cheu viña, Tûpa rumo che moingo opíratasa pipe ñehesa písirosa resendar mombehu água.

⁸ Che recocuer niha ivi coti catu opacatu ambuae Tûpa reroyasar sui viña, ahe rumo ombou oporovasasa co mboraviquisa ñehesa aviye vahe Cristo recocuer resendar mombehu água ava ndahei vahe judío upe nara cheu.

⁹ Iyavei ombou che cuaitarã amombehu tupri vaheerã opacatu ava upe opacatu mbahe Aposar pihañemoñetasa yipindar ndicuasai vahe.

¹⁰ Êgüe ehi cûritei oyesuindar aracuasa cua uca água viroyasareta recocuer rese opacatu mborerecuar guasu, seco pírata vahe iva pendar upe.

¹¹ Êgüe ehi, Tûpa opihañemoñeta ndopai vahe mboaviye Guahir, yande Yar Jesucristo rese.

¹² Sese yande yeroyasa suiño ité yaicatu yande yemboya água Tûpa rese yande siquiyeñehisa pipe.

¹³ Sese aní chira, ndapequerêhi iri Cristo rupi pe guata água, pe recocuer rese che yemombaraisusa sui. Iyacatu rumo che paraisusa pereco pe yemboviha água.

Cristo poroaisusa

¹⁴ Sese añenopiha yande Ru Tûpa rovaque.

¹⁵ Ichui serer pãve vireco yuvireco, opacatu seroyasareta iva pendar, ivi pendar avei ñepeí oñemu yuvirecoi vahe nungar.

¹⁶ Che aporandu chupe ‘tombou güeco porañetesa sui opíratasa yuvireco chupe oEspíritu pipe imoviracua água’ viya pëu.

¹⁷ Êgüe ahe ayeroqui pe rese pe piha pipe Cristo rereco água sese pe yeroyasa pipe. Iyavei pe poroaisusa pipe pe yemoviracua catu água peyese

¹⁸ ‘toicatu opacatu ambuae Jesús reroyasareta reseve Cristo poroaisusa tuvichá vahe ité renducua tupri catu água yuvireco’ viya pëu.

¹⁹ Che ayeroqui ahe poroaisusa peicua tupri catu água rese (yepé ndayaicatuí icuapa tupri água yaico viña). Ipipe sui Tûpa tasecoi pe rese.

²⁰ Cûritei yamboetei yande Ru Tûpa. Esepia niha, ahe opíratasa pipe ombouvicha catu itera mbahe yande porandusa sui, yande pihañemoñetasa sui avei yandeu. Esepia, opíratasa pipe oporaviqui yande rese.

²¹ ¡Sese êgüe tehi imboeteipri Tûpa tasecoi seroyasareta recocuer sui, Jesucristo sui avei apirêhi vaheerã!

4

Ava Espiritu rese oyoya guasu yuvirecoi vahe

¹ Sese Cristo recocuer mombehusa sui che roquendasa pipe, “Peico tuprira pe cuaita rupi Tûpa pe renoisa pipe” ahe pëu.

² Peyemominira peico pe reco aviyesa pipe, pe reco mbegüesa pipe aveira iyavei peñemosañe pe yeaisusa pipe peyeupe.

³ Peyapo opacatu pe recocuer pipe peico tupri vite água peyepãhuve Espiritu Santo pe pítiviisa pipe, pe reco tuprisa pipe avei.

⁴ Yaico ñepeí nungar Cristo rese iyavei yareco ñepeí Espiritu. Êgüe ehi avei Tûpa yande poravo ñepeí guãrosa rereco água.

⁵ Oime ñepeí yande Yar, ñepeí yande yeroyasa, oime avei ñepeí poroãpiramosa.

⁶ Oime ñepeí Tûpa, ahe opacatu yande Ru, opacatu yande cuaisar, ahe oporaviqui opacatu yande rese, secoi avei yande rese no.

⁷ Iyavei Cristo niha yande yacatu ñepeí-peí mbahecuasa ombou.

⁸ Sese aipo ehi icuachiapri arachendar pipe:

“Oso ivave, víraso secopipireta oyeupi; omondo avei porerecosa ava upe” ehi.

⁹ ¿Mara oya aipo ehi: “Oso ivave”? Yipindar ogüeyi co ivi pipe.

¹⁰ Acoi ogüeyi vahe co ivi pipe oso ivate catusave ‘taico opacatu rupi’ oya.

¹¹ Ahe niha ombou amove apóstol seco água, ambuae upe ombou Vu ñehe mombehu água, ambuae upe ombou ñehesa písirosa mombehu água, ombou avei ambuae upe viroyasar rãro água iyavei iporombohe água.

¹² Ēgüe ehi ava viroyasar mbohe oyeupe mboraviqui apo ambuae viroyasar moviracua tupri catu āgua.

¹³ Opacatu yaico tupri rane itera oyese Jesús rese yeroyasa pipe iyavei yaicua tuprira Tūpa Rahir recocuer. Ahese yaico tuprira yande Cristo rese inungar ava ipihañemoñeta tupri catu vahe, ahese yasupitira Cristo recocuer yaico.

¹⁴ Evocoyase ndahe iri chira chihivahe tēi nungar ova-ova tēi vahe yaico inungar-ra que ivitu yande reraso vahe oyeupi. Ndayayembopa uca iri chira ava co coti tēi oporombohe vahe upe, que yande rerova pota vahe upe mbahe tēi pipe.

¹⁵ Yande rumo evocoyase yañehera mbahe supi eté vahe rese poroaisusa pipe iyavei yaroya catu-catu irira Cristo opacatu tupri yande recocuer pipe. Ahe niha yande rerecuar secoi.

¹⁶ Esepia, ahe yande mboya tupri oyese, yande moenda tupri avei yande rereco, ēgüe ehi ahe yande mboyemboya oyese ñepepe vahe nungar. Ñepepepe yaporaviqui tuprise, ahese opacatu yayeroya catu itera, yayemoviracua catu aveira yande yeaisusa pipe.

Cristo yande recocuer mbopiasu

¹⁷ Che aipo ahe Tūpa rer pipe pēu che pe cuaisa pipe: peico iri eme ava Tūpa cuaparēhi nungar. Ahe yuvirecoi vahe ité opihañemoñeta raisa pipe,

¹⁸ ndoicatu mbahe renducua tupri āgua iyavei ndovirecoi tecovesa Tūpa suindar oyese yuvireco. Esepia, ndoicuai Tūpa ñehe opihañemoñetaēhisa pipe yuvireco.

¹⁹ Ndoyvinochi iri mbahe tēi apo āgua iyavei oyemondo ité mbahe tēi pipe. Ndosiquiyei eté opacatu güemimbotarai apo āgua yuvireco.

²⁰ Pe rumo ndaperebohei eté evocoi nungar mbahe rese Cristo rese peicose,

²¹ supi eté pesenduse porombohesa supi tupri vahe Jesucristo resendar iyavei peyembohesa secocuer rese.

²² Ahe yande mbohe yande recocuerai yipindar vahe reya āgua. Esepia, ahe naporai vahe yande mbopa tēi yande pihañemoñeta rai apo āgua.

²³ Peseçuñaro catu pe yapisacasa.

²⁴ Peicoño ité avei pe recocuer piasu pipe. Sese niha Tūpa yande apo yande reco ivi tupri āgua yande reco maranehi vahe rā supi tupri vahe pipe, inungar ahe.

²⁵ Sese ndaperemira iri chira, iya rumo peñehe ñepepepe mbahe supi tupri vahe rese peyeupe. Esepia niha, yande opacatu ñepepepe ava rete resendar nungar yaico.

²⁶ Peyemboangapai rene peñemoirose, iyavei ndiyai peñemoiro ari momba peico.

²⁷ Peipota ucai rene Caruguar upe peyeupe mbahe apo āgua.

²⁸ Acoi imonda rai vahe, timonda iri eme; toporaviquiño ava iparaisu vahe pītivi āgua.

²⁹ Ndapeñehe rai chira, iyacatu rumo peñehe tuprira ñehesa aviye vahe pipe ambuae pe ñehe rendusar monguerēhi catu āgua yuvireco yande Yar rese.

³⁰ Peyapoi rene mbahe Espiritu Santo mbovīhāēhi āgua. Ahe niha Tūpa ombou yandeu 'toicua ava co cheundar opisira ari ipa vahe pipe poropisirosa ñepepe reseve vahe yuvireco' oya.

³¹ Peypepepe co nungar mbahe sui: piha vīracuasa, mbahe mboasi pīratasa, ñemoirosa, pe rāse aisa, opacatu pe ñehe rai, opacatu ambuae mbahe-mbahe tēi sui avei.

³² Iya rumo peico tupri ambuae upe pe yeaisusa pipe. Peñeroño itera peyeupe yepi inungar Tūpa iñero Guahir Cristo rese pēu.

5

Mara ehira ava Tūpa rahir yuvireco

¹ Pe niha Tūpa rahir sembiaisu peico. Sese peyemonguerēhi catu secocuer moña āgua.

² Peico pe poroaisusa pipe, inungar Cristo yande raisu iyavei oyemondo yande recocuer rese, ovesa nungar seropovēhepri Tūpa uve. Ahe aviye ité inungar mbahe siacua vahe chupe.

³ Pe niha Tūpa upendar ité peico. Sese ndapeyemboaguasai chiera iyavei ndapeicoi chira ambuae mbahe naporai vahe pipe, que yemombotasa opacatu mbahe rese.

⁴ Ndapeñehe rai chira que poromochisa rese, que ēgüe ehi tēi vahe rese, anise que co coti-coti tēi vahe rese. Esepia, evocoi nungar ndahei mbahe aviye vahe. "Aviye ndeu" peye catuñora rumo Tūpa upe peico.

⁵ Peicua niha acoi oyemboaguasa vahe, oyapo vahe mbahe naporai vahe, que yemombotasa (esepia, ahe inungar mbahe rahanga mboeteisa), evocoi nungar ndoyuvirecoi chira Tūpa povrive iyavei Tahir Cristo povrive.

⁶ Ndapeyembopa ucai chira evocoi nungar ñehesa tecocuer ēgüe ehi tēi vahe upe. Esepia, evocoi nungar mbahe apo pipe sui ou Tūpa ñemoirosa ava seroyasarēhi upe.

⁷ Sese ndapeyemboyai chira evocoi nungar ava rese.

⁸ Peicua niha yipindar peico pītumimbisa nungar mbahe-mbahe tēi pipe. Cūrteite rumo peico tesapasa nungar pipe yande Yar rese. Sese peico tupriño ité Tūpa suindar poroesapasa pipe.

⁹ Esepia, poroesapasa pipe yande recose, yayapo opacatu mbahe tupri ava upe yande reco ivi tuprisave, mbahe supi tupri vahe pipe.

¹⁰ Sese peyembohe catu mbahe Tūpa piha rupindar apo āgua rese.

¹¹ Peypepepi ité opacatu pītumimbisa nungar ava rembiapo ai, ēgüe ehi tēi vahe sui. Iya peicua uca voira co nungar mbahe.

¹² Esepia, ahe sembiapo yemochīsa ñomipri tēi vireco yuvireco.

¹³ Acoi yamboyecua ucasa rumo evocoi nungar mbahe tesapasa nungar pipe, ahese oyecua tupri secocuer naporai vahe.

¹⁴ Esepia, co tesapasa omboyecua tupri opacatu mbahe recocuer yandeu. Sese aipo ehi: “Peymopoāse pe oque vahe nungar, peypepepi omano vahe nungar pāhu sui. Ahese niha Cristo pe recocuer resapera” ehi.

¹⁵ Sese pemahecua tupri pe recocuer rese. Peicoi rene ndayaracuai vahe nungar; peicora rumo pe yapisaca tuprisa pipe.

¹⁶ Peiporu catu ñepepepe ari yande Yar upe nara pe recoveseve. Esepia, cūrteite tecocuer co ivi pipe mbahe tēi.

¹⁷ Sese peico eme ndoyemboaracuai vahe; iya rumo peyembohe catu yande Yar remimbotar apo āgua.

¹⁸ Ndahei chira caguar tēi peico, evocoi mbahe ndoporopoisui mbahe tēi apo uca āgua. Peico catura rumo Espiritu Santo pe mbohesa pipe.

¹⁹ Peñehe catu Salmo pipe, opacatu Tūpa upendar sapucaisa pipe avei peyeupe; pesapuca, pemboetei avei opacatu pe piha pipe yande Yar.

²⁰ “Aviye” peyera opacatu mbahe rese yande Ru Tūpa upe yande Yar Jesucristo rer pipe yepi.

Omenda vahe cuaitarā mbiguai reseve

²¹ Peyemboyeroya catu ambuae rese Cristo mboeteisa pipe peico.

²² Cuña tomboyeroya omer, inungar yande Yar omboyeroya yuvireco.

²³ Esepia, imer güembireco cuai āgua secoi, ēgüe ehi avei niha Cristo viroyasar cuai āgua oico. Viroyasar Písirosar avei secoi, inungar güetecuer ité sereco.

²⁴ Evocoiyase inungar seroyasar omboyeroya Cristo yuvireco, cuña avei niha ēgüe ehira opacatu omer mboyeroya yuvireco.

²⁵ Iyavei cuimbahe osaisura güembireco, inungar Cristo osaisu opacatu viroyasar, omondo güecocuer chupe nara.

²⁶ Ēgüe ehi yande recocuer moatiro yande angaipa sui i pipe Tūpa Ñehengagüer reroyasave.

²⁷ Iyavei oyeupe yande rerecora yande reco catuprisa pipe iyavei yande reco quihaēhisa pipe ‘tipo eme que mbahe tēi secocuer rese’ oya, ‘toyuvirecoi cheu nara güeraño ité güeco tuprisave’ ohesa pipe.

²⁸ Ēgüe ehi aveira ava güembireco raisu inungar ahe oyeaisu. Acoi ava osaisu vahe güembireco, oyeaisu ité ahe ae.

²⁹ Supi eté, ndipoi eté que ava ndosaisui vahe güetecuer. Ahe rumo ocaruño ité oye-moviracua āgua, oñearo tupri avei. Ēgüe ehi avei Cristo opacatu viroyasar upe.

³⁰ Esepia, chupendar ité yaico setecuer nungar.

³¹ “Sese ava oseyara vu, osi güembireco rese güeco āgua; ñuvirío yuvirecoira ñepepepe ava nungar.”

³² Ahe ñehesa pipe oime mbahe oyecua ramo vahe aviye vahe ité. Ahe Cristo opacatu seroyasareta resevendar ñehesa.

³³ Ēgüe ehi eté ñepepepe pesaisu pe rembireco pe yeaisu nungar. Iyavei cuña tomboetei tupri omer yuvireco.

6

¹ Chīhivahe, pemboyeroya pe yesupa, pe si avei yande Yar raisu pipe. Esepia, ahe niha pe cuaita.

² Co porocuaita yipindar omombehu vahe porovasasa pisi āgua imboaviyesa pipe aipo ehi: “Pemboeteira pe ru, pe si avei.

³ Ēgüe peyese, pe rorivetera iyavei pe reco pāhumbucu catura co ivi pipe” ehi.

⁴ Iyavei pe iyepusa, pemoñemoiro ucai rene pe rahir. Iyacatu rumo pemboacua imboaracuasa tupri pipe, imbohesave avei yande Yar upe saisusa pipe.

⁵ Pe avei no mbiguai, pemboyeroya catura pe rerecuar co ivi pipe imboetisave. Ichui pe siquiyepave avei mbahe tupri pipe mbahe peyapora inungar-ra Jesucristo upe ité mbahe peyapo vaheřá viřa.

⁶⁻⁷ Pe poraviqui tupri catu chupe nara, ndahei chira rumo pe repiasęno imboviha ğua tęi; pe poraviquira rumo pe queręhisa pipe Cristo rembiguai pe recosa pipe opacatu pe rorivetesave yande Yar upe pe cuaita mboaviye tupri ğua.

⁸ Esepia, peicua Tępa omboepira opacatu yandeu yayapose mbahe aviye vahe mbiguai yaicose, anise que ndahei vahe mbiguai avei.

⁹ Iyavei pe serecuar, peico tupri aveira pe rembiguai upe pe recoasięhisa pipe. Peicua niha pe opacatu Tępa pe rerecuar ivave chini vahe povrive peicose. Ahe niha ndayande raisu yoaviratii yande rereco.

Ava Cristo rese yuvirecoi vahe yoepisa resendar

¹⁰ Sese peyemoviracua catu yande Yar rese, ipiratasa rese avei.

¹¹ Peřearo tupri catu Tępa piratasa pipe pe yemoviracua ğua Carugar pe mbopa tęięhi ğua.

¹² Esepia, yande ndahei ava itę amotaręhisave yayepihamoviracua. Yande rumo yayepihamoviracua espřitu naporai vahe ndoyecuai vahe upe iyavei co ivi pipendar Carugar ipirata vahe pitumimbisa pendar reroyaęhi ğua.

¹³ Sese peipisi catu opacatu mbahe Tępa ombou vahe pęu pe yoepi ğua. Evocoyase yepe oime tęira mbahe tęi pęu viřa, peyemoviracuařno itera rumo chupe.

¹⁴ Eęęe peye aveira peyemoviracua catu řehesa supi tupri vahe pipe. Iyavei peyoepira pe reco ivi tupriřa pipe.

¹⁵ Peyemoingatu voi Tępa řehengagęer řeroisa resendar mombehu ğua yepi.

¹⁶ Iyavei pereco catu Tępa rese pe yeroyasa peyese. Ahe inungar sundao yoepisa. Ipipe peyoepira carugar uhu tata resendar nungar pe ātoisa sui.

¹⁷ Poropisirosa inungar sundao āca ndiru, ipipe tapeyoepi; peiporu avei Tępa řehengagęer, ahe niha inungar quise pucu Espřitu vireco vahe.

¹⁸ Peyeroqui catu Espřitu piratasa pipe ari yacatu rupi Tępa upe opacatu yeruresa pipe. Pemahemoha catuřno itę pe yeruresa pipe. Peyeroquiřno itę avei opacatu ava Tępa reroyasar rese yepi.

¹⁹ Peyeroqui avei che rese. Evocoyase Tępa tombou che řehese ğua che siquiyęhisa pipe řehesa řepisirosa icuapi ramo vahe cua uca ğua ava eta upe.

²⁰ Tępa niha che cuai co řehesa mombehu ğua. Ichui tęi cęritei soquendapri aico. Peyeroqui catu che rese che siquiyęhisa pipe co řehesa mombehu ğua.

řehesa ipa vahe

²¹ Yande rivri Tiquico, yande rembiaisu, che pitivisar omboaviye vahe ocuaita yande Yar upe mboraviquisa rese, ahe omombehura opacatu che recocuer, mbahe che rembiapo avei pęu.

²² Sese amondo eipeve pęu ore recocuer mombehu ğua 'ipipe toyemongueręhi catu yuvireco' viya.

²³ Yande Ru Tępa iyavei yande Yar Jesucristo tomondo opacatu viroyasar upe teco catupri ğua, iporoaisu ğua, oyese yeroya ğua avei.

²⁴ Tępa tosovasa opacatu yande Yar Jesucristo raisupar saisusa řepei reseve vahe pipe. Aipo rupive.

PABLO REMBICUACHIA FILIPO PENDAR UPE FILIPENSES

Pablo mahenduhasa Jesús reroyasar Filipino pendar upe

¹ Che, Pablo, iyavei Timoteo oroico Jesucristo rembiguai. Aicuachía co che ñehe pëu, pe Tüpa upendar Jesucristo rese peico vahe tecua Filipino ve, Jesús reroyasar rãrosar uve, seroyasar rese ihañeco vahe upe avei.

² Yande Ru Tüpa, yande Yar Jesucristo tape rovasa pe reco tupri ägua.

Pablo yeruresa Jesús reroyasar rese

³ Pe rese che mahenduhasa pipe, “Aviye ndeu” ahe Tüpa upe yepi.

⁴ Iyavei che ayerurese, ari rupi ayeroqui opacatu pe rese Tüpa upe che viharetasa pipe yepi.

⁵ Esepia, oyoya yañepitivii Jesucristo resendar ñehesa icatupri vahe rese, acoi pe seroya ramo suive.

⁶ Che aicua co Tüpa omboipi mbahe aviye vahe güemimbotar apo pe rese, ahe omboaviye tupri itera acoi ari pipe oyevise yande Yar Jesucristo.

⁷ Aviye ité aipo rupi che pihañemoñeta areco opacatu pe rese. Esepia, che opoaisu ité. Opacatu niha oyoya yaipisi Tüpa porovasasa yepe co che roquendasave añ, anise que co coti rupi aico mborerecuar rovai co ñehesa písirosa resendar repi ägua iyavei amboyecua vaherã ahe ñehesa supi tupri vahe yuvireco chupe.

⁸ Tüpa oicua ité che opoaisu etepri opacatu. Esepia, Jesucristo niha pe raisu uca cheu.

⁹ Che aporandu vite Tüpa upe che yeruresa pipe: “Toicua tupri oaracuasa pipe oyeaisu catu-catu iri ägua yuvireco” ahe pëu.

¹⁰ Ipipe sui peicuara mbahe aviye catu vahe poravo ägua yepi; ëgüe peye aveira pe recocuer moatiro ägua peico. Evocoyase ndipoi chira angaipa pe rese acoi Jesucristo ouse curi.

¹¹ Perecora pe recocuer aviye vahe ité Jesucristo ombou vahe pëu Tüpa mboetei ägua.

Cristo Pablo recovesa ité secoi

¹² Che rivireta, aipota peicuara co mbahe tēi co oyapo vahe yuvireco cheu, ahe ichui setá catu ava osendura Jesucristo resendar ñehesa yuvireco.

¹³ Evocoyase opacatu mborerecuar guasu poraviquisa pendar iyavei opacatu ambuae ava oicuapa che roquendasas Jesucristo rupi che guata sui tēi yuvireco.

¹⁴ Iyavei setá etepri yande rivri che repiase soquendapri che recose yuvireco, oye-monguerēhi catu Tüpa Ñehengagüer mombehu ägua osiquiyeeñisa pipe. Yande Yar rese evocoyase oyeroyá catu yuvireco.

¹⁵ Supi eté oime ava oñehe angahu tēi vahe Jesucristo rese che reroñrosa pipe tēi. Oime rumo amove ava oñehe tupri Jesucristo rese opihañemoñeta tuprisa pipe.

¹⁶ Evocoi ava oñehe tupri oporoaisusa pipe, ahe oicua cohawe che roquendase yuvireco, “Co ñehesa Tüpa ñehe písirosa resendar, ahe supi eté vahe, ndahei temira tēi” ahese.

¹⁷ Evocoi ambuae ava Cristo rese oñehe angahu tēi vahe oyeupe nara tēi oipota mbahe. Ahe che reco momara pota catu co che roquendasave che rēi vitesese.

¹⁸ Mara etemo che areco aipo mbahe-mbahe tēi viña. Yepe amove ava ipihañemoñeta rai yuvireco viña, opacatu rumo ñehesa Cristo rese. Ahe niha che mboviha.

 Che mboviha catu aveira.

¹⁹ Esepia, che aicua co opacatu mbahe-mbahe tēi sui añepisirora pe yeruresa pipe iyavei che pítivira Jesucristo Espiritu.

²⁰ Che aipota ité, asãro avei opacatu che recocuer sui che chñēhi ägua añehe vaherã opacatu che siquiyeeñisa pipe. Evocoyase yepe amanora, anise aicovera, tomboetei catu ava Cristo che recocuer repiase yuvireco.

²¹ Esepia, Cristo che recovesa ité secoi; amanose rumo, aviyeño itera cheu.

²² Aicove vitesese co ivi pipe, aicatura aporaviqui tupri yande Yar recocuer rese. Evocoyase ndaicuai uma revo aviñera cheu.

²³ Ndaicatui co ñuvirio che pihañemoñetasas rereco: amove amano pota che so ägua ivave Cristo piri. Ahe aviye catura cheu viña.

²⁴ Pëu nara rumo aviye catu aicove vitesese co ivi pipe.

²⁵ Sese che aicua aicove vite vaherã pe pítivii vite ägua, pe guata tupri vite catu ägua iyavei pe viharete catu ägua pe Jesús reroyasa pipe.

²⁶ Evocoyase che rereco vitera peye pe piri. Ahese pe viharetasa pipe, “Imboeteipri Jesucristo tasecoi” aipo peyera che repiase.

²⁷ Co catu toyoya tupri pe recocuer co ñehesa aviye vahe Jesucristo resendar rese. Evocoiyase asose pe repia, anise amombri aicose pe sui, asendu pota pe resendar ñehesa aviye vahe, pe yemoviracuasa resendar, pe pihañemoñetasa yoyasa resendar iyavei pe poraviqui pĩratasa resendar pe poreroyasave co ñehesa poropisirosa resendar rese.

²⁸ Iyavei ndapeyembosiquiyei chira pe amotarẽhimbar sui. Evocoiyase ahe oicuara yuvireco chupe ité Tũpa omondora imocañi ãgua; pe rumo Tũpa pe pisĩrora curi.

²⁹ Supi eté ndahei Jesucristo recocuer reroya ãgua güeraño Tũpa oipota pẽu, sese pe yemobaraisu ãgua avei oipota.

³⁰ Esepia, pe, che avei oyoya tupri yaporaviqui pĩrata yande amotarẽhimbar pãhuve yaico. Iyavei acoi pesepia yipindar che aporaviqui pĩrata che amotarẽhimbar pãhuve vichico, iyavei cũritei peyandu mara ahe aporaviqui pĩrata vite ipãhuve yuvireco.

2

Cristo yemominisa, seco ivatesa resendar avei

¹ Iyavei Cristo pe monguerẽhi, pe mboviha oporoaisusa pipe oico, Espĩritu avei secoi pe rese. Peyeaisu tupri iyavei pe yeaisusa pipe peñepitivii.

² Sese che mboviha catu peye: perecora pihañemoñetasa ñepeí reseve, oyoya guasu avei peyeaisura, oyoya aveira pe pihañemoñetasa, ñepeí reseve mbahe pe remimbotar rese avei.

³ Ndapeyapoi chira mbahe peyeupe güeraño tẽi. Ndapeyapoi chiaveira mbahe pe yemboivate aisave. Iyacatu rumo pe reco yemominisa pipe ambuae aviye catu perecora peyesui.

⁴ Pesecai rene mbahe aviye vahe peyeupe nara güeraño; iyacatu rumo peseca avei mbahe aviye vahe ambuae ava reco tupri ãgua.

⁵ Inungar Cristo pihañemoñeta, ãgũe peye tupri aveira.

⁶ Yepe ahe Tũpa recocuer vireco, “Taseya eme Tũpa recocuer areco vahe ivive che so ãgua” ndehi.

⁷ Opa ité rumo oseya, oyemboava inungar mbiguai tẽi ou.

⁸ ãgũe ehi oyemomini.

Vu porocuaíta reroyasa pipe ou iyavei omano poromochisa pipe curusu rese.

⁹ Sese Tũpa omboivate catu, omondo avei sererguã ivate catu vahe opacatu ambuae rer sui.

¹⁰ Evocoiyase ahe terer ivate catu vahe renduse ‘toñenopihã opacatu iva pendar, ivi pĩpendar, opacatu omano vahecuer avei yuvireco’ oya.

¹¹ Ichui toicua opacatu, “Jesucristo ité yande Yar” tehi yande Ru Tũpa mboetei ãgua yuvireco.

Jesús reroyasar tesapesa nungar yuvirecoi co ivi pipe

¹² Evocoiyase che rembiaisu, yepe che amombri aico pe sui viña, iya rumo pe che reroya vite ité peye inungar aicose pe pãhuve cuese. Che aipota peicora pisirosa pipeño ité Tũpa mboeteisave ichui pe siquiyesa pipe.

¹³ Esepia, Tũpa ombou pe querẽhisa semimbotar apo ãgua. Güemimbotar rupi avei ombou pĩratasa imboaviye ãgua pẽu.

¹⁴ Peyapo opacatu mbahe pe ñehe-ñehe tẽiẽhisa pipe, pe yepoepi-epiẽhisa pipe avei.

¹⁵ Sese tipo eme mbahe pe rembiavi que pe reco raisa pe rese. Evocoiyase peicora Tũpa rahir ndayangaipai vahe ava mbahe-mbahe tẽi oyapo vahe pãhuve. Ahe ipãhuve pe recocuer osesapera, inungar tataendi osesape pĩtumimbisave.

¹⁶ Pemombehuse ñehesa tecovesa resendar yuvireco chupe, acoi ouse Cristo curi, aviharetera pe rese. Esepia, pe rese che poraviquisa ãgũe ndehi tẽi vaheřã.

¹⁷⁻¹⁸ Jesucristo recocuer rese pe yeroyasa, ahe inungar mbahe seropovẽhepri Tũpa upe. Aviyeteramo ichui tẽi che yucara yuvireco. Ahe omboaviye tupri itera pe porerocosa Tũpa upe. Yepe che yucara yuvireco viña, che rumo ayembovihañora opacatu pe rese. Pe avei, pevihañora che rese.

Pablo oicuachĩa Timoteo, Epafrodito recocuer resendar

¹⁹ Che ayeroya yande Yar Jesús rese amondo pihai vi vaheřã Timoteo pe repia. Ahe omboyevisẽ ñehesa pe recocuer resendar, ahese che aviharetera.

²⁰ Iyavei ndipoi eté ambuae ava Timoteo nungar che pihañemoñetasa rupi tupri imahenduha vahe pe rese pe reco tupri ãgua.

²¹ Esepia, opacatu oseca güemimbotar tẽi apo ãgua, ndosecai eté Jesucristo remimbotar yuvireco.

²² Pe niha peicua Timoteo reco tuprisa opacatu upe. Iyavei che pĩtivii Tũpa Ñehengagũer mombehu ãgua, inungar chĩhivahe oipĩtivii oyesupa, ãgũe ehi che pĩtivii oico.

²³ Sese che aipota imondo ãgua pe repia acoi aicuase mara ehira che rereco yuvireco.

²⁴ Che rumo ayeroya yande Yar rese aso p̄ihaivi vaheṛā che teieté pe repia.

²⁵ Iyavei revo aviye catu co yande rivri Epafrodito amboyevira pe piri ahe pembou vahe che p̄itiviĩ āgua mbahe cheu ipane vahe rese. Ahe che nduḡier oporaviqui p̄irata vahe Tūpa upe.

²⁶ Esepia, ahe pe repia pota ité opacatu. Iyavei ahe ehiño oico p̄ēu peicuase imbaheasi.

²⁷ Supi eté imbaheasi oico, seni eté omano viña. Ipare rumo Tūpa oiparaisuereco, ndahei ahe güeraño oipitiviĩ, che avei che paraisuereco co viharēhisa yeapi-apiñoēhi āgua cheu.

²⁸ Sese che amondo pota poyava ité pe piri sese pe yemboviha iri āgua, che mboviha iri āgua avei.

²⁹ Peipisi tupri p̄ēu iyepotase pe viharetesa pipe. Esepia, ahe yande rivri yande Yar rese secoi vahe ité. Pesaisu itera evocoi nungar ava yepi.

³⁰ Yande Yar rese oporaviquise che piri seni omano. Ahe niha oyemondo ité mbahe-mbahe tēi porara āgua che p̄itiviĩ pipe. Esepia, pe ité ndapeicatu che p̄itiviĩ peye.

3

Oicoete ai vahe ité

¹ Iyavei, che rivireta, peyembovihaño yande Yar rese peicose. Ndachecuerai eté ñehesa aicuachía vahecuer cuachía iri āgua p̄ēu. Iyavei aviye catu ité p̄ēu nara.

² Peñearo acoi ava cave nungar tēi sui, oyapo vahe mbahe tēi iyavei gütecuer omomara tēi vahe.

³ Yande rumo imbocircuncidapri nungar supi eté vahe Tūpa mboyeroyasar yaico. Esepia, yayerure Espiritu pipe Tūpa upe; yayemboviha avei Jesucristo reroyasar yande recosa rese. Ndahei yande retecuer rese tēi yayeroya,

⁴ yepe che supi eté ayeroya catura ambuae ava sui evocoi nungar mbahe rese viña.

⁵ Esepia, che imbocircuncidapri aico ocho arí pipe che hare, israelita, Benjamín suindar aico. Iyavei che hebreo, hebreo rahir avei aico no. Che yipindar fariseo recocuer areco. Evocoiyase ayembohe tupri fariseo aracuasa judío porocuita resendar rese vichico.

⁶ Ipipe sui tēi eté aseca-seca catu ayapo vaheṛā mbahe opacatu ava Jesucristo reroyasar upe vichico. Co porocuita reoyasa rese rumo ndipoi eté ava “mara” ehi vahe yuvireco cheu.

⁷ Opacatu co mbahe aviye ité cheu aracaco viña. Cūritei rumo Jesucristo rese aicose, ēgüe ehi tēi vahe nungar areco.

⁸ Iyavei opacatu que ambuae mbahe aviyera cheu viña, areco rumo inungar iti che Yar Jesucristo recocuer cuasa pipe. Opacatu ahe mbahe aseya Cristo rese che reco āgua. Supi eté Cristo rereco āgua areco opacatu ambuae mbahe iti nungar tēi

⁹ ‘taico sese’ che yapave. Ndahei porocuita mboaviyasa rese tēi aseca che reco catupri āgua, che rumo aseca Jesucristo rese che yeroyasa pipe sui ēgüe ahe vaheṛā. ēgüe ehi eté Tūpa che pisi seco catupri vahe nungar Cristo rese che yeroyasa pipe.

¹⁰ Che aipota ité Cristo cua tupri catu āgua. Iyavei areco pota p̄iratasa icuerayevi aḡier resendar cheyese. Iyavei aipisi pota iparaisu aḡier. Iyavei inungar ahe omano, ēgüe ahe pota avei.

¹¹ ēgüe tahe avei che cuerayevi āgua omano vahe p̄āhu sui, ahe co che asāro vichico.

Pablo osupiti pota ité güeco maranehi āgua

¹² ‘Asupiti ité opacatu co mbahe’ ndahei eté. Iyavei, “Ndaseco marai vahe ité aico” ndahei vitei chietera. Che rumo aseca vite ahe tecocuer che recorā. Esepia, Jesucristo che pisi ité oyeupe nara.

¹³ Che rivireta, “Che ae tēi co tecocuer ih̄ivi vahe opa ité ayapo vichico” ndahei chira p̄ēu. Co rumo mbahe che ayapo, ayemboesarai opacatu che reco aḡier sui. Iyavei opacatu che recovesa rese aguata tenondeño ité.

¹⁴ Esepia, Tūpa che renoi ivave che so āgua aipisi vaheṛā iporrecosa iva pendar Jesucristo rese che recose. Ahe niha aipota catu ité cheyeupe nara.

¹⁵ Aipo rupi iya yande p̄ihañemoñetara opacatu yande yaracua tupri vahe. Que revo yande p̄ihañemoñetase que ambuae mbahe rese tēi, ahe Tūpa oicua ucara yandeu.

¹⁶ Co rese rumo yaicora yande yembohesa yareco vahe rupi tupriño ité.

¹⁷ Che rivireta, peico che nungar iyavei pemahecua tupri ava ore recocuer moñasar rese.

¹⁸ Iyavei amombehu setá yupaḡier p̄ēu, cūritei amboyevi iri che yasehosa pipe imombehu p̄ēu. Setá ité oime ava co ñehesa Cristo mano aḡier curusu resendar amotarēhimbar.

¹⁹ Ahe rumo imocañipirā yuvirecoira curi. Oyemonguerēhi opacatu mbahe tēi apo āgua rese yuvireco yepi. Ahe niha otūpa nungar ité vireco. Iyavei güeco ivate aisa pipe oyapo

mbahe tēi yande mochi ai vahe yuvireco. Co ivi pīpendar mbahe-mbahe tēi reseño ité ipihañemoñeta yuvireco.

²⁰ Yande rumo ivave nara ité yaico. Iyavei yasāro ité yaico iva sui ou vaheṛā yande Pīsīrosar, ahe yande Yar Jesucristo.

²¹ Ahe opīratasa pipe virecora opacatu mbahe opovrive. Ahe opīratasa pipe avei ose-cuñaropara yande retecuer ēgüe ehi tēi vahe, ahe se inungar ahe setecuer sendi yai, nimarai vahe, ēgüe yahe aveira yande yaico.

4

Yayemboviha yande Yar rese yepi

¹ Sese che rivireta, che rembiaisu, peyemoviracuara yande Yar rese yepi. Che niha opoepia pota ité. Pe inungar porerecosa imbouprī peico cheu. Esepia, che vihasa ité peico.

² Ambuae mbahe, Evodia iyavei Síntique toyuvirecoi oyecupihir nungar ité yande Yar reroyasa pipe yuvireco.

³ Nde niha che pītivii tupri vahecuer che poraviquisa rese eve. Eipītivii evocoi cuña. Esepia, ahe niha oyembopihavīracua ité che pītiviise Tūpa Ñehengagüer pīsīrosa resendar mombehu āgua yuvireco cuese. Oyoya Clemente rese iyavei ambuae oporaviqui vahe rese che rupi yuvireco. Ahe serer opa icuachiapri yuvireco Tūpa cuachiar tecovesa apirēhi vahe resendar pipe.

⁴ Peyemboviharete ari yacatu rupi yande Yar rese yepi, “¡Peyembovihaño ité!” ahe aipo pēu.

⁵ Pemboyecua catu opacatu ava upe pe reco mbegüesa. Esepia, cōimi yande Yar yevi iri āgua yandeu.

⁶ “¿Mara ahera pīha vichico?” ndapeyei chira que mbahe rese. Iyacatu rumo peyerurera opacatu evocoi nungar mbahe rese Tūpa uve, peporandura evocoi mbahe rese iyavei, “Aviye ndeu” peyera chupe.

⁷ Evocoiyase Tūpa omondora güeco tuprisa pēu, pe Jesucristo rese peico vahe. Co teco tuprisa niha aviye catu ité opacatu ava pihañemoñetasa sui. Ipīpe sui Tūpa osārora pe pīha, pe pihañemoñetasa avei pēu.

Yandepihañemoñetara opacatu mbahe aviye vahe rese

⁸ Co ipa, che rivireta: yande pihañemoñetara opacatu mbahe supi tupri vahe rese, porom-boetei āgua rese, mbahe ihivi vahe rese, mbahe maranehi rese, mbahe yande mboviha vahe rese, opacatu mbahe aviye vahe icuapri vahe rese. Iyavei yande pihañemoñetara que ambuae mbahe aviye vahe rese, imboeteipri vahe rese avei.

⁹ Iyavei peyapo ité acoi mbahe che opombohe vahecuer, pesendu vahe che aipo ahe se, che repia vahecuer yapose peye. Evocoiyase Tūpa güeco tuprisa reseve secoira pe rese.

Filipo pendar porerecosa Pablo upe

¹⁰ Aviharete yande Yar rese. Esepia, pemahenduha irimi che rese pe porerecosa mbou āgua cheu. “Sesarai yuvireco che sui” ndahei chira pēu. Pe rumo yīpīndar ndapeicatui eté che pītivii āgua peye.

¹¹ “Ipane mbahe cheu” ndahei chira pēu. Esepia, ayembohe che viharete āgua mbahe che rembiereco rese.

¹² Aicua mara yahe yande paraisusa pipe yaico, aicua avei mara yahe mbahe rereco ati āgua. Ayembohe avei che viha āgua opacatu mbahe oimese cheu, que chehitarose, ndache riepoise, que oimese sumbire vahe mbahe cheu, que mbahe ipanese cheu.

¹³ Aicatu opacatu mbahe uve che yemoviracua āgua. Esepia, Cristo ombou che pīrata āgua.

¹⁴ Pe rumo peyapo mbahe aviye vahe cheu che pītivii eteprisave peye mbahe-mbahe tēi oimese cheu.

¹⁵ Iyavei pe Filipo pendar peicua avei acoi yīpīndar peipisise pīsīrosa resendar Tūpa Ñehengagüer acoi che sose Macedonia sui, ndipoi eté Jesús reroyasar ambuae tecua pendar iporeco vahe yuvireco che rese. Pe güeraño pembou pe porerecosa, “Aviye” pe hesa pipe che pītivii āgua.

¹⁶ Iyavei aicose Tesalónica ve, pembou pe porerecosa cheu ñuvirío yupagüer che pītivii āgua.

¹⁷ Ndachepihañemoñetai mbahe arocuafío tēi vaheṛā pe sui. Che rumo aipota Tūpa omboyevira pēu co pe porerecosa pembou vahe cheu.

¹⁸ Che opa aipisi pe porerecosa Epafrodito upe pembou vahe. Evocoiyase oimeño ité iyavei sumbire vite cheu. Ahe pembou vahe cheu aviye ité, inungar itaisi siacua vahe, iyavei inungar mbahe seropovēhepri aviye vahe Tūpa upe.

¹⁹ Evocoiyase yande Ru Tūpa, ombahe eta porañete vahe sui omondora opacatu mbahe ipane vahe pēu Jesucristo rese oime vahe.

²⁰ ¡Ēgüe tehi timboeteisa yande Ru Tūpa! ¡Ahe apirēhi vahe secoi yepi!

Ñehesa ipa vahe

²¹ Aviye, pemombehu che mahenduhasa opacatu Tūpa reroyasar Jesucristo rese yuvirecoi vahe upe eipeve. Iyavei opacatu Jesús reroyasar yuvirecoi vahe che rese, ahe avei omondo omahenduhasa yuvireco pēu.

²² Iyavei opacatu ambuae yuvirecoi vahe cohava Jesús reroyasar iyavei acoi mborerencuar guasu rētave yuvirecoi vahe, ahe ité avei omondo omahenduhasa yuvireco pēu.

²³ Yande Yar Jesucristo tape rovasa opacatu. Aipo rupive.

PABLO REMBICUACHIA COLOSA PENDAR UPE COLOSENSES

Pablo mahenduhasa Jesús reroyasar Colosa pendar upe

¹ Che, Pablo, Jesucristo apóstol aico Tüpa remimbotar rupi yande rivri Timoteo reseve.
² Co aicuachia pëu, pe Cristo rese peico tupri vahe Colosa ve, Tüpa upendar peico vahe. Yande Ru Tüpa tape rovasa, tombou pe reco tupri água pëu.

Pablo yeruresa Jesús reroyasar rese

³ Ari yacatu ore yeroqui pipe, “Aviye ndeu” orohe yande Yar Jesucristo Ru Tüpa upe pe rese.

⁴⁻⁵ Esepia, oroyandu acoi oyepota ramose Tüpa ñehe supi eté vahe, aviye vahe písirosa resendar pëu, peyapisaca tupri sese. Ipipe sui peyeroya ivave pe reique água Tüpa porerrecosa písí água. Ahe ichui peyeroya tupri Jesucristo rese iyavei pesaisu opacatu ambuae Tüpa rembiporavo yepi.

⁶ Co ñehesa imombehusa avei opacatu ivi rupi, setá ava oipisi tupri avei yuvireco. Inungar acoi pesenduse yipindar Tüpa porovasasa resendar ñehesa, ipipe sui peicua tupri catu ahe porovasasa supi eté vahe.

⁷ Co ñehesa yande rembiaisu yande mboetasa Epafras pe mbohe. Ahe mbia yande Yar Jesucristo rese oporaviqui vahe ore rupi, ocuaita viroya tupri vahe pe pãhuvé.

⁸ Ahe omombehu oreu Espiritu pipe pe ore raisusa resendar.

⁹ Sese avei ore aipo nungar rendu ramoseve ndoroyeroquipai pe rese. Oroyeroqui, oroporandu pe rese ‘toicua tupri opacatu Tüpa remimbotar ombahecuasa Espiritu suindar pipe, senducua tupri pipe avei yuvireco’ ore yapave pëu.

¹⁰ Ipipe sui tapeguata tupri yande Yar rupi seroyasar tupri pe recosa pipe. Tapemboaviye tupri opacatu semimbotar; mbahe pe rembiapo tupri pereco catu sovaque. Ipipe sui avei tapeicua tupri catu Tüpa recouer peico.

¹¹ Iyavei tombou catu pe momirata água güecocuer pïratasa pipe sui. Evocoiyase oimese que mbahe tēi pëu, peñemosañora pe reco mbegüesa pipe.

¹² “Aviye ndeu” peyera pe viharetesa pipe yande Ru Tüpa uve. Esepia, ahe omoingatu pe recouer peipisi água iporerrecosa oime vahe rä opacatu sembiporavo upe acoi yuvirecoi vahe Tüpa poroesapesa pipe.

¹³ Ahe niha yande písiro Carugar povri sui. Ēgüe ehi yande reraso Guahir güembiaisu povrive.

¹⁴ Ahe Tahir yande písiro iyavei yande angaipa rese iñero yandeu.

Jesús omano curusu rese Tüpa upe opacatu mbahe moingatu água

¹⁵ Jesucristo niha omboyecua uca Vu recouer ndoyecuai vahe güecocuer pipe. Ahe avei niha yipisuive ivate catu vahe opacatu mbahe yapopri sui.

¹⁶ Esepia, Tüpa niha opacatu mbahe oyapo uca Guahir upe aracahe: ivive, ivave avei; oyecua vahe, ndoyecuai vahe avei no. Ipipe sui avei yapopri opacatu iva pendar mborerecuar, mborerecuar guasu iyavei mborerecuar ivate catu vahe. Ēgüe ehi ipipe sui opacatu mbahe yapopri, chupe nara avei.

¹⁷ Ahe oicove yipisuive aracahe opacatu mbahe reimeēhi viteseve. Ahe avei omoime vite opacatu mbahe yandeu.

¹⁸ Iyavei ahe niha yande rerecuar tenonde secoi yandeu opacatu seroyasar yaico vahe. Esepia, ahe rane yipindar vahe iyavei ahe rane avei ocuerayevi. Evocoiyase ahe ivate catu vahe opacatu sui.

¹⁹ Esepia, Tu oipota opacatu güecocuer reseve secoi água sese yepi.

²⁰ Iyavei ‘che Rahir recouer pipe sui taroyevi iri opacatu mbahe cheyuepe ivi pipendar, iva pendar avei’ oya. Ēgüe ehi Jesús oipiyere vuvri curusu rese Tüpa upe opacatu mbahe moingatu água.

²¹ Yipindar pe pihañemoñeta raisa pipe sui tēi amombri Tüpa sui peico yamotarēhisa pipe mbahe pe rembiapo ai rese.

²² Cüritei rumo Tüpa iñero pëu pe reroeyevi oyeupe Cristo mano pipe. Ahe niha ēgüe ehi Vu rovai ipehapri pe rereco oyeupe nara, pe reco maranehi água mbahe aviēhisa pipe ava rovaque.

²³ Ēgüe peye água rumo peyemoviracuaño itera Cristo rese pe yeroyasa pipe yepi. Ndapeyepipi chiaveira mbahe oime vahe rä rese pe yeroyasa sui pesendu vahe co ñehesa

ñepisirosa resendar pipe. Ahe imombehusa opacatu ivi rupi. Che niha Pablo, icuaipri, aico co ñehesa mombehu água.

Pablo icuaita Jesús reroyasar rese hañeco água

²⁴ Cûritei aviha pe rese che yemomborasa pipe. Êgüe ahe iporara che rete rese cohawe vichico. Êgüe ehi avei Cristo oyemomborara vite viroyasar rese. Esepia, yande seroyasar setecuer nungar yaico.

²⁵ Jesús reroyasar pîtivii água niha Tûpa che cuai. Sese amombehu opacatu iñhengagüer pëu pe reco tupri água rese.

²⁶ Ahe ñehesa aracahe suive ndicuasai vahe ité. Cûritei rumo Tûpa omboyecua viroyasar upe.

²⁷ Chupe ité omboyecua pota co ñehesa porañete vahe omboyecua ramo vahe ava ndahei vahe judío upe. Co ndicuasai vahe, ahe Cristo pe rese secoi vahe. Co yande remiaro yareco vaherã teco ori porañete vahe curi.

²⁸ Ore niha Cristo recocuer oromombehu opacatu ava upe. Orombohe avei ava yaracua tupri água ore aracuasa pipe ‘toyuvirecoi tupri ité Cristo rese Tûpa rovai’ ore hesa pipe.

²⁹ Co rese niha che aporaviqui etepri opacatu Cristo pîratasa pipe.

2

¹ Che aipota peicua che yemboaquisa pe recocuer rese, Laodicea pendar recocuer rese, setá ambuae ava che cuaparêhi recocuer rese avei

² ‘toyemonguerêhi catu, toyemboyoya guasu oyeaisusa pipe yuvireco’ viya. Iyavei ‘senducua tuprisa pipe toyuvirecoi mbahe tupri pipe’ viya opacatu pëu. Esepia, ichui avei peicua tuprira co mbahe imboyecuapi ramo, ahe niha Cristo.

³ Ahe vireco opacatu mbahe yandé mboaracua água, mbahe renducua tupri água avei.

⁴ Aipo mbahe amombehu pëu ava oñehe tupri aisa pipe tēi pe mbopaêhi água.

⁵ Iyavei yepe amombri aico pe sui viña, pe rese chemahenduha pipe rumo aicoveño pe reseve yepi. Aicua peguata tupri aise pe reco ñvisa pipe, ndapeyepipiise co coti rupi Jesucristo reroyasa sui. Sese che mbovihareteño ité peye.

Jesús suindar tecocuer piasu

⁶ Evocoyase inungar acoi peipisi Jesucristo pe Yarã, êgüe peye aveira peico sese ari yacatu rupi

⁷ pe yemoviracuasa pipe. Pe yembohesa rese peyemomirata catura Cristo rese pe yeroyasa pipe. Iyavei, “Aviye ndeu” peye itera Tûpa upe ari yacatu yepi.

⁸ Peicua catu, yemboyapa ucai rene aracahendar tēi ava aracuasa pipe. Esepia, ahe êgüe ehi tēi vahe, ava suindar tēi yembohesa, ivi pipendar ava seco ivate catu vahe pihañemoñetasa tēi. Ndahei Cristo suindar porombohesa.

⁹ Esepia, Cristo vireco opacatu Vu Tûpa reco oyese.

¹⁰ Evocoyase pe pereco Tûpa reco rese peicose. Ahe opacatu mborerecuar ivi pipendar iyavei íva pendar rerecuar secoi.

¹¹ Iyavei sese peicose, ahese inungar imbocircuncidapri peico. Ndahei rumo pe rete rese iyavei ndahei ava rembiapo tēi. Co rumo Cristo oyapo vahe pe recocuer rese. Esepia, ahe virocua pe recocuerai pe sui.

¹² Pe ãpiramosa pipe ndoyavii pe recocuerai ñotimbrí Cristo reseve. Êgüe ehi avei ndoyavii pe recocuer ocuerayevi vahe seseve avei, peyeroyase Tûpa pîratasa rese. Ahe niha mbogüerayevi vahe Guahír omano vahe pãhu sui.

¹³ Pe niha acoi cuese omano vahe nungar peico Tûpa upe pe angaipa pipe, pe ndahei vahe judío peico vahe. Ahe rumo pe recocuer mbogüerayevi Guahír reseve iyavei iñero pe angaipa rese pëu.

¹⁴ Ahe yande cañi rãgüer rumo opa omboepi. Esepia, yande iporocuita pipe yaico imboaviye água viña, evocoyase imocañipri tēi yaico ipovrive viña; ombou rumo Guahír curusu rese yatica água yande cañi rãgüer sui yande renose água.

¹⁵ Êgüe ehi ahe omano pipe curusu rese caruguar, ipovri pendar mborerecuareta reseve secopi. Êgüe ehi seco reroyí, inungar vavasa pendar ipisipri serasosa opacatu ava rembiepiave.

Peseca íva pendar mbahe pe recocuer upe nara

¹⁶ Evocoyase toñehe-ñehe tēi eme que ava pe rembiyu rese yuvireco, pe igua rese avei; anise que ndapemboeteise judío pieta, que ari, yasi osē ramomi vahe, anise que judío ari mbituhusa avei no.

¹⁷ Esepia, opacatu co mbahe, ahe yipindar vahe, “Êgüe ehira Cristo ou” hesa tēi yandeu. Co rumo Cristo ité cute.

¹⁸ Peyapisacai rene acoi ava “ndapeipisii chira porerecosa iva pendar ndaperoyaise ore ñehe” ehi tēi vahe rese pēu. Acoi ava “Tūpa rembiguai pemboeteira” ehi tēi vahe yuvireco. Ahe avei, “Che seco mbegüe vahe aico” ehi angahu tēi. Iyavei, “Che asepia che quer nungar pipe iva pendar mbahe” ehi tēi. Esepia, ahe oyemboivate ai oaracua rai tēisa pipe yuvireco.

¹⁹ Evocoi rumo ndoyuvirecoi yande cuaisar Cristo rese yuvireco. Ahe omoviracua vahe opacatu viroyasar yepi. Evocoiyase ahe omboyemboya tupri oyese, ñepe i vahe nungar vireco oyeupe Vu Tūpa remimbotar rupi.

²⁰ Pe omano vahe nungar peico Cristo rese. Evocoiyase ndahe iri co ivi pipendar pihañemoñetasavrive peico. ¿Mahera evocoiyase peroya vite co ivi pipendar porocuaita ñgüe ehi tēi vahe,

²¹ inungar “pepocoi rene co mbahe rese, pehui rene evocoi nungar mbahe” ehi tēi vahe?

²² Opacatu co nungar porocuaita ocañi tēi vahe. Esepia, ahe ava remimbotar tēi yembohesa, iporocuaita tēi avei.

²³ Co mbahe aviye angahu aracuasa supi eté vahe. Esepia, seroyasar ahe ehiño oyeruresa uve, oyeecomomini tēi iyavei omombaraisu güetecuer yuvireco viña. Ahe aracuasa rumo ñgüe ehi tēi vahe. Esepia, ndayande pítivii eté yande yepipi ñgua yande remimbotarai sui.

3

¹ Cūrítei rumo ocuerayevi vahe peico Cristo rese. Sese peseca catu co mbahe aviye vahe iva pendar. Aheve ivave Cristo oguapi oĩ güeco mborerecuasa pipe Vu acato coti.

² Pehañemoñeta mbahe iva pendar rese, ndahei chira ivi pipendar mbahe rese tēi.

³ Esepia, cūrítei omano vahe nungar peico pe recocuerai upe. Iyavei Cristo reseve peico Tūpa piri, inungar-ra ivave viña.

⁴ Cristo niha yande recovesa ité secoi. Sese ahe oyevi irise curi, ñgüe peye aveira perecora ipiri seco ori porañetesa.

Yande recocuer yipindar iyavei yande recocuer piasu

⁵ Evocoiyase pepoi opacatu co mbahe naporai vahe co ivi pipendar tēi pe rese oime vahe sui: ndapeyemboaguasai chira, ndapeyapoi chira mbahe tēi pe recocuer pipe, ndapeipota rai chira pihañemoñeta raisa, ndapeipota rai chiaveira ambuae ava mbahe (esepia, ahe niha oyoya mbahe rahanga tēi mboeteisa rese).

⁶ Acoi oyapo vahe co nungar mbahe, ahe Tūpa ñemoirosa oipisira seroyañhisa pipe yuvireco.

⁷ Ñgüe peye avei yipindar pe recocuerai pipe peico.

⁸ Cūrítei rumo peseya opacatu co mbahe-mbahe tēi: pe ñemoirosa, pe poroyucái aisa, pe reco raisa, pe ñehe mara-mara tēisa iyavei pe ñehesa ndayamombehui vahe.

⁹ Ndaperemirai chira peyese. Esepia, pepoi yipindar pe reco ai sui iyavei pe rembiapo ai sui.

¹⁰ Iyavei peipisi tecocuer piasu, aviye vahe. Ipipe peyembohe ari yacatu yande Aposar Tūpa recocuer rese peico, icua tupri catu ñgua.

¹¹ Ndahe iri ivate yandeu “che griego aico” ehi vahe; que “che judío aico” ehi vahe. Iyavei “imbocircuncidapri aico”, “nimbocircuncidapri aico” ehi vahe avei. Iyavei que “ahe ambuae tecua pendar secoi”, “ahe chori”, “ahe ava rembiguai tēi secoi” ehi vahe. Anise que “che ndahei ava rembiguai aico” ehi vahe. Co rumo ivate vahe yandeu: Cristo ivate catu vahe opacatu sui. Iyavei oyoya guasu opacatu yande piha pipe yareco.

¹² Esepia, Tūpa pe raisu etepri iyavei pe poravo ‘toyuvirecoi cheu nara’ oya. Evocoiyase peyapora co nungar mbahe: peporoaisura, peavara peyeupe, peñemominira, pe reco mbegüera iyavei peñemosañora.

¹³ Ñgüe peyera peñemosañora oyeupe, peñero aveira opacatu oyeupe acoi pe pāhu pendar oñemoirosa pēu. Inungar Cristo ñerosa ombou yandeu, pe avei ñgüe peyera ambuae ava upe.

¹⁴ Iyavei peyeraisu catura. Esepia, ahe yande mboyemboya tupri oyese yepi.

¹⁵ Acoi teco tuprisa Cristo ombou vahe pēu, tape mbohe pe pihañemoñeta tupri ñgua. Esepia, co rese Tūpa pe renoi ñepe i vahe nungar pe reco ñgua. Iyavei, “Aviye ndeu” peyera chupe.

¹⁶ Topita tupri Cristo ñhengagüer pe piha pipe. Pe aracuasa tuprisave peyembohe tupri, peyemonguerēhi catu sapucaisa Tūpa resendar rese. Pesapucaí opacatu sapucaisa Tūpa upendar pe pihá pipe, “Aviye ndeu” pe hesave yepi.

¹⁷ Iyavei opacatu que mbahe peyapo vahe, que peñehe vahe avei peyapo yande Yar Jesús rer pipe. Jesús rer pipe avei, “Aviye ndeu” peyera Tūpa upe yepi.

Jesús reroyasar cuaita resendar

¹⁸ Iyavei pe no cuña omenda vahe: pemboyeroyara pe mer. Ahe niha pe cuaita pe yande Yar rese peico vahe.

¹⁹ Pe avei no imer: pesaisu pe rembireco. Perecoi rene pihavíracuasa pipe.

²⁰ Pe avei no chíhivahe: peroya aveira pe yesupa. Esepia, ahe yande Yar oipota.

²¹ Pe avei no tu: pemoñemoiro ucai rene pe rahir peyeupe. Esepia, aviyeteramo niquerēhi iri chira ocuaise pēu.

²² Pe avei no mbuguai: peroya tupri avei pe rerecuar co ivi pipe yepi. Aní chira ahe pe repiaseño pembovihara. Iyacatu rumo pemboyeroyara pe pihañemoñeta tuprisa pipe, Tūpa sui pe siquiyesa pipe avei.

²³ Opacatu mbahe peyapo vahe, peyapo pe querēhisave yande Yar mboviha āgua. Ndahei chira ava mboviha āgua tēi.

²⁴ Esepia, peicua tupri co: yande Yar omboura oporerecosa yandeundar. Esepia niha, Cristo upe nara ité mbahe peyapo. Ahe niha pe Yar supi tupri vahe.

²⁵ Acoi ava oyapo vahe mbahe naporai vahe, oipisi aveira gümbiapo ai repri. Tūpa niha nomboyoaviratí yande raisu.

4

¹ Pe avei serecuar: peyapo mbahe ihívi vahe pe pihañemoñeta tuprisa pipe pe rembuguai upe. Peyemomahenduha co rese: pe avei pereco pe rerecuar ivave.

² Iyavei no opacatu peyeroqui catu ari rupi pe mahemohasa pipe. “Aviye ndeu” peye Tūpa upe.

³ Peyeroqui avei ore rese. Tore pítivii Tūpa oñehengagüer mombehu vite āgua. Torofehe vite avei co ñehesa Cristo resendar Tūpa omboyecua ramo vahe rese yandeu. Sese tēi niha co che roquendasas.

⁴ Evocoiyase peyeroqui che rese, tamombehu tupri catu co ñehesa opacatu upe senducua tupri catu āgua. Ēgüe tahe che cuaita mboaviye.

⁵ Peico tupri pe aracuasa pipe ava ndahei vahe Cristo reroyasar rovaque. Peyapo tupri mbahe co tecocuer aviye viteseva.

⁶ Pe reco aviye tuprisa pipe peñehera yepi. Iyavei peicua tuprira ñehesa mboyevi āgua ñepeipei ava uve.

Ñehesa ipa vahe

⁷ Co yande rivri, yande rembiaisu, Tíquico, che pítivii tuprisar, ahe oporavíqui tupri yande Yar recocuer rese che rupi. Ahe omombehura che recocuer resendar pēu.

⁸ Sese co amondo pēu ore recocuer cua tupri āgua, pe monguerēhi catu āgua avei.

⁹ Co Onésimo avei osora supi. Ahe avei yande rembiaisu, yande rivri seco tupri vahe pe recua pendar. Ahe ñuvirío mbia omombehura pēu opacatu mbahe oime vahe cohava.

¹⁰ Aristarco, che ndugüer che roquendasave, omondo omahenduhasa pēu iyavei Marcos, Bernabé rihir. Pe revo peicuaño Marcos so āgua eipeve; osose pe piri, peipisi tupriñora.

¹¹ Iyavei omahenduhasa omondo Jesús, ahe serer acoi Justo, pēu. Co güerañomi Jesús reroyasar pāhuve judío oporavíqui vahe che rupi yuvireco Tūpa mborerecuasave nara. Ahe niha che mboviha yuvireco yepi.

¹² Epafras avei omondo omahenduhasa pēu. Ahe pe recua pendar ité, Jesucristo rembuguai. Ahe oyoerqui vahe pe rese yepi ‘toyemoviracua tupri iyavei toyuvirecoi Tūpa remimbotar rupi yuvireco’ oyapave.

¹³ Che aicua ité secocuer. Ahe oyemboaqui oyeruresa pipe pe recocuer rese, Laodicea pendar recocuer rese, Hierápolis pendar recocuer rese avei.

¹⁴ Iyavei yande rembiaisu Lucas, oporoposano vahe, Demas reseve omondo omahenduhasa yuvireco pēu.

¹⁵ Pemboaviravemi eipeve yande rivri Laodicea pendar oreu, cuña Ninfa serer vahe avei iyavei opacatu oñemonuha vahe Tūpa reroyasar yuvireco.

¹⁶ Peyeroquire, pemondo co cuachiar Laodicea pendar Jesús reroyasar upe iyeroqui āgua. Iyavei Laodicea pendar cuachiar rese peyeroqui avei.

¹⁷ Iyavei emombehu Arquipo upe aipo ere: “Emboaviye tupri Tūpa nde cuaisa” ere.

¹⁸ Che Pablo aico. Che ité aicuachía co che mahenduhasa pēu. Tapemahenduha vite che roquendasave che rese. Aviye pēu. Yande Aposar tape pítivii. Aipo rupive.

PABLO REMBICUACHIA YHĪPĪNDAR VAHE TESALONICA PNDAR UPE TESALONICENSES

Pablo mahenduhasa Jesús reroyasar Tesalónica pndar upe

¹ Che, Pablo, Silvano reseve iyavei Timoteo, aicuachía co che ñehe pëu, ore rivireta, peñemonuha vahe Tüpa upe tecua Tesalónica ve, yande Ru Tüpa, yande Yar Jesucristo rese peico vahe. Tape rovasa pe reco tupri água yande Ru Tüpa, yande Yar Jesucristo avei.

Tesalónica pndar yeroyasa resendar ñehesa

² Ore, “Aviye ndeu” orohe ari rupi Tüpa upe opacatu pe rese yepi. Iyavei oremahenduha pe rese ore yeruresa pipe.

³ Pe niha yande Yar rese pe yeroya tuprisa pipe peporaviquiño yepi, iyavei pe poroaisusa pipe peyapo mbahe Tüpa upe, iyavei peñemosañi mbahe tēi upe Jesucristo rārosa pereco vahe rese. Sese oremahenduha pe rese ari yacatu rupi yande Ru Tüpa rovai.

⁴ Ore rivireta, Tüpa niha pe raisu, oroicua avei ahe ité pe poravo.

⁵ Esepia, acoi oromombehuse ñehesa pīsirosa resendar, ndahei ñehesa oreyesuindar tēi oromombehu pëu; Espiritu Santo reco pīratasa pipe rumo oroñehe. Iyavei oroicua ité co ñehesa supi eté vahe. Peicua avei niha acoi pe pāhuve oroicose, oroico tupriño ité, orosecaño avei pe reco tupri água.

⁶ Ipare pemboyeapi ore recocuer peico iyavei yande Yar recocuer avei no. Iyavei yepe peparaisu mbahe-mbahe tēi pāhuve peico viña, peipisiño ité rumo co ñehesa pe vihasa pipe Espiritu Santo ombou vahe pëu.

⁷ Evocoya pe reco pipe pemboyecua catu pe reco catuprisa Tüpa reroyasar Macedonia pndar upe, Acaya pndar upe avei.

⁸ Esepia, pe Tüpa ñehe peicua uca Macedonia rupi, Acaya rupi avei. Ndahei rumo co rupiño, opacatu rupi avei oicua yuvireco Tüpa reroyasa pereco vahe peyese. Sese ore ndoromombehu iri chira pe recocuer.

⁹ Esepia, ahe avei omombehu yuvireco oreu acoi ore so agüer pe piri, pe ore pisi tupri agüer avei. Iyavei omombehu mbahe rahanga sui pe poi agüer Tüpa oicove vahe rupi pe guatasa yuvireco, pe chupe nara mbahe apo água avei no.

¹⁰ Omombehu avei pesāro vahe Tüpa Rahir Jesús iyevi água iva sui yuvireco oreu, acoi Tüpa ombogüerayevi vahe omano vahe pāhu sui. Ahe niha yande pīsirora Tüpa ñemoirosa ipīrata vahe ou vaherā sui.

2

Tesalónica pndar yeroyasa mboyecua

¹ Ore rivireta, pe niha peicua ore so agüer pe piri ndahei égüe ehi tēi vahe.

² Peicua tupri avei niha acoi cuese yipīndar mara-mara tēi ava ore rereco yuvireco tecua Filipo ve. Tüpa rumo ore pītivii oñhengagüer pīsirosa resendar mombehu água opacatu ore siquiyeeñhisa pipe ore amotarēhimbar pāhuve.

³ Esepia, ndoroyavii eté ore ñehe iyavei ndoroñehēi ore pihañemoñeta raisa tēi pipe pëu, ndahei avei ore porombopa água oroñehe.

⁴ Tüpa rumo ore recoāha, ichui ore cuai oñhengagüer pīsirosa resendar mombehu água; égüe ehi ore ñehe, ndahei ava tēi mboviña água. Tüpa yande pihañemoñetasa oicua vahe rumo oromboviña.

⁵ Peicua niha ore ndoroñehēi ñehesa icatupri catu vahe tēi rese pe mbopa água, iyavei ndahei guarepochi potasave tēi oroñehe tupri. Tüpa niha oicua.

⁶ Ore ndorosecai eté ava ore mboetei catu água pe, que ambuae ava eta avei no.

⁷ Ehi oroyandu ucara ore mborerecuasa Jesucristo ore cuaisa pëu viña; oroyemominiño rumo oroico pe pāhuve inungar acoi cuña osāro tupri vahe omembri imboacua.

⁸ Egüe orohe avei ore pe raisu. Sese ndahei Tüpa Ñehengagüer año oromondo pota pëu, ore recocuer avei no. Esepia, opoaisú ité.

⁹ Ore rivireta, peyemomahenduha acoi ore paraisu agüer rese, ore poraviqui agüer rese avei ari, pītu reseve. Ndahei que ñepeñi mañeco tēi água mbahe rese oromombehu Tüpa Ñehengagüer oroico pëu.

¹⁰ Pe niha ore repia peye Tüpa avei oicua, ore reco tuprisa, ore rembiapo supi eté vahe, ihīvi vahe pe Jesús reroyasar pāhuve.

11-12 Peicua niha, inungar mbia guahir upe, ěgüe orohe pe monguerĕhi, pe mbovihasa avei ñepei-pe opacatu. Iyavei oromondo pe cuaitarā pe reco tupri āgua Tūpa remimbotar rupi. Ahe niha oñehe pĕu peico vaheřā sese imborerecuasa porañetesave.

13 Co rese, “Aviye ndeu” orohe Tūpa upe ari yacatu rupi. Esepia, Tūpa Ñhengagüer, oromombehu vahe pĕu, peipisi itĕ, “Co Tūpa ñehe, ndahei ava tĕi ñehe” aipo peye itĕ pe chupe. Supi etĕ Tūpa ñehe. Ahe niha osecuñaro itĕ pe recocuer peroyare.

14 Ore rivireta, acoi cuese peiporara mbahe-mbahe tĕi pe mu eta pāhuve peicose; ěgüe ehi tupri avei Jesús reroyasar Judea pendar yuvirecoi vahe Jesucristo recocuer rese. Imu judío ae oseca-seca yamotarĕhisave yuvireco.

15 Ahe niha oyuca yande Yar Jesús yuvireco. Ahe avei oyucapa Tūpa ñehe mombehusar yuvireco aracahe. Ore avei opa ore mombo yuvireco. Ndoviroyai Tūpa yuvireco iyavei opacatu ava amotarĕhimbar tĕi yuvirecoi.

16 Esepia, acoi oroñehe potase ava ndahei vahe judío upe iñĕpisiro āgua rese, ahe rumo ndoipotai yuvireco oreu. Ipĕpe sui oyemboangaipa catu yuvireco. Cūrĕitei rumo Tūpa ñemoirosa ipirata vahe ou iharive yuvireco cute.

Pablo oso pota iri Tesalónica pendar repia

17 Ore rivireta, yepe ndayayoepia iri yayepĕpi raimise yandeyesui, ore piha pipe rumo, “Ahé” oroheño itĕ pĕu. Iyavei orequerĕhiño itĕ yepi oroso iri vaheřā pe repia.

18 Orosāha tĕi ore so āgua pe repia yepi; che Pablo teietĕ setā yupagüer tĕi aso pota. Carugar rumo ndoipotai.

19 ¿Ava sui piha orosāro mbahe aviye vahe? ¿Uma ore vihasa? ¿Uma ore mboviharete catura? ¡Peño itera acoi yande Yar Jesucristo yevise curi!

20 Pe itĕ niha ore mbovihara peye, iyavei oroviha catura pe rese no.

3

1-2 Evocoyase che nañemosā irise pe repiaĕhi rese, chepihañemoñeta yande rivri Timoteo mondo āgua pe repia; “Che güeraño tapita Atenas ve” ahe. Esepia niha, ahe oporaviqui vahe Tūpa upe ore rupi, omombehu vahe co ñehesa písirosa resendar Cristo suindar ou vahe. Ahe amondo pĕu pe moviracua catu āgua, pe monguerĕhi catu āgua avei peyeroya catu vaheřā Cristo rese.

3 Evocoyase tipo eme oyembosiquiye vahe co mbahe tĕi pe mombaraisuse. Peicua niha yaiporara rane itera co nungar mbahe.

4 Iyavei niha acoi oroico vĕtese pe piri, “Yande paraisu rane itera mbahe yavai vahe” orohe voi etĕ acoi pĕu. Ahe niha cūrĕitei peicua.

5 Evocoyase che nañemosā irise, amondo Timoteo ‘¿yuvirecoiño itĕ piha Tūpa rese?’ che yapave. Che asiquiye, “Aviyeteramo Carugar omondora mbahe tĕi pipe yuvireco” ahe ‘ore poraviqui agüer evocoyase ocañi tĕira’ che hesave.

6 Cūrĕitei rumo Timoteo oyevi Tesalónica sui, güeru ñehesa aviye vahe pe resendar oreu pe Tūpa reroyasa, iyavei pe poroaisusa resendar avei. Iyavei aipo pemahenduha ore rese pe poroaisusa pipe. Iyavei pe ore repia pota tĕi peye no; inungar ore pe repiasa pota tĕi avei.

7 Sese, ore rivireta, ore paraisusa pāhuve ore mboviharete peye, co oroicuase pe reco tupri Tūpa reroyasa pipe.

8 Cūrĕitei ore mopoase catu iri oroyanduse pe yemoviracua tuprisa yande Yar rese.

9 “¿Mara yahera piha, ‘Aviye ndeu’ yande he tupri catu āgua Tūpa upe?” orohe pe reco tuprisa rese, iyavei ore yemboviha catura rese avei no

10 pĕtu, ari rupi oroporandu Tūpa upe ore so āgua pe repia eipeve iyavei Tūpa reroyasa ipane vĕte vahe mboaviye tupri āgua pĕu.

11 Iyavei ore oroipota ore pĕtĕivira yande Ru Tūpa, yande Yar Jesucristo avei ore so āgua pe piri.

12 Evocoyase yande Yar tape moviracua catu, tombou catu avei pe yeaisu āgua, iyavei opacatu raisu catu āgua, inungar ore orovireco pe raisusa.

13 Ipĕpe sui tape moviracua pe reco maranehi pipe pe mbahe aviĕhisave yande Ru Tūpa rovai acoi oyevise yande Yar Jesús opacatu ovoya reseve. ěgüe tehi pĕu.

4

Teco tupri Tūpa oipota

1 Ore rivireta, cūrĕitei oroñehe pota pĕu pe cuaitarā rese yande Yar Jesús rer pipe: inungar cūrĕitei pe recocuer pereco, ěgüe peyeño itĕ catu peico ore pe mbohe agüer rupi Tūpa mboetei āgua.

2 Pe niha, peicua acoi ore pe mbohe agüer yande Yar Jesús rer pipe.

³ Esepia, Tūpa oipota pe reco maranehi āgua oyeupe. “Tipo eme que ñepeí oyemboaguasa tēi vahe” ehi.

⁴ Iyavei peico tupri pe rembireco rese pe reco ñvisa pipe Tūpa remimbotar rupi, iyavei pemboetei tupri sereco yepi.

⁵ Peicoi rene ava Tūpa ndoicuai vahe reco pipe pe remimbotar tēi apo āgua.

⁶ Tipo eme avei oyapo vahe co nungar angaipa yande rivri reco momara āgua tēi. Esepia, Tūpa omondora oñemoirosa ipĩrata vahe evocoi nungar ava upe. Evocoi niha yipisuive oromombehu vahe pēu.

⁷ Esepia, Tūpa niha yande poravo yande reco maranehi āgua, ndahei angaipa pipe yande reco āgua tēi.

⁸ Sese acoi ndosendu potai vahe co yembohesa, ndahei eté ava tēi viroĩro, ahe rumo Tūpa ité viroĩro yuvireco acoi ombou vahe oEspíritu Santo pēu.

⁹ Iyavei co peyepāhuve pe yeaisusa rese, ndaicuachía iri chira pēu. Esepia, Tūpa ité niha pe mbohe pe yeaisu āgua opacatu.

¹⁰ Ēgüe peye niha opacatu yande rivireta co Macedonia rupindar raisu peico. Co catu peyapo che rivireta: pe mbouvicha vite catu pe poroaisusa.

¹¹ “Peico tupriño avei pe reco mbegüesa pipe; mbahe pe rembiapo reseño tupri pehañeco; peporaviqui pe po pipe ité” aipo orohe acoi pēu cuese.

¹² Evocoiyase pe mboyeroyara ava ndahei vahe Jesús reroyasar yuvireco; iyavei Ēgüe peyera mbahe pēu ipaneēhi āgua avei no.

Oyevira yande Yar co ivi pipe

¹³ Ore rivireta, ore oroipota peicua aveira manosa recocuer; sese ndapeicoi chira pe viharēhisa pipe inungar co ava ndoyeroyai vahe Tūpa rese.

¹⁴ Esepia, yande yaroya: Jesús omano, ichui ocuerayevi. Evocoiyase yande avei yaroya Tūpa Guahir Jesucristo reseve ombogüerayevira opacatu acoi seroyasa pipe omano vahe yuvireco.

¹⁵ Sese co oromombehu pēu, ahe niha yande Yar porombohesa: yande yaicove vite vahe co ivi pipe, acoi oyevise yande Yar, ndahei chira yande rane omano vahecuer sui yayemboya yande Yar rese.

¹⁶ Esepia, yande Yar ité ogüeyi irira iva sui ou mborerecuar ivate vahe ñehesa pipe; ahese oyeendura Arcangel ñehe iyavei Tūpa remimbi moñehe pĩratasa. Ahese seroyasar omano vahecuer rane opũhara yuvireco.

¹⁷ Ipare voi yande yaicove vite vahe, serasopri yaicora opacatu iva quiha rese co yande Yar rovaĩchi āgua ivitu rupi. Ēgüe yahera yande Yar piri yaico vaheerā apirēhi.

¹⁸ Sese peyemonguerēhi catu co ñehesa pesendu vahe rese.

5

¹ Iyavei no, acoi ari yande Yar yusa resendar ore ndoroicuachiai chira pēu.

² Esepia, pe peicua tupri co yande Yar ari oyepotara imohaēhisa pipe, inungar acoi imonda rai vahe oyepota pĩtu pipe.

³ Acoi ava aipo ehise yuvireco: “Opacatu aviye ité yaico, ndipo iri mbahe-mbahe tēi yandeu” ehise, ahese inungar acoi cuña imembĩrasi aviyeteramo tēi, Ēgüe ehi aveira, aviyeteramo tēi icañi oura iharive, ahese ndoicatui chira ichui oñemi yuvireco.

⁴ Pe rumo, ore rivireta, ndahei pĩtumimbisa pendar nungar peico. Evocoiyase oyepotase yande Yar ari, ndahei chira imonda rai vahe nungar pe resapiha tēi ou.

⁵ Esepia, pe opacatu peico vahe Tūpa poroesapesa pipe, ndahe iri yande pĩtumimbi pipendar yaico.

⁶ Evocoiyase ndayaicoi chira co ambuae yuviroque tēi vahe nungar pihañemoñetasa pipe; iyacatu rumo yande yayemopoase yande pihañemoñeta tupri pipe.

⁷ Acoi yuviroque vahe, yuviroque pĩtu pipe; iyavei acoi osavaipo vahe, osavaipo avei pĩtu pipe yuvireco.

⁸ Yande rumo yaico vahe Tūpa poroesapesa pipe. Evocoiyase yareco tupri yande pihañemoñetasa yande reco tupri āgua yepi. Iyavei yayoepira yande yeroyasa pipe, poroaisusa pipe avei no. Iyavei inungar acoi sundao vireco oāca ndiru guarepochi apopri yuvireco oāca repi āgua, yande avei tayareco yande remiaro yande ñepisiro āgua.

⁹ Esepia niha, Tūpa yande poravo ndahei yaico vaheerā iñemoirosa pipe nara; ahe rumo yande poravo yasupiti vaheerā ñepisiro yande Yar Jesucristo rembiapo sui.

¹⁰ Esepia, ahe omano yande recocuer rese oyese yande rereco āgua opacatu yande recove vitesse, yamanose avei.

¹¹ Sese peyemonguerēhi catu, iyavei peyemoviracua catu vite peyeupe inungar co peyapo peico.

Pablo omboaracua Jesús reroyasar oico

¹² Iyavei no, ore rivireta, pemboyeroa acoi oporaviqui vahe yuvireco pe pãhuve. Ahe niha pe cuai vahe yuvireco, iyavei pe mboaracua vahe yande Yar uve nara yuvireco.

¹³ Pemboyeroa iyavei pesaisu tuprira iporaviquisa rese. Peico tupri avei peyepãhuve.

¹⁴ Iyavei ore rivireta, pe cuaisa: pemboaracua acoi ndoporaviqui potai vahe imbohe catu ãgua. Iyavei pemonguerêhi acoi niquerêhi iri vahe. Peipitívii avei acoi ndoyemoviracuai vahe Tũpa rese güeco ãgua. Iyavei peñemosañõ opacatu ava uve yepi.

¹⁵ Peicua catu pe rereco megua potasar sui. Ndapemboyevii chira mbahe-mbahe tẽi co pe rereco megua potasar upe. Iyacatu rumo peyapo tupri mbahe aviye vahe peyeupe, opacatu ava upe avei no.

¹⁶ Peyembovihanõra ari yacatu peico.

¹⁷ Iyavei peyeroquirã ari yacatu rupi no.

¹⁸ “Aviye ndeu” peyera Tũpa upe opacatu mbahe rese. Esepia, ahe niha Tũpa oipota yandeu Cristo rese yaico vahe.

¹⁹ Iyavei ndapemombituhui chira mbahe Espiritu Santo oyapo pota vahe pe rese.

²⁰ Ndapeyamotarêhii chira Tũpa ñehe imombehupri.

²¹ Pesãhapa rane opacatu mbahe. Ichui peipisira mbahe aviye vahe peyeupe.

²² Peyepipi opacatu mbahe naporai vahe sui.

²³ Tũpa acoi ombou vahe teco tuprisa yandeu tape pehapa tupri oyeupe nara. Iyavei tosãro tupri opacatu pe espõritu, pe hã, pe rete avei pe reco maranehi ãgua co yande Yar Jesucristo yevi irise.

²⁴ Ahe acoi pe poravo vahe oyeupe nara seco tupri vahe. Ahe omboaviyera opacatu co mbahe.

Pablo imahenduha Jesús reroyasar rese

²⁵ Ore rivireta, peyeroqui ore rese.

²⁶ Pemboavirave opacatu yande rivri eipe pendar pe yeovaupitesa pipe.

²⁷ Che opocuai yande Yar rer pipe: peyeroqui co cuachiar opacatu yande rivireta upe.

²⁸ Yande Yar Jesucristo tape rovãsa tupriño pe rereco. Aipo rupive.

PABLO REMBICUACHIA IMON̄UVIRIOSA TESALONICA PNDAR UPE TESALONICENSES

Pablo mahenduhasa Jesús reroyasar Tesalónica pndar upe

¹ Che, Pablo, Silvano, Timoteo reseve, aicuachía co ore ñehe p̄eu, ore rivireta, peñemonuha vahe Tūpa uve tecua Tesalónica ve, yande Ru Tūpa, yande Yar Jesucristo rese peico vahe.

² Tombou p̄eu oporovasasa pe reco tupri āgua yande Ru Tūpa, yande Yar Jesucristo avei.

Tūpa omombaraisura viroyasarēhi Jesucristo yevise curi

³ Ore rivireta, “Aviye ndeu” orohe itera Tūpa upe pe recocuer rese yepi. Esepia, Tūpa rese pe yeroyasa tuvicha-vicha iri, tuvicha-vicha iri avei pe yeaisusa opacatu peyeupe pereco vahe.

⁴ Evocoiyase, ore oroñehe pe rese ore vihasa pipe Tūpa reroyasar ñemonuha rupi. Esepia, acoi ava mbahe-mbahe tēise p̄eu, peñemosañu chupe pe Cristo rese pe yeroyasa pipe.

⁵ Co niha omboyecua Tūpa reco ivisa ava upe. Esepia, ipipe pe rereco omborerecuasave pe reiñeque āgua. Sese niha, peparaisu vite tēi peico.

⁶ Tūpa omombaraisura acoi pe mombaraisusarer. Iya ité ēgüe ehi vaheṛā chupe.

⁷ Pe rumo imombaraisupri: peico vahe, Tūpa omondora pe pituhu āgua, ore pituhu āgua avei, acoi yande Yar Jesús oyevise tata rendigüer p̄āhuve iva sui opacatu güembiguai seco p̄irata catu vahe reseve.

⁸ Ahe oura opacatu Vu Tūpa reroyasarēhi mombaraisu āgua iyavei oyesuindar ñehesa poropisirosa resendar rendu tēisar mombaraisu avei.

⁹ Evocoi iparaisura yuvireco, imocañipri yuvirecoira apirēhi. Iyavei imboyepisara amombri yande Yar reco p̄iratasu porañetesu sui.

¹⁰ Acoi ouse ahe ari pipe, yande Yar imboeteip̄ira opacatu seroyasar p̄āhuve; ip̄āhuve pe peicora. Esepia, peroya ité oromombehu vahe p̄eu.

¹¹ Co rese oroyeroquí pe rese yepi: oroporandu yande Ru Tūpa upe tape rereco tupri güemienoi pe recosa pipe. Iyavei oroyeroquí chupe, tomboaviye güeco p̄iratasu pipe opacatu ñepe-pei mbahe aviye vahe peyapo pota vahe iyavei opacatu mbahe pe rembiapo aviye vahe sese pe yeroyasa pipe.

¹² Evocoiyase yande Yar Jesucristo rer imboeteip̄ira pe recocuer pipe sui; iyavei pe imboeteip̄ira peico yande Yar rese peico vahe yande Ru Tūpa, yande Yar Jesucristo pe raisusave.

2

Yande Yar Jesús yevisa resendar mombehu tup̄isa

¹ Iyavei, ore rivireta, ore oromombehu potami p̄eu opacatu acoi yande Yar Jesucristo yevisa resendar yande monuha vaheṛā oyese.

² Peicua catu, tapepihañemoñeta rerova eme iyavei peyembosiquiyei rene que ava “che añehe Espiritu pipe” ehi vahe sui, que icuachiapri sui, que ñehesa pesendu vahe sui inungarra ore ñehesa ité viña “oyepota ari Jesús yevisa” ehi tēi vahe yuvireco p̄eu.

³ Peicua catu peyembopa ucai rene ñepe-pei yepe ava upe. Esepia, yipindar ari Jesucristo yu āgua renonde, yugüerura mbahe-mbahe tēi aposar. Ahe Tūpa amotarēhisar yuvirecoi vahe. Ahese oyemboyecuaru ava yangaipa guasu vahe. Ahe ocañi tēi vaheṛā.

⁴ Oyemboivate aira opacatu Tūpa rer rerecosar amotarēhisave iyavei ndoipotai chira ambuae mboetei. Oique aveira, oguapi Tūpa rēta pipe inungarra Tūpa ité viña. “Supi eté che Tūpa aico” ehi tupri tēira oī.

⁵ ¿Ndapemahenduhai vo acoi che ñehengagüer rese pe p̄āhuve aico vitesese cuese?

⁶ Co imombitasar peicua cūrítei. Ihari oyepotase voi, oyemboyecuaru.

⁷ Co porocuaita amotarēhisar ndoyemboyecua vitei vahe rembiapo oime cūrítei. Co güeraño ipane imombitasar renose āgua ip̄āhu sui,

⁸ ahese voi oyemboyecuaru acoi ava yangaipa guasu vahe. Yande Yar Jesús rumo oyucara oñehe pipe, omocañi itera güendigüer p̄iratasu pipe oyevise curi.

⁹ Yucasa renonde rumo, acoi ava yangaipa guasu vahe oura Carugar p̄iratasu pipe; güerura güeco p̄iratasu tuvicha vahe; omboyecua angahura poromondiisa.

¹⁰ Oyapo angahura opacatu mbahe tēi oporombopa āgua oico ava ocañi tēi vaheṛā upe. Esepia, evocoi ava ndosendu potai porombohesa supi eté vahe oñepisiro āgua yuvireco.

¹¹ Sese Tūpa oseyara co porombopasa reroya āgua yuvireco

¹² 'ipipe tocañi tēi co ava, opacatu mbahe supi eté vahe reroyaēhisar, acoi oyemboviha catu vahe mbahe-mbahe tēi rese yuvireco' oya.

Iporavopri ipisiropirā

¹³ Ore rumo, "Aviye ndeu" orohera Tūpa upe pe recocuer rese yepi, ore rivireta, yande Yar rembiaisu peico vahe. Esepia, Tūpa niha pe poravo yipisuive pe písiro āgua pe reco maranehi āgua rese Espiritu pipe iyavei porombohesa supi eté vahe reroya āgua.

¹⁴ Sese niha, Tūpa oñehe yandeu yande piha pipe co ñehesa písirosa resendar pipe, ore oromombehu vahe pēu 'tovireco che Rahir Jesucristo reco porañetesa' oya.

¹⁵ Sese ore rivireta, peyemoviracua iyavei peresarai eme acoi oromombehu vahecuer iyavei oroicuachía vahe acoi pēu.

¹⁶ Yande Yar Jesucristo teieté, yande Ru Tūpa avei, yande raisusa yande rovasasa pipe ombou vahe vihasa apirēhi vahe yandeu iyavei yande reco tupri rāro āgua,

¹⁷ ahe tape monguerēhi, tape moviracua avei opacatu ñehesa aviye vahe rese, opacatu mbahe pe rembiapo aviye vaherā rese avei.

3

Pablo oporandu Jesucristo reroyasar yeroquisa rese oyeupenara

¹ Ore rivireta, co mbahe ipa vahe amombehu pota pēu: peyeroqui ore rese. Evocoyase toyepota pihaivi yande Yar ñehengagüer opacatu rupi; tipisisa tupri imboeteisa pipe inungar oyeputa pe pāhuve.

² Peyerure avei ore repi āgua rese ava ndaseco pōrai vahe, ipihañemoñeta rai vahe sui. Esepia niha, ndaopacatui Tūpa rese ipihañemoñeta yuvireco.

³ Yande Yar rumo seco ñvi vahe. Ahe pe recocuer moviracuara iyavei pe rārora mbahe tēi sui.

⁴ Ore oroyeroya yande Yar rovai peyapo vahe rese iyavei peyapo viteño vaherā rese acoi ore pe cuai agüer.

⁵ Yande Yar tape pítivii pe poroaisu āgua inungar Tūpa oporoaisu iyavei Cristo ñemosasa rereco āgua.

Yande cuaita yande poraviqui āgua

⁶ Ore rivireta, opocuai yande Yar Jesucristo rer pipe: acoi ndoporaviqui potai vahe yande rivri; pe pāhuve, peyepipiño ichui, acoi ndoviroya potai vahe avei ore porombohesa oromombehu vahe pēu.

⁷ Pe peicua mara peyera ore recocuer moña āgua peico. Ore oroicose pe pāhuve, ndoroico tēi,

⁸ ndorohu tēi avei ambuae tembihu imboepipirēhi. Ore rumo que ñepeñe mañeco tēiēhi āgua rese oroporaviqui orecurai rane ité ari, pítu reseve.

⁹ Iya ité niha mbahe rese ore porandu āgua pēu ore pítivii āgua rese viña; ore rumo oroporaviqui pe ore recocuer rupi pe guata āgua rese.

¹⁰ Acoi oroico vitesse pe pāhuve, oromondo pe cuaitará: acoi ndoporaviqui potai vahe, ahe tocaru eme.

¹¹ Oroyandu amove aipo pe pāhu pendar yuvirecoñe tēi ndoporaviqui vahe. Evocoi omañeco tēi ambuae ava recocuer.

¹² Ore oromondo acoi ava upe mborocuaita yande Yar Jesucristo rer pipe: toporaviqui güeco quiririsa pipe; ipipe sui yuvirecovera.

¹³ Ore rivireta, pecuerai eme mbahe aviye vahe apo.

¹⁴ Oimese ndoviroyai vahe ore remimombehu co cuachiar pipe, peicua tupri evocoi nungar. Peyemboya eme sese. Evocoyase tochi ahe.

¹⁵ Pereco eme catu yamotarēhisa chupe; iyacatu rumo pemboaracua catuñora inungar yande rivri.

Ñehesa ipa vahe

¹⁶ Aviye, yande Yar ae tombou güeco tuprisa pe reco tupri āgua pēu ari yacatu rupi opacatu pe reco pipe. Tasecoi pe rese ari yacatu.

¹⁷ Che, Pablo, aicuachía co mahenduhasa che po pipe ité pēu. Che rembicuachía icuapri opacatu che cuachiar pipe.

¹⁸ Yande Yar Jesucristo tape rovasa opacatu yepi. Aipo rupive.

PABLO REMBICUACHIA YIPINDAR VAHE TIMOTEO UPE TIMOTEO

Pablo mahenduhasa Timoteo upe

¹⁻² Che, Pablo, aicuachía che ñehe ndeu, Timoteo. Nde niha che rahir Tüpa reroyasa pipe ereico. Che niha Jesucristo apóstol aico, yande Písirosar Tüpa porocuita rupi iyavei yande Yar Jesucristo porocuita rupi. Ahe niha yande remiaro. Tombou yande Ru Tüpa, yande Yar Jesucristo oporovasasa, oporoparisuerecosa ndeu nde reco tupri ägua.

Pablo, "Eicua catu porombohesa co coti tēi vahe sui" ehi Timoteo upe

³ Iyavei acoi aipo ahe ndeu cuese che so ägua Macedonia ve: nde epita co tecua Efeso ve. Evocoiyase eremboaracuara co ava co coti tēi oporomboaracua vahe, toporomboaracua eme pihañemoñetasa co coti-coti tēi vahe rese yuvireco.

⁴ Toyapisaca eme avei tecocuer ipapapri tēi vahe rese, tecocuer aracahendar ägüe ehi tēi vahe rese avei. Ahe ichui osē yeacasa naporai vahe yepi; ndayande pítivii rumo Tüpa remimbotar reroya tupri ägua rese.

⁵ Sese co amondo porocuita ndeu yande yeaisu ägua yande pihañemoñeta catuprisa pipe, yande reco yapisaca tuprisave, iyavei yande yeroyasa supi eté vahe pipe.

⁶ Esepia, amove ava oime ichui oyearacua mocañi oñehe-ñehe tēisa pipe yuvireco.

⁷ Oporombohe pota tēi Tüpa porocuita rese; ndosenducuai rumo oporombohesa yuvireco, "Supi tupri revo yaporombohe" ehi tēi yuvireco viña.

⁸ Yaicua niha co porocuita aviye ai eté yaiporuse Tüpa remimbotar rupi eté.

⁹ Yaicua avei acoi porocuita ndahei ava aviye vahe upe nara. Ahe rumo ndiporeroyai vahe mboaracua ägua, ndayaracua potai vahe upe nara, angaipa viyar upe nara avei, iyavei opacatú mbahe-mbahe tēi aposar upe nara, nombotei vahe Tüpa iyavei chupendar pihañemoñetasa; acoi vu, osi oyuca vahe; opacatu ava oporapichi vahe upendar.

¹⁰ Acoi oyemboaguasa tēi vahe, iyavei cuimbahe ambuae cuimbahe rese oyapo vahe mbahe, que cuña ambuae cuña rese avei; iyavei acoi virocua tēi vahe mbiguai ambuae ava sui, semirañete ai vahe; iyavei acoi, "Che amombehu mbahe supi eté vahe" ehi tēi angahu vahe, chupe nara ité co porocuita; imondosa avei opacatu porombohesa nimarai vahe amotarēhisar upe nara.

¹¹ Co porombohesa nimarai vahe oyoya tupri ñehesa porañete vahe poropísirosa re-sendar rese. Tüpa sovasapri secoi, ahe che cuai vahe sese.

Pablo oparaisuerecosa rese, "Aviye ndeu" ehi Tüpa upe

¹² "Aviye ndeu" ahe yande Yar Jesucristo upe. Ahe niha ombou pīratasa co che ñehe ägua. Esepia, ahe oyeroya che rese. Sese che mondo oñehengagüer mombehu ägua.

¹³ Yepe che yipindar che ñehe-ñehe tēi sese; aseca-secaño mbahe-mbahe tēi che rembiapoguā yamotarēhimbave che yemboivate aisa pipe, Tüpa rumo, che paraisuerecono. Esepia, che ahese, ndahe vitei Cristo reroyasar aico; ndaicua vitei mbahe ayapo vahe.

¹⁴ Ägüe ehi yande Yar ombou catu oporovasasa che rese iyavei ombou che oyese yeroya ägua iyavei che poroaisu ägua Jesucristo rese che recosa pipe.

¹⁵ Iya peroya co supi eté vahe, che aipota avei opacatu oyapisacara yuvireco sese: Jesucristo ou co ivi pipe ava yangaipa vahe písiro ägua. Che rumo acoi ivate catu vahe yipindar aico ipāhuve.

¹⁶ Sese Tüpa che paraisuereco che rese rane Jesucristo reco mbegüe tuprisa mboyecua ägua. Ägüe ehi che recocuer upe ambuae ava seroya ägua. Ipipe sui osupitira tecovesa apirēhi vahe yuvireco.

¹⁷ ¡Sese yamondo imboeteisa apirēhi yande Rerecuar ndopai vahe upe! ¡Ahe nomanoi vahe, ndayasepai vahe, ahe ñepeí vahe Tüpa!

¹⁸⁻¹⁹ Che rahir Timoteo, co amondo nde cuaitarā ndeu nde reco moviracua ägua mbahe tēi recopi ägua Cristo rese nde yeroyasa pipe nde pihañemoñeta catuprisa pipe avei. Supi tupri cuese Tüpa reroyasar oñehe yuvireco nde rese serer pipe. Amove ava opihañemoñeta tupri reroyaēhisave, omocañi uca Tüpa rese oyeroyasa

²⁰ inungar vahe Himeneo rese, Alejandro yuvirecoi. Ahe che amondo Carugar povrire 'evocoiyase toicua tiñehe-ñehe tēi eme Tüpa upe yamotarēhisave yuvireco' che yapave.

2

Ñehesa yeruresa resendar

¹ Iyavei no, co che opomonguerêhi pe yerure âgua, peporandu, pemondo avei “aviye” pe hesa Tûpa upe opacatu ava recocuer rese.

² Iyavei peyerure opacatu mborerrecuar rese. Evocoiyase tayareco yande reco tupri Tûpa mboetei tuprisa pipe, yande poromboeteisa pipe avei.

³ Co aviye ité; ahe niha yande Písirosar Tûpa remimbotar.

⁴ Supi eté ahe oipota opacatu ava ñepisiro iyavei co porombohesa supi eté vahe cua tupri âgua.

⁵ Esepia, ñepeño ité Tûpa, iyavei ñepeño ité ava oicatu vahe yande reraso Tûpa upe: ahe Jesucristo.

⁶ Esepia, Jesucristo omano opacatu ava yangaipa vahe repirã ipisiro âgua. Ahe imombehusa chupendar ari iporavopri rupi.

⁷ Sese che supi eté apóstol, icuai pri aico Tûpa Ñehengagüer mombehu âgua, ava ndahei vahe judío mbohe âgua, co yeroyasa rese iyavei supi eté vahe rese. Supi eté ndopombopai.

⁸ Evocoiyase che aipota opacatu rupi ava toyerure yuvireco. Tomopuha opo yuvireco opihañemoñeta catuprisa pipe, ombahe mboasiêhisa pipe, oyeacaêhisa pipe avei.

⁹ Iyavei cuña toyemonde tupriño turucuarño tēi pipe yuvireco. Aní chira rumo oâca moporañeteisa pipe yuvirecoi; tomondo eme avei mbahe sendí vahe inungar oro oyese yuvireco. Iyavei turucuar sepi rusu vahe tomondo eme yuvireco.

¹⁰ Iyacatu rumo yuvirecoi tuprira güembiapo aviye vahe pipe, inungar cuña oyemondo tupri vahe Tûpa upe yuvireco yepi.

¹¹ Iyavei cuña tosendu porombohesa oquiririsa pipe imboyeroyasave.

¹² Ndaipotai cuña oporombohe ava rehí pâhuve iyavei toyocuai eme cuimbahe. Iyacatu rumo iquiririflora yuvireco.

¹³ Esepia, Tûpa oyapo yipindar Adán; ipare Eva oyapo.

¹⁴ Adán ndahei imbopapri; cuña rumo oyembopa uca. Ichui oviapi angaipa pipe.

¹⁵ Oñepisiora rumo ocuaita mboaviyasa pipe oyese yeroyasa rereco pipe, iporoaisusa pipe, güeco maranehisa pipe avei.

3

Tûpa reroyasar rãrosar cuaita

¹ Iyavei co supi eté: acoi amove oico pota vahe Tûpa reroyasar rãro âgua, ahe oipota mboraviqui aviye catu vahe.

² Sese acoi vireco vahe ocuaita Tûpa reroyasar rãro âgua, ahe secoi tuprira mbahe aviye vahe pipe yepi. Ipipe ava noñehei chira yamotarêhise. Iyavei omendara ñepeñi cuña reseño ité. Toñearo tupri avei yuvireco, toyapo mbahe supi eté vahe, tiporomboetei tupri avei. Iyavei omoinguera oyepiri ava oyepota vahe güêtave. Oicua aveira ava mbohe tupri âgua.

³ Iyavei ndahei chira caguar tēi. Ndosecai chiaveira ovava âgua. Iyacatu rumo seco mbegüera opacatu ava upe. Ndoipota rai chiaveira guarepochi.

⁴ Iyavei oicua tuprira güeta pipendar rãro âgua. Oambohe aveira guahir iporeroya âgua, iporomboetei âgua avei.

⁵ Esepia, acoi ndoicuai vahe güeta pipendar rãro, ¿mara ehira evocoiyase Tûpa reroyasar rãro?

⁶ Tûpa reroyasar rãrosar rumo ndahei chira oipisi ramo vahe Tûpa opiha pipe. Esepia, aviyeteramo oyemboivate ai tiêtera. Ipipe sui imocañipri avei secoira Carugar nungar.

⁷ Iyavei oyecua uca tupri ranera Tûpa reroyasarêhi pâhuve. Ahese ndipoi chira imboeteiêhisa iyavei ndoviapi chira Carugar povrive.

Tûpa reroyasar rese ihañeco vahe cuaita

⁸ Iyavei Tûpa reroyasar rese ihañeco vahe yuvirecoira oporomboeteisa pipe. Tomboaviye oñehe. Ndahei chira caguar tēi; ndahei chiaveira guarepochi pota raisar tēi.

⁹ Iyacatu rumo, porombohesa supi eté vahe rese oyemboya catura opihañemoñeta catuprisa pipe yuvireco.

¹⁰ Iyavei secoãhasa ranera. Acoi osê tuprise, ahese toyuvirecoi Tûpa reroyasar rese ihañeco vahe.

¹¹ Iyavei sembireco yuvirecoi aveira oporomboeteisa pipe, nimahechiroi chira, osãro tuprira güecocuer yuvireco, iyavei imboyeroyapri aveira opacatu mbahe rese yuvireco.

¹² Iyavei Tûpa reroyasar rese hañecosar ñepeño itera sembireco, oicua aveira guahir rãro tupri âgua, güeta pipendar rãro âgua avei.

¹³ Esepia, Tûpa reroyasar rese hañecosar oyapo tuprise oporaviyasa yuvireco, ipipe sui imboyeroyasara. Osiquiyeehise avei secoira Jesucristo reroyasa pipe.

Tūpa reco oyecua ramo vahe reroya tuprisa

¹⁴ Che aso pihaiivi pota nde repia. Aicuachía rumo co che ñehe ndeu
¹⁵ acoi che aracahese, ereicuañora rumo pe reco tupri ãgua ava Tūpa rese yuvirecoi vahe pãhuve; ahe acoi Tūpa oicove vahe upendar yuvirecoi, oyemoviracua tupri vahe yuvireco co porombohesa supi eté vahe mboyecua ãgua.
¹⁶ Supi eté tuvichá etepri Tūpa reco oyecua ramo vahe reroya tuprisa: Cristo oyemoporēhi yande reco nungar pipe yandeu. Ipare Espiritu pipe imboyecuasa secocuer supi tupri vahe. Iyavei Tūpa rembiguai rembiepiave secoci. Ichui imombehusa opacatu ivi rupi; opacatu rupi avei seroyasa. Iyavei ipisipri secoci ivave nara.

4

Oimera ava oyepepi vahe Tūpa rese oyeroyasa sui yuvireco coiye

¹ Iyavei Espiritu aipo ehi tupri yandeu: coiye, ari cañi renonde, amove ava oyepepira Tūpa rese oyeroyasa sui yuvireco. Omboyeroyara espíritu oporombopa tēi vahe, porombohesa Carugar suindar avei.

² Oyapisacara ava aipo ehi tēi vahe rese, semirañete ai vahe ñehe rese avei yuvireco. Ēgüe ehira opihañemoñetasa mocañi tēi yuvireco.

³ Co ava niha, “Aní chira yamenda” ehi tēi ava upe yuvireco; “Aní chira yahu opacatu mbahe” ehi avei chupe. Tūpa rembiapo rumo co tembihu poromoviracuasa. Sese Jesús reroyasar iyavei oicua tupri vahe mbahe supi eté vahe yuvirohura ‘aviye ndeu’ ohesa pipe Tūpa upe yuvireco.

⁴ Esepia, opacatu mbahe Tūpa rembiapo, aviye ité. Ahe ndiyai chira yaroïro yaipisise, “Aviye ndeu” yande hesa pipe chupe.

⁵ Esepia, Tūpa oñehe pipe yande yeroquise co tembihu rese, osovasa yandeu.

Cristo rembiguai aviye vahe resendar

⁶ Acoi erembohese co mbahe rese yande rivireta iyavei ereyemoviracuase ñehesa poreroyasa resendar rese iyavei porombohesa aviye vahe nde yese erereco vahe rese, ahese Jesucristo rembiguai aviye vahe ereicora.

⁷ Ndereyapisacai chira rumo acoi mbahe aracahendar co ivi pendar yapisaca tēisa rese. Eyembohe catu yande Yar uveño ité nde reco ãgua.

⁸ Esepia, yepe aviyeño chñhi yande retecuer yamoviracua viña, yande Yar upe yande reco ãgua aviye catu opacatu yande reco uve nara. Esepia, ahe yande pñiviira yande recove ãgua cūritei iyavei curi yande recove ãgua.

⁹ Co supi eté vahe, evocoyase yande yaroyara opacatu yepi.

¹⁰ Sese niha yaporaviquí etepri. Esepia, yande yayeroya ité Tūpa ndopai vahe rese, ahe opacatu ava Písirosar, iyavei viroyasar Písirosar catu ité secoci.

¹¹ Co porombohesa eremombehura ava pãhuve, erembohe aveira sese.

¹² Tipo eme ava nde roeroïro vahe chñhivahe catu nde reco rese. Nde rumo ereico tuprira Tūpa reroyasar rovaque. Eñehe Tūpa reroyasave nde reco tuprisa pipe. Esaisu tupri nde yeroyasave nde recocuer maranehi pipe.

¹³ Che yepota recondeve, eyeroqui catu Tūpa Ñehengagüer rese opacatu ava rovaque. Emonguerēhi catu yande rivireta iyavei erembohe tuprira.

¹⁴ Nderepoi chira Tūpa ndeu mbahecuasa ombou vahe sui. Esepia, ava Jesús reroyasar rãrosar upe Tūpa omombehuse nde cauitarã, omondo opo nde harive yuvireco.

¹⁵ Ndehañeco catu co mbahe rese; tosepia catu opacatu ava nde recocuer yemoingatu catusa yuvireco.

¹⁶ Iyavei eñearo tupri, eicua catu nde porombohesa rese; eyemoviracua sese ité nde hañeco. Acoi ěgüe erese, ipisiropri ereicora; nde ñehe rese oyapisaca vahe avei ipisiropri yuvirecoira.

5

Mara ehira Jesús reroyasar oyepãhuve yuvireco

¹ Eremboaracua pñrata eme mbia cuacuami. Iyacatu rumo eremboaracuara mbegüe rupi inungar nde yesupa ité sereco. Iyavei mbia chñhivahe upe ereñehe tuprira secocuerã rese inungar nde rivri upe.

² Cuña otãro vahe upe avei ereñehe tuprira inungar nde si ité sereco; iyavei cuñatai eremboaracua tuprira inungar nde reindri ité ererecora opacatu nde reco catuprisa pipe.

³ Acoi imer mano vahecuer ité ereipñiviira que mbahe ipane vahe rese.

⁴ Que oimese imembri, anise que semiariro, toyembohe rane ocuaita mboaviye āgua yuvireco chupe. Ēgüe tehi guaisu mboyeve chupe, ahe niha Tūpa remimbotar.

⁵ Iyavei acoi cuña imer mano vahecuer, acoi supi eté ahe ae secoi vahe, ahe oyeroya ité Tūpa rese, iyavei oyerokuñi ité ari, pītu yacatu yepi.

⁶ Osecase rumo mbahe güemimbotar yuvireco, ahese omano vahe tēi secocuer yuvirecoi.

⁷ Eyocuai tupri ava co ñehesa rese; ichui ndahei chira ava ñehepora tēi yuvirecoi.

⁸ Acoi ava rumo nosaroi vahe omu; acoi güeta pipendar nosaroi vahe avei, ahe ndoguata iri Tūpa rese oyeroyasa rupi iyavei mbahe tēi catu Jesús reroyasarēhi sui.

⁹ Icuachiasara rumo ambuae cuña imer mano vahecuer pāhuve ivate catu sesenta sui iharaviter vahe, iyavei ñepeñi ité omer vireco vahecuer.

¹⁰ Icuapirira secocuer icatuprisa rese, omboacua tuprise chīhivahe oyesuindar, omoinguese ava güeta pipe, ihañecose ava Tūpa reroyasar rese ipi sei āgua, oipitiviise ava iparaisu vahe, oyapo tuprise opacatu mbahe aviye vahe.

¹¹ Ereicuachía eme iharaviter ndosupitii vahe sesenta cuachiar pipe. Esepia, amove güemimbotar pipe tēi oyepepi Cristo sui, omenda yupagüe pota iri vahe.

¹² Ipipe oimera Tūpa poronupasa chupe. Esepia, yipendar oyemondo Tūpa upeño ité oyecuachiasa. Ipare rumo nombuaviyei eté oñehe.

¹³ Iyavei oi yacatu rupi tēi oguatase oico, ahese virecora oatēhisa, iyavei imahechiroi tēira, oñangareco tēira opacatu rese, omombehu-mbehu tēi aveira mbahe naporai vahe.

¹⁴ Sese co aipota acoi imer mano vahecuer cuñatai vite vahe: tomenda iri, timembi iri avei yuvireco, iyavei tosāro tupri güeta pipendar. Sese yamotarēhimbar secocuer ndahei chira oñehepora tēi vireco yuvireco.

¹⁵ Esepia, oime ité amove oyepepi vahe güemimbotar pipe Carugar rupi güeco āgua.

¹⁶ Acoi oimese que cuña Tūpa reroyasar vireco vahe que cuña imer mano vahecuer oyepiri, ahe toipitivi yuvireco. Ahe sese evocoyase tūparo pendar nihañecoi chira. Ahese oicatura supi eté imu ndipoi vahe rese hañeco āgua yuvireco.

¹⁷ Iyavei acoi Tūpa reroyasar rārosar osāro tupri vahe, ahe toipisi catu ava poropitiviisa imboyeroyasave. Acoi oyemondo vahe Tūpa Ñehengagüer mombehu āgua, ava mbohe āgua avei, ahe co poropitiviisa oipisi catura.

¹⁸ Esepia, aracahendar icuachiapri pipe aipo ehi: “Ereyuru āpichi rene tivi oporaviqui vahe trigo cambesar” ehi. Iyavei aipo ehi: “Mbía oporaviqui vahe iyacatu oipisira oporaviqui repri” ehi.

¹⁹ Iyavei nde, ndereroyai chira mbahe omombehu vahe Tūpa reroyasar osāro vahe yamotarēhisave yuvireco. Oimese que ñuvirío sepiasar, que mboapi, ahese ramo ereroyara.

²⁰ Acoi oimese rumo angaipa aposar ipāhuve, ahese eremboaracuara opacatu ava rovaque. Evocoyase ambuae osiquiyera angaipa apōñe āgua yuvireco.

²¹ Iyavei che orocuai Tūpa rovaque, Jesucristo rovaque iyavei opacatu Tūpa rembiguai iva pendar rovaque avei: ereyapo tuprira co mborocuaita, nderemomahuatii chira ava imboaracua nde remimbotar rupi tēi.

²² Ndahei chira pihaiivi eresenoi mbía mborocuaita rese ihañeco vahe. Aviyeteramo nde rese pāve mbahe oimera. Eñearo tupri nde reco maranehisa pipe.

²³ Nde rie mbaherasisa upe ndereihui chira i güeraño tēi, chīhimi rumo uva ricuer ereihuñomira chupe.

²⁴ Amove ava angaipa oyecua tupri oyeupe porandu āgua renonde. Oime rumo acoi oñomi vahe oangaipa yuvireco. Ipare tēi icuasa.

²⁵ Inungar avei acoi mbahe ava rembiapo oime aviye vahe oyecua tupri vahe no, acoi ndoyecuai vahe ité nañomisai chira.

6

¹ Iyavei co ava mbiguai Jesús reroyasar, ahe oyeroya tuprira güerecuar yuvireco ava oñehe-ñehe tēiēhi āgua Tūpa rer rese, yande porombohesa rese avei no.

² Acoi co mbiguai virecose güerecuar Tūpa viroya vahe yuvireco, ahese ndovirecoi chira imboyeroyaēhisa Jesús reroyasar recosa rese. Iyacatu rumo omboyeroya tupri catura güerecuar yuvireco. Esepia, serecuar oipisi vahe iporaviquisa, ahe Jesús reroyasar saisupri yuvirecoi yepi.

Tūpa rese yande pihañemoñetas sepirusu vahe nungar

Eporombohe, emombehu co mbahe:

³ oimese oporombohe vahe oyesuindar pihañemoñetas co coti tēi vahe rese, ndoyoyai vahe yande Yar Jesucristo porombohesa aviye vahe rese, ndoyoyai vahe avei yande yembohesa Tūpa rese yande yeroya tuprisa rese,

⁴ Ēgüe ehi vahe oyemboivate ai tēi mbahe renducuaēhisave. Iyavei oporandu-randu tēi ñehesa rese secoāha āgua inungar imbaheasi vahe. Ichui osē mbahe pota raisa, ñemoirosa, ñehe-ñehe tēisa, yemboyeroaēhisa

⁵ Iyavei iporoacasā ndopai vahe ava yaracua rai vahe pāhuve. Ndoicuai rumo mbahe supi tupri vahe yuvireco. Ipihañemoñeta Tūpa rese omahenduhasa pipe mbahe rereco ati āgua yuvireco viña.

⁶ Yayembovihañose mbahe yande rembiereco rese, ahese Tūpa rese yande pihañemoñetasa inungar mbahe sepirusu vahe yandeu.

⁷ Esepia, ndayarui eté niha mbahe yahase co ivi pipe iyavei ndayarasoi chiaveira mbahe yamanose yande yeupi.

⁸ Iyacatu rumo yarecose yande remihura, yande yemonde āgua avei, sese yayembovihañora yaico.

⁹ Amove rumo ava, “Mbahe rerecosar ité taico” ehi tiēte viña, ndoyemoviracuai rumo tecoāhasa upe. Ipare oviapi mbahe tēi pipe, setá mbahe pota raisave, ipipe oyeecomomara. Ipare oyemocañi tēi.

¹⁰ Esepia, guarepochi pota raisa sui osē opacatu mbahe naporai vahe. Amove ava ipota raisa pipe oyepepi Tūpa reroyasa sui iyavei omombaraisu güecocuer ipipe ahe ae yuvireco.

Tūpa rese yande reco vīracuasa

¹¹ Nde rumo, Tūpa rese ereico vahe, eyepepi opacatu co nungar mbahe naporai vahe sui. Eico nde reco ivisa pipe, ndemahenduhāño ité Tūpa rese. Eroya, esaisu, eñemosā avei eico nde reco mbegüesave.

¹² Eyemoviracua ité mbahe tēi uve Tūpa reroyasa rese. Erepoi rene tecovesa apirēhi vahe sui, sese niha Tūpa oñehe ndeu. Iyavei eremombehu ité niha Tūpa reroyasa nde reco āgua ava eta rovai.

¹³ Cūrítei Tūpa rovaque, ahe opacatu mbahe moingovesar iyavei Jesucristo rovaque, ahe niha omombehu tupri ité supi eté vahe Poncio Pilato rovai, che orocuai

¹⁴ Ndererovai chira che remimombehu ‘tipo eme, mara ehi, ehi tēi vahe yuvireco ndeu’ che yapave. Nderepoi chietera co nde reco tuprisa sui acoi ouse yande Yar Jesucristo.

¹⁵ Acoi oyepotase ari imombehupri: curi, ahese Tūpa omboyevira Guahir. Ahe niha ñepepi vaheño ité imboeteipri, seco pīrata catu vahe. Aheño ité niha mborerecuar ivate catu vahe rerecuar.

¹⁶ Aheño ité teco apirēhi vahe, tesapesa secoi; ndipoi oyemboya vahe sese, ndipoi eté que ava osepia vahe. jĕgüe tehi, imboeteipri tasecoi opacatu opīratasa apirēhi vahe rese!

¹⁷ Acoi imbahe eta vahe co ivi pipe eyocuai: toyemboivate ai eme, iyavei toyeroya rai eme ombahe eta rese tēi yuvireco. Esepia, ahe ĕgüe ehi tēi vahe. Iyacatu rumo Tūpa rese oyeroyara yuvireco. Ahe niha opacatu mbahe icatupri vahe ombou yandeu nara yande rembiporuguā.

¹⁸ Eyocuai avei evocoi ava: toyuvirecoi mbahe yar nungar mbahe aviye vahe aposa pipe. Iyavei toyemoingatūño acoi mbahe vireco vahe mboyaho āgua ambuae ava upe yuvireco.

¹⁹ Evocoyase virecora mbahe aviye vahe, apirēhi vahe oyeupe nara yuvireco curi tecovesa supi eté vahe rereco āgua.

Timoteo cuaitarā ipa vahe

²⁰ Timoteo, esāro tupri co porombohesa supi tupri vahe Tūpa ombou vahe ndeu. Ereyapisacai rene ava tēi pihañemoñetasa ĕgüe ehi tēi vahe rese, iyavei porombohesa co coti tēi vahe rese avei. Esepia, amove ava aipo ehi co porombohesa rese, “Co ité, yande mboaracuara” ehi tupri tēi vahe yuvireco chupe.

²¹ Ipipe sui niha amove ava oyavi Tūpa reroyasa yuvireco. Aviye, yande Aposar tande rovasa. Aipo rupive.

PABLO REMBICUACHIA IMONŨUVIRIOSA TIMOTEO UPE TIMOTEO

Pablo mahenduhasa Timoteo upe

¹⁻² Che, Pablo, amondo co cuachiar ndeu, che rembiaisu, che rahir nungar, Timoteo. Che niha Jesucristo apóstol aico Tūpa remimbotar rupi acoi “che amondora teco piasu che reroyasar uve” ehi vahe rupi tupri. Ahe cūrítei oime yandeu Jesucristo rese yande recose. Yande Ru Tūpa iyavei yandé Yar Jesucristo tombou oporovasasa, oporoparaisuerecosa nde reco tupri āgua ndeu.

Pablo oyocuai Timoteo Cristo recocuer mombehu āgua

³ Che yeroqui pāhuvé, chemahenduha nde rese pītu, ari yacatu rupi. “Aviye ndeu” ahe Tūpa upe nde recocuer rese. Che aporaviqui tupri ité Tūpa rese che pihañemoñeta tuprisa pipe yepi inungar che ramoi eta oyapo yuvireco aracahe.

⁴ Ndacheresaraí eté acoi nde yaseho agüer sui. Iyavei oroepia pota tēi che yemboviharete āgua.

⁵ Supi eté chemahenduhaño ité nde Tūpa reroyasa supi eté vahe erereco vahe rese. Iyavei nde yari Loida, nde si Eunice, ahe niha yipindar ēgüe ehi yuvireco. Evocoyase ayeroyaño ité nde rese, nde avei ēgüe erese.

⁶ Sese che oromonguerēhi embouvicha catu co Tūpa ombou vahe ndeu acoi amondose che po nde harive; ahe ereco catu ndeyeupe.

⁷ Esepia, Tūpa nomboui siquiyesa yandeu. Ahe rumo ombou yande reco moviracuasa, poroaisusa, iyavei yande mbopihañemoñeta tupri āgua.

⁸ Evocoyase eresiquiye eme catu yande Yar recocuer mombehu. Nderechī chiaveira che roquendasa sui tēi. Esepia, yande Yar recocuer mombehusa sui tēi niha che roquenda yuvireco. Iyacatu rumo, nde avei ereñemosañora co mbahe-mbahe tēi Tūpa pīratasa pipe. Ahe oura ndeu ñehesa písirosa resendar mombehusa sui.

⁹ Tūpa niha yande písiro iyavei yande renoi yande reco tupri āgua sese, ndahei yande rembiapo pipe. Ahe rumo güemimbotar rupi yande raisu Cristo Jesús rese yande recose. Ahe Tūpa ité yande raisu yipisuive ivi apo vitéēhiseve.

¹⁰ Cūrítei rumo ahe omboyecua oporoaisusa yande Písirosar Jesucristo ouse, acoi ou vahe co ivi pipe manosa pīratasa recopi āgua. Iyavei ñehesa písirosa pipe avei oicua uca tecovesa ndopai vahe.

¹¹ Tūpa niha che cuai co ñehesa mombehu āgua. Che cuai avei apóstol che reco āgua iyavei che porombohe āgua.

¹² Sese niha che opacatu aiporara co mbahe-mbahe tēi vichico. Nachi eté rumo yande Yar rese che yeroyasa pipe. Esepia, aicua ahe vireco pīratasa acoi ñehesa ombou vahe cheu imocañēhi āgua acoi Jesús yevi āgua rupi eté.

¹³ Erecoveño ité porombohesa aviye vahe che suindar, iyavei eicoño ité Tūpa rese nde yeroyasa pipe iyavei poroaisusa yareco vahe pipe Cristo rese yaicose.

¹⁴ Esāro avei co ñehesa aviye vahe Tūpa ombou vahe ndeu Espíritu Santo reco pīratasa pipe yareco vahe yandeyese.

¹⁵ Ereicua niha co ava opacatu Asia pipendar oyepepiño che sui yuvireco. Ipāhuvé yuvirecoi mbia ñuvirío, ahe serer: Figelo, Hermógenes.

¹⁶ Yande Yar tomondo paraisuerecosa Onesíforo mu upe. Esepia, Onesíforo setá yupagüer che mbovīha. Iyavei nochi eté ava rovaque che roquendasa sui.

¹⁷ Ouse rumo Roma ve, ndopituhui eté che reca.

¹⁸ Yande Yar tomondo oporoparaisuerecosa chupe ahe ari pipe curi. Iyavei nde ereicua tupri ité ahe mbia yande pīvīi vahe Efeso ve.

2

Jesucristo sundao oyemoviracua vahe

¹ Iyavei nde no, che rahir, eyemoviracua mbahecuasa Jesucristo ombou vahe pipe ndeu.

² Acoi che porombohesa eresendu vahe ava rehi rovaque amondo vahe ndeu, embohe tupri mbia oyeroya vahe, oicatu vahe avei ambuae mbohe āgua.

³ Nde eyemoviracuaño teco así upe Jesucristo uve nara inungar sundao oyemoviracua vahe ité.

⁴ Ñepe yepe sundao ndosirii eté ocuaita sui. Esepia, ahe oyemoingatu voi eté ocuai āgua güerecuar upe.

⁵ Iyavei iguayi rai vahe, ndoipisii chira porerecosa oguayi tupriēhi pipe.

⁶ Iyavei yande inungar que ava oñoti vahe mbahe, ahe rane omonuha güemiti yaviyese oyeupe yepi.

⁷ Eyapísaca tupri co che ñehe rese. Yande Yar niha osenducua uca tuprira opacatu co mbahe ndeu.

⁸ Iyavei no ndemahenduha Jesucristo rese. Ahe niha ocuerayevi vahe. Iyavei aracahendar mborerecuar David suindar secoi. Co niha ñehesa ñepisírosa resendar amombehu vahe vichico.

⁹ Co ñehesa mombehusa sui tēi che mombaraisu yuvireco. Che roquendasave aviye oporapichi vahe che rereco yuvireco. Tūpa Ñehengagüer mombita rumo ndoicatu eté yuvireco.

¹⁰ Sese che añemosañu opacatu mbahe-mbahe tēi upe opacatu Tūpa rembiporavo recocuer aviye água rese ‘tovireco catu písírosa porañete, apirēhi vahe Jesucristo rese yuvireco’ che yapave.

¹¹ Co niha supí tupri vahe: Yamanose Cristo rese, ahese yaicove aveira sese.

¹² Yañemosase mbahe tēi upe, ahese yande yaicora mborerecuar imborerecuasave ipiri. “Ndaicuai Jesucristo” yahese, ahese ahe avei, “Ndopocuai vahe” ehiñora yandeu.

¹³ Yepe co coti tēi yarovara yande recocuer seroyaēhisave, ahe rumo ndovirovai chietera güeco ñvisa.

Esepia, ndoicatu, “Ndahei che ahe aico” ehi vaherā.

Ava osē tupri vahe güecoñhasa Tūpa upe nara

¹⁴ Emomahenduha yuvireco co ñehesa rese, iyavei eyocuai Tūpa rovaque: topoi ñehepoepi-episa sui yuvireco, co ñehepoepi-episa ēgüe ehi tēi vahe. Esepia, omomara ambuae ava osenducua ñehe rai yuvireco.

¹⁵ Eyapo tupri mbahe opacatu nde catugüer rupi nde recocuer mboyecua água Tūpa rovai inungar oporaviqui tupri vahe, nochi vahe. Ēgüe ere, eporombohe tupri ñehesa supí eté vahe rese.

¹⁶ Eyepepi ñehe tēisa, ēgüe ehi tēi vahe sui. Esepia, co nungar ñehesa tēi ombouvicha catu mbahe naporai vahe.

¹⁷ Iyavei iporombohesa rai oyembouvicha inungar caracha vai ndocuera catui vahe, oyembouvicha-vichaño yepi. Ēgüe ehi Himeneo, Fileto

¹⁸ oyavi porombohesa supí eté vahe sui yuvireco. “Opa cuerayevisa. Ndipo iri chira” ehi tēi yuvireco. Ipipe Jesús reroymas oipihañemoñeta rerova yuvireco.

¹⁹ Tūpa rumo omondo mbahe moviracua tupri água, sese icuachiasa aipo ehi vahe: “Yande Yar oicua ité oyeupendar ava” ehi, iyavei, “Opacatu yande Yar rer vireco vahe, toyepipi mbahe naporai vahe sui yuvireco yepi” ehi.

²⁰ Oí guasu pipe, ndahei guarepochi, oro apopri güeraño oime, oime avei ivirape, ñaihu apopri avei no. Ñepeí iporupirā ari imboeteisa pipe nara, ambuae rumo ari rupi iporupirā.

²¹ Acoi ava oñemotiro vahe co tecocuerai sui Tūpa upe nara, ahe ipehasa inungar vaso oro apopri poromboeteisa pipe iporupirā; ahe ava oyemoingatu voi eté oico mbahe icatupri vahe apo água Tūpa upe.

²² Eyepepi mbia chíhivahe pihañemoñeta rai tēisa sui. Emohivi tupriño ité nde recocuer sereco. Eyeroyaño ité Tūpa rese. Esaisu catu avei ava, eico avei nde reco tupri pipe, inungar Jesucristo reroymas oyapo opihañemoñeta tuprisa pipe yuvireco.

²³ Eremboyeroyai rene ñehesa porandu-randu tēisa, ēgüe ehi tēi vahe. Ereicua niha ichui tēi oime yeamotarēhisa yepi.

²⁴ Iyavei yande Yar rese oporaviqui vahe, ndiyai oyeecopi oñehe pipe yuvireco. Iyacatu rumo, aviñera secocuer opacatu upe, eporombohe tuprira, oñemosañora ombahe mboasiñhisa pipe oico.

²⁵ Iyavei omboaracuara güeco asiñhisa pipe acoi ava ndiporeroyai vahe. Esepia, aviyeteramo Tūpa osecuñarora ipihañemoñeta raisa oyeupe yevi iri água: ipipe sui porombohesa supí eté vahe oicuaru yuvireco.

²⁶ Ipipe sui avei toyemopoase, toyuvinose Carugar povri sui semimbotar apo iriñhi água.

3

Mara ehira ava ari ipa vahe pipe curi

¹ Iyavei tereicua ari ipa vahe yepotasa, ahese oimera tecocuer yavai catu vahe.

² Ahese ava ahe ae tēi oyeaisura yuvireco, guarepochi tēi oipota raira, oyemboivate aira, oyemboetei ai tēi aveira. Oñehe raira Tūpa rese yamotarēhisave. Nomboyeroyai chira

oyesupa yuvireco. Setá aveira, “Aviye ndeu” ndehi vahe ava upe. Iyavei nomboetei chira Tūpa rese pīhañemoñetasa yuvireco.

³ Ndosaisui chira oyesuindar yuvireco. Niñeroi chiveira oyeupe yuvireco. Iyavei imahechiroi aira. Noñemosai chira mbahe tēi apo āgua yuvireco. Güeco así pipe avei yuvirecoira. Iyavei opacatu mbahe aviye vahe oyamotarēhira yuvireco.

⁴ Iyavei omondora ava yamotarēhimbar upe, ndiporomboetei chira güemimbotar apo yuvireco. Iyavei oyemboivate aira yuvireco, osecara güemimbotar tēi oyemboviha āgua yuvireco. Ipipe rumo Tūpa ndosaisui chira yuvireco.

⁵ Ahe inungar-ra Tūpa rese ité yuvirecoi vahe viña. Tūpa pīratasa rumo nomboyecuai chietera güembiapo pipe yuvireco oyes.

Sese nde, eyepepiño evocoi nungar ava sui.

⁶ Esepia, evocoi nungar ava pāhuve oime yuviroiqueño tēi vahe oi rupi cuña ndoicatu vahe angaipa rerecosar mbopa āgua. Esepia, ahe cuña opīhañemoñeta raísa pipe yuvirecoi vahe.

⁷ Yepe oyapisaca tupri tēira ñehesa rese yuvireco viña, ndosupití eté rumo co porombohesa supi eté vahe renducua āgua yuvireco.

⁸ Inungar co ava ipaye vahe Janes, Jambres serer vahe oyemboyere Moisés amotarēhi yuvireco, ēgüe ehi avei evocoi ava porombohesa supi eté vahe amotarēhisar yuvireco. Ahe oyemomara vahe opīhañemoñeta rai pipe yuvireco. Ndovíroyai eté Jesús porombohesa yuvireco.

⁹ Ndoporombopa iri chira rumo yuvireco. Esepia, opacatu ava oicua ra yuvireco imbahecuāñi rese, inungar co ñuvirío mbia Moisés amotarēhimbar yuvirecoi aracahe.

Timoteo cuaitarā ipa vahe

¹⁰ Nde rumo che reco rupi tupri ité ereico. Esepia, ereroya tupriño ité che porombohesa, che pīhañemoñetasa, che Cristo rese yeroyasa, che reco mbegüesa, che poroaisusa iyavei che ñemosasa

¹¹ opacatu mbahe tēi porarasa rese. Nde niha ereicua opacatu mbahe tēi oime vahe cheu co tecua guasu, Antioquia ve, Iconio ve, Listra ve avei no, iyavei che paraisusa mara-mara tēi che rerecose yuvireco. Yande Yar rumo che písiro opacatu evocoi mbahe-mbahe tēi sui.

¹² Supi eté opacatu acoi Jesucristo rese güecocuer víreco pota vahe oiporarara mbahe-mbahe tēi yuvireco.

¹³ Ava secocuer naporai vahe rumo, iporombopa serai vahe avei ombouvicha catura güecocuerai; oporombopa-mbopa tēira yuvireco. Iporombopasa pipe rumo ambuae omboyevira chupe.

¹⁴ Nde rumo ereyemoviracuaño itera acoi ereyembohe vahe rese. Ahe ereroya tupriño ité, Esepia niha, nde mbohesar ereicua.

¹⁵ Iyavei eyemomahenduha co rese: nde chíhivahe suive ité niha ereicua Tūpa ñehe icuachiapri eico. Ahe niha nde mombahecua vahe nde písiro āgua Jesucristo reroyasa pipe.

¹⁶ Opacatu co ñehesa icuachiapri ou vahe Tūpa sui, aviye ai eté porombohe āgua, iyavei poromboyapisaca āgua, poromboaracua tupri āgua iyavei ava upe ñehe tupri āgua secocuer mohívi āgua yepi.

¹⁷ Ichui, ava Tūpa rese yuvirecoi vahe oyemoingatu voira opacatu tecocuer tupri apo āgua yuvireco.

4

¹ Iyavei no, co rese che orocuai pota Tūpa rovaque, Jesucristo rovaque avei acoi ou vaherā omborerecuasa reseve oicove vahe, omano vahe recocuer rese porandu āgua.

² Emombehu Tūpa Ñhengagüer ari rupi. Erova ité ava reco. Eporomboaracua, eporomgüerēhi tupri avei opacatu nde reco asiēhisa pipe.

³ Esepia, coipe ava ndosendu pota iri chira porombohesa aviye vahe yuvireco. Ahese güemimbotar tēi osecara ombohe āgua, güemimbotar tēi avei omombehu ucara oyeupe yuvireco.

⁴ Iyavei oyepepira co mbahe supi eté vahe sui. Viroyara rumo opacatu ava remimombehu tēi yuvireco.

⁵ Nde rumo, ererecoveñora nde aracua tuprisa. Eñemosañi mbahe naporai vahe upe. Ndehañeco catu ñehesa písirosa resendar mombehu āgua. Emboaviye tupri avei opacatu nde poraviquisa.

⁶ Vírovi ari che retecuer mondo āgua manosave inungar mbahe seropovēhepri yande Yar upe.

⁷ Ayapopa che recoeté pipe che poraviquisa aviye vahe che amotarēhimbar pāhuve. Amboaviye che cuaita. Ndayepepi eté che yeroyasa sui.

⁸ Cūrítei che rãro ivave co porerecosa che poraviqui aviye vahe resendar. Yande Yar mborerecuar seco ivi vahe niha omboura cheu ahe ari pipe. Ndahei chira cheu güeraño. Ombou aveira opacatu Cristo raisusa pipe iyevisa osãro vahe upe yuvireco.

Pablo, “Eyu rane che repia” ehi Timoteo upe

⁹ Ndepayava catu eyu che repia.

¹⁰ Esepia, Demas che reya co mbahe ivi pipendar tēi potasave, ichui tēi oso tecua Tesalónica ve. Crescente oso tecua Galacia rupi. Iyavei Tito oso Dalmacia ve.

¹¹ Lucas güeraño oicove che piri. Eseca Marcos, tou nde rupi che pítiviã ãgua mboraviqui rese.

¹² Tíquico amondo tecua Efeso ve.

¹³ Acoi ereyuse, eru avirave che yemboyohasa aseya vahe Troas ve Carpo rētave. Iyavei cuachiar guasu, ambuae cuachiar reseve, ahe aipota catu vahe; erupa eyu.

¹⁴ Alejandro, guarepochi mombesar, oyapo mbahe tēi cheu. Yande Yar rumo oicuaa sembiapogüer rese chupe.

¹⁵ Iyavei nde eicua catu ichui. Esepia, ahe yande amotarēhi mbahe yande remimombehu rese oico.

¹⁶ Yipindar añehese che yoepi ãgua mborerecuareta rovai, ndipoi eté que che pítivisar; opacatuño ité che reya yuvireco. Tüpa tiñero sese yuvireco chupe.

¹⁷ Yande Yar Jesucristo rumo che pítiviã. Che momirata co ñehesa pĩsirosa resendar mombehu tupri ãgua opacatu ava ndahei vahe judío upe. Ēgüe ehi avei che renose mbahe tēi sui.

¹⁸ Ahe che pehara opacatu mbahe-mbahe tēi sui iyavei che pĩsirora oyepiri ivave che so ãgua. ¡Ēgüe tehi timboeteisa catu yande Yar apirēhi vahe yepi!

Mahenduhasa opacatu upe

¹⁹ Emombehu che mahenduha Prisca upe, Aquila upe iyavei opacatu Onesiforo rēta pendar upe avei.

²⁰ Erasto opita Corinto ve, Tróximo rumo imbaheasi, evocoyase aseya Mileto ve.

²¹ Ndepayava catu eyu irohi yu renondeve. Imahenduha yuvireco nde rese Eubulo, Pudente, Lino, Claudia iyavei opacatu yande Yar viroya vahe yuvireco.

²² Yande Yar Jesucristo toico nde rese. Iyavei Tüpa tape rovasa opacatu pe rereco. Aviye. Aipo rupive.

PABLO REMBICUACHIA TITO UPE TITO

Pablo mahenduhasa Tito upe

¹ Che, Pablo, Tüpa rembiguai aico iyavei Jesucristo apóstol semimbou aico Tüpa rese reyoyasa mondo ägua sembiporavo eta upe iyavei Tüpa rese pihañemoñetasa supi tupri vahe cua uca tupri ägua.

² Esepia, tecovesa apirêhi vahe rãrosa pipe sui viroyara, oicua aveira yuvireco. Tüpa ndoporombopai vahe niha omombehu co tecovesa mondo ägua ivi apo viteêhiseve oico.

³ Ichui cūrítei ari oyepota yandeu iñehengagüer cua ägua. Sese Tüpa, yande Písirosar, che cuai oñehengagüer mombehu.

⁴ Tito, co che ñehe aicuachía ndeu; nde niha che rahir ité ereico Jesucristo rese yande recosa pipe. Esepia, oyoya yaroya vahe yaico. Yande Ru Tüpa, yande Písirosar Jesucristo tombou oporovasasa nde reco tupri ägua ndeu.

Tito poraviquisa caha pãhu Creta ve

⁵ Che oroeya vitu co caha pãhu Creta ve mbahe opita vite vahe moingatu tupri ägua. Iyavei, “Eiporavo ava, Jesucristo viroya vahe rãro ägua ñepeí-peí tecua rupindar” ahe acoi ndeu cuese.

⁶ Evocoi Jesucristo viroya vahe rãrosar toyuvirecoi güeco tupri ägua. Tipo eme “co oyapo mbahe” ehi-ehi tēi vahe yuvireco oyeupe. Ñepeíño güembireco virecora yuvireco; tahir evocoiyase Jesucristo reroyasar pãvera. Iyavei ndoyuvirecoi chira ndoyemboaracuai vahe nungar oporoyaêhisa pipe ambuae ava ñeheêhi ägua sese yuvireco.

⁷ Acoi Jesucristo reroyasar rãrosar yuvirecoi vahe, ahe icuaita mbahe Tüpa upendar rese. Sese taseco ivi tupri yuvireco. Iyavei toico eme oporeroyaêhisa pipe, toñemoiro eme avei, ndahei chiaveira caguar tēi; ndivava serai chiaveira, tiguarepochi pota rai eme yuvireco.

⁸ Iyacatu rumo omoinguera ava oyepota vahe güetave oyepiri. Iyavei aviye aira yepi. Osãro tuprira güecocuer. Iyavei taseco ivi güeco catupri pipe Tüpa upe. Tosãro tupri avei opihañemoñetasa yuvireco.

⁹ Iya oyemboya catu oyembohesa supi tupri vahe rese yuvireco. Ipipe sui tomonguerêhi catu ambuae yuvireco co ñehesa maranehi pipe iyavei ambuae seroĩrosar pihañemoñeta mohivi ägua.

¹⁰ Esepia, oime setá nimbahe reroyai vahe; judío “peymbocircuncida pe ñepisiro ägua” ehi vahe pãhuve oime catu evocoi nungar. Ahe omondo-mondo tēi vahe oñehe, ombopa tēi vahe avei ava yuvireco.

¹¹ Egüe ehi vahe iyacatu pemonguiriri. Esepia, ahe niha setá ava oñemu vahe omboyepipi uca porombohesa supi tupri vahe sui yuvireco. Oporombohe mbahe co coti tēi vahe rese guarepochi rereco ägua tēi yuvireco.

¹² Ñepeí mbia, otüpa ñehe mombehusar, Creta iguar ae aipo ehi omu rese oñehe: “Co Creta iguar yuvirecoi vahe semirãnete ai, mbahe mimba nungar tēi, icaru ai, yangaipa vai yuvireco yepi” ehi oñehe.

¹³ Supi eté aipo ehi; sese emboaracua pĩrata ité. Evocoiyase toviroya tupri Tüpa yuvireco.

¹⁴ Iyavei toviroya eme co judío oyesui tēi mbahe omombehu vahe iyavei ava porocuaíta tēi yuvireco. Esepia, ahe oyemboyere mbahe supi vahe sui yuvireco.

¹⁵ Acoi ava ndaseco marai vahe upe opacatu mbahe nimarai. Ndiporteroyai vahe, ipihañemoñeta rai tēi vahe upe rumo, ndipoi eté mbahe nimarai vahe. Esepia, ipihañemoñeta, yaracuasa avei naporai eté.

¹⁶ Iyavei, “Che aicua Tüpa” ehi tupri tēi angahu yuvireco. Mbahe sembiapo rese rumo icuasa seroyaêhisa yuvireco. Ahe niha ava ndosepia potai vahe, ndiporteroyai vahe yuvireco, ndoicatui mbahe aviye vahe apo yuvireco yepi.

2

Porombohesa nimarai vahe

¹ Nde ñehe toyoya tupri co porombohesa nimarai vahe rese yepi.

² Evocoiyase mbia oñiaro catu vahe Tüpa reroyasar toñearo tupri, imboyeroyapri toyuvirecoi, tosãro tupri güecocuer, toviroco tupri avei Tüpa reyoyasa, oporoaisusa. Iyavei güeco mbegüesa pipe toñemosa mbahe-mbahe tēi upe.

³ Ēgüe tehi avei cuña otïaro vahe Tûpa reroyasar yuvireco: güeco tupri tovireco oporom-boeteisa pipe yuvireco. Iyavei timahechiroi eme, ndosavaipoi chiaveira. Ahe rumo omboyecuara güecocuer aviye vahe,

⁴ ombohera cuñatai imer raisu ägua, imembrî raisu ägua avei.

⁵ Tombohe avei seco tupri ägua, iñearo tupri ägua angaipa sui iyavei sêta pipendar rese hañeico tupri ägua yuvireco. Tomboaracua avei seco aviye ägua, imer mboyeroya ägua avei. Evocoyase noñehe-ñehe têi chira ava Tûpa Ñehengagüer rese yuvireco.

⁶ Ēgüe ere avei emonguerêhi mbia chîhivahe secocuer rese iñearo tupri ägua.

⁷ Iyavei emboyecua nde recocuer aviye vahe opacatu mbahe rese yuvireco chupe; nde imbohe tuprisa pipe emboyecua nde reco maranehisa, nde poromboeteisa avei.

⁸ Iyavei ereñehera nde reco tupri pipe. Ipipe ambuae noñehe rai chira yuvireco nde rese. Evocoyase yande amotarêhimbar yuvinochira ndoicatuise, “Mbahe” ohe ägua yuvireco yandeu.

⁹ Emboaracua avei mbiguai yuvirecoi vahe: toviroya opacatu mbahe rese güerecuar, tomboyeroya imboeteisave, toiñehepoepi eme avei yuvireco.

¹⁰ Iyavei toñomi eme mbahe. Iyacatu rumo seroyapri tupri yuvirecoira. Evocoyase opacatu osepiase seco tuprisa, omboeteira yande Pîsirosar Tûpa recocuer resendar yembohesa yuvireco.

¹¹ Tûpa niha omboyecua oporoaisusa yandeu. Ahe güeru pîsirosa opacatu ava upe.

¹² Co poroaisusa Tûpa suindar yande mbohe mbahe-mbahe têi iyavei yande remimbotar têi reya ägua. Iyavei yande mbohe co ivi pipe yande ñearo tupri ägua, yande reco ivi ägua iyavei Tûpa mboetei ägua.

¹³ Iyavei yasäro yande viharetesa pipe Tûpa omboaviye vahe rä güemimombehu, ahe Jesucristo yande Tûpa seco ivatê vahe, yande Pîsirosar yevi irisa oporañetesa pipe.

¹⁴ Ahe oyemondo oyeyuca uca yande rese yande pîsiro ägua opacatu mbahe-mbahe têi sui yande reco moatiro tupri ägua. Evocoyase yande yaico chupe nara güeraño itê yande querêhisave opacatu mbahe aviye vahe apo ägua.

¹⁵ Evocoi rese erembohera, eremonguerêhira, eremboaracua aveira opacatu nde porocuaita pipe. Sese tipo eme que nde reeröirosar.

3

Jesús reroyasar cuaita

¹ Co rese emomahenduha: toyapo ava mborerecuar guasu porocuaita yuvireco iyavei opacatu ambuae mborerecua-recuarmi porocuaita avei. Iyavei toyemomingatu tupri opacatu mbahe aviye vahe apo ägua yuvireco.

² Toñehe-ñehe têi eme ambuae ava rese yuvireco. Iyavei tiñemoiro serai eme, toporoaisu, tomboyecua avei güeco mbegüesa opacatu ava upe yuvireco.

³ Esepia, yipindar yande avei ndayande mbahecuaï yaico iyavei ndayaroyai Tûpa. Ocañi têi vahe yaico, iyavei yande mbiguai têi yaico opacatu mbahe yande remimbotar apo pipe; iyavei yaseca-seca mbahe têi vahe yande yemboviha ägua. Iyavei yaicoño mbahe têi pipe, yaipotañi têi ambuae ava mbahe, yamotarêhimbrî yaico iyavei yandeyeupe ae-ae yayeamotarêhi.

⁴ Ipare rumo Tûpa, yande Pîsirosar, omboyecua güeco tuprisa, oporoaisusa opacatu ava upe.

⁵ Yande pîsiro, ndahei rumo yande rembiapo aviyesa sui, ahe rumo vireco oporoparisuerecosua yandeu nara. Ichui omoatiro yande recocuer yande reco mopiasu. Iyavei Espîritu Santo pipe yande recocuer recuñaro tecove piasu yande ägua.

⁶ Iyavei yande Pîsirosar Jesucristo rembiapo sui Tûpa ombou catu oEspîritu Santo yandeu,

⁷ ipipe yande reco ai sui yande renose yande reco ivi tupri ägua oporoaisusa pipe ‘toipisi co tecovesa apirêhi güemiaro yuvireco’ oya.

⁸ Aipo ñehesa supî etê vahe. Che aipota sese ereporombohera. Ipipe Tûpa reroyasar toyapo mbahe aviye vahe yuvireco. Evocoi ñehesa aviye itê opacatu oiporu vahe rä yuvireco.

⁹ Ereyepëpîra rumo opacatu co nungar mbahe sui: yipindar ñehesa yepoepi têisa sui, ipare aracahendar ava recocuer rese ñehesa sui. Ereyepëpi aveira iporomoñemoiro serai vahe sui, Moisés porocuaita resendar sui têi ñehepoepi-episa sui avei. Esepia, evocoi nungar mbahe êgüe ehi têi vahe.

¹⁰ Acoï ava omoimese yemboyahosa Tûpa reroyasar pâhuve, eñehe chupe. Nande reroyaise, eñehe iri chupe. Nande reroya catu itese, eremosera peyesui.

¹¹ Tereicua evocoi nungar ava oyavî vahe güecocuer yepi, ahe ae oyemocañî vahe oangaipa pîpe oico.

Tito upendar ñehesa

¹² Acoi amondose Artemas, anise Tíquico ndeu, eyu pîhaivi che repia tecua Nicópolis ve. Esepia, aheve apita pota sôhisa vahe pîtuhu rãro.

¹³ Eipîtivîi opacatu nde catugüer rupi ava recocuer moingatusar Zenas, Apolos avei. Ahe chupe emondó mbahe semimbotar. Evocoiyase toyuvîraso tupri oguatasa rupi; tipane eme que mbahe chupe yuvîreco.

¹⁴ Iyavei ambuae Jesús reroyasar eipe pendar toyembohe avei yuvîreco mbahe tupri apo ãgua iyavei ava mbahe chupe ipane vahe pîtivîi ãgua. Evocoiyase secocuer aviye itera yuvîrecoi.

Mahenduhasa iyavei porovasasa ipa vahe

¹⁵ Opacatu yuvîrecoi vahe cohava che pîri omondo omahenduhasa yuvîreco ndeu. Iyavei emombehu che mahenduhasa yande mborîpar iporeroya vahe upe. Tûpa tape rovasa eipeve opacatu. Aipo rupive.

PABLO REMBICUACHIA FILEMÓN UPE FILEMON

Pablo mahenduhasa Filemón upe

¹ Che, Pablo, che roquendasa Jesucristo recocuer sui tēi. Aicuachía co che ñehe yande rívrí Timoteo reseve ndeu, Filemón. Nde niha ore rembiaisu iyavei ore ndugüer ité Tüpa upe mboraviquí apo água ereico.

² Iyavei amondo co cuachiar yande reindri Apia upe, Arquipo upe avei. Ahe avei yande ndugüer mboraviquí apo água Tüpa upe nara yuvirecoi, iyavei opacatu Jesús reroyasar nde rētave oñemonuha vahe upe nara.

³ Yande Ru Tüpa, yande Yar Jesucristo tombou oporovasasa, güeco tuprisa avei pēu.

Filemón poroaisusa iyavei Cristo rese iyeroyasa

⁴ Che niha, “Aviye ndeu” ahe yande Ru Tüpa upe che yeruresa pipe nde rese yepi.

⁵ Esepia, ayandu aipo nde eresaisu iyavei ereroya yande Yar Jesús. Eresaisu avei opacatu ambuae seroyasar.

⁶ Aporandu Tüpa upe nde rese nde ereyeroyase yande Yar rese inungar ore ‘toicua tupri opacatu mbahe aviye vahe orovireco vahe nde Rahir Jesucristo reroyasa sui’ viya.

⁷ Cherorivete, ayemonguerēhi catu opacatu nde poroaisusa rese. Che rívrí, nde niha eremonguerēhi catu opacatu yande Yar reroyasar yuvireco.

Pablo oporandu mbahe aviye vahe rese Onésimo upe nara

⁸ Sese yepe che aico Cristo apóstol nde cuai água viña.

⁹⁻¹⁰ Che rumo aporandu ndeu nde poroaisusa rese mbahe aviye vahe apo água co nde rembiguigüer Onésimo upe nara. Che niha Pablo, acuacuami vichico. Cüritei rumo aico soquendapri Jesucristo recocuer sui. Co Onésimo secoi che rahir nungar yande Yar reroyasa pipe cohove che roquendasave.

¹¹ Aracaco co nde rembiguai secoise nde piri, ěgüe ehi tēi vahe secocuer ndeu viña. Cüritei rumo ěgüe ndehi iri chira oico ndeu, iyavei cheu no.

¹² Amboyevi co imondo ndeu eipeve. Eipisi inungar-ra che itera viña.

¹³ Che aipota opita vaherā nde nungar tupri che pítivii água viña, co soquendapri vite che recose Jesucristo ñehengagüer sui.

¹⁴ Che rumo ndaipotai mbahe apo nde pihañemoñetasa cuaēhi viteseve. Nde rumo ereyapora co mbahe aviye vahe nde remimbotar rupi, ndahehi chira che nde cuaisa pipe.

¹⁵ Aviyeteramo Onésimo oyepipi pucu raimi nde sui oyevi iri vaherā nde piri nara.

¹⁶ Ndahe iri chira mbiguai tēi. Ahe rumo aviye catu itera mbiguai güeco agüer sui. Esepia, yande rívrí niha yande rembiaisu secoi cüritei. Che asaisu etepri iyavei nde eresaisu catu irira che sui. Ndererecoi chira ava nungar tēi; erereco tuprira saisusa pipe yande rívrí nungar tupri ité yande Yar upe nara.

¹⁷ Inungar nde rívrí che rereco eve. ěgüe ere tupri aveira co mbia pisi.

¹⁸ Acoi oyapose mbahe ndeu, anise virocuase que mbahe nde sui, cheu emombehu. Che evocoiyase amboepira ndeu.

¹⁹ Che Pablo, aicuachía che po pipe ité seroya tupri água, ahe co amboepira ndeu; che nde mbohesa pipe sui ereroya yande Yar. Ipipe inungar ireve vahe ěgüe ere cheu. Che rumo, “Nderereve cheu” ndahehi eté ndeu.

²⁰ Supi eté, che rívrí, eyapomi mbahe icatupri vahe cheu che remimbotar yande Yar Cristo reroyasa pipe. Ipipe che mboviha catumí eve.

²¹ Che aicuachía ndeu. Esepia, aicua nde ereyapo tuprira aipo che porandusa, iyavei ereyapo catu itera co sui.

²² Iyavei amoha Tüpa che renose vaherā che roquendasa sui pe yeruresa pipe che so água eipeve pe repia. Sese emoingatumi avei che pítuhu água.

Mahenduhasa, porovasasa ipa vahe

²³ Che ndugüer, Epafras, omondo omahenduhasa ndeu. Ahe avei soquendapri cohove yande Yar Jesucristo recocuer rese.

²⁴ Iyavei Marcos, Aristarco, Demas, Lucas che ndugüer oporaviquí vahe Tüpa uve, ahe avei omondo omahenduhasa yuvireco ndeu.

²⁵ Yande Yar Jesucristo tape rovasa opacatu eipeve. Aipo rupive.

ICUACHIAPRI HEBREO YUVIRECOI VAHE UPE HEBREOS

Guahir Jesucristo pipe Tūpa oyemboyecua yandeu

¹ Aracahe suive setá yupagüer Tūpa omombehu uca yande ramoi eta upe oñehe mombehusar upe. Iyavei ambuae mbahe rupi oseca imombehu tupri āgua yuvireco chupe.

² Cūrítei yandeu omoñehe uca Guahir. Chupe avei oyapo uca opacatu mbahe. Ahe mbahe sembiapo chupe nara ité.

³ Ahe niha Vu Tūpa recocuer porañetesa secoi. Ēgüe ehi eté, ahe Vu recocuer tupri ité. Ahe opacatu mbahe omoviracua oñehe pīratasa pipe. Yande angaipagüer sui yande moatiro pare oso, oguapi Vu acato coti oī ivave cute.

Tūpa Rahir seco ivate catu Vu rembiguai iva pendar sui

⁴ Tūpa Rahir secoi ivate catu vahe Vu rembiguai iva pendar yuvirecoi vahe sui. Ahe vireco omborerecuasa ivate catu vahe ichui.

⁵ Esepia, Tūpa aipo ndehi eté güembiguai upe:

“Nde che Rahir ereico; co pipe amondo nde recove āgua” ndehi eté.

Iyavei:

“Che Tu aicora, ahe evocoyase che rahir secoira” ndehi avei chupe.

⁶ Ichui rumo ombouse Guahir ñepeí vahe co ivi pipe aipo ehi:

“Tomboetei opacatu che rembiguai yuvireco”

ehi.

⁷ Evocoyase güembiguai rese oñehe Tūpa aipo ehi icuachiapri arachendar pipe:

“Ayapo che rembiguai ivitu nungar, tata nungar avei cheu oporaviqui vaherā” ehi.

⁸ Tahir rese ñehesa rumo aipo ehi icuachiapri arachendar pipe:

“Che Yar Tūpa, nde mborerecuasa rumo apirēhi vaherā ité.

Ereporocuai nde reco ivi tuprisa pipe yepi.

⁹ Mbahe ihivi vahe raisusar ereico.

Iyavei mbahe naporai vahe raisuēhisar.

Sese nde Yar Tūpa ité, nde poravo, omondo avei torivetesasa ndeu ivate catu vahe opacatu nde mboetasasa sui” ehi.

¹⁰ Iyavei aipo ehi iri:

“Nde, ore Yar, yipisuive eremoviracua vahe ivi.

Nde ité avei ereyapo iva.

¹¹ Opacatu co nde rembiapo opa vaherā tēi,

inungar turucuar cuacua oyearo vahe opa.

Nde rumo apirēhi vaherā ité ereico.

¹² Ipape ereyapara inungar turucuar yapapri iyavei eresecuñarora inungar oturucuar osecuñaro vahe.

¡Nde rumo ndereñecuñaroi chietera!

Iyavei nde recocuer ndopai vaherā ité” ehi.

¹³ Ndaheí que ñepeí iva pendar güembiguai upe Tūpa aipo ehi:

“Eguapi che acato coti, ahese che amondora nde amotarēhimbar nde povrive” ehi.

¹⁴ Esepia, opacatu Tūpa rembiguai espíritu yuvirecoi chupe oporaviqui āgua, icuapri avei ava ipisiropirā pītívii āgua.

2

Yandemahemoha tupri yande písirosa rese

¹ Sese iyacatu co ñehesa yasendu vahe rese yayapisaca tupri catu co tecocuer piasu sui yande yepipiēhi āgua.

² Esepia, co Tūpa rembiguai remimombehugüer seroyapri ité secoi, iyavei oyemboan-gaipa vahe, ndoviroyai vahe avei imobaraisupri ité sembiapo rupi yuvirecoi aracahe.

³ ¿Mara yahera pīha evocoyase yande yañemi Tūpa ñemoirosa sui viña acoi ndayan-demahemoha tupriise co yande písirosa aviye vahe rese? Esepia, yande Yar ahe rane ité omombehu co ñehesa ñepisirosa resendar. Ipape sendusar, “Supi eté co ñehesa” ehi yuvireco. Ichui ahe avei omombehu yuvireco yandeu.

⁴ Iyavei Tūpa oyapo setá mbahe yavai rai vahe poromondiasa ndayasepiaí vahe. Iyavei oEspíritu Santo pipe, omboyoavirati mbahecuasa imbou yandeu güemimbotar rupi ‘toicua yuvireco co ñehesa supi tupri vahe’ oyapave.

Jesucristo ava nungar tupri secoi

⁵ Ndahei güembigui povrive omondo Tüpa ivi oime vaherã, acoi oromombehu vahe pëu.

⁶ Oime rumo icuachiapri aracahendar pipe omombehu tupri vahe:

“Che Yar, ¿uma vo evocoyase ava?

¿Mahera ndemahenduha ava tēi rese, iyavei eresãro no?

⁷ Ndaseta ariimi erereco ivi coti catu nde rembiguai sui.

Ipare voi rumo eremondo nde porañetesa imboetisave chupe.

⁸ Iyavei opacatu erereco uca mbahe nde rembiapo ipovrive” ehi imombehu.

Ëgüe ehise Tüpa, ndoseyai eté que ñepeí yepe mbahe ipo pendarēhi. Cūritei rumo ndaopacatu tupri vitei mbahe ipovrive.

⁹ Yaicua niha Jesús, ahe Tüpa güembigui sui ndaseta araviter ivi coti catu vireco. Oporoaisusa pipe oipota imano ägua opacatu ava repirã. Cūritei rumo iyemombaraisu pare, omondo oporañetesa imboetisave chupe.

¹⁰ Iyavei opacatu mbahe oime Tüpa upe, ichuindar avei ‘toyuviroique opacatu che rahir che reco porañetesave’ oyapave. Sese omombaraisu uca Guahir Jesucristo ‘tomboaviye tupri rane che remimbotar Poropisiroas güeco ägua’ oya.

¹¹ Esepia, opacatu vireco ñepeí Vu yuvireco co seco catupri vahe, seco mbocatuprisar avei. Sese Tahir nochí eté, “Che rivireta peico” ohe ägua vïroyasar upe.

¹² Ahe aipo ehi icuachiapri aracahendar pipe:

“Añehera nde rese che rivireta upe.

Asapucaí aveira sapucaisa ndeu opacatu ava ndeu oñemonuha vahe pâhuve” ehi.

¹³ Iyavei aipo ehi:

“Che ayeroya itera sese” ehi.

Ichui aipo ehi iri:

“Co oroico Tüpa rahir cheu ombou vahe rese” ehi icuachiapri pipe aracahe.

¹⁴ Inungar ava vireco vahe guahir, oyoya soho, suví; ëgüe ehi avei Jesús vireco voho, vuvi yande nungar; omano pipe sui omocañi vaherã iporoyuca ai vahe pïratasa; ahe Carugar.

¹⁵ Opacatu ava manosa sui osiquiyesa pipe mbiguai tēi nungar yuvirecoi vahe güecove viteseve, evocoi nungar sui senose ägua, ëgüe ehi Jesús.

¹⁶ Esepia, ahe ndoui Tüpa rembiguai pïtivíi ägua, ahe rumo ou Abraham suindareta pïtivíi ägua.

¹⁷ Sese niha tivireta nungar tupri ité oyapo Tüpa, “Toime che rovaque pahi rerecuar ivate catu vahe seco tupri vahe; taseco mbegüe avei, tomondo güetecuer ava angaipa repirã ñeroisa reime ägua” ehi.

¹⁸ Esepia, ahe avei oiporara Carugar poroãtoisa. Sese cūritei ahe oicatu ité ava Carugar remiatoi pïtivíi ägua.

3

Jesús ivate catu vahe Moisés sui

¹ Evocoyase, che rivireta, iporavopri, pe Tüpa remienoi peico vahe chupe nara. Peyapisaca tupri Jesucristo recocuer rese. Ahe secoi yandeu apóstol iyavei pahi ivate catu vahe yande yeroyasa.

² Ahe ité niha omboaviye tupri Vu remimbotar, osenoise imbou co tecocuer apo ägua inungar Moisés omboaviye tupri ocuaita Tüpa mbahe rãro aracahe.

³ Jesús rumo imboeteipri catu Moisés sui. Inungar acoi oi aposar imboeteipri catu oi sui secoi.

⁴ Esepia, ñepeí-peí oi vireco oaposar viña. Tüpa rumo opacatu mbahe aposar secoi.

⁵ Supi eté Moisés Tüpa rembiguai güeco pipe omboaviye opacatu oporaviquisa itüparo rese. Esepia, omombehu Tüpa omboyecua pota vahe ava upe yepi.

⁶ Cristo rumo tahir güeco pipe omboaviye ocuaita Vu tüparo rese. Ahe tüparo yande yaico yayeroyaño itese Cristo rese iyavei yasãroño itese yande yembovihasa pipe co mbahe aviye vahe oime vaherã yandeu curi.

Mbituhusa Tüpa upendar yuvirecoi vahe upe

⁷ Sese inungar aipo ehi Espiritu Santo icuachiapri aracahendar pipe:

“Co pipeve voi, pesenduse Tüpa ñehe,

⁸ peyepihamoatai rene catu chupe, ndapeicoi chira ava ndiava reroyai vahe nungar acoi ivi iporupirēhisa rupi Tüpa recoãhasar yuvirecoi vahe aracahe.

⁹ Aheve avei acoi che recoãha tēi pe ramoí mbahe güembiaipo pipe, yepe cuarenta araviter rupi osepia tēi mbahe che rembiapo yuvireco viña.

¹⁰ Sese añemoiro ahe ava upe, aipo ahe:

'Ipihañemoñeta rai co coti tēi vahe rese yepi iyavei ndoicua potai eté che recocuer yuvireco' ahe chupe.

¹¹ Sese che añemoiro ahe ava upe, 'Ñepeí reseve ndapepituhui chietera che pituhusa pipe' ahe yuvireco chupe" ehi aracahe.

¹² Che rivireta, peñearo catu; tipo eme que ñepeí ipihañemoñeta naporai vahe Tüpa seroyaëhisa pipe oyepepi vaheñã ichui.

¹³ Iya rumo peyemonguerëhi catu ñepeí-peí ari yacatu rupi cüritei pe recove pipe angaipa upe pe yembopa uca iriëhi ägua, pe mbahe reroya iriëhi ägua rese avei.

¹⁴ Esepia, yayemoviracua tuprise Cristo rese yande yeroyasa yipisuive yareco vahe pipe yande mano ägua rupi eté, ahese yaico itera sese.

¹⁵ Supi niha acoi aipo ehi ñehesa:

"Co pipe voi pesenduse Tüpa ñehe, peyepihamoatai rene catu chupe; ndapeicoi chira ava ndiava reroyai vahe nungar" ehi vahe.

¹⁶ ¿Ava pñha acoi ava iñehe mara vahe yuvireco Tüpa ñehe rendu pare chupe? Moisés remienose Egipto ivi sui ëgüe ehi yuvireco.

¹⁷ ¿Ava upe pñha acoi Tüpa oñemoiro cuarenta araviter rupi? Acoi oyemboangaipa vahe omanopa vahe yuvireco ivi iporupirëhisa rupi.

¹⁸ ¿Uma upe pñha acoi ñepeí reseve, "Ndapeiquei chietera che pituhusa pipe pe pituhu ägua" ehi Tüpa? Acoi vroyaëhisar upe aipo ehi.

¹⁹ Sese yaicua seroyaëhi pipe ndoicatui yuviroique ipipe.

4

¹ Oime vite Tüpa remimombehu yande yaique vaheñã ipiri yande pituhu ägua. Sese iya ité yañearo tupri. Aní chira que ñepeí pe pñhu pendar ndoiquei chira.

² Esepia, yandeu avei imombehusa ñehesa poropisirosa resendar inungar yande ramoí upe ivi iporupirëhi rupi yuvireco aracahe. Co ñehesa rumo ndoipitívii eté ahe ava yuvireco. Esepia, ahe osendu yuvireco seroyaëhisave tēi.

³ Yande rumo yaroya vahe, yaiquera yande pituhu ägua, ahe chupe Tüpa aipo ehi:

"Sese añemoiro ahe ava upe; ñepeí reseve, 'Ndoyuviroiquei chietera che pituhusa pipe opituhu ägua yuvireco' ahe" ehi.

Tüpa rumo yipive ité opa omboaviye oporaviquisa íva, ívi.

⁴ Esepia, co imbosietesa ari resendar ñehesa oime icuachiapri aracahendar pipe:

"Tüpa opituhu opacatu oporaviquisa sui imbosietesa ari pipe" ehi.

⁵ Iyavei aipo ehi iri icuachiapri pipe:

"Ndoyuviroiquei chietera che pituhusa pipe opituhu ägua yuvireco" ehi.

⁶ Ipane vite rumo amove ari yuviroique vaheñã ahe pituhusave. Acoi yipindar osendu tēi vahe rumo ñehesa poropisirosa resendar, ndoyuviroiquei eté seroyaëhisa pipe yuvireco.

⁷ Sese Tüpa omombehu tupri iri ambuae ari, chupe ité, "Co pipe" ehi. Ahe acoi coiyé mborerecuar guasu David upe omombehu ucasa aracahe yandeu icuachiapri pipe, aipo ehi vahe:

"Co pipe voi, pesenduse Tüpa ñehe, peyepihamoatai rene catu chupe" ehi vahe.

⁸ Ehi revo Josué omondose co pituhusa israelita upe aracahe viña, Tüpa evocoyase noñehe iri chira co ambuae ari rese viña.

⁹ Evocoyase oimeño itera mbíthusa iporavopri ava Tüpa upendar upe nara:

¹⁰ Acoi oique vahe evocoyase pituhusa pipe, opituhu oporaviquisa sui inungar Tüpa opituhu ombahe mboaviye pare aracahe.

¹¹ Sese yayemoviracua catura yande reique ägua evocoi mbíthusa pipe. Aní chira ava aracahendar seroyaëhisar recocuer rupi tupri avei yaicora.

¹² Esepia, Tüpa Ñhengagüer oicove vahe, ipirata avei. Ahe inungar avei guise saimbe catu vahe que ambuae guise pucu saimbe yoya vahe sui. Ahe oique vahe ité yande aviterve; ëgüe ehi avei iñhengagüer oñatoí eté yande hã, yande espíritu avei. Iyavei omboyecua tupri ité yande pihañemoñeta.

¹³ Ndipoi eté niha mbahe Tüpa rembiapo ñomipri ichui. Opacatu ité oicua, osepia avei opacatu mbahe. Ahe niha oporandura opacatu yande recocuer rese yandeu curi.

Jesús niha pahi ivate catu vahe secói

¹⁴ Jesús, Tüpa Rahir, pahi ivate catu vahe secói yandeu oique vahe ivave Tüpa piri. Sese yayemoviracuaño itera sese yande yeroyasa pipe.

¹⁵ Esepia, yande pahi ivate catu vahe oicuaño ité yande recocuer pĩrataẽhisa. Ahe avei niha yande nungar aracaco viroparaisu opacatu mbahe-mbahe tẽi güecoãhasa. Ahe rumo ndoyemboangaipai eté ipipe.

¹⁶ Sese yayemboya catura yande yeroyasa pipe yande Ru Tũpa rese. Esepia, ahe yande raisu ité. Ipipe sui tayande paradisuereco güeco aviyesa pipe yande pĩtivii ãgua mbahe tẽi oimese yandeu.

5

¹ Opacatu pahi ivate catu vahe iporavopri secoi ava pãhu sui ava recocuer reropovẽhe ãgua Tũpa upe iyavei porerecosa mondo ãgua chupe, mbahe mĩmba yucapri reropovẽhe ãgua avei ava angaipa repirã.

² Ahe pahi niha oiporara avei teco asisa ambuae ava nungar. Sese güeco asiẽhisa pipe oipĩtivii ava ndayaracuai vahe, oyavi vahe avei.

³ Ahe rumo güeco pĩrataẽhisa pipe viropovẽhe mbahe mĩmba yucapri Tũpa upe oangaipa repirã, opacatu ambuae ava angaipa repirã avei.

⁴ Ndiyai chira que ava oyesui tẽi pahi oyeapo. Tũpa ité rumo osenoira imboetei uca ãgua inungar acoi Aarõn upe aracahe.

⁵ Ëgũe ehi avei Cristo, ahe noñeenoi pahi ivate catu vahe güeco ãgua oyesui tẽi. Tũpa ité osenoi imboetei uca ãgua acoi aipo ehise:

“Nde che rahir ereico, co pipe amondo nde recove ãgua” ehi.

⁶ Aipo ehi avei ambuae icuachiapri pipe:

“Nde ereico pahi ivate catu vahe apirẽhi vaheerã, inungar tupri mbia Melquisedec serer vahe” ehi.

⁷ Co ivi pipe Cristo oicove vitesse, oyeroqui pĩrata oyasehosa pipe Vu Tũpa upe yepi. Esepia, ahe oicatu ipisiro ãgua manosa sui. Ëgũe ehi iporeroya tuprisa pipe, Tu osendu iyeroqui yepi.

⁸ Yepe Tahir ité viña, güeco paraisu pipe rumo oyembohe imboyeroya ãgua;

⁹ evocoiya güeco pipe omboaviye güeco catuprisa. Ipipe sui güeru poropisirosa ndopai vahe opacatu viroyasar upe nara.

¹⁰ Esepia, Tũpa niha osenoi pahi ivate catu vahe seco ãgua inungar Melquisedec aracahe.

Peicua catu, “Ndaroyai eté co tecocuer piasu” pe hesa sui

¹¹ Orovireco vite mo setã mbahe ore ñehe ãgua pẽu co mbahe tecocuer resendar rese. Yavai etepri rumo imombehu tupri ãgua. Esepia, pe ndapesenducua tupri vitei eté.

¹² Aracacove peporombohera viña; peipota vite rumo pẽu mbahe ndayavaimi vahe imombehu iri ãgua yembohesa Tũpa suindar. Ndayemoviracuai rumo; peihu iri pota cambi mbahe sãta vahe hu rãgũer sui.

¹³ Esepia, acoi Ëgũe ehi vahe pĩtami osi rese ocambu vite vahe nungar tẽi pe recocuer. Ipipe sui ndapeyembohei eté Tũpa Ñhengagũer rese mbahe tupri pe reco ãgua.

¹⁴ Co tembihu sãta vahe rumo ahe ava ocuacua vahe upe nara. Esepia, ahe oyembohe tupri catu ñhengagũer rese güeco tupri ãgua yepi. Ipipe sui oicua ité mbahe aviye vahe poravo mbahe naporai vahe sui.

6

¹ Sese ndiyai yayembohe yembohesa yipindar vahe Cristo resendar ahe avei-vei vahe rese. Iya rumo yaguata catu tenonde inungar ava oicua catu vahe mbahe. Ipipe sui tayaicua seroyasa pipe ambuae mbahe Tũpa suindar co mbahe rese yembohe iri rãgũer sui. Ahe yipindar vahe co: yande ñecuñarosa, yande reco ai sui yande poisa, manosa apirẽhi vahesave yande rerasoẽhi ãgua, iyavei Tũpa rese yande yeroyasa,

² yembohesa poroãpiramosa resendar, po mondosa Tũpa reyoyasar harive, omano vahe cuerayevisa iyavei ava recocuer rese porandusa resendar avei.

³ Tũpa oipotase yayembohera ambuae mbahe yavai catu vahe rese.

⁴ Acoi ava yipindar osenducua vahe Tũpa remimbotar, osãha vahe avei Tũpa suindar porerecosa iyavei oyandu ité Espiritu Santo güecocuer pipe,

⁵ osãha vahe avei Tũpa Ñhengagũer aviye vahe iyavei osãha chĩhi ipĩratasa curi oime vaheerã viña,

⁶ oyepepise rumo ichui, ndayaicatu iri seco reroyevi iri ãgua Tũpa upe. Esepia, yaticapri nungar iri eté vireco Tũpa Rahir iyavei ambuae ava omoñehe-ñehe tẽi iri sese.

⁷ Esepia, ava inungar ivi osupite vahe amar oquise yepi. Iha tuprise mbahe miti oyese oporaviqui vahe upe, evocoiyase evocoi nungar ava oipisira porovasasa Tũpa suindar.

⁸ Ahe ivi rese yu pãve tẽi oyesuse, ahe naporai eté. Evocoi nungar ava Tũpa poromo-cañisavri tẽi, sapipirã tẽi avei yuvirecoira curi.

Yande remiario aviye vahe yande moviracua tupri vahe

⁹ Che mboripar saisupri, yepe aipo orohe pëu viña, oromoha ité rumo mbahe aviye catu vahe pëu co ñepisirosa pare.

¹⁰ Esepia niha, Tüpa seco aviye vahe, ahe ndasesarai chietera pe rembiapo aviye vahe sui pe poroaisusa pemboyecua vahe peipitiviise seroyasar. Ahe niha co peyapoño vite peico.

¹¹ Ore rumo oroipotaño ité ñepepe-pepe pe pemboyecuaño itera ari cañi rupi eté co pereco vahe pe querhisa pe remiario aviye vahe rupiti ñgua.

¹² Ndoroipotai pe atëhisa perecora co tecocuer upe. Oroipota rumo pe saquicue moñara acoi ava yande Yar rese oyeroyasa pipe iyavei güeco ñemosasa pipe oipisi vahe porerecosa imombehupri Tüpa sui.

¹³ Peyemomahenduha acoi Tüpa güemimbotar omombehuse Abraham upe: “Che rer pipe amboaviyera co mbahe ndeu” ehise chupe aracahe. Esepia, ndipoi eté ambuae ivate catu vahe ichui ñgüe ehi vaherã. Sese ahe güerer ité osenoi

¹⁴ aipo ehi chupe: “Supi eté oroovasa itera, iyavei setara ava nde suindar” ehi.

¹⁵ Evocoiyase Abraham osãro güeco mbegüesa pipe, ñgüe ehi ipisi oyeupendar Tüpa remimombehu.

¹⁶ Ava omoingatu potase oñehe, ivate catu vahe rer pipe omoingatu yuvireco yepi. Ñgüe ehise yuvireco, ndiya iri eté ipare oñehe vitera sese.

¹⁷ Tüpa güerer pipe ité omoingatu oñehe omombehuse güemimbotar aracahe ‘toicua tupri che remimombehu pisi ñgua che ñehe ñepepe reseve vahe yuvireco, iyavei amboaviye itera che remimombehu chupe’ oyapave aipo ehi aracahe.

¹⁸ Ñgüe ehi oime ñuvirio mbahe imboyepoepipirëhi: Tüpa niha ndoporombopai vahe ité, ipipe avei yande monguerëhi catu yande yasaca vahe iporopitiviisa iyavei yayeroya vahe ñearosa yandeu ombou vahe rese.

¹⁹ Co mbahe yasãro vahe omoviracua tupri yande hã, inungar mbahe carite guasu mombitasa omoviracua tupri carite ivitu sui. Ñgüe ehi yande remiario oique turucuar guasu tüparo asiasa cupeve oi imaranehi catu vahesave ivave.

²⁰ Aheve Jesús oique yande raperã mboi ñgua. Ñgüe ehi ahe apirëhi vahe ité pahi ivate catu vahe güeco ñgua, inungar tupri Melquisedec aracahe.

7

Jesús pahi Melquisedec nungar tupri ité

¹ Co Melquisedec aipo mborerecuar guasu Salem pendar, iyavei pahi Tüpa ivate catu vahe upendar secoi aracahe. Abraham oyevise peri rupi ovavasa sui ou mborerecuar guasu eta momba pare, ahese aipo osë voi eté oso Abraham rovaichi Tüpa porovasasa mondo ñgua chupe.

² Iyavei aipo Abraham omondo oporerecosa vavasa sui mbahe güeru vahe diez vahe sui ñepepe-pepe chupe. ‘Mborerecuar guasu secoi vahe’ oyapave Melquisedec ehi. Iyavei ahe mborerecuar Salem pendar, ahe tecua Salem ‘mbahe tupri’ oya; sese mborerecuar guasu mbahe tupri vahe secoi.

³ Ahe iyésupa rumo ndicuasai eté iyavei ichi, tamoi, ari iharagüer ndicuasai vahe ité. Ndicuasai avei imano agüer yuvireco. Secocuer rumo inungar Tüpa Rahir recocuer; ahe pahi apirëhi vahe ité.

⁴ Peyapisaca tupri co mbia recocuer rese; ivate ité secoi aracahe. Yande ramoi Abraham teieté avei omondo diez sui ñepepe-pepe mbahe porerecosa mborerecuar guasu eta sui güembierocua chupe.

⁵ Moisés porocuaita pipe rumo opacatu Leví suindar pahi eta yuvirecoi vahe vireco ité ocuaita opacatu ava sui diez sui ñepepe-pepe iporaviquimi reroqua ñgua yuvireco. Abraham suindar ité niha ñgüe ehi yuvireco.

⁶ Yepe Melquisedec ndahei Leví suindar viña, ahe rumo oipisi ité Abraham sui evocoi porerecosa; Abraham, ahe acoi oipisi vaherã mbahe Tüpa remimombehu. Ñgüe ehi Melquisedec Abraham rovasa.

⁷ Supi eté sovasapri sui oporovasa vahe ivate catu secoi yepi.

⁸ Evocoi levita suindar oipisi ava poraviqui repri diez sui ñepepe-pepe. Ahe ava rumo omano vaherã tēi yuvirecoi. Icuachiapri arachendar pipe rumo Melquisedec serer vahe oicoveño vahe ité.

⁹ Ndoyavii evocoiyase opacatu pahi eta Levi suindar omondo vahe porerecosa Abraham rupive chupe yuvireco viña.

¹⁰ Esepia, Abraham oyeseve vite Levi oyesuindar vireco, evocoiyase ihaëhi viteseve oyeepia Melquisedec rese yuvireco aracahe.

¹¹ Ava israelita yuvirecoi vahe oipisi mborocuaita pahi levita sui yuvireco; ahe Aarón suindar yuvirecoi. Supi etese rumo ava virecose Tūpa suindar güeco catuprisa evocoi mborocuaita reroya pipe viña, evocoiyase ndoyemboyecuai chietera ambuae pahi viña. Ndahei chira rumo ahe Aarón nungar, ahe Melquisedec nungar itera.

¹² Esepia, Tūpa osecuñarose evocoi pahi cuaita, osecuñaro aveira supive mborocuaita; ¹³ iyavei yande Yar, ahe sese acoi icuachiapri pipe ñehesa, ndahei Levi suindar, ahe rumo ambuae judío ramo suindar. Ahe ichui acoi ndipoi eté osē vahe ambuae pahi.

¹⁴ Esepia, icuapri ité yande Yar Judá suindar secoise. Iyavei Moisés noñehi ahe ichuindar turi vahe rese oñehese pahi cuaita rese.

¹⁵ Iyavei co oyecua tupri catu itera, oyecuae pahi ipiasu vahe Melquisedec nungar.

¹⁶ Ahe rumo ndahei porocuaita “uma sui osēra pahiguā” ehi vahe sui oique pahi güeco āgua; güecocuer pīrata ndopai vahe reseve oique.

¹⁷ Esepia, Tūpa ité aipo ehi oñehese sese:

“Nde pahi apirēhi vaheṛā ité ereico inungar Melquisedec” ehi.

¹⁸ Sese mborocuaita arachendar opa ité. Esepia, ahe nipiratai, ndayande pītivi eté.

¹⁹ Esepia, Moisés porocuaita ndosecocuer mbocatupri eté ava. Yande rumo yasāro mbahe aviye catu vahe yande recocuer uve nara. Supi niha yayemboya Tūpa rese.

²⁰ Tūpa rumo oñehese omoingatu ñepeí reseve güerer pipe. Ambuae pahi rumo ndahei ñepeí reseve senoipri yuvirecoi Tūpa rer pipe.

²¹ Yande Yar rumo Tūpa osenoi ñepeí reseve güerer pipe pahi seco āgua icuachiapri pipe aipo ehise chupe:

“Yar Tūpa osenoi ñepeí reseve, sese nosecuñaroi chietera:

‘Nde pahi apirēhi vaheṛā ité ereico’ ehi”

ehi icuachiapri pipe.

²² Sese Jesús rese yaicua Tūpa omboaviyera güemimbotar ipiasu vahe yandeu aviye catu vahe yipindar vahe sui.

²³ Yipindar setá pahi yuvirecoi. Opa-opaño rumo omano.

²⁴ Jesús rumo nomanoi vahe ité, sese nomondoi chietera pahi güecosa ambuae upe.

²⁵ Sese ahe oicatu ité ñepeí reseve viroyasar Tūpa rese oyemboya vahe písiro āgua apirēhi. Esepia, ahe oicove vaheṛā ité apirēhi oyeruqui vaheṛā Vu Tūpa upe sese.

²⁶ Supi eté Jesús pahi ivate catu vahe secoi. Evocoi nungar niha ipane ité yandeu yipindar. Ahe ndaseco marai vahe, ndoyapoi vahe mbahe tēi güeco maranehisa pipe, ndahoyoyai avei ava angaipa viyar rese, iyavei ahe ivate catu vahe iva pendar sui.

²⁷ Ndahei eté ambuae pahi eta nungar secoi, ndoyuca ranei ari yacatu rupi mbahe mimba Tūpa upe seropovēhe āgua yipindar oangaipa rese, ipare opacatu ambuae angaipa rese. Ñepeí reseve ité rumo güete viropovēhe opacatu ava angaipa repirā.

²⁸ Moisés porocuaita rupi iporavopri pahi ivate catu vaheṛā ava ndahei seco tupri vahe; Tūpa rumo Moisés porocuaita pare osenoi ñepeí reseve Guahir seco catupri vahe ‘tasecoi pahi ivate catu vahe apirēhi vaheṛā ité’ oya.

8

Jesús Tūpa remimbotar ipiasu vahe omoime yandeu

¹ Co rupi eté oroyepota ore remimombehu mbahe aviye catu vahe upe. Yareco ité evocoi nungar pahi ivate catu vahe. Ahe oguapi Vu acato coti omborerecuasa pipe ivave oñ.

² Aheve pahi secoi oporaviqui Vu rēta supi eté vahe pipe. Ahe ivave ité yande Aposar rembiapo, ndahei ava tēi rembiapo.

³ Opacatu pahi ivate catu yuvirecoi vahe senoisa mbahe oporerecosa iyavei mbahe mimba yucapri viropovēhe vaheṛā Tūpa upe yuvireco. Sese Jesucristo avei vireco mbahe viropovēhe vaheṛā Vu Tūpa upe.

⁴ Ahe secoise co ivi pipe viña, ndahei chietera pahi secoi viña. Esepia, cohave oime vite ité pahi mbahe viropovēhe vahe Moisés porocuaita rupi yuvireco.

⁵ Co ivi pipendar pahi rumo ihañeco iva pendar rahanga rese tēi yuvireco. Yaicua niha ahe sahanga tēi. Esepia, Moisés oyapo potase tūparo, Tūpa aipo ehi chupe: “Emahecua tupri acoi ivitriye amboyecua vahe rese ndeu. Ahe inungar tupri eyapo” ehi chupe.

⁶ Yande pahi ivate catu vahe rumo, Jesús, vireco ocuaita aviye catu vahe ambuae pahi sui. Esepia, Tūpa remimbotar ipiasu vahe Jesús güeru vahe yandeu aviye catu vahe ité yipindar vahe sui iyavei sesendar Tūpa remimombehu aviye catu vahe avei.

⁷ Esepia, yipindar Tūpa remimbotar oicatusse yande recocuer recuñaro āgua viña, ndipoi chira ambuae semimbotar ipiasu vahe yandeu viña.

⁸ Tūpa rembiepiave rumo ava recocuer mbahe tēi eté. Sese aipo ehi icuachiapri pipe co ava rese aracahe:

“Yande Yar aipo ehi:

‘Oimera ari ayapo iri água che remimbotar ipiasu vahe ahe Israel pendar upe, Judá pendar upe avei.

⁹ Ndahoyoyai chira rumo acoi tamoi eta rese yipindar ayapo vahe che remimbotar.

Ahese acoi opa anose ivi Egipto sui,
nomboaviyei eté rumo che porocuaita yuvireco.

Sese apoi ichui’ ehi yande Yar Tûpa.

¹⁰ ‘Co ari pare rumo na ahera che remimbotar apo Israel pendareta upe’ ehi yande Yar Tûpa,
‘Amondora che porocuaita iyapisacasa pipe,
aicuachía aveira ipihañemoñetasa pipe.

Evocoiyase che iTûpa aicora; ahe evocoiyase cheundar yuvirecoira.

¹¹ Nombohe iri chira ondugüer, omu avei che cua água yuvireco.

Esepia niha, opacatu chihivahe catu vahe sui,
ava ocuacua catu vahe avei che cuara yuvireco.

¹² Iyavei cheñero aveira mbahe tēi sembiapogüer rese yuvireco chupe; ndayemomahenduha iri chiveira yangaipagüer rese’ ehi yande Yar”

ehi icuachiapri pipe aracahe.

¹³ Oñehese Tûpa güemimbotar piasu rese, omombehu yipindar vahe cañi água; chihimi tēi ipane icañipa água.

9

Tûparo ivi pipendar iyavei tûparo iva pendar

¹ Evocoiyase yipindar Tûpa remimbotar vireco ava cuaitarā iñemonuha água Tûpa mboeteisa pipe iyavei vireco tûparo co ivi pipendar.

² Ahe tûparo pipe na ehi mbahe imoingatusa: yipindar oi Nimarai Vahe serer. Ipipe oime vera renda iyavei mesa pan sovasapri Tûpa upendar reseve.

³ Imoñuviriosa turucuar tûparo asiata cupeve oime ambuae oi, ahe serer Nimarai Catu Vahe.

⁴ Aheve oime itaisi rapisa renda oro apopri, aheve avei oime Tûpa porocuaita riru oro pipe yaopri. Ahe ipipe oime cambuchi oro apopri ahe tembihu maná riru, ipipe avei oime Aarón pococa ahe sori vahe, iyavei mborocuaita cuachiapri ita ipe vahe rese oime ipipe.

⁵ Ahe mborocuaita riru harive oime Tûpa rembiguai rahanga oyovai yuvinohai, “Tûpa oime ité cohave” he água. Ahe ipepo oyopi tupri Tûpa porocuaita riru rovapisa yuvireco. Co rupive revo amombehu co mbahe pēu.

⁶ Evocoi nungar mbahe moingatupri pare, pahi eta yuviroiqueño yipindar oi asiapri pipe ari rupi ocuaita apo água.

⁷ Imoñuviriosa oi pipe rumo pahi ivate catu vaheño oique ñepeí reseve ñepeí-peí araviter pipe, iyavei güeique yacatu viroique mbahe mimba ruvi viropovêhe vaherá Tûpa upe oangaipa rese, ava icuaēhi pipe angaipa oyapo vahe repirá avei.

⁸ Co rese Espíritu Santo oicua uca yandeu avañe tēi ndiata vitei eté oique ipa vahe oi imaranehi catu vahe pipe Tûpa rovai oime viteso yipindar oi yasiapri.

⁹ Co opacatu mbahe yande mbohe mbahe cūríteindar rese. Esepia, co porrecosa iyavei mbahe seropovêhepri aheve Tûpa upe, nomoatiroi eté imboeteisar pihañemoñetasa.

¹⁰ Ahe rumo carusa, ihusa, ñemoatirosa nungar mbahe resendar tēi; yande retecer resendar tēi porocuaita. Ahe rumo egüe ehiñomi tēi yuvireco Tûpa remimbotar ipiasu vahe yu água renonde.

¹¹ Poropisirosar rumo ou cute. Iyavei ahe ité cūrítei yande pahi ivate catu vahe seci mbahe aviye vahe güeru vahe yandeu. Ahe pahi reiquesa rumo ndahei ava rembiapo nungar tēi, ahe rumo aviye catu ité iyavei ndahei eté co ivi pipe yapopri.

¹² Cristo rumo oique ité imaranehi catu vahesave ivave. Ndahei rumo ovesa iyavei guaca rahir ruvi reropovêhe água, ahe rumo viropovêhe vuvi ité opacatu rese; egüe ehi ahe ñepeí reseve oique apirêhi vahe ñepisirosa reime água yandeu.

¹³ Supi eté guaca cuimbahe ruvi iyavei ovesa ruvi, guaca cuña tanimbu acoi imondopri vahe ava seco mara vahe rese, ahe avei vireco raimi tēi pīratasa ava rete moatiro água.

¹⁴ Cristo ruvi rumo vireco catu ité pīratasa. Esepia, Cristo, Espíritu apirêhi vahe pipe, oyemondo ahe ae Tûpa upe inungar mbahe seropovêhepri nimarai vahe, iyavei suvi yande pihañemoñetasa moatiro opacatu yande rembiapo ai manosave yande rereco vahe sui Tûpa oicove vahe upe mbahe apo uca água yandeu.

¹⁵ Sese Jesucristo seci Vu remimbotar ipiasu vahe moingatugar ava reru água Tûpa upe omano pipe. Ipipe sui oime ñeroisa oyemboangaipa vahe yipindar mborocuaitavrive

yuvirecoi vahe upe 'toipisi che rembiporavo yuvireco oyeupendar mbahe apirêhi vahe che remimombegüer rupi' oya.

¹⁶ Que ava oicua ucase güemimbotar ombahe mondo ãgua omano renondeve, icuasa tupri ranera rumo imanosa semimbotar apo ãgua renonde.

¹⁷ Esepia, ndiya vitei eté omano vaheerã recove vitesese mbahe imondosa iyarã upe. Imanore voi rumo aviye imondosa.

¹⁸ Sese yipindar vahe Tüpa remimbotar yaposa mbahe mimba ruvi piyere pipe.

¹⁹ Esepia, Moisés omombehupase mborocuaíta opacatu ava upe, oipisi ovesa ragüer pïra vahe iyavei ivira hisopo serer vahe rãca, ahe omoaqui guaca rahir ruvi iyavei ovesa rahir ruvi, i rese oyeseha vahe pipe. Ipipe opa osipii cuachiar mborocuaíta resendar, opacatu ava avei.

²⁰ Evocoyase aipo ehi icuachiapri pipe: "Co mbahe ruvi oicua tupri uca co porocuaíta Tüpa ombou vahe omboyeroya ãgua pëu" ehi.

²¹ Mbahe mimba ruvi pipe avei opa Moisés osipii tüparo iyavei opacatu mbahe ipipendar iporupri.

²² Porocuaíta rupi eté tuvî pipe seni opacatu mbahe oñemoatiropa Tüpa rovaque; ndipoi eté ñeroisa angaipa upe mbahe ruvi piyerepri porêhise.

Tüpa upe güete reropovêhe pipe Cristo omocañi angaipa

²³ Iyacatu ité imoatirosa evocoi nungar mbahe mbahe mimba seropovêhepri ruvi pipe. Esepia, co mbahe iva pendar nungar têi sahangaposa; iva pendar ité rumo ipotasa seropovêhepirã mbahe aviye catu vahe evocoi sui.

²⁴ Esepia, Cristo ndoiquei tüparo oi imaranehi catu vahe ava rembiapo pipe têi. Esepia, ahe iva pendar rahanga têi. Êgüe ehi rumo ahe oique ité iyave. Aheve cüritei secoi Tüpa rovai yande pítivii ãgua oyoeroqui pipe.

²⁵ Judío pahî ivate catu vahe niha ñepeï reseve oique araviter yacatu oi imaranehi catu vahe pipe mbahe ruvi têi reropovêhe ãgua; ndahei rumo vuvî ité viropovêhe. Cristo rumo ndoyeeropovêhe pihî Tüpa upe.

²⁶ Êgüe ehise rumo, yipisuive omano pihira viña. Cüritei rumo oyemboyecua co ipa ari rupi ñepeï reseve, apirêhi vaheerã viropovêhe ãgua güete Tüpa upe 'tocañipa angaipa' oya.

²⁷ Supi eté opa rane itera ava omano yuvireco, ipare voi ñepeï reseve oimera porandusa.

²⁸ Indó, Cristo oyeeropovêhe ñepeï reseve opacatu angaipa mocañi ãgua. Ipare rumo oyeveï irise ou, ndahe iri chira angaipa recocuer rese. Ahe rumo oyevira ou guãrosar pïsiro ãgua.

10

¹ Esepia, Moisés porocuaíta mbahe aviye vahe ou vaheerã rahanga têi, ndahei ahe eté vahe ité. Sese ahe porocuaíta ndoicatu eté ava Tüpa rese oyemboya vahe reco mohivi tupri ãgua mbahe seropovêhepri araviter yacatundar pipe têi.

² Porocuaíta oicatusê pe angaipa sui pe moatiro tupri ãgua, ndapeyandu iri chira pe angaipa viña iyavei pahî ndoviropovêhe iri chaveira mbahe ruvi Tüpa upe yuvireco viña no.

³ Co seropovêhepri rumo yande nomahenduha uca ãgua têi yande angaipagüer rese araviter yacatu.

⁴ Esepia, mbahe mimba ruvi têi nomocañi eté yande angaipa yande sui.

⁵ Sese Cristo co ivî pipe ouse, aipo ehi Tüpa upe:

"Ndereipota iri niha mbahe mimba têi porerecosa seropovêhepirã ndeyeupe, nde rumo ereyapo che retecuer evocoi nungarã.

⁶ Ndahei niha nde pihî rupi mbahe rapipri mbahe mimba yucapri ndeu seropovêhepri ñepeï reseve angaipa mocañi ãgua.

⁷ Evocoyase che aipo ahe:

'Che ayu nde remimbotar apo ãgua, che Ru Tüpa, che resendar icuachiapri remimombehu rupi tupri mboaviye ãgua' ahe" ehi.

⁸ Yipindar aipo ehi, Tüpa ndoipotai eté, iyavei ndahei ipihî rupi mbahe mimba reropovêhepri, porerecosa mbahe sapipri avei angaipa mboyeho ãgua, yepe ahe mborocuaíta rupi seropovêhesa viña.

⁹ Ipare aipo ehi: "Che ayu nde remimbotar apo ãgua" ehi. Ahe ipipe omombopa yipindar vahe mbahe seropovêhepri co ambuae mbahe ipiasu vahe apo ãgua.

¹⁰ Tüpa evocoyase yande peha angaipa sui oyeupe nara. Esepia, Jesucristo oyapo ité semimbotar mbahe ñepeï reseve apirêhi vaheerã güete mondo pipe.

¹¹ Opacatu judío pahî eta ari yacatu oyapo ocuaíta iyavei mbahe mimba avei-vei viropovêhe Tüpa upe yuvireco. Yepe ahe viropovêhe têi yuvireco viña, nomocañi catui eté rumo angaipa.

¹² Jesucristo rumo oyeeropovêhe ñepei reseve angaipa repirã apirêhi vaherã. Ipave oso ivave, uguapi oĩ Vu acato coti.

¹³ Aheve osãro oĩ Vu Tũpa opase voi omondo yamotarêhimbar ipovrive.

¹⁴ Esepia, ñepei reseve oyeeropovêhe pipe osecomohivi tupri Vu Tũpa rembipeha apirêhi vaherã.

¹⁵ Iyavei Espiritu Santo aipo ehi tupri avei icuachiapri aracahendar pipe yandeu:

¹⁶ “ Co ari pare rumo na ahera che remimbotar apo chupe’ ehi yande Yar Tũpa, ‘Coiye amondora che porocuita ipihañemoñeta pipe, amondo aveira iyapisacasa pipe’ ehi.

¹⁷ Ndayemahenduha iri chietera yangaipagüer rese iyavei mbahe tẽi sembiapogüer rese yuvireco” ehi aracahe.

¹⁸ Êgüe ehi angaipa rese oimese ñeroisa, ahese ndiya iri seropovêhesa mbahe angaipa repirã.

Yayemboya catura Tũpa rese

¹⁹ Sese che rivireta, iya ité cūrteite yande reique água Tũpa rovai yande siquiyêhisa pipe Jesucristo ruvi pipe sui.

²⁰ Yaicoveño itera ipiasu vahe tecocuer tecovesa yandeu ombou vahe pipe. Ahe niha omboi tũparo pipe asiasa turucuar yande reique água Tũpa rovai. Ahe turucuar inungar Jesús rete.

²¹ Iyavei ahe yande pahi ivate catu vahe ité secoi Vu Tũpa rêta rãrosar;

²² sese yayemboya catura Tũpa rese yande pihañemoñeta tuprisa pipe iyavei yande yeroyasa ipa voi vahe pipe. Supi eté ahe opa yande reco mbocatupri yande pihañemoñeta raisa sui iyavei omoatiro yande rete i maranehi pipe.

²³ Yayemoviracua catura mbahe aviye vahe yande remiaro pipe yamombehu vahe ava upe yande pihañemoñeta rorovaêhisa pipe. Esepia, Tũpa omboaviye itera mbahe güemimbehugüer yandeu.

²⁴ Iyavei yasecañora ñepei-peí yañepitívii vaherã yande yeaisu catu água iyavei mbahe tupri apo água yandeyeupe.

²⁵ Ndayamopanei chira yande ñemonuhasa Tũpa upe. Ndayaicoi chira omopane vahe nungar, iya rumo yayemonguerêhi catura ñepei-peí yandeyeupe. Esepia, viroví ari yande Yar yevi iri água.

²⁶ Acoi, “Tayemboangaipaña ité” yahese mbahe supi tupri vahe cua pare yaico, ndipo iri ambuae seropovêhepirã evocoi yande angaipa repirã yandeu;

²⁷ Tũpa ñemoirosa ipirata vahe güeraño oimera yandeu iyavei tata guasu apirêhi vahe opara omocañi Tũpa amotarêhimbar yuvirecoi vahe.

²⁸ Ava Moisés porocuita ndoviroyai vahe que ñuvirío, anise mbosapi rembiepiave, ahe secocuer mombehuse, ahe yucapri ité saisuêhisa pipe yuvirecoi.

²⁹ Peyapisaca tupri co rese: ipirata catu oimera Tũpa ñemoirosa tahir roerõrosar upe curi iyavei acoi ava vireco vahe suvi inungar mbahe êgüe ehi tẽi vahe iyavei viroiro tẽi vahe guaisusar Espiritu, chupe avei oimera Tũpa ñemoirosa ipirata catu vahe. Esepia, co tuví rese niha seroyapri ité Tũpa remimbotar. Ipipe avei niha ahe ava Tũpa rembipeha yuvirecoi.

³⁰ Yaicua niha yande Yar aipo ehise: “Che ité asepira, sembiapo ai amboyevíra chupe” ehi aracahe. Iyavei ambuae ñehesa aipo ehi vahe: “Yar oporandura mbahe sembiapogüer rese ava oyeupendar upe” ehi.

³¹ ¡Mbahe tẽi eté yaicuese Tũpa oicove vahe ñemoirosa pipe!

³² Peyemomahenduha acoi aracaco co tesapesa nungar supi eté vahe pisi ramose, peyemoviracuaño ité pe recoãhasa upe pe yemombaraisusa pipe.

³³ Esepia, acoi amove pe pâhu pendar rese ñehhe-ñehhe tẽi yuvireco, mara-mara tẽi avei pe rereco opacatu ava rovaque. Ambuae pe pâhu pendar evocoyase peipitívii pe yemombaraisusa rese.

³⁴ Pesaisuña ité avei ambuae soquendapri yuvireco. Opase pe mbahe virocua yuvireco pe sui peñemosaña avei pe vihareteta pipe peico. Esepia, peicua ivave perecora mbahe aviye catu vahe iyavei apirêhi vahe.

³⁵ Sese pemocañi tẽi eme Tũpa rese pe yeroyasa. Esepia, evocoyase pe recosa pipe omoime ucara mbahe tupri pẽu curi.

³⁶ Pe rumo peyemoviracuaño itera mbahe-mbahe tẽi upe Tũpa remimbotar apo água semimombehugüer oime vaherã pisi água curi.

³⁷ Supi eté icuachiapri pipe Tũpa aipo ehi:

“Pihaiví eté oura acoi ou vaheví.

Ndiaracahei chietera.

³⁸ Acoi cheundar seco catupri vahe rumo che rese oyeroyasa pipe oicovera.

Acoi oyepepise rumo che sui, che evocoyase ndavihai chira sese” ehi aracahe.

³⁹Yande ndahei oyepepi vahe nungar yaico. Evocoi nungar niha ocañi tēi vaherā yuvireco. Yande rumo yayeroya sese; ipipe yañepisiro.

11

Tūpa rese yeroyasa

¹Supi eté yarecose yande yeroyasa Tūpa rese, ahese yaicua ahe ombou itera mbahe yasāro vahe yandeu, iyavei yaicua ité oime mbahe ndayasepiai vahe.

²Supi eté amove yande ramoi arachendar upe, “Aviye ité” ehi Tūpa oyese yeroyasa pipe sui.

³Tūpa rese yande yeroyasa pipe yaicua ahe oñehe pipe ité oyapo opacatu mbahe. Sese yaicua cūriteindar mbahe yasepia vahe mbahe ndayasepiai vahe apopri.

⁴Sese oyeroya pipe Abel viropovēhe oporerecosa aviye catu vahe Caín porerecosa sui chupe. Sese, “Co ava seco catupri vahe che rovaque” ehi iyeroyasa rese oipisi tuprise iporerecosa. Yepe Abel omano viña, oimeño vite rumo Tūpa rese yeroya agüer resendar ñehesa.

⁵Enoc avei Tūpa rese oyeroyasa pipe serasosa co ivi pipe sui, “Tomano rane” ndehei eté chupe. Ava ndoseca iri eté yuvireco. Esepia, Tūpa ité viraso secove reseve. Yipindar rumo Tūpa virasoēhi viteseve, “Enoc recocuer aviye ai rane ité chupe” ehi icuachiapri arachendar.

⁶Ndahei eté rumo Tūpa piha rupi yaico ndayayeroyaise sese. Esepia, oyemboya pota vahe sese, “Oime ité Tūpa” ehi rane itera, iyavei, “Oime itera mbahe secasar upe nara” ehi aveira.

⁷Noé avei oyeroya Tūpa rese. “Oimera mbahe tēi co ivi pipe ndapesepia vitei vahe” ehise chupe, viroya voi eté. Evocoiyase seroyasave oyapo arca oyesuindar pisiro āgua. Iyavei sese oyeroya pipe omombehu ava co ivi pipendar cañi āgua. Ahe rumo Tūpa rese oyeroya pipe oñepisiro.

⁸Abraham avei oyeroya Tūpa rese. Esepia, Tūpa, “Eso ambuae ivi ndeu amboyecua vaherā vahesave, ahe amondora ndeu” ehise, omboyeroyaño ité. Yepe ahe ivi ndoicuai viña, osēño ité rumo oivi sui oso.

⁹Ipare Tūpa rese oyeroya pipe avei secoiño ité ahe ivi pipe. Ndoyavii ambuae ivi pendar secoi vahe; oi mbahe pিরer apopri pipe tēi aheve secoi. Ēgüe ehi tupri avei tahir Isaac iyavei sumino Jacob. Ahe avei oipisi vaherā Tūpa remimombehu ivi yuvireco.

¹⁰Esepia, aipo Abraham osāroño ité tecua ivave oviracua vahe. Tūpa niha ahe tecua rāhasar, yaposar avei.

¹¹Yepe Sara nimembii vahe viña iyavei Abraham ocuacuami, Tūpa rese oyeroyasave rumo oipisi pīratasa Tūpa sui guahi āgua. Esepia, viroyaño ité Tūpa oñehe omboaviye āgua chupe.

¹²Evocoiyase yepe Abraham ocuacuami viña, vireco rumo guahir. Ahe ichuindar sehii eteanga coiye inungar yasitata iyavei inungar ivi cuhi para guasu popi rupindar ndayaipapa catui vahe ité.

¹³Ahe ava rumo opacatu omanopa tēi; ndoipisii eté mbahe semimombehugüer oyeupendar. Ahe mbahe amombri rupi osepiañomi tēi yuvireco oyeroyasa pipe, soriveteño avei sese. Ēgüe ehi oicuaño ité ndahei co ivi pipendar güecosa; ahe rumo yuvirecoveño raimi tēi co ivi pipe.

¹⁴Aipo ehi vahe oicua uca tupri yandeu oseca vite oyeupendar ivi yuvireco.

¹⁵Ipihañemoñetase rumo ivi güeco agüer rese yuvireco viña, oyevi iriño itera aheve avei yuvireco viña.

¹⁶Ahe rumo oipota ambuae ivi aviye catu vahe yuvireco, ahe iva pendar. Sese Tūpa nochii eté, “Che Ru Tūpa” oyeupe hese. Esepia, vireco ité tecua imoingatupri chupe.

¹⁷Tūpa rese yeroyasa pipe avei Abraham oyemoingatu voi guahir ñepeii vahe Isaac reropovēhe āgua Tūpa upe güecoñhasa pipe. Yepe Tūpa aipo ehi chupe aracahe viña:

¹⁸“Nde rahir Isaac sui setá oimera nde suindar” ehi.

¹⁹Esepia, oicua ité Tūpa vireco pīratasa ava omano vahe mbogüerayevi iri āgua. Evocoiyase imano rāgüer sui eté oipisi iri guahir aracahe. Ahe evocoiyase omboyecua mbahe yandeu.

²⁰Tūpa rese oyeroya pipe avei Isaac osovasa Jacob, Esaú avei mbahe oime vaherā pisii āgua.

²¹Iyavei Tūpa rese oyeroya pipe avei Jacob omano pota āgua, osovasa ñepeii-peii José rahir. Ahese opococa rese tēi eté oyemoviracua oyerocu āgua Tūpa upe imboeteisa pipe.

²²Tūpa rese oyeroya pipe avei José, omano āgua renonde, aipo ehi: “Yande mu israelita opara yuvinose ivi Egipto sui curi” ehi. Ipare oyocuai omu oitacuer rerova āgua aracahe.

²³ Tūpa rese oyeroya pipe avei, ohasē Moisés, iyēsupa oñomi mbosapī yasi rupi yuvireco. Esepia, ahe pītani icatupri ai, iyavei ndoyembosiquiyēi eté mborerecuar guasu porocuaita yuca āgua sui.

²⁴ Tūpa rese oyeroyasa pipe avei, ocuacuase Moisés, ndoipotai eté, “Egipto pendar mborerecuar guasu rayri membri” oyeupe he āgua.

²⁵ Ahe rumo oipota catu mara-mara tēi güereco āgua Tūpa reroyasar reseve chīhi rupive mbahe tēi rese yemboviha rāgüer sui.

²⁶ Aviye catu ité chupe Tūpa rembiporavo upe nara mbahe tēi porara āgua Egipto pendar mbahe eta sepirusu vahe rereco rāgüer sui. Esepia, ahe oicuaño ité oyeupe nara porerecosa Tūpa ombou vaheerā.

²⁷ Tūpa rese oyeroya pipe avei osē ivi Egipto sui osiquiyēhisa pipe mborerecuar guasu roriēhise. Oyemoviracuaño ité oyese mbahe apo āgua; aviye osepia vahe ité Tūpa acoi ndoyecuai vahe.

²⁸ Tūpa rese oyeroya pipe avei oyapo Pascua pieta. Opa uca oipichi ava upe oquenda rese mbahe mīmba ruvi Tūpa rembiguai oporoyuca vahe ava israelita rahir ipi yucaēhi āgua.

²⁹ Tūpa rese oyeroya pipe avei ava israelita osasa para guasu Pīra Vahe ivi ipiru vahe hari rupi yuviraso. Ipare yamotarēhimbar Egipto pendar, “Ēgüe vahe avei” ehi yuvireco viña, i rumo opaño oyopi.

³⁰ Tūpa rese oyeroya pipe avei israelita oyerese siete ari rupi tecua Jericó rese, opa ñachisa onduru.

³¹ Tūpa rese oyeroya pipe avei Rahab, oyemondo-mondo tēi vahecuer, nomanoi eté ambuae ava mbahe-mbahe tēi vahe rupi. Esepia, ahe oipisi tupriño güētave israelita Jericó ivi repiasar.

³² ¡Setá vite ambuae ava recocuer oime amombehu vaheerā pēu! Ipane ité rumo ari imombehupa āgua: Gedeón, Barac, Sansón, Jefté, David, Samuel iyavei opacatu Tūpa ñehe mombehusar recocuer.

³³ Evocoi avei Tūpa rese oyeroya pipe osecopi ité ambuae ivi pendar, oporocuai tupri güeco ñvisa pipe, oipisiño ité Tūpa suindar mbahe semimombehugüer yuvireco, oiyurumboyaño avei yaguar,

³⁴ ombogüe avei tata ipirata vahe, oyeepi avei quise pucu pipe oyuca rāgüer sui; ava nipiratai vahecuer rumo oyemomirata yuvireco, oyemoviracua ité vavasave oyese; opaño ité oamotarēhisar sundao osecopi yuvireco.

³⁵ Oime amove cuña ipāhuve vireco iri vahecuer omu manosa sui imbogüerayevipri.

Ambuae rumo omanopaño ité teco rasisa pipe, “Yasē catu co nungar mbahe sui” ndehi eté yuvireco cuerayevisa aviye catu vahe pipe güeco āgua.

³⁶ Ambuae iparaisu catu ava upe oñeeroirosa pipe, onupasa pipe, oapīchi-pīchisa pipe, voquendasa pipe avei yuvireco.

³⁷ Ambuae ita pipe oapi-apisave omano, amove imombitesa ivira asiasa pipe, anise ambuae yucasa quise pucu pipe, amove ipāhu pendar oguata tēi, ovesa, cavara pīrer añomi tēi iyemondesa, iparaisu mbahe porēhi yuvireco nombohe catui ava ipihañemoñetasa pipe sereco iyavei mara-mara tēi vireco yuvireco no.

³⁸ Evocoi seco catupri vahe yuvireco ndiyai co ivi pipendar Tūpa cuaparēhi upe vireco vaheerā oyepāhuve, ahe oguata tēi ivi iporupirēhisa rupi, ivitri rupi, mbahecuar rupi avei yuvireco.

³⁹ Yepe ahe opacatu aviye ité Tūpa upe oyeroyasa rese yuvireco viña, ndoipisi eté rumo oyeupe Tūpa remimombehugüer yuvireco.

⁴⁰ Esepia, Tūpa omoime mbahe aviye catu vahe yandeu ‘oyoya tupri toipisi güecocuer ihīvi tupri āgua che remimombehugüer rupi yuvireco’ ohesa pipe chupe, yandeu opacatu avei.

12

Yamahecua tupri yande yeroyasa pipe Jesús rese

¹ Sese yande, yaicuase setá ité evocoi ava oime omboyecua vahe Tūpa rese oyeroyasa, iyacatu ité yaseyapa opacatu mbahe ndayande mbohe catui vahe Tūpa upendar mbahe rese iyavei yande angaipa yande mboha tupri vahe. Ichui yayemoviracuaño itera yande cuaita Tūpa ombou vahe rese yandeu inungar ivava catu vahe.

² Yamahe tupri itera Jesús rese. Ahe ichui niha yareco yande yeroyasa Tūpa rese. Ahe avei oyese yande mboporeroya tupri catu. Oiporara curusu rese omano ochīhisa pipe. Esepia, ahe oicua ité oparaisu pare virecora oviharetasa, oguapise omborerecuasave Vu acato coti oī.

³ Pe avei catu, pepihañemoñeta Jesús recocuer rese; ahe oiporara ité mbahe rasicuer ava yangaipa vahe mara-mara tēi güerecose. Sese pecuerai eme Cristo rese peico água iyavei, “Ndorequerēhi iri” ndapeyei chira.

⁴ Esepia, pe ndapemano vitei eté angaipa upe pe yembopihaviracuasa pipe.

⁵ Peresarai eté Tūpa pe mboaracuasa sui tahir ité pe recosa pipe; icuachiapri arachendar pipe aipo ehi:

“Che rahir, eyemoingatu voiño Yar nde mombaraisusa upe nde reco mohivi tupri água, iyavei, ‘Ndachequerēhi iri’ nderei chiaveira chupe ndeu oñehe pīratase.

⁶ Esepia, Tūpa osecomohivi tupri ava güembiaisu iyavei omombaraisu rane guahir sereco água” ehi.

⁷ Peñemosaño catu pe mombaraisusa upe pe reco mohivi água. Esepia, Tūpa ēgüe ehise pēu guahir ité pe rereco. ¿Oime pīha que ñepeí ava guahir upe noñehe pīratái vahe secocuer mohivi água?

⁸ Tūpa ndape recocuer mohivise inungar oyapo ambuae guahireta upe yepi, pe evocoyase inungar-ra chīhivahe ndiyesupai vahe, ēgüe peye tēi peico chupe.

⁹ Iyavei, chīhivahe tēi vite yaicose, yande yesupa co ivi pipendar yande nupa yande recocuer mohivi água, ahese yamboetei. Sese yamboetei catura yande Ru Tūpa iva pendar tecovesa rereco água.

¹⁰ Yande yesupa co ivi pipendar opihañemoñetagüer rupi tēi yande nupa yaicove raimi tēise co ivi pipe; Tūpa rumo yande mombaraisu yandeu mbahe tupri água rese yande reco maranehi água inungar ahe ndaseco marai vahe.

¹¹ Supi eté yipindar, poronupasa yaipisi ramose, tasi yandeu. Coiye rumo yande imboyero-asa pipe yayapo catura mbahe ihivi vahe. Ahe evocoyase yande recocuer rerecora mbahe tupri pipe.

Peicua catu Tūpa ñehe rendu potaēhi sui

¹² Sese pemopoase iri pe reco pīratasa iyavei peyemonguerēhi iri pe guata água yande Yar rupi.

¹³ Ipape peseca peri ihivi vahe pe recocuer uve nara ‘toingatu che pi ndoguatai vahe’ pe yapave ‘timara catu iri eme’ pe hesa pipe.

¹⁴ Peico catu opacatu ava upe mbahe tupri pipe, peico avei pe reco maranehi pipe. Esepia, ava ndovirecoi vahe güeco maranehi, ndosepiai chietera yande Yar.

¹⁵ Peñearo tupri catu, tipo eme ava ndoipisii vahe Tūpa porovasasa pe pāhuve, iyavei tipo eme mbahe tēi que ava pīha pipe; aviyeteramo opacatu rese ova tiētera.

¹⁶ Tipo eme catu pe pāhu pendar oyemboaguasa tēi vahe. Tipo eme avei ava Tūpa upendar mbahe viroiro vahe pe pāhuve inungar Esaú aracahe. Ahe omondo Tūpa porovasasa oyeupendar tahir ipi güecosa resendar mimoi repirā tēi vivri upe.

¹⁷ Iyavei peicua, ipape acoi Esaú oipisi pota Tūpa porovasasa vu sui viña. Ahe rumo ndiya iri eté sovasapirā secói. Yepe oyasehó iteanga viña, ndiya iri eté rumo mbahe sembierecovi rāgüer mboyevi água chupe.

¹⁸ Peyemboyase Tūpa rese, ndahei inungar pe ramoi israelita arachendar. Esepia, ahe ivitri Sinaí sese yapoco vahe rese tēi oyemboya vahe yuvireco; ahe ivitri rese sendí ité inungar tata rendigüer; oime pītu, pītumimbi vahe, ivitu ai avei sese.

¹⁹ Iyavei ndapesendui mimbi imoñehepri, Tūpa ñehe avei. Arachendar rumo osendu ité yuvireco. Iñehe renduse rumo, osiquiyepave ndoipota iri ahe oyeupe ñehe yuvireco.

²⁰ Esepia, ahe oyembosiquiye ité evocoi porocuita aipo ehi vahe sui: “Acoi opiro vahe ivitri rese, yepe que mbahe mimba tēi viña, ahe peyapi-yapi yuca ita pipe, anise lanza pipe avei” ehi.

²¹ Ahe mbahe oyeuca vahe aipo oporombosiquiye vahe ité. Evocoyase Moisés teieté aipo ehi: “Che siquiyepave aririi eté” ehi.

²² Pe rumo peyemboya iva pendar ivitri Sión ve, Tūpa oicove vahe recuave. Ahe tecua Jerusalén iva pendar. Aheve Tūpa rembiguai setá iteanga vahe oñemonuha imboetei água yuvireco yepi.

²³ Iyavei peyemboya opacatu ava Tūpa rahir ipi Cristo reroyasasa rese, ahe serer icuachiapri ivave. Peyemboya avei Tūpa rese, ahe niha yande recocuer rese oporandu vahe secói; iyavei peyemboya ava seco aviye vahe espíritu yuvirecoi vahe rese. Ahe niha Tūpa osecomohivi tupri sereco.

²⁴ Peyemboya avei Jesús rese, ahe omoime yandeu Tūpa remimbotar ipiasu vahe, ahe suvi yande moatiro vahe. Ahe aviye catu yandeu Abel ruvi sui.

²⁵ Sese peicua catu, “Ndoroviroyai” peye vaheerā acoi pēu oñehe vahe upe. Esepia, Moisés reroyaēhisa pipe pe ramoi noñemi eté Tūpa ñemoirosa sui yuvireco, oyeupe, “¡Peicua catu!” ehise co ivi pipe aracahe. Égüe ehise chupe yuvireco aracahe, ēgüe ehi catu iri tiētera

yandeu. Nayañemi chietera ichui cute ndayaroyaise co iva pendar, “Peicua catu” ehise yandeu.

²⁶ Tūpa oñehe pipe omboriri eté ivi aracahe; cūritei rumo yandeu aipo ehi: “Che omboriri irira ivi, ndahei chira rumo ivi güeraño, iva avei omboririira” ehi.

²⁷ ‘Amboriri irira’ aipo oyapave aipo ehi: “Opara mbahe omii vahe omocañi güembiapo Tūpa ‘topita apirēhi mbahe nomii vahe’ oyapave” ehi.

²⁸ Tūpa mborecuasa ombou vahe yandeu ahe nomii chietera. “Aviye ndeu” yahera evocoyase sese chupe; ipipe sui yayerure catu yande piha pipe chupe imboetisave semimbotar rupi.

²⁹ Esepia niha, ahe inungar tata ñepei reseve mbahe omocañipa vahe.

13

Mara yahera Tūpa mbovīha

¹ Ndapepoi chietera pe yeaisua sui ñepei-pei oyeivri nungar pe recosa pipe.

² Iyavei peresarai eme pe avasa sui ava oyepotase pe piri. Esepia, co nungar apo pipe amove ava omoingue Tūpa rembiguai güetave icuaēhi pipe.

³ Peyemomahenduha avei soquendapri rese inungar-ra pe avei supive soquendapri peico vahe viña. Iyavei peyemomahenduha ava mara-mara tēi serecopri rese. Esepia, aviyeteramo ēgüe ehi aveira pēu.

⁴ Pe opacatu pemboetei avei mendasa, iyavei peico pe reco maranehisa pipe mendasa rese. Esepia, Tūpa oicuara oyemboaguasa tēi vahe upe.

⁵ Ndahei guarepochi tēi peipota raira. Iya rumo peyemovīhaño mbahe pereco vahe rese. Esepia, Tūpa aipo ehi: “Ndoroyai chietera, ndapoi chietera nde sui” ehi aracahe.

⁶ Evocoyase aipo yahera Yar rese yande yeroyasa pipe:

“Che Yar che pitivii, ndasiquiyei chietera ava tēi sui oyapo potase mbahe cheu” yahera.

⁷ Peyemomahenduha pe rerogatasar rese, pēu Tūpa Ñehengagüer mombehuser rese avei. Pepihañemoñeta tupri secocuer rese, seco apri rese avei; iTūpa reroya agüer rupi tupri avei peico.

⁸ Jesucristo recocuer noñecuñaroi vahe ité, yipisuive secoi apirēhi vahe.

⁹ Peyembopa ucai rene yembohosa co coti tēi vahe upe. Aviye catu yayemomirata Tūpa poroaisusa rese que mborocuita tembilu resendar sui. Esepia, co nungar mbahe ndovireco ucai mbahe aviye vahe ohuser upe.

¹⁰ Yande rumo yareco ambuae ité Tūpa upe seropovēhepri. Ahe niha ndiyai eté pahi tūparo yipindar yuvirecoi vahe pendar yuvirohu.

¹¹ Supi eté judío pahi ivate catu vahe viroique mbahe ruvi tēi Tūpa rēta oi imaranehi catu vahe pipe seropovēhe ava angaipa rerocua āgua; ahe mbahe mimba rete rumo osapi tecua ivii yuvireco yepi.

¹² Ēgüe ehi avei niha Jesús iparaisu, omano tecua ivii ava reco mbocatupri āgua vuvi pipe.

¹³ Ēgüe yahe aveira yasora Jesús upe yande paraisu āgua supi ava yande reroirosa pipe yaico.

¹⁴ Supi eté, co ivi pipe ndayarecoi eté tecua apirēhi vahe. Yande rumo yaseca evocoi tecua oime vaheṛā yandeu curi.

¹⁵ Sese Jesús rembiapo rese iyacatu yamboeteira apirēhi vaheṛā yande Yar Tūpa. Co imboeteisa inungar mbahe seropovēhepri ari rupi chupe. ¡Ēgüe yahera imboetei yande ñehe pipe!

¹⁶ Peresarai eme catu ambuae ava upe mbahe tupri aposa sui. Iyavei pemondoño ité mbahe pereco vahe ambuae ava upe. Esepia, evocoi nungar inungar mbahe seropovēhepri Tūpa upe. Ahe niha Tūpa oipota.

¹⁷ Pemboyeroya pe cuaisar, peyapo semimbotar. Esepia, ahe ndopituhui eté pe recocuer rāro yuvireco. Esepia, oicua Tūpa oicuara mbahe sembiapo rese chupe curi. Sese pemboyeroya catu ‘tayavai eme iporaviquisa chupe; tasorivete oporaviquisa rese yuvireco’ pe yapave. Pemboavaise rumo, nosei chietera mbahe aviye vahe ichui pe recocuer upe nara.

¹⁸ Peyerure Tūpa upe ore rese. Supi eté, ore oroyandu ité mbahe aviye vahe oroyapo ore pihañemoñeta pipe yepi. Esepia, oroyapo pota mbahe aviye vahe opacatu mbahe rese ava rembiepiave.

¹⁹ Che yevi pihaivi āgua rese ité aporandu pe yeruresa rese pēu Tūpa remimbotar rupi.

Mahenduhasa ipa vahe

²⁰ Tūpa mbahe tupri rerecosar, ahe niha ombogüerayevi vahe yande Yar Jesucristo yande rārosar ivate catu vahe, suvi pipe omboyecua güemimbotar piyasu ndopai vahe imbou yandeu,

²¹ tombou pe reco mohivisa iyavei pe reco aviyesa opacatu pe semimbotar apo água; iyavei ahe toyapo mbahe opacatu güemimbotar yande rese Jesucristo rembiapo sui. ¡Ëgüe tehi imboeteipri apirêhi tasecoi Cristo yepi!

²² Che rivireta, peñemosañ co che opomboaracua vahe rese, moviro tēi niha co ñehesa aicuachía pēu.

²³ Aipota pe peicua yande rivri Timoteo imosesa soquendasa sui. Oyepota pihavise, arasora cheyeupi che sose pe repia.

²⁴ Pemombehu che mahenduha opacatu ava pe cuaisar upe, opacatu ambuae Tūpa upendar ava upe avei. Ivi Italia rupindar avei ombou omahenduhasa yuvireco pēu.

²⁵ Aipo rupive, yande Ru Tūpa tape rovasa opacatu.

SANTIAGO REMBICUACHIA SANTIAGO

Mahenduhasa

¹ Che, Santiago, Tüpa, yande Yar Jesucristo rembiguai aico. Amondo che mahenduhasa doce yuvirecoi vahe Israel iguar opacatu ivi rupi oñemosai vahe upe.

Mbahecuasa ou vahe Tüpa sui

² Che rivireta, pevhareteñora peico acoi oimese tecoãhasa pëu yepi.

³ Esepia, peicua niha pe poreroyasa rese oimese mbahe tecoãhasa, ahe ipipe peyembohe pe ñemosã ãgua rese peico.

⁴ Peicoño ité pe reco ñemosasa pipe pe reco mohivi tupri catu ãgua. Evocoiyase nipane iri chira mbahe Tüpa suindar pëu.

⁵ Iyavei acoi ipanese que ava pe pãhu pendar upe yaracua ãgua, toporandu Tüpa upe. Evocoiyase ahe omboura chupe. Esepia, ahe opacatu upe mbahe ombou güecatêhiêhisa pipe iyavei ombahe mboasiêhisa pipe avei.

⁶ Iyacatu rumo evocoi ava oporandura Tüpa upe sese oyeroyá pipe, ndahei chira opihãmoñeta rerova-rova tẽisa pipe inungar acoi ivitu i ombohitu-hitu tẽi vahe.

⁷ Acoi êgüe ehi-ehi tẽi vahe ava ndoipisii chira mbahe yande Yar sui yuvireco.

⁸ Esepia, ñepeí ari ipihãmoñeta ñepeí mbahe rese, ambuae ari ambuae rese. Ndoyemoviracuai güeco tupri ãgua rese yuvireco.

⁹ Iyavei que Jesús reroyasar seco mbegüe vahe toyembovhareteño yepi Tüpa omboeco ivate ãgua rese.

¹⁰ Iyavei mbahe yar secoi vahe pe pãhuve, toyemboviha viteño Tüpa viroyise seco ivatesa sui. Esepia, mbahe yar yuvirecoi vahe inungar caha potri êgüe ehi raimi tẽi vahe yuvireco.

¹¹ Evocoiyase acoi ari osêse, sacú iteangase, ahese caha opa ipiru; ipotri avei opa oviapi ichui iyavei iporañetesa opa ichui. Êgüe ehi aveira ava mbahe yar; omanora oporaviquisa sui.

Tecoãhasa, poroãtoisa resendar

¹² Acoi ava oyemoviracua vahe poroãtoisa upe oyembovhara oico. Esepia, osasa tuprise evocoi poroãtoisa, oipisira porerecosã, ahe tecovesã apirêhi vahe Tüpa ombou vahe gúaisupar upe.

¹³ Acoi ava oyanduse poroãtoisa oyeupe mbahe tẽi apo ãgua, “Tüpa revõ êgüe ehi cheu” ndehi chira. Esepia niha, Tüpa ãtoisar ndipoi eté mbahe tẽi oyapo uca vaheerã chupe. Iyavei ahe noñatoi avei mbahe tẽi apo ãgua ava.

¹⁴ Co rumo ava opihãmoñeta rai upe oñeatoí uca mbahe tẽi apo ãgua yepi.

¹⁵ Güemimbotarai pipe evocoiyase oyapo angaipa. Ipare angaipa apo pipe sui ou manosa chupe.

¹⁶ Che rivireta, che rembiaisu, peyembopai rene.

¹⁷ Esepia, opacatu mbahe aviye vahe ahe Tüpa ombou vahe yandeu. Ahe niha opacatu va rese mbahe aposar. Ndahei rumo güembiapo nungar secoi. Esepia, sembiapo oñecuñaro vahe.

¹⁸ Ahe rumo ombou ité tecovesã yandeu co ñehesa supi eté vahe pipe ‘toyuvirecoi inungar yipindar mbahe miti ha seropovêhepri cheu opacatu che rembiapo sui’ ohesave yandeu.

Tüpa rese yande pihãmoñetasa supi tupri vahe

¹⁹ Iyavei che rivireta, che rembiaisu, peyemomahenduha co che ñehese rese: peyapisaca tupri voira ambuae ava ñehese rese, mbegüe rupi rumo peñehera chupe iyavei ndapemba-hemboasi voi tẽi chiaveira.

²⁰ Esepia, yambahemboasi voi tẽise, ndayayapoi Tüpa remimbotar.

²¹ Evocoiyase peseya teco raisã, opacatu ambuae oime vahe mbahe naporai vahe pe pãhuve. Co catu pe yemominisave peroya catu vite Tüpa ñehese omoingue vahe pe piha pipe. Ahe niha vireco pĩratasa pe písiro ãgua.

²² Pe rumo pemboaviyera co pe mbohe vahe ñehesa; ndahei acoi pesenduño tẽira. Esepia, pesenduño tẽise, pe ae peyembopara.

²³ Supi eté acoi ava osenduño tẽise Tüpa Ñehengagüer, ipare rumo ndoviroyai, ahe inungar acoi ava osepiãño tẽi vahe vova yepiasa pipe.

²⁴ Ipare rumo oyepepise ichui, cüriteimi sesaraiño ichui.

²⁵ Acoi ndasesarai vahe ité rumo güemiendu sui iyavei oyapisaca tupri vahe co mborocuita maranehi mbahe-mbahe tēi sui yande reroqua vahe rese iyavei oye-moviracuaño ité vahe oyapo vahe rā iporocuita, ahe oviharetera opacatu güemiapo tupri rese.

²⁶ Amove ava, “Che aguata tupri Tūpa rupi” ehi tēi. Ndoicuai rumo oñehe monguiriri āgua. Evocoiyase ahe ae oyembopa oico. Sembieroya evocoiyase ēgüe ehi tēi vahe.

²⁷ Yarecose rumo yande rembieroya icatupri, nimarai vahe yande Ru Tūpa rovai, ahesa yaipitiviira co tirēhi, imer mano vahecuer avei iparaisusa rese. Iyavei ndayayapoi chira mbahe naporai vahe.

2

Ndayamboyoaviratii chira ava mboeteisa sereco

¹ Iyavei no, che rivireta, pe peroya vahe yande Yar Jesucristo seco porañete vahe peico, ndapeyaisu yoavii chira.

²⁻³ Inungar-ra que ava mbahe yar oiqueste pe ñemonuhasave viña, ahe icuā penda oro vahe, iturucuar catupri ai vahe. Sese peñañeco tupri, “Eguapi co tenda aviye catu vahesave” peyera chupe. Ahe pipeve avei co oiqueste pe pāhuve iparaisu vahe oturucuar cuacua vahe reseve, “Eipe peve nde epita, anise eguapi ivive” aipo peyeñora co chupe viña.

⁴ Evocoiyase ēgüe peyese, peyapo mbahe ndoyoyai vahe, naporai vahe pe pāhuve ae iyavei peyeapo ava poravosar nungar peico pe piñañemoñeta raisa pipe.

⁵ Che rivireta, che rembiaisu, pesendu aipo ñehesa: Tūpa oiporavo ava iparaisu vahe co ivi pipe ‘toyuvirecoi mbahe yar nungar che reroyasa rereco’ oya, iyavei ‘toipisi che remimombegüer rupi che mborerecuasa oyeupe nara’ oyapave guaisupar upe.

⁶ Pe rumo seroñrosa pipe pemochi ava iparaisu vahe. ¿Ndahei vo mbahe yar mara-mara tēi pe rereco yuvireco yepi? Ahe niha pe mbotiriri mborerecuar rovai pe reraso yuvireco yepi.

⁷ Ahe avei niha oñehe-ñehe tēi seroñrosa pipe yande Yar yaroya vahe rer imboyeroyapri rese yuvireco.

⁸ Supi eté yayapo mbahe aviye vahe yamboaviyese mborocuita ivate catu vahe icuachi-apri aipo ehi vahe: “Pesaisu ava pe yeaisu nungar” ehi vahe.

⁹ Acoi yayeaisu yoavirati tēise rumo, ahesa yayapo angaipa, yayavi mborocuita Tūpa rovai.

¹⁰ Esepia, acoi ava viroya vahe opacatu mborocuita, ipare rumo oime que ñepe nomboaviye tupri vahe, ahe oyavi opacatu mborocuita.

¹¹ Esepia, Tūpa ité niha aipo ehi: “Ndapeyemboaguasai chira” ehi. Ahe avei aipo ehi: “Ndapeporoyuca chira no” ehi. Yepe acoi ndapeyemboaguasai chira viña, pe poroyuca pipe rumo, peyavi mborocuita.

¹² Evocoiyase peñehe tupri ra iyavei peico tupri aveira. Esepia, oporandura yande recocuer rese yande Yar oporocuita pipe güeru vahe yande reco tupri āgua.

¹³ Supi eté acoi ndoiparaisuercoi vahe ava, ahe chupe ndipoi chiaveira poroparaisuercosa mborandusave. Oporoparaisuerco vahe rumo, ahe soriveté catura yuvireco ahe ari pipe mborandusave curi.

Yamboaviye itera mbahe; ndahei chira yande ñehe tēi

¹⁴ Che rivireta, ¿aviyera piha acoi ava, “Ayeroya yande Yar rese” ehi tēi vahe, ndoyapoise mbahe aviye vahe yuvireco? ¿Oicatura piha ahe oñepisiro aipo ohe pipe tēi yuvireco?

¹⁵ Inungar-ra oimese que yande rivri, anise yande reindri upe ipanera iturucuarā, semihura ari yacatu rupindri viña.

¹⁶ Evocoiyase que pe aipo peyeñora chupe viña: “Aviye, eso tupri eico. Eyeao eso sōhisagüer sui, ecaru tupri” peyera. Ipare rumo ndapemondoise mbahe ipane vahe chupe, ¿aviyera piha ava upe aipo yande he tēi viña?

¹⁷ Ēgüe ehi avei, “Ayeroya yande Yar rese” yande hesa; ndayayapoise rumo mbahe aviye vahe aipo yande hesa pipe, aipo yahe tēi yaico.

¹⁸ Aviyeteramo ava pe pāhu pendar aipo ehira cheu: “Nde ereyeroya yande Yar rese, che rumo ayapo mbahe tupri” ehi. Che evocoiyase aipo ahera chupe: “Emboyecua ru nde yeroyasa mbahe nde rembiapoēhi pipe. Evocoiyase che amboyecua che yeroyasa oime vahe che rembiapo pipe ndeu” ahera.

¹⁹ Nde niha aipo, “Che aicua oime ñepe Tūpa” ere. Supi eté aipo ere. Co rumo caruguar avei oicua. Ichui osiquiyepave rumo ahe oririi eté yuvireco.

²⁰ ¡Mbia, tapeico eme ndayaracuai vahe! ¿Ereicua vo co nde mbahe apoñisa nde yeroyasa ēgüe ehi tēi vahe?

²¹ Esepia, Tūpa oipisi yande ramoi Abraham seco tuprisa pipe oicuvāhese porerecosa nungar guahir Isaac chupe aracahe.

²² Indó, Abraham yeroyasa omboyecua ité gümbiapo catupri reseve. Evocoiyase ěgüe ehi ahe gümbiapo tupri pipe omboaviye tupri oyeroyasa oico aracahe.

²³ ěgüe ehi yaviye icuachiapri aipo ehi vahe: “Abraham viroya ité Tūpa, evocoiyase, ‘Co seco catupri vahe’ ehi Tūpa ipisi” ehi. Ahese ava, “Abraham Tūpa mboripar ité” ehi yuvireco chupe.

²⁴ Indó, Tūpa, “Co seco catupri vahe” ehi ava upe sembiapo tupri repiase yepi, ndahei iyeroyasa rese güeraño.

²⁵ ěgüe ehi tupri avei cuña ndipihai vahe Rahab upe. Esepia, ahe omoingue ñuvirío ava ivi repiasar imondopri güeta pipe, ipare oñomi imondo ambuae perí rupi yamotarēhisar sui. Ipípe sui Tūpa oipisi inungar-ra seco ivi tupri vahe viña.

²⁶ ěgüe ehi yande rembiapo catupri ndayamboycuaise yande yeroyasa pipe, ahe inungar avei Espirítu ndasecoise yande rese, yande yeroyasa evocoiyase omano tēi eté oico.

3

Yande ñehe resendar

¹ Che rivireta, yipindar ndapeyeapoi chira setá etepri oporombohe vahe peyepāhuve. Esepia, peicua niha yande oporombohe vahe yaicose, Tūpa oporandu catu itera ambuae ava sui yande porombohe agüer rese yandeu curi.

² Opacatu yande yayavi setá mbahe rese yepi. Oimese que ava ndoyavii vahe oñehe, ahe ava seco ivi tupri vahe. Iyavei oicua tupri opacatu güeco rereco tupri āgua.

³ Inungar acoi yamondose cavayu yuru penda sese seroguata āgua. Ahese opacatu cavayu retecuer yaicatu imboyahuva āgua.

⁴ Inungar tupri avei carite guasu, yepe tuvicha iyavei yepe ivitu omoañi opiratagüer pipe viña, serovasa rahimi pipe rumo seroguatasar omohivi-hiviño seraso güemimbotar rupi.

⁵ ěgüe ehi avei yande āpecu, yepe chihimi tēi viña, ipipe rumo yayapo tēi mbahe tuvicha vahe ava upe. Inungar avei que tata chihimi vahe sui tēi yuvi guasu opa ocai.

⁶ ěgüe ehi yande ñehesa tata nungar. Iyavei yande āpecu pipe opacatu mbahe-mbahe tēi yamombehu. ¡Evocoi mbahe-mbahe tēi mombehusar yande resendar ité! Ahe amove ovireco mara opacatu yande recocuer. Inungar tata ova-ova vahe mbahe rese. Evocoi yande ñehe tēisa caruguar suindar.

⁷ Ava oicatu opacatu mbahe mimba nimasoi vahe mboaracua āgua, vīrai, mboi iyavei mbahe ipi para guasu pipendar avei no.

⁸ Ndiipoi eté rumo que ava oipoepeí vaheṛā oñehe. Yandeu ndiyai eté ipoepi āgua. Yande ñehesa oporoyuca vahe nungar ité yepi, mbahe tēi eté.

⁹ Co yande āpecu pipe yamboetei yande Yar Tūpa, ipipe avei rumo yamomara ava, ahe ava rumo Tūpa oyapo onungar.

¹⁰ ěgüe ehi eté, yande ñehe pipe yamboetei Tūpa, ipipe avei yaroïro ava. Che rivireta, ndiyai evocoi nungar mbahe yayapo yepi.

¹¹ ¿Oicatura pīha osē ñepeí i ohē vahe sui sēhe vahe, iro vahe avei viña?

¹² ¿Ihara pīha higuera ivira rese aceituna viña? ¿Iyavei oicatura pīha uva hi rese oha higo viña no? ¡Aní, ndoicatuí eté! Iyavei ndoicatuí ñepeí i ohē vahe sui osē i, sēhe vahe sēhe asi vahe reseve.

Mbahecuasa supi eté vahe

¹³ Acoi oimese pe pāhuve yaracua vahe, oyapisaca vahe, tomboyecua catu güeco catuprisa, güeco mbegüesa avei ombahecua tuprisa pipe.

¹⁴ Oimese rumo pe pihave pe poroamotarēhisa mbahe pota raisa pipe, iyavei peyuepe nara tēi mbahe peseca, ahese ndiyai peyembovīha tupri tēi ‘che yaracua vahe aico’ pe yapave. Esepia, peremira tēira supi eté vahe mbahe rese.

¹⁵ ěgüe ehi eté evocoi nungar aracuasa ndahei Tūpa suindar. Ahe rumo co ivi pipendar tēi vahe, ava pihañemoñeta sui tēi osē vahe iyavei caruguar suindar tēi avei.

¹⁶ Esepia, poroamotarēhisa yande mbahe pota raisa pipe yarecose iyavei yaipotase mbahe yandeyeupe nara tēi, ichui osē ñehepoepisa iyavei opacatu mbahe tēi.

¹⁷ Acoi vireco vahe rumo Tūpa suindar aracuasa, ahe vireco itera opacatu ava rovaque güeco maranehisa iyavei secoira güeco mbegüesa pipe. Ahe ndaseco asi chiaveira. Iyavei oyemoingatu voi vahe, ahe oporoparisuereco vahe, nomboyoaviratí vahe güecocuer. Ahe ipihañemoñetasā ñepeí reseve vahe iyavei oyapo tupri vahe mbahe.

¹⁸ Iyavei acoi oseca vahe mbahe tupri yepi, oipisi itera opiha pipe teco ivisa.

4

Co ivi pipendar mbahe raisusa

¹ ¿Que sui pīha ou vavasa iyavei ñehopepi-episa pe pāhuve? Ahe ou pe mbahe pota raisa sui pereco vahe pe pīhañemoñetasa pipe.

² Pe peipota rai mbahe. Ipare rumo ndapeicatui sereco āgua. Evocoyase peporoyuca pe mbahe pota raisa pipe. Ndiyai eté rumo pēu sereco āgua. Ipipe sui peyecoāha, pevava avei no. Ndapeyosui eté rumo mbahe pe remimbotar. Esepia, ndapeporandui Tūpa upe.

³ Acoi peporanduse rumo sese, ndapeipisii. Esepia, peporandu rai tēi, peipota pe yemboviha āgua rese nara tēi.

⁴ ¡Pe mbia, peyavi vahe pe recocuer! ¿Ndapeicuai vo acoi ava Tūpa cuaparēhi mboripar tēi yuvirecoi vahe, ahe Tūpa amotarēhimbar yuvirecoi? Ēgüe ehi eté acoi oipota vahe co ivi pipendar mbahe-mbahe tēi pipe güeco āgua, ahe oyeapo Tūpa amotarēhimbar.

⁵ Supi eté Tūpa Ñhengagüer aipo ehi: “Tūpa osaisu güecatēhisa pipe o Espíritu omondo vahe yande pīha pipe” ehi.

⁶ Ahe rumo yande pītivii catu oporoaisusa pipe. Esepia, icuachiapri arachendar pipe aipo ehi: “Tūpa oyamotarēhi ava oyeecombóivate ai vahe. Oipītivii rumo seco mbegüe vahe saisusave” ehi.

⁷ Sese pemboyeroa catu Tūpa. Peyemoviracua caruguar remimbotar apoēhi āgua. Ahese ahe oyepepira pe sui.

⁸ Peyemboya Tūpa rese, ahe evocoyase oyemboyara pe rese. Pe, angaipa viyar, ¡peñemoatiro mbahe peyapo vahe sui! ¡Iyavei pemoatiro pe pīhañemoñetasa ñuvirío pereco vahe sui!

⁹ ¡Tatasi pēu, tapeyaseho, perorivete iri eme, pemboasi pe angaipa pe yemboviharēhísave!

¹⁰ Peñenopiha Yar rovai imboyeroyasa pipe. Ahe evocoyase pe reco mboivatera.

Peroiro eme pe mboetasa

¹¹ Che rivireta, aní chira peñehe mara peyeupe. Acoi oñehe rai vahe iyavei viroiro vahe ambuae Jesús reroayasar, ahe oñehe rai tēi aveira mborocuita rese seroiosave. Ēgüe peyese, evocoyase seroyaēhisa pipe peyemboivate catura mborocuita sui viña.

¹² Oime rumo ñepeño ité ombou vahe mborocuita yandeu iyavei oporandu vahe yande recocuer rese. Ahe güeraño avei oicatu oporopisiro iyavei oporomocañi āgua no. Evocoyase pe, ¡ndiyai pe cotindar reroiro āgua pēu!

Ndayaicuai mbahe oime vaheñā yandeu ayihive

¹³ Pesendu pe aipo peye vahe: “Cūritei, anise ayihive yasora que tecuave, anise que tecua guasuve revo. Aheve yaicora ñepeí araviter yande poraviqui āgua. Ahese yamogana catura guarepochi” aipo peye vahe.

¹⁴ ¡Ndapeicuai rumo mbahe oime vaheñā pēu ayihive! ¿Mara ehi pīha yande recocuer? Ahe inungar ivichi oyeuca raimi tēi vahe, ipare opaño ocañi.

¹⁵ Iyacatu aipo peyera viña: “Oipotase yande Yar yande reco āgua, yayapora co nungar mbahe, que ambuae mbahe” peyera yepi.

¹⁶ Pe rumo peñeheño pe yemboivate aisa pipe mbahe pe rembiaporā rese. Opatatu evocoi nungar mbahe rumo naporai.

¹⁷ Esepia, acoi oicua vahe mbahe tupri apo āgua, ipare rumo ndoyapoi eté, ahe oyapo angaipa.

5

Imbahe eta vahe paradisusa resendar

¹ ¡Pe mbahe yar, pesendu co: peyaseho iyavei perāse! Esepia, peiporarara mbahe tēi peico.

² Opatatu pe mbahe eta ocañi tēi vaheñā. Esepia, pe mbahe pe reco ati vahe opa ituyu. Iyavei pe turucuar yayi vahe opa avei ohu sasoi.

³ Pe oro, pe guarepochi opa opochi ati-ati no. Ahe niha pe recoāha āgua, omboyecua vahe mbahe tēi pēu. Iyavei pe mbahe pota raisa ndoyavii pe roho ocai vahe vireco. Esepia, pemonuha guasu tēi mbahe pereco ati vahe sereco co ari ipa vahe pipe.

⁴ Peyapisaca, acoi oipoho vahe mbahe pēu nara yuvireco, chupe ndapemboepii eté. Sese sāsé tēi yuvireco. Ahe rumo yande Yar ipīratá vahe, ivate catu vahe oicua.

⁵ Co ivi pipe tēi pe peyecomoiñiyai peico iyavei peyemboviha co ivi pipendar mbahe rese inungar guaca imonguirapri yuca āgua. Ipipe peyemoingatu pe cañi āgua.

⁶ Pe ñehe pipe pemombaraisu ava ndoyapoi vahe mbahe yuvireco; yepe, “Mara” ndehi yuvireco pēu viña, pe rumo peyucaño.

Ñemosasa iyavei yeroquisá resendar

⁷ Che rívreতা, peñemosañó yande Yar yevi iri água rese. Inungar ava omaheti vahe osãro rane güemiti pohó água. Esepia, ahe osãro yípíndar oquí vahe iyavei ipa oquí vahe mbahe miti aviye água.

⁸ Pe avei peñemosañó, peyemonguerêhi catu. Esepia, cõimi eté yande Yar yevi água cute.

⁹ Iyavei che rívreতা, peñemoiroi rene peyeupe. Evocoyase Tũpa ndoporandui chira co mbahe rese pũ. Esepia, mborerecuar guasu iva pendar oyemoingatu voi ohã yandeu porandu água.

¹⁰ Che rívreতা, peico catu inungar Tũpa ñehe mombehusar aracahendar yuvirecoi vahe. Ahe oñemosañó mbahe rasicuer upe yande Yar rer pipe oñehe água yuvireco.

¹¹ Yande rumo yaicua sovasapri ava oñemosasa vahe mbahe rasicuer upe yuvireco. Psendu niha pe acoi mbia Job serer vahe ñemosasa. Ipare peicua avei mbahe aviye vahe yande Yar oyapo chupe. Yande Yar niha oporoparisuereco vahe.

¹² Che rívreতা, peyapisaca tupri catu co che ñehe rese. Pe ñehe água ndapeiporui chietera que iva rer iyavei que ambuae mbahe pe ñehe reroya uca água. Iyacatu rumo, “Supi eté” peyese, supiño itera; “Aní” peyese, aní chiño itera Tũpa poronupasa pisiêhi água.

¹³ Aviyeteramo que pe pãhu pendar iparaisura oico; toyeróqui. Aviyeteramo oimera que sorivete vahe oico; ahe tosapucaí Tũpa upe.

¹⁴ Aviyeteramo que ava imbaheasira oico, toñehe evocoyase Jesús reroyasar rãrosar upe. Ahe tomondo aceite yande Yar rer pipe yuvireco sese. Ipare toviroyeroquí yuvireco.

¹⁵ Acoi oyeróquise oyeroyasa pipe sese yuvireco, imbaheasi vahe evocoyase ocuerara; yande Yar avei omopuhara. Acoi angaipa virecose, oime aveira ñerosa chupe.

¹⁶ Sese pemombehu pe angaipa peyeupe, peyeróqui avei peyese pe yembogüera tupri uca água. Ava aviye vahe oyeróquise oquerêhisave opacatu güecocuer pipe, ahe iyeroquisá ipĩratá ité.

¹⁷ Acoi Tũpa ñehe mombehusar Elías yande nungar avei. Ahe oporandu oyeróquisa pipe Tũpa upe, “Toquí eme” ehi. Aipo ehise, ndoquí eté ivi harive mbosapi araviter imombitesa rupi.

¹⁸ Ipare oyeróqui iri, ahese oquí iyavei mbahe miti iha iri.

¹⁹ Che rívreতা, acoi oimese oyahuva vahe supi eté vahe sui pe pãhuve, ipare ambuae viroyevise Jesús upe,

²⁰ tapeicua pe acoi viroyevi vahe angaipa viyar secocuerai sui, oipĩsiro ihã imano rãgüer sui. Iyavei omoime ñerosa tuvichá vahe yangaipa upe. Aipo rupive.

PEDRO REMBICUACHIA YIPINDAR VAHE SAN PEDRO

Pedro mahenduhasa Jesús reroyasar opacatu rupi oñemosai vahe upe

¹ Che, Pedro, Jesucristo apóstol aicuachia co che ñehe pëu, pe Tüpa rembiporavo pe recua pipe sui peñemosai vahe ivi Ponto, Galacia, Capadocia, Asia iyavei Bitinia rupi peico vahe upe.

² Supi eté pe yande Ru Tüpa rembiporavo yipisuive peico semimbotar rupi. Evocoyase oEspíritu Santo pipe pe peha oyeupe nara viroyasar pe reco ägua 'imoatiropri toyuvirecoi che Rahir ruvi pipe oangaipagüer sui' oya. Peipisi catu Tüpa porovasasa pe reco tupri ägua.

Tüpa suindar mbahe aviye vahe rãrosa

³ ¡Imboeteipri tasecoi Tüpa, yande Yar Jesucristo Ru! Ahe niha oporoparisuerecosa pipe yande recocuer mbopiasu. Ëgüe ehi yandeu Guahir Jesucristo ocuerayevise. Ipipe sui yaicuaño ité oimera mbahe aviye vahe Tüpa suindar yandeu.

⁴ Ipipe sui avei Tüpa oipisi ucara pëu pe mombaheisa ivave yapocatupri nocañii vaheerã, ndituyui vaheerã iyavei ndopai vaheerã ité.

⁵ Pe peyeroia ité Tüpa rese. Sese niha ahe opíratasa pipe pe repi mbahe tēi sui poropísirosa pe reco ägua. Ahe víreco vahe imoingatupri ari ipa vahe mboyecua ägua pëu.

⁶ Co rese peyembovihareteño peico, yepe cūrítei pe reco pipe peparaisu pucu raimi tēi setá pe recoãhasa pipe peico viña.

⁷ Esepia, pe yeroyasa Tüpa rese aviye oro, ahe sãhasa tata pipe yepi. Ëgüe ehi aveira pe recocuer sãhambri tata nungar mbahe yavai vahe pipe, "¿Aviye vahe ité pãha?" hesave. Yañemosase evocoi mbahe yavai vahe upe, ahese yande yeroyasa aviye catura oro ocañi tēi vaheerã sui. Ëgüe yahese, "Che rese pe yeroyasa aviye ité" ehira yande Yar yandeu. Ahese yarecora teco porañetesa iyavei imboeteipri yaicora acoi Jesucristo oyevise curi.

⁸ Pe niha pesaisu yande Yar Jesucristo, yepe ndapesepiai viña; cūrítei rumo sepiaēhi pipe peyeroia sese. Sese pereco ité pe viharetesa tuvichá, aviye catu vahe, ndapeicatu vahe ahe imombehu.

⁹ Esepia niha, pesupiti pe remiaro poropísirosa apirēhi vahe peico pe yeroyasa pipe.

¹⁰ Aracahe suive ava Tüpa ñehe mombehusar oicua tupri pota ité co poropísirosa resendar yuvireco '¿mara ehi eté pãha co tecocuer?' oyapave yuvireco. Iyavei oñemoñeta yuvireco Tüpa oporoaisusa pipe pëu mbahe ombou vaheerã rese.

¹¹ Cristo Espiritu senondeve oicua uca mbahe Tüpa ñehe mombehusar upe aipo ehi: "Poropísirosar oyemombaraisu ranera, ipare rumo teco orisa porañete vahe oimera" ehi chupe aracahe. Sese, "¿Umara pãha evocoi mbia?" ehi; "¿Mbahesera vo oimera co Espiritu remimombehu yandeu?" ehi yuvireco.

¹² Tüpa rumo omboyecua chupe, ndaehi chupe nara ité imombehupri yuvireco, pëu nara ité rumo. Ahe avei niha poropísirosa resendar ñehesa mombehusar omombehu pëu cūrítei, Espiritu Santo píratasa pipe imboupri iva pendar yandeu. ¡Tüpa rembiguai avei oicua tupri pota tēi cūrítei yuvireco viña!

Tüpa yande poravo yande reco maranehi ägua

¹³ Sese pe pãhañemoñeta tuprisa pipe pemahemoha tuprira peyese Tüpa porovasasa pëu ombou vaheerã rese pe yeroya catu ägua acoi Jesucristo oyevise curi.

¹⁴ Tahir iporeroya vahe pe recosa pipe ndapeicoi chira mbahe pe remimbotarai pipe, acoi pereco vahecuer peyese Tüpa recocuer cuaēhi viteseve.

¹⁵ Peicora rumo pe reco maranehisa pipe ité. Esepia, Tüpa pe poravo oyeupe nara; ahe ndaseco marai vahe ité.

¹⁶ Supi eté icuachiapri aracahendar pipe aipo ehi imombehu: "Pe tapeico seco maranehi vahe. Esepia, che ndaseco marai vahe aico" ehi.

¹⁷ Tüpa niha opacatu ava upe secocuer rese nomboyoaviratii chira oporandu curi, sese pe, "Che Ru" peye vahe chupe peyembosiquiyera mbahe tēi apoēhi ägua imboeteisave co ivi pipe peico vitese.

¹⁸ Esepia, Tüpa pe písiro aracahendar pe ramo suindar aracuaa Ëgüe ehi tēi vahe sui. Peicua tupri ité niha co poropísirosa repri nimboepisai eté que mbahe ocañi tēi vaheerã pipe inungar oro, anise guarepochira viña.

¹⁹ Imboepisa rumo Cristo ruvi maranehi pipe. Ahe seropovēhepri, inungar ovesa nimarai vahe.

²⁰ Ahe Tüpa oiporavo aracahe ivi, iva apoēhi viteseve Ëgüe ehi vaheerã. Cūrítei rumo oymboyecua pëu mbahe tupri ägua.

²¹ Secocuer sui niha peroya Tūpa peico, ahe ombogüerayevi vahe omano vahe pāhu sui, ipare omondo oyemboeteisa, güeco porañetesavei chupe. Ipípe sui peyeroya Tūpa rese iyavei pesāro co mbahe aviye vahe pisi āgua ichui.

²² Cūrítei Tūpa Ñehengagüer supi tupri vahe mboyeroyasa pipe imoatirosa pe recocuer pesaisu vaherā ambuae Jesús reroyasareta. Evocoiyase ěgüe peyera peyeaisu catu opacatu pe pihañemoñeta tuprisa pipe, iyavei opacatu pe pīratasa pipe.

²³ Pe niha pereco tecovesa piasu, ndahei pe yesupa omano tēi vahe suindar. Ahe rumo Tūpa Ñehengagüer supi tupri apirēhi vahe reroya pipe.

²⁴ Esepia, icuachiapri aracahendar pipe aipo ehi:
“Opacatu ava inungar caha, iyemboeteisa evocoiyase inungar ipotri.
Ipare ahe caha opa omano, ipotri avei opa oviapi;

²⁵ Tūpa Ñehengagüer rumo apirēhi vaherā ité yepi” ehi.
Ahe co ñehesa imombehupri poropísirosa resendar pēu nara.

2

¹ Sese peseya opacatu mbahe naporai vahe; opacatu porombopasa tēi, pe reco tupri angahu tēisa, ambuae ava mbahe pota raisa, iyavei opacatu mahechiroi resendar.

² Inungar pītanimi ocuacua āgua oipota cambi; ěgüe peye aveira pe querēhisa pipe Tūpa Ñehengagüer rese pe yembohe catu iri āgua, peico tupri āgua poropísirosa pipe,

³ que peicua itese yande Yar reco aviyesa.

Cristo inungar ita ndopai vahe

⁴ Peyemboya catu yande Yar rese. Ahe inungar ita ndopai vahe. Ava rumo oviroñroño yuvireco. Tūpa rumo ahe ita oiporavo aviye catu vahe.

⁵ ěgüe ehira pe rereco oyeupe inungar ita ndopai vahe; ipípe sui omopuhara otūparoguā pe rese. Iyavei pahí ndaseco marai vahe nungar peicora semimbotar rupi chupe. Pe evocoiyase Jesucristo rembiapo pipe sui peyapora Espiritu upendar mbahe aviye vahe. Ahe inungar mbahe seropovēhepri aviye vahe Tūpa upe.

⁶ Esepia, icuachiapri aracahendar pipe aipo ehi:
“Che amondo ñepeí ita nungar ava aviye vahe tecua Sión ve imoviracua āgua.
Ahe che rembiporavo iporañete vahe, imboeteipri.
Acoi oyeroyá vahe sese, ahe nochī chietera ichui” ehi.

⁷ Pe seroyasar peico vahe upe evocoi ita aviye vahe ité. Seroyasarēhi upe rumo imboaviyesa co ñehesa aipo ehi vahe:

“Oí aposar rumo viroñroño co ita yuvireco.
Ahe ita rumo coiye víracuasa aviye catu vahe”
ehi.

⁸ Iyavei omboaviye aipo ñehesa:

“Co ita oipihapi oiti uca ava” ehi. Esepia, Tūpa suindar ñehesa reroyaēhi pipe sui oyemondo uca mbahe tēi pipe yuvireco. ěgüe ehi vaherā ité rumo ahe secocuer yuvireco.

⁹ Pe rumo ava oyesuindar nungar iporavopri peico Tūpa uve nara, imborerecuasa upendar pahí, iyavei chupendar ava seco maranehi vahe peico. ěgüe peye Tūpa reco pīratasa mombehu āgua peico. Esepia, ahe pe renose pītumimbisa nungar pe recocuerai sui tesapasa aviye vahe pipe pe reique āgua.

¹⁰ Yipindar ndahe víteí eté Tūpa upendar ava peico, cūrítei rumo ahe ité peico; yipindar ndaperecoi Tūpa poroparaisuerecosa, cūrítei rumo pereco ité cute.

Peico catu Tūpa mboetei āgua

¹¹ Che rívíreta, che rembiaisu, peico raimi tēi vahe co ivi pipe, pepoi opacatu co ivi pipendar pe pihañemoñeta raisa sui. Esepia, pemomara uca tēi pe recocuer ipípe.

¹² Pereco tupri pe recocuer aviye vahe ava Tūpa ndoicua víteí vahe rovaque. Yepe ava remieroñro peico inungar-ra mbahe tēi aposar viña, osepiase rumo pe rembiapo catupri, omboeteira Tūpa yuvireco ahe arí pipe acoi yande Yar oporanduse opacatu ava recocuer rese curi.

¹³ Yande Yar raisusa pipe pemboyeroya opacatu pe rerecuar co ivi pipe: que mborerecuar guasu ivate catu vahe,

¹⁴ anise yivirindar. Ahe pe recua pipendar rārosar imondopri ava naporai vahe mombaraisu āgua, iyavei ava seco catupri vahe upe, “Aviye nde recocuer” he āgua.

¹⁵ Esepia, Tūpa oipota pe peyapora mbahe aviye vahe ava mbahe ndoicuai vahe upe, ndayaracuai vahe upe pe rese ñehē-ñehē tēiēhi āgua.

¹⁶ Peico tupri ava rovaque mbiguai tēi nungar sui senosepri pe recosa pipe. Ndiyai rumo ipípe peyapo iri mbahe tēi. Peico tuprira rumo Tūpa rembiguai pe recosa pipe.

¹⁷ Pemboeteira opacatu ava. Pesaisu catu pe rivireta Jesús reroyasar; pemboetei Tūpa; pemboyeroa avei mborerecuar guasu.

Yembohesa yande Yar Jesucristo mombaraisu agüer resendar

¹⁸ Pe, ava rembigual, pemboyeroa catu pe rerecuar imboeteisa pipe que seco catupri vahe, que ndaseco pōrai vahe avei.

¹⁹ Esepia, aviye catu yañemosase mbahe-mbahe tēi ava rembiapo upe Tūpa mboyeroa tuprisa pipe.

²⁰ Mbahe tēi aposa pipe rumo pe mombaraisuse yuvireco, ndipoi eté evocoyase ichui mbahe aviye vahe peñemosase evocoi nungar mbahe upe. Co rumo acoi mbahe tupri aposa pipe pe mombaraisuse yuvireco, ipare peñemosase chupe, ahe rumo aviye catu itera Tūpa upe.

²¹ Pe paraisu āgua rese niha Tūpa pe poravo. Esepia, Cristo oyemombaraisu pe recocuer rese. Ahe rane ēgüe ehi pe rese pe secocuer moña āgua.

²² Ahe ndoyapoi vahe ité angaipa iyavei ndoporombopai vahe ité.

²³ Acoi ava iñehe mara-mara tēise yuvireco chupe, nomboyevii eté iñehe raisa. Iyavei acoi mombaraisuse yuvireco, “Ayepira sese” ndehi eté. Ahe rumo, “Che Ru Tūpa seco ívi vahe oicuara chupe yuvireco” ehiño oyeupe mbahe-mbahe tēi aposar upe.

²⁴ Cristo teieté viraso yande angaipagüer güete pipe curusu rese ‘toyepipi angaipa sui yuvireco. Ipípe sui toyuvirecoi teco ívisave’ oyapave yandeu. Ahe niha yapichapri secói pe recocuer moingatu āgua.

²⁵ Esepia, pe niha yipindar inungar ovesa ocañi tēi vahe peico viña. Cūrítei rumo peyeví Cristo upe. Ahe pe recocuer osāro cūrítei inungar ovesa rārosar.

3

¿Mara ehira ava omenda vahe recocuer yuvireco?

¹⁻² Ēgüe peye aveira cuña, pemboyeroa itera pe mer. Esepia, amove ndoviroya vitei Tūpa Ñehengagüer yuvireco; pemboyecuase rumo pe reco tuprisa imboeteisa avei chupe, aviyeteramo ahe avei viroyara, yepe ndapeñehei chira chupe viña.

³ Acoi pemboyecua potase pe yemoporañetesa ndahei chira pe rete rese inungar oāca rese mbahe omoporañete ai vahe, ndahei chiaveira pe yemondesa sendi yai vahe oro nungar, que turucuar porañete catu vahe.

⁴ Iya rumo pe aviter pipe sui mbahe porañete ipocopi vahe pemboyecua pe reco mbegüemisa iyavei pe recoasiñehisa pipe. Evocoi nungar aviye catu ité Tūpa rovaque.

⁵ Ēgüe ehi avei cuña seco catupri vahe güeco porañetesa imboyecua aracahe. Ahe oyeroya Tūpa rese yuvireco, omer avei omboyeroa yuvireco.

⁶ Inungar Sara aracahe, omboyeroa ité omer Abraham, “Che yar” ehi chupe. Pe inungar ichuindar peico peyapose mbahe aviye vahe pe siquiyēhisa pipe.

⁷ Iyavei pe imer; pereco mbegüera pe rembireco upe. Pemboeteira sereco. Esepia, ahe nipirata tuprii, iyavei Tūpa omboura güeco tuprisa pipe tecovesa apirēhi vahe oyoya voi pēu. Ēgüe peyese, Tūpa osendu itera pe yeruresa.

Paraisusa mbahe tupri aposa rese

⁸ Iyavei na peyera pe opacatu peyese inungar ñepeí oñemu vahe. Oyoya tupri mbahe tapeyandu. Peyeaisu catura Jesús reroyasar pe recosa pipe. Peyemboavara oyeupe pe reco mbegüesa pipe.

⁹ Oyapose ava que mbahe tēi pēu, anise que oñehe raise, ndapemboyevii chira chupe. Iyacatu rumo mbahe tuprisa pipe pemboyevira chupe. Evocoi nungar mbahe apo āgua niha Tūpa pe poravo ‘toipisi che porovasasa’ oyapave.

¹⁰ Esepia,

“Peipotase pe recocuer aviye tupri āgua pe yemboviharetasa pipe, pemombituhu pe ñehe raisa iyavei ndapeporombopai chira.

¹¹ Pepoi aveira mbahe tēi sui, pesecara mbahe aviye vahe.

Peseca teco tuprisa peyeupe nara, peguata supi.

¹² Esepia, supi eté, yande Yar osāro ava seco catupri vahe iyavei osendu oyeupe yeruresa. Ava mbahe tēi aposar rumo ndoipisii eté” ehi.

¹³ Ndipoi chira revo que ava mbahe tēi oyapo vahe pe recocuer upe yuvireco, pequerēhise mbahe aviye vahe apo.

¹⁴ Peparaisuse rumo mbahe pe rembiapo aviye vahesa rese, ¡sovasapri peico! Peyemboisiquiyei rene que ava sui.

¹⁵ Pemboeteiñora rumo Cristo pe Yar secosa rese pe piha pipe. Peyemoingatu voira ava pe remiaro rese oporanduse pēu pe querēhisa pipe imombehu tupri āgua.

¹⁶ Ēgüe peyera rumo pe reco mbegüesa pipe imboeteisave. Peico tuprira pe pihañemoñeta tupri rereco. Acoi que oñehe rai vahe pe Cristo reroyasa recocuer rese, ahe yuvinochira oñehe sui curi.

¹⁷ Tüpa oipotase pe yemombaraisu, aviye catu mbahe aviye vahe apo pipe yepi mbahe tēi apo rāgüer sui.

¹⁸ Esepia niha, Cristo teieté omano yande angaipa repirā ñepei reseve. Güeco maranehi pipe ēgüe ehi ava recocuerai rese opacatu pe reraso āgua Vu Tüpa upe. Ahe omano güete rese. Ipape rumo ocuerayevi güeco espíritu pipe.

¹⁹ Güeco espíritu pipe avei oso, omombehu Vu Tüpa remimbotar ava hā soquendapri yuvirecoi vahe upe.

²⁰ Ahe ava Noé recosendar ndiporeroyai vahe yuvireco aracahe. Tüpa osāro güeco mbegüesa pipe secocuer moingatu āgua viña Noé oyapo viteseve arca oico. Ahe ipipe oñepisiro ochomi tēi yuvireco amarusu sui.

²¹ Ahe i osāhangapo i poroāpiramosa, ahe omboyecua yande ipisiroproi yande recosa. Poroāpiramosa rumo i pipe ndahei yande rete moatiro āgua. Co rumo yaporandura Tüpa upe, yande pihañemoñetasa moatiro āgua. Ipipe sui evocoyase yañepisirora yande Yar Jesucristo cuerayevisa pipe.

²² Ahe oso ivave uguapi oī Vu acato coti. Opacatu sembiguai eta, mborerecuareta, opacatu imborerecuasa ipīrata vahe avei ipovri pendar yuvirecoi.

4

Yandehañeco yandeyese mbahecuasa Tüpa suindar yaipisi vahe pipe

¹ Cristo oiporara mbahe rasicuer güete rese. Pe avei evocoyase peyemoingatu voi ēgüe peye vahe rā peico chupe nara. Esepia, acoi ava oyemombarora vahe güete pipe oseya angaipa yuvireco.

² Ipipe sui ndoyuvireco iri chira ari rupi ava tēi pihañemoñetasa pipe. Tüpa remimbotar rupi eté rumo oyapo pota mbahe co ivi pipe yuvirecoi vitesse.

³ Ēgüe peye pucu rane niha pe rembiapo ai pipe peico ava Tüpa reroyasarēhi recocuer nungar rupi tupri. Ahese mbahe-mbahe tēi peyapo pe pihañemoñeta raisa pipe, savaiposa, pietasave pe rāse tēi pipe pe aracuasa pemocañi pe ihu tēisa pipe, pemboetei avei mbahe rahanga tēi peico.

⁴ Cūrítei rumo pe mboriparer, ndoyembovihal tēi pe rese, ndapeico irise supi semimbotarai apo āgua. Ahe oñehe-ñehe tēi yuvireco pe recocuer piasu rese.

⁵ Ahe chupe rumo oimera porandusa. Esepia, yande Yar oyemoingatu opacatu ava recocuer rese oporandu āgua omano vahe upe, oicove vite vahe upe avei curi.

⁶ Sese niha co ñehesa pīsirosa resendar imombehusa ava omano vahe upe. Yepe omano co ivi pipe inungar opacatu ambuae ava oangaipa repirā, iespíritu rumo yuvirecoi apirēhi inungar Tüpa.

⁷ Virovi rumo ari ipa vahe oico, sese pe yapisacasa pipe pepihañemoñeta tupri iyavei peyerure catuño ité pe yeroya tuprisa pipe.

⁸ Co catu opacatu tupri ité peyeaisura pe piha pipe. Esepia, ēgüe yahera poroaisusa pipe yande ñero voira seta ava yangaipa vahe upe.

⁹ Peipisi tupri ava yuviraso vahe pe rētave; “¿Mbahe rese piha co ou?” peyei rene pe pihañemoñeta pipe pe piri ou vahe upe.

¹⁰ Ñepei-pe yande yaiporura Tüpa suindar mbahecuasa yareco vahe ambuae Jesús reroyasar rese hañeco tupri āgua. Yaiporu tuprira co Tüpa porovasasa setā vahe yande cuaita mboaviye tupri āgua.

¹¹ Acoi pemombehuse Tüpa suindar mbahe, pemombehura inungar iñehe ité; acoi peporopitivi potase, peyapoño opīratasa pēu Tüpa ombou vahe pipe. Opacatu mbahe peyapo vahe peyapo ‘tomboetei ava yuvireco Tüpa yande Yar Jesucristo rembiapo pipe sui’ pe hesa pipe. Esepia, chupendar ité imboeteisa iyavei imborerecuasa. Ēgüe tehi apirēhi vahe rā ité.

Yemombaraisusa Cristo reroyasar yande recosa pipe

¹² Che rivireta, che rembiaisu, ndapeyesapiha ucai chira, acoi oimese mbahe-mbahe tēi yande recoāhasa pēu ‘ndoyaviñi, ndipoi chietera evocoi nungar mbahe cheu viña’ pe hesa pipe.

¹³ Yayemboviharreteñora rumo ipipe. Esepia, yande rereco yande Yar yemombaraisu agüer nungar pipe yuvireco. Evocoyase yayemboviharrete itera acoi yande Yar oyevise güeco pīratasa pipe.

¹⁴ Iñehe marase yuvireco pēu Cristo reroyasar pe recosa rese, sovasapri peico. Esepia, Tüpa Espiritu güeco porañetasa pipe secoi eté pe rese.

¹⁵ Acoi pe pāhu pendar omombaraisuse yuvireco, ndahei chira rumo iporapichisa rese, ndahei chiveira imondasasui, que mbahe tēi aposa rese. Ndahei chiveira que ambuae ava mbahe rese iñemañeco tēisa sui ēgüe ehira serecosa.

¹⁶ Co rumo acoi peparaisuse Cristo reroyasar pe recosa pipe, ndapechī chietera. Pesapucaira rumo Tūpa upe imboeteisa pipe serer pereco vahe rese.

¹⁷ Esepia, oyepota itē ari Jesús reroyasar upe rane itē tecocuer rese porandu āgua. Ēgüe ehise yandeu, mbahe tēi catu itera Jesús reroyasarēhi upe.

¹⁸ Yavaise seco catupri vahe upe iñepisiro āgua, ħmara ehira pīha ava ndaseco pōrai vahe ava angaipa viyar yuvirecoi vahe upe?

¹⁹ Sese peyemborarase Tūpa remibotar rupi, iyacatu peguataño itera mbahe aviye vahe pipe. Iyavei peyemondo itera yande Aposar upe ahe pe hā rāro āgua. Esepia, ahe niha yeroyasa itē secoi.

5

Aracuasa Jesús reroyasar upe

¹ Che amboaracua pota pe pāhu pendar Jesús reroyasar rārosar. Inungar avei niha che aico iyavei asepia vahe itē yande Yar mombaraisu agüer. Inungar ahe vireco teco orisa, ēgüe ahe aveira acoi yande Yar oyevise curi.

² Pesāro tupri catu Tūpa upendar ava eta pe remiaro co omondo vahe pēu inungar ovesa rese yangarecuar osāro tupri vahe ovesa; peyapora pe querēhisa pipe itē. Ahe niha Tūpa oipota, ndahei ambuae yande cuaisa pipe tēi, ndahei avei guarepochi pota raisave yayapo. Yayapora rumo mboraviqui yande querēhisa pipe itē.

³ Ndapeicoi chira pe remiaro upe inungar que mborecuar güeco ivatesa pipe oporocuai pīrata vahe. Pemboyecuaru rumo pe recocuer aviye vahe chupe imbohesa tupri pipe.

⁴ Evocoyase acoi oyevise yande Yar, yande rārosar ivate catu vahe, ahese peipisira mbahe porerecosa, teco ori porañete apirēhi vahe.

⁵ Iyavei no pe mbia chihivahe, pemboyeroyara ava pe rārosar peico. Iyavei opacatu peyemboyeroyara pe reco mbegüesa pipe peyeupe peico. Esepia, “Tūpa ava oyeecomboivate ai vahe amotarēhimbar secoi; ava seco mbegüemi vahe upe rumo ombou oporovasasa” ehi.

⁶ Peyecomombegüe catu peico Tūpa pīratasa povrive. Evocoyase pe reco mboivatera curi.

⁷ Opacatu mbahe rese pe pihañemoñeta atisa pemombehura Tūpa upe. Esepia, ahe pe rārosar itē secoi.

⁸ Pearacua cañii rene peyesui, pemahemoha ari rupi peyese. Esepia, pe amotarēhimbar Carugar pe reco momara pota yepi inungar yaguar oñaro vahe uguata tēi oporoeca ‘tamomara ava’ oyapave.

⁹ Sese peyemoviracuara Tūpa rese pe yeroyasa pipe Carugar upe. Esepia, peicua niha opacatu rupi avei yande rivireta Tūpa rese yuvirecoi vahe iparaisu co nungar mbahe pipe.

¹⁰ Peparaisumi pare rumo, Tūpa teietē pe reco mohivi tuprira, iyavei pe reco moviracuara, pe momirata aveira pe yepepi iriēhi āgua ichui. Ahe niha oporovasasa pipe yande poravo oyeupe nara, yande yaso vahe rā supi teco ori ndopai vahesave yande Yar rese yande recosa pipe.

¹¹ Ēgüe tehi tasecoi güeco pīratasa apirēhi vahe pipe.

Mahenduhasa ipa vahe

¹² Yande rivri Silvano omboaviye tupri vahe itē ocuaita yepi, ahe che pītiviisa pipe co ayapo imondo che rembicuachía ndipucuimi vahe pe mboaracua catu āgua ‘ipipe toicua tupri catu yuvireco co porovasasa oipisi vahe, supi etē omboyecua vahe Tūpa poroaisusa’ che hesave. ¡Peyemoviracua tupri itē sese!

¹³ Iyavei Babilonia pendar Jesús reroyasar yuvirecoi vahe oyoya vahe pe rese iporavopri, ahe ombou omahenduhasa yuvireco pēu. Marcos, che rahir nungar avei imahenduha pe rese.

¹⁴ Peyeovaupite “avirave” apo pe yeaisusa pipe.

Tapereco tecocuer tupri yande Yar Jesucristo rese peico vahe. Aipo rupive.

IMONŪVĪRIOSĀ PEDRO REMBICUACHIA SAN PEDRO

Pedro mahenduhasa Jesús reroyasar upe

¹ Che, Simón Pedro, apóstol, Jesucristo rembiguai aico. Co aicuachía che ñehe pēu nara, pe pipisi vahe yande Yar rese pe yeroyasa aviye vahe inungar ore. Esepia, yande Yar Tūpa, yande Pīsirosar Jesucristo seco ivi vahe yuvirecoi.

² Tapeipisi catu porovasasa iyavei teco tupri Tūpa, yande Yar Jesús cua tupri pipe.

Jesús reroyasar recocuer

³ Tūpa ombou güeco pīrata pipe opacatu mbahe ipane vahe yande recove āgua, sese yande pihāñemoñeta catu āgua avei yande secocuer cua tupri pipe. Ahe yandē poravo güeco porañetesa pipe, güembiapo porañete vahe pipe avei.

⁴ Ipipe avei oseya oñehe imboaviyepirā yandeu; ahe ñehe ēgüe ndehi tēi vahe, aviye catu vahe ité. Co yandeu ñehesa pipe sui perecora Tūpa reco aviye vahe peyese pe yepēpi āgua mbahe tēi sui. Ahe acoi oime vahe co ivi pipe ava remimbotar tēi sui.

⁵ Sese pe peyeroya vahe Jesús rese, peyemomirata catu aveira peyapo vahe rā mbahe aviye vahe. Peseca aveira Tūpa remimbotar cua tupri catu āgua.

⁶ Iyavei peñearo tuprira. Ipare peñemosañ aveira mbahe tēi upe. Ipipe sui peyemondo tupri catura Tūpa upe.

⁷ Ipare peyeaisura peyēivri nungar pe recosa pipe. Ipipe sui peseca catu vitera ava raisu tupri āgua.

⁸ Esepia, perecose evocoi nungar mbahe pe recocuer pipe, pembouvicha catuse avei, ahese pe recocuer ēgüe ndehi tēi chira, peicua tupri catu aveira yande Yar Jesucristo.

⁹ Acoi ndovirecoi vahe rumo evocoi nungar mbahe oyese, ahe oyeapo inungar ndas-esapiso vahe, anise mbahe ndosepia tupri vahe, sesaraiño oangaipa rese ñero agüer sui.

¹⁰ Sese che rivireta, peyemoviracua catu Tūpa pe renoisa mboyecua āgua iporavopri pe recosave. Ēgüe peyese, ndapeviapi chietera mbahe tēi pipe.

¹¹ Evocoi nungar pipe sui pe pisi tuprira omborerecuasa ndopai vahe pipe yande Yar, yande Pīsirosar Jesucristo.

¹² Sese niha opomomahenduhāño itera evocoi nungar mbahe rese, yepe peicua, peicoveño avei mbahe supi tupri vahe rese.

¹³ Aviyeño itera revu che recove viteseve opomomahenduha vite co aracuasa rese.

¹⁴ Esepia, yande Yar Jesucristo oicua uca cōimi che mano āgua cheu.

¹⁵ Opombohera rumo opacatu che catugüer rupi co tecocuer rese che manore pe mahenduha āgua.

Co osepia vahe ité Jesús mborerecuasa yuvireco

¹⁶ Co porombohesa oromombehu vahe pēu yande Yar pīratasa resendar, iyēvi iri āgua resendar avei, ndahei oreyesui tēi. Ore rumo orosepia vahe ité ore resa pipe yande Yar mborerecuasa.

¹⁷ Orosepia niha yande Ru Tūpa omboeteise Guahir iyavei omondose chupe seco porañete iri āgua aipo ehise oñehe güeco porañetesa pipe: “Co che Rahir, che rembiaisui ité, sese niha che ayemboviharete vichico” ehise.

¹⁸ Ore ité niha aipo ñehesa orosendu va suindar oroicose yande Yar rupi ivitri imboeteipri vahesave.

¹⁹ Ahe ñehesa omboyecua catu ñehesa aracahendar Tūpa ñehe mombehusar remimombe-hugüer supi tupri vahe Cristo resendar. Iya ité pēu pe yapisaca tupri āgua sese; inungar que tataendi pitusave osesape vahe oico acoi osēse voi cōhe rerusar yasitata guasu ou, ēgüe ehi co ñehesa pe piha pipe sesape.

²⁰ Peicua catu co mbahe, co ñehesa aracahendar icuachiapri Tūpa suindar ité, ndahei yandeyesui tēi yaicua imombehu āgua.

²¹ Esepia, ndahei ñehe mombehusar oyesui tēi omombehu yuvireco. Ahe rumo ava seco catupri vahe ité. Tūpa ité omombehu uca oñehe chupe Espiritu Santo pīratasa pipe aracahe.

2

Oporombopa vahe porombohesa

¹ Yuvirecove rumo aracahe porombohesar oporombopa tēi vahe Israel ivi rupi. Oime aveira niha pe pāhuve co nungar oporombopa tēi vahe yuvireco. Ahe ñemisa pipe oporombohera co coti tēi vahe ava reco momara tēi āgua; evocoiya güeco pipe oicuacuñora oyar opisirosar. Co rumo güecocuer momba pihaivi āgua tēi ēgüe ehira yuvireco.

² Setá ava oguatará secocuerai rupi. Ipípe sui ambuae ava oñehe rai tēira porombohesa supi tupri vahe rese yuvireco.

³ Mbahe pota raisa pipe pe mbopara yuvireco co porombohesa co coti tēi vahe rese. Icañi rumo oimeño itera yuvireco chupe. Yipisuiwe ité niha ahe imocañipirā yuvirecoi.

⁴ Esepia, aracahe Tūpa niñeroi eté güembiguai oyemboangaipa vahe upe. Ahe opa ité omondo mbahe tēisave. Ēgüe ehi seyapa pītumimisave, inungar ñapichimbrí carena pipe yapocatupri yuvireco cañisave nara.

⁵ Iyavei acoi Tūpa niñeroi avei ava aracahendar ndaseco pōrai vahe ivi pipe yuvirecoi vahe upe. Omocañi ité amarusu pipe ahe ava yuvireco. Noé acoi omombehu vahe tecocuer ihívi vahe resendar iyavei ava siete yuvirecoi vahe supindar, ahe güeraño ité oipisiro.

⁶ Iyavei opa omocañi tata pipe tecua Sodoma, Gomorra avei; ēgüe ehi imbotanibu tupri 'na ahe aveira niha ambuae ava che reroyaēhisar upe curi' ohesave.

⁷ Lot güeraño rumo ahesa oipisiro. Ahe mbia aviye vahe secocuer; ndoyembovihal tēi ambuae ava recocuer mbahe-mbahe tēi yuvirecoi vahe repiase.

⁸ Co mbia aviye vahe secoise ahe ava pāhuve ari rupi, tasi tēi ipihañemoñeta pipe osepiase, osenduse avei mbahe tēi yuvirecoi vahe rembiapo.

⁹ Indó, yande Yar oicua viroyasar renose āgua mbahe tēi sui; oicua avei mbahe tēi pipe yuvirecoi vahe rereco imombaraisu āgua ari cañise curi.

¹⁰ Tūpa omombaraisu catu itera acoi ndopoi vahe güemimbotarai sui, viroño vahe yande Yar mborerecuasa, oyeecomboivate ai vahe güemimbotar aposa pipe, acoi osiquiyeēhisa pipe oñehe rai vahe seco ivate, ipirata vahe rese.

¹¹ Tūpa rembiguai eta iva pendar rumo yepe ipirata catu vahe, omborerecuasa vireco catu vahe avei yuvireco viña, niñehe-ñehe tēi rumo Yar rovai yuvireco sese.

¹² Co ava mbahe mimba nungar tēi ndovirecoimi eté opihañemoñetasa yuvireco. Opoco voño tēi mbahe rese; evocoi nungar yuviroha yucapirā tēi eté. Ahe oñehe rai tēi vahe mbahe güemienducuaēhi rese. Mbahe mimba nungar tupri avei rumo omanora yuvireco güecocuerai pipe.

¹³ Oyemombaraisu uca ambuae ava mombaraisusa pipe sui tēi, "Yayembovihal mbahe yande rembiapo ai rese" ehi tēi eté yuvireco viña. ¡Oporomochi pipe tēi rumo yuvirecoi, yuvirasose pe pietasave pe piri, güeco rai reseve oyembovihal oporombopasa tēi pipe yuvireco!

¹⁴ Osepiase cuña, oipota voño tēi; ndaporambai avei iyemboangaipasa chupe. "Yayapoño mbahe" ehiño ndoyembohe catui vahe upe. Evocoi nungar oyembohe-mbohe catu mbahe pota raisa reca āgua oyeupe yuvireco. Ava ocañi tēi vaherā yuvirecoi.

¹⁵ Ocañi tēi secocuer yuvireco Tūpa ñehe mombehusar Beor rahir Balaam recocuerai nungar pipe. Esepia, oyepepi tecocuer aviye vahe sui mbahe tēi apo āgua guarepochi pota raisa pipe yuvireco.

¹⁶ Tūpa rumo oyaca yangaipa rese guaricu omoñehe ucasa vahe ñehe pipe chupe. Ahesa ramo opoi oaracuaēhisa sui.

¹⁷ Co ava oporombohe vahe inungar ivicuar ipiru vahe. Iva quiha ivitu remimombo nungar tēi avei. Apirēhi vahe ité imombopirā yuvireco pītumimbi catu vahesave nara.

¹⁸ Esepia, oñehe tupri ai angahu tēi ava monguerēhi āgua ava pihañemoñeta raisa rupi seroyevi āgua. Ipípe sui ombopa tēi ahe ava seco catupri pota vahe yuvireco evocoi nungar mbahe tēi pipe iyevi iri āgua.

¹⁹ "Opacatu mbahe apo yaicatu yande reco pipe" ehi tēi yuvireco. Ahe ae rumo mbiguai tēi nungar yuvirecoi güecocuerai apo pipe. Esepia, noyuvínose catui eté ichui. Supi eté, yayapoño itese que mbahe tēi, ahe evocoiyase mbiguai nungar ité yande rereco uca.

²⁰ Esepia, acoi oicua vahe yande Yar, yande Písirosar Jesucristo yuvireco, ipípe oyepepi co ivi pipendar mbahe-mbahe tēi sui, oyeiti uca irise rumo co nungar mbahe tēi pipe, ichui ndoicatu iri yuvínose. Ipare mbahe tēi catu yipindar secocuer sui yuvireco chupe.

²¹ Oyeupe Tūpa porocuaita imondopri aviye vahe cua pare oyepepise ichui, aviye catura revo ndoicuaise co tecocuer ihívi vahe yuvireco viña.

²² Supi tupri ité yaviye ñehesa sesendar: "Cave rumo ohu iri ogüehē. Iyavei cuchi oyasa pare, oyevi iri tuyuve oyemboavaete āgua" ehi vahe.

3

¹ Che rivireta, che rembiaisu, co icuachía iri che ñehe pëu. Ipípe opomopihañemoñeta tupri uca pota che pe mboaracuasa pípe.

² Peyemomahenduha aracahendar Tüpa ñehe mombehúsar seco catupri vahe ñehengagüer rese, yande Yar Poropisírosar porocuaíta rese avei acoi apóstol pe mbohe vahecuer yuvireco.

³ Peicua ranera co ari imombehupri ipa vahe virovise, oimera ava ahe oviroñrora co tecocuer aviye vahe Tüpa suindar güemimbotarai pípe yuvireco

⁴ aipo ehira, “¿Marase tēi vo aipo oura Tüpa Rembiporavo imombehupri ou vaheñā curi? Esepia, yande ramoi opa tēi omano yuvireco. Cūrítei opacatu ahe tupriño tēi tecocuer aracahe ivi apo suive” ehi tēira yuvireco.

⁵ Ahe nimahenduha potai yuvireco co aracahendar rese. Esepia, Tüpa oyapo oñehe pípe íva, ívi avei, ahe ívi osē vahe í sui, í pāhuve avei secoi.

⁶ Coiye í pípe avei opa omocañi ívi, ombouse amarusu aracahe.

⁷ Cūríteindar rumo íva, ívi imoingatupri tata uve nara Tüpa porocuaíta rupi. Evocoi tata pípe avei ocañi tēira ava mbahe tēi aposar yuvirecoi vahe curi.

⁸ Che rivireta, che rembiaisu, peresarai rene co mbahe sui: yande Yar upe ñepeí ari inungar mil araviter; mil araviter evocoiyase inungar ñepeí arimi tēi chupe.

⁹ Esepia, yande Yar ndiaracahei eté oñehe mboaviye āgua; inungar amove ava, “Iharacahe tēi” ehi yuvireco viña. Ahe rumo aviye etepri güeco mbegüesa pípe yandeu. Esepia, ndoipotai que ñepeí yepe yande cañi tēi āgua; ahe rumo oipota opacatú tupri ité yande recocuer ñecuñaro āgua.

¹⁰ Yande Yar ari yande resapiha tēira inungar imonda rai vahe ou pítu pípe yepi. Ahese íva ocañi tupri tēira viapugüer ipírata vahe pípe curi. Opacatu mbahe yapopri opara yuvirocai. Ipípe sui co ívi opacatu ipor reseve ocañi tēi etera.

¹¹ Opacatu ité niha co mbahe yapopri ocañi tēi vaheñā. Sese, ípeyemoviracuano itera pe reco maranehisa rese Tüpa rese pe pihañemoñetasa pípe!

¹² Pesāroño Tüpa yepotasa resendar ari, iyavei peyapo opacatu peicatugüer rupi ‘toyepota poyava voi’ pe yapave. Ahe ari pípe íva opara ocañi tēi eté tata pípe. Ipípe sui opacatu mbahe yapopri ticupa tuprira curi.

¹³ Yande rumo yasāro ité íva, ívi ipíasu vahe Tüpa remimombehu. Aheve opacatu ava yuvirecoira güeco aviyesa pípe.

¹⁴ Sese che rembiaisu, pesāro vitesese co tecocuer, ēgüe peyera opacatu peicatugüer rupi pe reco tupri āgua pe angaipāēhi pípe, pëu Tüpa, “Peyavi mbahe” ehiēhi āgua.

¹⁵ Tapeicua co: yande Yar seco mbegüe yandeu yande písiro āgua. Ēgüe ehi avei yande rembiaisu Pablo icuachía oyeupe Tüpa ombou vahe mbahecuaasa pípe pëu.

¹⁶ Opacatu ocuachiar pípe omombehu evocoi nungar mbahe pëu, yepe amove yavai senducua āgua yuvireco viña. Sese amove ndoyemoviracua tuprii vahe yande Yar rese iyavei ndoyemboaracua tuprii vahe, ahe co coti tēi virova ñehesa, inungar oyapo ambuae ñehesa icuachiapri Tüpa suindar rese. Ipípe güecocuer omocañi tēi ahe.

¹⁷ Che rivri, che rembiaisu, peicua ité niha evocoi mbahe; sese peñearo tuprira pe yembopa ucaēhi āgua ava ndiporeroyai vahe upe Tüpa rese pe recocuer yemoviracuasa sui pe yepepiēhi āgua.

¹⁸ Peicua tupri catura rumo yande Yar Poropisírosar Jesucristo iyavei peicoveño itera iporovasasa pípe. ¡Ēgüe tehi imboeteipri tasecoi cūrítei apirēhi vaheñā! Aipo rupive che ñehe pëu.

JUAN REMBICUACHIA YIPINDAR VAHE SAN JUAN

Ñehesa tecovesa resendar

¹ Co cuachiar pipe oromombehu pëu co yipisuive secoi vahe. Ahe orosendu, orosepia avei ore resa pipe ité iyavei oropoco ité sese. Ahe niha Tüpa Ñehesa tecovesa resendar.

² Co tecovesa oyemboyecua, orosepia iyavei ahe secocuer oromombehu. Ahe tecovesa apirëhi oromombehu vahe pëu. Ahe Vu rese secoi vahe oyemboyecua vahe oreu.

³ Oromombehu co orosepia vahe, orosendu vahe ñepei vahe nungar pe reco ägua ore rese inungar ore oroco yande Ru Tüpa rese, Tahir Jesucristo rese avei.

⁴ Evocoyase cüritei oroicuachía evocoi mbahe pëu yande yemboviharete catu ägua.

Tüpa tesapesa secoi

⁵ Iyavei Jesucristo ore mbohe co ñehesa rese, ahe oromombehu pëu: yande Ru Tüpa niha tesapesa secoi; ndipoi eté pítumimbisa sese.

⁶ “Che aico tupri Tüpa rese” yahese, yaicoño rumo angaipa pipe, ahe inungar pítumimbi vahe, ahese yande remira tēi iyavei ndayayapoi mbahe supi tupri vahe.

⁷ Yaicose rumo tesapesa pipe inungar yande Ru Tüpa secoi tesapesa, evocoyase yaico tupri yandeyeupe. Iyavei suvi yande moatiro opacatu angaipa sui.

⁸ Iyavei, “Ndarecoi angaipa che piha pipe” yahe tēise, yande ae yayembopa ipipe. Evocoyase mbahe supi eté vahe ndayarecoi yandeyese.

⁹ Acoi yamombehuse yande angaipagüer Tüpa upe, ahese ahe omboura oñeroisa yande angaipa rese yandeu iyavei omoatirora opacatu mbahe-mbahe tēi yande sui. Esepia, ahe seco ivi vahe.

¹⁰ Iyavei, “Che ndacheangaipai eté” yahe tupri tēise yaico, evocoyase Tüpa semirañete ai vahe nungar yareco. Ipipe ndayaroyai iñhengagüer.

2

Jesucristo yande reco moingatusar

¹ Che rahireta, co aicuachía pëu pe angaipaëhi ägua. Que revo ava oime oyemboangaipa vahe pe pãhuve, yareco rumo yande Pítiviisar yande Ru rovai. Ahe Jesucristo, seco ivi vahe.

² Ichui oime avei ñeroisa yande angaipa rese yandeu iyavei opacatu ava uve. Esepia, ahe omano curusu rese yande angaipa mocañi ägua yande sui.

³ Acoi yayapo tupri Tüpa porocuaita, ahese supi eté yaicua Tüpa.

⁴ Oime amove ava “che aicua Tüpa” ehi vahe; nomboaviyei rumo iporocuaita. Ahe semirañete ai vahe, ndovirecoi mbahe supi tupri vahe oyese.

⁵ Acoi yamboaviyese iñhengagüer, ahese supi eté yasaisu Tüpa. Ipipe sui yaicua yande reco tupri Jesucristo rese.

⁶ Acoi “aico tupri Tüpa rese” ehi vahe, ahe secoira Jesucristo nungar.

Mborocuaita ipiasu vahe resendar

⁷ Iyavei, che rivireta, ndaicuachiai mborocuaita ambuae ipiasu vahe pëu. Aheño ité mborocuaita pereco vahe yipisuive. Ahe acoi yipindar pesendu vahe.

⁸ Co aicuachía vahe rumo ogüeru mborocuaita ipiasu vahe. Ahe supi eté tesapesa Jesucristo vireco vahe iyavei pereco vahe avei. Esepia, pítumimbi opara. Tesapesa evocoyase osesape.

⁹ Oime amove ava “che aico tesapesave” ehi angahu tēi vahe; oyamotarëhiño rumo ambuae omboetasa Tüpa reroyasar. Evocoi nungar recocuer pítumimbisave tēi vite.

¹⁰ Acoi osaisu vahe ambuae omboetasa Tüpa reroyasar, ahe secoi tesapesave. Sese nomboangaipa ucai omboetasa.

¹¹ Acoi ndoyambotai vahe omboetasa, pítumimbisa pipe tēi secoi, ndoicuai avei que rupi güecocuer virecora. Esepia, pítumimbi vahe nomboesapisoi.

¹² Che rahireta, co aicuachía pëu nara. Esepia, Tüpa iñero pe angaipa rese pëu Jesucristo recocuer pipe.

¹³ Pe, yesupa peico vahe upe co aicuachía. Esepia, peicua yipisuive oicove vahe. Aicuachía avei pëu, mbia chihivahe. Esepia, pesecopi Carugar.

¹⁴ Iyavei pe tahireta aicuachía opacatu pëu. Esepia, peicua vahe niha yande Ru Tüpa. Aicuachía avei pëu, pe iyepupa. Esepia, peicua yipisuive oicove vahe. Aicuachía avei pëu, mbia chihivahe. Esepia, peyemoviracua etepri, peipisi avei Tüpa Ñhengagüer pe piha pipe. Ipipe pesecopi Carugar.

¹⁵ Evocoiyase pesaisu eme co mbahe tēi ivi pipendar. Acoi ava co mbahe tēi osaisu vahe, ahe ndosaisui yande Ru Tūpa yuvireco.

¹⁶ Esepia, opacatu co mbahe tēi ndahei yande Ru Tūpa suindar; ahe rumo co ivi pipendar suindar. Ahe niha opacatu yande pihañemoñeta raisa, yaipota vahe sese yamahese, iyavei opacatu yande rembiereco rese yande yemboivate ai tēisa.

¹⁷ Co ivi pipendar mbahe tēi iyavei ava mbahe pota raisa opa pota ité ocañi. Acoi ava oyapo vahe rumo Tūpa remimbotar, yuvirecoira apirēhi vaheṛā ité.

Mbahe supi eté vahe iyavei mbahe ndahei vahe supi

¹⁸ Che rahireta, co ari ipa vahe ité yandeu. Iyavei acoi pesendu “oura Jesucristo amotarēhimbar” ehi vahe, ahe cūritei setá oyemboyecua yamotarēhimbar yuvireco. Sese yaicua ari ipa vahe yepota āgua.

¹⁹ Ahe oyepepi yande pāhu sui; ndahei eté rumo yande rivri yuvireco Tūpa rese. Esepia, acoi yande rivri itese, ahese opitara yande piri yuvireco viña. Ēgüe ehi oyecua ndahei opacatu yande rivri yuvirecoi.

²⁰ Cristo omondo Espiritu Santo pēu. Sese opacatu pe peicua mbahe supi tupri vahe.

²¹ Pe niha peicua co mbahe supi eté vahe. Sese aicuachía co pēu. Esepia, mbahe supi eté vahe sui ndoui temira.

²² Acoi “Jesús ndahei Poropisrosar imboupri” ehi vahe, ahe semira tēi vahe, yamotarēhimbar yuvirecoi. Ahe niha ndoviroyai Tu, Tahir avei yuvireco.

²³ Acoi ava “evocoi ndahei Tūpa Rahir” ehi vahe, ndovirecoi Tu oyese yuvireco. Acoi “evocoi niha Tūpa rahir” ehi vahe rumo, ahe vireco yande Ru Tūpa oyese yuvireco.

²⁴ Sese yipisuive pesendu vahe ñehesa peyapocatu pe piha pipe. Ēgüe peyese, ahese peico tupri Jesucristo rese, Tu rese avei.

²⁵ Esepia, Jesucristo aipo ehi: “Pe perecora co tecovesa apirēhi vahe peyese” ehi yandeu.

²⁶ Sese co ava pembopa pota vahe resendar aicuachía pēu.

²⁷ Pe pereco Espiritu Santo Jesucristo ombou vahe pēu. Sese ndiyai eté ambuae pe mbohera. Espiritu ae pe mbohe opacatu mbahe rese oico. Iporombohesa supi eté, ndoporombopai vahe. Sese peicoño Jesucristo rese Espiritu Santo pe mbohesa rupi.

²⁸ Iyavei che rahireta, peicoño ité Cristo rese yareco vaheṛā sese yande yeroyasa. Acoi ogüeyise iva sui curi, ahese nayachí chietera sovai ichui.

²⁹ Pe niha peicua Jesucristo seco ivi vahe. Iya peicua avei opacatu oyapo vahe mbahe ihivi vahe, ahe Tūpa rahir ité yuvirecoi.

3

Tūpa rahir yuvirecoi vahe

¹ Mara ehi rutei Tūpa yande raisu. Ahe aipo ehi yandeu: “Pe niha che rahireta peico” ehi, ahe supi eté aipo ehi. Sese niha co ava ndoviroyai vahe Tūpa, ndoicatu ité yande recocuer cua āgua. Esepia, ndoicuai Tūpa recocuer yuvireco.

² Che rivireta, yaico ité Tūpa rahir. Yande rumo ndayaicua tupri vitei yande reco āgua ipare. Cūritei rumo co mbahe yaicua: acoi oyemboyecuase Jesucristo, yaicora inungar. Esepia, yasepia itera opacatu seco reseve.

³ Iyavei opacatu osāro vahe Jesucristo yuvireco, oyepepiño ité opacatu angaipa sui güeco catupri āgua, inungar ahe secoi.

⁴ Opacatu ava oyemboangaipa vahe, ahe oyavi Tūpa porocuaíta. Esepia, angaipa Tūpa porocuaíta mboaviyeēhisa yepi.

⁵ Pe rumo peicua Jesucristo ou co ivi pipe yande angaipagüer mocañi āgua. Ahe niha ndovirecoi eté angaipa oyese.

⁶ Opacatu ava sese yuvirecoi vahe ndoyapoi angaipa. Acoi ava yangaipa vahe rumo ndosepiaí, ndoicuai avei secocuer yuvireco.

⁷ Che rahireta, peyembopa uca eme ambuae ava upe, acoi oyapo vahe mbahe aviye vahe yepi, ahe secocuer aviye vahe ité inungar Jesucristo.

⁸ Acoi oyapo vahe angaipa, ahe Carugar suindar. Esepia, Carugar yipisuive ité oyapo angaipa. Sese ou Tūpa Rahir Carugar rembiapo mocañipa āgua.

⁹ Opacatu yuvirecoi vahe Tūpa rese ndoyapoi angaipa. Esepia, ahe vireco ité Tūpa recocuer oyese yuvireco. Sese ndoicatu iri angaipa apo āgua yuvireco. Esepia, ahe Tūpa rahir ité yuvirecoi.

¹⁰ Icuapri ité Tūpa rahir yuvireco, icuapri avei Carugar rahir yuvirecoi vahe. Esepia, acoi ndoyapoi vahe mbahe tupri iyavei ndosaisui vahe Tūpa peroyasar, ahe ndahei eté Tūpa rahir yuvirecoi.

Yayaisura ñepi-peí yande yacatu

¹¹ Co niha ñehesa, acoi pesendu vahe yipisuive, ahe co yayeaisura ñepeipei.

¹² Ndayaicoi chira inungar Caín, ahe Carugar remimbohe oyuca vivri. ¿Mahera pñha oyuca? Esepia, tivri oyapo mbahe aviye vahe; Caín rumo oyapo mbahe naporai vahe.

¹³ Che rivireta, pepihañemoñetai rene Tũpa ndoicuai vahe pe reroirose yuvireco.

¹⁴ Yande rumo yaicua aracacondar yande hã cañi tẽi agũer. Cũritei rumo yasẽ evocoi nungar sui tecovesa apirẽhi vahe pipe yande reco ãgua. Esepia, yande niha yasaisu yande rivireta Tũpa rese yuvirecoi vahe. Acoi ndosaisui vahe rumo ahe ihã ocañi tẽi vite itẽ yuvireco.

¹⁵ Opacatu ava ndoyambotai vahe yande rivri, ahe iporapichi serai vahe nungar. Pe rumo peicua ava iporapichi serai vahe ndovirecoi tecovesa apirẽhi vahe oyese.

¹⁶ Jesucristo niha omondo gũecocuer manosave yande recocuer repirã. Ichui yande yaicua poroaisusa. Sese yande avei ãgũe tayahe yande rivireta rese.

¹⁷ Acoi ava vireco tẽi vahe mbahe eta oyeupe nara, osepiaño tẽi rumo vivri upe mbahe ipane vahe, iyavei ndoipitvii, ahe ndovirecoi Tũpa poroaisusa oyese yuvireco.

¹⁸ Che rahireta, yande poroaisusa rumo ndahei chira yande ñehese pipe tẽi, iyacatu rumo yamboyecua mbahe yande rembiapo pipe.

Yande yeroyasa yareco vahe Tũpa rovai

¹⁹⁻²⁰ ãgũe yahese, yande yaicua yande recocuer supi etẽ vahe pipe yaico. Acoi, “Ndahei revo Tũpa rahir aico” yahese, ahese Tũpa rovaque yayemomahenduhara evocoi nungar rese: “Tũpa niha tuvichã catu yande pihãmoñetasa sui. Ahe opacatu mbahe oicua.” Sese yayeroyara.

²¹ Supi etẽ che rivireta, yaicua itese yande piha pipe yande reco tupri Tũpa rese, ahese yayeroyara itera sovai.

²² Ahe avei niha ombou opacatu mbahe yandeu yaporanduse chupe. Esepia, yamboyeroy iporocuaite iyavei yayapo semimbotar yaico.

²³ Co itẽ iporocuaite: yaroyara Tahir Jesucristo iyavei yayeaisura ñepeipei Tũpa yande cuaisa rupi tupri.

²⁴ Acoi yaroyase iporocuaite, ahese yaicora Tũpa rese; ahe avei secoira yande rese. Iyavei ahe ombou Espĩritu yandeu. Ichui yaicua Tũpa secoi yande rese.

4

Espĩritu Tũpa suindar iyavei espĩritu Cristo amotarẽhimbar

¹ Che rahireta, anĩ chira peroya opacatu “Espĩritu pipe añehese” ehi vahe. Iyacatu rumo pesãha rane “¿Tũpa suindar itẽ pñha?” pe hesa pipe. Esepia, setã vai oporombohe angahu tẽi vahe oguata opacatu ivi rupi yuvireco.

² Co rese peicuara ava Espĩritu Tũpa suindar vireco vahe: “Jesucristo ou opacatu gũete rese” ehise, aipo ehi vahe vireco Espĩritu Tũpa suindar itẽ.

³ Acoi aipo ndehi vahe rumo, ndovirecoi etẽ Espĩritu Tũpa suindar oyese. Ahe rumo vireco espĩritu Cristo amotarẽhimbar tẽi. Aracaco niha pesendu ñehesa acoi yamotarẽhisar espĩritu ou vaheerã resendar. Ahe cũritei secoi co ivi pipe.

⁴ Che rahireta, pe rumo Tũpa suindar peico. Iyavei pesecopi itẽ acoi semira tẽi vahe peico. Esepia, Espĩritu secoi vahe pe rese, ahe ipĩrata catu Carugar sui.

⁵ Evocoi co ivi pipendar tẽi yuvirecoi vahe. Esepia, oñehese mbahe ivi pipendar rese tẽi yuvireco. Iyavei ava supindar ae itẽ oyapisaca ñehese rese yuvireco.

⁶ Yande rumo Tũpa suindar yaico. Acoi oicua vahe Tũpa oyapisaca yande ñehese rese yuvireco. Acoi ndahei vahe Tũpa rahir, ahe yande ñehese ndosendu potai yuvireco. Sese yande yaicuara vireco vahe Espĩritu supi etẽ vahe, yaicua aveira vireco vahe espĩritu oporombopa tẽi vahe.

Tũpa poroaisu vahe

⁷ Che rivireta, che rembiaisu, yayeaisu ñepeipei. Esepia, yeaisusa Tũpa suindar. Opacatu osaisu vahe ava, ahe Tũpa rahir, oicua itẽ avei Tũpa yuvireco.

⁸ Acoi ndosaisui vahe ava, ahe ndoicuai Tũpa yuvireco. Esepia, Tũpa yeaisusa secoi.

⁹ ãgũe ehi omboyecua oporoaisusa yandeu. Ahe niha, ombou Guahir ñepeipei vahe co ivi pipe ichui yande recove ãgua.

¹⁰ Ndahei yande rane yasaisu Tũpa. Ahe rane rumo yande raisu iyavei ombou Guahir imano ãgua yande angaipa repirã. Ahe niha poroaisusa supi etẽ vahe.

¹¹ Che rivireta, che rembiaisu, ãgũe ehi Tũpa yande raisu. Evocoyase ãgũe yahe aveira yande yayeaisu ñepeipei yepi.

¹² Ndipoi etẽ ava osepia vahe Tũpa. Yayeaisuse rumo, Tũpa secoi yande rese. Iporoaisusa evocoyase oime itẽ yande rese.

¹³ Ahe ombou oEspíritu yandeu; ipipe sui yaicua sese yande reco iyavei yaicua ahe secoise yande rese.

¹⁴ Iyavei orosepia vahe, oromombehu: yande Ru ombou Guahir ava ivi pipendar p̄s̄iro āgua.

¹⁵ Acoi ava “Jesús niha Tūpa Rahir” ehi vahe, ahe secoi eté Tūpa rese; Tūpa evocoiyase secoi sese.

¹⁶ Ēgüe yahe icua, seroya tupri āgua co Tūpa yande raisusa. Ahe niha yeaisusa. Acoi vireco vahe oporoaisusa, yuvirecoi avei sese; ahe avei secoi sese.

¹⁷ Ēgüe yahe Tūpa poroaisusa mboaviye tupri ichui yande siquiyēhi āgua acoi oyepotase ari cañi yandeu. Esepia, yande yaico co ivi pipe inungar Jesucristo.

¹⁸ Yasaisu tupri itese Tūpa, ndipoi chira siquiyesa yandeu. Ēgüe yahese, opara siquiyesa yande sui. Esepia, cañisa sui oime siquiyesa yandeu. Sese acoi ava osiquiye ai vahe, ndoporoaisu tupri eté.

¹⁹ Yipindar Tūpa yande raisu. Sese cūrteite yande avei yasaisu Tūpa.

²⁰ Amove ava aipo ehi tēi: “Che asaisu Tūpa” ehi. Ahe ramoseve rumo viroiro omboetasa Tūpa reroyasar. Evocoiyase ahe semira tēi vahe. Esepia, acoi ndosaisui vahe omboetasa Tūpa reroyasar sepiase, ndoicatu Tūpa ndayasepai vahe raisu āgua.

²¹ Jesucristo ombou co porocuita yandeu: acoi osaisu vahe Tūpa, tosaisu avei omboetasa seroyasar yuvireco.

5

Yande mbahe-mbahe tēi co ivi pipendar recopisa

¹ Opacatu viroya vahe Jesús Tūpa Rembiporavo Porop̄s̄irosar seco rese, ahe Tūpa rahir yuvirecoi. Iyavei osaisu vahe ava, osaisu avei tahir yuvireco.

² Yande yasaisuse Tūpa, yayapose avei iporocuita, ahese yaicua yasaisu avei ava Tūpa rahir yuvirecoi vahe.

³ Yamboaviyese Tūpa porocuita, ahese yamboyecua Tūpa raisusa yaico. Iyavei iporocuita ndahei yavai etepri yapo āgua.

⁴ Esepia, opacatu Tūpa rahir yuvirecoi vahe osecopi mbahe-mbahe tēi ivi pipendar Cristo rese viroyasa pipe yuvireco.

⁵ Acoi oyeroya vahe Jesucristo Tūpa Rahir secosa rese, ahe oicatu co ivi pipendar mbahe-mbahe tēi recopi āgua yuvireco.

Tūpa rahir recocuer resendar ñehesa

⁶ Co Jesucristo yusa icuasa i pipe ñapiramombrise: ndahei i reseño, suvi rese avei icuasa. Espiritu avei osecu mombehu. Esepia, ahe omombehu mbahe supi eté vahe yepi.

⁷ Evocoiyase oime mbosapi imboyecuar:

⁸ Espiritu, i, iyavei suvi. Ahe mbosapi oyoya tupri.

⁹ Yaroya revo ava remimombehu; Tūpa remimombehu rumo aviye catu vahe ité ichui. Esepia niha, ahe Guahir omombehu.

¹⁰ Acoi viroya vahe Tūpa Rahir vireco ité ahe semimombehu opiha pipe. Acoi ndoviroyai vahe rumo Tūpa, semirañete ai vahe nungar tēi vireco. Esepia, ndoviroyai Tūpa ñehe Tahir resendar.

¹¹ Co Tūpa remimombehu: ahe ombou yandeu tecovesa apirēhi vahe. Co tecovesa Tahir rese secoi.

¹² Acoi oipisi vahe Tūpa Rahir opiha pipe, ahe vireco avei co tecovesa. Acoi ndoipisii vahe rumo, ndovirecoi eté tecovesa oyese.

Poromboaracusa ipa vahe

¹³ Co aicuachía p̄u, pe pereco vahe Tūpa Rahir; peicua āgua pe supi eté pereco tecovesa apirēhi.

¹⁴ Yande rumo yayeroya co rese: yaporanduse mbahe rese Tūpa remimbotar rupi chupe, ahese ahe yande ñehe osendu.

¹⁵ Evocoiyase yaicua ahe osendu yande yeruresa, yaicua avei mbahe yande porandusa ombou vaherā yandeu.

¹⁶ Acoi osepia vahe yande mboetasa Tūpa reroyasar oyemboangaipa vahe, ahe rumo ndahei manosave nara, oyeruquirā sese. Evocoiyase Tūpa omondora secove āgua chupe. Oime rumo angaipa ahe güeru manosa. Che, “Peyeroqui evocoi nungar angaipa rese” ndahei p̄u.

¹⁷ Opacatu mbahe-mbahe tēi ahe angaipa. Oime rumo angaipa ndayande rerasoi vahe manosave.

¹⁸ Yaicua Tūpa rahir ndoyapoi angaipa yuvireco. Esepia, Tahir osāro evocoi nungar. Ichui Caruguar ndopocoi sese.

¹⁹ Sese yaicua yande Tūpa rahir yaico. Iyavei opacatu ava ndoviroyai vahe Tūpa, ahe Caruguar povri pendar tēi yuvirecoi.

²⁰ Iyavei yaicua Tūpa Rahir ogüeru oaracuasa yandeu Tūpa supi eté vahe cua ãgua iyavei yaico co supi eté vahe rese. Ahe niha Tahir Jesucristo, ahe avei Tūpa supi eté vahe iyavei tecovesa apirēhi vahe.

²¹ Che rahireta, peñearo tupri tūpa angahu tēi sui. Aipo rupive co che ñehesa amombehu pēu.

IMON̄UVIRIOSA JUAN REMBICUACHIA SAN JUAN

Mbahe supí eté vahe iyavei yeaisusa

¹ Che, icuaiprí, aicuachía co che ñehe p̄eu pe Tūpa rembiporavo peico vahe opacatu eipeve peico vahe upe. Che niha supí eté opoaisu. Ndahei rumo che güeraño opoaisu, opacatu oicua vahe porombohesa supí eté vahe avei pe raisu yuvireco.

² Opoaisu ité mbahe supí eté vahe yande piha pipe yareco vahe rese. Ahe ndopai chivaherā ité.

³ Yande Ru Tūpa, yande Yar Jesucristo, Tūpa Rahír, tombou oporovasasa, oporoparaisuerecosa p̄eu nara. Tombou avei güeco tuprisa, güeco supí eté vahe pipe oporoaisusa pipe avei p̄eu.

⁴ Che mboviharete aicuase pe p̄ahu pendar yuvirecoi vahe güecocuer aviyesa pipe. Esepia, ahe viroya porombohesa supí eté vahe yuvireco. Ahe niha yande Ru Tūpa porocuaíta yandeu.

⁵ Iyavei, che rivireta, che rembiaisu, tayayeaistu catu ñepeí-peí. Co aicuachía vahe ndahei porocuaíta ipiasu vahe. Ahe niha acoi yipindar icuachiapri p̄eu.

⁶ Co yandé yeaisusa, yande guata tupri água Tūpa porocuaíta rupi. Co Tūpa porocuaíta yipisuive pesendu vahe, ahe omombehu yande yeaisu tupri água yandeu.

Iporombopa serai vahe resendar

⁷ Setá vai oguata ivi yacatu rupi oporombopa t̄ei vahe yuvireco. Ahe, “Jesucristo ou güete reseve” ndehi eté yuvireco. Ahe oporombopa t̄ei vahe Jesucristo amotar̄himbar yuvirecoi.

⁸ Peñearo catu pe poraviquí repri mocañi t̄eiñi água. Tapeipisi catu opacatu Tūpa porerecosa peyeupe nara.

⁹ Oime ava oyepepiño vahe Cristo porombohesa sui. Ahe Tūpa ndovirecoi opiha pipe yuvireco. Acoi oyapisaca tupri vahe Cristo porombohesa rese, ahe vireco Tūpa, Tahír avei oyese.

¹⁰ Acoi oyepotase ava oporombopa t̄ei vahe p̄eu, ndovirecoi vahe co porombohesa, ndapeipisii chira pe r̄etave. Iyavei ndapemboaviravei chiaveira.

¹¹ Acoi pemboaviravese, pe avei pehara sembiapo pipe.

Ñehesa ipa vahe

¹² Che niha amombehu pota setá mbahe p̄eu. Namombehu potai rumo cuachiar pipe. Che teieté aso pota p̄eu che ñehe água. Ahese yayemboviharetera oyese.

¹³ Iyavei Tūpa rembiporavo oñemonuha vahe cohava opacatu omondo omahenduhasa yuvireco p̄eu. Aipo rupive co che ñehesa amondo p̄eu.

IMOMBOSAPISA JUAN REMBICUACHIA SAN JUAN

Gayo recocuer aviye vahe resendar

¹ Che, icuaipri, aicuachía co che ñehe ndeu, che mboripar, che rembiaisu, Gayo. Che supi eté oroaису yepi.

² Che rembiaisu, che rivri, cūritei nde recocuer erereco tupri Tūpa rese. Che aheroqui nde rese opacatu nde reco tupri āgua iyavei tipo eme mbaherasisa ndeu.

³ Che aviharete asenduse yande rivri ñehe nde recocuer resendar yugūeruse cohave. Ahe aipo ehi yuvireco cheu: “Evocoi Gayo oyemoviracua tupri mbahe supi eté vahe pipe” ehi yuvireco ndeu.

⁴ Ndipoi eté niha ambuae ñehesa asendu vahe che mboviharete catu vahe que che rahireta oguatase co porombohesa supi eté vahe rupi yuvireco.

⁵ Che rivri, che rembiaisu, ereyapo tupri opacatu mbahe yande rivireta upe iyavei ambuae tecua pendar oyepota vahe upe avei.

⁶ Ahe omombehu ore ñemonuhasave opacatu nde poroaисusa resendar yuvireco oreu. Eyapo catu mbahe icatupri vahe; eipitívii catu chupe mbahe ipane vahe rese iguataño āgua Tūpa remimbotar rupi yuvireco.

⁷ Esepia, ahe oguata yuvireco Jesucristo rer pipe. Ndoipisii eté rumo mbahe ipane vahe opitívii āgua yuvireco ava Tūpa reroyasarēhi sui.

⁸ Sese yande ēgūe yahera yaico evocoi nungar upe ñehesa supi eté vahe rese ipitívii āgua.

Diótfes recocuerai iyavei Demetrio recocuer aviyesa

⁹ Che aicuachía che ñehe eipeve Tūpa upe oñemonuha vahe upe cuese. Diótfes rumo ndoviroyai ore mborerecuasa. Esepia, ahe oipota rai mborerecuar gūeco āgua ipāhuve.

¹⁰ Evocoiyase asose eipeve, amboaracuara opacatu Tūpa viroya vahe rovai sembiapo ai rese. Esepia, ahe oñehe-ñehe tēi ore rese, ndahei ahe gūeraño, ndoipisi potai avei gūētave yande rivireta oyepota vahe. Iyavei ndoipotai ambuae upe ipisi āgua sētave. Acoi oipisise, omombo voiño ité ñemonuhasa sui.

¹¹ Che rivri, che rembiaisu, ereicoi rene evocoi ava recocuer nungar. Ereicora rumo ava aviye vahe recocuer rupi. Esepia, oyapo vahe mbahe aviye vahe, ahe Tūpa suindar. Acoi oyapo vahe rumo mbahe naporai vahe, ahe ndoicuai vahe Tūpa.

¹² Opacatu, “Demetrio aviye ité” ehi yuvireco. Ahe supi eté aipo ehi; aipo avei ore oromombehu. Pe niha peicuaño ore oromombehu mbahe supi eté vahe.

Ñehesa ipa vahe

¹³ Che niha amombehu pota setá mbahe ndeu. Namombehu potai rumo cuachiar pipe tēi ndeu.

¹⁴ Esepia, aso pota ité nde repia. Ahese voi yañemoñetara oyeovai eté.

¹⁵ Eico tupri. Yande mboripar coha pendar omondo omahenduhasa yuvireco ndeu. Iyavei, eyapo mbahe icatupri vahe, emombehu nde teieté che mahenduhasa ñepeipei yande mboripareta upe eipeve. Aipo rupive.

JUDAS REMBICUACHIA SAN JUDAS

Judas mahenduhasa Jesús reroyasar upe

¹ Che, Judas, aico Jesucristo rembiguai, Santiago rívrí. Che aicuachía co che ñehe pëu. Pe niha yande Ru Tüpa rembiaisu semienoi peico. Jesucristo niha pe rãro opacatu mbahe-mbahe tēi sui.

² Tüpa tombou catu pëu pe paradisuecosa pe reco tupri ägua pe raisusa pipe.

Oporombohe vahe ava mbopa tēi ägua resendar

³ Che rivireta, che rembiaisu, yipindar chepihañemoñeta ité yande písirosa resendar cuachía ägua pëu viña. Ipape rumo chepihañemoñeta iri: iyaño revo che aicuachía pe yemoviracua tupri catu ägua yembohesa yaroya vahe rese. Ahe yembohesa yaroya vahe ñepeí reseve imondopri opacatu yandeu Jesucristo rese yaico vahe.

⁴ Esepia, amove ava iporombopa serai vahe yuviroique mbegüe angahu pe pãhuve. Aracahe suive rumo Tüpa Ñehengagüer icuachiapri pipe omombehu evocoi nungar ava imocañisa tēira yuvireco. Ahe ava ndaseco pōrai vahe, “Tüpa aviye ité, ndoyapoi chietera mbahe yandeu” ehi tiéte yuvireco. Sese oyapoño mbahe tēi. Iyavei, “Jesucristo ndahei yande Rerecuar” ehiño tēi vahe yande Yar ñepeí vahe upe yuvireco.

⁵ Che opomomahenduha pota iri acoi peicua tupri vahe rese. Yipindar yande Yar Tüpa vinose yande ramoí eta Egipto sui. Ipape rumo opa omocañi viroyasarēhi.

⁶ Inungar avei Tüpa rembiguai yipindar vahe yuvirecoi, nomboaviyei vahe ocuaita. Ipipe sui Tüpa osoquenda pítumimbi ndopai vahesave ari cañise nara.

⁷ Iyavei ava Sodoma pendar, Gomorra pendar iyavei ahe tecua ivirindar avei inungar acoi Tüpa rembiguai oyemondo mbahe tēi pipe, ahe avei oyemondo vahe oyemboaguasaguasa tēi ägua yuvireco. Iyavei cuimbahe, cuimbahe rese; cuña, cuña rese no. Ipipe sui oiporara tata guasu apirēhi vahe yuvireco. Ahe opita opacatu yande yembosiquiyē ägua.

⁸ Ègüe ehi avei niha evocoi nungar ava pe pãhu pendar. Esepia, ahe oqueraisa nungar roroyasa pipe sui tēi omonguiha viteño güecocuer oangaipa pipe. Iyavei ndoviroyai vahe yande Yar mborerecuasa. Ahe avei oñehe-ñehe tēi vahe iva pendar rese yuvireco.

⁹ Aracahe Tüpa rembiguai ivate vahe Miguel oyepoepi-epi Caruguar rese yuvireco Moisés retecuer rese. Yepe ahe Tüpa rembiguai rerecuar viña, ndiyai rumo chupe iñehe mara ägua Caruguar upe. Evocoiyase aipo ehi chupe: “¡Tüpa oicuará co rese ndeu!” ehiño.

¹⁰ Evocoi ava pe pãhu pendar rumo oñehe tēiño vahe que mbahe ndosenducuai vahe rese yuvireco. Iyavei co mbahe oicua vahe oyesui tēi inungar mbahe mimba ndipihañemoñetai vahe oyesui tēi imbahecua, ahe oiporu yuvireco oyemocañi ägua tēi.

¹¹ ¡Iparaisu yuvireco! Cañ recocuer rupi tupri avei oyapo mbahe yuvireco. Inungar Balaam guarepochi pota raisave tēi oyavi güeco yuvireco. Inungar Coré omano opereroyaēhisa pipe.

¹² Pe peñemonuhase pe yeaisusa pipe pe caru ägua, ahese ahe avei yuviroique pe pãhuve; noyuvinochi eté ocaru ägua pe piri. Ndapeicuai rumo ahe pe recocuer monguiha ägua tēi yuviroique vahe pe pãhuve. Evocoi inungar ovesa rãrosar oyese tēi ihañeco vahe yuvireco. Iyavei ahe inungar iva quihá ndovirecoi vahe i, ivitu remimombo tēi. Ahe avei inungar ivira ndihai vahe ohasa rupi, ipiru vahe, evocoiyase ahe sapohopri.

¹³ Inungar avei acoi iai pipe itu omombo tiyui vahe oyesui yepi. Ègüe ehi avei evocoi mbia rembiapo poromochisa. Iyavei inungar yasitata amove omocañi vahe guaper co coti tēi oso pítumimbisave, ègüe ehi aveira ava Tüpa sui oyepoepi vahe pítumimbisa apirēhive secocuer yuvirecoi.

¹⁴ Iyavei Enoc, Adán raquicuerindar imboseisa rupi oyesu vahe, ahe oñehe evocoi nungar ava naporai vahe recocuer resendar rese aracahe aipo ehi: “Co che asepia che queraisa nungar pipe yande Yar turi iva pendar rehí reseve

¹⁵ opacatu ava recoãha ägua iyavei icañi mombehu ägua opacatu mbahe-mbahe tēi aposar upe, opacatu oñehe-ñehe tēi yamotarēhisave yuvirecoi vahe upe avei” ehi.

¹⁶ Ahe mbia niha oporoviroíro yuvireco. Iyavei oseca oyeupe nara mbahe güemimbotar tēi apo ägua. Ahe oyemboivate ai vahe oñehe pipe tēi yuvireco. Iyavei oñehe tupri ai angahu tēi ambuae ava upe imbahe rerocua ägua ichui.

Jesús reroyasar upendar poromboaracua

¹⁷ Pe rumo, che rivireta, che rembiaisu, peyemomahenduha acoi yande Yar Jesucristo apóstol ñehengagüer rese

¹⁸ aipo ehi vahe: “Co arí cañi renonde oimera ava viroïro ai vahe Tûpa rembiapo yuvireco. Iyavei oyapoño itera güemimbotarai yuvireco” ehi vahe.

¹⁹ Ahe ava niha omboyaho-yaho ucara ava Jesús reroyasar yuvireco. Güecocuer ivi pipendar têi vireco vahe. Ahe niha ndovirecoi Tûpa Espiritu yuvireco.

²⁰ Pe rumo, che rivireta, che rembiaisu, peyemoviracua pe poreroyasa maranehi vahe rese. Iyavei peyeroqui Espiritu Santo pe rãrosa pipe.

²¹ Peñearo tupri Tûpa pe raisusa pipe. Iyavei pesãro viteño yande Yar Jesucristo yande paraisuerecosa pipe tecovesa ndopai vahe mondo ãgua yandeu.

²² Pesaisu ava ndoviroya tuprii vahe Jesús.

²³ Amove ava pesecoreroyevi voi icañi rãgüer sui. Ambuae peiparaisuereco. Peicua catura rumo, pesiquiye catu secocuerai sui; ndapeipotai chira mbahe sembiapo ai que ñepeí yangaipa pipe pe viapiêhi ãgua.

Tûpa mboetei tupriisa

²⁴⁻²⁵ Tûpa yande Pisirosar ñepeí vahe vireco pĩratasa pe rãro angaipa pipe pe viapiêhi ãgua. Ahe aveí pe rerecora güecocuer porañetesave pe reco angaipaêhisa pipe. Ichui peicora pe viharetasa pipe. Ahe imboeteipri tasecol. Êgüe tehi timboyeroyasa seco pĩratasa iyavei imborerecuasa yande Yar Jesucristo sui, yipisui, cūrítei apirêhi vaherã.

TŪPA REMIMBOYECUA JUAN UPE APOCALIPSIS

Jesucristo yemoporēhisa

¹ Che, Juan, aicuachía mbahe imboaviye pihavipirā pēu acoi Tūpa omboyecua vahe Guahir Jesucristo upe ‘tomboyecua oviroyasar yuvirecoi vahe upe’ oyapave. Ahe niha Jesucristo oicua uca Vu rembiguai pipe imboyecua uca āgua güembiguai che recose cheu.

² Che supi eté amombehu opacatu mbahe asepia vahecuer iyavei amombehu evocoi Tūpa Nehengagüer acoi Jesucristo oicua uca tupri vahe mbahe supi eté vahe.

³ Sorivete catura acoi ava oyerogui vahe co Tūpa suindar ñehesa rese, acoi ava oyapisaca tupri vahe sese, viroya vahe avei icuachiapri pipendar yuvireco. Esepia, ari cañi virovi ité yandeu.

Juan oicuachía siete tecua pendar Jesús reroyasar ñemonuhasa upe

⁴ Che, Juan, aicuachía Jesús reroyasar siete tecua Asia ivi rupindar yuvirecoi vahe upe. Peipisi porovasasa, teco tuprisa Tūpa suindar, ahe yipivé vahe ité, cūrteindar apirēhi vahe avei; siete espíritu suindar avei no, ahe senda rovai yuvino hai vahe,

⁵ iyavei Jesucristo suindar, evocoi omombehu tupri vahe ñehesa supi vahe. Ahe acoi yipindar ocuerayevi vahe iyavei mborerecuar ivate catu vahe secoi opacatu ambuae-ae tēi mborerecuar sui. Ahe yande raisu iyavei yande písiro yande angaipa sui vuvi pipe,

⁶ iyavei yande rereco mborerecuarā, pahiguā avei no Vu Tūpa upe yande poraviqui āgua. ¡Ēgüe tehi imboeteipri tasecoi opiratasa pipe apirēhi vahe rā!

⁷ ¡Esepia, Cristo i va quiha rese oura curi!

Ahese opacatu ava osepiara yuvireco, yamotarēhisarer, oicutu vahecuer avei.

Iyavei opacatu tecua ivi pipendar ahese oyaseho tēira yuvireco sepiase.

Ēgüe ehi etera curi.

⁸ “Che aico yipindar iyavei ipandar” aipo ehi yande Yar Tūpa opacatu mbahe mboavais- arēhi evocoi yipivé vahe ité, cūrteindar apirēhi vahe avei.

Juan osepia oquer nungar pipe Jesucristo porañetesa

⁹ Che, Juan, pe riqehir aico, iyavei che pe nungar Tūpa povri pendar aico, cheparaisu avei vichico Jesucristo rese che recosave che ñemosasa pipe. Che roquendasa vichico caha pāhumi para guasu aviterve Patmos serer vahesave Tūpa Nehengagüer mombehusa pipe sui tēi, Jesucristo recocuer mombehusa pipe sui tēi avei no.

¹⁰ Acoi yande Yar ari pipe Espíritu povrive aicose, asendu che raquicuei oñehe pīrata vahe avīye acoi mimbī ñehe

¹¹ aipo ehi: “Eicuachía mbahe eresepia vahe. Ipare emondopa siete tecua pendar che reroyasar ivi Asia rupindar upe: Efeso ve, Esmirna ve, Pérgamo ve, Tiatira ve, Sardis ve, Filadelfia ve, ipa Laodicea ve” ehi cheu.

¹² Che evocoyase ayemboyere sese ‘¿ava pīha oñehe cheu?’ che yapave. Ahese asepia siete tupri vera hi oro apopri,

¹³ iyavei asepia ipāhūve mbia avīye tupri ava ité viña, iturucuar pucucuer ipi rupi tupri ité sese, sumbicusasa evocoyase oro apopri ipochiha rupi tupri ité oyepota.

¹⁴ Iha morochí inungar acoi mbahe saviyu vahe, inungar avei yesapi ñapirata morochí vahe, sesa evocoyase avīye tupri ité tata rendigüer.

¹⁵ Ipi evocoyase sendi yai eté, avīye acoi bronce ocai vahe horno pipe, iyavei iñehe ipīratá iteanga inungar itu riapugüer.

¹⁶ Oacato coti vireco siete tupri yasitata, iyavei iyuru sui osē quise pucu saimbe yoya vahe. Sova evocoyase avīye ari rendigüer ipīratá vahe.

¹⁷ Sepia ramoseve, aviapi ipive inungar omano vahe. Ahe rumo omondo opo oacato coti che rese aipo ehi cheu: “Nderesiquiyei chira. Esepia, che yipindar ité aico, ipandar avei.

¹⁸ Aicove vahe ité; yepe amano viña, cūrtei rumo aicove iri ndopai chivaherā ité aico. Che areco che mborerecuasa ava recocuer mocañi āgua.

¹⁹ Sese eicuachía co mbahe eresepia vahe: cūrteindar oime vahe mbahe iyavei mbahe oime vahe rā curi.

²⁰ Co acoi ndereicuai vahe eresepia vahe siete yasitata che acato coti, ahe yuvirecoi Tūpa rembiguai siete tecua rupindar che reroyasar rārosar; evocoyase vera hi oro apopri, ahe yuvirecoi siete tupri tecua pipendar che reroyasar” ehi.

2

Ñehesa siete tupri tecua-tecua pendar Jesús reroyasar upe. Ñehesa Efeso pendar upe

¹ “Eicuachía Tüpa rembiguai Efeso pendar che reroyasar rãrosar upe: ‘Acoi vireco vahe oacato coti siete yasitata, ahe acoi oguata vahe siete vera hi yacatu rupi, aipo ehi imombehu:

² Che aicua opacatu mbahe pe rembiapo, pe poraviqui pĩratasa iyavei pe yemoviracuasa. Aicua avei ndapeipotai ava naporai vahe pe pãhuve yuvirecoi vahe. Pesecoãha avei ava, ore apóstol oroico, ehi tẽi vahe; ipare peicua iporombopa tẽisa yuvireco.

³ Che aicua peñemosañõ peyemombaraisu peico che raisupave; ndapecuerai eté ipipe.

⁴ Che rumo aicua oime mbahe ndahei vahe che piha rupi pe recocuer: ndapeyeaisu iri inungar yipindar.

⁵ Sese peyemomahenduha yipindar pe recocuer aviye vahe rese; pemboasi mbahe pe rembiapo, peyevi Tüpa upe; peyeaisu iri catu inungar yipindar. Anise ayevíra pẽu, arocuapara pe vera hi senda sui acoi ndapeyeviise Tüpa upe.

⁶ Co rumo mbahe pe rembiapo aviye cheu: ndapeipotaise nicolaítas rembiapo mbahe. Che avei niha ndaipotai eté.

⁷ ¡Acoi osendu pota vahe, toyapisacaño Espíritu omombehu vahe rese opacatu che reroyasar upe! Acoi oyemoviracua vahe mbahe-mbahe tẽi apoẽhi ãgua, itohu amondora ivira ha tecovesa resendar oime vahe teco orisave che Ru piri, ehi’ erera icuachía chupe.

Ñehesa Esmirna pendar upe

⁸ “Eicuachía avei Tüpa rembiguai Esmirna pendar che reroyaseta rãrosar upe: ‘Acoi yipindar vahe, ipandar avei; ahe acoi omano vahe viña, ocuerayevi iri rumo. Ahe ombou co ñehesa pẽu aipo ehi:

⁹ Che aicua pe yemombaraisusa, pe paraisusa avei; pe rumo mbahe yar nungar ité peico iva pendar mbahe rese. Aicua avei pe rese ava semira tẽi vahe, ore Tüpa rembiporavo judío oroico, ehi tẽi vahe. Ndahei rumo ahe yuvirecoi. Esepia, Carugar reroyasar tẽi evocoi yuvirecoi.

¹⁰ Ndapesiquiyei chira pe paraisu ãgua sui. Esepia, Carugar osoquenda ucara amove pe pãhu pendar secoãha ãgua; pe paraisu rane itera niha diez ari rupi peico. Acoi peyemoviracua tuprise ité chupe, Cristo rese ité amanora, pe hesave, ahese amondora porerecosca tecovesa pẽu.

¹¹ ¡Acoi osendu pota vahe, toyapisacaño Espíritu omombehu vahe rese opacatu che reroyasar upe! Acoi ava oyemoviracua vahe mbahe-mbahe tẽi apoẽhi ãgua, ahe imanore ihã ndoiporarai chira imoñuviriosa manosa pipe, ehi’ erera icuachía chupe.

Ñehesa Pérgamo pendar upe

¹² “Eicuachía avei Tüpa rembiguai Pérgamo pendar che reroyaseta rãrosar upe: ‘Aipo ehi acoi vireco vahe quise pucu saimbe yoya vahe:

¹³ Che aicua pe recosa. Aheve acoi Carugar uguapi oĩ; mborerecuar guasu nungar imboyeroyapri secõi. Pe rumo peyemoviracuaño ité chupe che recocuer rese peico. Ndapeseyai eté che rese pe yeroyasa yepe oyuca tẽi che recocuer mombehu tuprisar Antipas evocoi tecua Carugar recosave.

¹⁴ Che rumo aicua mbahe pe resendar: eipeve amove ava ndoyepipi potai eté Balaam porombohesa sui yuvireco. Ahe omboaracua Balac israelita mboangaipa uca ãgua, toyuvirohuño mbahe roho seropovẽhepri mbahe rahanga upendar tẽi, oya, iyavei, toyemboaguasaño yuvireco, oyapave avei.

¹⁵ Iyavei amove ava pe pãhuve ndoyepipi potai eté nicolaíta porombohesa sui yuvireco.

¹⁶ Sese pemboasi pe recocuerai, peyevi Tüpa upe, anise che aso poyava voira pẽu, ahese avavara chupe yuvireco che yuru pipe sui osẽ vahe quise pucu pipe, ehi.

¹⁷ ¡Acoi ava osendu pota vahe, toyapisacaño Espíritu omombehu vahe rese che reroyasar yuvirecoi vahe upe! Acoi ava oyemoviracua vahe mbahe-mbahe tẽi apoẽhi ãgua, semihura amondora ndasepiasai vahe maná. Iyavei amondora ita morochi vahe chupe. Ahe ita rese icuachiasara terer ipiasu vahe oĩ, evocoi ava oipisi vahe güeraño oicua, ehi’ erera icuachía.

Ñehesa Tiatira pendar upe

¹⁸ “Eicuachía avei Tüpa rembiguai Tiatira pendar che reroyaseta rãrosar upe: ‘Tüpa Rahir acoi vireco vahe güesa inungar tata rendigüer, ipi avei inungar acoi bronce rapipri aipo ehi imombehu:

¹⁹ Che aicua mbahe opacatu pe rembiapo; aicua pe poroaisusa, che rese pe yeroyasa, mbahe rese pe hañecosca iyavei pe yemoviracuasa. Aicua avei yipindar sui mbahe peyapo catú aviye vahe.

²⁰ Oime rumo mbahe pe rembiavi: peñemosañño evocoi cuña Jezabel pe pãhu pendar upe, ahe acoi oñehe tẽi angahu vahe Tũpa rese viña. Ahe rumo ombopa tẽi oporombohesa pipe che rembiguai iyemboaguasa-guasa tẽi uca ãgua sereco iyavei ohu uca mbahe roho mbahe rahanga tẽi upe seropovẽhepri yuvireco chupe.

²¹ Che amondo vite tẽi ari chupe, toamboasi oangaipa Tũpa upe oyevi ãgua, che yapave viña. Ahe rumo ndopoi potai etẽ yemboaguasa tẽisa sui.

²² Evocoyase cũritei che amombaheasi ucara supave ino; iyavei acoi sesendarer yuvirecoi vahe, ahe avei iparaisu catura yuvireco acoi noñecuñaro potaise itẽ yuvireco.

²³ Ipare ayucapara imembri ichui. Ëgũe ehi opacatu che reroyasar oicuaru yuvireco che aicua tupri itẽ opacatu ava pihañemoñetasa iyavei ñepeipei pe yacatu amondora pe rembiapogũer repri pẽu.

²⁴ Pe rumo opacatu Tiatira pendar ndaperoyai vahe co porombohe raisa iyavei ndapembohehi vahe Caruguar suindar aracuasa, ndicuasai yavai vahe, ehi vahe rese, pẽu ndarecoi que ambuae che porocuita.

²⁵ Peyemoviracuãñora rumo evocoi mbahe pereco vahe rese, acoi che ayevisẽ voi vitu curi.

²⁶ Acoi ava oyemoviracua vahe mbahe-mbahe tẽi apoẽhi ãgua, oyapo vahe che remimbotar mano rupi etẽ, chupe amondora mborerecuar seco ãgua opacatu ivi rupi

²⁷ inungar che Ru ombou che mborerecuarã cheu; Ëgũe ehi aveira oporocuai opacatu tecua rupi inungar acoi vara guarepochi, mbahe riapiipa uca ãgua, aviñera acoi mahe-moinda ñaihu apopri viña.

²⁸ Iyavei amondora yasitata cõhe rerusar chupe.

²⁹ ¡Acoi ava osendu pota vahe, toyapisacañño Espĩritu omombehu vahe rese opacatu che reroyasar yuvirecoi vahe upe! ehi' erera icuachía.

3

Ñehesa Sardis pendar upe

¹ “Eicuachía avei Tũpa rembiguai Sardis pendar che reroyasareta rãrosar upe: ‘Acoi ava vireco vahe siete tupri Tũpa espĩritu iyavei acoi siete tupri yasitata no aipo ehi imombehu: Che aicua mbahe opacatu pe rembiapo; aicua yepẽ amove ava, Co mbia yuvirecoi vahe itẽ Tũpa upe nara, ehi pẽu viña; omano vahe nungar tẽi rumo peico.

² Peyemopoase catu peico iyavei pemonguerẽhi catu acoi viroya vite vahe. Esepia, oyepepipa pota itẽ yuvireco viña. Supi etẽ mbahe pe rembiapo che Ru rovaque, ndahei sui tupri vahe.

³ Peyemomahenduha acoi porombohesa peipisi vahe rese; pepoi rene ichui. Peyevi catu Tũpa upe. Ndapemopoaseise rumo, asora pẽu inungar imonda rai vahe, Ëgũe ahera vicho pe resapiha.

⁴ Oime rumo amove ava pe pãhu pendar ndoyapoi etẽ angaipa yuvireco, evocoyase inungar ava oguata vahe oturucuar morochi vahe rese, Ëgũe ehi aveira ahe güeco maranehi pipe oguata che rupi yuvireco. Esepia, ahe chupe iya itẽ.

⁵ Acoi ava oyemoviracua vahe mbahe-mbahe tẽi apoẽhi ãgua, ahe sese imondesara turucuar morochi vahe. Ahe serer namboyehoi chira cuachiar tecovesa resendar pipe sui, asenoira rumo che Ru rovai iyavei sembiguai eta rovaque avei curi.

⁶ ¡Acoi ava osendu pota vahe, toyapisacañño Espĩritu omombehu vahe rese che reroyasar yuvirecoi vahe upe! ehi' erera icuachía.

Ñehesa Filadelfia pendar upe

⁷ “Eicuachía avei Tũpa rembiguai Filadelfia pendar che reroyasareta rãrosar upe: ‘Co seco maranehi vahe, sui tupri vahe itẽ, vireco vahe mborerecuasa aracahendar mborerecuar guasu David nungar, acoi omboise que oquenda, ñepeipei yepẽ que ava nomboyai chietera; iyavei acoi omboyase, ñepeipei yepẽ que ava nomboi chiẽte aveira, ahe aipo ehi:

⁸ Che rumo aicua mbahe opacatu pe rembiapo. Esepia, che amondo pe rovaque inungar oquenda imboipri pẽu pemombehu vaherã che recocuer. Ahe que ñepeipei yepẽ ava nomboyai chietera yuvireco. Esepia, yepẽ pe nipirata tupri vahe, peroya itẽ rumo che ñehe iyavei ndacheñomi etẽ ava sui peye.

⁹ Co Caruguar reroyasar semira tẽi vahe, ore Tũpa rembiporavo judío oroico, ehi tẽi vahe, ndahei rumo ahe etẽ vahe yuvirecoi. Ahe amoñenopihapa ucara pe rovai, toicua yuvireco che pe raisusa, che yapave.

¹⁰ Esepia, peroya itẽ che porocuita, peyemoviracua itẽ evocoi mbahe tẽi upe peico. Evocoyase che opoepira acoi ari tecoãhasa ouse opacatu ivi rupindar upe curi.

¹¹ Ayevi poyavara. Peyemoviracua catu Tũpa reroyasa pereco vahe rese. Evocoyase ñepeipei yepẽ que ava ndovirocui chietera Tũpa suindar porerecosã pe sui.

¹² Acoi oyemoviracua vahe mbahe-mbahe tēi apoēhi āgua yuvireco, ahe che Ru piri nara itē yuvirecoira. Ahe evocoiyase inungar-ra che Ru Tūpa rēta vīracuasa ndopai vahe yuvireco. Sese arova ucara che Ru Tūpa rer iyavei che Ru Tūpa recua rer avei no, ahe Jerusalén piasu, evocoi ou vaherā iva pendar che Ru Tūpa sui, iyavei che rer ipiasu vahe itē arovara sese no.

¹³ ¡Acoi ava osendu pota vahe, toyapisacaño Espiritu remimombehugüer rese che reroy-asareta upe! ehi' erera icuachía.

Ñehesa Laodicea pendar upe

¹⁴ “Eicuachía avei Tūpa rembiguai Laodicea pendar che reroyasareta rārosar upe: ‘Evocoi seco tupri vahe, omombehu vahe mbahe supi tupri vahe itē, ahe ichui oime opacatu Tūpa rembiapo, ahe aipo ehi:

¹⁵⁻¹⁶ Che aicua mbahe opacatu pe rembiapo. Pe inungar i ndahei sōhisa vahe iyavei ndahei sacu vahe. I sacu raimi tēi vahe nungar peico pe rembiapo pipe. ¡Ñepeí reseve vahe rumo aipota, ndahei iguayí tēi vahe! Pe recocuer rumo iguayí tēi vahe nungar, sese opomboyeviñora cheyesui.

¹⁷ Esepia, pepihañemoñeta: Che mbahe yar itē, opacatu mbahe areco, nipanei etē mbahe cheu, peye viña. Pe rumo ndapeicuai pe paraisusa che Ru rovaque inungar ndasesapisoi vahe peico. Iyavei ndapeyavii nditurucuai vahe peico.

¹⁸ Sese opomboaracua; peseca iva pendar oro tatave imoatiropri nungar che sui pe paraisuēhi iri āgua che Ru rovaque; peseca avei turucuar morochi vahe teco tupri sa peyeupe che suindar nani tupri vahe nungar pipe pe recoēhi āgua, pe chíēhi āgua avei iyavei inungar ava oseca mosa güesa upe nara osareco iri āgua, ēgüe peye aveira.

¹⁹ Che añehe pīrata seco mohivi āgua che rembiaisu upe yepí. Peyemonguerēhi catu, pemboasi itē pe recocuer che Ru Tūpa upe pe yeví āgua.

²⁰ Esepia, inungar que ava oquenda omotara oquendipive ohā viña, ēgüe ahe pe pihave vichico; pesenduse che ñehe, pemboira cheu. Che evocoiyase aikuera pe piri, yacarura oyepiri.

²¹ Acoi ava oyemoviracua vahe mbahe-mbahe tēi apoēhi āgua yuvireco, ahe amboguapi ucara che ipive imoi che porocuaisave, inungar che mbahe tēi reco reroyi pare, aguapi che Ru ipive vite.

²² ¡Acoi ava osendu pota vahe, toyapisacaño Espiritu remimombehugüer rese che reroy-asareta upe! ehi imombehu pēu' erera icuachía” ehi Jesús cheu.

4

Tūpa mboeteisa ivave

¹ Ipape asepia mbahe inungar oquenda oyemboi vahe ivave. Ahese evocoi ñehesa ipīrata vahe mimi nungar yipindar oñehe vahe cheu, ahe asendu iri: “Eyeupi ave. Che evocoiyase mbahe amboyecura ndeu mbahe imboaviyepirā curi” ehi.

² Ahe pipeve voi, Espiritu pīratasa pipe aico iyavei asepia tenda ivave, ahe iharive ñepei oguapi oí.

³ Co oguapi vahe ndoyavii etē ita jaspe porañetesa iyavei ndoyavii cornalina porañetesa no. Iyavei oime oyere tupri vahe tenda rese inungar arco iris sendí vahe, inungar esmeralda.

⁴ Iyavei asepia evocoi rese oyere tupri ambuae veinticuatro tenda, ahe iharive oguapi yuvinoi veinticuatro avei icuai pri yuvirecoi vahe; iturucuar morochí vahe yuvireco iyavei oāca rese omboyere tupri oro apopri yuvireco.

⁵ Evocoiyase Tūpa renda sui yuvinose overa-vera vahe, iyavei siapu guasu vahe, osunu vahe no; iyavei siete tupri tataendi sendipa yuvireco evocoi tenda rovai, ahe co siete tupri Tūpa espíritu.

⁶ Evocoi tenda rovai oime avei ndoyavii tupri para guasu tūpiu vahe oyecua tupri vahe mbahe ipipe.

Ambuae tenda pāhu rupi oyere tupri Tūpa renda rese irungatu iva pendar yuvirecove vahe, ahe sesa oyere tupri vahe sese, ahe osareco tupri vahe güenonera, guaquicuei coti avei no.

⁷ Yipindar yuvirecove vahe pāhu pendar ahe ndoyavii tupri yagua pīta; saquicuerindar ndoyavii tupri guaca cuimbahe; inombosapisa ndoyavii etē ava; imoirungatusa cute ndoyavii vira guasu oveve vahe.

⁸ Evocoi iva pendar irungatu yuvirecove vahe vireco oyacatu seis tupri opepo yuvireco iyavei vireco opacatu güete rese güesa. Ndogituhui etē ari, pītu rupi aipo ehi yuvireco: “¡Santo, santo, santo itē secoi, yande Yar Tūpa itē, ahe mbahe mboavaisarēhi, yipivé vahe itē, cūriteindar, apirēhi vahe!”

ehi yuvireco.

⁹ Evocoi yuvirecove vahe omboetei yuvireco, “Aviye ndeu” ehi co oguapí vahe oí tenda haríve ndopai vahe upe.

¹⁰ Ēgüe ehise evocoiyase veinticuatro tupri icuaipri yuvirecoi vahe, ahe oñenopíha imboeteisa pípe sovai yuvireco. Ipare osequíi oáca resendar oyere tupri vahe omborerecuasa resendar sovai aipo ehi:

¹¹ “Ore Yar Tüpa, iya ité nde mboeteisa, ndeu sapucaisa nde pírataresa.

Esepia, nde ereyapo vahe mbahe opacatu; nde remimbotar rupi niha oime opacatu mbahe”

ehi yuvireco chupe.

5

Ovesami upe güeraño iyacatu cuachiar imboyapri mboi água

¹ Che asepia cuachiar Tüpa vireco vahe oacato coti, icuachiapri ipípe coti, ocar coti avei no, imboyapri siete sello pípe.

² Ipare asepia Tüpa rembiguai seco ivate vahe, ahe oporandu pírata oico aipo ehi: “¿Ava upe vo iya cuachiar mboi água iyavei sello imboyeroyapri mondoro água no?” ehi.

³ Ndipoi eté rumo que íva pendar, ívi pípendar, ívivri pendar oicatu vaheerá cuachiar pípira sepia água viña.

⁴ Evocoiyase che ayasehó iteanga. Esepia, ndipoi eté que ñepeí yepe oime angara aviye vahe cuachiar pípira sepia água viña.

⁵ Ahese icuaipri páhu pendar ñepeí aipo ehi cheu: “Ereyaseho iri eme. Esepia niha, evocoi ava yagua píta vahe vahe chupe, Judá suindar, acoi mborerrecuar guasu David suindar avei, ahe niha Carugar osecoreroyi. Sese iya ité chupe siete sello mondoro cuachiar pípira água” ehi.

⁶ Evocoiyase, asepia Tüpa rovai íva pendar irungatu yuvirecove vahe páhuve, icuaipri yuvirecoi vahe mbíterve, ñepeí ava Ovesami nungar ihái, aviye seropovêhepri. Ahe niha vireco siete tupri sáchi, siete tupri avei sesa; sesa evocoiyase siete tupri Tüpa espíritu yuvirecoi opacatu ívi rupi imboguatapri.

⁷ Ipare evocoi Ovesami oso, oipisi cuachiar evocoi tenda haríve oguapí vahe yacato coti sui;

⁸ ípisi pare, evocoi irungatu yuvirecove vahe, iyavei veinticuatro tupri icuaipri, ahe oñenopíhapa Ovesami rovai yuvireco. Oyacatu ñepeí-peí vireco arpa yuvireco, itaisi ríru oro apopri, ahe avei vireco yuvireco, ahe itaisi niha Tüpa reroyasar yeruresa.

⁹ Osapucaí ípíasu vahe sapucaisa pípe aipo ehi yuvireco:

“Ndeu iyacatu ité cuachiar písi água,

imboyapri mondoro água avei no.

Esepia niha, nde yucapri seropovêhepri ereico.

Evocoiyase nde ruví pípe eremboepípa Tüpa upe nara opacatu ava ambuae-ae tēi vahe, íñehe ambuae-ae tēi vahe avei, ñepeí-peí tecua yacatu rupindar, ívi rupindar avei yuvireco.

¹⁰ Iyavei eremborerrecua uca Tüpa upe nara,

erembopahi uca avei no, ipare ahe oporocuaira opacatu ívi rupi yuvireco” ehi osapucaí yuvireco.

¹¹ Ipare asepia, asendu avei Tüpa rembiguai rehí ñehevocoi oyere tupri vahe tenda rese yuvireco, iyavei evocoi yuvirecove vahe ñehevocoi, icuaipri ñehevocoi asendu setá iteanga yuvirecoi.

¹² Ahe aipo ehi pírata yuvireco no:

“¡Co Ovesami yucapírer, ahe chupe iyacatu ité mborerrecuasa písi água, opacatu Tüpa suindar porerrecosa písi água, mbahecuasa,

pírataresa, mboyeroyasa, poromboeteisa, iyavei sapucaisa písi água avei no!” ehi.

¹³ Ahese asendu avei opacatu Tüpa rembiapo ívave yuvirecoi vahe, ívi pípendar, ívivri rupindar iyavei para guasu pípendar, aipo ehi yuvireco:

“¡Toime sapucaisa, Tüpa upendar mboyeroyasa,

imboeteisa, iyavei pírataresa, ahe timondosa apírēhi vaheerá Tüpa acoi güendave oguapí vahe upe, Tahír Ovesami nungar upe avei no!” ehi.

¹⁴ Evocoi irungatu ava yuvirecove vahe, “¡Ēgüe tehi eté!” ehi yuvireco. Iyavei icuaipri veinticuatro tupri yuvirecoi vahe, ahe oñenopíha yuvireco sovai imboeteisave.

6

Siete sello

¹ Ipare asepia acoi Ovesami omondoro yipindar vahe sello siete vahe cuachiar mboyasa sui. Ahese asendu avei ava irungatu yuvirecoi vahe pāhu pendar oñehe pīrata. Iñehe ndoyavii osunu vahe, “¡Eriol!” ehi cheu.

² Ahese asepia cavayu morochi vahe, ahe ava ihari pendar vireco virapar. Chupe omondo yeguaca yuvireco. Ëgüe ehi ahe osē seco pīrata catu vahe ava reco reroi āgua.

³ Omondorose acoi Ovesami imoñuviriosa sello, ahese asendu imoñuviriosa yuvirecove vahe pāhu pendar ñehe, “¡Eriol!” ehi vahe cheu.

⁴ Ipare osē cavayu pīra vahe, ahe ava ihari pendar oipisi pīratasa mbahe tuprisa rerocua āgua ivi pīpendar ava sui ‘toyeyuca-yuca tēi yuvireco’ oyapave. Ipare imondosa quise pucu chupe.

⁵ Omondorose acoi Ovesami imombosapisa sello, ahese asendu imombosapisa yuvirecove vahe pāhu pendar ñehe, “¡Eriol!” ehi vahe cheu. Amahe sese, ipare asepia cavayu sū vahe, ahe ava ihari pendar vireco opo pipe mbahe rāhasa.

⁶ Ipare asendu yuvirecove vahe cotindar ñehe, ahe aipo ehi: ‘Ñepei kilo trigo serocuasa guarepochi ñepei ari resendar mboraviqui repri pipe, mbosapi kilo cebada evocoiyase serocuasa avei ñepei ari resendar mboraviqui repri pipe no. Pemocañi eme mbahe quira iyavei uva ricuer avei no’ ehi.

⁷ Evocoi Ovesami omondorose imoirungatusa sello, ahese asendu ava imoirungatusa ñehe aipo ehi: “¡Eriol!” ehi cheu.

⁸ Amahe, ipare asepia cavayu iyu rasi vahe, ahe ava ihari pendar serer Tehögüer. Ipare saquicuei ou vahe oico ahe serer Omano-vahe-recosa. Ahe chupe yuvireco imondosa teco pīratasa ivi imoirungatusa yahocuer rupi iguata āgua ava yuca āgua vavasa pipe, tieporēhi pipe, mbahe rasi pipe, mbahe ipi pipe avei no.

⁹ Evocoi Ovesami omondorose imbopoyandeposa sello, ahese asepia mbahe seropovēhepri rendavrive ava hā, ahe yucasa vahe yuvireco Tūpa Ñhengagüer mombehusa sui tēi iyavei Jesús reroyasa sui tēi avei no.

¹⁰ Ahe aipo ehi pīrata yuvireco: “Ore Yar Tūpa seco maranehi, supi tupri vahe, ¿mbahese vo eremombaraisura ore yucasarer yuvirecoi vahe ivi pīpendar ore repisave?” ehi yuvireco.

¹¹ Ipare imondosa iyacatu turucuar morochi vahe chupe, ahese aipo ehi: “Pepituhu vite rane, tayaviyepa rane pe rivireta retacuer Cristo upendar mbahe aposa pipe yucapri pe nungar yuvireco” ehi.

¹² Ipare Ovesami omondorose imoñepei ovasa sello, ahese oime ivi ririi ipīratá vahe. Ari evocoiyase sū, aviye acoi turucuar sū vahe mano sendar yemondesa iyavei yasi pīrá inungar tuvi,

¹³ yasitata evocoiyase opa oviapi iva sui ivi rese yuvireco no inungar acoi higo hacri ombosururu vahe ivitu ai yepi.

¹⁴ Ahese iva ndoyecua iri cute inungar acoi cuachiar yeapoapipri vahe, opacatu tupri avei ivitri, caha pāhu avei no osiri güenda sui yuvireco.

¹⁵ Mborerecuareta avei co ivi pīpendar yuvirecoi vahe opa tēi oñemi mbahecuar pipe yuvireco, ita guasu pāhu rupi avei yuvireco no, oyoya guasu seco ivate vahe, sundao rerecuareta, mbahe yar seco pīratá vahe, iyavei opacatú tupri mbiguai eta, ava ndahei vahe mbiguai avei;

¹⁶ iyavei aipo ehi yuvireco ivitri upe, itape guasu upe avei no, “¡Eviapi ore harive, toroñemipa tēi Tūpa sui iyavei Ovesami sui acoi ombou vahe co poronupasa ipīrata vahe oreu!

¹⁷ Esepia, oyepota ité Tūpa ñemoirosa oreu. Ndipoi chietera ava oyemoviracua tupri vahe oyese chupe” ehi yuvireco.

7

Israel suindar iporavopri yuvirecoi vahe

¹ Ipare asepia irungatu tupri Tūpa rembiguai iva pendar yuvinohai vahe irohi coti, norte coti, ari sēsa coti, caharu coti avei no omombituhu tupri vahe irungatu ivitu yuvirecoi vahe ivi hari rupi ipeyuēhi āgua, que para guasu pipe angara viña, que ñepei yepe ivira ro angara viña no.

² Ipare asepia avei ambuae Tūpa rembiguai iva pendar ou vahe ari sēsa coti sui, ahe vireco oyese Tūpa oicove vahe rer mondosa. Ahe niha osapucai pīratá evocoi irungatu tupri Tūpa rembiguai iva pendar yuvirecoi vahe upe, oipisi vahe pīratasa ivi, para guasu momara āgua yuvireco, aipo ehi:

³ “¡Ndapemomara vitei chira rumo ivi, para guasu avei, ivira avei no, co ndoromondo viteiseve ava Tūpa rembiguai eta upe isiva rese Tūpa rer icuachiapri!” ehi.

⁴ Ipape asendu Tūpa rer oipisi vahe retacuer: ciento cuarenta y cuatro mil tupri, evocoi opacatu doce judío ramoi suindar pāhu sui iporavopri yuvireco.

⁵ Doce mil tupri yuvirecoi iporavopri Judá suindar, doce mil tupri Rubén suindar, doce mil tupri Gad suindar,

⁶ doce mil tupri Aser suindar, doce mil tupri Neftalí suindar, doce mil tupri Manasés suindar,

⁷ doce mil tupri Simeón suindar, doce mil tupri Leví suindar, doce mil tupri Isacar suindar,

⁸ doce mil tupri Zabulón suindar, doce mil tupri José suindar, ipa evocoiyase doce mil tupri Benjamín suindar.

Ava rehi iturucuar morochi vahe

⁹ Ipape asepia setá iteanga ava, opacatu ivi rupindar, ambuae-ae tēi vahe, ambuae-ae tēi vahe iñehe yuvireco iyavei secua ambuae vahe avei no. Ahe opūhapa vahe Tūpa rovai Ovesami rovai avei yuvireco no, ahe ndayaicatui eté ipapapa āgua. Esepia, setá etepri yuvireco iyavei iturucuar morochi vahe pāve; pindo-pindomi vireco opove yuvireco no.

¹⁰ Ipape opacatu guasu oñehe pīrata yuvireco aipo ehi:

“¡Poropīsirosa yande Ru Tūpa suindar, ahe oguapi vahe oī güendave, iyavei Ovesami suindar avei no!” ehi.

¹¹ Iyavei opacatu Tūpa rembiguai íva pendar yuvirecoi vahe oyere tupri Tūpa renda rese, icuaipri rese avei yuvinoha iyavei irungatu yuvirecove vahe rese avei no; ahese oyeaivi omboya ité osiva ivi rese senda rovai Tūpa mboeteisave yuvireco,

¹² aipo ehi:

“¡Ēgūe tehi!

Sapucasa, poromboeteisa, mbahecuasa, ‘¡Aviye ndeu’ hesa, poromboyeroyasa, mborere-cuasa,

teco pīratasa avei tasecoi yande Ru Tūpa upe!

¡Ēgūe tehi apirēhi vahe rā ité yepi!” ehi.

¹³ Ahese icuaipri ipāhu pendar aipo ehi cheu cute: “¿Ereicua vo co ava rehi iturucuar morochi vahe pāve yuvirecoi, ereicua que sui pīha yugūeru?” ehi.

¹⁴ Che evocoiyase, “Nde rumo ereicua” ahe chupe. Ipape ahe aipo ehi cheu: “Co acoi yuvinohe tupri vahe ité teco asisa sui yuvireco, inungar oyosei, omomorochi vahe oturucuar, ēgūe ehi avei güecocuer imomorochi Ovesami ruvi pipe yuvireco.

¹⁵ “Sese Tūpa renda rovai yuvirecoi, chupe mbahe apo āgua ari, pītu rupi avei sēta pipe.

Güendave oguapi vahe oī, güecocuer pipe osepira.

¹⁶ Evocoi ndiyumbiasi iri chira yuvireco,

ndihusei iri chiaveira, iyavei ari ndoyope iri chira, ndasacuvasi iri chiaveira chupe no.

¹⁷ Esepia, evocoi Ovesa secoi Vu renda rovai, ahe osārora ava rehi sereco inungar ovesa rārosar.

Ipape opara vīraso tecovesa resendar i ndopai vahesave imboihu āgua.

Tūpa evocoiyase omombituhupara imboyasehosa sui yuvireco” ehi.

8

Imoñuvirío ovasa sello iyavei itaisi rapisa oro apopri

¹ Ipape coiye cute co Ovesami omondorose imoñuvirío ovasa sello cuachiar mboyasa ichui, ahese siu tupri ivave ñepi hora yemombitesa rupive.

² Ichui asepia siete tupri Tūpa rembiguai íva pendar yuvinohai vahe Tūpa rovai, chupe opa imondosa siete tupri mimbí.

³ Ipape ou ambuae Tūpa rembiguai íva pendar oro itaisi rapisa reseve, iyavei ou ohā itaisi rapisa renda rovai; ipape imondosa tuvichá itaisi chupe oicuvēhe vahe rā oyoya tupri opacatu ava Tūpa upendar yeruresa rese oro mbahe reropovēhepri renda harive; ahe Tūpa renda rovai chini vahe.

⁴ Itaisi rātachi evocoiyase oso Tūpa rembiguai íva pendar po sui. Ēgūe ehi oyepota oso Tūpa recosave, oyoya tupri chupendar yeruresa rese.

⁵ Ipape evocoiyase Tūpa rembiguai íva pendar opoco itaisi rapisa rese, omboapipo mbahe reropovēhepri renda pendar tātapii pipe. Ipape opa omombo ivi hari rupi. Aheseve voi osunu vahe opororo-roró, overa-vera iyavei ivi oririi.

Siete vahe mimbí

⁶ Evocoiyase siete tupri Tūpa rembiguai íva pendar oyemoingatu voi güemimbí moñehe āgua yuvireco.

⁷ Yipindar vahe Tūpa rembiguai omoñehe güemimbí, ahese imombosa ivi hari rupi amanda iyavei tata oyeseha vahe tuví rese. Ipape opa ocai ivi mombosapisa yahocuer. Oyoya tupri ivira mombosapisa yahocuer rese iyavei capihí reseve avei opa yuvirocai.

⁸ Imoñuviriosa Tūpa rembiguai omoñehe güemimbi. Ahese imombosa para guasu pipe inungar tupri acoi ivitri sendi vahe tata pipe; ipare para guasu mombosapisa yahocuer oyeapo tuvi.

⁹ Iyavei para guasu mombosapisa yahocuer pipendar ava omano yuvireco. Ipare carite guasu mombosapisa yahocuer pipendar opa tupri avei imocañisa.

¹⁰ Ipare imombosapisa Tūpa rembiguai iva pendar omoñehe güemimbi, ahese yasitata tuvichá vahe oviapi iva sui ou. Sendi guasu inungar acoi ivira rese tata sendi guasu vahe. Ahe oviapi iai mombosapisa yahocuer pipe iyavei ivi sui i ohē vahe mombosapisa yahocuer pipe avei no.

¹¹ Yasitata rer evocoyase Iro-vahe. Ipare i mombosapisa yahocuer iró iteanga. Evocoi i pipe setá ava omano yuvireco.

¹² Imoirungatusa Tūpa rembiguai omoñehe güemimbi. Ipare ari mombosapisa yahocuer imegua, yasi mombosapisa yahocuer, iyavei yasitata mombosapisa yahocuer avei no. Ichui imombosapisa yahocuer ndosesape iri yuvireco ari mombosapisa yahocuer pipe, pítu mombosapisa yahocuer pipe avei no.

¹³ Ipare asepia, asendu avei no vira guasu ovevese iva mbit̄er rupi, aipo ehi pucu oñehe oico: “¡Too, too! ¡Iparaisu catura moco ava yuvirecove vite vahe ivi pipe yuvireco acoi omoñehese ambuae mbosapi Tūpa rembiguai güemimbi yuvireco!” ehi.

9

¹ Tūpa rembiguai imbopoyandeposa omoñehese güemimbi, ahese asepia yasitata oviapi vahe iva sui ou ivive. Ipare chupe imondosa ivicuar picucu pítumimbi vahe mboisa.

² Ipare omboise ivicuar rovapisa, ichui opūha tātachi, inungar acoi horno guasu pipe sui osē vahe. Evocoyase evocoi tātachi ndosesape uca iri ari upe, niporēhi iri eté mbahe.

³ Iyavei evocoi tātachi sui opa yuvinose tucru guasu rehii oñemosai opacatu ivi rupi; chupe avei imondosa seco pírata āgua inungar acoi mbaherumbiquiāpe.

⁴ Icuaisa rumo opacatu capihii mbahe roc̄ri iyavei ivira momaraēhi āgua, ēgüe ehi rumo acoi ava nomboyecuai vahe osiva rese Tūpa rer; chupe nara ité.

⁵ Nimondosai rumo mborocuaita chupe ava yuca āgua. Ēgüe ehi rumo ‘tomombaraisu pucu rane poyandepo yasi rupi sereco’ oyapave tēi, inungar tupri acoi mbaherumbiquiāpe rasicuer.

⁶ Evocoi ari rupi ava oipota tēira omano āgua yuvireco viña. Imanosa rumo que vitera yuvireco ichui.

⁷ Tucru guasu rehii inungar cavayu imoingatupri vavasave nara yepi; oāca rese evocoyase vireco ndoyavii yeguaca oro apopri, iyavei sova aviye tupri ité ava repiaca.

⁸ Iha ndoyavii cuña ha, sāi evocoyase ndoyavii tupri yagua pita rāi.

⁹ Setecuer evocoyase oyopia tupri guarepochi apopri, iyavei ipepo riapugüer aviye tupri ité acoi cāreto riapugüer cavayu vinoña vahe vavasave.

¹⁰ Vireco vuguai rese opopiar aviye mbaherumbiquiāpe popiar. Ahe niha vireco opíratasa poyandepo yasi rupi ava momara āgua tēi.

¹¹ Evocoi tucru guasu rerecuar, ahe icuai pri ivicuar ipicucu vahe mboi āgua. Ahe serer hebreo ñehe pipe Abadón; griego ñehe pipe evocoyase Apolión ehi.

¹² Opa yip̄indar vahe mbahe-mbahe tēi; oime vite rumo co pare ñuvirío mbahe tasi vahe. ¹³ Imoñepe ovasa Tūpa rembiguai omoñehese güemimbi, ahese asendu ñehesa itaisi rapisa renda oro apopri Tūpa rovaindar irungatu sāchi vahe pāhu sui.

¹⁴ Ahe aipo ehi evocoi imoñepe ovasa Tūpa rembiguai upe: “Eyorapa evocoi irungatu Tūpa rembiguai ñapichimbr̄i iai guasu Eufates ivirindar” ehi.

¹⁵ Evocoyase opa yorasa ava mombosapisa yahocuer yuca āgua yuvireco. Esepia, evocoi imoingatupri co ari rupi tuprise nara yuvireco.

¹⁶ Ipare asendu sundao rehii cavayu harive yuvirecoi vahe, ahe setacuer doscientos millones tupri.

¹⁷⁻¹⁸ Ēgüe ehi asepia cavayu rehii che quer nungar pipe, ihari pendar evocoyase vireco opochiha rupi tupri oyoepisa guarepochi apopri yuvireco, ahe iparagüer pira vahe tata nungar, sov̄i vahe, iyu vahe avei no. Cavayu rehii āca evocoyase aviye tupri yagua pita āca, iyuru sui evocoyase yuvinose-nose tata, tātachi iyavei azufre. Ipipe sui ava mombosapisa yahocuer opa tupri omano yuvireco.

¹⁹ Esepia niha, cavayu pírataisa iyuru rese chini, suguai rese avei no; ahe suguai ndoyavii tupri ité mboi āca, ipipe avei ava omomara.

²⁰ Ava rumbirer rumo nomanopa vitei vahe co mbahe tēi sui yuvireco, nosecañaroi eté güecocuera i yuvireco. Ndopoi potai eté carugar mboetei aisa sui, iyavei opacatu mbahe rahanga tēi oro apopri, guarepochi, bronce, ita, anise ivira apopri mboeteisa sui

avei yuvireco. Evocoi mbahe apopri rumo ndosarecoi vahe, ndosendui vahe ité mbahe, ndoguatai vahe avei.

²¹ Iyavei noñecuñaro potai eté oporapichisa sui yuvireco, opaye aisa sui, que cuña, que cumbahe ambuae rese angaipa aposa sui, omonda raisa sui avei.

10

Tüpa rembiguai iva pendar vireco vahe icuachiapri cuachiarmi

¹ Ipare asepia ambuae Tüpa rembiguai iva pendar ipirátá vahe ogüeyise iva sui ou mbahe pítu páhuve; ahe ñaca rese arco iris oyere tupri. Sová sendí aviye ari, setíma evocoiyase ndoyavii tata rendigüer opüha tupri vahe.

² Cuachiarmi oyemboi vahe vireco opove. Opi oacato cotindar pipe opíro para guasu rese, ambuae opive evocoiyase opíro ivi rese.

³ Evocoiyase sãse pírátá, inungar yagua píta rãse; sãse, evocoiyase siete tupri osunu vahe ñehe oyendu yuvireco.

⁴ Oñehepase, ahese iñehe che aicuachiara viña; asendu rumo iva sui ñehesa aipo ehi vahe: “Eremboyecuai rene acoi siete tupri osunu vahe ñehe, ndereicuachiai chietera” ehi cheu.

⁵ Evocoiyase Tüpa rembiguai asepia vahecuer, ahe acoi opíro vahe para guasu rese, ivi rese avei opo oacato cotindar omopuha iva coti.

⁶ Ichui Tüpa ndopai vahe rer pipe evocoi oyapo vahe iva, ivi, para guasu iyavei opacatu mbahe ipor reseve, omoingatu oñehe aipo ehi: “Nasarosa iri chietera;

⁷ oyepotase rumo imoñuvirío ovasa Tüpa rembiguai upe güemimbi moñehe água, ahese imboaviyesara Tüpa remimbotar yipindar ndicuasai vahe, ahe acoi omombehu vahe güembiguai oñehe mombehusar upe aracahe” ehi.

⁸ Ñehesa asendu vahe iva sui oñehe iri cheu aipo ehi: “Eso, tereipisi cuachiarmi imboipri Tüpa rembiguai vireco vahe evocoi opíro vahe para guasu rese ohã, ivi rese avei no” ehi.

⁹ Evocoiyase aso Tüpa rembiguai upe, aporandu cuachiarmi rese, ahese ahe aipo ehi cheu: “Ndo co, eipisi, ehu. Nde yuru pipe evocoiyase sêhera eiri nungar, nde aviterve rumo irora” ehi cheu.

¹⁰ Ahese aipisi cuachiarmi cute Tüpa rembiguai sui, ipare ahu; yipindar sêhé che yuru pipe inungar eiri, amocopase rumo, che aviterve iró cheu.

¹¹ Evocoiyase aipo ehi yuvireco cheu: “Nde ereñehe irira Tüpa aipo ehi vahe rese ambuae-ae tecua pipendar rese, ivi rupindar rese, ambuae-ae iñehe vahe rese, mborerecuar rese avei no” ehi.

11

Ñuvirío ava Tüpa recocuer mombehusar

¹ Ipare ombou vara mbahe rãhasa yuvireco cheu, ichui aipo ehi yuvireco cheu no: “Erio, teresãhapa tüparo, mbahe ropovêhepri renda avei, ipare opara ereipapa ipipendar Tüpa mboeteisar retacuer” ehi.

² “Nderesãhai chira rumo ñachimbri pipe tüparo rocar rupi. Esepia, evocoi opa imondosa ava Tüpa ndoicuai vahe upe, ahe opíroa tecua nimarai vahe rese yuvireco cuarenta y dos yasi rupi” ehi.

³ “Ipare ñuvirío ava amondora che recocuer mombehu água opacatu ava upe mil doscientos sesenta ari rupi. Ahe omondera turucuar ipo guasu vahe yuvireco” ehi.

⁴ Co ava ñuvirío, ahe inungar ñuvirío ivira Olivo iyavei inungar ñuvirío vera hi yuvinoha vahe ivi Yar rovai.

⁵ Acoi que oimese ovireco mara pota vahe, ahese che reco mombehusar yuru sui osëra tata sapipa água; égüe ehira ava omano que che reco mombehusar reco momara potasar.

⁶ Co ñuvirío vireco opíratasa oqui vahe mombita água, acoi ari rupi che reco mombehu viteseve yuvireco; iyavei vireco pírataa i recuñaro água tuvi pipe yuvireco, imombaraisu uca água avei ivi opacatu-catu tēi mbaherasi pipe güemimbotar rupi.

⁷ Omboaviyepase rumo Tüpa reco mombehusa yuvireco, ahese osëra ivicuar guasu ipicucu vahe sui mbahe ipi vai. Ahe ovavara sese, osecopira, ichui oyucara.

⁸ Sehögüer evocoiyase yangarecuavēhi tēi yugüeru tecua guasu rocar rupi, ahe tecua pipe avei yande Yar oyatica curusu rese yuvireco, ahe tecua pendar upe amove ava, “Sodoma pendar nungar yuvirecoi” ehi yuvireco; “Egipto pendar nungar yuvirecoi” ehi avei yuvireco no.

⁹ Ipare mbosapi ari yemombitesa rupi, ava-ava tēi tecua rupindar, ava ambuae-ae tēi vahe, iñehe ambuae vahe iyavei ambuae-ae ivi rupindar osepiãño tēira sehögüer yuvireco iyavei ahe noñoti ucai chietera ava upe yuvireco.

¹⁰ Ava yuvirecove vahe ivi pipe, ahe oviharetera yuvireco imano rese. Ēgüe ehira sorivete, iporeredora oyese yuvireco. Esepia, evocoi ñuvirío ava Tüpa ñehe mombehusar imombaraisupirer yuvirecoi.

¹¹ Mbosapi ari yemombite pare rumo, Tüpa opa ombogüerayevi, ahese opühapa yuvireco. Evocoiyase ava opacatu osepia vahe osiqüiyé iteanga yuvireco ichui.

¹² Ipare ahe ñuvirío osendu yuvireco ñehesa ipĩrata vahe iva suindar aipo ehi vahe: “¡Pyeupipa ave ivate!” ehi. Evocoiyase opa oyeupi ivave yuviraso iva quiha pāhu rupi oamotarēhisareta rembiepiave.

¹³ Aheseve voi oime ivi rirí tuvichá vahe, ichui tecua guasu imbodiesa yahocuer opa onduru; ahese siete mil tupri ava opa omano yuvireco. Evocoiyase ava rumbirer, osiqüiyepave tēi osapucaí Tüpa iva pendar upe imboeteisa pipe yuvireco.

¹⁴ Opa mbahe-mbahe tēi moñuviriosa cute; ou poyava irira rumo imombosapisa.

Imoñuvirío ovasa Tüpa rembiguai omoñehe güemimbi

¹⁵ Imoñuvirío ovasa Tüpa rembiguai omoñehese güemimbi, ahese oyeendu ñehesa ipĩrata vahe iva suindar aipo ehi vahe:

“Yande Yar Tüpa, Sembiporavo Poropĩrosar avei vireco co ivi pipendar mborerecuasa opovrive yuvireco cute.

Ahe evocoiyase mborerecuar apirēhi vakerā itera secoi” ehi.

¹⁶ Evocoiyase veinticuatro tupri icuaipri, evocoi oguapi vahe yuvinoi Tüpa renda rovai, ahe oyeavi mboya ité osiva ivi rese imboeteisa pipe yuvireco,

¹⁷ aipo ehi:

“Aviye ndeu ore Yar, Tüpa mbahe mboavaisarēhi, nde acoi yipisuive vahe ité, ereicoveño avei cūrítei.

Esepia, nde pĩratasa tuvichá vahe pipe ereporocuai eico.

¹⁸ Ambuae tecua rehii pendar nde amotarēhi ité yuvireco.

Nde ñemoirosa rumo cūrítei oypota, iyavei nde porandusa oime voira ava omano vahe upe.

Iyavei eremondora mbahe porerecosa nde rembiguai eta nde ñehe mombehusar upe, ndeundar seco catupri vahe upe, iyavei acoi nde rer mboeteisar upe no, que seco ivate vahe upe, que seco ivi coti catu vahe upe avei no; iyavei eremocañira co ivi pipe mbahe tēi rerusar” ehi yuvireco.

¹⁹ Ahese oyemboi tüparo iva pendar, iyavei oyecua tupri cuachiar porocuaita resendar riru. Ipare overa-vera, siapu guasu, osunu, ivi oriríi, amanda osururú avei no.

12

Cuña iyavei mbahe ipi oporomocañi vahe

¹ Evocoiyase iva rese oyecua mbahe poromondiisa tuvichá vahe ambuae mbahe mboyecua ñgua: oime cuña iturucuar inungar ari rendigüer, aviye opĩro vahe yasi rese ohá, oāca yeguaca rese doce tupri yasitata vireco.

² Co cuña ipuruha oico, sāsé tēi omembrí iha pota ñgua oyesui. Esepia niha, oiporará ité tasicuer.

³ Ipare coiyeyecua iva rese ambuae mbahe mboyecua tupri: mbahe ipi pĩra vahe, ahe ñaca siete tupri, sāchi evocoiyase diez iyavei vireco yeguaca oāca yacatu.

⁴ Suguai evocoiyase ombotiriri yasitata iva pendar imombosapisa sui ñepeí iyahocuer seraso. Ipare opa omombo ivive. Ahe evocoiyase opita osāro cuña imembira pota vahe rovai ohá, “Tahupaño voi imembrí oha ramoseve” ehi viña.

⁵ Ipare co cuña membrí oha cuimbahemi, ahe mborerecuar virecora mbococa guarepochi apopri, ipĩrata catu vahe secoira opacatu ava ivi rupindar upe. Ichui serocuasa voi serasosa Tüpa rovai.

⁶ Cuña evocoiyase oñemi ivi iporupirēhisave oso. Aheve omoingatu Tüpa iyemboerecua ñgua, eipeve icaru ñgua mil doscientosenta ari rupi.

⁷ Oime avei vavasa ivave; ahese Tüpa rembiguai iva pendar ivate catu vahe Miguel güeru ovoya eta ovava ñgua mbahe ipi oporomocañi vahe upe ivoya upe avei yuvireco.

⁸ Ndoicatu eté rumo Miguel recopi ñgua yuvireco. Sese ndipoi eté ivave seco ñgua yuvireco chupe.

⁹ Ēgüe ehi imboypepisa mbahe ipi oporomocañi vahe reco pĩratasa sembiguai eta reseve; opa imombosa ivi pipe yuvireco. Evocoi mboi vai, “Carugar” ehi vahe yuvireco chupe; “Satanás” ehi avei yuvireco chupe. Evocoi niha ava ombopa-mbopa tēi vahe opacatu ivi pipe yuvireco.

¹⁰ Evocoiyase asendu ñehesa ipĩrata vahe ivave, aipo ehi vahe:

“Cūritei oime poropĩsirosa, pĩratasa iyavei yande Tũpa mborerecuasa, Poropĩsirosar mborerecuasa avei no.

Esepia niha, imboyepepisa iva sui acoi oseca-seca vahe yande rivri Tũpa reroyasareta recocuer momara āgua pĩtu, ari yacatu rupi yande Ru Tũpa rovai.

¹¹ Yande rivri osecoreroyi Ovesami ruvi piyere pipe sui yuvireco iyavei acoi secocuer mombehu tuprisa pipe sui avei no.

Esepia niha, ndosiqũyivei eté gũetecuer mocañi āgua yuvireco.

Ahe rumo oyemoingatu voi eté omano āgua.

¹² ¡Peyembovĩha catu pe iva iguar peico vahe!

Pe rumo, ¡peparaisu catura ivi pipe, para guasu pipe avei peico vahe!

Esepia niha, Carugar ogũeyi pẽu oñemoirosa pipe, oicuae güeco pucuẽhi āgua” ehi.

¹³ Ipare mbahe ipi oporomocañi vahe oicuae imombopri güecose ivi rese, ahese omoña cuña imembrĩ cuimbahemi reseve yamotarẽhisa pipe.

¹⁴ Evocoi cuña upe rumo imondosaño ñuvirio vira guasu pepo iveve āgua chupendar ivi imoingatupri ava porẽhisave seco āgua, amombri mbahe ipi oporomocañi vahe sui. Aheve oyopoi mbosapi araviter yemombitesa rupive.

¹⁵ Ipare mbahe ipi oporomocañi vahe oyuru rupi ombotipimacua cuña raquicuei iai apo ‘tocañi tẽi’ oyapave viña.

¹⁶ Ivi rumo oime co cuña pĩtiviisa, ahe oyeca. Ipare opa omoco iai evocoi mbahe ipi oporomocañi vahe rembiapo.

¹⁷ Evocoiyase, oñemoiró iteanga cuña rese, ipare oso ovava ambuae ichuindar rehi rese, ahe omboyeroa vahe ité Tũpa porocuaita yuvireco iyavei yuvirecoi tupri vahe Jesucristo remimombehu rupi.

¹⁸ Ipare mbahe ipi oporomocañi vahe opita para guasu popive ohã.

13

Ñuvirio mbahe ipi vai

¹ Ipare asepia para guasu pipe sui osẽ mbahe ipi vai, ahe siete tupri ñaca vahe iyavei diez tupri sãchi. Guãchi yacatu evocoiyase vireco ñepi-peiyeguaca, iyavei oãca yacatu rese vireco terer Tũpa upe mbahe tẽi vahe.

² Co mbahe ipi vai aviye tupri acoi yaguar iparaũ vahe; iyavei ipi aviye tupri oso pi, iyuru evocoiyase aviye yagua pita yuru. Mbahe ipi oporomocañi vahe evocoiyase omondo opĩratasa iyavei omborerecuasa chupe.

³ Ñepi mbahe ipi vai ãca oyeapicha guasu vahe ndoyavii omano vaherã ité viña; ahe rumo ocuera tupri iriño evocoiyase opacatu guasu ava sepiase, ndoyembovĩhai. Ichui viroya catu yuvireco.

⁴ Omboetei guasu mbahe ipi oporomocañi vahe sereco yuvireco. Esepia, omondo omborerecuasa mbahe ipi vai upe. Ipare ahe avei omboetei ai yuvireco no, aipo ehi yuvireco: “Ndipoi eté mbahe ipi vai nungar, iyavei ndipoi eté ava oicatu vahe ovava vaherã sese” ehi yuvireco.

⁵ Iyavei mbahe ipi vai upe ipotasa iyemboivate ai āgua oñhe pipe ava rovaque iyavei Tũpa roeroiro āgua avei no, iyavei mborerecuar guasu seco āgua cuarenta y dos yasi rupi.

⁶ Ēgũe ehi iñhe mara-mara tẽi Tũpa rese, iñhe-ñhe tẽi avei serer maranehi rese, sãta rese, iva pendar rese avei no.

⁷ Imondosa avei chupe vavasa apo uca āgua Tũpa upendar ava eta upe secopi āgua. Ipare imondosa avei mborerecuar seco āgua chupe ava ambuae-ae tẽi vahe upe, secua ambuae vahe upe, ambuae-ae tẽi iñhe vahe upe, iyavei ambuae ivi rupindar upe avei no.

⁸ Ipare omboetei ai sereco yuvireco opacatu ava ivi pipendar acoi ivi apoẽhi suive ndovirecoi vahe güerer Ovesami cuachiar tecovesa resendar pipe, ahe niha acoi yucapirer.

⁹ Que amove osendu pota vahe, toyapisacaño co rese:

¹⁰ “Acoi ava oyeoquenda uca vaherã, oyeoquenda ucaño itera; iyavei acoi ava omano vaherã quise pucu pipe, ipipeño ité omanora.”

Co pipe oyecua Tũpa rese yeroyasa iyavei ipĩratasa ava chupendar rese.

¹¹ Ipare asepia ambuae mbahe ipi vai osẽ vahe ivivri sui. Co vireco ñuvirio guãchi ndoyavii tupri Ovesa rãchi, mbahe ipi oporomocañi vahe ñhehe pipe rumo oñhehe oico.

¹² Ahe vireco opacatu evocoi yipindar vahe mbahe ipi vai mborerecuasa sovaque, iyavei ava ivi pipendar yuvirecoi vahe upe omboetei uca yipindar mbahe ipi vai, ahe acoi ocuera tupri vahe oyeapichasa oyuca rãgũer sui.

¹³ Iyavei oyapo setã mbahe poromondiisa mbahe mboyecua āgua. Iva sui eté niha oiti uca tata ivive imbou opacatu ava rembiepiave.

¹⁴ Ombopa tēi ava ivi pipendar yuvirecoi vahe mbahe poromondiisa pipe evocoi imondosa vahe yapo āgua chupe yipindar mbahe ipi vai rovai. Ipare oporocuai yapichapri ocuera tupri vahe rahangapo āgua imboeteisave.

¹⁵ Ipare imondosa pīratasa chupe tecovesa mondo āgua evocoi sahanga upe ‘toñehe, toyuca uca avei ava opacatu omboteiēhisar’ oyapave.

¹⁶ Ipare ava opacatu yuvirecove vahe upe, seco mbegüemi vahe upe, seco ivate vahe upe avei, que mbahe yar upe, que iparaisu vahe upe, ava nimañecoprii vahe upe, mbiguai tēi upe, ahe chupe, “Toyecuachía opo oacato cotindarve yuvireco, anise osivave” ehi.

¹⁷ Ahese ava ndipoi eté oicatu vahe mbahe rerocua, anise que mbahe mondo āgua acoi ndovirecoise mbahe ipi vai rer, anise serer retacuer ndovirecoise oyese no.

¹⁸ Iya pereco mbahecuaa co renducua tupri āgua. Acoi osenducua vahe toicua tupri mbahe ipi vai rer retacuer. Evocoi niha ava rer retacuer. Ahe seiscientos sesenta y seis.

14

144,000 ava iporavopri sapucaisa

¹ Ipare asepia Ovesami ivitri Sión rese imoha. Ahe supi yuvirecoi ciento cuarenta y cuatro mil tupri ava evocoi oicuachía vahe Ovesami rer, Tu rer avei osiva rese yuvireco.

² Ipare asendu mbahe riapu vahe sui ou vahe; ndoyavii acoi itu guasu riapugüer iyavei ndoyavii eté acoi osunu vahe opororo-roró iteanga vahe; ndoyavii avei acoi ava setá vahe omñehese arpa yuvireco, ěgüe ehi siapugüer.

³ Ipare osapucai sapucaisa ipiasu vahe yuvireco Tūpa rovai iyavei iva pendar irungatu yuvirecove vahe rovai, icuairi eta rovai avei no. Ñepe yepe que iva pendar ndoicatu eté evocoi sapucaisa rese oyembohe vahe. ěgüe ehi rumo ava ciento cuarenta y cuatro mil tupri yuvirecoi vahe, evocoi oñepisiro vahe ivi pipendar pāhu sui, ahe güeraño tupri ité oicatu osapucai yuvireco.

⁴ Co ava ndoyapoi vahe ité mbahe co coti tēi cuña rese. Esepia, oñearo tupri güeco catuprisa pipe yuvireco; iyavei osaquicue moñaño ité Ovesami que iguatasa rupi. Opa serocuaa ava pāhu sui iyavei inungar yipindar mbahe seropovēhepri Tūpa upe, Ovesami upe avei.

⁵ Ndipoi eté que temira sese. Esepia niha, ndipoi eté mbahe oyavi vahe yuvireco.

Mbosapi Tūpa rembiguai omombehu ñehe ava upe yuvireco

⁶ Evocoiyase asepia ambuae Tūpa rembiguai iva pendar oveve vahe iva mbiter rupi iyavei vireco Tūpa Ñehengagüer pisirosa resendar ndopai vahe imombehu āgua opacatu va co ivi pipendar upe: opacatu ivi rupindar upe, ava ambuae-ae vahe upe, ñehe ambuae-ae vahe upe, opacatu tecua rupindar upe avei no.

⁷ Ipare oñehe pīrata aipo ehi: “Pesiquire Tūpa sui iyavei pesapucai seco ivatesa rese chupe no. Esepia niha, cūritei oyepota ari chupe ava recocuer rese iporandu āgua. Pemboetei catu oyapo vahecuer iva, ivi, para guasu, i ohē vahe avei no” ehi.

⁸ Ambuae Tūpa rembiguai iva pendar raquicuerindar aipo ehi oico: “¡Oviapi Babilonia guasu cute! ¡Esepia niha, evocoi opa ombosavaipo opacatu ambuae tecua pendar ohigua yemboaguasa tēisa resendar pipe!” ehi.

⁹ Ipare ambuae Tūpa rembiguai iva pendar imombosapisa, saquicue moña aipo ehi pīratá iri oico: “Acoi que ava omboetei vahe mbahe ipi vai sereco, sahanga avei no, iyavei acoi oyembohe catu vahe oyecuachía āgua osiva rese, que opo rese no,

¹⁰ oipisi itera Tūpa ñemoirosa ipīrata vahe ité; ipare omombaraisura setecuer azufre ocai vahe pipe güembiguai iva pendar eta reco marañehi rovaque, Ovesami rovaque avei no.

¹¹ Tātachi icaigüer pendar evocoiyase oyeupira ndopai vahe, ahese ndipoi chietera pituhusa pītu, ari pipe evocoi mbahe ipi vai mboeteisar upe, sahanga mboeteisar upe avei no, iyavei acoi vireco vahe serer cuachiapri oyese yuvireco no” ehi.

¹² ¡ěgüe ehira Tūpa rese ité yuvirecoi vahe yeroyasa oyecua ahe acoi iporocuita mboaviye tuprisar, Jesús reroya tuprisar avei yuvireco!

¹³ Ahese asendu ñehesa iva pendar aipo ehi vahe cheu: “Eicuachía co: Co pipe suive sorivete catura acoi ava omano vahe yande Yar rese yuvireco” ehi.

“ěgüe ehi eté —ehi Espiritu imombehu—, opituhura oporaviquisa sui yuvireco. Esepia, mbahe sembiapo rerācua osora ivave supi” ehi.

Ivi pipendar recoāhasa

¹⁴ Ahese asepia iva quihā morochí vahe; iharive ndoyavii ava oguapi vahe oī. Vireco niha oyeguaca oro apopri oāca rese iyavei mbahe miti asiasa saimbé vahe vireco opove.

¹⁵ Ipape osē ambuae Tūpa rembiguai tūparo sui. Ahe osapucaí pīrata evocoi iva quiha harive chini vahe upe: “¡Eyasia nde remiti iyavei emonuha nde rembiasia! ¡Esepia, nde remiti ivi pendar yaviye ité!” ehi ava recocuer uve chupe.

¹⁶ Evocoiyase evocoi chini vahe oyasia güemiti ivi ve oico, ahesa opa omonuha güembiasia.

¹⁷ Ipape osē ambuae Tūpa rembiguai tūparo sui, ahe avei vireco mbahe miti asiasa saimbé vahe.

¹⁸ Ipape ambuae Tūpa rembiguai osē mbahe reropovēhepri renda sui, ahe tata rese hañecosar secói. Iyavei oñehe pīrata evocoi vireco vahe mbahe miti asiasa upe aipo ehi: “¡Eyasia uva ha apacuar, evocoi oime vahe ivi pipe! ¡Esepia niha, opa yaviye!” ehi.

¹⁹ Evocoiyase co Tūpa rembiguai inungar oyasia vahe uva ha ēgüe ehi opa ava ipeha ivi pipendar. Ipape opa oyapocatu Tūpa ñemoirosa rāro āgua.

²⁰ Ipape inungar uva ha icambepri tecua cupeve, ēgüe ehi co ava imombaraisu; ichui osē tuví evocoi tipigüer oyepota ité cavayu yuru penda rupi eté sese, ahe ipucucuer trescientos kilómetros tupri ité.

15

Ipape siete tupri Tūpa rembiguai güeru mbaherasi yuvireco

¹ Ipape asepia ivave ambuae mbahe mboycuasa tuvichá vahe poromondiisa: siete Tūpa rembiguai, siete tupri mbaherasi ipa vahe vireco vahe, ahe ipá vahe ité Tūpa ñemoirosa.

² Iyavei asepia para guasu ndoyavi yepiasa oyeseha vahe tata rese. Ahe ipopive yuvinoha ati mbahe ipi vai recopisar, sahanga recopisar iyavei nomondo uca potai vahe serer cuachía āgua yuvireco oyese. Ahe vireco Tūpa upendar arpa yuvireco.

³ Ipape osapucaí Tūpa rembiguai Moisés sapucaisa yuvireco, iyavei Ovesami sapucaisa aipo ehi:

“Tuvichá opacatu mbahe nde rembiapo, che Yar Tūpa opacatu mbahe mboavaisarēhi; nde recocuer supi tupri vahe ité; seco ivi vahe.

¡Too, nde mborerecuar guasu opacatu ivi rupindar ereico!” ehi.

⁴ “Yar, nde sui opacatu ité osiquiyera yuvireco nde mboetei āgua.

Nde güeraño ité ereico seco maranehi vahe, opara yugüeru opacatu ambuae tecua rupindar iyavei nde mboeteira yuvireco. Esepia niha, sepiasa nde rembiapo supi tupri vahe” ehi.

⁵ Ipape asepia ivave oyemboise Tūpa rēta imaranehi vahe. Aheve acoi yapocatusa mborocuita resendar.

⁶ Evocoiyase ichui yuvinosepa evocoi siete Tūpa rembiguai vireco vahe siete tupri mbaherasi vai yuvireco. Ahe iturucuar secose vahe, ndiquihai vahe, sendí iteanga. Vumbicuasa ípe vahe oro apopri pipe evocoiyase oyeumbicua opochiha rupi tupri yuvireco.

⁷ Ipape ñepeí evocoi irungatu iva pendar yuvirecove vahe pāhu pendar omondo siete tupri Tūpa rembiguai upe siete Tūpa ñemoirosa riru oro apopri, ahe oicove vahe ité, ndopai vahe.

⁸ Ipape Tūpa rēta omboapipo tātachi, evocoi ou vahe Tūpa reco porañetes iyavei ipīratasa sui. Aheve ndiyai eté que ava upe seique āgua acoi opase voi eté omomba siete tupri mbaherasi vai vireco vahecuer siete Tūpa rembiguai.

16

Siete Tūpa ñemoirosa riru

¹ Evocoiyase asendu ñehesa ipīrata vahe osē vahe Tūpa rēta pipe sui. Ahe aipo ehi siete Tūpa rembiguai yuvirecoi vahe upe: “Peso, tapeipiyerepa ivi hari rupi evocoi siete tupri mbahe riru pipendar Tūpa ñemoirosa” ehi.

² Yipindar vahe Tūpa rembiguai opa oipiyere ígua riru pipendar ivi hari rupi; evocoi opacatu ava vireco vahe mbahe ipi vai rer oyese sahanga mboeteisar tēi avei, ahe chupe oime setá caracha vai tasi vahe.

³ Tūpa rembiguai imoñuviriosa opa oipiyere ígua riru pipendar para guasu pipe. Ahe evocoiyase oyeapo omano vahe ruvi nungar; ichui opa omano opacatu mbahe yuvirecove vahe ipipe.

⁴ Tūpa rembiguai imombosapisa opa oipiyere ígua riru pipendar iai pipe, i ohē vahe pipe avei no. Ipape opa ahe oyeapo tuví yuvireco.

⁵ Co pare asendu Tūpa rembiguai i rese ihañeco vahe ñehesa aipo ehi:

“Nde seco tupri vahe ité ereico evocoi ava upe eremouse nde ñemoirosa, che Yar Tūpa, seco maranehi vahe.

Nde yipisuvendar ité ereico.

⁶ Esepia, ahe opa oyuca ndeundar ava iyavei nde ñehe mombehúsar yuvireco.

Cūrítei rumo eremboihu uca tuvi pipe.

¡Evocoi nungar upe aviyesa rupi eté!” ehi.

⁷ Asendu avei ambuae ñehesa mbahe reropovēhesa renda sui aipo ehi vahe: “Supi eté, che Yar Tūpa, opacatu mbahe mboavaisarēhi, nde ava recocuer mombaraisusa supi tupri vahe ité iyavei nde reco ivi vahe ité no” ehi.

⁸ Tūpa rembiguai imoirungatusa, opa oipiyere mbahe riru pipendar ari rese, ipare ari upe imondosa pīratasa ava rapipa āgua.

⁹ Ipare opacatu ité ava yuvirocaipa tupri; ndoyevii eté rumo Tūpa upe iyavei nomboeteiño ité yuvireco. Ēgüe ehi rumo ñehese mara-mara tēiño mbaherasi rerecose Tūpa upe yuvireco.

¹⁰ Tūpa rembiguai imbopoyandeposa oipiyere mbahe riru pipendar mbahe ipi vai renda rese. Ahese aviyeteramo tēi serecuar ipovri pendar avei pitumimbisave yuvirecoi. Ava evocoiyase oñeapecusuhu-suhu tēi yuvireco mbahe rasicuer pāhuve;

¹¹ ndopoiño ité rumo mbahe-mbahe tēi aposa sui yuvireco, ahe rumo ñehese mara-mara tēiño Tūpa ivate vahe rese oyeupe mbahe tasi vahe pāhuve yuvireco.

¹² Tūpa rembiguai imoñepei ovasa oipiyere mbahe riru pipendar iai guasu Eufartes pipe. Ahe evocoiyase opa ipiru peri apo āgua añihivei coti sui mborerecuareta yu āgua.

¹³ Ipare asepia mbahe ipi oporomocañi vahe, mbahe ipi vai, ndahei vahe Tūpa ñehese mombehúsar supi vahe avei, ahe yuvirecoi vahe yuru rupi yuvínose mbosapi caruguar vireque nungar.

¹⁴ Co Carugar suindar yuvirecoi, ahe oyapo poromondiisa mbahe mboyecuasa yuvireco. Ipare opa yuvínose opacatu ivi rupi mborerecuareta monuha āgua vavasave nara, acoi ari cañi pipe Tūpa mbahe mboavaisarēhi amotarēhisave.

¹⁵ “Peyapisaca tupri che ñehese rese, che aviyeteramo tēi ayura imonda rai vahe nungar curi. Sorivetera acoi ava imahemoha vahe oyemonde tupri vahe güembiapo aviyese vahe pipe. Ahese nochí chietera oico che sui” ehi.

¹⁶ Ipare opa omonuha mborerecuareta hebreo ñehese pipe serer Armagedón ve.

¹⁷ Evocoiyase imbosietesa Tūpa rembiguai oipiyere ñemoirosa mbahe riru sui ivitu rupi. Ipare iva pendar Tūpa rēta pipe sui osē ñehesa ipīrata vahe evocoi ou vahe senda sui: “¡Opa ité yaposa cute!” ehi.

¹⁸ Ahese oime overa vahe, mbahe siapu guasu vahe iyavei osunu vahe. Ipare ivi oririri ipīrata catu vahe opacatu ivi ririri sui ava yuvirecove vitesese ivi pipe.

¹⁹ Tecua guasu oyeca-yeca mbosapi rupi, opacatu tecua evocoiyase opa onduru ivi pipendar. Ipare Tūpa oyemomahenduha evocoi tecua guasu Babilonia pendar rembiapo ai rese, evocoiyase omondo oñemoirosa ipīrata catu vahe chupe.

²⁰ Opacatu caha pāhu, ivitri avei ocañipa ité yuvireco.

²¹ Iyavei yuviroviapipa iva sui ava harive amanda guasu, ahe iposiigüer cuarenta kilos rutei. Ava rumo ñehese mara-mara tēiño vite ité Tūpa upe yuvireco amanda sui tēi. Esepia niha, evocoi Tūpa poronupasa ivaté catu vahe.

17

Cuñā oyemondo-mondo tēi vahe mocañisa

¹ Siete Tūpa rembiguai vireco vahecuer mbahe riru yuvireco, ipāhu pendar ñepei ou aipo ehi cheu: “Erio, amboyecuara co cuñā yaguasa serai vahe upe ñemoirosa ndeu, ahe evocoi oguapi i harive oñi” ehi.

² “Co cuñā rese yaguasa-guasa tēi mborerecuareta ivi pipendar yuvireco iyavei ava ivi pipendar inungar osavaipo vahe ndopoi potai eté oyemboaguasasa sui yuvireco” ehi cheu.

³ Ipare che quer nungar pipe Espiritu omboyecua vahe cheu, Tūpa rembiguai iva pendar che reraso ava porēhisave. Aheve asepia cuñā mbahe ipi vai pīra vahe harive chini. Evocoi mbahe ipi vai opacatu rupi oyapete tupri ñehesa vai Tūpa amotarēhisa sereco oyese, iyavei vireco siete tupri oāca, diez tupri guāchi.

⁴ Co cuñā turucuar, suendi vahe, pīra vahe avei no, iyavei oyemoendi yai oro pipe oico, ita iporañete ai vahe pipe, opohir pipe avei no. Vireco igua riru oro apopri. Ipipe omboapipo mbahe yavaeté vahe sereco oyemboaguasa-guasa tēisa;

⁵ iyavei icuachiapri isiva rese terer ndicuasai vahe aipo ehi vahe: “Co Babilonia guasu, cuñā yaguasa-guasa tēi vahe si, opacatu ava ivi pipendar secocuer yavaeté vahe si avei no” ehi.

⁶ Ipare aicua evocoi cuñā osavaipo vahe oñi Tūpa reroyasar ruvi pipe iyavei acoi Jesús recocuer mombehusa sui tēi yucapri vahe ruvi pipe avei no.

Co asepiase che quer nungar pipe, ndache mbovihai eté.

⁷ Ahese ahe Tūpa rembiguai iva pendar aipo ehi cheu: “¿Mahera vo nderevīhai eico? Aicua ucara mo ndeu co imombehusa ndicuasai vahe cuña resendar, iyavei acoi mbahe ipi vai vireco vahe siete tupri oāca, diez tupri avei acoi sāchi” ehi.

⁸ “Acoi mbahe ipi vai eresepia vahe ahe yipive secoi vahe, cūrīte rumo ndipo iri; osēra rumo ivicuar guasu ipicucu vahe sui omano āgua renonde curi. Acoi ava ivi pipendar ndovirecoi vahe güerer cuachiar tecovesa resendar pipe yuvireco yipive ivi apoēhiseve, ahe ndovīhai chira yuvireco osepiase evocoi mbahe ipi vai yipive oicove vahe viña, ndoicove iri rumo, oyevi irira curi.

⁹ “Co rese icuasara uma vireco mbahecuasa senducua āgua: Co siete tupri vahe ñaca ahe omombehu ‘siete tupri ivitri’ oyapave. Ahe iharive evocoi cuña uguapi oī iyavei ahe siete ñaca avei omoporēhi ‘siete tupri mborerecuar’ oyapave.

¹⁰ Cinco tupri mborerecuar evocoi ipāhu pendar ndipo iri yuvireco, ñepeiño evocoiyaseoporocuai cūrīte oico, ambuae rumo ndou vitei. Ouse rumo ipandar, ou raimi tēira.

¹¹ Mbahe ipi vai secoi vahe yipindar, ndoicove iri cūrīte, ahe imbohochosa secoira mborerecuarā, yepe siete tupri vahe mborerecuar guasu mboetasa viña, ahe rumo ocañi tēi vahe rā secocuer” ehi.

¹² “Evocoi diez tupri vahe sāchi, ahe mborerecuar diez tupri ndoyuviroique vitei vaheoporocuai vahe rā yuvireco. Oyoya rumooporocuai raimi tēira mbahe ipi vai reseve yuvireco curi.

¹³ Co diez tupri mborerecuar yuvirecoi vahe oyoya guasura ipihañemoñeta evocoi mbahe ipi vai upe omondo vahe rā pīratasa iporocuai āgua yuvireco.

¹⁴ Ipare ovavara Ovesami rese yuvireco; Ovesami rumo osecoreroyira. Esepia niha, ahe yande Yar opacatu ava Yar iyavei mborerecuar guasu secoi no opacatu mborerecuareta rerecuar, iyavei acoi ava yuvirecoi vahe sese, ahe senoipri yuvirecoi iyavei iporavopri oyemoviracuano vahe ité supi uguata āgua yuvireco” ehi.

¹⁵ Iyavei Tūpa rembiguai aipo ehi cheu: “Evocoi para guasu eresepia vahe, iharive cuña yaguasa-guasa tēi vahe uguapi oī, ahe ‘ava rehī tecua yacatu rupindar, iñehe ambuae-ae vahe iyavei opacatu ambuae tēi vahe ivi rupindar’ oyapave.

¹⁶ Evocoi eresepia diez tupri vahe sāchi mbahe ipi vai rese, ahe ndoyambotai chira cuña yaguasa-guasa tēi vahe; iyavei osequii tuprira seya; ohupara soho, ipare opara osapi.

¹⁷ Tūpa niha omondo ipiha pipe mbahe güemimbotar apo āgua ‘ahe toyemonguerēhi yuvireco omborerecuasa mondo āgua mbahe ipi vai upe; tomboaviye rane ité che remimombehugüer yuvireco’ oyapave.

¹⁸ Iyavei evocoi cuña yaguasa-guasa tēi vahe eresepia vahe, evocoi niha tecua guasu ivi pipendar mborerecuareta vireco vahe opovrive yepi” ehi Tūpa rembiguai cheu.

18

Babilonia viapi agüer

¹ Ipare asepia ambuae Tūpa rembiguai ipīrata vahe ogüeyi vahe iva sui. Vireco omborerecuasa ivate vahe, ahe sendigüer osesape tupri ivi rupi.

² Iyavei oñehe pīrata oico aipo ehi:

“¡Oviapi tecua Babilonia cute!

Carugar yuviroique sese, opacatu carugar naporai vahe iyavei vīrai vai nungar yuviroique sese.

³ Esepia niha, opacatu ambuae ivi rupindar inungar osavaipo vahe ndopoi potai eté yemboaguasasa sui, evocoiyase mborerecuareta ivi pipendar oyapo mbahe tēi yuvireco sese, iyavei mbahe mboepisar ivi pipendar oyemombahe eta imbahe porañete ai vahe pota raisa pipe sui yuvireco” ehi.

⁴ Evocoiyase asendu ambuae ñehesa iva sui ou vahe, ahe aipo ehi:

“Peyepipi evocoi tecua guasu sui, pe peico vahe cheundar evocoi yangaipa rese imboyoaēhi āgua.

Iyavei ñepei yepe taperupiti eme imbaherasisa.

⁵ Esepia niha, yangaipagüer oyepota ité ivave.

Tūpa evocoiyase oyemomahenduha mbahe-mbahe tēi sembiapogüer rese chupe.

⁶ Inungar ahe ambuae upe, ēgüe peye tupri avei chupe; pemboepi ñuvirio rupi mbahe sembiapogüer chupe; pemomirata catu mbahe igua ñuvirio rupi pemboyeseha imondo chupe;

⁷ pemondo setecuer mombaraisusa chupe, tiparaisu tahoyoya iyemondo-mondo tēi agüer iyemboetei ai agüer rese avei no.

Esepia niha, ahe aipo ehi opiha pipe oico:

‘Cohave che aguapi vite mborerecuar che reco nungar pipe.

Ndahei imer mano vahecuer che aico, iyavei ndacheparaisui chietera' ehi viña.

⁸ Sese niha aviýeteramo tēi oura mbaheerasisa chupe:

paraisusa, tieporēhi, manosa; ipare sapisara.

Esepia niha, yande Yar Tūpa mbahe mboavaisarēhi secoi, ahe, 'Tomano' ehi chupe" ehi.

⁹ Evocoiyase mborerecuar ivi pipendar yuvirecoi vahe co cuña resendarer, chupe oyemondo-mondo tēi vahecuer imbahe eta rese, oyaseho tēira yuvireco iyavei ndoyembovihal chira sese osepiase evocoi cuña rātachi yuvireco curi.

¹⁰ Opitañora amombrive osiquiyepave, iparaisusa sui aipo ehi tēira yuvireco:

"jNdeparaisu catu, tecua guasu Babilonia, nde reco pīrata vahe tie viña!

Esepia niha, co aviýeteramo tēi ou nde mombaraisu catusa" ehiru yuvireco.

¹¹ Evocoiyase ava mbahe mboepisar ivi pipendar yuvirecoi vahe, ahe avei oyaseho tēira iyavei ndoyembovihal chietera evocoi tecua rese yuvireco. Esepia niha, ndipo iri chietera que virocua vaheerā imbahe yuvireco ichui,

¹² co opacatu mbahe sepi vaheerā ahe: oro, guarepochi, ita iporañete ai vahe, mbohir sendi vahe, turucuar secose vahe, turucuar sendi vahe, iyavei pīraumbi vahe, pīra vahe no; iyavei opacatu-catu tēi ivirape siacua vahe; mbahe-mbahemi marfil apopri, ivira icatupri vahe apopri, bronze apopri, guarepochi apopri, mármol avei;

¹³ mbahe serocuapri yahu vahe canela, tembihu moiacuasa; itaisi, mirra, mbahe siacua vahe; uva ricuer, mbahe quira, trigo cuhi aviye vahe, trigo avei; iyavei mbahe mimba ovosii vahe no, ovesa, cavayu, cāretomi iyavei mbiguai no.

¹⁴ Aipo ehi tēira yuvireco co tecua guasu upe:

"jNderereco iri acoi mbahe ha erepota etepri vahe; iyavei eremocañi tēi apirēhi opacatu nde mbahe eta nde yemboeteisa avei!" ehiru.

¹⁵ Evocoiyase evocoi mbahe mboepisareta oyemombahe eta vahecuer co mbahe rese tecua guasu sui, ahe opitañora amombrive osiquiyepave iparaisusa repiase yuvireco. Oyaseho tēira iyavei ndoyembovihal tēi chira yuvireco no,

¹⁶ iyavei aipo ehi tēira yuvireco:

"jToo! jparaisú iteanga tecua guasu pendar!

Inungar tie cuña acoi oyemondo tupri vahecuer secoi cuese viña iyavei iturucuar suendi, pīra vahe; oro pipe oyemboetei vahecuer,

itami iporañete vahe pipe iyavei mbohir sendi vahe pipe oyemboetei vahe no.

¹⁷ jAviýeteramo tēi rumo opa ocañi imbahe eta ichui!" ehi.

Evocoiyase opacatu ava carite guasu pipendar rerecuar, ava imbehi ivirindar carite guasu roguatasar, i rupi oporaviqui vahe oyeupe nara mbahe rereco água, ahe opaño opita amombrive yuvireco ichui

¹⁸ iyavei co tecua rātachi repiase, ahese osapucaí pīrata tēi yuvireco: "jNdipoi eté niha yipisui tecua na ehi vahe!" ehi yuvireco.

¹⁹ Ipape imboasipave omondo ivi cuhi oācave yuvireco, oyaseho iyavei ndoyembovihal tēi, ipare osapucaí tēi yuvireco aipo ehi:

"jToo! jparaisu catu tecua guasu pendar!

Esepia niha, evocoi tecua guasu mbahe eta pipe sui ava i rupi oporaviqui vahe oyemombahe yar yuvireco viña.

jAviýeteramo tēi rumo opa ocañi!" ehi.

²⁰ Peyembovihan evocoi tecua rese, pe iva pendar, iyavei opacatu chupendar peico vahe, pe no Jesús apóstol peico vahe,

opacatu Tūpa ñehe mombehusar peico vahe avei no.

Esepia niha, co tecua omocañisa pipe Tūpa oyapo mbahe tupri pēu nara.

²¹ Ahese Tūpa rembiguai iva pendar seco pīrata vahe osupí ita inungar mbahe mbocuhisa, ipare omombo para guasu pipe aipo ehi:

"Na ehi aveira tecua guasu Babilonia mocañisa.

Imombopri secoira.

Ipape ndapesepia iri chietera apirēhi vaheerā" ehi.

²² "Ndasendusa iri chietera ocar rupi arpa moñehesar, mimbí moñehesar, iyavei mimbí guasu moñehesar avei no; ndererecoi chietera ava oporaviqui vaheerā, ndasendusa iri chiaveira ita mbahe mbocuhisa monarasa nde suindar.

²³ Iyavei ñepeí yepe que tataendi ndosesapei chietera ndeu, ndasendusai chiaveira ava aivu mendasa rupi, yepe niha nde ava upe mbahe mondosar seco pīrata etepri vahe opacatu rupi ereico viña.

Iyavei erembopa-mbopa tēi opacatú ambuae tecua rupindar eico nde payesa pipe" ehi Tūpa rembiguai chupe.

²⁴ Esepia niha, evocoi tecua guasu pipe oyecua Tūpa ñehe mombehusar ruvi, Tūpa pendar ava ruvi, iyavei opacatu ava yucapri vahe ivi pipendar ruvi avei.

19

¹ Co pare, asendu ava rehiñ ñehe pĩrata ivave aipo ehi vahe:

“¡Imboeteipri yande Yar tasecoi!

Poropĩsirosa, teco porañtesa iyavei ipĩratasa ahe yande Ru Tũpa suindar.

² Esepia niha, ahe oyapo mbahe supi eté vahe,

“Tocañi’ ehise co cuña oyemboaguasa-guasa tẽi vahe nungar tecua guasu upe evocoi niha oseco momara tẽi vahe ava ivi pĩpendar güeco rai pipe; ichui Tũpa osepi oyeupendar” ehi.

³ Ipare aipo ehi iri yuvireco no:

“¡Imboeteipri yande Yar tasecoi!

Esepia niha, evocoi tecua rãtachi ndopai chietera” ehi.

⁴ Evocoiyase veinticuatro tupri iva pendar icuaipri yuvirecoi vahe iyavei irungatu iva pendar yuvirecove vahe, ahe Tũpa mboeteisa pipe oyeaivi ivi rese yuvireco. Ipare aipo ehi yuvireco no: “¡Ēgũe tehi! ¡Imboeteipri yande Yar tasecoi!” ehi.

⁵ Evocoiyase Tũpa renda sui tupri oyeendu ñehesa aipo ehi vahe:

“¡Pemboetei yande Ru Tũpa opacatu peroya vahe, que seco ivi coti catumi vahe, que seco ivate vahe avei, pe pesiquiye vahe imboyeroya ãgual!” ehi.

Pieta mendasa Ovesami resendar

⁶ Asendu avei ava rehiñ ñehe, inungar acoi itu guasu riapu, ndoyavii avei osunũ guasu vahe aipo ehi:

“¡Imboeteipri yande Yar tasecoi!

Esepia niha, yande Yar Tũpa opacatu mbahe mboavaisarẽhi omboipi oporocuai.

⁷ Tayayemboviha catu yaico iyavei tayamondo yande viharetesa, yande sapucaisa yande Ru Tũpa upe.

Esepia niha, cũritei oyepota mendasa ari Ovesami upendar.

Sembireco evocoiyase opa oyemoingatu oico:

⁸ chupe ipotasa iyemunde ãgua turucuar secose vahe, ndiquihai, sendi vahe pipe.

Esepia niha, co turucuar secose vahe “Tũpa rese yuvirecoi vahe recocuer ihĩvi vahe’ oyapave aipo ehi” ehi.

⁹ Evocoiyase Tũpa rembiguai, “Na ere icuachia: ‘Sorivete catu acoi ava mendasave ichohopri yuvireco’ ere” ehi cheu. Iyavei aipo ehi cheu no: “Co niha Tũpa ñehesa supi tupri vahe ité” ehi.

¹⁰ Ipare añenopiha Tũpa rembiguai rovai imboetei ãgua. Ahe rumo aipo ehiño cheu: “Ēgũe erei rene. Esepia, che Tũpa rembiguai tẽi aico nde nungar iyavei nde rivireta nungar oguata vahe Jesús ñhengagũer rupi. Emboetei Tũpa” ehi.

Esepia niha, evocoi Jesús recocuer mombehugar moñehe ucasar, ahe niha acoi omombehu uca vahe Tũpa ñehe mombehugar upe.

Cavayu morochi vahe reroguatasar

¹¹ Evocoiyase asepia iva oyemboi vahe. Aheve aviyeteramo tẽi cavayu morochi vahe oyemboyecua, evocoiyase ava sese oyeupi vahe rer: “Ocuaita-omboaviye-tupri-vahe iyavei Supi tupri vahe” ehi. Esepia, güeco ivisa pipe oporocuai iyavei oyapo vavasa.

¹² Sesa evocoiyase ndayaviyei eté acoi tata rendigũer; iyavei oãca rese setá vireco oyeguaca, iyavei vireco terer icuachiapri oyese; ahe güeraño ité oicua.

¹³ Iturucuar evocoiyase imopirapri tuvĩ pipe; serer evocoiyase, “Tũpa Ñehe” ehi.

¹⁴ Sundao rehiñ iva pendar saquicuerive yuvirecoi. Iturucuar secose vahe pãve morochĩ vahe, ndiquihai vahe avei. Ahe cavayu morochi vahe harive yuvirecoi.

¹⁵ Iyuru pipe sui osẽ quise pucu saimbe vahe opacatu ambuae-ae tecua rupindar momara ãgua. Ahe oyocuai ra oamotarẽhisar guarepochi apopri opo pendar pipe. Iyavei osecoãhara inungar uva opive otiamĩ vahe yuvireco iyavei omboihura evocoi uva ricuer paraisu catusa resendar pipe. Ahese Tũpa mbahemboavaisarẽhi oñemoiro itera chupe.

¹⁶ Oturucuar popi rese vireco icuachiapri ohivipi rese avei aipo ehi vahe: “Mborerecuareta rerecuar guasu iyavei ava Yar ivate catu vahe” ehi.

¹⁷ Ipare asepia Tũpa rembiguai opũha vahe arisave. Ahe osapucai pĩrata opacatu vĩrai mbahe rohoguar upe oveve vahe iva rese: “¡Perio! ¡Peñemonuha Tũpa suindar carusa guasusave;

¹⁸ pehu co mborerecuareta roho, sundao eta rerecuar roho iyavei ava oico eté vahe roho, cavayu roho, ihari pendar roho avei, opacatu ava roho ava nimañecosai vahe roho, mbiguai roho, seco ivi coti catumi vahe roho, seco ivate vahe roho avei!” ehi.

¹⁹ Ahese asepia mbahe ipi vai iyavei mborerecuareta ivi pĩpendar osundao reseve-seve. Ahe oñemonuha yuvireco ovava ãgua evocoi cavayu hari pendar rese iyavei isundao rese avei no.

²⁰ Co mbahe ipi vai yipindar vahe soquendasa, oyoya evocoi Tūpa ñehe mombehugar angahu tēi rese. Ahe acoi oyapo vahe mbahe yavai rai vahe yipindar mbahe ipi vai rovaque, evocoi mbahe yavai rai vahe apo pipe ombopa-mbopa tēi ava, acoi seroyasar vireco vahe mbahe ipi vai rer oyese iyavei omboetei vahe sahanga yuvireco. Evocoiyase co mbahe ipi vai iyavei Tūpa ñehe mombehugar angahu tēi, ahe opa imombosa secove reseve ipa azufre ocai vahe pipe yuvireco.

²¹ Ambuae evocoiyase evocoi cavayu morochi vahe hari pendar yuru pipe sui osē vahe quise pucu pipe opa omano yuvireco. Evocoiyase opacatu virai mbahe rohoguar opa soho pipe oyemohitaro yuvireco.

20

Mil araviter resendar ñehesa

¹ Ipare asepia Tūpa rembiguai ogüeyi vahe ou iva sui ivicuar guasu ipicucu vahe mboypasar iyavei carena ipo guasu vahe opove vireco.

² Ipare oipisi mbahe ipi oporomocañi vahe mboi nungar aracahendar, ahe niha Caruguar secoi, Satanás serer vahe; ahe oicuhacua carena pipe mil araviter rupi imoi.

³ Ahese omombo ivicuar guasu ipicucu vahe pipe. Aheve osoquenda. Omondo sello soquenda rese opacatu ambuae-ae tecua rupindar mbopa-mbopa tēi iriñhi āgua rese acoi osupitise voi mil araviter. Coiye rumo mil araviter pare, imosesa raimi tēira.

⁴ Ipare asepia tenda, iharive setá ava oguapi yuvinoi evocoi oipisi vahe omborecuasa yuvireco ava upe mbahe rese porandu āgua. Iyavei asepia ava hā evocoi opa vahecuer oyasia ñaca yuvireco Jesús recocuer mombehuga sui tēi iyavei Tūpa Ñehengagüer mombehuga pipe sui tēi avei. Ahe ava nomboetei vahe mbahe ipi vai yuvireco; sahanga avei nomboetei yuvireco no; iyavei nomondo ucai vahe avei osiva rese serer yuvireco, opo rese avei. Ahe asepia opa ocuerayevi yuvireco. Ipare oporocuai Cristo rese mil araviter rupi yuvireco.

⁵ Ahe co yipindar vahe cuerayevisa. Ambuae ava omano vahe rumo ndocuerayevi iri eté yuvireco osupitise voi mil araviter.

⁶ ¡Sorivete catu acoi ava vireco vahe yipindar cuerayevisa yuvireco! ¡Esepia niha, ahe Tūpa upendar ité yuvireco! Imoñuviriosa manosa evocoiyase chupe ndipo iri eté. Ēgüe ehira rumo ahe Tūpa upe naraño ité pahi yuvirecoira, Cristo upe avei. Ipare mborerecuar yuvirecoira sese mil araviter rupi.

Caruguar recopisa

⁷ Acoi osupitise rumo mil araviter cute, ahese Caruguar yorasara soquendasa sui.

⁸ Ichui osēra opacatú ava ivi pipendar mbopa-mbopa tēi oico; osēra ivi Gog mbopa tēi āgua, ivi Magog mbopa tēi āgua avei. Ipare omonuhara vavasave nara isundao eta. Esepia niha, ahe sehii etepri yuvireco inungar ivi cuhi para guasu popi rupindar.

⁹ Ēgüe ehi yugüeru ati amombri sui, oyerepa tupri Tūpa recua rese yuvireco no, evocoi tecua Jerusalén sembiaisu rese avei. Tūpa rumo ombou tata iva sui, ahe ipipe opa tupri ité osapi.

¹⁰ Caruguar evocoiyase, ava mbopa-mbopa tēisar, ahe opa imombosa ipa azufre ocai vahe pipe. Aheve acoi opa imombosa mbahe ipi vai iyavei Tūpa ñehe mombehugar angahu tēi vahe avei no. Aheve iparaisura pītu, ari yuvireco apirēhi vaheerā.

Tūpa oguapira güendave ava recocuer rese porandu āgua ari ipa vahe pipe

¹¹ Evocoiyase asepia tenda imboeteipri, morochi vahe. Iharive oime ava oguapi vahe oī. Sovai ivi iyavei iva opa ocañi tupri tēi. Ndoyecua iri eté co coti rupi yuvireco.

¹² Ipare asepia omano vahecuer seco ivate vahe, seco mbegüemi vahe avei no opūha yuvinoha Tūpa rovai; ahese cuachiar opa ipipirasa yuvireco, iyavei ambuae cuachiar. Ahe cuachiar tecovesa resendar. Omano vahecuer upe evocoiyase porandusa evocoi cuachiar pipendar mbahe sembiapogüer rese.

¹³ Omano vahecuer opa yuvinose para guasu pipe sui, iyavei tehögüer recosa sui opa yuvinose; ichui opacatú mbahe sembiapogüer rese porandusa yuvireco chupe no.

¹⁴ Ipare manosa recua opa imondosa tata nungar ipa pipe. Evocoi ipa niha imoñuviriosa manosa.

¹⁵ Aheve opa imondosa acoi ndovirecoi vahe güerer icuachiapri cuachiar tecovesa resendar pipe.

21

Iva piasu iyavei ivi piasu

¹ Ipape asepia iva piasu iyavei ivi piasu. Esepia niha, yipindar vahe mbahe opa ité ocañi yuvireco, para guasu avei no.

² Che asepia tecua nimarai vahe, ahe Jerusalén piasu, evocoi ogüeyi vahe Tüpa sui ou. Opacatu imoingatusa tupri vahe, inungar acoi cuña omenda ägua oyemboeteti tupri omevi upe.

³ Ipape asendu ñehesa pĩrata tenda suindar aipo ehi vahe: “Tüpa cüritei oicove ava rehii pãhu rupi oico. Ahe oicove vaheã ité sese yuvireco yepi, ahe ava evocoyase chupe nara ité yuvirecoira. Ahe teieté niha secoira yuvireco chupe.

⁴ Ahe niha omombituhura opacatu ava resai; iyavei ava nomanoi chietera; ndoyasehoi chira yuvireco; ndipoi chira viharëhisa, tecoasisa avei chupe. Esepia niha, opacatu mbahe oime vahecuer yipindar, ndipoi iri eté” ehi.

⁵ Ahese evocoi uguapi vahe tenda harive oĩ, ahe aipo ehi cheu: “Che ayapo mbahe opacatu ipiasu vahe” ehi. Iyavei aipo ehi: “Eicuachía. Esepia niha, co ñehesa supi tupri vahe ité, evocoyase iya ité peyeroa sese” ehi.

⁶ Ipape aipo ehi cheu: “Opa ité yaviye. Che aviye acoi letra omboipi vahe A sui yepi, Z rupi. Esepia, che yipive vahe ité, ipandar avei. Acoi ava ihusei vahe amboihuño tẽira i tecovesa resendar ndasepii vahe pipe.

⁷ Acoi ava oyemoviracua vahe ité mbahe-mbahe tẽi apoẽhi ägua, ahe oipisira co mbahe opacatu omahera yuvireco. Evocoyase che aicora chupendar ité, ahe evocoyase che rahir ité yuvirecoira.

⁸ Acoi ava osiquiye ai vahe rumo che recocuer sui, ndache reroyai vahe, ava ndiporoepia potai vahe, oporoyuca vahe, acoi ava oyemboaguasa tẽi vahe, ipaye serai vahe, mbahe rahanga mboeteisar tẽi iyavei opacatu ava semira-mira tẽi vahe, ahe opara yuviraso ipa nungar azufre ocai pĩrata vahe pipe. Ahe niha imoñuvirio manosa” ehi.

Tecua Jerusalén piasu

⁹ Evocoyase ou ñepeí siete Tüpa rembiguai pãhu pendar acoi siete tupri igua riru, siete mbaherasi ipa vahe vireco vahecuer ipipe, ahe aipo ehi cheu: “Erio, amboyecua cuña omenda vahevi ndeu, Ovesami rembirecovi” ehi.

¹⁰ Evocoi che quer nungar pipe Espiritu osepia uca vahe cheu, che reraso ivitri guasu ivate vahesave. Aheve omboyecua tecua guasu Jerusalén nimarai vahe cheu, ogüeyi vahe Tüpa sui.

¹¹ Ahe tecua sendí iteanga Tüpa rendigüer pipe. Sendigüer evocoyase oyoya tupri ita iporañete vahe rese, oyoya avei ita jaspe serer vahe ipĩrerimi vahe rese.

¹² Oyerepa tupri tecua guasu rese ñachisa tuvichá vahe, ivaté iteanga iyavei vireco doce oquenda guasu. Evocoyase ñepeí-pei Tüpa rembiguai oquenda yacatu; iyavei Israel suindar doce tupri vahe serer icuachiasa oquenda yacatu rese.

¹³ Vireco niha mbosapi oquenda añihivei coti, mbosapi norte coti, mbosapi irohi coti iyavei mbosapi caharu coti no.

¹⁴ Tecua guasu ñchisa vireco doce tupri ita imoviracuasa. Ahe sese evocoi doce tupri yuvirecoi vahe Ovesami apóstol rer icuachiasa yuvireco.

¹⁵ Evocoi Tüpa rembiguai oñehe vahe cheu vireco vara oro apopri tecua rãha ägua, opacatu soquendipi rãha ägua, ñachisa rãha ägua avei no.

¹⁶ Tecua guasu pucucuer oyoya tupri ipigüer rese. Evocoyase Tüpa rembiguai osãha tecua guasu ruvichagüer; osãhase ipucucuer dos mil dos cientos kilómetro tupri ité; ipucucuer, ihivategüer iyavei ipigüer oyoya pãve tupri ité no.

¹⁷ Ipape osãha ñachisa: osãhase ipigüer sesenta y cinco metro tupri. Evocoi Tüpa rembiguai osãha ava rembiporu pipe.

¹⁸ Tecua ñchisa ahe ita porañete vahe Jaspe serer vahe apopri; tecua evocoyase oro pãve tupri, aviye vidrio secose catu vahe.

¹⁹ Ñachisa moviracuasa vireco opacatu ambuae ita-ita tẽi iporañete vahe pãve: yipindar iviracuasa jaspe, imoñuviriosa zafiro, imombosapisa ágata; imoirungatusa esmeralda;

²⁰ imbopoyandeposa ónice; imoñepeí ovasa, cornalina; imoñuvirio ovasa, crisólito; imombosapi ovasa, berilo; imoirungatu ovasa, topacio; imbopoyandepo ovasa, crisoprasa; co opoyandepo yovaivesa ahe jacinto; imoñuvirio yovaivesa, amatista.

²¹ Doce tupri vahe oquenda guasu ahe doce tupri mbohir; ñepeí-pei oquenda ñepeí mbohir sui yapopri. Calle guasu tecua aviter rupindar evocoyase oro pãve, inungar vidrio yande porẽhi tupri vahe ipipe.

²² Ndasepai eté evocoi tecua guasu pipe ñepeí yepe tüparo. Esepia niha, yande Yar Tüpa mbahe mboavaisarẽhi, Ovesami reseve yuvirecoi aheve.

²³ Evocoi tecua guasu ndovireco iri eté ari, yasi güesape ägua. Esepia niha, Tüpa ité osesape güendigüer pipe, iyavei Ovesami tataendi nungar secoi aheve yuvirecoi vahe upe.

²⁴ Sendigüer osesapera opacatu tecua rupindar iguatasa rupi, iyavei ava mbahe yar mborerecuar ivi pipendar opara güeru ombahe eta porañete vahe yuvireco chupe.

²⁵ Evocoyase soquendipi nimboyasai chietera ari yacatu rupi. Pítu ndipoi chiaveira aheve.

²⁶ Ipare opara aheve ambuae tecua mbahe eta, porañete vahe omoingue yuvireco;

²⁷ ava angaipa viyar rumo, Tüpa remimbotarēhi oyapo vahe, iporombopa serai vahe, ahe ndoyuviroiquei chietera aheve. Ēgüe ehi rumo acoi ava vireco vahe güerer icuachiapri Ovesami cuachiar tecovesa resendar pipe yuvireco, ahe güeraño yuviroiquera aheve.

22

¹ Ipare Tüpa rembiguai omboyecua iai tecovesa resendar cheu, típiu, oyecua tupri, osē vahe Tüpa iyavei Ovesami renda porañete vahe sui.

² Calle guasu mbiter rupi oso. Iyavei iai ique yacatú oime ivira tecovesa resendar, iha vahe doce yupagüer rupi ñepeí araviter pipe. Iyavei evocoi ivira ro avíye ai ava opacatu rupindar mbogüera água.

³ Ndipoi chietera aheve que mbahe tēivri pendar. Tüpa renda porañete vahe iyavei Ovesami renda avei chinira evocoi tecua guasu pipe. Aheve sembiguai eta omboeteira yuvireco.

⁴ Osepiara sova iyavei virecora serer osiva rese yuvireco.

⁵ Aheve ndipoi chietera pítu, iyavei ava aheve yuvirecoi vahe ndosecai chietera tataendi. Ndosecai chiaveira que ari güesape água yuvireco. Esepia niha, yande Yar Tüpa teieté osesapera. Ipare ahe ava mborerecuar apirēhi vaheṛá ité yuvirecoira sese.

Cōimi eté Jesucristo yeví água

⁶ Ipare Tüpa rembiguai aipo ehi cheu: “Co ñehesa supi tupri vahe ité, sese iya ité peyeroya. Iyavei yande Yar Tüpa acoi omboyecua tupri vahe mbahe oyesuindar oñehe mombehusar upe, ahe ombou güembiguai iva pendar mbahe omboaviye poyava voi vaheṛá mboyecua água viroyasareta upe” ehi.

⁷ “¡Ayeví poyava voira curi! ¡Sorivete catura acoi ava viroya vahe ñehesa Tüpa suindar mbahe oime vaheṛá resendar co cuachiar pipe!” ehi.

⁸ Che, Juan, asepia iyavei asendu ité co mbahe. Sendu pare voi, añenopiha evocoi Tüpa rembiguai rovai imboetei água viña.

⁹ Ahe rumo aipo ehiño cheu: “Aní ereñenopiha che rovai. Esepia niha, che Tüpa rembiguai tēi aico, nde nungar, nde rivireta nungar avei evocoi oñehe vahe Tüpa Ñehengagüer rese yuvireco, iyavei inungar opacatu viroya vahe co cuachiar pipendar icuachiapri yuvireco no. Tüpa catu pemboetei” ehi.

¹⁰ Aipo ehi avei cheu no: “Ereicuacui rene co ñehesa Tüpa suindar mbahe oime vaheṛá resendar sereco, evocoi icuachiapri cuachiar pipe. Esepia niha, ari cōimi secoi imboaviye água.

¹¹ Acoi ava mbahe tēi aposar, toyapoño mbahe tēi; iyavei acoi ava seco rai vahe, taseco raño ité oico; acoi ava seco tupri vahe rumo, ahe toyapoño mbahe tupri oico; iyavei acoi ava Tüpa upe oyemondo tupri vahe ité, ahe taseco tupriño avei oico chupe” ehi.

¹² “Supi eté ayeví poyavara, iyavei arura mbahe porerecosa ñepeí-peí ava rembiapogüer rupi-rupi amondo vaheṛá chupe.

¹³ Che aico inungar letra A iyavei Z, yipindar vahe, ipandar vahe avei no; yipive vahe ité apirēhi vaheṛá” ehi.

¹⁴ “Sorivete catura acoi ava omoatiro vahe güecocuer. Esepia, ahe oipisira ivira ha tecovesa apirēhi vahe resendar. Ipipe sui oiquera tecua guasu pipe.

¹⁵ Ava rehí ndiporeroyai vahe rumo opitapara ocarve tēi yuvireco, iyavei ava ipaye serai vahe, oyemboaguasa-guasa tēi vahe, oporoyuca vahe, mbahe rahanga upe tēi oyerogui vahe, iyavei opacatu ava oipota rai vahe oporombopa-mbopa tēi água yepi” ehi.

¹⁶ “Che, Jesús, amondo che rembiguai iva pendar mbahe mombehu água opacatu che reroyasar upe oñemonuha vahesa rupi-rupi. Che aico mborerecuar guasu David suindar. Iyavei aico inungar yasitata guasu sendi vahe añihiveindar no” ehi cheu.

¹⁷ Espíritu Santo iyavei Ovesami rembireco aipo ehi: “¡Perio!” ehi ava upe yuvireco. Iyavei acoi ava osendu vahe ifehe, “¡Perio!” tehi ambuae ava upe yuvireco. Iyavei acoi ava ihusei vahe, toyugüeraño; acoi ava oipota vahe, toipisi i tecovesa resendar ndasepi vahe yuvireco.

¹⁸ Opacatu acoi ava osendu vahe co ñehesa Tüpa suindar mbahe oime vaheṛá resendar icuachiapri co cuachiar pipe yuvireco, ahe chupe, “Peicua catu” ahe. Amove que ava co mbahe resendar omboyeapí iri vahe, ahe chupe Tüpa omboyeapí aveira co cuachiar pipendar mbahe-mbahe tēi imombehupri.

¹⁹ Amove que ava virocua vahe co cuachiar pipe sui ñehesa Tūpa suindar, Tūpa avei evo-coiyase ndoipotai chira chupe co cuachiar pipe imombehupri ivira ha tecovesa resendar rereco āgua iyavei co tecua maranehi pipe sei que āgua.

²⁰ Acoi co mbahe mombehusar aipo ehi: “Supi eté ayevi poyavara” ehi.

Ēgüe tehi ayase. ¡Erio, che Yar Jesús!

²¹ Yande Yar Jesucristo tape rovasa opacatu. Aviye, aipo rupive.